


Yus Papí: Shuarjai
Yus Yamaram Chicham
Najanamu



New Testament in Shuar (ECjiv:Shuar)

Yus Papi: Shuarjai Yus Yamaram Chicham Najanamu

New Testament in Shuar (EC:jiv:Shuar)

copyright © 2012 Wycliffe Bible Translators, Inc.

Language: Shuar

Translation by: Wycliffe Bible Translators, Inc.

Shuar [jiv], Ecuador

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Shuar

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022

fb10d1f0-e2d5-5d8e-8a74-10846708c857

Contents

MATEU	1
MÁRKUS	69
RÚKAS	112
JUAN	185
TÚRAMU	235
RÚMANAM	306
1 KURINTIUNAM	333
2 KURINTIUNAM	361
KARASEANAM	380
IPISIUNAM	391
JIRIPIUSNUM	401
KURUSENAM	408
1 TISARÚNIKIANAM	415
2 TISARÚNIKIANAM	422
1 TIMIUTÉUN	426
2 TIMIUTÉUN	434
TITIUN	440
JIRIMIÚÑKAN	444
ISRAERNUM	446
SÁNTIAK	467
1 PÍTIUR	475
2 PÍTIUR	484
1 JUAN	489
2 JUAN	496
3 JUAN	497
JÚTAS	498
APUKARÍPSIS	501

Yúsan Shiir Chichamen MATEU aarmia nu

Jesukrístu weatrí
(Rúkas 3.23-38)

¹ Jesukrístu weatrí ju áiniawai. Tura ashí nan̄kaamas ti uunt weat Tawitcha Apraámsha áiniawai. ² Apraáma uchirí Isak. Tura Isaka uchirí Jakup. Jakupa uchirísha Jutá ni yachijiai. ³ Tura Jutá uchirín Páresan tura Sarancha Tamar jurermiayi. Páresa uchirísha Esrum, nuna uchirísha Aram. ⁴ Nuna uchirísha Aminiatáp. Nuna uchirísha Nasun. Nuna uchirísha Sarmun. ⁵ Sarmunka uchiríncha Púusan Raap jurermiayi. Puusa uchirín Uwitian Ruut jurermiayi. Uwitia uchirísha Isai. ⁶ Nuna uchirísha uunt akupin Tawit. Uunt akupin Tawitia uchiríncha Sarumúnkan Patsepa jurermiayi. Patsepasha emka Uríasa nuweeyayi.

⁷ Sarumúnka uchirí Rupuam. Nuna uchirísha Apías. Nuna uchirísha Asa. ⁸ Asa uchirísha Jusapát. Nuna uchirísha Juram. Nuna uchirí Usías. ⁹ Usíasa uchirí Jutam. Nuna uchirí Akas. Nuna uchirí Esekías. ¹⁰ Esekíasa uchirí Manasés. Nuna uchirí Amun. Nuna uchirí Jusías. ¹¹ Jusíasa uchirí Jekunías ni yachí armia nujai. Nuí Papirúnianmaya shuar Israer shuaran mesetjai nupetkar Papirúnia nunkanam achirar júkiarmiayi.

¹² Nu ukunman̄ka Jekuníasa uchirí Saratiár akiiniamiayi. Tura nuna uchirí Surupapír. ¹³ Surupapíra uchirí Awiut. Nuna uchirí Iriakím. Nuna uchirí Asur. ¹⁴ Asura uchirí Satuk. Nuna uchirí Akim. Nuna uchirí Eriut. ¹⁵ Eriuta uchirí Ereasár. Nuna uchirí Matan. Nuna uchirí Jakup. ¹⁶ Jakupa uchirí Jusé Marí áishriya nu. Marisha Jesusan jurermiayi. Nu Jesuska shuáran uwemtikiartin asa Kristu tu anaikiamuiti.

¹⁷ Tuma asamtai Apraámnumia Tawitnium Jesusa weatrí katurse (14) áiniawai. Tawitniumiasha Papirúnianam jukimiunma nuísha katurse weat áiniawai. Papirúnianam jukimiunmayasha Krístunam ataksha katurse áiniawai.

Jesukrístu akiiniamu
(Rúkas 2.1-7)

¹⁸ Jesukrístu akiiniamu júnis ámiayi. Ni nukurí Marí Jusejai anajmanairuyayi. Tura tsaníatsain̄ Yusa Wakaní ajaprumtikiamiayi. ¹⁹ Ajaprukматаisha Jusé Marin iniatsaatsuk nin ajapatniun enentáimpramiayi. Tura ti péñker asa aya iniaisatniun wakerimiayi aents nekainiatsain̄. ²⁰ Nuna tu enentáimia pujái, mesekranam Yusa suntari tarí chicharuk tímiayi “Juséa,

ame weatrum Tawitchakait. Tuma asam Marijjai nuatnaiki-
atin ashamkaip. Uchin jurertatna nuka Yusa Wakaníniuiti.
²¹ Uchin áishmaṅkan takustatui tura nuna naari JESUS anaiki-
attame. Ashí ni shuárin ni tunaariya uwemtikkiartin asa
Jesus anaikiatniuiti” tímiayi.

²² Yus ni etserniurjjai yaunchu timia nu uminkiat tusa nu
túrunamiayi. Juna áamtikramiayi:

²³ “Nuwa natsa ajapruktatui tura uchin takustatui. Nuna
náarisha Emanuér anainiaktatui.” Tu áarmaiti.
Emanuérsha nu chichamnum “Yus iijjai pujuwiti” tawai.

²⁴ Jusesha mesekranmaya shintiar Yusa suntari timia
núnisan Marin nuatkamiayi. ²⁵ Tura uchin júreatsain
tsaninchamiayi. Tura jurermatai uchin Jesus anaikiamiayi.

2

Ti neka apach Jesusan eakarmiania nu

¹ Jutía nunkanam Pirin pépru ana nui Jesus akiiniamiayi.
Nuisha nú nunka akupniuri Irutisauiyayi. Akiiniamtai ti
neka apach nantu tátainmaaniya Jerusaren péprunam táarmiai.

² Taar inintruiniak “¿Israer shuara úunt akupniuri tui akiini-
ait? tiarmiayi. Nantu tátainmaani pujaati ni yaari wáinkiamji.
Tura tikishmatratatui tusar winiaji” tiarmiayi.

³ Irutis nuna antuk nushaa enentáimpramiayi. Tuma
asamtai ashí Jerusarennumia shuarsha antukar nushaa
enentáimpramiayi. ⁴ Irutis nuikia ashí Israer-patri

uuntrincha tura yaunchu akupkamun jintinniuncha
untsukarmiayi. Tura Kristu akiiniatniurin inintrusmiayi.

⁵ Tutai chichainiak “Jutía nunkanam Pirin pepru ana nui
akiiniatniuiti, tiarmiayi. Yaunchu Yúsnan etserin tu áaruiti:

⁶ “Jutía nunkanam, Pirin pepru, ishitiápchich ana nuyá nekas
uunt akupin winittiwai. Nii ashí Israer shuaran, Wíi
shuar ásarmatai, péñker wáinkiatwai,” tawai Yus.” Tu
tiarmiayi.

⁷ Nuna tuíniakui Irutis ti neka apachin úusan, urutía yaa
emka wáinkiamarum tusa aniasarmiayi. ⁸ Nuyá Pirinnum
akupeak “Nui werum uchi péñker inintrusrum wáinkiatarum.
Tura wáinkiarum ujatkatatum. Wisha werin tikishmátuutaj”
tímiayi.

⁹⁻¹⁰ Tutai ti neka apach wearmiayi. Tura yaa, yajaya
wáinkiamiania nu, tuke eem wémiayi. Tura yaan wáinkiar ti
wararsarmiayi. Tura nú yaa uchi pujumia nui ejeniarmiayi.

¹¹ Jeá wayawar uchincha ni nukuri Marijjai wáinkiamiai.
Tura uchin tikishmatrarmiayi. Nuyá ni kajuntriyan kurin-
cha, mirá kunkuinniasha, chíkich kunkuinniasha súarmiayi.

¹² Nuyá mesekranam Yus “Irutisaini weerap” tutai chíkich jintianam wakеткиarmiayi.

Ejiptunam pisaamu

¹³ Ti neka apach waketrantai Yusa suntari mesekranam Jusen ujakmiayi. “Nantakim uchi ni nukuríjjai Ejiptu nunkanam jukim nuí pujustá. Irutis uchin máataj tusa eaktatui. Tura ukunam ankant ajasmatai ujaktajme” tímiayi.

¹⁴ Tutai Jusé kurat shintiar nú káshik uchincha nukuríjjai Ejiptunam jukimiayi. ¹⁵ Irutis jáatsain nuí pujusarmiayi. Ejiptunam pujusmatai Yus yaunchu timia nu uminkiamiayi. Iis, Yúsnan etserin aak tímiayi:

“Ejiptunmayaan winia Uchirun untsukmajai.”

Tu áarmiayi.

Irutis uchin máawarat tusa akupkamu

¹⁶ Irutissha ti neka apach nin ananka yajá waketrán nekáa ti kajekmiayi. Ti kajek ashí áishmanchin Pirinnumsha tura yantamach pujuarmia nunasha maawaarat tusa akupkamiayi. Ti neka apach ujakmia nuna enentáimias ashí jimiara uwin takakun tura nú uchichin máawarat tusa akupkamiayi. ¹⁷ Nuka Yusnan etserin Jeremías aarmia nu uminkiamiayi. Juna áarmiayi:

¹⁸ “Ramá nunkanam ti úutainiak uur ajainiawai. Raker ti uutu asa atsankrachminiaiti ni uchirí jákarmatai.” Tu áarmiayi.

¹⁹ Tura Irutis jakamtai Yusa suntari mesekranam Jusen ujakmiayi. ²⁰ “Uchin máataj tiarmia nuka jákarai. Yamaikia ataksha uchi ni nukuríjjai jukim Israer nunkanam wakеткиtia” tímiayi. ²¹ Tutai Jusé nantaki uchincha nukuríjjai jukin Ejiptunmayaan Israer nunkanam wakеткиmiayi. ²² Túrasha Irutisa uchirí Arkiráu Jutía nunkanam uunt akupin ajasun nekáa nuí wétinian aránkamiayi. Mesekranmasha ujakma asa nuí pujutsuk Kariréa nunkanam wémiayi. ²³ Nuí jeá Nasarét péprunam pujusmiayi. “Nasarétnumia átatui” Yusnan etserin yaunchu tu etserkamu nujai uminkiamiayi.

3

*Imiakratin Juan atsamunam etserkamiania nu
(Márkus 1.1-8; Rúkas 3.1-9, 15-17; Juan 1.19-28)*

¹ Nuyá imiakratin Juan Jutía nunkanam aents atsamunam etserki támiayi. ² “Enentáim yapajíatarum. Tsawant ishichik ajasai Yus juí akupin ajastin.” Tu etserkamiayi.

³ Nú Juan kan yaunchu Yúsnan etserin Isayas juna áarmiayi:

“Shuar atsamunam aents untsumui. Untsumuk “Atumí enentái Uunta jintí iwiarturtarum tura naka awajsa-tarum” tawai.” Tu áarmiayi.

⁴ Nu Juansha kamiyu ure najantramun entsauyayi. Emen-mamkesha nuapeyayi. Tura yutai-titikriátsnasha chinijjai yúuyayi. ⁵ Tura Jerusaréñ péprunmaya shuarsha tura ashí Jutía nunkanmaya shuarsha Jurtan entsanam matsamiarmia nú shuarsha mash Juánkan tariarmiayi ni chichamen an-turkatai tusar. ⁶ Tura ni tunaarín paant etserkarmatai Juan Jurtan entsanam imiainiarmiayi.

⁷ Juansha Paríséuncha Satuséuncha imiatti tusa wininian wáiniak tímiayi “Napia áaniutirmincha, ¿ya atumniasha ti asutniátniunmaya uwempratniuncha ujatmakmarum? tímiayi. Asutiátin tsawant ishichik ajasai. ⁸ Tuma asamtai enentáim yapajíámuítikiuínkia péñker wekaamurmíjjai paant iniakmastarum. ⁹ Atumsha “Íikia Apraám weeaitji” tu enentáimtumasairap. Nujai uwemprashtatrome. Yus wakerakka ju kayan Apraáman tirankí najankainti, tímiayi. ¹⁰ Numi ajaktinia áintsan kampuwarín jacha atuttsamuiti. Tura numi péñker nereatsna nuka tsupikia jinium apeamu ártatui. ¹¹ Wikia aya entsajain imiajrume atumi enentái yapajíáwakrumin. Antsu winia ukuruí winiana nuka péñker awajtamsataj tusa imiantinia áanis tura jáa áanis Yusa Wakanin enketramprattarme. Wijjai nankaamantu asamtai wikia tsuntsumpruan ni sapatrínkisha atitrachminiaitjai. ¹² Aruusa nerejai túruinia áintsan átatui. Awajtiutairín achikiuiti tura nujai saepen awajtittiwai. Tura neren péñker ikiustatui, antsu saepenka jinium apeattawai. Nu jisha tuke kajinchaiti.” Tu tímiayi Juan.

Juan Jesusan imiaimiu amia nu

(Márkus 1.9-11; Rúkas 3.21-22)

¹³ Nuyá Jesus Kariréa nunkanmaya winis Jurtan entsanam támiayi Juan imiatti tusa. ¹⁴ Juansha emka nakitiak Jesusan tímiayi “Ame winia imiatminiaitme. Túrutamniaiatmesha ¿urukamtai winia tarutnium?” tímiayi.

¹⁵ Tura Jesus tímiayi “Ánsan asati yamaikia. Núnisrik ashí Yus akupkamu umirkatniuitji.” Tutai Juan iniaisamiayi. ¹⁶ Tura Jesus imiani entsaya jíinkímtai nayaimpí uranmiayi. Tura Yusa Wakaní yámpitsa áintsan Jesusan tarimiayi. Niisha wáinkíamiayi. ¹⁷ Túramtai nayaimpinmaya Yus chichaak “Juka winia Uchiruiti. Ti aneamuiti. Tí shiir enentáimtajai” tímiayi.

4

Uunt iwianch Jesusan anankataj tímiania nu

(Márkus 1.12-13; Rúkas 4.1-13)

¹ Nu túrunamtai Yusa Wakaní Jesusan iwianchjai nekap-mamtiksatts aents atsamunam jukimiayi. ² Nuí kuarenta (40) tsawant, káshisha tsawaisha yurumtsuk pujak tsukarmi-ayi. ³ Nuí uunt iwianch Jesusan nekapsataj tusa tarí tímiayi “Nekas Yusa Uchirínkiumka ju kaya apatuk najanata.”

⁴ Tutai Jesus tímiayi “Yus-Papinium áarmaiti: “Aents aya apatkujain iwiaaku pujuschamniaiti. Antsu Yus táman enentáimtuiniak nekas iwiaaku pujusartatui” tawai” tímiayi.

⁵ Tutai uunt iwianch Jerusaréñ péprunam jukí Yusa Uunt Jee cháikín iwiak ⁶ tímiayi “Nekas Yusa Uchirínkiumka juya akaikim iniaata. Kame Yus-Papinium áarmaiti:

“Yus ni suntarín akatar akúptúrmaktatui. Nawemin kayanam ajiintsumniñ wenkurmaktatui” tawai” tímiayi.

⁷ Tutai Jesus tímiayi “Núnisan Yus-Papinium áarmaiti: “Ame Úntrum Yus “Nekapsataj” tiip” tawai” tímiayi.

⁸ Ataksha uunt iwianch naint yakí wájakmanum iwiakmiayi tura nuyá ashí nunkanmaya péprun shiira nuna iniaktusmi-ayi. ⁹ Tura tímiayi “Winia tikishmatrurakminkia juna mash amastatjai.”

¹⁰ Tutai Jesus tímiayi “Werumta, uunt iwianchi. Yus-Papinium aarma awai:

“Ame Úntrum Yúsak tikishmatrata tura Niñki shiir awajsata” tawai” tímiayi.

¹¹ Tutai uunt iwianch Jesusan ikuak wémiayi. Túramtai Yusa suntari taria atsumamuriñ súsarmiayi.

*Jesus Kariréa nunkanam etserkamiania nu
(Márkus 1.14-15; Rúkas 4.14-15)*

¹² Juan sepunam enketui taman antuk Jesus Kariréa nunkanam wémiayi. ¹³ Tura Nasaréñ péprunam pujutsuk Kapernáum péprunam we pujusmiayi. Kapernáumsha Kariréa antumianka kánmatkariñ pujumiayi. Ti yaunchusha Jakupu uchiri Sapurúnsha tura Niptarísha nu nunkanak nuí pujus-taitsar achikiaruyayi. ¹⁴ Jesus nuna túramtai yaunchu Yúsna etserin Isayas aarmia nu uminkiamiayi. Juna áarmiayi:

¹⁵ “Sapurúnsha Niptarísha nayaantsanam tíjiuch Jurtan entsa amainini nunkan achikiarmiayi. Nuka Kariréaiti Israer-shuarcha matsatainia nuí. ¹⁶ Nu aents kir-itniunam pujuiniayatan ti tsáapninian wáinkiarmai. Jákatniunam pujuiniaí tsáapin tsáapnirmiayi.” Tu áarmaiti.

¹⁷ Nuyá Jesus étseruk tímiayi “Tunaarum enentáimturum enentáim yapajiátarum. Ju nunkanam Yus akupkatin tsawant ishichik ajasai.”

*Jesus kuaru aents namakan achinian ni unuiniamurī
ajasarat tusa achikmiania nu*

(Márkus 1.16-20; Rúkas 5.1-11)

¹⁸ Jesus Kariréa antumianka kánmatkarin wesa jimiara áentsun nuámtak yáchinniun wáinkíamiayi. Chikichik Antre-sauyayi, chikichcha Semunkayayi. Nu Semun núnisan Pitru náartiniuyayi. Namakan achin ásar namakan nekajai nankíak yujaarmiayi. ¹⁹ Nuna Jesus wáinkiar tiarmiayi “Nemartus-tarum. Túrakrumin shuarsha Yusna arti tusan yamáí namak achíarmena núnisan shuaran-eau awajsatjarme.” ²⁰ Tutai ni nekarin ikiukiar Nin nemariarmiayi.

²¹ Nuyá ishichik wésan ataksha nuámtak yachinniun wáinkíamiayi. Jakupu Juanjajai mai Sepetéu uchirí ármiayi. Niisha kanunam enkemsar ni nekarin ni aparíjajai iwiarainiak pujuriarmiayi. Tura Jesus “Nemartusta” tutai ²² nu chichamaik kanuncha tura aparíncha ikiukiar Jesusan nemariarmiayi.

Jesus untsurí shuaran jintintiamiania nu

(Rúkas 6.17-19)

²³ Ashí Kariréa nunkanam Jesus Israer-shuar iruntainiam etserki wémiayi. Yus ju nunkanam akupkatin chichaman etserkamiayi. Tura untsurí sunkurjajai jáinian ashí tsuármiayi. ²⁴ Ashí Siria nunkanam Jesus tsuákratman nekaawar ashí nánkamas sunkurjajai wáitin armia nuna Jesusan tsuarti tusa itiariarmiayi. Ashí jaancha, najaimiancha, yajauch wakantrukuncha, wáuruncha, tampemaruncha Jesus tsuármiayi. ²⁵ Tura untsurí shuar Jesusan nemariarmiayi. Kariréa nunkanmayasha, Tekapurisnumiasha, Jerusarén péprunmayasha, Jutía nunkanmayasha, Jurtan entsa amainiyasha Jesusan nemariarmiayi.

5

Náinnium Jesus etserkamu

¹ Jesus untsurí shuar káunkarun wáiniak náinnium waka nuí pujusmiayi. Tura ni unuiniamurísha taar pujusarmiayi.

² Nuyá Jesus júnis unuiniamiayi.

Warastin ainia nu
(Rúkas 6.20-23)

³ “Ame wakanim atsumamu nekamarum kakaram ajas-rum warastarum. Tuma asarum Yus akupeamunam pachi-inniuitrume. ⁴ Kúntuts pujarum nu warastarum. Yus at-santamprattarme. ⁵ Pééjchach enentáimtumarmena nu waras-tarum. Yus ashí nunkan amastatrume. ⁶ Eseer wekasat-j tusa aya kitiamarum nu warastarum. Yus imiktam-prattarme. ⁷ Waitnenkratniutiram warastarum. Yus wait-nentramprattarme. ⁸ Pénker enentáimniutiram warastarum. Yus wáinkiáttarme. ⁹ Chicham iwiarin árum nu warastarum. Yusa uchirí turamartatui. ¹⁰ Pénker túrakrumin yajauch awajtamainiakui warastarum. Yus akupeamunam pachi-iniuitrume. ¹¹ Wíi shuar asakrumin katsekramainiakuisa, itit awajtamainiakuisa, tura ashí tsanumprutmainiakuisa warastarum. ¹² Núnisan yaunchu Yúsnan etserin armia nunasha túrawarmiyi. Túramtai shiir enentáimkiuram waras-tarum. Nayaimpiniam ti pénker akinkiattarme’ tímiayi.

Ju nunkanam átum tsáapninia áintsarum tura weeya áintsarum árum

(Márkus 9.50; Rúkas 14.34-35)

¹³ ‘Átumka ju nunkanam wee ana áintsanketrume. Tura wéeaítat jeakchaitkiunka míchuiti. ¿Nusha itiur yuámniak ati? Antsu ántraití. Tuma asamtai aa najatai tepet tusar ajapashtinkiait’ tímiayi.

¹⁴ ‘Átumka ju nunkanam shiripkia áintsanketrume. Náinniumka pepu umkachminiati. ¹⁵ Núnisan shiripik ekeemakam kajunnum enkeatsme. Antsu yakí sukúatsmek ashí jeanam ana nu paant atí tusam. ¹⁶ Núnisan atumsha Yusjái pénker túramu paant atí. Tura ashí aents nuna iisar niisha Yus Apan shiir awajsartatui’ tímiayi.

Yaunchu akupkamun pachis Jesus unuiniamiania nu

¹⁷ ‘Muisais akupkamuncha tura yaunchu Yúsnan etserin etserkarmia nuna ántar awajsattawai” turutiirap. Antsu nuna Wikia umiktaj tusan táwitjai. ¹⁸ Nekasan tájarme. Ashí túrunatniua nu amúatsain nu akupkamu ishichkisha yapajniáshtatui. Nayaimpisha tura nunkasha tuke amúatsain nu akupkamusha amuukashtatui. ¹⁹ Nu asamtai shuar chikichik akupkamun, yúpichuch ana nunaksha, umirchakka tura chikich shuaran umirkashtinian unuinia akka Yus nekas akupin paant ajastatna nui nú shuar uunt áhattawai. Antsu ashí shuar akupkamun umiana nu tura chikich shuaran umirkatniun unuiniana nusha Yus nekas akupin paant ajastatna nui, nu shuarka uunt átatui. ²⁰ Tuma asamtai Yus akupeamunam pachiinkiatat tákumka Paríséujái nankaamas tura akupkamu jintinniuujái nankaamas eseera wekasat-niuitrume’ tímiayi.

*Kajeamun pachis Jesus unuiniamiania nu**(Rúkas 12.57-59)*

²¹ ‘Yaunchu tiniu armia nu ántichukaitrum: “Maṅkartuawairap. Maṅkartana nuka asutniátniuiti” tiniu ármiai. ²² Tura Wisha tájarme: Shuar ni yachin aya kajerakka nusha asutniátniuiti. Ni yachin kátsekea nuka akupniunam junaktiniaiti. Tura ni yachin “netse” tákunka jinium akupnakminiaiti.’

²³ ‘Tuma asamtai Yus susataj tusam wakerakum tura ame yatsum ámin itit enentáimturman enentáimpramka, ²⁴ suamu nuí ikiuakum emka ame yatsum werim níijiai iwiarata. Turam waketkim Yus suam nu susata.’

²⁵ ‘Shuar úuntnum júramkuinkia jintian wesam níijiai iwiarata úuntnum ejetamsain. Túrachakminkia úuntnum surutmaktatui tura niisha suntarnum surutmaktatui tura sepunam enketmattawai. ²⁶ Tura nekas tajai, nuí enkemamka ashí rearchisha akikmachkumka jíinkishtatme’ tímiayi.

Tsanirmatniun pachis Jesus unuiniamiania nu

²⁷ ‘Yaunchu tiniu armia nu ántichukaitrum: “Tsanirmawaip.” ²⁸ Tura Wisha tájarme: Shuar nuwan tsanirmataj tu iiska nuikia ni enentáin tsanirmayi.’

²⁹ ‘Tuma asamtai ame jimi tunaanum yajauch awajtamkuinkia ukuinkiam yajá ajapata. Ashí ame ayashim jinium esaatsain aya chikichik ayashmi muchitmari emesratin péñkeraiti. ³⁰ Ame ewejmesha untsuurmetiat tunaanum ajunmakuinkia tsupikiam yajá ajapata. Ashí ame ayashim jinium esaatsain aya chikichik ayashmi muchitmari emesratin péñkeraiti.’

*Nuwa ajapatniun pachis Jesus unuiniamiania nu**(Mateu 19.9; Márkus 10.11-12; Rúkas 16.18)*

³¹ ‘Núnisan yaunchu tiniu ármiai: “Shuar ni nuarin ajapatniun wakera nuka papí najana susati.” ³² Tura Wisha tájarme: Shuar ni nuarin tsanirmachun ajapeakka nuwan tsanirmamtikiaiti. Tura ajapamujai nuatnaiyakka nuka tsanirmaiti.’

Jesus aya nekasa nu titinian unuiniamiania nu

³³ ‘Núnisan yaunchu tiniu ármiai: “Yusa naari pachisan turattajai” tákumka nekas takamtsuk umiktiniaitme.” ³⁴⁻³⁷ Tura Wisha tájarme: Áyatik “Ee” tákumka tura “Atsá” tákumka wáitrutsuk nuke titiá. Támena nu nekas umiktaj takum ame nú arant pachistiniaitkiumka nuka yajauchiiti, iwianchnumiaiti. Ti nekas tajai tusam nayaim pachischatniuitme. Nuka Uunt Yus pujutainti. Nunkasha pachischatniuiti Yusa tarimtairi asamtai. Jerusaren péprusha pachischatniuiti Uunt

Akupin pujutai nuĭ asamtai. Múukmesha pachischatniuitme. Chikichik intiashkesha pújusha mukusasha awajsachmini-aitme. Áyatik nekasa nu páchitsuk titiá.'

Ikkiatniun pachis Jesus unuiniamiania nu
(Rúkas 6.29-30)

³⁸ 'Yaunchu tiniu armia nu ántichukaitrum: "Shuar máanikiar jĭĭ apujtukka niisha apujtuktiniaiti. Tura naj akarkasha ni naisha akarkatniuiti." ³⁹ Tura Wisha tájarme: Yajauch shuar taritirap. Antsu ame yapimin ijiutmamtai áatú yapimsha tsanĭkatkata. ⁴⁰ Tura pushirmin jurutramkitiaj tákuisha sakurmesha susata. ⁴¹ Tura káarkancha chikichik kirumitruk jurutkitia túramkui ámeká jimiará kirumitru ejeeta. ⁴² Seatmana nu susata. Ikiatmakuisha páchitsuk ikiasta.'

Nemasrĭ aneetniun Jesus unuiniamiania nu
(Rúkas 6.27-28, 32-36)

⁴³ 'Núnisan tiniu armia nu ántichukaitrum: "Ame shuarum aneeta tura nemasrumka kajerkata." ⁴⁴ Tura Wisha tájarme: Nemasrum aneetarum. Yajauch chichartamna nusha shiir awajsata. Nakitramana nusha nawamkata. Tura katsekramainiana nu tura yajauch awajtamainiana nusha Yus áujtusarta. ⁴⁵ Atumsha nu túrakrum atumí Aparĭ nayaimpiniam pujana nu túrana áitkiasrumek túarme. Iista, Yus yajauch shuarnumsha péñker shuarnumsha tsáapin awajmatkiatsuk. Núnisan yumincha yajauch shuar pujuiniamunmasha péñker shuar pujuiniamunmasha yútumtiktsuk. ⁴⁶ Aya atumin anenmainia nuke aneakmesha ĭyaki akirmakat? Yajauch shuarsha nuna túrin áiniawai. ⁴⁷ Aya ame yatsumek shiir chichaakmeká ĭwarí péñkerak túram? Yus-shuarchasha nuna túrin áiniawai. ⁴⁸ Nu asamtai atumí Aparĭ Yus nayaimpiniam pujana nujai métek ti péñker átiniaitrume.'

6

Pénker túratniun Jesus unuiniamiania nu

¹ 'Ashí ĭimiainiaĭn aya shuar iirsarti tusarum Yusna nu takasairap. Tu takaakrumniĭkia Yus Apa nayaimpiniam pujana nu penké akirmakchattarme. ² Nu asamtai shuar atuma nu yaiyákmeká ashí shuar ujakairap. Anañkartin ainia nuka iruntainmasha tura pepru jintí wekasasha ashí ĭimiainiaĭn shiir túrajai tusar nuna túrin áiniawai. Junasha "pénker túrawai" tu enentáimturarti tiniu ásar Yus akiátsaĭn aya tu enentáimturmajaiĭn akinkiaruiti, nekas tajai. ³ Antsu átumka

atsumainia nu yaiyakmeka penké úukam túrata. Chikichk-
isha nu yáinman nekaashti. ⁴Úukam túrakminkia ame Apa Yus
uukman wainia nu, nuna akirmaktatui.'

Yus áujsatniun Jesus unuiniamiania nu
(Rúkas 11.2-4)

⁵ 'Atumsha Yus áujeakrumsha ántar chichamtin ainia núnis
áujsairap. Nu shuarka iruntainmasha tura pepru jintísha
shuar iirsarti tusa wajakiar Yúsan áujin áiniawai. Nekasan
tájarme, Yus akíatsain aya nu iismajain akinkiaruiti. ⁶ Tura
ame Yus áujeakmeka ame kuárturmin wayam waiti epenim nui
amek ame Apa Yus áujsata. Nuna ame Apa Yus uuka túramu
waitma asa akirmaktatui.'

⁷ 'Yus áujeakmesha ántram esaram áujsaip. Yúsan
nékainiatsna nuka "Esaram áujeakuinkia Yus anturtuktatui"
tu enentáimainiawai. ⁸ Niijiai métek ajasairap. Átumka
seatsrumnin Yus Apa átum atsumamun nékawai. ⁹ Nu asamtai
Yus áujkuram júnis títiniaitrume:

'Aparu Yus, nayaimpiniam pujamna nu, ii Aparinme.
Ame náarmincha shuar ántar pachischarti. ¹⁰ Ashí
áentsnum ame akupkatin tsawantrm wari jeati. Ame
wakeramuram nayaimpiniam umikma ana núnisan ju
nunkanmasha uminkiatí. ¹¹ Aparu, ii yurumkari ashí
tsawant amasta. ¹² Tura winia nemasrun tsankurajna
núnismek, Aparu, winia tunaaru tumashrisha
tsankurturta. ¹³ Tunáa wakeruktin tsankatrukaip.
Antsu ashí tunaanumia uwentikrurta. Tuke ashí
aents akupkamniaitme. Núnisam Amesha tuke ti
kakarmaitme. Tura ti shíiraitme. Tuma asakmin
seajme. Nuke atí.'

¹⁴ 'Amesha chíkich shuar yajauch awajtamka nu
tsankureakminkia Yus Apa nayaimpiniam pujana
nu amincha tsankurtamprattawai. ¹⁵ Tura chíkich
tsankureachkumninkia Yus Apasha ame tunaarmincha
tsankurtamprashtatui.'

Ijiarmatniun pachis Jesus unuiniamiania nu

¹⁶ 'Ijiarmarum Yus áujkurmesha wake mesekrum susun-
trairap. Anankartin shuar chíkich shuar "ijiarmaiti" tu
enentáimtursarti tusa tuma áiniawai. Nekasan tájame, Yúska
akíatsain aya nujai akikma áiniawai. ¹⁷ Antsu ámeka ijiar-
mamsha pénker temashmaram pénker jaupmitia. ¹⁸ Shuar
ijiarmaiti tu enentáimturmasarain. Aya Yus Apak nekaattawai.
Tura asa akirmaktatui.'

Kuítian pachis Jesus unuiniamiania nu
(Rúkas 12.33-34)

19-20 'Ju nun^{kan}maya kuit ikiaun^{kat}niujai nan^{ka}amas nayaimpiniam kuit ikiaun^{kat}a. Juin^{ka} kayaa yúchakait tura mash meseatsuk. Tura kasasha wayá kasamtsuk. Antsu nayaimpinman^{ka} kayaa^asha yuatsui tura mash meseatsui tura kasasha wayá kasamtsui. ²¹ Kuítrum ana nui enentáimtustatme. Tuma asam nayaimpiniam ikiaun^{kat}a.'

Ayashí tsáapnintrí

(Rúkas 11.34-36)

²² 'Ame jímijiaí tsáapin amiin wayamniaiti. Tuma asamtai ame jiimi pén^{ker}aitkiuin^{ka} amiin tsáapin wayá tuke tsáapniiti. ²³ Antsu ame jiimi yajauchitkiuin^{ka} tsáapin amiin wayachmin asamtai tuke kiritin átatui. Núnisañ yajauchia nu wakerakmeká pén^{ker}a nu ame enentáimiin wayachmin asamtai tuke kirit ajastatui. Nu kiritcha imiá yajauchiti.'

Yussha kuitsha máimtek enentáimtuschaniaiti

(Rúkas 16.13)

²⁴ 'Shuar jimiará úuntriñ umirkatniun tujintiawai. Chikichan wakerak chikichnaka nakitrattawai. Chikichan umiruk chikichnaka umirkashtatui. Núnisañ átumka Yussha kuitcha máimtek enentáimtustin tujinkiattarme.'

Yus ni uchirín pén^{ker} wáinkiaiti

(Rúkas 12.22-31)

²⁵ 'Tuma asamtai tájarne: Wariniak yuataj wariniak umartaj tura wariniak entsartaj tusarum nuke enentáimsairap. Yus iwiaaku átinian amasu asa yurumkancha amaschamniakait. Tura ju ayashniasha najana asa entsataincha amaschamniakait. ²⁶ Chin^kisha enentáimpratarum. Yakí nanamainiak yurumkan arakmainiatsui. Tura juuk yurumkan ikiuniatsui. Tuma ain Yus Apa nayaimpiniam pujana nú Yusak áyureatsuk. Atumsha chin^kia nú nan^{ka}amaschakaitrum. ²⁷ Nu arantcha ti enentáimkiumsha ¿nujaí tsakartatmek?'

²⁸ 'Nuikia ¿urukamtaí entsartincha timiá enentáimprum? Iistá, kukujsha takachuitiat tura najanchaitiat ²⁹ ti shíirmach áiniawai. Yaunchu uunt akupin Sarumún ti shiir iwiarmamniuitiat kukujia tímianchayayi. ³⁰ Iis, nupa yamá tsakaawai tura kashin aents tsupikiar jinium epeenawai. Tuma ain Yus ti shiir áentseatsuk. Nuna tura asa atumniasha nú pén^{ker} waitmakchattawak. ¿Urukamtaí Yus nekas enentáimtatsrum? ³¹⁻³² Ju nun^{kan}am ana nu pachikiairap. Chíkich shuar, Yúsán nékainiatsna nu, warin yuattajⁱ warin umartatajⁱ warin entsartatajⁱ nuna ti pachiniawai. Tura atumsha tu enentáimsarum weerap. Ame Apa nayaimpiniam pujana nu ame atsumamurmin nékawai. ³³ Tuma asamtaí Yusjaí shiir wekasatin tura Yus akupkamu ana nu umiktin emka enentáimsatarum. Túrakrumni^{ka}

atsumamurmin Yus suramsattawai. ³⁴ Kashin átatna nujai itiu^urchat enentáimsairap. Kashinkia nusháa itiu^urchatrⁱjai tsaw^uarchattawak. Yamái tsawanta jujai máakchakait.'

7

Chíkich sumamtikiawairap

(Rúkas 6.37-38, 41-42)

¹ 'Chíkicha tunaari ti enentáimtusairap. Núnisaⁿ Yus atumi tunaari iirtamsashtatui. ² Chíkich wárik sumamtikiatin enentáimkiumniⁿkia Yus núnisaⁿ sumamtikramattawai. Tura ame chíkicha túramuri nekapmarmena nú nekapkajaiⁿ amincha nekapmarmattawai. ³ Tuma asamtai ¿itiurtsuk atumi jiiⁿ numi enketna auk íitskesha atumi yachí jiiⁿ tsuat enketusha iyarum? ⁴ Ame jii^miin numi tuke enketai^sha ¿itiurtsuk ame yatsumi jii^ya tsuátan jurustajme tame? ⁵ Ántar shuará, ame yáintaj tákumka emka ame jii^miin numi enketna nu jusata. Nuyá paant iistatme yatsumi jiiⁿ tsuat enketna nu jurustin.'

⁶ 'Ti shiira nuka yawá súsashtiniaiti. Nuna nakitrar amincha esatmichartimpiash. Kuítrumsha kuchi súsashtiniaiti. Aya najatrachartatuak.'

Yus seakmin suramsattawai

(Rúkas 11.9-13; 6.31)

⁷ 'Yus seakrumin suramsattawai. Eakrumka wainkiatarme. "Winiajai" tákurmin awaintiamattarme. ⁸ Seana núnaka suíniawai. Eana nuka wáiniui. "Winiajai" tuinia núnaka awainiawai.'

⁹ 'Ame uchiram apatkun seatmakui ¿kayaash súsaintiam? ¹⁰ Tura namakan seatmakui ¿napíash súsaintiam? ¹¹ Nuikia átum yajauchitirmesha atumi uchirí péⁿker ana nu tuke súuchakaitrum. Nuna nan^ukaamas nuikia seakrumniⁿkia atumi Aparí nayaimpiniam pujana nu péⁿker ana nuna suramsashtatuak.'

¹² 'Júnaka Muisaishsha Yúsnaⁿ etserniusha akupenawai: "Chíkich ámin túrutatí tusa wakerakme^uka amesha núnismek túratá." Tu akupenawai.'

Wankaram jintiasha tura yupikiach jintiasha

(Rúkas 13.24)

¹³⁻¹⁴ 'Wankaram jintia awai. Wayatniusha yúpichuchiiti. Nuisha untsurí wáiniawai. Tura nusha menkakatniunam jeawai. Túrasha chíkich jintia awai. Nusha yupikiach asa itiu^urchataiti. Wayatniurisha yupikchiiti. Nuⁱ ishichik wáiniawai. Tura nusha iwiaaku pujustinnium jeawai. Tuma asamtai tuke iwiaaku pujustaj tákurmeka yupipitin jintia achiktarum.'

Nerejai numi nekaatainti

(Rúkas 6.43-44)

¹⁵ ‘Aneartarum. Wáitruiniak “Wi Yúsnan étserjai” tuinia nu írunui. Pátatek murikiua áinis yúpichuch áiniawai tura ni enentáin nekas úunt-yawā áinis áiniawai. Pátatek shiir chichainiawai tura ni enentáin yajauch piakuiti. ¹⁶ Atumsha túramujai nin nekaatniuitrume. Naranmaya shuiya júukchamniaiti. ¿Tsachiksha kushin̄kiapen nerektatuak? ¹⁷ Núnisan̄ péñker numia nu tuke péñkeran nereatsuk. Tura yajauch numia nu yajauchin nereatsuk. ¹⁸ Péñker numi yajauchin nereatsui. Núnisan̄ yajauch numi péñkeran nereatsui. ¹⁹ Yajauch numi ajakar tsupirar jinium apeashtinkiait. ²⁰ Tuma asantai wáitrin ainia nuka túramujai nekanattawai.’

Ashikia Yus akupeana nui jeachartatui
(Rúkas 13.25-27)

²¹ ‘Aya winia Apar nayaimpiniam pujana nuna wakera-mur̄in umirin ainia nuke Yus akupeamunam pachiinkia-tui. Chíkichka “Uuntá, Uuntá” turutainiyat nayaimpiniam jeachartatui. ²² Amuukatin tsawant jeamtai untsurí turutiar-tatui “Uuntá, Uuntá, ame náaram pachisar ashí nun̄kanam et-serkachmakaji. Ame náarmesha pachisar yajauch wakancha jijīki akupkamji. Tura ame náaram pachisar aentsti tujintiamu túramji” turutiartatui. ²³ Nuī chichainiakui “Werumtarum. Pen̄ke nékachuitjiarme. Aya yajauchitrume” títiatjai.’

Péñker ukurma tura yajauch ukurma
(Rúkas 6.47-49; Márkus 1.22)

²⁴ ‘Shuar winia chichamprun antuk umirkañka nu shuar ti péñker enentáimniuiti. Niisha jū shuarjaī méteketete. Jēa jeamuk kayanam ukurmai. ²⁵ Tura yumi ti yutuk entsa nujan̄kruamai tura nase ti kakaram umpuimiai. Túmain̄ pukukachmai ni ukurmarī kayanam ukuamu asantai. ²⁶ Tura shuar winia chichamprun antuk umirtukchañka jū shuara núnisan̄ enentáimchaiti. Jēa jeamuk náikminiam ukurmai. ²⁷ Tura yumi yutuk entsa nujan̄kruamai tura nase ti kakaram umpuimiai. Túmakui jēa mash saanaki iniaamai” tímiayi Jesus.

²⁸ Jesus nuna tinia amukmatai ashí shuar ti enentáimprarmiai. ²⁹ “Yusa kakarmarijijaī unuitiamtsujik. Israer-shuara jintinniur̄inkia núnis unuiniainiatsui” tiarmiayi.

8

Jesus tunamarun tsuarmiania nu
(Márkus 1.40-45; Rúkas 5.12-16)

¹ Jesus muraya támatai untsurí shuar Nin nemariarmiayi.
² Nui shuar tunamaru Jesusan jearin tikishmatramiayi. Tura tímiayi “Uuntá, wakerakmeká tsuáramniaitme.”

³ Tutai Jesus uwejejái antiñ “Wakerajai. Pénker ajasta” tímiayi. Tutai tunamaru ni tunamarmari pénker ajasmiai.

⁴ Tura Jesus tímiayi “Pai, penké etserkaip. Áyatik Israerpatri iniakmamsam Muisais timia nu susata ashí shuar nekaawarti tusam.”

*Jesus suntara uchirín tsuarmiania nu
 (Rúkas 7.1-10)*

⁵ Jesus Kapernáum péprunam wayamtai apachi suntara kapitíantri Nin tarimiayi. ⁶ “Uuntá, tímiayi. Winia uchir tampemaru jeá tepes ti wait ajáa tepawai” tímiayi.

⁷ Jesussha “Ayu, winin tsuartaiai” tímiayi.

⁸ Tutai kapitían tímiayi “Uuntá, Ame ti nankaamaku asam winia jearuí wayachminiaitme. Áyatik “Pénker ajásti” tákumin winia uchir pénker ajatrustatui. ⁹ Iista, winiasha akuptuiniatsuk tura wisha suntaran akupenatsjak. Juna “Wetá” takui wéawai. Tura chikichnasha “Winitía” tutai winiawai. Tura takartinian “Ju túratá” tutai umíawai.”

¹⁰ Kapitían nuna tutai Jesus ti enentáimiuk Nin nemarainian tímiayi “Nekasan tájarme, Israer-shuar Yúsan tímiatrus enentáimtin atsawai. ¹¹ Maa, yajaya untsurí shuar Yus akupeana nui jeawar Apraámjaisha Isakjaisha Jakupjaisha iruntrar yurumáwartatui. ¹² Tura Israer-shuar Yúsnun jeamnia áiniayat aa kiritniunam ajapnawartatui. Nui ti úutin tura ti wáitsatin átatui.”

¹³ Nuyá Jesus kapitíanin chicharuk “Jeemiin waketkitia. Nekas enentáimtusú asakmin uchiram pénker ajatramsattawai” tímiayi. Túramtai ni uchirí nu chichamtaik pénker ajatsamiayi.

*Jesus Pitru tsatsarín tsuármiania nu
 (Márkus 1.29-31; Rúkas 4.38-39)*

¹⁴ Jesus Pitru jeen we Pitru tsatsarín tsuemujai jaa tepan wáinkiamiayi. ¹⁵ Tura ni uwejen antiñmatai tsuemun michatramiayi. Tura nuwá nantakin ashí ajamsarmiayi.

*Jesus untsurí jáinian tsuármiania nu
 (Márkus 1.32-34; Rúkas 4.40-41)*

¹⁶ Kashi ajasmatai yajauch wakantrukarun Jesusan itiariarmiayi. Tura nu yajauch wakanin chikichík chichamjai chicharas jiki akupiarmiayi. Ashí jáiniancha tsuáramiai. ¹⁷ Yúsnan etserin Isayas “Ii pimpirmaríncha ii sunkuríncha jurutramkimiaji” yaunchu timia nu uminkiatí tusa nu túrunamiayi.

Jesus nemarsatin

(Rúkas 9.57-62)

¹⁸ Shuar untsurí Jesusan káutkarmatai “Entsa amain katiñtai” tímiayi.

¹⁹ Nui Israer-shuara jintinniurí Jesusan tarí tímiayi “Uuntá, Ámin páchitsuk nemarsatniun wakerajme.”

²⁰ Tutai Jesus tímiayi “Kujanchmasha ni waarín takaktsuk. Chinkisha pasunken takaktsuk. Tura Wi Yúsnumiãitiatan tepestiniur atsawai.”

²¹ Nin nemarniusha tímiayi “Uunta, emka winia aparun iwiarsan ikuuttajai.”

²² Tura Jesus “Nemartusta, tímiayi. Wakannium jaka ainia nu jakan iwiarsarti” tímiayi.

Nasesha entsasha Jesusan umirkarmiania nu

(Márkus 4.35-41; Rúkas 8.22-25)

²³ Nuyá Jesus ni unuiniamuríjiai uunt kanunam enkemámiayi. ²⁴ Nui nase ti kakaram umpuimtai antumian ti tamparintin ajasmiayi. Tura entsa kanunam yaráná piákmiayi. Tuma aín Jesus kanunam kanar tepemiayi. ²⁵ Nuyá ni unuiniamurí kurashim Jesusan ishintiarar tiarmiayi “Uuntá, wayaji. Kakaram ajachkumniñkia jakattaji.”

²⁶ Jesus tímiayi “¿Urukamtai timiá ashamarum, Yus enentáimtutskesha?” Nuyá wajaki nasencha entsan cha chicharkamiayi. Tutai mash miaaku ajasmiayi. ²⁷ Nuna ísar ni unuiniamurí ti enentáimsarmiai. Tura tiarmiayi “Jusha ¿warí áentsuit? Nasesha entsasha Nin umirainiatsuk” tiarmiayi.

Jatara nunkanam Jesus yajauch wakantrukun tsuármiania nu

(Márkus 5.1-20; Rúkas 8.26-39)

²⁸ Nuyá Jesus entsá amaini katiñ Jatara nunkanam jeamiayi. Nui jimiara shuar yajauch wakantruku tuke iwiartainium pujú Jesusan tariarmiayi. Mai yajauch wakantruku ásar ti kajeñ ármiai. Tuma asamtai shuar nu jintianam nankaamachu ármiai. ²⁹ Niisha Jesusan wáinkiar kakan tar tiarmiayi “¿Warí pujuram iijiai, Jesusá, Yusa Uchiría. Tsawant jeatsaín in amukratkataj tusamek taum?” tiarmiayi. ³⁰ Nui arant kuchi untsurí shushunmak yujaarmiayi. ³¹ Yajauch wakancha Jesusan seainiak “Jiiki akupkartakmek a kuchíñiam wayatin tsankatkartukta” tiarmiayi.

³² Tutai Jesus “Pai, wetarum’ tímiayi. Yajauch wakan cha shuara enentáiyá jíinkiar kuchiniam enkemáwarmiai. Túramtai kuchi wáurkiar arau utsanamiayi. Nuyá entsá iniañkar jakerarmiayi.

³³ Kuchí wáinniusha nuna ashamkar péprunam tseke wéarmiayi. Nui jeawar ashí túrunamun etserkarmiayi. Yajauch wakantrukun péⁿker ajasmancha etserkarmiayi. ³⁴ Nuyá ashí nú peprunmaya shuar Jesusan in^kiun^tai tusar ashinkiar^mayi. Tura in^kiun^kar ni nun^keya waketkiti tusar seawarmiayi.

9

Jesus emearun tsuármiania nu
(Márkus 2.1-12; Rúkas 5.17-26)

¹ Nuyá Jesus kanunam en^kemar antumian amaini katin^mayi. Tura nui ni péprurⁿ Kapernáumnum jeamiayi. ² Nui jeamtai shuar emearu jaan patak yanakin ejeetiarmiayi. “Tsuártatui” nekas tu enentáimtuinia ásarmatai Jesus jaan tímiayi “Uchirú, kakaram ajasta. Ashí ame tunaarum tsan^kuramuiti.”

³ Takui Israer-shuara jintinniuri yajauch enentáimprar “Juka Yúsán ti yajauch chicharui” tiarmiayi.

⁴ Tu enentáimainian Jesus nekáa tiarmiayi “¿Urukamtai imiá yajauch enentáimprum. ⁵ Tua imiá yúpichuchit. Shuara tunaarⁿ tsan^kuratin yúpichuchikiai^t. Tura emearun “Nan-takim wekasata” títin yúpichuchikiai^t? ⁶ Wi Aents Aja-sua núchakaitiaj. Ju nun^kanam Wi tunaan asakátratniuitjai. Wátsek, nu nekaatarum tusan juna iniakmastatjai.” Nuna tinia emearun “Wajaktia, tepetairam jukim jeemⁱin wetá” tímiayi. ⁷ Tutai emearu tsuámar nantaki ni jeen wémiayi. ⁸ Tura nuna ashí aents wáinkiar Yus kakarman shuáran susa asamtai ashamkar Yúsán shiir enentáimtusarmiayi.

Jesus nemartusat tusa Mateun achíawai
(Márkus 2.13-17; Rúkas 5.27-32)

⁹ Nuyá Jesus wémiayi. Nui wesa Mateun kuit júutainium pujan wáiniak “Nemartusta” tímiayi. Tutai Mateu nuna ikiuak Jesusan nemarmiayi.

¹⁰ Nú ukunmasha Mateu jeen yurumuk pujai yajauch armia nu Israer-shuar untsurⁱ káunkar Jesusa unuiniamur^jijai irunar yurumiarmiayi. ¹¹ Paríséusha nuna íisar Jesusa unuiniamurⁿ aniasarmiayi “¿Urukamtia atumí Uuntrⁱ kuitia achinja^jisha tunaarinniuja^jisha irunar yuruma?”

¹² Tura Jesus nuna antuk tímiayi “Pén^ker ainia nuka tsuákratniun atsumainiatsui. Antsu jainia nu tsuákratniun atsumainiawai. ¹³ Werum ju aarma unuimiutarum:

“Murik maam Winia surusum nujai “máakete” tátsujai. Antsu waitnen^kartutain wakerajai,” Yus-Papinium tu áarmaiti.

Wikia “pénkeraitjai” tuńnian untsuktaj tusan táchaitjai. Antsu tunáa shuar ni enentáin yapajíáwarat tusan táwitjai” tímiayi.

Ijarmatniun Jesusan aniasarmiania nu
(Márkus 2.18-22; Rúkas 5.33-39)

¹⁴ Nuyá imiakratin Juan̄ka unuiniamuri Jesusan tariat aniasarmiayi. “¿Urukamtai iikia tura Pariséusha ijiarmaji tura ame unuiniamurmeka ijiarmainiatsu?” tiarmiayi.

¹⁵ Jesus ayak tímiayi “Nuatma nampernum ipiaamu ainia nu ¿ajakra uutu wayamniakait? Yamái-nuatu pujakui úutchamin áiniawai. Núnisan Wi pujakui ijiarmashtin áiniawai. Tura tsawant jeattawai nuatua áintsan Wi junaktatjai. Antsu nuikia ijiarmawartatui” tímiayi.

¹⁶ ‘Mamuru pushí jaanakmatai yamaram tarach anuj-tukchatniuiti. Túramka nijiam yamaram tarach sumpeak mamushan chin̄kiá nuna nan̄kaamas jaaktatui. ¹⁷ Nijiamanch yamáí nawar nuap najanamun arutnum yaraachminiati. Túramka kariak nuap najanamun ijiakratniuiti, nijiamchisha ukaratniuiti, tura nuap najanamusha yajauch ajastiniati. Antsu yamaram nijiamanch yamaram nuap najanamunam yaraatniuiti. Nu túramka nijiamchisha nuap najanamusha mai pénker ártatui.”

Jesus Jairu nawantr̄incha tura chíkich nuwancha tsuármiania nu
(Márkus 5.21-43; Rúkas 8.40-56)

¹⁸ Jesus nuna tai Israer-shuara uuntri Jesusan tari tikishmatar tímiayi “Winia nawantur jarutkayi, tura Ame winim ewejmijiai antintrukakminkia ataksha nantaktiatui.”

¹⁹ Tutaí Jesus ni unuiniamurijiai wajakiar nijijai wearmiayi.

²⁰ Tura jintiá weenai nuw̄a tuse (12) uwitin numpá ájapeak wáitias pujú asa Jesusa ukurin̄i amainian̄ ni pushir̄in antiñmiayi. ²¹ “Áyatik ni pushir̄in antiñnaka pénker ajastatjai” tu enentaimpramiayi. ²² Nuna nekáa Jesus ayantar nuw̄an tímiayi “Shiir enentáimprata, nawantru. Yus shiir enentáimtusú asam pénker ajasume.” Nu chichamtaik ni jáamuri pénker ajasmiai.

²³ Nuyá Jesus uunta jeen jeamiayi. Tura nūi charaatum ajainiancha tura jakan iwiarsatai tusar péeman umpuiniancha wáiniak ²⁴ tímiayi “Aa jíntratarum. Nuw̄achikia jákachai antsu aya kanarai.” Penké jakan nékayat túrat̄ta nuna neka asa “aya kanarai” tímiayi. Takui aents Nin wishikrarmiayi. ²⁵ Tura nuna ashí jiir Jesus jeá wayá nuw̄achin uwejnum achik iniantkimiai. Túram nantakmiayi. ²⁶ Nu túramu ashí nu nuñkanam etsernarmiayi.

Jesus kusurun jímíaran tsuármiania nu

²⁷ Nuyá Jesus wéakui jimiara shuar jii kusuru untsumki weriarmiayi. “Uuntá, ii Uuntri Tawit ame weatrum asamtai in waitnenkarturta” tiarmiayi. ²⁸ Jesus jeá wayamtai jii kusuru tariarmiayi.

Tura Jesus aniasar “¿Juna túramniaiti túrutrumek?” tímiayi. Niisha “Ee, Uunta” tiarmiayi.

²⁹ Tuíniakui Jesus ni jii antinkiar tímiayi “Átum nekas enentáimtarmena núnisan túrunati.” ³⁰ Nujai jii péñker ajasarmiayi. Nuyá Jesus “Etserkairap. Shuar penké nekáwarain” tímiayi. ³¹ Támaitiat jiiinkiar Jesus túramun ashí nu nunkanam etserkarmiayi.

Jesus chichachun péñker awajsamiania nu

³² Nuyá wenai shuar yajauch wakantruku chichachun Jesusan itiararmiayi. ³³ Tura Jesus yajauch wakanin jii awemamtai nu chichachu chichakmiayi. Ashí nuna ísar ti enentáimprarmiayi. Tura tiarmiayi “Yáunchusha Israer nunkanam jujai métek túramu penké atsuwiti.” ³⁴ Antsu Pariséuka yajauch enentáimtuiniak tiarmiayi “Nu shuar iwianchi uuntri kakarmarijiai yajauch wakanin jii akupeawai.”

Jesus shuaran waitnentawai

³⁵ Jesus ashí péprunam we ni iruntairin wayá “Yus akupeana nuí enkemátarum” tu etsermiayi. Tura ashí nánkamas sunkurjai jáiniancha tsuáarmiayi. ³⁶ Shuaran ísar murik wáinchatia núnis pimpikiar tura kúntuts pujuinia asamtai waitnentrarmiayi. ³⁷⁻³⁸ Nuyá ni unuiniamurin tímiayi “Ju aents Yus-Chicham ujaktiniaitji Yus-shuar ajasarat tusar. Nu takat ti núkap awai tura takarin ishichik áiniawai. Nu takatka júuktinia áintsankete. Júuktin tsawant jeamtai takau táasmatai takamtikin ujaktin átsuk takaun akupkat tusa. Atumsha núnisrumek Yus seatarum ni shuarin akupak áentsun júukarat tusarum.”

10

Jesus tuse (12) unuiniamurin achikmiayi tuke nemarsat-niun

(Márkus 3.13-19; Rúkas 6.12-16)

¹ Nuyá Jesus tuse (12) unuiniamurin achik Yusa kakarmarin súsarmiayi yajauch wakanin shuara enentáiya jii akupkatniun. Núnisan ashí sunkurjai jáinian tsuáartinian susamiayi.

² Ju áiniawai Jesus tuse (12) unuiniamurin achikiarmia nu: Emka Semun núnisan Pitru náartiniuyayi. Nuyá ni yachi Antres. Nuyá nuámtak yáchintin Jakupusha Juansha, Sepetéu

uchirí armia nu. ³ Nuyá Jiripi, Parturumí, Tumas, Mateu. Mateusha kuítian achiniuyayi. Arpeu uchirí Jakupusha. Ripíu núnisan Tateu náartiniuyayi. ⁴ Ásumpí Semunsha nuyá Jútas Iskariúti Jesusan ukunam surukmia nu. Nu tuse (12) achikma ármiayi.

Jesus ni unuiniamurin etserkarti tusa akupkarmiania nu
(Márkus 6.7-13; Rúkas 9.1-6)

⁵ Nu tuse (12) unuiniamurin Jesus júnis chicharak akupkarmiayi. “Israer-shuarcha matsatmanum weerap. Samaria nunkanam péprunam weerap. ⁶ Antsu Israer-shuar murikiua áinis Yúsaiya wákaru ainia nu weritiarum. ⁷ “Tsawant ishichik ajasai Yus jú nunkanam akupin ajastin” tu etserki wetarum. ⁸ Tunamarusha chíkich sunkurjai jainia nusha tsuatarum. Jakasha iniantkitiarum. Yajauch wakancha shuara enentáiya jiki awematarum. Nu túratin kuítchajai kakaram susamuítume, tuma asantai atumsha ashí ánrarmek túratarum.’

⁹ ‘Kurisha ashí kuitcha jukiirap. ¹⁰ Uyuncha jukiirap. Sap-atcha tura ushukrustincha jukiirap. Antsu chikichik pushí jukitiarum. Takau asakrumin yurumkan ajampramsartin áiniawai.’

¹¹ ‘Péprunam jearmesha pénger shuar wáinkiarum nuí wayarum tuke nuin pujustarum. ¹² Nu jeanam wayamsha “Ju jea shiir atí” titiá. ¹³ Nekas pénger shuaraitkiunka shiir ajasarti. Antsu nu shuar pénger itiamachkuunka shiir ajascharti. ¹⁴ Tura nánkamsan atumin awaintiamainiachkuunkia anturtamainiachkuunkia nuyá jinkitiarum. Nu shuar yajauch ásarmatai jinkirum atumí naweya nunka japimiarum ikiuktiarum. Ni tunaari aents nekaawarat tusarum túratarum. ¹⁵ Nu shuaran nekapsatin tsawant jeamtai Yus asutiáshtatuak. Sutum péprunmaya shuara nankaamas Kumura péprunmaya shuarnasha nankaamas Yus asutiáttawai nu shuaran’ tímiayi.

Yajauch awajsatniun ujakmiania nu

¹⁶ ‘Aneartarum. Wisha murik yawanum akupkatniua áintsanak akupeajrume. Tuma asantai shiir nawamkartin áyatrú aneartarum. ¹⁷ Yajauch shuarjai aneartarum. Akup-niunam juramkiartatui. Israer-shuar iruntainiam asutia-mawartatui. ¹⁸ Wíi shuar asakrumin uuntnumsha tura nuyá akupniunmasha juramkiartatui. Núnisrum akupni-uncha tura Israer-shuarchancha winia chichamur ujakta-trume. ¹⁹ Tura akupniunam surutmakakrumnisha wariniak títiáj tu enentáimprairap. Nuí uuntjai chichaakrumin Yus títinian jintintramattarme. ²⁰ Nuinkia átum enentáimmiajai

chichaschattarme antsu atumí Aparí Yusa Wakaní atumin chichamtikramsattarme.'

²¹ 'Shuar ni yachíncha máawarti tusa suruktatui. Apasha ni uchirín surukartatui. Uchisha ni aparín máawarti tusa surukartatui. ²² Tura Wíi shuar asakrumin mash muíjramkartatui. Tura tuke katsuntea nu uwemprattawai. ²³ Chikichik péprunam yajauch awajtamainiakui chíkich péprunam pisartarum. Wi Aents Ajasuitjai. Tuma asan nekasan tájarme, átum Israer-shuar mashí ujatsrumnin wantinkiattajai.'

²⁴ 'Unuiniamuka nin unuiniana nuna nankaamaschaiti. Takarniusha ni uuntri nankaamaschaiti. ²⁵ Unuiniamuka nin unuinia nujai métek ajaska maak. Takarniusha ni úuntrijiai métek ajaska maak. Wátsek, Winia atumí úuntrin "Iwianchi uuntri" túrutainiakui atumniasha nuna nankaamas yajauch turamtatui.'

Yúsak ashamkatniuiti
(Rúkas 12.2-9)

²⁶ 'Tuma asamtai aentska ashamkairap. Ashí uukma nu paant nekanattawai. ²⁷ Ishishmasan kiritniunam ujaajrumna nu, tsawái kakantrarum etserkatarum. ²⁸ Aya ayashin main ainia nu ashamkairap. Wakanin máachmin áiniawai. Antsu wakanniasha ayashniasha mai jinium emesramnia asamtai Yus ashamkatarum.'

²⁹ 'Jimiará chiní penké ishichik kuitjai surukmin áiniawai. Túmaitiat Yus tsankateachkuinkia nunká jaka iniainiatsui. ³⁰ Ame intiashmisha mash nekapmarmaiti. ³¹ Nu asamtai jákatin ashamkairap. Yusjai átumka ti untsurí chinikijiai nankaamas pékerchakaitrum.'

Jesus natsantrashtiniaiti
(Rúkas 12.8-9)

³² 'Ashí shuar ashí íimiainiaín Winia natsantruiniatsna núnaka Winia Apar yakí nayaimpiniam pujana nui natsantrashtajai. ³³ Antsu shuar íimiainiaín Winia natsantra núnaka Wisha yakí nayaimpiniam winia Apar pujana nui natsantrattajai.'

Jesusa chichamejai shuar akannartatui
(Rúkas 12.51-53; 14.26-27)

³⁴ 'Ashí shuar nawamnaikiar shiir pujusarat tusan ju nunkanam táchaitjai. Nuna túrat tusarum enentáimturairap. Antsu wi tamaajai shuar péker ajasarmatai yajauch shuar nin nakitrartatui. ³⁵ Shuar ni aparín nakitrattawai. Nuwasha nukurín nakitrattawai. Najatísha tsatsarín nakitrattawai. ³⁶ Tuma asa shuar ni shuarijiai nemasrintin ártatui.'

³⁷ ‘Shuar ni aparíncha nukuríncha Wijíaj nan̄kaamas aneakka Wíi shuar áchamniaiti. Núnisan̄ ni uchiríncha nawantríncha nan̄kaamas aneakka Wíi shuar áchamniaiti. ³⁸ Tura ashí wáitsatniun surimiatsuk ni krúsrin̄ yanaki jukí nemartachkun̄ka Wíi shuar áchamniaiti. ³⁹ Aya jú nun̄kanam péñker pujustaj tana nu ni iwiaakmarin̄ emesrattawai. Tura Winia anentu asa jú nun̄kanam péñker pujustinian páchiatsna nu tuke shiir pujustatui.’

Akinkiatin
(*Márkus 9.41*)

⁴⁰ ‘Atumin̄ itiaarma nuka Winia itiaarui. Tura itiaarea nuka Winia akuptukmia nunasha itiaawai. ⁴¹ Yúsnan etserni-uncha Yúsnumiá winiá asamtai itiaakka etserin̄ akínkiáttana nujaj̄ métek akínkiáttawai. Péñker shuárnasha péñker asamtai itiaakka péñker shuar akínkiáttana nujaj̄ métek akínkiáttawai niisha. ⁴² Uchincha Wíi shuar asamtai entsá michan shikirak súsan̄ka imiá nekas nusha akínkiáttawai.” Tu tímiayi Jesus.

11

Imiakratin Juan̄ Jesusaj̄ shuaran̄ akupkamiania nu
(*Rúkas 7.18-35*)

¹ Tura tuse (12) unuiniamurin̄ Jesus tinia akupkar Niisha nú nun̄ka péprunam we Yus-Chichaman jintíak etserkamiayi.

² Tura Juan̄ sepunam en̄kemas Kristu túramun antukmiayi. Antuk ni unuiniamurin̄ jímiaran̄ Jesusaj̄ akupkamiayi.

³ Tura Jesusan̄ aniasarmiayi “¿Nekas ame Kristu Yus akupkamu tátinia nukaitiam. Kame chikichak nákastataji?”

⁴ Tutai Jesus tímiayi “Waketkirum ashí ántarmena nusha wáintrumna nusha Juan̄ ujaktarum. ⁵ Kusurusha wáinmainiawai. Shutuapsha wekainiawai. Tunamarusha péñker ajainiawai. Empekarusha ántuiniawai. Jákarusha nantainiawai. Tura kuítrinchamasha uwempratin̄ chicham ujakmaiti. Nu ujaktarum. ⁶ Túrusha yawetsuk Winia tuke shiir enentáimturna nú shuar shiir átatui.” Jesus nuna tutai waketkiarmiayi.

⁷ Waketkiarmatai shuar káunkarun̄ Jesus Juán̄kan̄ pachis áujmatmiayi. “Shuar atsamunmasha ¿warí werimiarum? Pintiu nase umpúam atúu we juní we ajana nuka ¿ístai tusarumek wémarum? Kame Juán̄kka nú shuarchaiti.

⁸ Nuikia ¿warí werimiarum. Shuar péñker iwiarmampra ístai tusarmek wémarum? Warí, péñker iwiarmampraka uunta jeen̄ pujuiniatsuk. ⁹ Nuikia ¿warí werimiarum. Yúsnan etserniuk werimiarum? Maa, túrachmashiuram. Túrusha Juán̄kka yaunchu etserniu nan̄kaamas enentáimtustiniaiti.

¹⁰ Yaunchu Yus-Papinium áarmaiti:

“Winia akatramurun amiini emka akupeajai ame jintimin iwiarat tusa.”

Juan nu akatramuiti. ¹¹ Nekasan tájarme, shuar imiakratin Juanjaj nankaamas uunt atsuwiti. Tuma ain Yus akupeamunam pachiinia nu shuarnaka, nekasmianchancha, Juanjaj nankaamas shiir enentáimtustiniaiti. Tuma asantai nui pachiinkiatin enentáimpratarum.’

¹² ‘Kakaram shuarka imiakratin Juan támia nú tsawant-numia Yus akupeamunam ti pachiinkiatniun wakeruiniak kakarmajaj pachiinkiatniun enentáimiainiawai. ¹³ Juan pujumia nú yaunchu ashí Yúsna etserin armia nusha tura Muisais akupkamusha Yus akupin ajastinian etserkarmiayi. ¹⁴ Yaunchu Yúsna etserin “Kristu táatsain Erías tátiniaiti” tímiayi. Tura nekaatin wakerakrumka Juan nu Eríasaiti. ¹⁵ Antuktin jeakrumka nekaatarum.’

¹⁶ ‘Ju áentsnasha ¿warijaj métek nakumkataj? Uchijaj métek áiniawai. Ni aijaj iruntrar nakurustaj táyatan tuíniawai ¹⁷ “Námpera áinis nakurustaitsar peem umpuarji túrasha jantsemáchurme. Nuyá iwiarsatniua áinis nakurustaitsar íwiareakur kantamta kantamáji túrasha átum úutcharme.” ¹⁸ Atumsha núnisaitrume. Kame Juan núkap yurumtsuk nijiamchinchá úmutsuk wekaimiayi. Túmakui átumka “Yajauch wakantrukuiti” tímiarme. ¹⁹ Nuyá Wisha Aents Ajasu támajai. Tura yurumeakui tura úmakui “Ti yurumin ti nampenaiti. Ashí yajauch shuaran amikrinti” túrutrume. Wátsek, wi túramujaj Yus nekas nékamu nekanattawai.”

Yajauch péprunmaya shuaran chicharkamiania nu (Rúkas 10.13-15)

²⁰ Nuyá tujintiamun túramiania nú péprunmaya shuaran pachis Jesus chicharkamiayi. Tuma ain nuyá shuar ni enentáin yapajiácharu asantai juna chicharkamiayi.

²¹ “Wáinkiatá, Kurasín péprunmayatiram, Petsaitia péprunmayatirmesha. Nui aents tujintiamun ti túraitjai. Tiru péprunmasha Setun péprunmasha nu tujintiamu túramuitkiuinikia yaunchu ni enentáin yapajiáwaraayi. Túrawar kúntuts pujutai pushín entsarar yunkunim ajakiaraayi. ²² Tura Wisha tájarme, nekapsatin tsawant jeamta Yus atumin tí asuttiamattarme. Tirunmaya shuaran nankaamas tura Setunnumia shuaran nankaamas asuttiamattarme.’

²³ ‘Tura atumsha Kapernáum péprunmayatirmesha, ashí nankaamas nankaamantu ajastin enentáimtumarme. Antsu ashí emestamprartatui. Atumiin aents tujintiamun ti túraitjai. Sutuma péprunam nu tujintiamu túramuitkiuinikia nu pepru yamaisha tuke aayi. ²⁴ Tura Wisha tájarme, nekapsatin tsawant

jeamtai Yus Sutumanmaya shuar nan̄kaamas atumin asuttia-mattarme.”

“Win̄in ayampratarum” tímiania nu
(Rúkas 10.21-22)

²⁵ Nuyá Jesus tímiayi “Shiir enentáimtajme, Aparu, ashí nayaimpisha nun̄kasha Úuntrinme. Tuma asam Ame túram nu ti unuimiaru enentáimtumainia nuyá úukuitme antsu uchichia áinis nan̄kaamantu enentáimtumainiatsna nú shuar paant awajtusuitme. ²⁶ Ame, Aparu, núnis wakera asam túraitme.’

²⁷ ‘Winia Apar ashí surusuiti. Wisha ni Uchirí asamtai Winia nékarui. Tura ch̄kích Winia nekas nekarainiatsui. Yus Apancha Wiki nékajai. Tura Wi wakeraj nú shuaran winia Aparun paant awajtajai. Nu shuarsha winia Aparun nékainiawai. ²⁸ Ashí pimpikniutirmesha itiurchat pujar-mena nusha Winí winitiarum. Túrakrumn̄kia ayamtikrattajrume. ²⁹ Wi kajechu asan tura péejchach enentáimin asamtai Winí winirum unuimiartarum. Winia chichamur ántakrum umiákrumn̄ka atumí wakaní ayamprattawai. ³⁰ Atumin akuptaj nú túratin yúpichuchiiti. Káarkasha Wi súajrumna nu wampuchiiti” tímiayi Jesus.

12

Jesusa unuiniamurí ayampratin tsawantai trikiu neren pakaarmiania nu

(Márkus 2.23-28; Rúkas 6.1-5)

¹ Nuyá Jesus ayampratin tsawantai ajanman̄ ajapenin̄ nan̄kaamamiayi. Ni unuiniamurísha tsukarar trikiu neren majusar yukí wekasarmiayi. ² Pariséu shuarsha nuna wáinkiar Jesusan aniasarmiayi “Iista, ame unuiniamuram ayampratin tsawantai túratin surimkiamua nuna túruiniawai.”

³ Tutai Jesus tímiayi “Yaunchu uunt akupin Tawitcha tura nemarniusha tsukamainiak túrawarmia nu ántichukaitrum. ⁴ Yusa Uunt J̄een wayá Yus iniaktusma tantan yuámiayi. Nu tantasha aya Israer-patrik yúatin asamtai Tawitniasha tura ni nemar̄in ana nunasha suritkiamuyayi. Túmain̄ yúawarmiayi. ⁵ Muisais akupkamunam aarma nu áujsachukaitrum. Israer-patrikia ayampratin tsawantai takainiayatan̄ nusha tunaachuiti. ⁶ Nekas tájarme, yamá Yusa J̄een enentáimtustinia nuna nan̄kaamas Wíniaka Aents Ajasuitjiana nu, nekas enentáimtursatniuitrume. ⁷ Yus-Papinium tawai:

“Murik maam Winia surusum nujai “maakete” tátsujai. Antsu waitnen̄kartutain wakerajai.”

Nu chicham nekas nékaitkiurmeka yamáí túrarmena núnisrum tunáa túrachu ántarum súmamtikiachaintrume. ⁸ Wi Aents Ajasu asan ayampratin tsawantan Úntrintjai.”

Shuara uwejé jakan Jesus tsuármiania nu
(Márkus 3.1-6; Rúkas 6.6-11)

⁹ Jesus nuyá wé Israer-shuar iruntainiam wayamiayi. ¹⁰ Nui shuar ámiayi ni uwejé jaka. Tura Jesusan ántar nekap-satai tusa wakeruinia ásar aniiniak “¿Ayampratin tsawantai jaa shuar tsuarminkiait?” tiarmiayi.

¹¹ Tutai Jesus tímiayi “Atumsha atumí murikrí ayampratin tsawantai waanam akaiki iniamtai jusatai tusarum wéchaintrupash. ¹² Antsu shuarka murikjai nankaamaschakait. Tuma asantai ayampratin tsawantaisa péñker ana nu túramniaiti.” ¹³ Tinia iniais áishmankan uwejé jakan tímiayi “Uwejém takuitia.” Tutai uwejé takuí chíkich uwejéjai métek péñker ajasmiayi. ¹⁴ Nuna túramtai Paríséu shuarsha aa jíinkiar Jesus itiurak máawaintiajiⁱ tusar chichaman najatiarmiayi.

Isayas Jesusnan tímia nu uminkiamiayi

¹⁵ Jesus nin máatniun nekaama nuyá jíinkimiayi tura wéakui untsurí shuar nemariarmiayi. Untsurí jáiniancha tsuámiayi. ¹⁶ Tsuar “etserkairap” tinia akupiarmiayi. ¹⁷ Yaunchu Yúsnan etserin Isayas tímia nu uminkiaiti tusa túrunamiayi. Niisha juna áarmiayi:

¹⁸ “Júiti Wi achikmaj nu. Niisha Wi tájana nuna umin asantai ti aneakun Níijiai waraajai. Winia Wakantru kakarmarin takamtsuk susattajai. Túramtai winia uwempratin chichamprun ashí Israercha nunkanmasha etserkattawai. ¹⁹ Jiakchattawai tura kakaram chichaschattawai. Winia anturtukarat tusa péprunam weak untukchartatui. ²⁰ Akupin ajatsuk shuar pintiu punua núnis pimpiru ainia nuna kúpitsuk yáintatui. Núnisai shuar ji yama ikiapámu áinis kakarmachu ainia nuna ikiajniatsuk ikiakártatui. Tura ashí nupetak ti péñker kakaram akupin ajastatui. ²¹ Tura Israer-shuarchasha Nin nekas enentáimtusartatui.”

Jesusan “iwianchi uuntri kakarmarijiai túrawai” tiarmiania nu
(Márkus 3.19-30; Rúkas 11.14-23; 12.10)

²² Nuyá Jesusan shuar yajauch wakantrukun itiararmiayi. Nu shuar jii kusurusha chichachusha ámiayi. Tura Jesus tsuármatai paant íimsamiayi tura chichakmiayi. ²³ Nuna

wáinkiar shuar shiir enentáimprar tiarmiayi “¿Tawitia uchirí pampanku iniannamu uwemtikkiartin tátinia nuáshit?”

24 Tura Paríséu shuarsha nuna antukar yajauch enentáimtuiniak tiarmiayi “Juka iwianchi kapitíántrín Pirsepún umirniuiti. Tuma asa nuna kakarmarijijai yajauch wakanin jiiiki akupeawai.”

25 Jesus tu enentáimainian neka asa tímiayi “Nú nunkanmaya shuar nuamtak kajernaiyakuinkia nú nunka wari meserchattawak. Núnisan nuamtak shuar ní shuarjai mánainiakka amunaikchartatuak. 26 Núnisan íwianch nuamtak jiiiki akupnainiakka máanaikiar wárik amuukashtatuak. 27 Kame Wi Pirsepú iwianchi kakarmarijijai iwianchin jiiiki akupeakuinkia atumí uchirísha ¿yana kakarmarijijain jiiiki akupena? Ni túramurijijai átum awajirma nekamatarum. 28 Wi Yusa Wakaní kakarmarijijai yajauch wakanin jiiiki akupea asamtai atumsha Yusa akupeamurí atumíin jeartamarmena nu nekaatniuitrume.”

29 ‘Tista. Shuar kakaram shuara kuítrín kasarkatin wak-erakka emka kakarman jiníkiá aya túran ni jeen wayá kasarkamniaiti. Wi iwianchin jiiikmiajai uunt iwianch nu-petkamua nu nekaamniaiti.’

30 ‘Wijijai tsanín pujatsna nuka winia nemasruiti. Núnisan Winia yáintsuna nu aya itiurchat nájateawai.’

31 ‘Tuma asamtai tájarne, Ashí shuar tunáa túruinia nusha yajauch chichainia nusha tsankuratin awai. Antsu Yusa Wakanín yajauch chicharin ainia nuka tsankurashtiniaiti.

32 Winiasha Aents Ajasuitjiana nuna yajauch chichartuinia nú shuarsha tsankuramniaiti. Tura Yusa Wakanín yajauch áujmatainia nuka penké tsankurachminiaiti. Ju nunkanmasha tura ukunmasha tsankurnarchattawai’ tímiayi.

Ni nerejai numi nekaamniaiti

(Rúkas 6.43-45)

33 ‘Yutai numi péñkeran nereawai. Tseas numisha ya-jauchin nereawai. Ni nerejai numi nekaamniaiti. Núniskete atumjai. 34 Tseas wenunniutirmesha, ¿atumsha itiurak imiá yajauchitirmesha péñker chichamsha chichastarum? Shuar ni enentáin enentáimna nuna chichaawiti. 35 Péñker shuar péñker enentáimiu asa shiir chichaawiti. Tura yajauch shuar yajauch enentáimiu asa yajauch chichaawiti. 36 Tura Wisha tájarne, nekapsatin tsawant jeamtai ashí enentáimtsuk chichakma nuna Yúsan paant ujakartatui. 37 Iis, ame chichammijijai nekanattarme. Péñker chichakuitkiumka sumamashtatme. Tura péñker chichakchaitkiumka sumamattame.”

*Nu shuar yajauch ásar iniakmamun seawarmiania nu
(Márkus 8.12; Rúkas 11.29-32)*

³⁸ Paríséu shuarsha Israer-shuara jintinniurisha Jesusan chicharuk “Uuntá, ame Yúsaiyaitjai tusam nayaimpinmaya kakarmajai iniakmamu túrata, iisha wáinkiatái” tiarmiayi.

³⁹ Tutai Jesus tímiayi “Shuar yajauch tura Yúsan enentáimtachu ásar nayaimpinmaya iniakmamun seainiawai. Tuma asamtai, áyatik yaunchu Junas túrunamu iniakmastiniaiti. ⁴⁰ Junas menaintiu kashi menaintiu tsawantcha namaka ampujen enkemsamiayi. Núnisnak Wi, Aents Ajasu asan, menaintiu kashi menaintiu tsawantcha nunká jakan tepestatjai. ⁴¹ Júnás Níniwi péprunmaya shuaran Yus-Chichaman etserkamtai nu shuar ni tunaarín enentáimtusar ni enentáin yapajíawarmiayi. Tura jui yamáí Junasa nankaamas etserin pujawai. Wiitjai nusha, tura anturkachuitrume. Tuma asamtai nekapsatin tsawant jeamtai Níniwinmaya shuar juyá shuaran súmamtekiawartatui.’

⁴² ‘Yaunchu nuwá yajaya shuaran úunt akupniuriyayi. Nu nuwá Sarumún ti neka asamtai nin anturkataj tusa tarimiyai. Tura jui yamáí Sarumúnjai nankaamas anturkamnia pujawai. Nusha Wiitjai. Tuma asamtai nekapsatin tsawant jeamtai nu nuwá juyá shuaran súmamtekiawartatui’ tímiayi.

*Yajauch wakan jiki akupkamuitiat wáketna nu
(Rúkas 11.24-26)*

⁴³ ‘Shuara enentáiya yajauch wakan jíinkin yumi penké yútatsna nuí wéawai. Tura nuí pénger pujustinian wáinkiach ataksha waketkitniun enentáimui. ⁴⁴ “Wi jíinkimíaj nuí waketkittiajai” tawai. Tura waketki shuara enentáin pénger iwíaramu tura ankantan wáiniak ⁴⁵ ni ain siati (7) iwianchin níijiai nankaamas yajauchin itia shuara enentáin enkemáwartatui. Túrunamtai nu shuar nuiki núna nankaamas yajauch ajastatui. Núnisan juyá shuar túrunawartatui” tímiayi Jesus.

*Jesusa yachí, Jesusa nukurí
(Márkus 3.31-35; Rúkas 8.19-21)*

⁴⁶ Jesus nu shuarjai tuke chichaak pujai ni nukurisha ni yachísha tariarmiayi. Tura aa wajasar Níijiai chichastaj tiarmiayi. ⁴⁷ Túramtai Jesusan ujakar “Ame nukusha yatsumsha aa wajasar chichastaj turamainiawai” tiarmiayi.

⁴⁸ Chichaman ujakmia nuna Jesus tímiayi “¿Ya ainia winia nukursha winia yatsursha?” ⁴⁹ Nuyá ni unuiniamurín iniakmas tímiayi “Ju áiniawai winia nukur tura winia yatsursha. ⁵⁰ Ashí shuar winia Apar nayaimpiniam pujana nu wakeramun umiiniana nu winia yatsur winia umar winia nukur áiniawai” tímiayi.

13

Untsurí métek-taku chichamjají Jesus unuiniamiania nu

(1) Atsaamin atsaampramiayi

(Márkus 4.1-9; Rúkas 8.4-8)

¹ Nu tsawantají Jesus ni jeeya jíinkin antumianka kánmatkarín pujusmiayi. ² Tura ti untsurí shuar káunkarmatai kanunam enkemar nuí pujusmiayi. Shuarsha antumianka kánmatkarín pujusarmiayi. ³ Túrunawarmatai untsurí métek-taku chichamjají unuiniamiayi. “Atsaamin atsaamprataj tusa jíinkimiai, tímiayi. ⁴ Atsaamki wesa arakrí jintia písunmasha iniaarmai. Tura chiníki tariar yuawarmai. ⁵ Chikichcha kaya írunmanum iniaarmai. Nunka ishichik asamtai wárik tsapainiarmai. ⁶ Tura nantu etsantramtai péñker kankáprúrcharu asa sukuam káararmai. ⁷ Chikichcha janíki nupanam iniaarmai. Tura janíki wárik tsakar nupetak ajakramai. ⁸ Chikichcha péñker nunkanam iniaarmai. Nusha péñker nerekar chíkich siansha (100) nerekarmai. Tura chikichcha sesenta (60) nerekarmai. Tura chikichcha trainta (30) nerekarmai. ⁹ Kuishim ákuinkia antuktarum” tímiayi.

“¿Urukamtai aya métek-taku chichamjají jintíam?” aniasarmiania nu

(Márkus 4.10-12; Rúkas 8.9-10)

¹⁰ Nuyá ni unuiniamurín Jesusan taruntar aniiniak “¿Urukamtai aya métek-taku chichamjají ju shuar unuiniam?” tiarmiayi.

¹¹ Tutai Jesus tímiayi “Urukuk ju nunkanam Yus akupin ati, nuka yaunchu nekanachmiayi. Tura yamaikia Yus ashí nuna atumin paant iniakturmawai. Antsu chíkich nuna nekaachmin áiniawai. ¹² Kame núkap takakna nu shuar nú nukap patatnaktatui tura ti núkap takustatui. Antsu ishichik takakna nuka ishichik takakuk juruktiniaiti. Núnisan Yusna ti nekarum nú núkapka yúpichuch nekaat-tarme. Tura ishichik nékarum wárik kajinmatkittiarme. ¹³ Tuma asamtai aya métek-taku chichamjají unuiniajai. Nú shuarka íniayatan wáiniáiniatsui. Ántuiniayatan ántachua núnis nékainiatsui. Túmainiak Winia nekarainiatsui. ¹⁴ Nujají yaunchu Yúsna etserin Isayas timia nu uminkiaiti. Juna tímiayi:

“Ti ántayatrum anturkashtatrum. Wáiniatrumsha nekaashtatrum. ¹⁵ Ju shuara enentái kátsuram ásar péñkera nuna nakitiainiawai. Nu asamtai péñker ántuiniatsui, jíisha pusá áinis áiniawai. Túrachkunka paant nekaawarainti,

tura nekas antukarainti, tura enentáijjai enentáimias Winia tsuarat tusa tarutiarainti.”

¹⁶ Tura átumka paant wainkia asarum péñker anta asarum shíraitrume. ¹⁷ Nekasan tájarme, untsurí Yúsna etserniusha tura péñker shuarsha átum yamáí wáintrum nuna wáinkiatniun wakeruiniyatan wáinkicharmiayi. Tura átum yamáí ántarme nuna antuktinian wakeruiniyatan antukcharmiayi’ tímiayi.

Jesus atsaampramu chichaman paant jintintiamiania nu (Márkus 4.13-20; Rúkas 8.11-15)

¹⁸ ‘Ayu, antuktarum. Atsaampramu chichaman paant jintintiatjarme. ¹⁹ Árak jintia písunam iniaararma nuka shuar Yus-Chichaman ántayatan ni enentáin ikiuiniatsna núiti. Tura íwianch nu Yus-Chicham ni enentáin atsaampramu áinis antukman kajinmatkiawai. ²⁰ Árak kaya írunmanum iniaararma nuka shuar Yus-Chichaman antuk waras umirainia núiti. ²¹ Tura núkap kankaprurcharu ásar katsuiniatsui. Antsu itiurchatan ínkiuiniak tura Yus-Chichaman wakeruinia ásarmatai chíkich yajauch áujmatam wárik iniaisar ikiuiniawai. ²² Árak janí nupanam iniaararma nuka shuar Yus-Chichaman antuk emka umirniua núiti. Tura ju nunkanam írunna nuna tuke páchiniak ni kuítríncha ti enentáimtuinia ásarmatai ashí Yus-Chichaman enentáimtamun núpeteawai. Tuma asamtai nu áentsnum Yus-Chicham atsaampramu nereatsui. Yus-Chicham ni enentáin takasma atsawai. ²³ Tura árak péñker nunkanam iniaararma nuka shuar Yus-Chichaman antuk péñker umirainia núiti. Tura péñker nerenawai. Chíkich siañ (100) nerekarma núnis chikichcha sesenta (60) nerekarma núnis chikichcha trainta (30) nerekarma núnis áiniawai” tímiayi Jesus.

(2) Yajauch nupá tríkiunam atsaamkamu

²⁴ Jesus ataksha ju métek-taku chichaman áujmatsamiayi. “Shuar Yus akupeamunam pachiinkiertin júnisaiti. Shuar péñker arakan, tríkiun ni nunken araamai. ²⁵ Tura ashí kanararmatai nemasrí kashi taa trikiu arakmanum yajauch nupān aratak ikiukmiai. ²⁶ Trikiu tsapakar nereakui nuyá yajauch nupāsha nusháa nereku asa ti paant ajasmai. ²⁷ Nuna íisar takainia nu ni úuntrin werí tiarmai “Uunta, ¿péñker arak araachmakam. Itiura jusha yajauch nupāsha tsapakuit?” ’

²⁸ ‘Tutai nérentin timiai “Winia nemasur arakuiti.” ’

‘Takui ni takarniurí tiarmai “¿Yajauch nupān uwerat tusam wakeramek?” ’

²⁹ ‘Tutai timiai “Atsá, uwerairap. Yajauch nupā uweaj tukamarum trikiu uweniirum. ³⁰ Iniaisatarum. Antsu métek tsakakti. Júuktin tsawant jeamtai winia takartinian emka yajauch nupān uwer irumar jinkiiawarat tusan akupkartatjai.

Tura áesawartatui. Tura trikiu nerēn júukar péñker ikiusarat tusan akupkartatjai” timiai” tímiayi Jesus.

(3) *Mustasa jĩnkíái*

(*Márkus 4.30-32; Rúkas 13.18-19*)

³¹ Jesus ataksha métek-taku chichaman áujmatsamiayi. “Shuar Yus akupeamunam pachiinkiertin mustasa jĩnkíaiya áintsan̄kete. Shuar péñker nun̄ken araamai. ³² Mustasa jĩnkíáikia imiá uchichiitiat tsapái tsakaakka ashí numichijjái nan̄kaamas uunt ajawai. Ti uunt asamtai chin̄ki ni kanawen pasun̄mainiawai” tímiayi Jesus.

(4) *Karin en̄ketatin*

(*Rúkas 13.20-21*)

³³ Núnisan̄ chíkich métek-taku chichaman áujmatsamiayi. “Shuar Yus akupeamunam pachiinkiertin karinia áintsan̄kete. Nuwá nijiamchiniam karinia en̄kea mashi páchimiawai. Tura nu mash karim̄tikiawai” tímiayi.

Jesus aya métek-taku chichamjain̄ jintintiamiania nu

(*Márkus 4.33-34*)

³⁴⁻³⁵ Ashí nuna Jesus métek-taku chichamjai áujmatsamiayi. Yaunchu Yúsna etserin timia nu uminkiat̄i tusa túramiayi. Etserin juna áarmiayi:

“Métek-taku chichamjai áujmattiatjai. Yámankam̄taiknumiá nékashtain̄ etserkattajai” tu áarmiayi.

Nu asamtai aya métek-taku chichamjain̄ áujmatmiayi Jesus.

Jesus yajauch nupá tríkiunam atsamkamun paant awajsami-ania nu

³⁶ Nuyá shuaran ikiukin Jesus jeá támiayi. Túramtai ni unuiniamur̄i tariar “Yajauch nupá áujmatmena nu paant awajsata” tiarmiayi.

³⁷ Tutai Jesus tímiayi “Wi Aents Ajasuitjai. Wi péñker arakan atsaamkaitjai. ³⁸ Ashí nun̄ka aja áintsaiti. Péñker jĩnkíái Yus-shuaran Yus akupea nuna nakumeawai. Yajauch nupá iwianchna ainia nuna nakumeawai. ³⁹ Tura iwianch ii nemasr̄i asa yajauch nupān arakuiti. Tura nun̄ka amúamunam Yusa suntar̄i arakan júuktinia áintsan̄ shuaran yaruaktatui. ⁴⁰ Yajauch nupá irur jin̄ium áesatniua áanis nun̄ka amúamunam túrunattawai. ⁴¹⁻⁴² Nūi Wi Aents Ajasu asan winia suntarun akupkattajai. Tura ashí tunaan túruinia nunasha tura chikichan tunaanum útsuinia nunasha mash irurar jin̄ium apeawartatui. Nūisha ti úutin ti wáitsatniusha átatui. ⁴³ Antsu péñker túruinia nuka ti shiir wincha ajasar ni Apar̄i akupeana nūi etsa núnis tsáapnin ajasartatui. Wats, kuishim átsuk. Antukta.’

(5) *Kuit wáinkiamu*

44 ‘Shuar Yus akupeamunam pachiinkiatin kuit nunka uukma áintsankete. Shuar nu kuítian wáiniak nuin ataksha uukmai. Tura ti waras waketki nu kuit niiniu atí tusa ashí ni takakman suruk nu nunkan sumakmai.’

(6) Kaya shiirmach ti kuitia nu

45 ‘Shuar Yus akupeamunam pachiinkiatin júnisaiti. Shuar kayachin ti shíрман eak wekaana áintsankete. 46 Tura kayan ashí nankaamas kuit jeean wáiniak waketki ashí takakna nuna suruk nu kayan niiniu atí tusa súmawai.’

(7) Neka

47 ‘Shuar Yus akupeamunam pachiinkiatin júnisaiti. Shuar nekajai namakan achía áintsankete. Nekan nayaantsanam ajuntak niisháa namakaim achíawai. 48 Tura nekanam nemarmatai kukar jiki, nui péñker namaknasha chankinnium chumpiniawai. Tura yajauch namaknaka ajapenawai. 49 Núnisan átatui nunka amúamunam. Yusa suntari taar Yus-shuaran tura íwianch shuaran akantrattawai. 50 Tura íwianch shuarnaka uunt jinium apeattawai. Nuisha ti úutin ti wáitsatin átatui.” Nuna ashí ni unuiniamurijai áujmatsamiayi Jesus.

Yamá nekaamujaisha tura yaunchu nekaamujaisha Yus-shuaran yáintiniaiti

51 Jesus nuna tinia amuk “¿Ju mash antukurmek?” tímiayi.

Tutai ni unuiniamuri “Ee, Uunta, ashí antukji” tiarmiayi.

52 Tuiniakui Jesus tímiayi “Shuar ashí Yúsnan péñker unuimiaruka aents kuítriniua áintsankete. Ni ikiutairiya yamarmancha yaunchu sumakmancha jusamniaiti. Núnisan nu shuar yamá nékamujaisha tura yaunchu nékamujaisha Yus-shuaran yáintiniaiti.”

Jesus Nasarétnum waketkimiania nu

(Márkus 6.1-6; Rúkas 4.16-30)

53 Jesus nu métek-taku chichaman áujmatas amuk nuyá wémiayi. 54 Tura ni péprurin Nasarétnum jeá Israer-shuar iruntainiam wayá unuiniamiayi. Tura nuyá shuar antukar tí enentaimprarmiayi. Tura “¿Jusha tui imiá unuimiaruit, tiarmiayi. Itiurak aents tujintiamun túramniait? 55 Juka karpintíru uchirinchukait. Nukurísha Marichukait. Tura ni yachísha Jakupu, Jusé, Semun, Jútas áiniatsuk. 56 Tura ni umaisha iijiai írutra pujuiniatsuk. ¿Nuikia itiura mash neka?” tiarmiayi. 57 Túrawar Jesusan itiurchat enentáimturarmiayi.

Túramtai Jesus chicharuk “Yúsnan etserniun ashí shuar péñker anturainiawai, antsu aya nuna nunkeyanka ni shuarinkia nin anturainiatsui” tímiayi. 58 Tura nú shuar

Jesusan enentáimtuiniachu asamtai aentsti tujintiamun aya ishichik túramiayi.

14

Imiakratin Juan jakamu

(Márkus 6.14-29; Rúkas 9.7-9)

¹ Kariréa nunkanam Erutis akupniuyayi. Tura Jesus túramuncha antukmiayi. ² Tura ni írutramurín tímiayi “Nuka imiakratin Juan jakamunmaya nantaki túrawai auka. Tuma asa aents tujintiamun túrawai” tímiayi. Kame Erutis Juan kan maa asa tímiayi.

³⁻⁴ Akupin Erutis ni yachí Jiripi nuwen Jirutíasan akintrukmatai Juan Erutisan “Ame yatsumi nuwé akintrukchatniuitme” tímiayi. Tutai Erutis Juan kan achik jirujai jínkiá sepunam enkeatarum tusa akupkamiayi. ⁵ Niisha Juan kan máataj tukamá aentsun ashamiarmiayi. Ashí aents “Juan Yúsnan etserniuiti” enentáimtuiniakui ashammiai. ⁶ Tura akupin Erutis akiiniamu tsawantri jeamtai nú námpertin Jirutíasa nawantri ashí ipiaamu pujuiniamunam jantsemamiayi. Túramtai Erutis shiir enentáimtak ⁷ “Ame ashí wak-eram nu seattia, tímiayi. Nekasan amastatjai, Yussha iirui” tímiayi.

⁸ Tutai nu nuwäch emka ni nukurí akatramu asa Erutisan chicharuk “Imiakratin Juan ka muuké tsupikiam amamkunam enkeram surústá” tímiayi.

⁹ Tutai Erutis wake mesekmiayi. Túrasha “nekas Yus iirui” tiniu asa tura ni amikrishá antukaru asamtai umikmiayi. ¹⁰ Ni suntarín sepunmayan Juan ka muuken tsupik itiarti tusa akupkamiayi. ¹¹ Tura amamkunam itiar nuwächin súarmiayi. Tura niisha ni nukurí susamiayi.

¹² Nuyá Juan ka írutramurí tariar ayashí jukiar iwiarsarmiayi. Túrawar Jesusan ujauwearmiayi.

Jesus senku mir (5000) áishman kan ayuramiania nu

(Márkus 6.30-44; Rúkas 9.10-17; Juan 6.1-14)

¹³ Jesus nuna antuk Nínki ni unuiniamuríjiaín kanunam enkemar arant aents atsamunam wémiayi. Túrasha nuna aents nekaawar kukarak weriarmiayi Jesusan.

¹⁴ Kanunmaya jíniaj tukamá untsurí áentsun wáinkiamiayi. Tura wáiniak waitnentrarmiayi. Tura jáiniancha tsuáarmiayi.

¹⁵ Kíakui ni unuiniamurí Nin tariar tiarmiayi “Kíawai, Uunta. Tura shuar tíjiuch pujaaka atsawai. Ju aents akupkarta. Péprunam wear sumak yuuwearti” tiarmiayi.

¹⁶ Tutai Jesus tímiayi “¿Urukamtaik wearat? Antsu atumek ayuratarum.”

¹⁷ Tutai tiarmiayi “Iikia takaktsuji. Aya senku (5) tantachik jimiarchik namakchijiain takakji.”

¹⁸ Tuíniakui Jesus “Wats, nu itiartitiarum” tímiayi. ¹⁹ Tinia aents chírichriniam pujusarti tusa akupkamiayi. Nuyá senku (5) tantancha jímiar namaknasha achik nayaimpiniam íimias Yúsan yuminsamiayi. Tura puur ni unuiniamurin aents ayuratarum tusa súsarumiayi. ²⁰ Ashí yurumáwar jémarmumiayi. Tura nuyasha puunaruka tuse (12) chankin tiármumiayi. ²¹ Nui yurumáwarmia nusha nuwasha uchisha nekapmatsuk senku mir (5000) aya áishman ármumiayi.

Jesus entsá pátatek wekasamiania nu
(Márkus 6.45-52; Juan 6.16-21)

²² Nuyá Jesus ni unuiniamurin kanunam enkemprarum amain émaa ajatarum tusa akupkarmiayi. Niisha áentsun akupkarmiayi. ²³ Akupkarsha naint waka Yúsan áujumiayi. Káshisha nui Ninki tuke pujumiayi. ²⁴ Tura antumian tí wankkaram asamtai kanu ajapén ajasmatai nase tukumma entsa tamparukumiayi. ²⁵ Tsawaana ai nii tuke wenai Jesus entsá pátatek wekas pujuiniamunam jeamiayi. ²⁶ Tura ni unuiniamuri entsá pátatek wekaan wáinkiar ti sapijmiakarmiayi. Tura ashamainiak “wakanchashit” tiarmiayi.

²⁷ Tuíniakui Jesus tiarmiayi “Kakaram ajastarum. Wiitjai. Ashamprukairap.”

²⁸ Takui Pítiur chicharuk tímiayi “Uunta, Ámetkumka nui wekasa jeatin untsurkata.”

²⁹ Takui Jesus tímiayi “Wats, winitá.”

Tutai Pítiur kanunmaya akaikin Jesus wajana nui jeataj tusa entsá pátatek wekasamiayi. ³⁰ Tura ti nasen násentun nekáa ashamkamiayi. Ashama asa entsá wayamiayi. Tura “Untá, achirkata” tu untsummiai.

³¹ Nu chichamtaik Jesus uwejnum achik júak “Maa, Yus imiá ishichik enentáimtuscheme” tímiayi. ³² Tura kanunam enkemáwarmatai nasesha menkakamiayi.

³³ Túramtai kanunam enkemarmia nusha Jesusan tikishmatar chicharuk “Nekas ame Yusa Uchirinme” tiarmiayi.

Jesus Jinisarítiumiq shuaran tsuármiania nu
(Márkus 6.53-56)

³⁴ Tura amaini katinkiar Jinisarít nunkanam jearmiayi. ³⁵ Tura nuyá aents Jesusan nekaawar nu nunkanam ashí ujanairarmiayi. Túrawar jaancha ni pujamunam itiararmiayi. ³⁶ Ni pushirinkisha antintai tusar seawarmiayi.

15

Shuáran yajauch awajeana nuna Jesus jintintiamiania nu
(Márkus 7.1-23)

¹ Nuyá Jerusaréñ péprunmaya Paríséusha yaunchu akupkamu jintinniurisha Jesusan tariar aniasarmiayi
² “¿Urukamtai ame unuiniamuram ii uuntri yaunchu jintintrarmia nuna uminiatsu? Iis, ikijmiatskesha yurumáiniawai” tiarmiayi.

³ Tuíniakui Jesus aniasarmiayi “¿Urukamtai atumsha Yus akupkamu umirtsuk aya aents akupkamu umiirum? ⁴ Iis, Yus tíchamkia:

“Ame apa, nukusha shiir enentáimtustarum.” Tura “Shuarsha ni aparíncha nukuríncha katsekka nu shuar jakati” tíchamkia.

⁵⁻⁶ Antsu átumka tárume “Shuar ashí niiniu írunka nuna mash “Yúsnaiti” takui nuikia nujai ni aparíncha nukuríncha yáínchamniaiti, tárume. Nin yáínťinian nakitiak ayatik “Ashí winia áiniana nu Yusna asamtai yáínchamniaitjame” títiniaiti” tárume. Núnisrum tákuram Yus akupkamu iniaisarum aya aents akupkamu umiirume, tímiayi. ⁷ Antra chichamtini-aitrume. Yúsna etserin Isayas yaunchu nekas atumin áartampramiayi juna:

⁸ “Ju aents ni wenejai shiir awajtuiniawai, tura ni enentái jeachat pujuiniawai. ⁹ Tura tukeneasan shiir awajtuiniawai. Aentsu chichamen jintintiainiayat “Yusa chichamente” tuiniawai.” Tu áarmiayi” tímiayi Jesus.

¹⁰ Tinia shuaran untuk tiarmiayi “Ju antukrum péñker nekaatarum. ¹¹ Aents yúana nuka shuáran yajauch awajsashtatui. Antsu wenunmaya jiinia nuka shuáran yajauch awajeawai” tímiayi.

¹² Nuyá ni unuiniamuri Jesusan tariar “Maa, Paríséu ame chichammin antukar ti itiurchat enentáimprarai” tiarmiayi.

¹³⁻¹⁴ Tuíniakui Jesus tímiayi “Ikiuktiarum. Kusuru áintsan áiniawai. Tura kusuruncha jintintiainiawai. Mai kusuru ásar mai wáñnam akaiki iniaawartatui. Wats, ajanam nupá áintsan ainiawai. Tura ashí winia Apar nayaimpiniam pujana nu araachmaka takamtsuk uwé ajapamu átatui” tímiayi Jesus.

¹⁵ Takui Pítiur Jesusan tímiayi “Nu métek-taku chicham paant awajsata.”

¹⁶ Tutai Jesus tímiayi “¿Atumsha nekaachurmek. ¹⁷ Enentáimprachurmek? Ashí wenunam wayaana nu wakenam wéatsuk. Tura nuyá iniankastiniaiti. ¹⁸ Antsu wenunmaya jiinia nu enentáinmaya jiiniu asa áentsun yajauch awajeawai. ¹⁹ Enentáinmaya ashí yajauch enentáimsatin jiiniainiawai. Mankartuatniusha, chikicha

nuwé kasamkatniusha, tsanirmatniusha, kasamkatniusha, wáitruatniusha, yajauch áujmatsatniusha ²⁰ ashí nu áiniawai nekaska shuáran yajauch awajeana nu. Tura ikijmiatsuk yurumátniuka shuáran ni enentáin yajauch awajeatsui” tímiayi.

Nuwá Israer-shuarcha Jesusan enentáimtusmiania nu
(Márkus 7.24-30)

²¹ Jesus nuyá jiinki Tiru péprunmasha Sitiun péprunmasha wémiayi. ²² Tura nu nunkanmaya nuwá Jesusan tarí tímiayi “Unta, uunt akupin Tawit ame weatrum asamtai winia waitnentrurta. Nawantur yajauch wakantruku asa ti wáitrutawai” tímiayi.

²³ Tura Jesus áikchamiayi. Tura ni unuiniamurí tariat “Awemata, tiarmiayi. Tuke untsunki apapétmaji” tiarmiayi.

²⁴ Nuyá Jesus tímiayi “Aya Israer-shuarnum menkakarú áinia nuna eaktinian Yus akuptukuíti.”

²⁵ Túrasha nuwá tikishmatar tímiayi “Unta, waitnentrurta.”

²⁶ Tutai Jesus tímiayi “¿Uchí apatkurí jurukir yawá susamniakait?” tímiayi.

²⁷ Tutai nuwá tímiayi “Nekas, Unta, tame. Tura yawasha ni aentsrí yurumainiakui nunká iniaarun yuúniatsuk.”

²⁸ Takui Jesus tímiayi “Maku, nekas Winia enentáimtursaitme. Ame wakeram núnisan atí” tímiayi. Tura nu chichamaik ni nawantrí péñker ajasmiai.

Jesus untsurí jáinian tsuararmiania nu

²⁹ Jesus nuyá jiinki Kariréa antumianka káanmatkarin waketkimiayi. Tura naint waka nuí pujusmiayi. ³⁰ Nuí untsurí aents Nin tariat shutuapnasha kusuruncha chichachuncha tsupirkamuncha chíkich jáiniancha itiariarmiayi. Túrawar nawenam aeprusarmiayi. Túram tsuararmiayi. ³¹ Nuna ísar chichachusha chichainiakui, tsupirkamusha péñker ajainiakui, shutuapsha péñker wekainiakui, kusurusha wáinmainiakui, ti shiir enentáimprarmiayi. Yus ni áentsrin Israeran yáinmatai shiir yumiñsarmiayi.

Jesus kuatru mir (4000) áishmankan ayuramiania nu
(Márkus 8.1-10)

³² Nuyá Jesus ni unuiniamurín untsukar tiarmiayi “Ju aentsun waitnentinaiajai. Warí, menaintiu tsawant Wijai yurumtsuk yujainiatsuk. Ayurtsuk ni jeen akupkachminiaitjai. Jintiá pimpiki wáitsartatui.”

³³ Ni unuiniamurí tiarmiayi “Túrasha, Unta, ¿shuar atsaasha tuyan yurumak imiá sumaktají ju aents ayurawartincha?”

³⁴ Jesus aniasarmiayi “¿Urutma tanta takakrum?”

Tutai niisha “Siati (7) tanta nuyá ishichik namak takakji” tiarmiayi.

³⁵ Nuyá aents nunká pujusarti tusa akupkamiayi. ³⁶ Tura siati tantan achik namaknasha achik nuyá Yúsan yumı̄nsamiayi. Tura puur aents ayuratarum tusa ni unuiniamurı̄n susamiayi. ³⁷ Ashı́ yurumáwar jémararmiayi. Tura puunaru siati chan̄kin tiármiai. ³⁸ Tura nuı̄ yurumáwaruka nuwasha uchisha nekapmatsuk aya áishman̄kak kuatru mir (4000) ármiayi. ³⁹ Nuyá Jesus áentsun akupak kanunam en̄kemar Maktara nun̄kanam wémiayi.

16

Pariséusha Satuséusha iniakmamurı̄n Jesusan seawarmia-nia nu

(Márkus 8.11-13; Rúkas 12.54-56)

¹ Paríséusha tura Satuséusha Jesusan nekapsatai tusar tariarmiayi. Túrawar “Ame Yúsaiyáitkiumka kakarmarmijjái nayaimpinnmayá iniakmasta, iisha wáinkiatái,” tiarmiayi.

² Tutai Jesus tímiayi “Átumka “Kapaaku péetar kintiamkui kashin esatrurtatui” tíniuitrume. ³ Túrusha “Te ajas kapaaku péetar tsawaakui yumi yajauch átatui” tíniuitrume. Tura nekasaiti. Maa, átumka nayaim ísrum ju nun̄kanam túrunattana nu nékarme. Antsu Yus yamáı̄ ju nun̄kanam tura nuka nékatsrume. Ántrairume. ⁴ Aents yajauch ásar tura Yusan enentáimtachu ásar kakarmajái iniakmamun wakeruiniawai. Túrusha áyatik Junas túrunamia nuke iniakmastiniaiti” tímiayi. Tinia ikiuak wémiayi.

Pariséusha Satuséusha jintintiainia nu aneartiniaiti

(Márkus 8.14-21)

⁵ Tura entsá amaini katı̄nkiar ni unuiniamurı̄n tantan júkitniun kajinmatkiarmiayi. ⁶ Nuyá Jesus tímiayi “Wáinkiatarum, Paríséusha Satuséusha wakaprutai takakainia nújajsha aneartarum.”

⁷ Tutai ni unuiniamurı̄n tiarmiayi “Ii tanta itiachakrin tátsuk.”

⁸ Jesus nuna antuk tímiayi “¿Urukamtai tanta itiachji tunaiyarum. Yusa kakarmari kajinmatkintrumek. ⁹ Sen̄ku tantajái túramiaj nu kajinmatkintrumek. Sen̄ku mir (5000) áishman̄kan ayuramtai untsurı̄ chan̄kin tiármia nu enentáimtsurmek. ¹⁰ Tura siati tantajái kuatru mir (4000) áishman̄kan ayuramtai nuna ishichik chan̄kin tiármia nu kajinmatkintrumek. ¹¹ Itiurak imiá nékatsrum? Wi Paríséu wakaprutairı̄sha Satuséu wakaprutairı̄sha aneartarum tákun pen̄ké tantan tátsujái” tímiayi. ¹² Nuna

Jesus takui ni unuiniamurisha nekaawarmiyai. Penké tantaa wakaprutairin tíchamiyai antsu Paríséusha Satuséusha unuiniatairin tímiyai.

Pítiur Jesusan Yus anaikiamun paant ujakmiania nu (Márkus 8.27-30; Rúkas 9.18-21)

13 Tura Sesaria-jiripiunam jeawar Jesus ni unuiniamurin aniasarmiyai “Aents Ajasuitjiana juna ýyaiti turutainiawa Winia?”

14 Niisha ayak tiarmiyai “Chíkich, imiakratin Juánkaiti turamainiawai. Chíkichka, Eríasaiti turamainiawai. Chíkichcha Jeremíasaiti, chíkichcha chíkich aents Yúsnan etserniuiti turamainiawai” tiarmiyai.

15 Tutai nincha aniiniak “¿Atumsha yaiti túrutrum?” tímiyai.

16 Semun Pítrusha “Ámetme Kristu, Yus Anaikiamu. Nekas iwiaaku Yusa Uchirínme” tímiyai.

17 Tutai Jesus tímiyai “Shiiraitme Junasa uchirí Semunka. Núnaka aents ujatmakchaiti antsu winia Apar nayaimpiniam pujana nu ujatmakmatai nekaam tame. 18 Tura Wisha tájame, ame Pítruitme, kayach tútaim. Nu kayanam jea jeam-tinia áintsan Yus-shuaran ekenin tsakatmartatjai. Túramtai jákatniusha tura Yusa nemasrisha nu jeamman pukukchat-tawai. 19 Yus akupeamu yawincha amastatjai. Ju nunkanam jiníkiatniusha atíatniusha amasmaiti. Tuma asamtai ame ju nunkanam suritiam nu nayaimpinmasha suritniaktatui. Tura ju nunkanam tsankateam nu nayaimpinmasha tsankatnaktatui” tímiyai. 20 Nuna tinia Jesus ni unuiniamurin Krístuitiaj nu etserkairap tinia akupkarmiyai.

Jesus Nin máatniun etsertumakmiania nu (Márkus 8.37-9.1; Rúkas 9.22-27)

21 Nuyá Jesus juna unuiniatan naníkammiyai. “Wi Jerusarénum wétiniaitjai. Nui Israer-shuara úuntrisha, Israer-patri úuntrisha, Israer-shuara jintinniurisha ti wáitkiarsartatui. Nuyá mantuawartatui túrasha menaintiú tsawantai nantaktiatjai.”

22 Takui Pítiur arantach jukí chicharuk tímiyai “Uunta, nuka penké áchatniuiti. Áminkia túrutmacharminiaiti.”

23 Jesus ayanmatar Pítrun tímiyai “Werumta, Satanása. Ya-jauch awajtame. Ámeka Yus wakeramu enentáimtsume. Antsu jú nunkanam enentáimainia áinis enentáimme.”

24 Nuyá Jesus ashí ni unuiniamurin tímiyai “Shuar Winia nemartustaj tusa wakerakka ni wakeramurin iniais ni krusi yanaki Winia nemartusti. 25 Shuar áyatik pénger pujustaj tákunka nu shuar uwemtsuk jakattawai. Antsu jákatniuitkuisha pénger pujustinian enentáimtsuna nú shuar

nekas iwiaakman wainkiattawai. ²⁶ Wats, shuar ashí jú nun_{kan}am ír_{unna} nuna sumakka tura nuj_{ai} ni wakan_i émes_{seak} ¿itiurak p_{én}ker puj_{ustín}? Shuara wakan_i emes_{ramu} ¿ashí jú nun_{kan}am ír_{unna} nuj_{ai} iwiam_{niakait}? ²⁷ Wi Aents Ajasu asan, winia Aparu kakarmari_{jai} tura ni suntari_{jai} tana ashí shuáran ni takasmaj_{ai} métek akiktat_{jai}. ²⁸ Paant tájarme, shuar ju_i wajainia ju játsuk Wi akupin ajasmatai wáitkiartatui” tímiayi.

17

Jesus nushá iira ajasmiania nu

(Márkus 9.2-13; Rúkas 9.28-36)

¹ Nuyá sais (6) tsawant nan_{ka}amasar Pítruncha, Jakupun_{cha}, tura ni yach_i Ju_{an}nasha níniak júkiar Jesus náinnium yakí wakamiayi. ² Nu_i Jesus nusháa iira ajattsarmiayi. Ni yapisha etsaya áinis wincha ajasmiai. Ni pushirisha ti puju jiitsumir ajasmiai. ³ Nu_{isha} Muisaisnasha Eríasnasha Jesus_{jai} chichainian wáinkiar_{miayi}. ⁴ Nuyá Pítiur Jesusan tímiayi “Uunta, ti shiir pujaji ju_i. Wakerakminkia menaint áakmaktai, Áminiu chikichik tura chíkich Muisaisnasha, tura chikichcha Eríasna.” ⁵ Tura Pítiur tu auju wajái yura_{nkim} ti puju amu_{amiayi}. Tura nu yura_{nmin}maya chichaman antukarmiayi. “Júka winia aneamu Uchiruiti, tímiayi. Nin ti shiir enentáimtajai. Nii p_{én}ker anturkatarum” tímiayi. Tu chichasmiai Yus. ⁶ Nuna ni unuiniamur_i antukar ti ashamkar pákea ajakiarmiayi. ⁷ Túrunawarmatai Jesus táriar anti_n “Ashamkairap, nantaktiarum” tiarmiayi. ⁸ Tura pa_{nk}ainiar íim_{iaj} tukamá aya Jesusan wáinkiar_{miayi}.

⁹ Nuyá náinniumi_a akainiak Jesus tiarmiayi “Átum íisurmena nu p_{én}ké etserkairap. Wi Aents Ajasu asan jakamunmaya nantaats_{ai_n} etserkairap’ tímiayi.

¹⁰ Nuyá ni unuiniamur_i Jesusan aniiniak “¿Urukamtai in jintintramin “Kristu táats_{ai_n} Erías emka tátini_{aiti}” tuinia?” tiarmiayi.

¹¹ Tuíniakui Jesus áik_{miayi} “Nekas Erías tátini_{aiti}. Tura nii mash iwiarattawai. ¹² Kame nekas Erías táwi_{ti} tura nin nekaacharmai. Antsu aents wakeriarmia nuna túrawar ya_{jauch} awajsarmiayi. Núnisa_n Winiasha, Aents Ajasu a_{in}, wáitkiarsartatui.” ¹³ Nuna takui ni unuiniamur_i imiakratin Ju_{an}kan áujmatui, tu enentáimprarmiayi.

Jesus iwianchin jiiki akupkamiania nu

(Márkus 9.14-29; Rúkas 9.37-43)

¹⁴ Ataksha aents matsatmanum jeawarmatai shuar Jesusan tarí tikishmatramiai. ¹⁵ Tura tímiayi “Uuntá, winia uchir waitnentrutata. Wainchi tukum ti wáitniuiti. Jiniumsha

patamniuiti. Entsasha iniainaiti. ¹⁶ Ame unuiniamurm̃incha itiarjiai túrasha tujinkiarai.”

¹⁷ Takui Jesus ashí tímiayi “Maa, Yus penké enentáimtichuitrume. Imiá úmichuitrume. ¿Wi atumin katsuntu ajatniukaitjiarum? Wats, uchi itiarititiarum’ tímiayi. ¹⁸ Itiarim Jesus yajauch wakanin j̃iki akupkamiayi uchi ayash̃iñia. Túramtai nu chichamaik penker ajasmiayi.

¹⁹ Nuyá urum ni unuiniamur̃i Jesusjai ñinki pujusar áujmatainiak “¿Urukamtai yajauch wakan j̃iktin iikia tujinkiamaj?” tiarmiayi.

²⁰ Tuíniakui Jesus tiarmiayi “Yus nekas enentáimtachu asarum tujinkiarume. Túmaitiat nekasaiti mustasa j̃inkíai timiá uchichitiat ti uunt tsakaatsuk. Núnisan Yus ishichkisha enentáimtakrumka nu naint ékemkata tutai nu naint túrunattawai. Penké tujinkiashtatrume Yus nekas enentáimtakrumka. ²¹ Kame nu yajauch wakan j̃iki akupkatniuka ijiarmam Yus áujsatniuiti.”

Ataksha Jesus ni játniun ujakmiania nu
(Márkus 9.30-32; Rúkas 9.43-45)

²² Jesus ni unuiniamur̃ij̃iai Kariréa nunkanam wekas j̃una ujakarmiayi. “Wi Aents Ajasu asan, aentsnum surunkattajai tura mantamnattajai. ²³ Túrutawarmatai menaintiú tsawantaj̃i nantaktiatjai.” Tura ni unuiniamur̃i nuna antukar ti kúntuts enentáimprarmiayi.

Jesus añkantaitiat akiktinia nuna akikmakmiania nu

²⁴ Jesus ni unuiniamur̃ij̃iai Kapernáum péprunam jeawarmiayi. Tura kuítian achin Pítrun tariar aniasarmiayi “¿Atumi uuntri Israer-patrin akiktinia nuna akínkiait?”

²⁵ Tutai Pítiur “Ee” tímiayi.

Tura Pítiur jeá wayá chichaatsaj̃n Jesus emka tímiayi “Chíkich nunkanmayá akupin ¿yana kuítrij̃iaj̃n takainia. Ni shuár̃iniunkek atantainia. Antsu yajayá shuár̃nan atantainiatsuk. Nekaschak, Semunká?”

²⁶ Tutai Pítiur “Nekas yajayá shuár̃nan atantainiawai” tímiayi.

Jesus tímiayi “Nuikia ni shuari añkant áiniawai. Iisha núnisrik nu akiktin añkantaitji. ²⁷ Túrasha itiurchat enentáimprar̃aj̃n tusar akiktai. Ame tsau jukim entsá wetá. Túram emka namak japikim iwiañkam nũi kuit wáinkiatame. Nu jukim Wíniasha áminiusha akikmakta.”

18

“¿Ya imiá nañkaamantuit?” tunaiyarmiania nu
(Márkus 9.33-37; Rúkas 9.46-48)

¹ Nu tsawantai ni unuiniamuri tariai Jesusan aniasarmiaiyi “Yus akupeamunam pachiinia nu ɛya imiá nan̄kaamantu áminiait?”

² Nuna tuíniakui Jesus uchin untsuk ajapen awajtusar ³ tímiayi “Tí nekasán tájarme, atumí enentáimtai_{ri} yapajiarum uchia áinis ajachkurmeka Yus akupeamunam pachiinki-achminiait_{rume}. ⁴ Nu asamtai ju uchia áinis pééjchach enentáimtumana nuka Yus akupeana nu_i nekas nan̄kaamantu ajasminiaiti. ⁵ Nú arantcha Winia anentuk uchin itiaana nú shuar Winiasha itiaareawai’ tímiayi.

Tsuumainti yajauch túrumtikiatin

(Márkus 9.42-48; Rúkas 17.1-2)

⁶ ‘Shuar ju uchin Winia umirtana nuna tunaanum ajuar-matainkia nuna túratsai_n niisha kuntujén kayajai jínk_{iar} nayaantsanam ajapen kunanam ajunmaít_{kiun}ka maak ainti, tímiayi. ⁷ Ju nunkanam tunáa iniaatai írunuk tuke itiurchataiti. Antsu shuar chikichan tunaanum ajuarka ti itiurchatan inkiuntatui’ tímiayi.

⁸ ‘Nu asamtai ame uwejem tura nawem tunaanum ajunmatniuitkiuinkia tsupikiam ajapata. Kame muntuch pujustin tura ukunam nayaimpiniam wétin pé_nkeraiti. Antsu kajinkiashtin jinium takamtsuk jeatniuka imiá yajauchiiti.

⁹ Núnisan ame jimi tunaanum ajunmatniuitkiuinkia ukuinkiam ajapata. Kame chikichik jiji_{jai} pujusam nayaimpiniam wétin pé_nkeraiti. Antsu jinium mai jii_{ntiuk} wétin imiá yajauchiiti’ tímiayi.

Murik menkaaka áujmatsamu

(Rúkas 15.3-7)

¹⁰ ‘Uchi ainia nu nakit_{rairap}. Yusa suntari nin wáinkiatniua nu winia Aparui tíj_{uch} pujuiniawai. ¹¹ Kame wi Aents Ajasu asan, menkaakarun eaktajtsan táwitjai.’

¹² ‘Enentáimpratarum. Shuar sia_n (100) murikiun takakuiat chikichik menkakamtai untsurí menkakacharun náinnium matsaak_u menkakan eaushtatuak. ¹³ Wáinkiasha untsurí menkakacharua nujai nan̄kaamas waraschattawak.

¹⁴ Núnisan atumi Aparí nayaimpiniam pujana nu, nu uchi chikichkisha menkakacharti tawai’ tímiayi.

Yus-shuarti tsan̄kurnairatin

(Rúkas 17.3)

¹⁵ ‘Chikich Yus-shuar ámin yajauch túrutmakuinkia nii werim áujsata. Tura ámechik werim ame yatsumjai chichasta. Anturtamkuinkia ame yátsum yáink_{iume}. ¹⁶ Tura anturtam-chakuinkia nuyá chikichik shuar jimiara shuarsha jukim ataksha weritia. Túram ataksha áujnaisatarum, niisha paant

nekaawarat tusam. ¹⁷ Túrasha yatsum tuke ántachkuĩkia Yus-shuar iruntainiam iwiainiakta. Túrasha yatsum tuke ántachkuĩkia Yus-shuarcha núnisan enentáimtusta nu shuar.'

¹⁸ 'Nekasan tájarme, jũ nunkanam suritiam nu nayaimpinmasha suritniaktatui. Tura jũ nunkanam tsan̄kateam nu nayaimpinmasha tsan̄katnaktatui.'

¹⁹ 'Núnisnak tájarme, jũ nunkanam pujusrum jimiará Yus-shuartiram métek enentáimprarum winia Apar nayaimpiniam pujana nu seakrumnĩkia wakerarmena nuna suramsat-tarme. ²⁰ Jímiar menaintiusha Yus-shuar Winia enentáimturuk iruntrarmatai Wisha nui niijiai pujajai" tímiayi Jesus.

²¹ Takui Pítiur werí Jesusan aniasmiayi "Uuntá, winia yat-sur yajauch awajtakui ħurutma tsan̄kuratniuitiaj. Siátikik tsan̄kuratniuitiaj?"

²² Jesus aiyak "Siátik tátsujme, antsu inian̄natsuk tsan̄kuratniuitme" tímiayi.

Takakmau tsan̄kurachun pachis áujmatsamiania nu

²³ Tuma asa Jesus Yus akupeamunam pachiinkiaru tsan̄kurnairartiniaiti tusa jũ métek-taku chichaman áujmatuk tímiayi, "Uunt akupin takarĩn tumashin akirkarat tusa untukarmai. ²⁴ Yama nán̄kamuk tí nukap tumashmakua nuna untukmai. Akikmakchamnia ti tumashmakuyi. ²⁵ Tura nu takakmau kuitrĩ atsakui uunt akupin "Yajasma áitkiasrum nuartiuik uchirtiuk ashí waririntiuk suruktatum, timiai. Nu kuitjaj akirkati" timiai.

²⁶ Tutai nu takakmau uunt akupniun tikishmatar seak timiai "Uunta, waitneasam nákarsatá. Auka, mash akiktat-jame." ²⁷ Uunt akupin waitnentar mash tsan̄kur an̄kant akupkamai. ²⁸ Tura nú chichamaik nú takakmau jiinki ni aĩn in̄kiun̄mai. Nú aĩsha nin ishichik tumashiiyi. Tura tséken̄ki suwenam achik chicharuk timiai "Wari akirkata tumashit-mená nu."

²⁹ Tura ni aĩ nin tikishmatar timiai "Waitneasam nákarsatá. Auka, mash akiktatjame" timiai. ³⁰ Túrasha nakitramai. Antsu tsan̄kurtsuk sepunam en̄keamai ashí akírkati tusa. ³¹ Chíkich takakmau nuna wáinkiar ti kúntuts enentáimtuiniak uunt akupniun ashí etsertukarmai. ³² Nuna antuk uunt akupin untuk itia timiai "Yajauchiitme. ħWinia "waitnentrurta" túrutkumin tsan̄kurachmakjam? ³³ Amesha núnismek ame aĩm tsan̄kuratniuitme" timiai. ³⁴ Tinia uunt akupin kajekmai. Tura ashí tumashin akikmatsuk asutniati tusa suntarnum surukmai." ³⁵ Jesus nuna áujmatas amúak tímiayi "Núnisan winia Apar nayaimpiniam pujana nu atumin túrutmattarme atumi yachĩ nekas enentáijiai tsan̄kureachkurminkia."

19

Jesus nuwá ajapatniun áujmatsamiania nu

(Márkus 10.1-12; Rúkas 16.18)

¹ Jesus nuna tinia ikiuak Kariréa nuṅkanmaya wémiayi. Tura Jurtan entsa amain Jutía nuṅkanam jeamiayi. ² Untsurí aents nemariarmiayi tura jáiniancha péñker awajsamiayi.

³ Nuí Paríséu Jesusan nekapsataj tusar aniasarmiayi “¿Shuar ni nuwēn itiurchat akui ajapamniakait?”

⁴ Tutai Jesus tímiayi “¿Átumka Yus-Papí áujdachukaitrum? Yámankamtaik Yuska shuáran áishmanṅkan nuwāncha najanamiayi tawai. ⁵ Tuma asamtai áishman ni aparin ni nukurin ikiuki ni nuwejai tsanin chikichik ayashtinia áinis ajasartatui, tu áarmaiti, tímiayi. ⁶ Tuma asa jímíarcha antsu chikichik ayash áiniawai. Tuma asamtai shuar Yus apatkamia nuna, aents akankashtiniaiti’ tímiayi.

⁷ Takui tiarmiayi “Nuikia ¿urukamtai papí áarar nuwá ajapatniun Muisais tsanṅkatkamia?”

⁸ Tutai Jesus tiarmiayi “Timiá ántichu asakrumin nuwá ajapatniun tsanṅkatkamiayi. Túrasha émkaka núnischauyayi.

⁹ Wí tájarme, shuar ni nuwēn chíkichjai pujuschan ajapeakka tura chikichan nuatkuṅka tsanirmayi. Chíkich áishmanṅsha nuwá ajapamun nuátkaṅka nusha tsanirmayi” tímiayi.

¹⁰ Takui ni unuiniamuri tiarmiayi “Nuikia áishman ni nuwé penké ikiukchamniaitkiuinṅka nuátkachminiaiti.”

¹¹ Jesus tiarmiayi “Nu chichamnaka mash antukchamin áiniawai. Antsu Yus nuna umiktin susamua nuke antukmin áiniawai. ¹² Chíkich chíkich nuatkachmin áiniawai. Chíkich nuátkachmin akiiniawaru áiniawai. Chikichcha aentsjai nuátkachmin najanaru áiniawai. Chikichcha nuátainiatsui Yus akupeamu takatan takastinian. Juna antuktinian jeáka antukti.”

Jesus uchin shiir awajsamiania nu

(Márkus 10.13-16; Rúkas 18.15-17)

¹³ Nuyá Jesusan uchin itiariarmiayi. Nin antin Yúsán áujtusarat tusar wakeriarmiayi. Túruiniakui ni unuiniamuri chicharkarmiayi. ¹⁴ Túruiniakui Jesus tímiayi “Uchi Winí winitin tsanṅkatkatarum. Suritkaiarap. Kame ju uchia áintsan péechach áinian nunak Yus akupkamniaiti.” ¹⁵ Tinia uchin miniakas nuyá wémiayi.

Kuítrintin Jesusjai chichasmiania nu

(Márkus 10.17-31; Rúkas 18.18-30)

¹⁶ Shuar natsa Jesusan tarin aniasmiayi “Uuntá, péñkeraitme. Tuma asam turuttia ¿warinia túrakna tuke iwiaaku átataj?” tímiayi.

17 Tutai Jesus nin enentáimtikrataj tusa tímiayi “¿Urukam-tai péñkeraitme túrutam. Shuar péñkerka atsatsuk. Aya Yúskechukait? Wats, tuke iwiaaku pujustaj tákumka akupkamu umírkartá.”

18 Tutai shuar “¿Tuna nekas umirkatniuitiaj?’ tímiayi.

Takui Jesus tímiayi “Mankartuawaip, tsanirmawaip, kasámkáip, chíkich shuar tsanumpruraip, 19 ame apa nukusha umírkartá, ame shuárum ame ayashim aneamna nútiksamek aneeta.”

20 Tutai natsa tímiayi “Núnaka úchichik mash umiki tsakaruit-jai. Nuyasha ¿warí táatrusa?” tímiayi.

21 Takui Jesus tímiayi “Nekas péñker átaj tákumka, weme ame kuítrum kuítríncha ainia nu súsartá. Tura nayaimpiniam kuítrintin ajastatme. Nuyá Winia nemártústá” tímiayi Jesus.

22 Tura natsa nuna antuk kúntuts wémiayi ti kuítrintin asa.

23 Nuyá Jesus ni unuiniamurín tiarmiayi “Nekasan tájarme, kuítrintin Yus akupeamunam pachiinkiatin ti itiurchataiti.

24 Ataksha tájarme, kamiriuka kawái nankaamas uunt asa auja jiin wayachminiaiti. Núnisan kuítrintin Yus akupeamunam pachiinkiatin ti itiurchataiti.”

25 Ni unuiniamurí nuna antukar antúu ajarmiayi. Túrawar aniniainiarmiayi “¿Nuikia yaki uwempramniat?”

26 Tuíniakui Jesus ashí íisar tímiayi “Aents uwempratniun nekas tujintiainiawai antsu Yuska ashí tujintiatsui.”

27 Nuyá Pítiur tímiayi “Uuntá, iikia ashí ikiukchajik Ámin nemarsatai tusar. ¿Wariñ wáinkiattaj iisha?”

28 Jesus tímiayi “Nekasan tájame, ukunmanka ju nunka yamaram ajastatui. Aents Ajasu asan, Wisha nui, uunt akupin ajastatjai tura atumsha winia nemartusutírmeka Wijíai métek akupin ajastatrume ashí Israer-shuar akupkatin. 29 Tura shuar ni jeencha, yachíncha, umaincha, aparíncha, nukuríncha, nuaríncha, uchiríncha, tura nunkencha Winia anentu asa ikiukin wekaakka, nu shuar nii ikiukmia núnisan yamaisha ti untsurí wáinkiattawai tura ukunmasha tuke shiir pujustatui Yusjai. 30 Untsurí yamáí penkerí áiniana nu ukunam ukunmaani pujusartatui, tura yapajíawar yamáí ukunmaya áiniana nu ukunam emka pujusartatui’ tímiayi Jesus.

20

Jesus takarniun pachis áujmatsamiania nu

1 ‘Yus akupeamunam pachiinkiatin júnisaiti. Nunka nérentin ni araamurín júuktaj tusa káshik iniartaj tusa jínkimiai. 2 Chikichík tenariu kuit jean tsawant takamtsuk akiktajrume tusa chichas ni araamun júuktinian

akupkarmiayi. ³ Nantu takuntaisha ataksha jiinki shuar yujan wáiniak ⁴ timiai “Atumsha winia arakur júuktin yáintkiatarum. Shiir akiktajrume.” Tutai wearmai. ⁵ Ataksha tutupin aī nuyá áankúsha jiinki, núnisan tinia akupkarmai. ⁶ Ataksha nantu patamsaī jínkimiai. Tura shuaran yujan wáiniak “¿Urukantai takakmatskesha áani pujarum?” timiai.’

⁷ “Warí, iincha iniatmainiatsji” tiarmai.’

“Tuíniakui timiai “Atumsha winia nunkarui takautarum. Pénker akiktajrume.”

⁸ ‘Kirit ajátekiái takatrīn wáinniun timiai “Takatan takasaru untsukam akikiarta. Kíarai nan̄kamawaru emka akikiarta. Túram káshik nan̄kamawarujai amuktá” timiai. ⁹ Takui nantu patamsa aī nan̄kamawaru wayawarmatai chikichík tenariu kuit jean ashí akikiarmai. ¹⁰ Mash umintramtai nuyá emka nan̄kamawaru wayawar “nuna nan̄kaamas achikchatjiash” tu enentáimsarmai. Tura chikichík tenariu kuit jean achikiarmai. ¹¹ Achikiar nérenniun itiurchat enentáimturarmai. ¹² Tura tiarmai “Íikia ashí tsawant nantujai wáitsachjik. Ju shuarsha nantu patamsa aī nan̄kamawaruka penké ishichik takasaraí. Túrasha iijiai métek akikiarume” tiarmai.

¹³ Tutai nérentin chikichiniak iniakmas timiai “Umpá, penké kasartsujme. Káshik chikichík tenariu kuit jeá chichasar iijiai iwiarachjik, timiai. ¹⁴ Pai, ame kuítrum achikiume. Nantu patamsaī takasuncha amijiai métek akiktinian wakerajai. ¹⁵ Warí, winia kuítrujai wi wakeramun túrachminkaitaij. Antsu wi tsan̄ka asamtai ¿yajauch enentáimturmek?” timiai.’

¹⁶ ‘Núnisaiti Yus-shuarnum. Émkaru áinia nu uku ártatui. Tura ukuyá áiniana nu, emka ártatui. Untsurí ipiaamu áiniawai tura ishichik achikma áiniawai.” Tu áujmatsamiayi Jesus.

Jesus ataksha ni jákatniurīn etserkamiania nu

(Márkus 10.32-34; Rúkas 18.31-34)

¹⁷ Jesus Jerusarénnum jintiá wesa ni unuiniamurīn akankin tiarmiayi ¹⁸ “Iistarum, Jerusarénnum wéaji. Nuisha Israer-patri úuntrīn tura ni jintinniurīncha Winia surutkartatui. Nuisha, wi Aents Ajasu aīn, “mantamnati” túrutartatui. ¹⁹ Tura apachnium surutkartatui. Nui katsekrucar, awattiar krúsnum máawarti tusar túrutawartatui. Túrasha jakayatan menaintiú tsawantai nantaktiatjai” tímiayi.

Jakupu tura Juanka nukurí Jesusan seamiayi

(Márkus 10.35-45)

²⁰ Nuyá Jakupusha Juansha, mai Sepetéu uchirí, nukuríjiai tariar Jesusan tikishmatrarmiayi. Tura nukurí Jesusan wait-nentrutrarat tusa seamiayi. ²¹ “¿Warí wakeram?” tímiayi Jesus.

Tutai nuwá tímiayi “Ame uunt akupin ajastatmena nui winia uchir chikichik untsuurnumaani chikichcha menaanaani akupkarti tusam apujsarta.”

²² Takui Jesus tiarmiayi “Atum seatrumna nu nékatsrume. ¿Wi wáitsattajna nujai métek túramniakaitrum? Wi wáitsatniun yapá umartinia áinis umartiniaitjai. Núnisan wáitsatniujai imi-aitniua áintsan imiantiniaitjai. ¿Nú piniñnumiá umarminkiaitrum. Núnisan imianminkiaitrum?”

Tutai “Páchitskea” tiarmiayi.

²³ Tuíniakui Jesus tímiayi “Ayu. Winia piniñkruiya umarta-trume. Wi imiantiatjana nujai imiantiatrume. Antsu Wijjai tsaniñkia pujustinniaka Wikia íschatniuitjai, antsu winia Apar iwiarturu áinia nuna nui apujsattawai” tímiayi.

²⁴ Chíkich tias (10) unuiniamuri nuna antukar nu jímíaran kajerarmiayi. ²⁵ Túmainiakui Jesus untsukar tiarmiayi “Ju nékarme, apachniumka kapitíán ajasar ni shuarin nérenniua áinis ti akupenawai. Ni úntrisha waantu enentáimsar “wítjai akupniun” tu enentáimtikiainiawai. ²⁶ Antsu atumjainkia núnis áchatniuiti. Nanakaamaku ajastaj tákunka chikicha yaintri átiniaiti. ²⁷ Ame kapitíántrum ajastaj tákunka ashí shuara yaintri ajástí. ²⁸ Wisha Aents Ajasuitiatan, Winia yáintkiarat tusan táchaitjai antsu shuáran yáintaj tusan táwitjai. Untsurí shuaran tunáa tumashrin akímatkataj tusan jákatniuitjai. Nuna tarimjai” tímiayi Jesus.

Jímiar jii kusurun Jesus tsuármiania nu

(Márkus 10.46-52; Rúkas 18.35-43)

²⁹ Jirikiú péprunmaya wénakui untsurí aents Nin nemari-armiayi. ³⁰ Nui jintiá yantam jímíar jii kusuru pujuarmi-ayi. Jesus wéawai taman antukar kakantar untsukarmiayi. “Uuntá, uunt akupin Tawitia Uchirínchukaitiam. Waitnentrurta” tiarmiayi.

³¹ Tuíniakui “Takamatsatarum” tiarmiayi.

Tútaisha nú nankaamas untsumkarmiayi. “Uuntá, Tawitia Uchiriá, waitnentrurta” tiarmiayi.

³² Tuíniakui Jesus wajas jii kusurun untsukar aniasarmiayi “¿Warí itiurtukat tusarum wakerutarum?”

³³ “Uuntá, iimtiaí tusar wakeraji” tiarmiayi. ³⁴ Tuíniakui Jesus nin waitnentrar ni jiiñ antíñkiarmiayi. Nu chichamaik íimiar niisha Jesusan nemariarmiayi.

21

Jesus Jerusaréñnum wayamiania nu

(Márkus 11.1-11; Rúkas 19.28-40; Juan 12.12-19)

¹ Jerusaréñnum nuntumsar Petpajái péprunam jeawarmi-ayi. Nusha Uriwiu náinnium ayamchiiyayi. Nui jeawar Jesus

ni unuiniamurin jímíaran akupeak tímiayi ² “Tíjiuch péprunam wérum umpuuru umpuuruchijíai jínkiamu wáinkíattarme. Nu atiarum itartitiarum. ³ Tura aents “Urukamtai áitkiarum” túramkurminkia “Uunt wakerawai, tura wárik awainkittiawai” titiarum” tímiayi.

⁴ Tura nusha yaunchu Yúsnan etserin aarmia nu umínkiati tusa tímiayi. Júnis áarmiayi:

⁵ “Ashí Israer-shuarnum ju etserkatarum:

“Iistarum, atumi Akupniuri, péejchach ajas umpuuruchiniam ekeemak winitramprume. Péejchach asa káarak áintstai umpuuru uchirin ekeemak winitrámtatrum,” titiarum.” Tu áarmaiti.

⁶ Tutai nu jímíar unuiniamuri wear Jesus timia núnisan túrawarmiayi. ⁷ Umpuuruchin nukurtiuk itiarmiayi. Tura ni pushirin áitkiaram Jesus entsamkamiayi. ⁸ Shuar untsurí ásar ni wéamunam pushirin áitkiarmiayi. Chikichcha nuká jurukar ni wéamunam áeprurarmiayi. ⁹ Shuar untsurí eem wearmia nusha tura uku winiarmia nusha kakantar untsumiarmiayi. “Juna weətri uunt akupin Tawit asamtai nan̄kaamakuiti. Yusa náariin winiana ju ii Uuntrinti. Shiir atí. Nayaimpin-masha Yus shiir awajsatai.” Tu untsumiarmiayi.

¹⁰ Jesus Jerusarénnun wayámtai ashí shuar ti enentáimainiak “¿Jusha yait?” tiarmiayi. ¹¹ Chikichcha “Yúsnan etserin Jesusaiti, tiarmiayi. Nasarét pepru Kariréa nun̄kanmayaiti” tiarmiayi.

Yusa Uunt Jeen suruktinian Jesus surimkiamiania nu (Márkus 11.15-19; Rúkas 19.45-48; Juan̄ 2.13-22)

¹² Nuyá Jesus Yusa Uunt Jeen wayá kuítian súruiniak tura súmainiak pujan akúprámiayi. Kuítian yapajinia misaríncha ayanturmiayi tura yampitsa súruinia kutan̄kríncha núnisan ayanturmiayi. ¹³ Nuyá tímiayi “Yus-Papinium áarchamukait,

“Yusa Jeenka Yus aujtai jéaiti.” Antsu átumka kasa matsam-taiya nútikiarme” tímiayi.

¹⁴ Nui Yusa Jeen jii kusurarusha shutuapsha Jesusan tari-armiayi. Túramtai tsuáarmiayi. ¹⁵ Tura Israer-shuar pátrisha tura Israer-shuara jintinniurisha aents tujintiamun Jesus túrakui íisar kajerarmiayi. Nu arantcha uchi Yusa Jeen “Juna weətri uunt akupin Tawit asamtai nan̄kaamakuiti” untsumainiakui Jesusan ti kajerarmiayi. ¹⁶ Tura tiarmiayi “¿Ju uchi tuinia nu ántamek?”

Tutai Jesus “Ee, ántajai, tímiayi. Átumka Yus-Papí juna tana júka áujsachukaitrum. Júnis tawai,

“Uchisha kuírchisha Yusa náariin imiá shiir awajtusarat tusa Yus tsan̄katkaiti.” Tu áarmaiti.

17 Nuna tinia ikiuiniak Jerusarénumiá jiinki Petania péprunam we nuí kanarmiayi.

Jesus iikiu numin yumin kramiayi

(Márkus 11.12-14, 20-26)

18 Kashin tsawaar Jerusarénum waketas Jesus tsukaarmiayi. 19 Iikiu numi jintiá yantam wajan wáiniak akaktajtsa werimiayi. Tura werí aya núminiak wáinkiamiayi. Túra numin tímiayi “Atakka nerekchattame.” Takui nu chichamaik káarmiayi.

20 Nuna wáiniak ni unuiniamurí ti enentáimprar aniasarmiayi “¿Urukaku imiá wárik jaka?”

21 Tuíniakui Jesus tiarmiayi “Nekasan tájarme, Yus nekas enentáimtakrumka, “nekaspash túrat” táchakrum iikiun túrajna nusha túramniaitrume. Tura nu arantcha nu naint “Ékemtam nayaantsanam iniaṅta” tutai túrunattawai. 22 Ashí Yus áujeakum seamna nu, Yus nekas enentáimtakum seakmek, wáinkiáttame” tímiayi.

Yusa kakarmarijaj Jesus takasmiania nu

(Márkus 11.27-33; Rúkas 20.1-8)

23 Yusa Uunt Jéen Jesus wayá unuiniamiayi. Turaj Israerpatri uuntri tura Israer-shuara úuntriṣha Jesusan tariar aniasarmiayi “¿Yana chichamejaj ju túram. Ya ju túratniuncha akuptamkait?” tiarmiayi.

24 Tutai Jesus tiarmiayi “Wisha aniaṣtaj tusan wakerajrume. Ju áirkakrumniṅkia Wissha yana chichamejaj túraj nuna ujaktatjarme. 25 Wats, ¿ya imiakratin Juan kan akupkamia. Yusak, aentsuk, ya akupkamia?”

Tutai nuámtak tunainiarmiayi. “Yus akupkamiayi” tákurniṅkia “¿urukamtai enentáimtichuitrum?” túramtatji.

26 Kame “shuar akupkaiti” tákurnisha ashí aents mantamattaji. Warí, ashí niisha Juan Yúsna etserniuyi tuíniatsuk” tiarmiayi. 27 Nuyá Jesusan “Nékatsji” tiarmiayi.

Tutai Jesussha aíiniak “Wátsek, Wissha núnisnak akuptukua nuna ujakchattajrume” tímiayi.

Jimiará uchi tiarmia nuna áujmatsamiania nu

28 Jesus unuiniak tiarmiayi “Enentáimpratarum. Shuar uchin jímiaran takakuuyi. Nuna chikichkin chicharuk timiai “Uchirú, arakur júuktin yamáí wetá.”

29 ‘Tutai uchi “Atsá, nakitiajai” timiai. Tayat urum enentáimiar takaumai.’

30 ‘Nuyá aparí chikichnasha werí núnisaṅ timiai.’

‘Tutai uchi “Apawa, páchitsuk wetajai” timiai, túrasha wéchamai.’

31 ‘¿Túa ni aparí wakeramun umirkama?” tímiayi Jesus.

Tutai “Emkaa nu” tiarmiayi.

Tuíniakui Jesus tímiayi “Nekasan tájarme, yajauch shuar ainia nu tura tsanirma ainia nusha átumka pachiintsrumniñ nii emka Yus akupeamunam pachiinkiertatui. ³² Iis, imi-akratin Juan péñker wekasatniun etserkamiayi, túrasha antukchamarme. Antsu yajauch shuar ainia nu tura tsanirma ainia nu umirkarmiayi. Nusha wáinkiaiatrum atumi tunaari enentáimturchamarme’ tímiayi.

Yajauch takaun áujmatsamiania nu
(Márkus 12.1-12; Rúkas 20.9-19)

³³ Ju chíkich áujmatmasha antuktatum. Nunká nérentin uwa ajan ajammai. Tura wenuimiai. Uwa neketaincha najanamai. Kumpin jeancha najanamai. Tura mash péñker iwiar shuar wáitrukarti tusa apujkimiai. Tura niñkia yajá nunkanam wemai. ³⁴ Tura júuktin tsawant jeamtai juuk nakak akúptúrkartí tusa chíkich takarniuri akupkamai. ³⁵ Tura nui pujuinia nu, akupkamun achikiar chikichnaka katsumkar, chikichnasha máawar, chikichnasha kayajai tukurar máawarmai. ³⁶ Túrawarmatai nérentin takarniun nuna nankaamas akupramai. Ataksha nui pujuarmia nu núnisan túrawarmai. ³⁷ Amúamunam ni uchirín akupeak “Winia uchir asamtai umirkachartimpiash” timiai. ³⁸ Túrasha nu takau nérenniu uchirín wáinkiar “Nuna aparí jakamtai juna mashi júkishtatuak, tiarmai. Maatai, túrar ii nérentin ajastai” tiarmai. ³⁹ Tiar achikiar arant júkiar nui máawarmai.” ⁴⁰ Tinia Jesus aniasarmiayi “Nunká nérenniuri taa nu takaun ¿itiurkatin?” tímiayi.

⁴¹ Tutai tiarmiayi “Nu shuar ti yajauch ásarmatai wait-
nentsuk máawartatui. Tura nu ajan chíkich takaun neren
akanak nin susamnia nuna apujsattawai” tiarmiayi.

⁴² Tuíniakui Jesus tímiayi “Átumka Yus-Papikia ¿penkek
ájchaitrum? Júnis áarmaiti:

“Jea jeamin utsankarmia nú kaya ashí kayajai nankaamas
apujsamuiti. Núnaka ii Uuntri Yus túrait. Iisha íisar ti
enentáimtaji.” Tu áarmaiti.

⁴³ Tuma asamtai tájarme, Yusna írunna nu wáinkiatárum tusa
suramsamuitiat atumíya junas chíkich aents súnastatui. Niisha
awañtukiartatui. ⁴⁴ Tura shuar nu kayan tukumainia nuka
kupintrartatui. Tura nu kaya shuarnum iniarka tsai tsai
awajsattawai auka” tímiayi Jesus.

⁴⁵ Israer-patri uuntrisha Pariséusha Jesus áujmatman an-
tukar “in túramji” tusar achiktaj tiarmiayi. ⁴⁶ Tura ashí aents
“Jesus Yúsnan étserui” tuinia ásarmatai nin ashamkarmiayi.

22

Métek-taku chichamjai nuatnaiyamun Jesus áujmatsamiania nu

¹ Jesus ataksha áujmatuk juna tímiayi: ² “Yus akupeamunam pachiinkiertin júnis enentáimpramniati. Uunt akupin ni uchirí nuáteakui nampermamai. ³ Túrak ni takarniurín ipiaamautarum tusa akupkarmai. Tura ipiaamusha naki-trarmai. ⁴ Ataksha chíkich takarniuncha ipiaamakrum jú titiarum tusa akupkarmai. ““Mash yurumkan iwiarajai, tawai, titiarum, timiai. “Waakashá máatarum tusan akupkar-jai, tawai. Ajaermancha máatarum tusan akupkajai, tawai. Ashí nuatnaiyamunam winiarti,” tawai” titiarum” timiai. ⁵ Támaiatiat nú ipiaamusha nakitrarmai. Chikichik ni nunken wemai. Chikichcha kuítian suruktinian wemai. ⁶ Chikichcha ipiaakratniun achikiar yajauch awajsarmai, tura chikich-naka máawarmai. ⁷ Túramtai uunt akupin ti kajek, ni suntarí mash máatarum túrarum ní jee mash ekeemáktárum tusa akup-karmai. ⁸ Nuyá ataksha ni takarniurín akupkamai. “Nuat-naikiatin jisat mash iwiamuít, timiai. Tura nu ipiaamu winichmin armái. ⁹ Tuma asamtai pepru jintí werum ashí shuar nánkamas wáintrum nu ipiaatarum” timiai. ¹⁰ Takui takarniurí jínkiar pepru jintín wajainian, yajauch shuar-nasha péñker shuarnasha, ashí ipiaawarmai. Túramtai jea piákmai.’

¹¹ ‘Nuyá uunt akupin ipiaamun ísartaj tusa wayamai. Nui shuaran péñker iwiamamprachun wáinkiamai. ¹² Tura timiai “Umpá, ¿urukantai nuatnaiyamunam entsatai pushí entsat-suk wayam?” Tutai nu áishman tákamtak pujusmiayi. ¹³ Nuyá uunt akupin yurunka ajaaman timiai “Achikrum nawen-masha uwejnusha jínkiarum aa jínkrum kiritniunam ajap-atarum. Nujsha ti úutin ti wáitsatin átatui” timiai. ¹⁴ Kame untsurí ipiaamu áiniawai antsu ishichik achikma áiniawai.”

*Uunt akupin Sésar akiktinia nu
(Márkus 12.13-17; Rúkas 20.20-26)*

¹⁵ Nuyá Paríséu chichaman najatawar uyumtikiatai tusar tiarmiayi. ¹⁶ Túrawar ni shuaríncha tura akupin Erutisa ne-marniurísha Jesusan akuptukarmiayi. Kame akupin Erutis uunt akupin Sésara kuitrí wáinin asamtai nu apachniasha akupkarmiayi. Niisha jeariar Jesusan tiarmiayi “Úuntá, ame-sha nekas chicham chichaame. Nu nékaji. Chíkich shuar tuinia nu ántutsuk nekasam Yus-Chicham jintíame. Shuar shiir enentáimturarat tusam jintíatsme, tiarmiayi. ¹⁷ Tuma asamtai jú nekaatai tusar wakeraji. ¿Uunt akupin Sésar akikminkiait?” tiarmiayi.

¹⁸ Jesus ni yajauch enentáijjaj aníam nekáa tiarmiayi “Aya shiir chichamtiniaitrume. ¿Urukamtai uyumatkiarkatin wakerutarum? tímiayi. ¹⁹ Wats, Sésar akiktinia nú kuit itiatitiarum.” Takui chikichik kuítian itiararmiayi. ²⁰ Nuna iis Jesus aniasarmiayi “¿Juí yana yapimpiait tura yana naari áarmait?”

²¹ Tutai “Uunt Sésarna” tiarmiayi.

Tuiniakui Jesus chicharuk tiarmiayi “Nuikia uunt Sésarna nu, Sésar susatarum. Tura Yusna nusha Yus susatarum” tímiayi. ²² Tura nuna antukar ti enentáimprarmiayi. Tura ikiuiniak wearmiayi.

Jesusan jakamunmaya nantaktinian aniasarmiania nu
(Márkus 12.18-27; Rúkas 20.27-40)

²³ Nu tsawantaik Satuséusha Jesusan tariarmiayi. Satuséuka jakamunmaya nantakchatniuiti tuíniawai. Nuna tiniu ásar juna Jesusjai áujmatsarmiayi. ²⁴ “Uuntá, Muisais juna áartampramiai, “áishman uchin yajutmatsuk jakamtainkia ni yachí nu nuwan nuatak ni yachin yajútmátrati,” tu áarmiayi, tiarmiayi. ²⁵ Ayu, íi shuarnum siati (7) yáchintin áarmiayi. Iwiairi nuatak uchin yajutmatsuk jakamiayi. Tura wajen ni yachin ikiurkimiayi. ²⁶ Tura niisha nuatak uchin yajutmatsuk jakamiayi. Tura chikichcha núnisaj jakamiayi. Tura chikichcha siati armia nu ashí nuatkar jákarmiayi. ²⁷ Nuyá nuwasha jakamiayi. ²⁸ Jakamunmaya nantakiar ¿yaki nekas ni aishri ati? Ashí nin nuatkacharmakia” tiarmiayi.

²⁹ Tuíniakui Jesus tímiayi “Yus-Chichamsha nékachkuram tura Yusa kakarmarisha nékachkuram nantaktin atsawai tákuram ti awajiarme. ³⁰ Nekaatarum. Jakamunmaya nantakiaruka nuatkachartatui. Antsu Yusa suntari nayaimpiniam pujuinia núnisar nuartichu pujusartatui. ³¹ Túrasha jakamunmaya nantakiartatna nu nekaatajtsa wakerakrumka ju enentáimsatarum. Muisais aarma nu áujsachukaitrum. Júnisan áarmiayi:

³² “Wiitjai Apráama Yúsrintjai, Isaka Yúsrintjai, Jakupu Yúsrintjai.” Tu áarmiayi.

Watsek, Yuska jaká Yúsrinchuiti. Antsu iwiaaku ana nuna Yúsrinti, tímiayi. Iis, nu shuar imiá yaunchu jákaruitiat Yusjai iwiaaku pujuiniak nantakmin áiniawai” tímiayi. ³³ Ashí aents nuna antukar nu jintintiam ti enentáimprarmiayi.

Yus akupkamu imiá enentáimtustinia nu
(Márkus 12.28-34)

³⁴ Satuséu Jesusan aiktinian tujinkiarumatai Pariséu nuna antukar iruntrarumiayi. ³⁵ Tura chikichik Pariséu jintintin asa Jesusan uyumtikiataj tusa aniasmiayi ³⁶ “Uuntá, ¿túa Yus akupkamu imiá nankaamas enentáimtustiniait?”

³⁷ Tutai Jesus tímiayi “Júiti: “Ame Yúsr^um ashí enentáimj^ai aneeta. Ashí ame wakanmij^aisha tura tuke enentáimt^usam aneeta.” Tu áarmaiti, tímiayi. ³⁸ Núiti emka ashí akupkamu nan^{ka}amas enentáimt^ustinia nu. ³⁹ Chikichcha juj^ai métek-taku awai. Nusha tawai: “Ame írutramuram ame ayashim aneamna nútiks^amek aneeta.” ⁴⁰ Nu jím^aiar akupkamu umirkam ashí Muisais akupkamia nusha tura ashí Yúsⁿan etserin unuiniararmia nusha umirkattame” tímiayi.

Kristu Tawit weeaitiat Yusa Uchirínti

(Márkus 12.35-37; Rúkas 20.41-44)

⁴¹ Tura Pariséu tuke irunar pujuiniakui ⁴² Jesussha anisarmiayi “Kristu tutai ¿ya weeá átiniait. Warí enentáimtarum atumsha?”

Takui “Tawit weeá átiniaiti” tiarmiayi.

⁴³ Tuíniakui Jesus tiarmiayi “Nuikia ¿urukamtai Tawit, Yusa Wakaní “titia” tutai, Krístun “winia Úuntur” tímia? Iis, Tawit juna tímiayi:

⁴⁴ “Uunt Yus winia Úun^unrun juna tímiayi: “Akupin pujutainium, winia untsuuruinⁱ, pujusam ná^akarsata. Ashí ame nemasrumin nupetkan Ámin umirtamkarti tusan amas^atajai” tímiayi Yús.” Tu tímiayi Tawit.

⁴⁵ Watsek, Tawit Krístun “winia Úuntur” taisha ¿itiurak ni pampanmarⁱ áti?” tímiayi Jesus. ⁴⁶ Nuna takui pen^{ke}sha áikcharmiayi. Túrawar atakka uyumamtikiatai tusar anischarmiayi Jesusan.

23

Jesus Pariséuncha Israer-shuara jintiniurinha
“yajauchitruma” timiania nu

(Márkus 12.38-40; Rúkas 11.37-54; 20.45-47)

¹ Jesus ni unuiniamurⁱncha tura ashí shuárnasha tiarmiayi ² “Israer-shuara jintinniurⁱsha tura Pariséusha Muisais akupkamun paant ujatmainiawai. ³ Tuma asamtai tuinia nu umirkatarum. Tú^rasha ni túruinia nu jumamkiirap. Nu shuar shiir chichainiayat nusháa túrin áiniawai. ⁴ Ti itiurchat ana nuna akupeenak ti emeram entsaktinia áintsan áentsun apujtuiniawai. Tú^rasha chikichik uwejéj^aisha ishichkisha takuitniun nakitiainiawai. ⁵ Aya shuar írsarti tusar ashí túruiniawai. Ashí shuar péⁿker enentáimturarti tusar Yus-Papin nijiaⁱncha tura kunturⁱncha ti wan^kkaram awajsar anujak yujainiawai. Tura nu arantcha pushirⁱ sasariarman ashí shuarj^ai nan^{ka}amas esaram awajas wekainiawai. ⁶ Nampernumsha péⁿker iwiamamunam pujustinian wakeruiniawai. Iruntainmasha nan^{ka}amantu ajasa pujustinian

wakeruiniawai. ⁷ Jintíá wekainiaksha ashí aents áujtuiniak “Jintínkiartiniá” turutiarti tusa wakeruiniawai’ tímiayi.

⁸ ‘Túrasha átumka ashí shuar “Jintínkiartiniá” turutiarti tusa enentáimsashtiniaitrume. Átumka nuámtak yáchintrume. Átumka chikichik jintinkiaartin ni naarí Kristu takakrume. Nu asamtai “Jintínkiartiniá” túramcharmin áiniawai. ⁹ Ju nunkanmasha shuar “Aparú” tiirap. Chikichik nayaimpiniam pujana nu atumí Aparínti. ¹⁰ Atumi uuntri aya Krístuk asamtai “Uuntru” túramcharmin áiniawai. ¹¹ Antsu átum írutkamunmaya uunta nuka peejchach átiniaiti. ¹² Shuar nankaamantu ajastaj tákuinkia Yus nin peejchach awajsattawai. Antsu peejchach ana nuna Yus nin nankaamaku awajsattawai’ tímiayi.

¹³ ‘Maa wáinkiatárum jintinniutirmesha, Paríséutirmesha. Ántrarum shiir chichamtiniaitrume. Yus akupeamunam wayátin waiti epennuiutrume. Atumsha wayatsuk chikichcha wayataj tuinia nusha suritniuitrume.’

¹⁴ ‘Maa wáinkiatárum jintinniutirmesha, Paríséutirmesha. Ántrarum shiir chichamtiniaitrume. Wajé jee atankiirum aents enentáimturarain tusarum ti esaram Yus áujtiniuitrume. Túrin asarum átum ti asutniátniuitrume.’

¹⁵ ‘Maa wáinkiatárum jintinniutirmesha, Paríséutirmesha. Ántrarum shiir chichamtiniaitrume. Nunkanmasha nayaantsanmasha yajá wekainiuitrume chikichik shuar winí nemartusat tusarum. Tura atumi nemari ajasmatai atumjai nankaamas tunáa sumamamnia awajearme.’

¹⁶ ‘Wáinkiatárum átumka. Jintinkiaartiniaitiatrum nékachu asarum kusurua áiniuitrume. Ju jintíarme: “Shuar nekasan tajai tusa Yusa Jee páchiakka nii tana nuna umitsuk ikiukminiaiti. Antsu nekasan tajai tusa Yusa Jee kuri ana nuna páchiakka ti nekas umiktiniaiti” tniuitrume. ¹⁷ Nétsetrume. Yúsjainkia ashí kuri ánrachukait. Antsu Yusa Jee írunna nuka aya nuin ikiusma asa Yusna ajasuiti. Tuma asamtai kurijai nankaamas Yusa Jee enentáimtustiniaiti. Enentáimcha asarum kusurua áinin wáakuitrume. ¹⁸ Nu arantcha tniuitrume: “Shuar nekasan tajai tusa naman-maar-Yus-sútain páchiakka nii tana nuna umitsuk ikiukminiaiti. Antsu Yús-sutainiam naman patasman páchiakka ti nekas umiktiniaiti” tniuitrume. ¹⁹ Nétsetrume. Penké naman Yusjai ánrachukait. Aya Yús-sutainiam patasma asa nu naman enentáimtuschatniukait. Enentáimcha asarum kusurua áinin wáakuitrume. ²⁰ Enentáimpratarum. Shuar nekasan tajai tusa Yús-sutain páchiakka aya sútainiak páchiatsui antsu sutaingha tura nuí patasmancha máí-metek páchiawai. ²¹ Núnisan shuar Yusa Jee páchiakka aya nunak páchiatsui antsu Yus nu jeanam pujú asamtai nunasha páchiawai. ²² Núnisan shuar nayaimpin

páchiakka Yus pujutainchsetrume. Penké naman Yusjái ánrachukai. Aya Yúa tura Yus nui pujana nunasha páchiawai.’

23 ‘Maa wáinkiatarum jintinniutirmesha, Paríséutirmesha. Ántrarum shiir chichamtiniaitrume. Kumintsu nukésa, anisa nukésa, menta nukésa tias (10) akantram chikichik akankamu Yus súwitume. Nuka péñkeraiti, ikiukchatniuiti. Túramaitiat nekas péñker túratniua nu túrutsuk ikiuwitume. Yus nekas enentáimtustincha, waitnentáimturincha tura tuke péñker túratniusha enentáimtsuk ikiuwitume. 24 Átumka jintinkiertiniaitiatrum nékachu asarum kusuru áiniuitume. Kutanam yajasmach enketu wáinkiumeka júwitume. Túrayatrum kamiriu wáinkiumeka kawai nankaamas úunt aín takamtsuk kújawitume.’

25 ‘Maa wáinkiatarum jintinniutirmesha, Paríséutirmesha. Ántrarum shiir chichamtiniaitrume. Átumka tsapasha pinínsha initiaani nijiatsuk aya pátatek nijiawitume. Núnisrum pátatek shiir awajmamniuitume tura enentáiminkia kasamkatniusha tura chíkichna wakeruktincha nujái piákuitrume. 26 Kusuru áiniuitume, Paríséutirmeá. Antsu emka initiaani tsapasha pinínsha nijiaktarum. Túrakrumnínkia pátatkesha mai péñker átatui. Núnisrum atumsha atumi enentáin ana nu shiir awajсарum pátatkesha shiir átatume.’

27 ‘Maa wáinkiatarum jintinniutirmesha, Paríséutirmesha. Ántrarum shiir chichamtiniaitrume. Iwiarsamu pújujai yakarar shiir awajsamua áiniuitume. Aani shiir áiniawai. Tura initkia jaká ukunchijiai piákuiti. 28 Núnisaitume atumsha. Chíkich shuar íismaka ti shiira áiniuitume. Túrasha atumi enentáinkia ashí mujjimai piákuiti.’

29 ‘Maa wáinkiatarum jintinniutirmesha, Paríséutirmesha. Ántrarum shiir chichamtiniaitrume. Yaunchu Yúsnan etserin iwiarsamunam átumka shiir enentáimtakrum jea jeamkaitume. Tura péñker shuar yaunchu jákarusha shiir enentáimturta tusarum ni iwiarsamu shiir awajearme. 30 Túrakrum ju tίνiuitume: “Íikia yaunchu ii weatrijiai pujaitkiurkia Yúsnan etserin máatin yáimkiachaaji.” 31 Nujái ti paant chichaarme atumsha. “Íi weatři Yúsnan etserniun máawar tunáa túrin ármiai” tárume. Tura “Yáimkiachaaji” táyatrum, atumsha métek túrin asarum “Nijiai méteketji” tárume. 32 Wats, atumi weatři nankamawarmia nu átum amuktatume’ tímiayi Jesus.

33 ‘Napia áiniuitume. Shuar aya yajauch awajniuitume. Túmatirmesha Yus tunáa shuaran jiniun akupkartatna nuya çitiurak uwempratarum? 34 Untsurí shuaran akuptuktat-jarme. Yúsnan etserniuncha, ti nekancha, jintinkiertinni-

asha akuptuktatjarme. Tura atumsha chíkich máattarme, chikichcha krúsnum ajintruarum máattarme, chikichcha iruntai jeanam asutiáttarme, tura chikichcha ashí nunkanam áintrattarme. ³⁵ Nu tura asarum péñker shuara numpé puarma nujai átum sumamattarme. Yámankamtaik Apir ti péñker shuáraitiat máamuyayi. Tura ukunam Perekíasa uchirí Sakarías atumi uuntri Yusa Jee ámanum namanmaar-Yús-sutai ajapén aténkamunam máawarmiyai. Wats, Apir máamunmaya Sakarías máamunam ashí péñker shuar ti untsurí máamujai sumamattarme. ³⁶ Nekasan tájarme, yamáí pujuinia nú shuar ashí nujai sumamawartatui' tímiayi Jesus.

Jerusarénumia shuaran Jesus aneak úutmiania nu
(Rúkas 13.34-35)

³⁷ Jerusarénumiatirmeá, Yúsnan etserin máiniaitrume. Yus akatar akupturmakmasha kayajai tukuram máiniaitrume. Túrin árumniñ waitnentajrume. Atash ni uchirín weaana áitkiasnak weartinian wakerimjarme, tura nakitramarme. ³⁸ Iistarum. Ame pépruram ajapamuiti. ³⁹ Tura “Yusa náarín winiana nu, shiir atí” títiatrumna nu tsawant jeatsain péñké wáitkiashtatrume. Nuna tájarme” tímiayi Jesus.

24

Yusa Uunt Jee saanaktinian Jesus ujakmiania nu
(Márkus 13.1-2; Rúkas 21.5-6)

¹ Jesus Yusa Uunt Jeeñia jiinki weai ni unuiniamurí nin tariar Jeañ iniaktusar áujmatsarmiyai. ² Tura Jesus tiarmiayi “Nu mash yamáí wáintrume. Tura nekasan tájarme ukunmanka mash saanaktiatui. Chikichík kayaksha ekentramurí atsuttawai” tímiayi.

Amúamu tsawant nekaatin
(Márkus 13.3-23; Rúkas 21.7-24; 12.22-24)

³ Nuyá Uriwiu náinnium wear niñki nují pujusar ni unuiniamurí Jesusan aniasarmiyai “¿Nusha urutaik túrunatí. Tura ame tátincha tura nunka amuukatin tsawant jeakuisha warijjain nekaattají? Nu ujatkata” tiarmiayi.

⁴ Tuíniakui Jesus tímiayi “Aneartarum, anankramawairap. ⁵ Untsurí shuar winia náarun pachisar “wi Krístuitjai” tiar untsurí shuaran anankawartatui. ⁶ Ti untsurí meset chicham antuktatrume túrasha sapijmiakairap. Núnisan átiniaiti nunka amúatsain. ⁷ Apachcha chíkich nunkanmaya apachjai máaniawartatui. Tura ti tsukasha átatui. Sunkursha ti pampartatui. Uusha ti uurkartatui. Nuka untsurí nunkanam ashí túrunawartatui. ⁸ Nujai ti wáitsatin aya yama nankamui’ tímiayi.

⁹ ‘Nuyá atumniasha yajauch awajsarti tusa surutmakartatui. Tura mantamawartatui. Tura winia naar pachia asakrumin ashí shuar muíjramkartatui. ¹⁰ Nu tsawantai untsurí shuar Yúsan iniaisartatui. Túrawar nuamtak muíjniainiak surunairartatui. ¹¹ Untsurí shuar wáitruiniak “wi Yúsnan etserniuitjai” tiartatui. Túrawar untsurí shuáran nusháa enentáimtikrartatui. ¹² Tura tunáa ti ákui nuamtak anenaichartatui. ¹³ Tura shuar ashí nuna tuke katsuntra nu uwemprattawai. ¹⁴ Ashí aents nekaawarat tusa Yus-Chicham ashí nunkanam etsernaktatui. Túramtai amuukatin tsawant jeat-tawai” tímiayi.

¹⁵ Shuar juna áujea nu enentáimprati. Kame Jesus tímiayi “Yúsnan etserin Taniar muijmiamtik tuke emesratin ana nuna yaunchu aar etserkamiayi. Nuka Yusa Jeen wantinkiamtai ¹⁶ ashí shuar Jutía nunkanam írunna nu, muranam pisararti. ¹⁷⁻¹⁸ Ti wárik pisartin asamtai shuar jea yakí pujaksha tura shuar ajanam wekaakusha jeá waketki warirí jukitiaj tíchati. Antsu nuyan wárik pisarti. ¹⁹ Nu tsawantai nuwá ajamtincha tura kuírchin takaku ainia nusha ti wáitsartatui. ²⁰ Ayampratin tsawantajsha tura michá nántutinha nu pisartin tsawant áchati tusarum Yus seatarum. ²¹ Maa, nu tsawantai ti wáitsatin átatui. Ti yáunchusha núnisan wáitsatin atsuuyayi. Ukunmasha atsuttawai. ²² Nu wáitsatin ti esarmaitkiuinikia chikichkísha uwemprachainti. Tura Yus nu wáitsatniun wárik amumtikiattawai. Shuar Niiniu ajasarat tusa achikma ainia nu uwemprarat tusa wárik amumtikiattawai’ tímiayi.

²³ “Tura atumin “Júiti Kristu,” tuíniakuisha tura “Nui pujawai” tuíniakuisha anturkairap. ²⁴ Untsurí shuar Krístuitjai tusar wantinkiertatui. Untsurísha “Yúsnan etserniuitjai” tiartatui. Tura shuáran anankataj tusar aents tujintiamun iniakmasartatui. Tura ti kakarman túruiniak Yús-shuarnasha anankamin áiniakuinkia anankawarainti. ²⁵ Túrunatsain nuna emka ujaajrume. ²⁶ Tuma asamtai “Iis, Kristu nui aents atsamunam pujawai” túramainiakuisha nui wéerap. “Jui úumak pujawai” tuíniakuisha anturkairap. ²⁷ Núnisan úumkan táchattajai. Peem péetuk ti wárik ashí nunkanam wáinkiachminkiait. Núnisnak wi Aents Ajasuka winiakun paant wantinkiatattajai. ²⁸ Wats, jaka tepaana nui chuan káutkachartatuak’ tímiayi.

Kristu tátintri

(Márkus 13.24-37; Rúkas 21.25-33; 17.26-30, 34-36)

²⁹ “Ti wáitsatin nankaamasmatai ti wárik tsawái nantu káinkiatattawai. Tura kashí nantusha etsantrashtatui. Yaasha ashí muchitrattawai. Nayaimpiniam kakaram ainia nusha

peantrartatui. ³⁰ Nuikia Wi Aents Ajasuka, tátiniur paant átatui. Tura ashí nunkanmaya aents Wi winiái wáitkiar asut-tiamattaji tusar útiartatui. Wisha ti kakaram tura Yusa win-charijiai yuranminiam winiái wáitkiartatui. ³¹ Yusa suntarin kachu kakaram umpuarterum tinia akupkamtai nu suntar ashí nunkanmaya ashí Yús-shuaran, Yus achikma ásarmatai, irurartatui' tímiayi.

³² 'Ikiu numiri nakumea nu nekaatarum. Ni nuken eteakui "esat nantu jeatemayi" tátsurmek. ³³ Núnisan ashí ju wáinkiumeka "amuukatin tsawant nekas jeatemayi" títiniaitrume. ³⁴ Nekasan tájarme, yamá aents pujuinia nu amúatsain ashí túrunattawai. ³⁵ Nunkasha nayaimpisha amuukartatui antsu winia chichamur amuukashtatui' tímiayi.

³⁶ 'Tura nu túrunatin tsawant nekanachminiaiti. Yusa sun-tarisha nékainiatsui. Wisha Yusa Uchiríntiatnak nékatsjai. Antsu aya winia Aparuk nékawai' tímiayi.

³⁷ 'Wi tátiniur jeamtai yaunchu Nuai pujumia nú tsawantin túrunamia núnisan átatui. ³⁸ Nu tsawantin, tuke amaartsain, aya júnisan aa asamtai yurumuk umarar pujuarmiayi. Nuat-nainiarmiayi. Ni nawantríncha nuatmamtikarmiayi. Tura tumá pujuinia Nuai uunt kanunam enkemamtai ³⁹ nu aents tuke nékainiatsain ama amarak mash amuukarmiayi. Núnisan átatui Wi tátin jeamtai. ⁴⁰ Nu tswantaik jimiará shuar ajanam pujuttawai. Chikichik junaktiatui tura chíkichkia ikiunkittiwai. ⁴¹ Núnisan jimiará nuwá shana nekeak pu-juttawai. Chikichik junaktiatui chikichcha ikiunkittiwai' tímiayi.

⁴² 'Nu asamtai atumsha iwiarnarum pujustarum. Nekaach-miniaiti uruk áintsuk taritjiarum. ⁴³⁻⁴⁴ Tuma asamtai aneara pujustarum. Wi nekaachmanum tátin júnisan enentáimpramniaiti. Shuar ju kashi kasa tátinian nekaanka kánutsuk kasa táawai tusa iwiarnar nákasainti. Núnisrum an-eara pujutarum.'

Pénker takamtikniuncha yajauch takamtikniuncha Jesus áujmatsamiania nu
(Rúkas 12.41-48)

⁴⁵ 'Shuar pénker uminian tura pénker enentáimniun áujmatsattajai. Nuna uuntri yajá irauweak "Yurumátin jeamtai winia takartin ayuratarum" tíchanpiash. ⁴⁶ Nu takamtikniuncha ni uuntri taa takatrin tímiatrusan túran tarinkia shiir enentáimtusainti. ⁴⁷ Nekasan tájame, umin asamtai ni uuntri ashí ni warirín wáitrukát tusa takatan susattawai. ⁴⁸⁻⁴⁹ Antsu úuntur wau táchattawai tusa takamtikin ni uuntri yáintrín yajauch awajeak tura takatsuk aya

yurumátniun tura nampektinian wararkun̄ka nu takamtikin yajauchiiti. ⁵⁰ Turaj̄ ni uuntrī aya aneachma taa nu takamtikniun, yajauch asamtai, ⁵¹ ti kakaram asutiattawai. Yajauch shuar pujuinia nūi akupkattawai. Nūisha ti wáitiak ti úuttiatui' tímiayi Jesus.

25

Jesus tias (10) nuw̄an áujmatsamiania nu

¹ 'Yus akupeamunam pachiinkiatin júnis átatui. Nu-atnaikiatin jísat akui tias nuw̄a natsa kantiran akaawar nuátkattana nu áishman̄kan in̄kiun̄ jeá itiatatı́ tusar wearmai. ² Sen̄ku nuw̄a enentáimcha armai. Tura chíkich sen̄ku nuw̄a enentáimin armai. ³ Enentáimcha arma nú nuw̄a aya akaamunak jūniak amuukamtaı́ yaraatniun asuitin júkicharmai. ⁴ Antsu chíkich sen̄ku núw̄aka akaamuncha jūniak tura ataksha amuukamtaı́ yaraatniun asuitin júkiarmai. ⁵ Tura j̄iinkarmataı́ nuatkatin áishman̄ warı́ taachkuı́ karı́ pujakuı́ kanararmai. ⁶ Nuyá kashi ajap̄en̄ shuar untsumuk "Pai nuatkatin winiawai. Werirum in̄kiuntarum" timiai. ⁷ Tu untsumun antukar nantakiar kantiran akaataı́ tusar pujursarmai. ⁸ Nuyá sen̄ku nuw̄a enentáimcha arma nu, chíkich nuw̄a enentáimniun tiarmai "Incha atumi asuitirī ishichik ajamprusaitia. Ii kantirı́sha kajiniawai."

⁹ "Tutai chíkich sen̄ku nuw̄a tiarmai "Atsá, warı́ íncha jeartamchattaji. Tura atumnı́a pen̄ké jeashtatui. Nekaska surutainium werum sumaka utumtarum" tiarmai.'

¹⁰ "Tura nuyá sen̄ku nuw̄a enentáimcha arma nu, asuitian sumak utitiaı́ tusar wéaraj̄ ukunam nuatkatin áishman̄ tamai. Túramtai enentáimin nuw̄a arma nuka nuatnaikiatin námpernam nuatkatniujaj̄ wayawarmai. Túramtai wáitin epeniarmai. ¹¹ Tura epeniaraj̄ enentáimcha nu táarmai. Tura tiarmai "Úuntá, waiti uratritia."

¹² "Tu untsumainiakui nu uunt kakerak chichak "Cha, ¿yátsukaitrum? Pen̄ké nékatsjarne" tiarmai." ¹³ Jesus nuna áujmatas umik tímiayi "Aents Ajasuitjai tura tátin tsawantrusha tura uruk aiñ̄ tátaj nusha nékatsrume. Tuma asarum tuke iwiarnarum pujustarum' tímiayi.

Kuit susamun áujmatsamiania nu

¹⁴ 'Núnisan Wi tátin júnisaiti. Shuar chíkich nun̄kanam wéak̄u ni takarniur̄in untukar ni kuı́trīn akanak súsarmai. ¹⁵ Chikichkiniak sen̄ku mir (5.000) kuıtian susamai. Chikich-nasha jimiará mir (2.000) kuitian susamai. Tura chikichnasha chikichik mir (1.000) kuıtian susamai. Nii takastin jearma nujaj̄ métek súsarmai. Tura ikiuak yajá wemai. ¹⁶ Takar̄in sen̄ku mir kuıtian achikmia nujaj̄ takakmas ataksha sen̄ku

mir kuítian patakmai. ¹⁷ Chikichcha núnisan jimiara míran achikmia nujai takakmas ataksha jimiara míran patakmai. ¹⁸ Tura chíkich shuar ni uuntri kuítrín chikichik míran achikmia nuna waa taur úukmai.'

¹⁹ 'Nuyá ukunam nu shuara uuntri támai. Tura kuítian súkiarma nujai itiurkarmakit tusa untsukarmai. ²⁰ Emka senku mir kuítian achikmia nu tamai. Nuyá ni úntrín chíkich senku mir patakman suak timiai "Uuntá, senku mir kuit surusmame. Pai, atak senku míran patasmajai."

²¹ 'Takui ni uuntri timiai "Ti penker takakmauwitme. Nekas uminiaitme. Ishichkijjaisha ti penker takakma asakmin ti núkap yamaikia amastatjai. Winí wayam wijjai ti shiir warasta" timiai.'

²² 'Nuyá chíkich shuar jimiara míran achikmia nu tarí timiai "Uuntá, jimiara mir surusmame. Pai, ataksha jimiara míran patasmajai."

²³ 'Takui ni uuntri timiai "Ti penker takakmauwitme. Nekas uminiaitme. Ishichkijjaisha ti penker takakma asakmin ti núkap yamaikia amastatjai. Winí wayam wijjai ti shiir warasta" timiai.'

²⁴ 'Nuyá chíkich shuar chikichik míran achikmia nu tarí timiai "Uuntá, ti kaje asakmin tura araachiatam tura atsaamprachiatam júurtuktarum tiniu asakmin ²⁵ sapijmiakun ame kuítrumniaka nunká táutran úukmajai. Pai, juíiti ame surukmiam nu" timiai.'

²⁶ 'Takui ni uuntri timiai "Ámeke yajauchiitme. Aya nákiitme. Wi araachiatan tura atsaamprachiatan júurtuktarum tiniuitme túrutsumek. ²⁷ Tu enentáimkiumka zurukamtai kuitiruntainiam ikiurtusamam? Nuikia wi táakun patasan achikiájai" timiai. ²⁸ Nuna tinia nui wajainian tiarmai "Ju shuar chikichik mir kuit atankirum tiaş mir kuítian takaka nu susatarum. ²⁹ Kame núkap takakna nú shuar ataksha patatnastatui tura ampiniartatui. Antsu ishichik takakna nusha ishichik takakuitiat jurunkittiawai. ³⁰ Ju umichu shuarsha aa kiritniunam ajapatarum. Nui ti wáitiak ti úuttiatui" timiai". Tu áujmatsamiayi Jesus.

Akantratin áatna nu

³¹ Jesus áujmatuk tímiayi 'Aents Ajasuitjiana nu ashí akupin asan Yusa suntari énekma winittiajai. Tura Uunt Akupin asan shiir pujutairui pujustatjai. ³² Túramtai ashí nunkanmaya aents Winia irunturartatui. Túrunawarmatai akantrartatjai. Murikiu wáinin kachurtinian tura kachurtichujai akanea nútisanak shuáran akantrattajai. ³³ Tura kachurtichunka, penkera nuna, untsuuruini awajsartatjai. Tura kachurtinniaka, yajauchia nuna, menaaruini awajsartatjai. ³⁴ Túran nekas Uunt Akupin

asan untsuuruinī wajainian títiatjai “Atumniaka winia Apar shiir awajtamsaitrume. Wi akupeajna nui winitiarum. Yus nunkan najanamia tímianaik átum nui warastinian tsankatramkamiarme. ³⁵ Kame Wi tsukamá wekai ayurtuamiarme. Kitiama wekaisha umartin surusmiarme. Wait ajá wekaisha itiaararum ajamprusmiarme. ³⁶ Pushir atsaisha átumka surusmiarme. Jaa tepaisha íiráimiarme. Sepunam enketaisha tarum íiráimiarme” títiatjai. ³⁷ Tutai untsuuruinī wajainia turutiartatui “Uuntá, ¿urutia tsukamá wekaamnisha ayuramaji. Urutiá iisha kitiama wekáa wainkiarsha umartincha amasmaji. ³⁸ Tura urutia wait ajá wekaamnisha tura pushiram mamurmataisha iisha amasmaji. ³⁹ Urutia iisha jaa tepamin tura sepunam enketmin wainkiarsha winitir íimiai?” turutiartatui.’

⁴⁰ “Turutainiakui Wi Uunt Akupin asan tiartatjai “Nekasan tájarme, ashí ju wíi shuar péechachisha waitnentramarum nu Winia anentakum túraitrume” tiartatjai” tímiayi.

⁴¹ “Wi Uunt Akupin asan menaruinī wajainian tiartatjai “Atumsha yajá wetarum. Yajauchijai yuminkramuitrume. Yus uunt iwianchi ni suntarijiai tuke kajinkiashtin jinium apeatniua nui wétatrume atumsha. ⁴² Átumka Wi tsukamai ayurtuachmarme. Kitiamaisha umartin suruschamarme. ⁴³ Wait ajá wekaisha ikiatrachmarme. Pushirun imiampraisha entsartin suruschamarme. Jaa tepaisha tura sepunam enketaisha íiraichmarme” tiartatjai.’

⁴⁴ “Tutai niisha turutiartatui “¿Urutia, Uuntá, tsukamakmesha, kitiamakmesha, wait ajaknísha, pushiram imiampramsha, jáakmesha, tura sepunam wait ajá pujamnisha íisha winitir yáinchamaji?” turutiartatui.’

⁴⁵ “Wi Uunt Akupin asan tiartatjai “Nekasan tájarme, Ashí Wíi shuar, péechachisha waitnentrachmarum nui Winiasha túrutachuitrume” tiartatjai. ⁴⁶ Nu shuarka tuke wáitsatniunam weartatui. Tura Yus achikma ainia nusha tuke iwiaaku Yusjai pujustinnium weartatui” tímiayi Jesus.

26

*Jesus achiktin chichaman jurusarmiania nu
(Márkus 14.1-2; Rúkas 22.1-2; Juan 11.45-53)*

¹ Jesus ashí nuna tinia umik ni unuiniamurin tiarmiayi
² “Atumsha nékarme, Paskua jisat jeatin jimiaarchik tsawant ajasai. Nui Wi Aents Ajasu asamtai krúsnum máawarti tusar surutkartatui” tímiayi.

³ Nuyá Israer-patri uuntrisha Israer-shuara jintinniurisha Israer-shuara úuntrisha Kaipiasa jeen áarin iruntrarmiayi. Kaipiassha Israer-patri uuntriayai. ⁴ Nui anankatin

chichamjaj Jesus achikiar maatai tusar chichaman jurusarmiaiyi. ⁵ Tura tiarmiayi “Jístatin túrachminiaiti aents téetet ajaraj tusar.”

Nuwa Jesusan kunkuinian ukatramiania nu
(Márkus 14.3-9; Juan 12.1-8)

⁶ Jesus Petania péprunam pujus tunamaru Semunka jeen pujumiaiyi. ⁷ Nuj pujaj nuwa ti kuit jeá kunkuinian arapástru tutai kaya najanamunam piakun itiamiayi. Tura Jesus misanam yurumátaj tusa pujan tarí nu kunkuinian ukatramiaiyi. ⁸ Túramtai ni unuiniamurj nuna íisar kajerkar tiarmiayi “¿Urukamtai au kunkuin imiá kuítniasha áantrasha wasurea? ⁹ Antsu ti kuitjaj suruk shuar kuítrinha ainia nuna yáitskesha” tiarmiayi.

¹⁰ Jesus tuinian anturak tiarmiayi “¿Urukamtai ju nuwa yajauch enentáimtarum? Túrutana ju ti pénkeran túrayi. ¹¹ Kuítrinha tuke atumjaj pujushtatuak. Antsu Wikia atumjaj tuke pujushtatjai. ¹² Ju nuwa kunkuinjaj ukatruraj juka, Wi iwiarnastin asamtai áitkiaraiyi. ¹³ Nekasan tájarme, ashí nunkanam uwempratin chicham etsernakui tuke ju nuwa pachinias etsernaktatui. Túramtai ni túramurj kajinmankish-tatui” tímiayi.

Jútas Jesusan surukmiania nu
(Márkus 14.10-11; Rúkas 22.3-6)

¹⁴ Nuyá Jesus tuse (12) unuiniamunmaya chikichik ni naari Jútas Iskariúti Jesusan suruktaj tusa Israer-patri uuntriin wémiayi. ¹⁵ Tura jeari tímiayi “Jesusan achikia amakui ¿urutmá akirkaintrum?” Takui trainta (30) kuítian akikiarmiayi. ¹⁶ Nu akikiam Jútas itiurak Jesusan súsaraintiaj tu enentáimias wekaimiaiyi.

Kristu jakamu enentaimtustin námper
(Márkus 14.12-25; Rúkas 22.7-23; Juan 13.21-30; 1 Kurintiu-nam 11.23-26)

¹⁷ Wakapruachu tantan yurumáinia nú námper yama nankamkui Jesusa unuiniamurj tariar aniasarmiaiyi “¿Tui paskua námper iwiaarakrin yurumáttam?” tiarmiayi.

¹⁸ Tuíniakui Jesus tímiayi “Péprunam wetarum. Nuj chikichik shuara jeen jearum titiarum “Uunta chichaak “Winia tsawantur ishichik ajasai. Tuma asan paskua namperan winia unuiniamurjaj ame jeemiin yurumátaj” tawai” titiarum” tímiayi. ¹⁹ Tutai ni unuiniamurj wear Jesus timia nuna umikiar paskua nampertin yurumátniun iwiararmiayi.

²⁰ Tura kashi ajasáí Jesus ni tuse (12) unuiniamurijíí mis-anam yurumuk pujumiayi. ²¹ Nuí yurumáinií Jesus tiarmi-ayi “Nekasan tájarme, átum pujarmena juyá chikichik Winia surutkattawai.”

²² Nuna takui ti kúntuts enentáimprar mai aní awajiarmiayi “Uuntá, ¿wiáshitiaj?”

²³ Mai tu awajenam Jesus tiarmiayi “Wi nú pininnuman jimiartukan yuajna ju Winia surutkattawai. ²⁴ Wi Aents Ajasu asan Yus Chicham tana nujái métek túrunattajai. Túrasha shuar Winia surutkattana nuka ti asutniátin asa akiin-mainchu ajakuíti” tímiayi.

²⁵ Nuyá Jútas suruktaj tana nu Nin tímiayi “Uuntá nuikia ¿wiáshitiaj?”

Takui Jesus tímiayi “Ee, nekas ámetme.”

²⁶ Tura yurumuk pujuinií Jesus yurumkan achik Yúsán yu-minsamiayi. Tura puur ni unuiniamurín suiniak tímiayi “Ju yuatarum. Juka winia ayashruiti.” ²⁷ Nuyá pininkian achik Yúsán yuminsamiayi. Tura suiniak tiarmiayi “Jusha ashí umartarum. ²⁸ Juka winia numparuiti. Tura winia numpar puármatai, yamaram chicham nekas uminkiattawai tawai. Tura puármatai untsurí shuara tunaarín tsankurattawai. ²⁹ Tura ataksha átum Yus akupea nuí jeatsrumniñ ju uwa yumirín umarchattajai. Tura tsawant jeamtai atumjai Yus akupeana nuí yamarman umartatjai” tímiayi Jesus.

Pítiur natsantratniua nuna Jesus ujakmiayi

(Márkus 14.26-31; Rúkas 22.31-34; Juan 13.36-38)

³⁰ Yús-kantan kantamáwar umikiar Uriwiu náinnium wearmiayi. ³¹ Nuí Jesus tímiayi “Ju kashi átum Winia ashí natsantrurtatume. Kame Yus-Papinium áarmaiti “Murikiu wáinnium mantuattajai túram murik pizarartatui.” Tu áarmaiti. ³² Tura nantakin Kariréa nunkanam Wi émkattajai átum wéatsrumin.”

³³ Takui Pítiur tímiayi “Chíkich natsantramainakuisha wikia túrashtatjai.”

³⁴ Tutai Jesus tímiayi “Nekasan tájame, ju kashi atash shini-atsaíñ menaintiú natsantrurtatme.”

³⁵ Pítiur tímiayi “Maa, Ámijíí métek mántuiniakuisha penkesha natsantrashtatjame.” Ashí ni unuiniamurí núnisan tiarmiayi.

Jesus Jitsemaní ajanam Yúsán áujsamiania nu

(Márkus 14.32-42; Rúkas 22.39-46)

³⁶ Nuyá Jesus ni unuiniamurijíí Jitsemaní náartin ajanam jeá tímiayi “Juí pujusrum nákarsatarum. Aranta aí wena Yúsán áujsatjai.” ³⁷ Tinia Pítruncha tura mai Sepetéu uchirí jukí wémiayi. Nuísha ti kúntuts enentáimiuk wake mesekmiayi.

38 Nuyá Jesus tímiayi “Ti kúntuts jakamnia enentáimjai. Atumsha jui pujusrum Wijiai métek iwiáa pujutarum.”

39 Tinia Jesus arantach we nui tikishmar tsuntsuma Yúsan áujeak tímiayi “Winia Aparú, Wi túrunatniua nu nusháa iwiamniaitkiuin_gkia ju wáitsatniua nu tsaŋkatrukaip. Tura Wi wakeraj núniska áchatí antsu Ame wakeram núnis atí” áujuk tímiayi.

40 Nuyá ni menaintiu unuiniamuri_i pujuiniamunam waketki kanúu pujuinian jeariar Pítrun tímiayi “Átumka chikichik úraksha Wijiai iwiáa pujutin ¿tujinkarmek?

41 Iwiáa pujusrum Yus áuksatarum. Tunáa nupettamkairap. Enentáimin ti wakeriniaitrume túrasha ayáshim pimpiruiti.”

42 Tinia ataksha we Yúsan áujeak tímiayi “Winia Aparú, Wi imiá nekasan wáitsatniuitkiuin_gkia nukia Ame wakeramna nu atí.” Tu áuksamiayi.

43 Nuyá ataksha taa ni menaintiu unuiniamuri_i tarimiayi. Tura kari_i ti nupeteam ataksha kanúu pujuarmiayi.

44 Túmainiakui nin ikiukin ataksha áujmia núnisan_g Yúsan áuksataj tusa waketkimiai. 45 Áujas umik ni unuiniamuri_i pujamunman_g wémiayi. Tura tiarmiayi “Antsu yamaikia kanarum ayampratarum. Ura jeayi. Wi Aents Ajasu ain_g, tunaarintin shuarum surunkatin jeayi. 46 Wari nantaktiarum. Wéartai. Súrutna nu winiawai” tímiayi.

Jesusan achikiarmiania nu

(Márkus 14.43-50; Rúkas 22.47-53; Juan 18.2-11)

47 Jesus tu chichai_i Jútas támiayi. Nusha ni unuiniamuriyayi. Nujai_gsha untsuri_i shuar puniajaisha tura numijjaisha winiarmiayi. Nu shuaran Israer-patri uuntri_gsha Israer-shuara úuntri_gsha akupka ármiayi. 48 Jútas, Jesusan sura, tuke Jesusai_i jeatsuk nu shuaran tiarmiayi “Wi miniakkan mukunattajna núiti. Nu achiktarum.” 49 Nu asantai Jesusan tarí “Winiajai Uuntá” tinia mukunamiayi.

50 Takui Jesus tímiayi “Amikrú, ¿warí winitiam?” Nuyá achikiar Jesusan júkiarmiayi.

51 Nui chikichik Jesusa tsaníakmari_i ni puniarin_g ukuiniak shuara kuishin_g tsupirkamiayi. Nu shuarsha Israer-patri uuntri_i takarniuriyayi. 52 Túramtai Jesus tímiayi “Puniarum enkeata. Ashí puniajai_i máanainia nusha puniajai_i mantamnashtatuak. 53 Wi wakeraknaka winia Aparun timiá untsuri_i suntarin_g seakui páchitsuk akupturkainti. ¿Nu nékatsmek? 54 Tura nuna túramtain_gkia Yus-Chichamnum tana nu uminkia achainti” tímiayi.

⁵⁵ Nuna tinia Jesus nu shuaran tiarmiayi “Átum kasá achiktaj tawa nútiksarum puniajaisha numijjaisha tarutni-urme. Kame ashí tsawantaj Yusa Jeen atumjai pujusan Yus-Chichaman etsermiajai. Nuisha achirkachmarme. ⁵⁶ Antsu yamaikia yaunchu Yúsnan etserin áararmia nu umínkiati tusarum jútikrarme.” Tu tímiayi Jesus.

Nuyá ni unuiniamuri Jesusan Níniak ikiuiniak pisararmi-ayi.

Israer-patri uuntriin Jesusan júkiarmiania nu

(Márkus 14.63-65; Rúkas 22.54-55, 63-71; Juan 18.12-14, 19-24)

⁵⁷ Shuar Jesusan achikiarmia nusha Kaipiasaj júkiarmiayi. Nusha Israer-patri uuntriýayi. Nuisha Israer-shuara jintin-niurisha Israer-shuara uuntri armia nusha irunar mat-sarmiaayi. ⁵⁸ Tura Pítiur árantak Jesusan nemarkin uuntri jeen aari jeamiayi. Tura suntarjai tsanin pujusmiayi Jesusan itiurkartin tusa.

⁵⁹ Tura Israer-patri úuntrisha Israer-shuara úuntrisha tura ashí naamka uunt armia nusha Jesusan wait-chichamjai súmamtiakiatai tusar áujmatiaarmiayi. ⁶⁰ Untsurí shuar ántar tsanumpruiniakuisha máatin chichaman nekaracharmiayi. Nuyá jimiara shuar tsanumpruiniak ⁶¹ tiarmiayi “Ju áishman chichaak “Yusa Uunt Jeen yumpuwaran ataksha menaintiú tsawantin jeamminiaitjai,” tu chichamai” tiarmiayi.

⁶² Nuyá Israer-patri uuntri wajaki Jesusan tímiayi “¿Áimtsumek. Turamainia nusha anturmammek?” ⁶³ Túrasha Jesus tuke áimchamiayi. Túmakui Israer-patri uuntri chicharuk “Nekas iwiaaku Yusa náariin tájame nekasa nu táchakminkia Yus írmastatui. ¿Ame Krístukaitiam. Yusa Uchirínkaitiam? Paant etsérkatá” tímiayi.

⁶⁴ Tutai Jesus tímiayi “Ee, ame támena núitjai. Tura ataksha atumin tájarme, wi Aents Ajasu asan ti kakaram Yusa untsuuriní pujaj wáitkiáttarme. Tura yuranminiam winiaisha wáitkiáttarme” tímiayi.

⁶⁵ Nuyá Patri uuntri nuna antuk ti kajek ni pushiri jaak tímiayi “Ju áishman ni chichamejai Yúsan nekas yajauch chicharniuiti. Nuyásha ¿warí atumaj? Atumsha Yúsan ya-jauch chicharu antukcharumek. ⁶⁶ ¿Waritia enentáimprum?”

Tutai “Sumamayi. Mantamnati” tiarmiayi. ⁶⁷ Tiar usuki-awarmiayi yapiniam. Tura awattiaarmiayi.

Chikichcha yapiniam awati wishikiainiak tiarmiayi ⁶⁸ “Ame Krístuchukaitiam. ¿Ya awattama? Íitsuk nekaata.” Tu chichariaarmiayi.

Pítiur Jesusan natsantramiania nu

(*Márkus 14.66-72; Rúkas 22.56-62; Juan 18.15-18, 25-27*)

⁶⁹ Nu túmaiñ Pítiur aa pujai nuwá chikichik jeari tímiayi “Amesha ju Kariréanmaya Jesus tutaijjai wekaichamkam.”

⁷⁰ Tutai Pítiur ashí ántuiniamunam tímiayi “Nékatsjai. ¿Warittsuk chichaam?”

⁷¹ Nuna tinia jínkitiaj tusa wéai chíkich shuar wáiniak nujujuinian tiarmiayi “Au áishmansha Nasarénumia Jesusjai wekainiuiti.”

⁷² Tutai Pítiur ataksha tímiayi “Nekasan tájarme, ju áishman kan penké nékatsjai.”

⁷³ Árusan nujujuarmia nu Pítrun tariar tiarmiayi “Nekas amesha aujai wekaimiame. Warí, chichammijjai páantaiti.”

⁷⁴ Tutai Pítiur “nekas Yus írui” taku tímiayi “Nu áishman kan penké nékatsjai.” Nuna tai atash shiniukmiayi. ⁷⁵ Túramtai Pítiur Jesus nuik tímia nuna enentáimpramiayi. “Atash shiniatsaiñ menaintiú natsantrurtatme” tímiayi Jesus. Pítiur nuna enentáimiar jínki we ti útmiayi.

27

Piratui Jesusan júkiarmiania nu

(*Márkus 15.1; Rúkas 23.1-2; Juan 18.28-32*)

¹ Kashin tsawarmatai Israer-patri uuntrisha Israer-shuara úuntrisha Jesus maatai tiarmiayi. ² Tiar Jesusan jínkiawar apachi uuntrin Punsu Piratui júkiarmiayi.

Jútas máamamiania nu

³ Jútas Jesusan suruk tura máatai tuínian antuk enentáimiar trainta kuítian Israer-patri uuntrincha Israer-shuara úuntrincha awantukiarmiayi. ⁴ Tura tímiayi “Nu áishman tunaarinchan máatarum tusan surukan wi sumamajai.”

Takui tiarmiayi “Nusha íjiaisha warí urukatin. Nuka amek íschatniukaitiam.” ⁵ Tinia Jútas nuju Yusa Uunt Jee kuítian utsan ikuak nuyá we kajempramiayi. ⁶ Nuyá Israer-patri uuntri nu kuítian júukar tiarmiayi “Ju kuit shuar sumakma asamtai Yusa kuítrijjai irurchamniaiti.” ⁷ Tura nuamtak áujmatsar “nunka sumaktai” tiar Nuwe Najantai nunkan sumakarmiayi yajaya shuar nuju iwiarsatniun. ⁸ Shuar sumakma kuitjai sumakma asamtai yamaisha Numpá Nunka tuke tuíniawai. ⁹⁻¹⁰ Nujai yaunchu Yúsnan etserin Jeremías timia nu uminkiamiayi:

“Uunt Yus turutmia núnisan túrawarmiayi. Israer-shuar trainta kuítian seawarmatai nuna akantrar nujai Nuwe Najantai nunkan sumakarmiayi.” Tu áarmiayi.

Piratu Jesusan aníasmiania nu

(*Márkus 15.2-5; Rúkas 23.3-5; Juan 18.33-38*)

11 Jesusan apachi úuntriin ejeniarmatai nii aniasmiayi “¿Nekasmek Israer-shuara uunt akupniurintiam?”

Tutai Jesus “Ame támena núitjai’ t́ímiayi.

12 Nuyá Israer-patri úuntrisha Israer-shuara úuntrisha súmamtikia Jesus pachischamiayi. 13 Nuyá Piratu t́ímiayi “Ashí yajauch chichartamainia nu ¿anturmammek?” 14 Tútaisha Jesus penké áimkiachmiayi. Túmakui akupin ti enentáimiar t́itinian nekaachmiayi.

Piratu Jesusan “mantamnati” t́ímiania nu

(Márkus 15.6-20; Rúkas 23.13-25; Juan 18.39-19.16)

15 Jísat tsawantin apachi uuntri Israer-shuar shiir enentáimprarat tusa sepunam enketun shuar wakeramun jiki ankant akupniuyayi. 16 Nu i sepunam tunáa shuar Parapás náartin pujumiayi. Ashí shuar nékarmiayi. 17 Tuma asantai Piratu Israer-shuar iruntrarun aniasmiayi “¿Yana ankant akupkat tusarum wakerarum. Parapásnak akupkattaj; Kristu tutai Jesusnak akupkattaj?” t́ímiayi. 18 Kame Israer-shuar ántar kajerainiak ni itiarmian nekaamiayi.

19 Tura Piratu nuna inintrak pjai ni nuari chichaman akuptukmiayi. “Ju pénker áishman súmamtikiatniujai pachiinkiaip. Mese克蘭am nii áitkiatniun nekaan wáitsan tsawarjai” t́ímiayi.

20 Túrasha Israer-patri úuntrisha Israer-shuara úuntrisha “Parapás ankant wetí, tura Jesus mantamnati” titiarum tusar shuáran akatrarmiayi. 21 Apachi akupniuri ataksha aniasarmiayi “Ju jimiará áentsun ¿yana ankant akupkat tusarum wakerarum?”

Tutai “Parapás” tiarmiayi.

22 Tutai aniasarmiayi “Jesusnasha. Yusa Anaikiamuri Kristu tuinia nunasha, ¿itiúrkáttaja?”

Tutai ashí “Krúsnum máatá” tiarmiayi.

23 Tuíniakui Piratu tiarmiayi “¿Warí yajauchinia túrait?”

Tutai kakantar untsumuk “Krúsnum máatá” tiarmiayi.

24 Tura Piratu Jesus uwemtikrachminiaitkiui antsu ashí shuar charaatum ajainiakui entsa uturtitiarum tusa seamiayi. Tura ashí íimiainiain ikijmiak t́ímiayi “Ju pénker áishman máatniunam wikia pachiintsujai. Antsu atumek íistarum.”

25 Tutai ashí shuar tiarmiayi “Iik ii shuarijai ju áishman máatin íistaji.”

26 Nuyá Piratu Parapásan ankant akupkamiayi. Tura Jesus asutiárum krúsnum máatárum tusa akupkamiayi. 27 Nuyá akupin pujutai jeanam akupniu suntari Jesusan júkiar ashí suntaraim irunturarmiayi. 28 Tura pushiri áitkiar akupin entsatain kapaaku pushin áentsrarmiayi. 29 Múuknúmsha

tawaspan janki najanamun etsemtikiarmiayi. Tura karisun akupniu numirja áaniun untsuurin̄i ataksarmiayi. Túrawar wishikiainiak tikishmatrar tiarmiayi “Israer-shuara uunt akupniur̄inme.” ³⁰ Tiar usukiarmiayi. Tura karisun jurukiar múuknum awatiarmiayi. ³¹ Tura núkap wishikrar kap̄aaku pushin áitkiar ni pushir̄in áentsrarmiayi. Nuyá krúsnum maatai tusar júkiarmiayi.

Jesusan krúsnum máawarmiania nu

(Márkus 15.21-32; Rúkas 23.26-43; Juan 19.17-27)

³² Jesusan jukí wésar Serini nun̄kanmaya shuaran, ni naari Semun̄, Jesusa krús̄in jurukit tusar achikiarmiayi. ³³ Nuyá Kúrkutanam ejeniarmiayi. Kúrkutaka, shuar chichamjain̄kia, muuka ukunch tútainti. ³⁴ Nuī Jesusan umutai yap̄ajai pachimpra najanamun áartaj tusar súsarmiayi. Tura Jesus apas iis umarchamiayi.

³⁵ Krúsnum ajintrurar suntar yáki Jesusa pushir̄in jukit tusar nakurusar awakmakua nuna súsarmiayi. Nújain̄kia yaunchu Yúsna etserin áarmia nu uminkiamiayi:

“Winia entsarmarun akantrarmiayi tura nakurusar awakmakua nuna winia pushirun súsarmiayi.” Tu áarmiayi.

³⁶ Nuyá wáinkiat̄ai tusar pujursarmiayi. ³⁷ Tura urukamtai máamuit ashí aents nekaawarti tusa áarman muuknumaani anujtukarmiayi. *JUITI JESUS, ISRAERA UUNT AKUPNIURI*
Tu áarmauyayi.

³⁸ Núnisan̄ Niijjaī métek jimiará kasa chikichkin untsuurnu-man̄i tura chikichnasha menaanman̄i krúsnum máawarmiayi. ³⁹ Shuar nuī nan̄kaamainiak muuke pēatar wishikiainiak ⁴⁰ tiarmiayi “Ame Yusa Uunt Jeē sá̄akim menaintiú tsawantin jeamtatjaī tíchakaitiam. Nekas Yusa Uchir̄inkiumka krúsnumiā akaikim uwemprata” tiarmiayi.

⁴¹ Núnisan̄ Israer-patri úuntrīsha, Israer-shuara jintinni-ur̄isha, Pariséusha, Israer-shuara úuntrīsha, Jesusan wishikiainiak nuamtak tiarmiayi ⁴² “Chikichnaka uwemtikrati tura Nín̄kikia uwemtsui. Israera Uunt Akupniur̄intkiun̄ka krúsnumiā akaikimtai nekas enentáimtustatji. ⁴³ “Yúsna nekas enentáimtiniaitjai” tawai. Wátsek, Yus nekas Nin aneakka uwemtikrati. “Wi Yusa Uchir̄intjai” turamchamkaj” tiarmiayi. ⁴⁴ Kasá shuarsha Niijjaī ajintruamu armia nusha Nin wishikrarmiayi.

Jesusa jakamuri

(Márkus 15.33-41; Rúkas 23.44-49; Juan 19.28-30)

⁴⁵ Nuyá tutupin̄ aī tee ajasmiai. Túrunayat ataksha āan̄ku tsáapin̄ ajasmiai. ⁴⁶ Nunī aī Jesus kakantar untsumkamiayi. “Erí, Erí, rama sapaktani’ tímiayi. Nusha

shuar chichamjainkia “Yusrú, Yusrú, ¿urukamtai ajapa ikiurkiniam?” tawai. ⁴⁷ Shuar nuĭ wajarmia nusha nuna enentáimtsuk antukar tiarmiayi “Yaunchu Yúsnan etserniun Eríasan untsuawai.” ⁴⁸ Tura chikichik tsékenki we uruchin itiamiayi. Tura churuinian ajamper sapapjaĭ ijiú mukunati tusa susamiayi. ⁴⁹ Tura chikichcha wíshikeak tiarmiayi “Iníáísatá, Erías tarí uwemtikratpiash.”

⁵⁰ Jesus ataksha kakantar untsamak nuyá jakamiayi. ⁵¹ Nu chichamaik Yusa Uunt Jee tarach ajamu yakiiniya achik nunkaani tseu jaanakmiayi. Nunkasha úurkamiayi. Kayasha jakukarmiayi. ⁵² Núnisan iwiarsamusha uraniarmatai untsurí Yus-shuar jákarusha nantakiarmiayi. ⁵³ Nusha emka Jesus nantakmiatai niisha nantakiar iwiarsamun ik-iukiar Yusa péprurĭn Jerusarénum wayawarmatai untsurí shuar wáinkiarimiayi.

⁵⁴ Nuyá suntar Jesusan wáinkiarimia nusha tura ni kapi-tiántrisha nunka úurkamtai nuyá chikichcha ashammai ajas-matai ti sapijmiakarmiayi. Tura tiarmiayi “Ju áishman nekas Yusa Uchirĭnti.”

⁵⁵ Nuĭsha nuwá Jesusan nemariarmia nu, arant wajasar, ii wajaarmiayi. Nusha Kariréanmaya pataatukiar Jesusan yainki ejeniarmiayi. ⁵⁶ Nujai Máktaranmaya Marisha, Sepetéu nuwésha, tura chíkich Marisha ármiayi. Chíkich Marikia Jakupuncha tura Jusenchá nukuríyayi.

Jesus iwiarsamu

(Márkus 15.42-47; Rúkas 23.50-56; Juan 19.38-42)

⁵⁷ Kiaraj shuar ti kuítrintin Arimatéu péprunmaya ni naarĭ Jusé támiayi. Nusha Jesusan enentáimtiniuyayi. ⁵⁸ Nii Piratui we Jesusa ayashin seamiayi. Nin súsarat tusa Piratu akupkamiayi. ⁵⁹ Túram Jusé Jesusa ayashin krusnumĭa jusa ti pénger tarachjai penuarmiayi. ⁶⁰ Tura kaya waa táurmanum yamaram amia nuĭ iwiarsamiayi. Ni iwiarsatin táumtikramunam Jusé iwiarsamiayi. Iwiaras kaya uuntjai etek-tuk ikuak wémiayi. ⁶¹ Nuĭsha Máktaranmaya Marísha tura chíkich Marísha iwiarsamunam naka ii pujuarimiayi.

Jesus iwiarsamun suntar wáinkiarimiania nu

⁶² Nú kíarain ayampratin tsawantna mash iwiarnakui Israer-patri úuntrisha Paríséusha Piratui wearimiayi. ⁶³ Tura tiarmiayi “Uuntá, nu wáitrin áishman iwiaaku pujus “Menaintiú tsawant jakan nantaktiatjai” tĭniuyi. ⁶⁴ Nu asamtai iwiarsamunam menaintiu tsawant suntar wáinkiarat tusa akuptukta. Ni unuiniamurĭ kashi tariar tura ni ayashin kasamkar “Pai, nantakni” shuáran tiarain. Jujainkia nuna nankaamas shuáran anankawarainti” tiarmiayi.

⁶⁵ Tutai Piratu tiarmiayi “Nui suntar takakrume. Werum iwiarsamu urakchamnia pé_ñker wáinkiatár_{um}.” ⁶⁶ Tutai wear iwiarsamun urankashti tusar etektukma in_ñkiun_{manum} ser-
aj_{ai} yakarar ni áarmar_{in} anujtukarmiayi. Tura suntarnasha awajtukiarmiayi.

28

Jesusa nantakmiari

(Márkus 16.1-8; Rúkas 24.1-12; Juan 20.1-10)

¹ Ayampratin tsawant nan_{ka}asmatai tumi_ñtin yama tsawaana ai Máktaranmaya Marisha chíkich Marij_{ia} iwiarsamu iyutai tusar wearmiayi. ² Tumai Yusa suntari nayaimpinmaya iwiarsamun tari kaya atutkamun urak nui pujusmiayi. Túmakui nun_{ka} ti ú_{ur}kamiayi. ³ Yusa suntarisha peemia tímiatrus wí_ncha_uyayi. Pushirisha ti puju áuyayi. ⁴ Tura iwiarsamun wáiniarmia nú suntarsha nuna wáinkiar ashamainiak ti kura_ñkarmiayi. Jaká áinis ajasarmiayi.

⁵ Nuyá nayaimpinmaya suntar nuw_{an} tímiayi “Ashamkairap. Jesus krúsnum máawarmia nu e_{at}srumek. ⁶ Ju_{in}kia pujatsui. Nii timia nú_nisa_ñ nantakniuiti. Pai, áepsarma nu í_{it}iarum. ⁷ Wárik wérum ni unuiniamur_i “Jesus jakamunmaya nantakni tura wari Kariréanam wétatui. Nui werirum wáinkíattarme” titiarum. Wats, nunak tá_{ja}i” tímiayi. ⁸ Tutai nu nuw_a iwiarsamunmaya wárik j_iinkiar ashamainiayat ti warasar tseke waketkiarmiayi ni unuiniamur_{in} ujaktai tusar. ⁹ Tumai Jesus wantintiukarmiayi. Tura “pujarmek” takui Jesusan tariar tikishmatrar nawencha miniakrusar shiir awajsarmiayi. ¹⁰ Túram Jesus tiarmiayi “Ashamprukairap. Werum winia yatsur u_{at}ruk_{tarum}. Kariréanam weartí. Nui wear wáitkiartatui. Tu ujaktarum” tímiayi.

Suntar etserkarmiania nu

¹¹ Nuw_a wéarmatai iwiarsamu wáinin suntarsha péprunam wéar Israer-patri ú_{un}tr_{in} ashí túrunamun u_{ja}karmiayi. ¹² Niisha nuna antukar Israer-shuara ú_{un}trij_{ia}í áujmatsatai tusar wearmiayi. Áujmatsar suntaran ti kuít akikiar ¹³ tiarmiayi “Atumsha étserkuram “Kashi kanararin ni unuiniamur_i taar Jesusa ayashin kasamkarmai” titiarum. ¹⁴ Tura akupin á_{tu}m kanarman nekamtaisha niij_{ia}í ii i_{wi}arattaji atumin yajauch awajtamsa_{in} tusar” tiarmiayi.

¹⁵ Nuyá suntarsha kuítian achikiar tiarmia nuna tímiatrusa_ñ titiái tusar wéarmiai. Tura tuke yamaisha Israer-shuar tu túrunaiti tu_ñniawai.

Jesus ni unuiniamur_{in} akatar akupkamiania nu

(Márkus 16.14-18; Rúkas 24.36-49; Juan 20.19-23)

¹⁶ Nuyá ni auntse (11) unuiniamurí Kariréanam wéarmiayi. Tura Jesus timia nú nainnium jeawar ¹⁷ nuí Jesusan wáinkiar tikishmatrarmiayi. Kame chíkichka Jesusashit tuíniayat Nin wáinkiar tikishmatrarmiayi. ¹⁸ Nuyá Jesus tíjiuch tantá tímiayi “Ashí nayaimpinmasha nuṅkasha akupkatniun kakarman surusuiti. ¹⁹ Tuma asamtai ashí nuṅkanam werum ashí shuar jintintiarum Wíi shuar awajsatarum. Túrarum Yus Apa náarijiaí, Yus Uchi náarijiaí, tura Yus Wakaní náarijiaí imi-aitiarum. ²⁰ Ashí atumin Wi akatramajrum nu nútiksarmek umiktin unuiniartarum. Tura ju nekaatarum: Tuke tsawan-tai ikiutsuk atumjai pujuttajai” tímiayi Jesus.

Yúsan Shiir Chichamen MÁRKUS aarmia nu

Imiakratin Juan̄ka etserkamuri

(Mateu 3.1-12; Rúkas 3.1-9, 15-17; Juan̄ 1.19-28)

¹ Jui Jesukrístunu shiir chicham nán̄kameawai. Jesukrístu Yusa Uchir̄inti.

² Yuska imiakratin Juan̄kan pachis ni etserniur̄in Isayasan ti yaunchu ni Papir̄īn juna áamtikramiayi:

“Iisiana, ame wéamurm̄in emka wetí tusan winia akatra-murun akupeajai. Niisha ame jintimin iwiarattawai.

³ Niisha aents atsamunam untsumuk juna títiatui: “Unta jinti iwiarturtarum; naka awajsatarum.”

Nuke áarmaiti.

⁴ Wats, aents atsamunam imiakratin Juan̄ imiaittsa pujus étseruk, ““tunaarun Yus asakatrurat” tusarum, enentáim ya-pajjár̄um imiantiarum” tímiayi. ⁵ Anturkatai tusar ashí Jutía nuñkanmaya shuar tura Jerusarén peprunmaya shuarsha Nīin tariarmiayi. Taar, ni tunaar̄in ujakarmatai, Juan̄ Jurtan entsanam imiainiarmiayi.

⁶ Juan̄sha kamiriu ur̄e najantramun entsauyayi. Emen-mamkesha nuapeyayi. Tura chinij̄iai yutai-títikriatsnasha yu-uyayi. ⁷ Niisha áentsun ujaak tímiayi “Wíj̄iāinkia nan̄kaamas ana nu winia ukurūi winittiawai. Niisha nekas ii Uuntri asantai, wikia tsuntsumpruan ni sapatr̄i j̄inkiamur̄inkisha atitrachminiaitjai. ⁸ Wikia entsaj̄aīn aya ayashmin imiaa-jrume, antsu Niñkia imiantinia áanis Yusa Wakan̄i atumi enentáin enketramprattarme” tímiayi.

Juan̄ Jesusan imiaimiania nu

(Mateu 3.13-17; Rúkas 3.21-22)

⁹ Juan̄ áentsun imiak pujurainiai, Jesuska Nasarét pepru Kariréa nuñkanam ana nuyá jiinki Juan̄kan tarimiayi. Tura Juan̄ Jurtan̄ entsanam Jesusan imiaimiayi. ¹⁰ Nūin, Jesus entsaya jiiniuk, nayaimpin uranniun wáinkiamiayi. Tura Yusa Wakan̄in yámpitsa núnin najanar Nīin taarun wáinkiamiayi. ¹¹ Tura nayaimpinmaya chichaamun juna antukmiayi, “Ámeká winia aneamu Uchiruitme. Ámin shiir enentáimtajme.”

Uunt iwianch Jesusan anan̄kataj tímiania nu

(Mateu 4.1-11; Rúkas 4.1-13)

¹² Nuyá wárik Yusa Wakaní Jesusan atsamunam jukimiayi. ¹³ Tura nuí, yajasma yujamunam, kuarenta tsawant pujumiayi. Nuí pujai uunt iwianch Satanás naartin Jesusan nekapsataj tusa pujurmiayi. Túramtai Jesusan wáinkiatat tusar nayainpinmaya suntar tariarmiayi.

Kariréa nunkanam ni takatrín Jesus nankammiania nu
(Mateu 4.12-17; Rúkas 4.14-15)

¹⁴ Ukunam, Juan kan sepunam enkeawarmatai, Jesuska Kariréa nunkanam Yusa akupeamuri pachis shiir chichaman etserki támiayi. ¹⁵ “Tsawant jeayi. Shuarnum Yusa akupeamuri jeatemai. Tuma asamtai, yaunchu enentáimsamuram yapajiárum, Uwempratin Chicham umirkatarum” tu etserkamiayi.

Jesus namakan achinian ni unuiniamuri ajasat tusa kuaru achikmiania nu

(Mateu 4.18-22; Rúkas 5.1-11)

¹⁶ Jesus Kariréa antumianka kánmatkariin wekas, namakan achinian Semunnasha ni yachi Antresnasha nekan ajuntuk pujuinian wáinkiamiayi. ¹⁷ Wáiniak “Nemartustarum, tímiayi. Namak achiarmena nútiksanak áentsun-eau Yusna arti tusan awajsatjarne” tímiayi. ¹⁸ Tura nuyanka ni nekarin ajapa ikiuiniak Jesusan nemarsarmiayi.

¹⁹ Nuyasha Jesus ishichik arantach wesa, Sepetéu uchirin Jakupun ni yachin Juánnasha kanunam ni nekarin apaa pujuinian wáinkiamiayi. ²⁰ Wáiniak, nemartusta tusa untsumukarmiayi. Tutai ni aparincha, ni aparí takarniurincha kanunam ikiuiniak Jesusan nemarsarmiayi.

Jesus iwianchin áishmannumia jiki akupkamiania nu
(Rúkas 4.31-37)

²¹ Nuyá Kapernáum péprunam jeawarmiayi. Nuí Israer-shuara ayampratin tsawantri jeakui Jesus Israer-shuar iruntainiam wayá Yus-Chichaman unuiniamiayi. ²² Tura ni jintinniuri jintintiarmin nuna iniankas uunt chichamjai Jesus jintiakui ni chichamen anturkar ti enentáimprarmiayi. ²³ Nuísha nu iruntainiam áishman iwianchraku ámiayi. Ni-isha untsumuk ²⁴ “¿Warí itiurtamkattsamea incha taum, Nasarénumia Jesusa? Wikia nékajme. Ámetme Tunaartichu Yúsaiya winiamna nu. In emestamprataj tusam táchamek” tímiayi.

²⁵ Tutai, Jesus kakantar chicharuk “Takamátsatá. Ni enentáiya jinkitia, tájame” tímiayi.

²⁶ Tutai iwianch áishman kan ukurak ajakniñkiar untsumak kakaar aa jinkimiayi. ²⁷ Nuna wáinkiar, ashamkar nuámtak aniniaisarmiayi. “¿Ausha warinkit. Yamaram chicham warí

chichamait? Ju Jesuska timiá kakaram asa ímia iwianchin akupeatsuk. Iisiana umirainiatsuk” tiarmiayi. ²⁸ Tura ti wárik nu túrunamu ashí Kariréa nunkanam antunkamiayi.

Jesus Semunka tsatsarín tsuármiania nu
(Mateu 8.14-15; Rúkas 4.38-39)

²⁹ Nuyá Israer-shuara iruntai jeenia jiinki Jesuska Jakupujai Juanjaisha we, Semun ni yachi Antresjai pujuarmia nui jeawarmiayi. ³⁰ Semunka tsatsari tsuer peaknum jaa tepemiayi. Núnaka wárik Jesusan ujakarmiayi. ³¹ Nuinkia Jesus werí uwejnium achik iniantkimiayi. Tura nu chichamaik michatramiayi. Michatar, pénger ajas, Jesusnasha ni nemarniuríncha ayurawarmiayi.

Untsurí jaan Jesus pénger awajsarmiania nu
(Mateu 8.16-17; Rúkas 4.40-41)

³² Nu tsawantai kjarai, ashí jáinian, iwianchrukuncha Jesusan itiariarmiayi. ³³ Tura ashí nú péprunmaya shuar taar wáitiniam Jesusan káutkarmiayi. ³⁴ Untsurí shuáran chíkich sunkuraim jáinian Jesus tsuararmiayi. Tura iwianchruku armia nuna enentáiyān iwianchin jiiarkiarmiayi. Jesuska íwianch nékamu asa, winia náarun ántar pachisarain tusa suritkiarmiayi.

Kariréa nunkanam Jesus Yus-Chichaman etserkamiania nu
(Rúkas 4.42-44)

³⁵ Nuyá kashin káshik tsawaatsain Jesus nantaki Yusan áujsataj tusa jiinki atsamunam wémiayi. ³⁶ Tura Semun ni amikrijiai Jesus wemaanum wéarmiayi. ³⁷ Nin wáinkiar “Ashi shuar Ámin eátmainiawai” tiarmiayi.

³⁸ Tutai Jesus chichaak “Chíkich péprunmasha arantach wetai. Nui Yusa chichame etserkatai; nuna túrattsan táwitjai” tímiayi.

³⁹ Nuna ti ashí Kariréa nunkanam Israer-shuar iruntai jeanam etseras wekaimiayi; tura núnisan iwianchniasha jiiaki akupkini wekaimiayi.

Tunamaru shuaran Jesus tsuármiania nu
(Mateu 8.1-4; Rúkas 5.12-16)

⁴⁰ Túramtai, ti tunamaru shuar Jesusan seatajtsa tarimiayi. Taa tikishmatar tímiayi “Wakerutakmekā tsuaratin tujin-tratsme.”

⁴¹ Jesus nin waitnentak uwejejai antinmiayi. Antin “Wakerajme. Pénger ajasta” tímiayi. ⁴² Nu chichamaik, Jesus chichakmatai, ni sunkurí menkakamiayi. Tura pénger ajasmiayi. ⁴³ Túrunamtai Jesus kakantar chicharuk ⁴⁴ akupeak

“Wáinkiatá, nánkamsam etseraip, tímiayi. Antsu weme, Israer-patirmin iniakmamsata. Túram ashí aents ame pé_ñker ajas-marumin nekaawarat tusam, Muisais aar akupkamiania nu umikiam súsatin ana nu susata” tímiayi. ⁴⁵ Tura etserkaip támaitiat, jiinki ni túrunamur_{in} mash etseramiayi. Tura nuna etserka asamtai, péprunam, aents írunmanum wétinian Jesus nakitramiayi, antsu aa atsamunam pujumiayi. Tura ashí nun_ñkanmaya Jesusan tariarmiayi.

2

Jesus emearun pé_ñker awajsamiania nu

(Mateu 9.1-8; Rúkas 5.17-26)

¹ Kapernáum péprunam Jesus ukunam ataksha wémiayi. Jeamtai, ni je_{en} pujan nekaawarmiayi. ² Tuma asamtai shuar wárik ti untsur_í káutkarmiayi. Ti untsur_í asamtai, jea piakmiayi; wáitinmasha ankantchauyayi. Jesuska Yus-Chichaman nu aentsun ujaak pujurmiayi. ³ Nui_ñkia ni amikr_{in} emearun kuatru shuar tampump_{ru}awar júkiar Jesusan itiarmiayi. ⁴ Tura jeawar, untsur_í shuar írunu ásamtai jeá wayatniun tujinkarmiayi. Tuma ásar, yakinin_i wakar jea urakar, áa_ñkawar, tampunam ni amikr_{in} Jesus pujamunam awaintiuawar itiararmiayi. ⁵ Tura niisha Jesus nekas tsuártatui tu enentáimmiar_{in} Jesus nekáa emearun chicharuk, “Uchirú, ame tunaarumka tsan_ñkuramuiti” tímiayi.

⁶ Israer-shuara jintinniur_{isha} nuna antúu pujuarmiayi. Tura ni enentáij_{ia}i enentáimsar, ⁷ “¿J_usha urukamtai emearun tu chichara? Yúsán imiá yajauch chicharui. Warí, yaki tunaan asakarminiait; aya Yúsak tunaan asakarchamniakait” tu enentáimsarmiai.

⁸ Jesuska ni enentáimmiar_{in} nekarawar “¿Urukamtia átum tu enentáimprum? tímiayi. ⁹ Emearu, tunaarum tsan_ñkuramuiti títin_{ja}i, emearu, wajakim tampuram entsakim wekasata títin_{ja}i ¿tuá imiá yúpichuchit? ¹⁰ Wats wi, Aents Ajasu asan Yusa kakarmar_jia_i shuara tunaar_i tsan_ñkuramniaitjiana nuna paant iwiaintiuktajrume” tímiayi. Nuna tinia emearun chicharuk ¹¹ “Wajaktia, tájame; túram tampuram jukim je_{em}i_{in} wetá” tímiayi. ¹² Nu chichamaik emearu wajaki, tampur_{in} jukí, ashí íimiainia_{in} jíinkimiayi.

Nuna túrunamtai ashí ashamkarmiayi. Tura “jútikiamu pen_ñké wáinchaitji” tiar Yusa náar_{in} uunt awajsarmiayi.

Jesus Riwin utsukmiania nu

(Mateu 9.9-13; Rúkas 5.27-32)

¹³ Nuyá ukunam Jesus antumia_ñnum waketkimiayi. Tura ashí shuar káunkarmatai jintintiawarmiayi. ¹⁴ Tura jintintiawar amuk, akupin akitiai jea_ñam nan_ñkaamak, Arpeu

uchir_in Riwin pujan wáinkiamiyi. Wáiniak “Nemartusta” tímiayi. Tutai Riwi_i wajaki Jesusan nemarsamiayi. ¹⁵ Chíkich tsawant, Riwish_a Jesusan ni j_{ee}n itiaamiayi. Tura unt_{sur}i kuítian-juu shuarsha, yajauch shuarsha Jesus_{jai} ni unuini_a-mur_ij_ia_isha ash_i nuim misanam pujuarmiai. ¹⁶ Tura kuítian-juu shuarsha yajauch shuarsha Jesus_{jai} irunar yurumáinian wáinkiar, Pariséu jintinniur_isha Israer-shuara jintinniur_isha Jesusa unuini_amur_in aniasarmiayi. “¿Urukamtai ame úuntrum Jesus, kuítian-juu shuar_{jai} tura yajauch shuar_{jai}sha yuruma?” tiarmiayi.

¹⁷ Jesus nuna antuk tímiayi “Jaachu shuar tsuákratniun atsumainiatsui. Antsu jaa ana nu tsuákratniun atsumainiawai. Wats, “pénkerait_{jai}” tuinia nú shuaran unt_{suk}tajtsan táchait_{jai}; antsu “tunait_{jai}” tuinia nú shuaran Winia ajasat tusan unt_{suk}tajtsan táwit_{jai}” tímiayi.

Yurumtsuk Yus áújsatniun Jesusan aniasarmiania nu
(Mateu 9.14-17; Rúkas 5.33-39)

¹⁸ Juan_{ka} unuini_amur_isha Pariséu unuini_amur_isha yurumtsuk Yúsan áújiarmiayi. Túmakui chíkich shuar Jesusan tariar chicharainiak, “Juan_{ka} unuini_amur_isha, Pariséu unuini_amur_isha yurumtsuk Yúsan áújainiatsuk; ¿ame unuini_a-murmeka urukamtai yurumtsuk áújainiatsu?” tiarmiayi.

¹⁹ Tutai Jesus chichaak, “¿Nuatma nampernum ipiaamu ainia nu ijiarmawartiniak ainia? Yama nuatu pujakui ni amikr_i warainiak ijiarmachartin ainiawai. Núnisan winia unuini_amur, Wi pujakui, warainiak yurumtsuk pujuschartin áiniawai. ²⁰ Tura tsawant jeattawai, Winia jurukiartin. Nuñkia winia unuini_amur ijiarmawartatui’ tímiayi Jesus.

²¹ Tura nuyá juna tímiayi ‘Mamuru pushí jaanakmatai yamaram tarach anujtukchatniuiti. Túramka nijiam yamaram tarach sumpeak mamushan chin_{kiá} nuna nan_{ka}amas jáaktatui. ²² Nijiamanch yamáí nawar nuap najanamu arutnum yaraachminiaiti. Túramka wakaprua karíak nuap najanamu ijiakratniuiti. Tura nijiamanch ukarattawai. Nuap najanamu yajauch ajastatui. Antsu yamaram nijiamanch yamaram nuap najanamunam yaraatniuiti” tímiayi.

Trikiu ner_{en} yuawarmiania nu
(Mateu 12.1-8; Rúkas 6.1-5)

²³ Chíkich ayampratin tsawant_i Jesus ajanman_i ajapén nan_{ka}amarmiayi. Tura ni unuini_amur_i trikiu ner_{en} majukiar wearmiayi. ²⁴ Nuna wáinkiar Pariséu Jesusan chicharainiak “¿Warí, urukamtai ame unuini_amuram ayampratin tsawant takastin surimkiamu a_isha takainia?” tiarmiayi.

²⁵ Tutai Jesus tímiayi “Íi uuntri Tawitia túramurí Yús-Papinium áujsachukaitrum. Niisha ni nemarniurísha tsukamainiak, ni yurumkarí atsakui, túrawarmia nu áujsachukaitrum. ²⁶ Apiatár Yusnan pujurniu uuntri pujai Uunt Tawit Yusa Jéen wayamiayi. Tura Tawitkia, patri nan̄kaamas uunt asa, pátrichuiat, iniaktusma tantan, aya patri yútainiak, yuamiayi; tura ni nemarniuríncha ajamsamiayi. Nu áujsachukaitrum, tímiayi. ²⁷ Ayampratin tsawantai túrashtinian umirkashtimpiash tusa Yуска aentsun najanachmiayi. Antsu aents ayamprarat tusa Yus ayampratin tsawantan tesamiayi. ²⁸ Wisha, Aents Ajasu asan imia ayampratin tsawantan Nerenniuríntjai” tímiayi.

3

Uweje jakan Jesus tsuármiania nu
(Mateu 12.9-14; Rúkas 6.6-11)

¹ Ataksha chíkich tsawantai Israer-shuar iruntainiam Jesus wayamiayi. Nuí shuar ámiayi, ni uweje jaka. ² Tura tunáan túrayi titiai tusar wakeruiniak “ayampratin tsawantai tsuártimpiash” tusar, Pariséu shuarsha Jesusan ii pujuriarmiayi. ³ Nuínkia Jesus uweje jaka shuaran chicharuk “Ajapén wajasta” tímiayi. ⁴ Nuínkia mamikmaun chicharuk “¿Ayampratin tsawantai péñker túratin yajauch túratniujai tuá imiá péñkerait. Shuar uwemtikratin máatniujai tuá imiá péñkerait?” tímiayi.

Nuna takui niisha pachischarmiayi.

⁵ Tura Jesus kajak nin íiyarmiayi; tura ni enentáin kátsuram ásarmatai kúntuts enentáimsamiayi. Tura shuáran chicharuk “Uwejé iniakmasta” tímiayi. Iniakmasmatai ni uweje jaruku ataksha péñker ajatsamiayi. ⁶ Nuyá Pariséu shuar jíinkiar, Jesus maami tusar Erutis shuarjai áujmatsarmiayi.

Untsurí shuar Jesusan káutkarmiania nu

⁷ Nuyá Jesus ni unuiniamuríjjai antumiannum wémiayi. Kariréa nun̄kanmaya untsurí shuarsha Jesusan nemariarmiayi. ⁸ Untsurí nun̄kanmayasha káunkarmiayi. Jutía nun̄kanmayasha, Jerusarén péprunmayasha, Itiumía nun̄kanmayasha, Jurtan entsa amainiasha, Tíru tura Setun pepru pujuinia nú nun̄kanmayasha, untsurí shuar ni túramurín nekaawar, Jesusan káutkarmiayi. ⁹ Untsurí káunkar chanuntawarain tusa Jesus ni unuiniamurín kanuram inianáastarum tusa seamiayi. ¹⁰ Kame untsurí shuaran Jesus nuik tsuaru asantai, jaa shuar nuí káunkarmiania nu Jesusan antíntaj tusar shitianainiakui nuna seamiayi. ¹¹ Tura iwianchrukusha Jesusan wáinkiar tikishmatrarmiayi.

Untsumainiak “Ame nekas Yusa Uchirínme” tiarmiayi.
 12 Tura nuna etserkairap tusa Jesuska kakantramiayi.

Jesus tuse shuaran anaikiarmiania nu
(Mateu 10.1-4; Rúkas 6.12-16)

13 Nuyá Jesus náinnium wakamiayi. Tura anaikiatniun wakerimia nú shuaran untzukmiayi. Tura niisha Jesusan weriarmiayi. 14 Tura Nijjiaj wekasar Yus-Chichaman uniniartinian tuse shuáran anaikiarmiayi. 15 Tura sunkur tsuártinian, iwianchcha jjiiki akupkatniun ni kakarmarin súarmiayi nú shuaran. 16 Ju shuáran anaikiamu ármiayi: Semun, Jesus chíkich naarin Pítiur apujtusmiania nu; 17 Sepetéu uchiri Jakupu, ni patai Juánsha; ipiamtajai métek kakaram ásmatai nuna mai “Puanérjis” naari susamiayi. Nusha shuar chichamjainkia “ipiamta nuke” tawai. 18 Nuyá Antressha, Jiripi, Parturumí, Mateu, Tumas, Arpeu uchiri Jakupu, Tateu, ásump Semun, 19 Jútas Iskariúti. Jesusan ukunam surukmia nú Jútasauyayi. Anaik amukmatai jeá waketrarmiayi.

Yusa Wakanin yajauch chicharna nu
(Mateu 12.22-32; Rúkas 11.14-23; 12.10)

20 Waketkiarmatai, ti untsuri shuar taarmatai takatri ti akui, yurumátniun jeacharmiayi. 21 Jesusa shuárissha nuna nekaawar Jesus ti itiurchat pujus wáurtsuash tu enentáimsar jukitiai tusar nu jeenam jeariarmiayi.

22 Nuyá Israer-shuara jintinniuri Jerusarénumia táarmiania nu, Jesusan áujmatainiak “Pirsepú enkea asa iwianchrukuity. Tuma asa uunt iwianchi kakarmarijjiai iwianchin jjiiki akupeawai” tiarmiayi.

23 Tutai Jesus winitiarum tusa nin untzukmiayi. Tura enentáimtikrataj tusa juna tímiayi: “¿Iwianch Satanáskesha itiur ajapmamatin? 24 Chikichik nú nunkanmaya shuar nuámtak kajernaiyakuinkia, nu nunka wari meserchattawak. 25 Nuámtak shuar ni shuarijjiai kajernaiyakuinkia nu shuarsha amunaikchartatuak. 26 Núnisan ¿Satanáskesha ni sun-tarijjiai máaniakka itiurak tuke pujusarat? Amunaikiartatui. 27 Nánkamas shuar kakaram shuara jeen wayá, nérenniun jinkiatsuk ni kuítrin kasarkachminiati. Antsu nérenniun jinkiá ni kuítrin kasarkamniati. 28 Nekas tájarme, shuar tunáa ashí túruiniana nuka tsankuramniati. Winiasha winia Aparnasha yajauch áujmatusha tsankuramniati. 29 Antsu Yusa Wakanin yajauch áujmatna nuka tsankurachminiati; antsu nu shuar ninki tuke sumamattawai.” 30 “Jesuska iwianchrukuity” tuíniakui Jesus nuní tímiayi.

Jesusa yachi Jesusa nukurí
(Mateu 12.46-50; Rúkas 5.19-21)

³¹ Nuyá ni yachí ni nukuríjiai taar aa wajasar, Jesusan untukat tusa akupkarmiyi. ³² Shuar Jesusan téntak pujuarmia nu tiarmiayi “Iis, nukusha, yatsumsha aa wajasar unturmainiawai.”

³³ Tutai Jesus chichaak “Ya ainia winia nukursha yatsursha” tímiayi. ³⁴ Nin téntakar pujuarmia nuna iis “Júiti winia nukurka, yatsurka, tímiayi. ³⁵ Shuar Yusa wakeramurin uminiana nu winia yatsuruiti, winia umaruiti, winia nukuruiti” tímiayi.

4

Atsaamin atsaampramiania nu

(Mateu 13.1-9; Rúkas 8.4-8)

¹ Nuyá jiinki antumianka yantamen Jesus ataksha unuiniartinian juarkimiayi. Tura untsurí shuar iruntrar-matai, kanunam enkempramiayi. Shuarsha antumianka káanmatkarin pujuarmiyi. ² Jesuska métek-taku chichamjai ti jintintiármiai. Jintintiuk juna tímiayi: ³ “Antuktarum. Atsaamin atsaamprataj tusa jíinkimiai. ⁴ Atsaamkui ni arakri jintiá iniararmai. Chínki yakiya káutkar yuawarmai. ⁵ Chikichcha kaya írunmanum iniararmai, nunka ishichik ámanum. Tura nunka ishichik asantai wárik tsapainiarmai. ⁶ Tura etsa etsantar sukuám kancape atsa asantai káararmai. ⁷ Chikichcha janí nupanam iniararmai. Jankisha tsapainiar kankar ajakrarmai; túram nerekcharmai. ⁸ Chikichcha pénger nunkanam iniararmai. Tura tsapainiar nerekar-mai, chíkich trainta, chíkich sesenta, chíkich sian nerekarmai. ⁹ Kuíshim ákuinkia antuktarum” tímiayi.

(Mateu 13.10-17; Rúkas 8.9-10)

¹⁰ Untsurí wearmatai, ishichik Niijiai juakarmiania nu, ni tuse unuiniamuríjiai aniasarmiyi “¿Ame jintintiamna nusha warimpiati?” tiarmiayi.

¹¹ Tutai Jesus chichaak “Yuska ni akupeamurin atumin paant nekantikramattsa wakerutnarmé. Antsu chíkich shuarka aya métek-taku chichamjai jintintiáwartatui. ¹² Íniyatan wáinkiacharat tusa, antukarsha nekaacharat tusa, umirtsuk ni tunaari tsankurnacharat tusa túrattawai’ tímiayi.

(Mateu 13.18-23; Rúkas 8.11-15)

¹³ Tura tímiayi “Wi jintintiajrumna nú métek-taku chicham nekaachurmek. Nu nékachkurmeka ¿itiurak chíkich métek-taku chichamsha nekaatarum? ¹⁴ Atsaamniua nuka Yus-Chichaman étserna nuna nakumui. ¹⁵ Jínkiái jintiá iniaarua nuna chíkich shuar ántuiniamun nakumui. Nu shuar chichaman ántuiniawai. Tura antukarmatai

Satanás wárik tarí ni enentáin atsaampramun jurawai. ¹⁶ Chíkich shuar ántuiniamu kayanam atsaampramua núniskete. Niisha chichaman antukar wárik warainiak umiktasa wakeruiniawai. ¹⁷ Tura ni kan̄kape atsakui, aya ishichik katsuiniawai. Tura ukunam, Yus-Chichaman wakeruiniakui shuar kajeram tura chíkich itiurchatan wáinkiar Yúsaiya kanainiawai. ¹⁸ Chíkich ántuiniamuka jan̄kí nupanam atsaampramua núniskete. Nu shuar Yus-Chichaman ántuiniawai. ¹⁹ Ántuiniayat jū nuñkanam ana nuna ti páchiniawai. Tuma ásar kuítian tura shiirmachin ti takustinian wakeruiniawai. Nú wakeramu ni enentáin Yus-Chicham ana nuna kan̄kar emen̄katui. Tuma asamtai nerektinian tujintiainiawai. ²⁰ Tura chíkich ántuiniamusha péñker núnkanam atsaampramua núniskete. Nú shuarsha Yus-Chichaman antukar umiiniawai. Tura nerenawai, chíkich shuar tainta, chíkich shuar sesenta chíkich shuar siañsha nerenawai.'

Uukma ana nu paant nekanattawai

(Rúkas 8.16-18)

²¹ Nuyá Jesus juna tímiayi '¿Shuar shiripkin ekeemak itiā pitiaknum en̄keattawak. Peaknum wakenam ikiustatuak? Atsá. Antsu misanam ekentsashtinkiait. ²² Núnisañ ashí uukma ana nu ukunam paant nekanattawai. Tura núnisañ yamá ishishmasa chichasmasha ukunam paant nekanattawai. ²³ Kuíshim ákuinkia antuktarum.' ²⁴ Tura nuyá tímiayi 'Ántarmena nu esetrarum enentáimsarum antuktarum. Urutá péñkerak enentáimsatarum, núnisañ Yuska ámin nekaatniun suramsattarme, tura nú núkap patatramsattarme. ²⁵ Tuma asamtai shuar núkap takakna nu patatnastatui. Antsu chíkich shuar ishichik takakuk jurunkittiawai.'

Yusa akupeamuri júnisaiti

²⁶ Nuyá Jesus chichaak juna tímiayi 'Yusa akupeamuri júnisaiti. Shuar jin̄kiāin atsaampratniua núniskete. ²⁷ Jin̄kiāin atsaamar, untsurí kanar, tsawar, uruksanpi tusa nákwai. Tura itiura tsapainia núnaka nékatsui. ²⁸ Kame jin̄kiāi nuñkanam init aku nin̄ki tsapaatsuk; emka nukareawai, nuyá tuyureawai tura nujamar katsuawai. ²⁹ Túruna káakmatai júuktin tsawant jeayi tusar jūniawai.'

(Mateu 13.31-32; Rúkas 13.18-19)

³⁰ Ataksha Jesus tímiayi '¿Yusa akupeamuri warijiāin̄kí nakumkataj. Warijiāin̄kí métek-takuit? ³¹ Mustasa jin̄kiāi araamua nujai métek-takuiti. Nu jin̄kiāisha ashí nan̄kaamas ishitiupchichiti. ³² Tura araam tsapai ashí nan̄kaamas uunt

ajawai; tura tsenkeakmarisha kámpuram asamtai nu̇i mikin-tranam chin̄kisha shiir ayamainiawai.”

(Mateu 13.34-35)

³³ Núnisan̄ Jesus untsurí métek-taku chichamjaī Yus-Chichaman ujaamiayi. Nii nekaatniun jearmia nunak ujaamiayi. ³⁴ Chíkich shuaran aya métek-taku chichamjaī ujaamiayi; antsu ni unuiniamurijiaī Nin̄ki pujus ashí paant jintintrarmiayi.

Nasencha, entsancha Jesus imijiánmia nu

(Mateu 8.23-27; Rúkas 8.22-25)

³⁵ Nu tsawantaī etsa akaikintaī Jesus ni unuiniamurin̄ chicharainiak “Entsa amain katiñtaī” tímiayi. ³⁶ Tutaī ka-nunam enkemprarmiayi. Chíkich shuarnaka káanmatkanam ikiukiar Jesusan kanunam pujan júkiarmiayi. Chíkich kanun-mayasha atampriarmiayi. ³⁷ Tura nasesha ti nasenkatasa nan̄kammiayi; chíchimi kanunam yaráná piáktasa ajamiayi. ³⁸ Jesuska kanú senkarin̄ atamprus kanúu tepemiayi. Tura, ni unuiniamurí Jesusan ishintiak chicharuk “Uunta ii wayajnia júka pachitmatsmek” tiarmiayi.

³⁹ Tutaī Jesus nantaki nasen kakantrarmiayi. Entsan-cha chicharuk “Takamatsata. Miaku ajasta” tímiayi. Tutaī nasesha men̄kakamiayi, entsasha miaaku ajasmiayi. ⁴⁰ Túrunamtaī Jesus ni unuiniamurin̄ chicharainiak “¿Urukam-taī ashamarum? Itiura Yus nekas enentáimtatsrum” tímiayi. ⁴¹ Tura imiá ashamainiak “¿Maa júsha yait? Nasesha entsasha nin umirainiatsuk” tunaiyarmiayi.

5

Jataranmayan̄ iwianchrkun Jesus tsuármiania nu

(Mateu 8.28-34; Rúkas 8.26-39)

¹ Nuyá antumian̄ amaini Jataa nun̄kanam jeawarmiayi. ² Jesus kanunmayā jiinkimtaī áishman̄ iwianchrku, shuar jakáa iwiartainiumiá wárik taa Jesusan in̄kiun̄miayi. ³ Nu shuar iwiartainium tuke pujuyayi. Tura jirujain̄kia nin jinkiaatniun tujinkiarimiayi. ⁴ Jirujaī nawenmasha, uwe-jnumsha tuke jin̄kiau ármiayi. Túramaitiat jinkiaarman tsuriar tepet-tepet awajmiayi. Tura ti kakaram asamtaī nin nu-petkachminiuyayi. ⁵ Tuke tsawaisha káshisha, iwiartaini-umsha murasha kayajaī ijiunak untsumu wekainiuyayi. ⁶ Tura yajayan̄ wáiniak Jesusan tseke tarimiayi; tura tikish-matramiayi. ⁷⁻⁸ Túrunamtaī Jesus chicharuk “Iwianchiá, ni enentáiyā jiinkitia, tájame” tímiayi.

Takui íwianch kakantar chichaak “¿Winiasha urukamtai tarutnium, Uunt Nan̄kaamaku Yusa Uchir̄i Jesúsá? Yus iir-manum wáitkiarsaip, tájame” tímiayi.

⁹ Takui Jesus tímiayi “¿Ame náarmesha yait?”

Tutai niisha ayak “Untsur̄i ásar wikia Untsur̄i-suntar tu anaikiamuitjai” tímiayi.

¹⁰ Nuna ti amik, nu nun̄kanmayā akuptukain̄ tusa Jesusan ti seamiayi. ¹¹ Nuisha nainnium nuntumas untsur̄i kuchi shushun̄mak matsamarmiayi. ¹² Tuma asamtai, kuchiniam en̄kemátin tsan̄katrukta tusar Jesusan seawarmiai.

¹³ Tuiniakui Jesus “ayu” tímiayi. Takui íwianch áishman̄kainiā j̄inkiar kuchiniam en̄kemáwarmiai. Kuchisha ti untsur̄i, j̄imí-ará mir (2.000) áchiawash. Ashí mash nánatanam iniaawar antumian̄num inian̄karmiayi. Nuisha entsá k̄iakar jakermiai.

¹⁴ Túrunamtai kuchin wáinin pisarar péprunmasha shuar-numsha nuna etserarmiayi. Tuma asamtai iyutai tusar ashintiukarmiayi. ¹⁵ Túrawar Jesusaī jeawarmiai. Jeawar áishman̄ yaunchu iwianchr̄ukun yamaikia p̄nker̄ ajasun pushir̄in entsar pujan wáinkarmiayi. Wáinkiar ashamkarmiayi. ¹⁶ Tura wakеткиar kuchi túrunamuncha iwianchr̄uku p̄nker̄ ajasmancha mash etserkarmiayi. ¹⁷ Tuma asamtai ni nun̄keyā jiinki wetá tusa seawarmiai. Jesus kanunam en̄kemamtai áishman̄ nuik iwianchr̄uku amia nu Jesusan chicharuk ¹⁸ “Wi Ámijiaī tuke tsan̄inkian wekasatjai” tímiayi.

¹⁹ Tura núnaka Jesus suritkiamiayi. “Antsu ame jeem̄jin, áminiurm̄jin weme, ashí Uunt Yus túrutma nu tura waitnen-trampra nusha ujakarta” tímiayi.

²⁰ Tutai áishman̄sha wémiayi. Tura antsu Tekapuris nun̄kanam Jesus nin p̄nker̄ awajsamia nuna ashí shuaran ujakmiayi. Nu nun̄kanmayā shuarka nuna antukar ti enentáimprarmiayi.

Jimiará jaan Jesus tsuármiania nu

(Mateu 9.18-26; Rúkas 8.40-56)

²¹ Ataksha Jesus kanujaī katin̄matai, aents untsur̄i Nin irunturarmiayi. Jesuska antumian̄ka káanmatkar̄i wajamiayi. ²² Tura Israer-shuar iruntaī jea náampruku, ni naarī Jairu, támiayi. Taa, Jesusan wáiniak, piniakum tepersamiayi. ²³ Piniakumar ti seak, “Winia nawantur jarutui. Winitiā, túram p̄nker̄ ajasat tusam uwejm̄jijaī antintrukta. Nuinkia jarutkashtatui” tímiayi.

²⁴ Tu tímiatai Jesus niijiaī wémiayi. Tura untsur̄i shuar wena ásar Nin chánuarmiayi.

²⁵ Nuī pachitkia nuwā ti jaa wémiayi. Niisha tuse uwi numpan ajapeak wáitias pujuyayi. ²⁶ Ti untsur̄i tsuakratin

nincha iisu armiai. Tura iyamsha ti wáitias pujuyai. Tura ni kuítríncha ashí ajapaitiat tsuámarchauyai; antsu tsuamsha nu arant ajauyai. ²⁷ Nu nuwasha, Jesus túramun antuku asa, ni ukuurini amainian ni pushirin antinmiyai. ²⁸ “Wi aya ni pushirin antinnaka penkerapi ajasaintjia” tu enentáimiar túramiai. ²⁹ Tura Jesusa pushirin antin nú chichamaik numpa ajapman menkakamiyai. Penker ajasman ayashin nekapramiai. ³⁰ Tura nuin Jesuska, ni kakar-marijjai tsuarman nekapmampramiyai. Tura nuna nekáa, ayantar chichaak “¿Yaki winia pushirun antintruka?” tímiyai.

³¹ Tutai ni unuiniamuri tiarmiiai, “Untsurí Ámin antin-mainiasha ¿urukantai “yaki winia antintkia” tame?”

³² Tura Jesus, yaki túruta tusa ashí ímpramiyai. ³³ Nuinkia nuwasha, ni ayashin túruna nuna nekáa, ti ashamak kuraimiai. Tura Jesusan jeari tikishmatramiai. Tura ni túrunamurin ashí paant ujakmiyai. ³⁴ Takui Jesus nin chicharuk “Nawantru, Winia nekas enentáimtursa asakmin, penker awajtamsaitme. Shiir wetá, tura tuke penker pujusta” tímiyai.

³⁵ Tura Jesus nuna tuke chichas pujai, iruntai jea uuntri jeenia tariarmiiai. Tariar chicharainiak “Ame nawantrum jakai. ¿Urukantai Unuikiartin tuke itit awajsatam?” tiarmiiai.

³⁶ Tura Jesuska, nii tiarmia nuna ántayat, núnaka pachit-suk, iruntai jea uuntrin chicharuk “Ashamkaip; áyatik nekas enentáimtursata’ tímiyai. ³⁷ Tura Nijjiai wétinian aya Pítruncha, Jakupuncha ni yachi Juanjai tsankatkarmiiai. ³⁸ Iruntai jea uuntri jeen jeawar, áentsun charaatum ajainian, úutainian untsukum ajainiancha Jesus wáinkiamiyai. ³⁹ Tura nuwach penké jakan nékayat, wayá nin chicharuk “¿Urukantai timiá úutrum, tura wa wa ajarum? Nuwach jákachai, antsu kanarai” tímiyai.

⁴⁰ Nuna takui wishikrarmiiai. Tura Jesus ashí jiiir akupkarmiiai. Áyatik nuwachí aparín, nukuríncha tura Nijjiai táaruncha nuwachí tepamurin jukimiyai. ⁴¹ Tura wayawar Jesuska nuwachí uwejen achik tímiyai “Taritia kumi.” Nusha shuar chichamjainkia “nawantrú nantáktiá” tawai. ⁴² Nuwach tuse uwí takakuya nu, nú chichamaik nantaki wekasamiyai. Túramtai nuí pujuarmiania nu ti enentáimprarmiiai. ⁴³ Jesuska chichaak “Atumsha penké etserkairap’ tímiyai. Tura “nuwach ayuratarum” tímiyai.

6

Jesus Nasarétnum pujusma
(Mateu 13.53-58; Rúkas 4.16-30)

¹ Jesus nuyá jiínki ni nunken waketkimiayi. Ni unuini-amurisha nemariarmiayi. ² Nuisha ayampratin tsawant jeamtai Israer-shuar iruntainiam wayá unuiniarmiayi. Tura Jesusan anturkarmiania nu ti enentáimsarmiayi. “¿Jusha tui unuimiaruit. Ni nekaatniuríncha yaki susait. Tura aentsti tujintiajnia nuna Niisha itiurak tura? ³ Jusha karpintíruchukait; Marí uchirínchukait. Ni yachisha Jakupusha, Jusesha, Jútassha, Semunsha nékatsjik. Tura ni umaisha jui iijiai pujuiniatsuk” tiarmiayi. Túrawar Nin nekas enentáimtustinian tujinkiarimiayi.

⁴ Túrassha Jesus nin chicharuk “Yúsnan etserniun chíkich nunkanmayanka shiir anturainiawai. Antsu ní nunkeyanka, ní shuarsha anturainiatsui” tímiayi.

⁵ Tura nuisha, ni nunkenkikia aentsti tujintiamun túratniun tujinkiamiayi. Antsu jaancha aya ishichik ni uwejejai antin tsuármiayi. ⁶ Tura nekas enentáimtacham “¿urukamtai nusha?” tu enentáimsamiayi.

Nuyasha chíkich péprunam wayá, chíkich péprunam wayá Yus-Chichaman unuiniakní wekaimiayi.

Yus-Chicham etserkatarum tusa Jesus ni unuiniamurin akupkarmiania nu

(Mateu 10.5-15; Rúkas 9.1-6)

⁷ Tuse unuiniamurin untasuk jímiarchik jímiarchik werum Yus-Chicham etserkatarum tusa akupkarmiayi. Tura iwianchin nupetkarat tusa ni kakarmarin súsarmiayi.

⁸ Tura chicharuk “Jintia yurumátniusha jukiirap, uyuntrumiíncha kuitcha enkearum jukiirap. Antsu aya áanik mashtun jukiirum wetarum. ⁹ Sapat uwekatarum, tura entsartincha jímiar jukiirap, tímiayi. ¹⁰ Tura jea wayarmena nuin pujustarum; pujá-pujakuarum nuyá chíkich peprunmasha wetarum. ¹¹ Tura nánkamas aents atumin awaintiamainiachuisha, anturtamainiachuisha, nuyá jíinkirum, nu shuar yajauch áiniawai tusarum, atumí nawe nunka akakekrum ikiuktiarum. Kame Yus áentsun nekapsattana nú tsawant jeamtai, nu shuarnaka asutiattawai. Sutuma péprunmaya shuarjai tura Kumura péprunmaya shuarjai nankaamas nin asutiattawai” tímiayi Jesus.

¹² Nuyá Jesusa unuiniamuri jíinkiar enentái yapajiar Yúsai enentáimtumartinian etserkarmiayi. ¹³ Tura iwianchruku enentáiya iwianchin jíirki akupkarmiayi, tura asutijiai yakarar unturí jáinian tsuararmiayi.

Juanka jakamuri

(Mateu 14.1-12; Rúkas 9.7-9)

14 Jesusa náarín tura ni túramurín ashí aents áujmatin ásarmatai, uunt akupin Erutis nuna antukmiayi. Erutiska “Imiakratin Juan jakamunmaya nantakni. Tuma asa ti kakaram takaawai” tímiayi. 15 Tura chíkich shuar “Eríasaiti” tiarmiayi. Chikichcha “Yúsnan etserniuiti, yaunchu etserniuya núkete” tiarmiayi. 16 Erutis nuna antuk “Nekas Juánkaiti. Ni muuken tsupiktinian akupkamiay nu, jakamunmaya nantakniuiti” tímiayi. 17-19 Kame Uunt akupin Erutis, ni yachí Jiripi nuarín nuatkamiayi. Nu nuwá naari Jirutíasaiti. Juansha uunt akupniun Erutisan chicharuk “Yatsumi nuarí akintrukchatniuitme’ tímiayi. Tutai nuwá Jirutías Juánkan ti kajerkamiayi. Tura Juánkan máataj tusa wakerimiayi. Túrasha uunt akupin Erutis nuna surimkamiayi. Antsu Juan achikrum sepunam enkeatarum tusa akupkamiayi. 20 Juansha tuke enentáijiai Yusa jintín wekainiuyayi. Erutis, ni esetar enentáimniun neka asa Juánkan ashamak Jirutías wakeramurín túrawain tusa suritkamiayi. Kame Erutis Juan étserman nékachuitiat antuktinian wakerimiayi.

21 Jirutías, itiurak máawaj tu pujai, uunt akupin Erutis, ni akiiniamu tsawantri jeamtaí, ni suntarincha, Kariréa nunkanmaya úuntríncha, kuítrintin armia nunasha untukar, namperan najanamiayi. 22 Nuisha Jirutíasá nawantri wayá jantsemámtai Erutis tura nijijai nampernum matsamarmia nusha shiir enentáimsarmiayi. Túramtai uunt akupin nuwáchin chicharuk “Ame wakeram nu seattia. Wi amastatjai. 23 Nekas tájame, ashí ame seatmena núnaka amastatjai. Wats, seatkumnínkia takakjana nuna jímiapetek nakakan, amastatjai” tímiayi.

24 Tutai nuwách jiínki ni nukurín Jirutíasan chicharuk “¿Wariniak seattaj?” tímiayi.

Tutai “Imiakratin Juánka muuke seata” tímiayi.

25 Nu chichamaik nuwách wari wayá Erutisan chicharuk “Yamaikia uunt amamkunam Juánka muuken wakerajai” tímiayi.

26 Nuna takui uunt akupin ti kuntuts enentáimpramiayi. Tura nii tiniu asa ni amikri matsatainia nu antukaru ásarmatai surimkiatniun tujinkiamiayi. 27 Tuma asa uunt akupin Juánka muuke itiata tusa ni suntarín wárikmas akupkamiayi. 28 Túramtai suntar wari we, sepunam Juánka muuken tsupikmiayi. Tsupik, amamkunam itia, nuwan susamiayi. Túram achik ni nukurín susamiayi. 29 Juan maamun antukar ni unuiniamurí ni ayashín iwiarsatai tusar júkiarmiayi.

*Senku mir áishmankan Jesus ayuramiania nu
(Mateu 14.13-21; Rúkas 9.10-17; Juan 6.1-14)*

³⁰ Tura Jesusa unuiniamurí Nii akupkarma nu, ataksha waketki káunak irunturarmiayi. Ashí nii túrawarmia nuna, unuiniararmia nunasha ujakarmiayi. ³¹ Tura untsurí shuar táiniakui, niisha ankant ajastinniasha yurumátniuncha tu-jinkiarmiayi. Tuma asantai Jesus chichaak “Ijijai wemí aents atsuiniamunam; nuí ishichik ayamprarmi” tímiayi. ³² Nuyá Jesus ni unuiniamurí*jijai* kanunam enkemprar, aents atsuini-amunam jeatai tusar jíinkiarmiayi. ³³ Túrasha shuar ni wéenan wáinkiarmiayi. Tura “Jesusaiti” tiarmiayi. Tuma ásar ashí péprunmaya untsurí shuar tseke ashintiukar, ni jeatniunam nákakarmiayi. ³⁴ Jesus kanunmaya jíinki ti untsurí aents iruntrar matsatun wáinkiamiayi. Murik péñker wáinchataiya núnisan matsatu ásarmatai Jesus nin wáitnentrarmiayi. Tura núkap unuiniararmiayi. ³⁵ Nuyá kíakui ni unuiniamurí Jesusan tariai chicharainiak “Atsamunam pujatsjik; tura yamá kíatsuk. ³⁶ Shuar wari akupkarta. Tíjiuch péprunmasha, shuar-numsha wearti, ni yurumkarí sumarmakarati” tiarmiayi.

³⁷ Tutai Jesus chichaak “Atumek ayuratarum” tímiayi.

Tutai “Isha ju shuar ayuratai tusar, ¿jimiara siañ kuitjai yurumak sumaktai tusar wétinkiaitiai?” tiarmiayi.

³⁸ Tura Jesus ni unuiniamurí chicharainiak “Tanta takakrum nu iistarum ¿urutmak aa?” tímiayi.

Tutai nekapmarar chichainiak “Tántaka sénkuchikiiti, tura namaksha jímiarchikiiti” tiarmiayi.

³⁹ Tutai Jesus tímiayi “Ju shuar chírichriniam pujusarti tusar akupkatarum.” ⁴⁰ Ankant ankant siañ siañsha, senkuenta senkuenta iruntrar matsamsarmiayi. ⁴¹ Jesuska senku tantancha, jímiar namaknasha jusa, yakí nayaimpinmaaní íimias Yúsan yuminsamiayi. Tura yurumkan púurmiayi. Puur ni unuiniamurí súsarmiayi. Namaknasha puur súsarmiayi, ashí shuáran ajamsarat tusa. ⁴² Ashí yurumáwar ejemarmatai, ⁴³ puunaruncha, namak ampirmancha achikiar, tuse chañkinian áimkiar júkiarmiayi. ⁴⁴ Nu yurumkan ti untsurí yurumáwarmiayi. Aya áishmankak senku mir (5.000) ármiayi.

Jesus entsá pátatek wekasamiania nu

(Mateu 14.22-27; Juan 6.16-21)

⁴⁵ Nuyá Jesus ni unuiniamurí chicharainiak “Kanunam enkemprarum, katinkrum amain émaa ajatarum, Petsaitia péprunam. Wisha ju shuaran áujsan ikiuktiatjai” tímiayi. ⁴⁶ Shuáran áujas ikiuki Yusjai chichastaj tusa náinnium wémiayi.

⁴⁷ Tura kirit ajasmanum kánuka antumiannum ajapén nanammiayi. Jesuska níñki juakmiayi. ⁴⁸ Jesusa unuiniamurísha wia-wiantainiakua ti pimpikiarmiayi, nase

tukumma ásar. Nuna Jesus wáiniak tsawartin ishichik ajasmatai entsá pátatek wekas nin jeariarmiayi. Tura nan̄kaamaktiása wea núnisan̄ wémiayi. ⁴⁹ Jesus entsá wekaan ni unuiniamur̄i wáinkiar, wakanchashit, tu enentáimprarmiayi. Túrawar ti untsumkarmiayi. ⁵⁰ Ashí wáinkiar ti ashamkarmiayi. Tura Jesus wárik nin chicharuk “Kakaram ajastarum, wítjai Jesus; ashamprukairap” tímiayi. ⁵¹⁻⁵² Nuñkia entsaya kanunam waka en̄kempramiayi. Túramtai nasesha majaantmiayi. Ni unuiniamur̄inkia enentá̄i kiritia áintsan̄ ásarmatai Jesus yurumkan núkap awajsamia nuna paant nekaatniun tuke tujinkiararmiayi. Tuma ásar yamá̄i túrunamu itiurak aankia tusar ti enentáimprar sapijmiakarmiayi.

Jinisarít̄niumīa shuáran Jesus tsuármiania nu
(Mateu 14.34-36)

⁵³ Nuyanka kat̄inkiar, Jinisarít̄ núnkanam jeawarmiayi. Jeawar kanun ajūniarmiayi. ⁵⁴ Kanunmayā j̄inintrarmatai, nu nun̄kanmayā shuar Jesusan nekaawarmiayi. ⁵⁵ Tura “Jesus pujawai” táman antukar, ashí jeanmayā jaan ni peakrintiuk Jesus pujamunam itiaarmiayi. ⁵⁶ Tura Jesus wekaak wémia nūisha, péprunmasha, shuar matsatmanumsha, ishichik matsatkamunmasha jaan itiariar jintiá̄i áeprusarmiayi. Túmainiak Jesusan pushirmin antintaj tusar seawarmiayi. Tura ashí antiñkiarmia nuka péñker ajasarmiayi.

7

Jesus Pariséun áujmatsarmiania nu
(Mateu 15.1-20)

¹ Pariséusha, Israer-shuara jintinniur̄isha Jerusaré̄numīa Jesusan tariarmiayi. ² Tura Jesusa unuiniamur̄in ikijmiatsuk yurumun wáinkiar “Israer-shuara túrutair̄in túruiniatsui” tiarmiayi. ³ (Kame Pariséusha, tura ashí Israer-shuarsha, ni uuntrī jintintiamur̄in umikiar ti núkap ikijmiarar yurumin ármiayi. ⁴ Péprunmayā tari “ikijmiatsuk yurumáshtiniaiti” tiniu ármiayi. Tura ti untsur̄i ni uuntrī túrutair̄i núnisan̄ ármiayi. “Tsapancha, ichin̄nasha, jiruncha, peaknasha nijiakartiniaiti” tiniu ármiayi.) ⁵ Tuma asamtai Pariséusha, Israer-shuara jintinniur̄isha Jesusan chicharainiak “¿Urukamtai ame unuiniamuram ii uuntrī jintintramniuitiaj nuna túruiniatsu. Urukamtai ikijmiatskesha yurumáinia?” tiarmiayi.

⁶ Tutai Jesus tímiayi “Ántar chichamtiniaitrume. Isayas yaunchu nekas atumin áartampramiayi juna: Ju aents ni wenej̄ai Winia “ti péñkeraiti” turutainiawai, tímiayi Yus, tura ni enentá̄inkia jeachat pujuiniawai. ⁷ Tura tukeneas Winia shiir awajtuiniawai. Aentsu chichame jintiainiyat, “Yus-Chichamaiti” tuñniawai.”

Tu áarmaiti. ⁸ Tura átum Yusa chichame iniaisarum, aentsu jintintiamurí umirkarum, ichinnasha, tsapancha nijiaktin, tura chíkich túrutaisha áintsarmek untsurí túrarme. ⁹ Túrákrum Yus-Chichamka tsukintiaani ikiusurme atumí uuntri chichame umirkatai tusarum. ¹⁰ Kame Muisais yaunchu aar juna tíchamka:

Ame apa nukusha shiir enentáimtustarum.

Tura ataksha áarmiayi:

Shuarsha ni aparín, nukuríncha yajauch chichareakka, nu shuar jákatniuiti.

¹¹⁻¹² Túrasha átumka Paríséutirmeka, antsu ju tárume: “Shuar ni aparín ni nukurín chicharuk “Wi yáintinian takakjana nu Kurpanaiti” takuinka, atumsha péñkeraiti, aparíncha nukuríncha yáinchatí” tarume. (Kurpan tana nuka, Yus susamu, tawai.) ¹³ Nekaatarum, Paríséutiram. “Íi yaunchu uuntri chichame tuke umiki wétiniaitji” tákurum, Yus-Chicham penké ántar chichama núnin awajearme. Núnisrumek chikichcha untsurí túrarme.” Tu timiayi Jesus.

¹⁴ Nuyá ataksha Jesus ashí shuáran untsukar “Mash an-turtuktarum, ashí nekaatarum, tímiayi. ¹⁵ Aaya ayashnium wayaana nu, shuáran yajauch awajsachminiaiti; tura antsu ni enentáiniá jiinia nu, yajauch awajsattawai. ¹⁶ Shuar nuna ántakka enentáimprati” tímiayi.

¹⁷ Nuyá áentsun ikuiak, jea wayamtai, ni unuiniamurí anisarmiayi “¿Nu métek-taku chicham warintiu?” tiarmiayi.

¹⁸ Tutai Jesus tímiayi “Atumsha nékatsrumek. Páantchakait; yurumak yúajnia nu, enentáiniam wayachu asa, shuáran yajauch awajsachminiaiti. ¹⁹ Antsu wakenam wayá, nankaamas menkaatsuk” tímiayi. Nuna taku, ashí yurumak páchitsuk yuamniaiti, tímiayi. ²⁰ Nuyá tímiayi “Shuara enentáiniá jiinia nu, yajauch awajsamniaiti. ²¹ Shuara enentáiniá, initia, yajauch enentáimsatniusha, tsanirmatniusha, natsa tsanirmatniusha, shuar máatniusha, ²² kasamkatniusha, chikichna wakeruktincha, péñkercha túratniusha, anankatniusha, natsantain átincha, yajauch enentáimtustincha, tsanumpratniusha, waantu enentáimtumastincha, netse túratniusha, ashí nuka initia wininiatsuk. ²³ Ashí nu tunáa ainia nu, shuara enentáiniá jiniu asa, shuáran yajauch awajainiawai” tímiayi.

Serupinísianmaya nuwa Jesusan nekas enentáimtusmiania nu (Mateu 15.21-28)

²⁴ Tiru pepru, Setún péprusha Serupinísia nunkanam ámiayi. Nuka Israer-shuara nunkenchauiyayi. Nu nunkanam Jesus wémiayi. Tura jea, jea wayaa pujusmiayi. Tura nui pujamun nu nunkanmaya shuar nekarawarain tusa

nakitmiayi; túrasha uumkatniun tujinkiamiayi. ²⁵ Wárik nu nunkanmaya nuwa Jesus pujan nekaamiayi. Nu núwaka nawantri iwianchrukuyayi. Tuma asa Jesusan tarí ni nawen piniakum tepersamiayi. ²⁶ Nu nuwa Israer-shuarcha, Serupinísianmayayuyayi. Túmaitiat, nawantru enentáiya iwianchin jiirturkitia tusa Jesusan seamiayi. ²⁷ Tutai Jesus nuwan chicharuk “Uchi emka ejemarartí. Uchi apatkuri atankir yawach súsatín péñkerchaiti” tímiayi.

²⁸ Tutai nuwa ayak “Nekas, Uunta, tame. Tura yawachisha misanam wakenam pujuinia nu, uchi apatkun yurumuk juyumak kákeamun yuúniatsuk” tímiayi.

²⁹ Tutai Jesus tímiayi “Pénker tame. Tuma asam, shiir wetá; ame nawantrumí enentáiya iwianch jíinkiyi” tímiayi.

³⁰ Takui niisha wémiayi. Tura ni jeen jeá, ni nawantrin íwianch jíinkimtai péñker ajas peaknum tepan wáinkiamiayi.

Jesus empekun tsuármiania nu

³¹ Jesus Tirunmaya jiinki Setún péprunam nankaamarkutak, Tekapuris nunkanmaani nankaamaki, Kariréa antumiannum ataksha jeamiayi. ³² Nui chichachu ámiayi, kuishin empeku. Nu shuáran Jesusan itiarar, ni uwejejai antinkiat tusar seawarmiai. ³³ Shuar matsatmanumia Jesus nin akanki jukí kuishin tsara uwejejai tsutsukruamiayi. Tura usukia, nu shuara iniaín antintkiamiayi. ³⁴ Tura nayaimpinmaaní ímias súkaska mayati “Epata” tímiayi. Nuka, shuar chichamnumka “chinkiatí” tawai. ³⁵ Nu chichamaik ní kuishisha chinikiamiayi, iniaisha séermiai. Tura paant chichasmiayi. ³⁶ Tura Jesus chicharainiak “Peñké etserkairap” tímiayi. Jesuska surí-suritiamaitiat, nu nankaamas etseriarmiayi. ³⁷ Tura ti enentáimprarmiayi. Enentáimprar, “Ju Jesus aya péñkeran túrawai. Empekuncha ántumtikniaiti, tura chichachun chichamtikniaiti” tiarmiayi.

8

Kuattru mir shuáran Jesus ayuramiania nu

(Mateu 15.32-39)

¹ Nu tsawantái shuar timiá untsurí iruntrararmiayi. Yurumkarí atsakui Jesus ni unuiniamurín untsukar juna tímiayi: ² “Ju shuáran waitnentajai. Menaintiú tsawant Wijíai pujuinia ásarmatai ni yurumkarí amuukachaik. ³ Tura ni jeen ayurtsuk akupeamka, tsukariín jintiá pimpikiartatui, yajaya káunkaru ásar” tímiayi.

⁴ Tutai ni unuiniamurí chichainiak “Túrasha juí atsamunam, ju aents ejemaratat tusar ¿tuyá yurumkak wáinkiatatái?” tiarmiayi.

⁵ Tutai Jesus nin aniasmiayi “¿Urutmá tanta aa?”

Tutai “siati awai” tiarmiayi.

⁶ Nuñkia ashí áentsun “nun_ká pujustarum” tiarmiayi. Tura tantan achik, Yúsan yumĩnsamiayi. Tura puuk, áentsun ajamsatarum tusa ni unuiniamurĩn susamiayi. ⁷ Tura uchich namaksha ishichik aan achik, Yúsan yumĩnkias, ni unuiniamurĩn chicharuk “Jusha shuar ajamsatarum” tímiayi. ⁸ Turam ashí yurumáwar ejemarmarmiayi. Ampirma púunaruncha siati chañkinnium áimkiarmiayi. ⁹ Kuatru mir (4.000) shuar yurumáwarmiayi. Yurumáwar amikiarmatai, Jesus nin áujas akupkarmiayi. ¹⁰ Tura ni unuiniamurijiai kanunam en_kemprar Tarmanúta nun_kanam wearmiayi.

Pariséu Jesusan iniakmasta tiarmiania nu

(Mateu 16.1-4; Rúkas 12.54-56)

¹¹ Pariséu Jesusjai áujmatsatai tusar tariarmiayi. Nekapsatai tusar wakeruiniak Nin chicharuk “Nayaimpinmaya kakaram iniakmasta” tiarmiayi.

¹² Tuñiakui Jesus kúntuts enentáimias, súkaska mayati “¿Urukantai, yamaiya aentstiram, nayaimpinmaya kakarman iniakmasat tusarum wakerarum? Nuka pen_ké sunaschattarme, paant tájarne” tímiayi.

¹³ Nuyá nin ikiukiar ataksha kanunam en_kemar amain katiñmiayi.

Pariséu túramurijiai aneartarum, tímiayi Jesus

(Mateu 16.5-12)

¹⁴ Tura ni unuiniamurĩ yurumak jukitiai tukamá kajinmatkiarmiayi. Kanunman_ká aya chikichik tantanak takaku ármiai. ¹⁵ Jesussha ni unuiniamurĩn enentáimtikiuk tímiayi “Wáinkiatarum; Pariséusha Erutissha wakaprutain takakainia nújaisha aneartarum” tímiayi.

¹⁶ Tutai ni unuiniamurisha tunaiyarmiayi “Tanta kajinmatkin asakrin nuna túramtsujiash” tiarmiayi.

¹⁷ Tura Jesus nuna nekáa chichaak “¿Urukantai aya yurumkak enentáimtarum? Tuke nékatsrumek. Pen_ké enentáimtsurmek. Atumí enentái tuke kiritkiai? tímiayi. ¹⁸ Jimi aisha itiura wáintsurmea. Kuishim aisha itiura ántatsrum. Ashí kajinmatkintrumek. ¹⁹ Nekaatarum, nuik, senku tantan púuran senku mir áishman_kan ayurachmakaj. ¿Tura ampirma urutmá chañkinnium chumpiamarum?” tímiayi.

Niisha tiarmiayi “Tuse chañkinnium chumpiamji.”

²⁰ Ataksha Jesus tímiayi “Tura siati tantajai kuatru mir shuaran ayurantai, ¿ampirmasha urutmá chañkinnium chumpiamarum?”

Niisha “siati” tiarmiayi.

21 Tuma asamtai Jesus tímiayi “¿Itiura imiá nékatsrum?”

Jesus kusurun ímtiksamiania nu

22 Nuyá Petsaitia péprunam jeawarmiai. Jeawarmatai, áishman̄ j̄i kusurun Jesusan itiararmiayi. Túrawar antiṅta tusar seawarmiayi. 23 Tuma asamtai Jesus uwejn̄um achik péprunam aani en̄keki jukí j̄iṅ usukij̄i kuérmiayi. Tura uwej̄ej̄ai antiṅ “¿íimmek?” tímiayi.

24 Tutai kusuru ími tímiayi “Aentsun iij̄ajai, túrasha paantcha. Numi wekainian áaniun iij̄ajai” tímiayi.

25 Nuyá ataksha Jesus ni uwej̄ej̄ai kusuru j̄iṅ antiṅmiayi. Tura kusurusha úmamkes iis, p̄n̄ker ajas, ashí paant ím̄pramiayi. 26 Jesus chichaak “Jeem̄iṅ weakum péprunam waȳawaip tura shuar ujakaip” tímiayi.

Pítiur Jesusan “Yusa Anaikiamurinme” tímiania nu
(Mateu 16.13-20; Rúkas 9.18-21)

27 Jesus ni unuiniamur̄ij̄i uunt pepru Sesaria-jiripiunam jeatsuk, tíj̄iuch uchich péprunam irasarmiayi. Jintiá wésar Jesus ni unuiniamur̄in chicharainiak, “¿Yaiti turutainiawa Winia?” tímiayi.

28 Tutai niisha áimkiarmiayi “Chíkich chichainiak, imiakratin Juan̄kaiti, turamainiawai. Chíkichcha, Eríasaiti, tura chíkichkia, yaunchu Yúsna etserin nantakniua núiti, turamainiawai” tiarmiayi.

29 Tutai Jesus tímiayi “Atumsha, ¿waritrume. Yáitij̄?” tímiayi.

Tutai Pítiur tímiayi “Ámeke Krístuitme; Yúsaiȳ akupka-muitme.”

30 Tutai Jesus chichaak “Peṅké etserkairap” tímiayi.

Jesus ni jákatniur̄in ujakmiania nu
(Mateu 16.21-28; Rúkas 9.22-27)

31 Unuinia: “Wí Aents Ajasuitjiana ju ti wáitsatniuitjai. Israer-shuarti ii uuntrīsha, Patri úuntrīsha, ii jintinniur̄isha Winia nakitrurar mantuawartatui. Túrasha menaintiu tsawant nan̄kaasmatai nantaktiniaitjai” tímiayi.

32 Nunasha paant ujakmiayi.

Tura Pítrusha Jesusan arantach jukí kakantramiayi. “Tu chichasaip” tímiayi.

33 Tutai Jesus ayantmatar, ni unuiniamur̄in iis, Pítrun kakantar chicharuk “Satanása, werumta. Ámeke Yusna ana nu enentáimtatsme, antsu aya áentsnak enentáimtame” tímiayi. 34 Nuna tuasua amik tura nui matsamarmia nunasha, ni unuiniamur̄incha untuk tímiayi, “Shuar Winia nekas nemartustasa wakerakka ni wakeramur̄inkia iniaisati; tura ni krusr̄i yanak̄i nemartustí. 35 Kame shuar ju nun̄kanam aya niṅki anenmamkun̄ka nu

shuar ni iwiaakmarin emenkaktatui. Antsu Winia anentu asa tura winia chichamprun anea asa, shuar aya pénker pujustinniak enentáimtsuna nu, nekas iwiaakman wáinkiatwawai. ³⁶ Nekaata, shuar ashí ju nunkanam írunna nuna sumaksha túrasha ni wakaní jinium wéakuisha, ¿itiurak pénker pujusaint? ³⁷ Shuarka wakanin uwemtikrataj tusa wakerak ¿urutmak akikmakaint? ³⁸ Antuktarum. Yamaiya aents Yúsan nakitiar ajapawaru yajauch ainia nu íimiainiamunam shuar Winia natsantrakuínkia tura winia chichampruncha natsantakuínkia, wi, Aents Ajasuitjiana ju, winia Aparu kakarmarijijai tura nayaimpinmaya pénker suntarjai atak taakun, nú shuaran natsantrattajai Wisha.' Tu tímiayi Jesus.

9

¹ Ataksha Jesus nin chicharuk, 'Nekas tájarme, shuar játsuk Yus ni kakarmarijijai aentsu enentáin akupkattana nú tsawantan wáinkiatatna nu juí iijiai pujuiniawai" tímiayi.

Jesus nusháa iira ajasmiania nu
(Mateu 17.1-13; Rúkas 9.28-36)

² Nuyá sais tsawant nankaamasmatai, Jesus Pítruncha, Jakupuncha, Juánnasha uunt náinnium júkiarmiayi. Nuísha Jesus nushá iira ajasmiai. ³ Ni pushirísha ti puju jíitsumir ajattsarmiai. Nujai métek puju awajsatin ju nunkanam atsawai. ⁴ Túruna nuí Erías, Muisaisjai wantinkiar Jesusjai chichainian wáinkiarmai. ⁵ Nuyasha Pítiur Jesusan chicharuk "Uuntá, ii juí pujustin ti pénkeraiti. Menaintiú áakmaktai, Áminiu chikichik, Muisaisna chikichik, Eríasnasha chikichik" tímiayi. ⁶ Jesusa unuiniamurí sapijmainiak, Pítiur wariniak titi nekaachmai. Nékachu asa nuna tímiayi.

⁷ Tura yurankim tara mikintiu awajsamiai. Yuranminmaya chichaak "Júiti winia aneamu Uchir. Nii anturkatarum" tímiayi.

⁸ Nuyanka ni unuiniamurí ayantmar iiyaj tukamar aya Jesusnak wáinkiarmai. Chíkichkia atsuarmiayi.

⁹ Nuyá náinniumia akainiak Jesus nin chicharuk "Wáinkiarumna nu etserkairap. Wi, Aents Ajasuitjiana ju jakamunmaya nantaatsain nu etserkairap" tímiayi.

¹⁰ Tutai ni tímian ímiatrusan úukarmiayi. Tura "jakamunmaya nantaatsain tana nu, ¿wariniak ta?" nuamtak tunainiarmai. ¹¹ Tura Jesusan aniasarmiai "¿Urukamtai Israerti ii jintinniurísha, Erías emka tátiniaiti, tuinia?" tiarmiayi.

¹² Tutai Jesus tímiayi "Nekas Erías ashí iwiarattsa emka tátiniaiti. ¿Tura Aents Ajasunun Yus-Papinium warintiu?

“Ti wáitsattawai; Nin nakitrartatui.” Tu áarmaiti.

¹³ Wi tájarne, Erías nekas táwiti. Támatai, shuar ashí ni wakeri-armia nuna nin túrawarmiai. Yusa Papiríin Eríasa túrunatniuri aarma amia tímiatrusan túrawarmiai” tímiayi Jesus.

*Jesus iwianchin jiki akupkamiania nu
(Mateu 17.14-21; Rúkas 9.37-43)*

¹⁴ Tura ni unuiniamuri matsatmanum atak wáketuk, ti untsurí aents káutkar Israer-shuara jintinniurisha níijjaj tu-nai pujuinian wáinkiamiyi. ¹⁵ Tura aencha, Jesusan wáinkiar warainiak, tsékenki weriar, áujsarmiai. ¹⁶ Túrunawarmatai, Jesus chicharainiak, “Warí tunaiyarum?” tímiayi.

¹⁷ Tutai chikichik ayak “Uuntá, winia uchirun Ámin itiar-jame. Iwianchruku asa chichachuiti. ¹⁸ Túmakui íwianch enkemtakun paat ajar áepeawai; túram uchisha saun kaput apak nain kátetete awajeawai. Túram kakaakcha ame unuiniamurmin seamjai, jíirtukti tusan, túrasha tujintrutkarai” tímiayi.

¹⁹ Tutai Jesus tímiayi “Yúsan enentáimtichutirmea urutmá tsawantak pujustaj atumjai. Urutmá katsuntrataj! Uchi itiatarum” tímiayi. ²⁰ Takui uchin Jesusan itiararmiai. Tura íwianch uchin enkemta Jesusan wáiniak uchin ajakrami-ayi. Uchisha chichiptur nunká iniaan péper-péper ajakin wenunam saun apakmiayi.

²¹ Túrunamtai Jesus ni aparín aniasmiayi “¿Urutá yaunchu áinkiait?”

Tutai ni aparí tímiayi “Úchichik áinkiaiti. ²² Tuma asa tuke jutikiú pujurniuiti; jiniumsha apeawai, entsá maataj tusa ajuaawai. Yaintrukminiaitkiumka waitneasam yaintrukta” tímiayi.

²³ Tutai Jesus chicharuk “¿Urukamtai, yaintrukminiaitki-umka, tame? Nekaata, shuar Winia nekas enentáimturna nu ashí túramniaiti” tímiayi.

²⁴ Tutai uchi aparí kakantar chichaak, “Uuntá, nekas enentáimtajme. Nekas enentáimtustinian táasjana nu yáintkiata” tímiayi.

²⁵ Tura shuar untsurí káunainian Jesus wáiniak kakan-tuk “Empeku chichachu awajin iwianchi jínkitia, tájame. Jíinkim ataksha wayawaipia” tímiayi. ²⁶ Tura íwianch jiiuiuk untsamak uchin we-werkasa ajakar chichichipty áepkimiayi. Túram uchi jaka ímianis tepemiayi. Túrunamtai untsurí shuar “jakayi” tiarmiayi. ²⁷ Támanak Jesus uwejen achik awajkimi-ayi, tura uchi nantaki wajakmiayi.

²⁸ Tura Jesus jeá wayamtai, níinki pujusar, ni unuiniamuri aniasar “¿Urukamtai iisha jíiktin tujinkiamaji?” tiarmiayi.

29 Tutai Jesus tímiayi “Ju iwianchkia ijiarmar Yus áujkur jíkminiaiti” tímiayi.

Jesus ataksha ni jákatniurín ujakmiania nu

(Mateu 17.22-23; Rúkas 9.43-45)

30 Nuyá jínkiar Kariréa nunkanmaani nankaamakarmiayi. Ni unuiniamurín unuinia asa nu nankaamamun nekaawarain tusa Jesus nakitmiayi. 31 Unuiniak juna tímiayi: “Wi Aents Ajasuitiaj juna mantamnati tusar achirkar surutkartatui. Tura máamuitiatnak, iwiarsamunmayan menaintiú tsawantaj nantaktiatjai” tímiayi. 32 Tura nu chichaman nekaacharmiayi. Nékainiachiat, anintrustinian arantukarmiayi.

“¿Yaki imiá nankaamantuit?”

(Mateu 18.1-5; Rúkas 9.46-48)

33 Nuyá Kapernáum péprunam jeawarmiayi. Tura Jesus jeá pujus ni unuiniamurín aniniak, “¿Atumsha jintiá winis-rum warí áujmatmiarum?” tímiayi. 34 Tura natsarar pachis-charmiayi. Kame jintiá wésar “íijíaj ¿yaki imiá nankaamantu ajasat?” tunainiarmiayi. 35 Ni unuiniamurí pachischarmatai, Jesus pujus ashí tuse unuiniamurín irur chichaak “Shuar nekas nankaamantu ajastajtsa wakerakka, peejchachia nuke enentáimtumar shuara yáintri atí” tímiayi. 36 Tura uchin itiáa miniakas chichaak: 37 “Shuar uchin winia naaruj shiir awajeakka Winia shiir awajtai. Tura Winia akuptukua nunasha shiir awajeawai” tímiayi.

“Shuar in nakitramachkunka in páchitkiawai”

(Rúkas 9.49-50; Mateu 10.42)

38 Nuyá Juan Jesusan chicharuk “Uuntá, shuar ame náarmin pachis iwianchin akupea wainkiamji. Tura íijíaj írutkachu asamtai nu túratin suritkiamji” tímiayi.

39 Tutai Jesus tímiayi “Antsu suritkiairap. Shuar winia náarun pachis tujinkiamun túrakka, nu shuar wari tsanumprutratniun tujinkiattawai. 40 Shuar in nakitramachkunka, in páchitkiawai, tímiayi. 41 Winia nemarka asakrumin shuar yumiichinkesha ajampramkuka ántar túratsui; akikma átatui’ tímiayi.

(Mateu 18.6-9; Rúkas 17.1-2)

42 “Tura shuar ju uchin Winia umirtuinia nuna yajauchin túrumtikiamtáinkia, ti asutniattawai. Tuma asamtai uchin yajauchin túrumtiktsain kuntujen kayajaj jínkiar nayaantsanam ajunmaka maak ainti. 43 Ame uwejmek yajauchin túrumtikramamniaitkuinkia tsupikta. Mai uwejtuk wáitsatniunam jeatniujainkia chikichík uwejjaj ju nunkanam

puj_usar tuke iwiaaku pujustinnium jeatin ti shiiraiti. Warí, wáitsatniunmaṅka ji kajinkiashtin awai, ⁴⁴ jákaru akarisha jáiniatsui tura jisha tuke kapaawai. ⁴⁵ Nawemsha yajauchin túrumtikramamniaitkuṅkia nusha tsupikta. Mai nawentuk wáitsatniunam jeatniujainṅkia chikichík nawejai ju nuṅkanam puj_usar tuke iwiaaku pujustinnium jeatin ti shiiraiti. Wáitsatniunmaṅka ji kajinkiashtin awai, ⁴⁶ jákaru akarisha jáiniatsui tura jisha tuke kapaawai. ⁴⁷ Jimisha yajauchin túrumtikramamniaitkuṅkia ukuṅkiata. Mai jiiṅtiuk wáitsatniunam jeatniujainṅkia chikichík jijijai ju nuṅkanam puj_usar Yus akupeana nuṅ jeatin ti shiiraiti; ⁴⁸ wáitsatniunmaṅka jákaru akarisha jáiniatsui tura jisha tuke kapaawai.

⁴⁹ Naman Yus susamu weaktinia áintsan aentstirmesha jijiai nekapnastatrume. ⁵⁰ Weesha ti penkeraitiat michumarka, ħitiurak jea-jeat átinkí? Wats, wee jeakua áintsarmek atumek shiir enentáimtunaistarum” tímiayi Jesus.

10

*Nuwa ajapatniun Jesus áujmatsamiania nu
(Mateu 19.1-12; Rúkas 16.18)*

¹ Jesus Kapernáumnumia jiinki, Jutía nuṅkanam nankaamaki, Jurtan entsa amain jeamiayi. Nuṅ pujai, aents ataksha Nin irunturarmiai. Iruntrarmatai tuke túrin asa ataksha unuiniamiayi. ² Tura Pariséu Jesusan nekapsatai tusar wakeruiniak, Nin chicharainiak “Ĥáishman ni nuarí ajapatin tsanṅkamkamukait?” tiarmiayi.

³ Tutai Jesus tímiayi “ĤMuisais wariniak timia?”

⁴ Tutai “Papíjiai in ajapatniun tsanṅkatramkamiaji” tiarmiayi.

⁵ Tutai Jesus tímiayi “Atumí enentai kátsuram asamtai nu chichaman atumin tsanṅkatramkamiarme. ⁶ Tura Yus yámankamtaik ashí najanamia nuṅ, áishmanṅnasha nuwancha najanamiayi. ⁷ Tuma asamtai áishman ni aparíncha nukuríncha kanaki ikiuki, ni nuaríjajai tsaniṅtiniaiti. ⁸ Warí, áishman nuaríjijai jímiairaitiat chikichík ajasartatui. Tuma asamtai yamá jímiaarchaiti, antsu chikichík ajasuiti. ⁹ Tuma asa, Yus atsanṅkiania nuna, aents akankashtiniaiti” tímiayi.

¹⁰ Tura urum jeá wayawar, Jesusa unuiniamuri nu chichaman ataksha aniasarmiayi. ¹¹ Tuiniakui Jesus tímiayi “Shuar ni nuarín ajapa ikiuak chikichan nuátkaṅka, emka nuarín yajauch awajas, ikiuak, tsanirmayi. ¹² Nuwasha ni áishri ajapa ikiuak, chikichjai niiniurtukka, niisha tsanirmayi” tímiayi.

*Jesus uchin shiir awajsamiania nu**(Mateu 19.13-15; Rúkas 18.15-17)*

¹³ Antĩkíarat tusar uchin Jesusan itiararmiayi. Túruiniakui Jesusa unuiniamurĩ “itiairap” tiarmiayi.

¹⁴ Tura Jesus nuna wáiniak, kajek juna tímiayi “Uchi Winí winitin tsankatruktarum. Suritkiairap. Iis, shuar ju uchía núnisan peejchach enentáimtumainia nu Yusa akupeamurĩn pachiinkiamniaiti. ¹⁵ Nuní asamtai tájarme, uchi umiana núnisan Yusa akupkamurĩn shuar umíachkunka nuna pachiinkiachminiaiti. ¹⁶ Nuyá uchin miniakas, “Yus yáinmakarti” tímiayi.

*Kuítrintin Jesusan áujsamiania nu**(Mateu 19.16-30; Rúkas 18.18-30)*

¹⁷ Ukunam, Jesus nuyá weai, shuar tseke Nin tarimiayi. Tarí tikishmatar chicharuk “¿Uuntá, Amesha ti pėnkeraitme. Tuma asam, turuttia, ¿warinia túrakna tuke iwiaaku átataj?” tímiayi.

¹⁸ Tutai Jesus tímiayi, “¿Urukamtai Winia, pėnkeraitme, túrutam? Shuarka chikichkisha pėnkerka atsawai. Aya Yúsak pėnkeraiti. ¹⁹ Yus akupkamu nékatsmek. Ju áiniawai: tsanirmawairap, mańkartuawairap, kasamkairap, chíkich shuar tsanumprurairap, anańkartuawairap, apasha nukusha umirkatarum. Nu áiniawai” tímiayi.

²⁰ Tutai kuítrintin chichaak “Uunta, núnaka úchichik mash umiki tsakaruitjai” tímiayi.

²¹ Tutai Jesus iis waitnenmai tímiayi “Chikichik táasume. Weme ashí áminiu ana nu surukta. Túram nu kuit kuítrincha susarta. Túrakum nayaimpiniam kuítrum ikiaunќattme. Túram winitia, krus yanaktinia áintsamek itiurchatrum aĩn nemartusta” tímiayi.

²² Tura kuítrintin nu chichaman antuk, wake mesek, kúntuts enentáimiar wémiayi, ti kuítrintin asa.

²³ Nii wématai, Jesus ashí ni téntakmarĩn iis, ni unuiniamurĩn chicharuk, “Kuítrintin ainia nu Yusa akupeamurĩn pachiinkiatin ti itiurchaiti” tímiayi. ²⁴ Takui ni unuiniamurĩn nuna antukar niisháa enentáimprarmiayi. Túramtai Jesus tímiayi “Uchiru antuktarum. Shuar kuítriniak enentáimtuinia nuka, Yusa akupeamurĩn pachiinkiatin penké itiurchataiti. ²⁵ Uunt kamiriu auja jĩn wayatin ana nú nanќaamas, kuítrintin Yusa akupeamurĩn pachiinkiatin itiurchataiti” tímiayi.

²⁶ Nuna antukar nú arant niisháa enentáimprarmiayi. “¿Nuńkia yaki uwempramniait?” tunaiyarmiayi.

²⁷ Tura Jesus nin iisar chichainiak “Aents nińki túrachminiaiti, antsu Yus túramniaiti. Yuska ashí túramniaiti” tímiayi.

28 Nuyá Pítiur Nin chicharuk “Iis, iikia ashí ikiukir némartujuk” tímiayi.

29 Tutai Jessusha tímiayi, “Nekas tájarme, shuar Winia nemartak Yus-Chichamnasha ipiampartasa wakerak ni jeencha, yachíncha, umaincha, aparíncha, nukuríncha, nuaríncha, uchiríncha, nuñkencha uyumatsuk ikiuakka, 30 nu shuar ju nuñkanam sian patatnas jeencha, yachíncha, umaincha, nukuríncha, uchiríncha, nuñkencha, ju nuñkanam wáitiayat sunastatui. Tura ukunam, nuñka amuukamtai, nu shuarsha jáchatainiam tuke péñker pujustatui. 31 Tura untsurí shuar yamá penkeri ainia nu, ukunam ukunmaaní pujusartatui, tura íksan untsurí shuar yamá ukunmayá ainia nu, ukunam eem pujusartatui” tímiayi Jesus.

*Jesus ni jákatniuri ataksha ujakmiania nu
(Mateu 20.17-19; Rúkas 18.31-34)*

32 Nuyá arak Jerusarénum wéenak, jintiak wearmiayi. Jesuska émak wémiayi. Ni unuiniamurísha niisháa enentáimprarmiayi. Ashamainiayatan Jesusan nemarsarmiayi. Túmainiaí atak ni nekas unuiniamurín akankiar, ni túrunatniurín ujakmiayi. 33 Ujaak tímiayi “Antuktarum, arak Jerusarénum wéaji. Nuí Winia, Aents Ajasuitjiana juna, Patri uuntriíncha, jintinniunmasha surutkartatui. Niisha apachnium mantamnati tusar surutkartatui. 34 Nusha Winia wishikrurar, katsumprukar, usukruawar mantuawartatui. Túramaitiatnak menaintiú tsawantai nantaktiatjai” tímiayi.

*Jakupu Juanjai seawarmiania nu
(Mateu 20.20-28)*

35 Sepetéu uchirí Jakupusha Juansha Jesusan taruntarmiayi. Taruntar “Uuntá, ii seattajnia nu túrak tusar wakeraji” tiarmiayi.

36 Tutai Jesus tímiayi “¿Warí itiurtukat tusam wakerutam?”

37 Tutai “Ame nupetmaktin tsawantrum jeamtai, iisha Ámijiaí pujustaitsar wakeraji, wi untsuurumini, winia yatsursha menaarmini. Nu tsan̄katrukta” tiarmiayi.

38 Tura Jesus tímiayi “Átum seatrumna nu nékatsrume. Wi umartatjana nu umarminkaitrum. Tura Wi imiantiatjana núnisrum imianminkaitrum” tímiayi.

39 Niisha tiarmiayi, “Túramniaitji, páchitskea.”

Tuiniakui Jesus tímiayi “Wats, Wi umartatjana nu umartatume, tura Wi imiantiatjana núnisrumek imiantiatrume. 40 Túrasha winia untsuuruini, menaruinísha átum pujustinian Wikia súsashtiniaitjarme, antsu Yus wakerana nu nuin̄ apujsat-tawai” tímiayi.

⁴¹ Tura chíkich tias unuiniamur_i nuna anturkar Jakupun-cha, Juánnasha ti kajerkar_{mi}ayi. ⁴² Tura Jesus ni unuini-
amur_in irur tímiayi “Ju nékarme; Yus-shuarchanum akup-
niuitjai tuinia nu, waantu enentáimtumas, ni shuár_in ti aku-
peawai; tura uunt ainia nusha ashí shuar ti takamtikiaini-
awai. ⁴³ Antsu atumjai núnisan atsutniuiti. Átumka, wi unuini-
amutiram, uunt ajastaj tusarum wakerakrumka, ashí yáimin
ajastiniaitruma. ⁴⁴ Shuar atumí penker_i ajastajtsa waker-
akka, takarniua nuke ajas, umirtamkatí. ⁴⁵ Wisha, Aents
Ajasuitjiana ju, shuar takartusarat tusan táchamjai, antsu
ashí shuáran yáintaj tusan táwitjai. Wisha jarukan shuáran
uwentikratajtsan táwitjai” tímiayi.

Jesus Partimiásan tsuármiania nu
(Mateu 20.29-34; Rúkas 18.35-43)

⁴⁶ Jesus ni unuiniamur_ijiaj, tura chíkich untsur_i aentsjai
Jirikiú péprunam jeawarmiayi. Nuyá Jirikiúnmayasha jíinkiar
weenaj, Timiasa uchir_i Partimiás, kusuru amia nu, jintiá
yantam kuítian seamu pujumiayi. ⁴⁷ Niisha, Nasarénumia
Jesusaiti táman antuk, untsukum “Uunt Jesusa, amesha Uunt
Akupin Tawit weeachukaitiam, Yus anaikiachmakaitiam.
Winiaja waitnentrurta” tímiayi.

⁴⁸ Tura untsur_i nu_i matsamarmia nu nin chicharainiak
“Takamatsata” tiarmiayi.

Niisha nú nankaamas untsummiayi “Tawit weeá Jesúsá,
winia waitnentrurta.”

⁴⁹ Nuna antuk Jesus wajatas, chichaak “Untsuktarum”
tímiayi.

Takui shuar kusurun untsuiniak “Kakaram ajasta. Wajak-
tia; untsurmawai” tiarmiayi.

⁵⁰ Tuiniakui niisha esekmatair_in ajapa ikuak wajaki Jesu-
san tseke tarimiayi.

⁵¹ Tura Jesus nin chicharuk “¿Winia itiurtukat tusamea
wakerutam?” tímiayi.

Tutai kusuru chicharuk “Uunta, ímtiasan wakerajai”
tímiayi.

⁵² Tutai Jesus chichaak “Shiir wetá. Winia nekas
enentáimtursa asam pé_nker ajasume” tímiayi. Tura nu
chichamaik ímpramiayi. Tura Jesusan nemarkí wémiayi.

11

Jesus Jerusarénum wayamiania nu
(Mateu 21.1-11; Rúkas 19.28-40; Juan 12.12-19)

¹ Wésar Jerusarénum tura Petpajái péprusha Petania
péprusha Uriwiu naint ínkiuasmak ámanum jeawar, Jesus
jimiará unuiniamur_in ujuikimiayi. ² Ujuiak tímiayi “Aatunini

pépruchiniam werum nuin umpuuru uchich jinkiamu wáinkiatarme. Nu umpuuruuka tuke entsamprukchamuiti. Nu atiarum utitiarum. ³ Tura “¿Urukamtia áitkiarum?” turamainiakuisha, “ii Uuntri wakerawai” titiarum” tímiayi. ⁴ Tutai wearmiayi. Tura umpuurun wáitiniam aani jinkiamun, jintiá yantamnum wajan wáinkiar atiawarmiayi. ⁵ Nui pujuarmia nu “¿Warí áitkiarum. Urukamtai umpuuru atiarum?” tiarmiayi. ⁶ Takui, niisha Jesus timia nu ujakam suritkiacharmiayi. ⁷ Tura umpuurun Jesusan itiarar pushirin umpuurunam awantkarmiayi. Túram Jesus entsamkamiayi. ⁸ Tura untsurí shuarsha pushirin jintianam ayapar áinkarmiayi. Chíkichcha jintiá yantamnumian nukan juuk jintianam áintrarmiayi. ⁹ Eem wearmia nusha, uku winiarmia nusha warainiak “Jusanna” untsumkarmiayi. “Yusa náarín winiana nu imiá penkeraiti. ¹⁰ Ii uuntri Tawitia akupeamuri tátatna nu imiá penker atí. Ii Yusri naari shiir ati.” Tu untsumki wearmiayi. ¹¹ Tura Jesus Jerusarénum jeamiayi. Jeá, Yusa Uunt Jeen wayamiayi. Tura ashí iyyasua amik, kintiampraj tusa ni tuse unuiniamurijjai tíjiuch Petania péprunam wearmiayi.

*Jesus iikiu numin yuminkramiania nu
(Mateu 21.18-19)*

¹² Kashin tsawar, Petanianmaya jintia wesa, Jesus tsukammiayi. ¹³ Tura arant wajan iikiu numirin núkenniun wáiniak, nereatsuash tusa iyumiayi. Tura nereshtairin asamtai neren penké wáinkiachmiayi. ¹⁴ Nuyá iikiu numin yuminkeak: “Ame nerem penké yunaashti” tímiayi. Ni unuiniamurisha nuna táman antukarmiayi.

*Yusa Uunt Jeen suruktinian Jesus suritkiamiania nu
(Mateu 21.12-17; Rúkas 19.45-48; Juan 2.13-22)*

¹⁵ Nuyá atak Jerusarénum jeawarmiayi. Nui Jesus Yusa Uunt Jeen wayá suruktai tusar pujuarmia nuna jiki akupkatasa nankammiayi. Kuítian yapajin armia nuna misarin tura yampitsan surin armia nuna kutankrincha ayanturmiayi. ¹⁶ Tura káarak entsaki Yusa Uunt Jeen nankaamaktinian suritkiarmiayi. ¹⁷ Nuyá “Yus áujсатаi tusar ashí shuar Yusa jeen wayamnia átatui” tú aarchamukait Yusa Papirijn. Antsu átumka Yusa jee kasa matsamtaiya nútikiarme” tímiayi. ¹⁸ Aents nui matsamarmia nu Jesusa chichamen antukar ti enentáimprarmiayi. Tuma asamtai Israer-patri úuntrisha, Israer-shuara jintinniurisha, nuna nekaawar, Jesusan ashamainiak mantamnati tusar chichaman jurusarmiayi. ¹⁹ Nuyá kiakui Jesus Jerusarénumia jinkimiayi.

*Iikiu numin káarun wáinkiarmania nu
(Mateu 21.20-22)*

²⁰ Kashin káshik nan̄kaamainiak iikiu numin kan̄kaptuk jaka wajan wáinkiarmai. ²¹ Tura Pítiur enentáimias Jesusan tímiayi “Uunta, iista, iikiu Ame yumin̄kramam nu kan̄kaptuk káarchaik.”

²² Tutai Jesus tímiayi “Yus nekas enentáimtustarum. ²³ Iis, nekas tátsujrumek, shuar “Yus nekas túratpiash” tútsuk, tura “wi tájana nuna Yus nekas túrattawai” tu enentáimsar, ju náintian “jiinki nayaantsanam iniánti” tákuin̄kia, páchitsuk inian̄tatui, tímiayi. ²⁴ Tuma asamtai tájarne, ashí Yus áujkuram searmena nuna suramsattarme. “Wi seajna nuna yamá takakjai” tu enentáimkiurmeka, wáinkiáttarme. ²⁵ Tura Yus áujkuram pujarmena nu, kajernaiyamuram ákuin̄kia tsan̄kurnáiratarum. Atumí Aparí nayaimpiniam pujana nu atumí tunaar̄in tsan̄kurturti tusarum túratarum. ²⁶ Atumsha tsan̄kurnáiyachkurminkia, núnisan̄ atumí Aparí nayaimpiniam pujana nu atumí tunaar̄in tsan̄kurtámprashtatrume” tímiayi Jesus.

*Yusa kakarmarijiai Jesus takasmiania nu
(Mateu 21.23-27; Rúkas 20.1-8)*

²⁷ Ataksha Jerusarénum waketkiarmiayi. Jesus Yusa Uunt Jeen wekai, Israer-patr̄i úuntrīsha, Israer-shuara jintinni-ur̄isha, Israer-shuara iruntai-jee úuntrīsha Nin káutkarmiayi. ²⁸ Káutkar Jesusan tiarmiayi “¿Yana kakarmarijiai ju túram. Ame túramna nuna ya tsan̄katrama?” tiarmiayi.

²⁹ Tuiniakui Jesus tímiayi, “Chikichkiniak aniatatjarne. Áirkatarum. Túrakrumnin̄kia Wisha winia takastinian tsan̄katrukma nuna ujaktatjarne. ³⁰ Wats, turutiarum, ¿ya Juan̄ imiaitniun tsan̄katkama? ¿Shuar tsan̄katkamka? ¿Yus tsan̄katkamka? Áirkatarum” tímiayi.

³¹ Tura niisha enentáimprar “Yus akupkaiti” tákurninkia, “¿urukamtia umirkachuram?” turamchattajik. ³² Antsu “shuar tsan̄katkaiti” tákurkia, ashí shuar ashamaji” tunainiarmiayi. Ashí aents Juan̄ nekas Yúsna etserniuiti, tu enentáimainiakui ashammiarmiayi. ³³ Nuyá Jesusan tiarmiayi “Iikia nékatsji.”

Tutai Jesus tímiayi “Wisha núnisnak yana kakarmarijiai takaaj nuna ujakchattajrume.”

12

*Yajauch takau armia nu
(Mateu 21.33-46; Rúkas 20.9-19)*

¹ Jesus ju métek-taku chichaman unuiniamiayi: “Shuar uwa ajan ajam wenuimiai. Nuyá uwa nekeetain najanamai. Tura

kumpin jean najanamai. Najana takartusti tusa shuáran ikiuak nínkia jeachat wémai. ² Neretai tsawant jeamtai, ni takarniurín júukman akankat tusa akupkamai. ³ Tura ajanam takau arma nu, nu takarniun achik, katsumkar, áyatik awainkiarmai. ⁴ Ataksha chíkich takarniun akupkamai, tura nunasha kayajai tukurar, múuknum katsumkar, katsekar awainkiarmai. ⁵ Tuma aín ataksha chíkichan akupkamai, tura nunasha máawarmai. Ti untsurín akupramai. Chikichnasha katsumkarmai, chikichan máawarmai.

⁶ Tura níijjai chikichik tuke ámiayi, nuka ni aneamu uchirí. Nu uchincha ukunam akupkamai. Akupeak “Winia uchirí naka shiir awajsartatui” tímiyai. ⁷ Tura ni uchirí winian wáinkiar, takau shuar nuámtak chichainiak “Juka ajá nérenniu uchirínti. Wátsek, maatai; túramka ájaka iiniu átatui” tiarmai. ⁸ Túsar achikiar máawarmai. Ayashincha ajanmaya ajapawarmai” tímiyai.

⁹ Tura nuyá aniasmiayi, “¿Wats, warí enentáimsarum; ajá nérenniurí itiurkattawa? Jeashtanmayá taa, ajá takainia nú shuaran amuktatui. Ni ajaríncha chikichan ikiastatui. ¹⁰ Ju, Yus-Papinium aarma ana nu áujsachukaitrum:

Kaya péñkernak, jeammin “yajauchiiti” tusar ajapawarmia nu ashí kayajai nankaamas péñker apujsamuiti.

¹¹ Nusha Yus túramuiti. Iisha íisar ti enentáimtaji. Nuke áarmaiti” tímiyai.

¹² Tura nú metek-taku chichamjai nin áujmatma asa achik-tai tusar chichaman jurusarmiayi. Túmainiyat shuáran ashamainiak Jesusan ikiuiniak wearmiayi.

Uunt akupin súsatín tura Yus súsatín

(Mateu 22.15-22; Rúkas 20.20-26)

¹³ Tura wear, imiaamtikiar yajá chichakmatai nújai yajauch títai tusar Paríséu shuarnasha, Erutisa namarín shuarnasha akatar Jesusan akuptukarmiayi. ¹⁴ Túram Nin jeariar chicharainiak: “Uuntá, aents nakitiainiaín tuke nekas chicham páchitsuk chichaame, nu nékaji. Aents pátatek iyatsme, antsu nekas Yusa jintí unuiniamé. ¿Waritia enentáimiam, ii kuitrí uunt Sesar súsatín péñkerkait. Susattajik. Suritkiattajik? Nu nekaatai tusar wakeraji” tiarmiayi.

¹⁵ Tura Jesus ni yajauch enentáimmiarín nekara “¿Urukamtai Winia yajauch titi tusarum wakerutarum? Kuit itiatarum, Wi íistaj” tímiyai.

¹⁶ Tutai kuítian itiariarmiayi.

Jesus nuna iis tímiyai, “¿Juisha yana yapí tura yana naari áarmait?” tímiyai.

Tutai “Uunt Sésarna” tiarmiayi.

17 Nuyá Jesus tímiayi “Uunt Sésarna ana nu susatarum; túrarum Yúsnaka Yus susatarum” tímiayi. Tura ni áimkiamur_{in} antukar ti enentáimprarmiyi.

Aents nantaktinian Satuséu anintrusarmiania nu (Mateu 22.23-33; Rúkas 20.27-40)

18 Nuisha Satuséu aents, jakamunmaya nantaktin penké atsawai tiniu armia nu, Jesusan tariarmiyi. Taar Jesusan chicharainiak: 19 “Uuntá, Muisais juna áatrampramaji:

“Áishman ni nuar_i júreats_{in} jakamtainkia, yachin yajutmatratsa, ni yach_i nu wajen nuátkatniuiti.”

20 Wats, siati yachi ármiayi. Iwiai_{ri} nuwan nuatak yajutmatsuk jakamiayi. 21 Ni yach_i wajen akinkiamiayi. Nusha núnisan yajutmatsuk jakamiayi. Nuna yach_isha núnisan tura nuna yach_isha núnisan túramiyi. 22 Tura ashí siati patainman, patainman nu nuwan nuátkarmiyi. Yajutmatsuk, yajutmatsuk jíiniawarmiyi. Tura ukunam nuwasha jakamiayi. 23 Nuinkia nantaktin tsawantai, nantakiarmatai, ¿yana nuar_{in} ati? Ashí siati nuátkacharmaka” tiarmiyi.

24 Tutai Jesus tímiayi ““Jakamunmaya nantaktin atsawai” táturmek. Yusa chichame tura Yusa kakarmari nékachu asarum awajiarme, tímiayi. 25 Iimiatarum, aents jakamunmaya nantakiarmatai, nuatnaikiatin atsuttawai, antsu nayaimpinmaya suntara núnisan pujusartatui. 26 Tura jakamunmaya nantaktiniapitia tusarum nu nekaatin nekas wakerakrumka Muisais aarmia nu enentáimtustarum. Yuska numichinmaya Muisaisan chicharuk “Wikia Apraama Isaaka tura Jakupu Yúsrintjai” Yus tímiayi. 27 Yaunchu jákaru ain, Yus nuna taku, ayashnium jakayat iwiaaku pujuinia nuna Yúsrintjai, tawai. Nekas jaka ainia nuna Yús_{in}chuiti. Nantaktin atsawai tau asarum awajirurme” tímiayi Jesus.

Yus akupkamu imiá pé_nker ainia nu (Mateu 22.34-40)

28 Jesussha Satuséusha áujmatnainian Israer-shuara jintiniur_i taa anturkamiayi. Anturak, Jesus ti penker áimkiui, niisha Jesusan juna aniasmiayi: “¿Yus akupkamu tuá imiá pé_nkerait?” tímiayi.

29 Tutai Jesus tímiayi “Júiti Yus akupkamu imiá pé_nker: Antukta Israer shuará. Ii Yusr_i úuntaiti, tura Niñki nekas Yúsaiti. 30 Tuma asantai, tuke enentáimjai ti enentáimsam Uunt Yus aneeta. Túram ame iwiaakmarmesha, kakarmarmesha Yus íiktusta. Núiti nekas pé_nker akupkamu, tímiayi. 31 Nuyasha chikichcha awai, “ame ayashim aneamna tímiatrusmek ame írutramurmesha aneeta.” Chíkich nu nankaamas pé_nker akupkamu atsawai’ tímiayi.

³² Tutai jintintin tímiayi “Ee, péⁿkeraiti, Uunta. Nékasme^ktame. Chikichík Yus awai, chíkichkia atsawai. ³³ Tura tuke enentáijjajⁱ ti enentáimsar, ii kakarmarisha Yus íktusar Nin aneakrikia, ii ayashí aneajnia núnik ii írutramurisha aneatniuitji. Nusha ashí Yus sutai ana nujajⁱ nan^kkaamas péⁿkeraiti’ tímiayi.

³⁴ Nuna tiniu asamtai Jesus ni péⁿker áimkian nekáa “Ameja Yus akupeamunam pachiinkiatin ishichik táasume” tímiayi. Tura nuyá chíkich shuar Jesusan aniastinian arantukarmiayi.

Kristu tutai çyana uchirimpait?

(Mateu 22.41-46; Rúkas 20.41-44)

³⁵ Jesus Yusa Uunt Jeen unuiniak pujumiayi. Tura chichaak “¿Urukamtai ii jintinniurⁱ “Yus anaikiamu Krístun Tawitia shuari” tuinia?” ³⁶ Tawit, antsu, Yusa Wakaní aarta tutai, Yus-Papini^um juna áarmiayi:

Uunt winia Úuntrun tímiayi “Ame nemasrumin nupetkatin amuatsainⁱ winia untsuuruinⁱnⁱ pujusta”.

³⁷ Kame Tawitkia, Krístun áujmatuk, “winia Uuntru” taisha, çitiura ní shuarisha átiⁿki?” tímiayi Jesus. Tuma asamtai untsurⁱ shuar nu^j matsamarmia nu ti shiir antukarmiayi.

“Israer-shuaran jintintin ainia nújajⁱ aneartarum” Jesus tímiania nu

(Mateu 23.1-36; Rúkas 11.37-54; 20.45-47)

³⁸ Jesus unuiniak tímiayi, “Israer-shuara jintinniurⁱ ainia nujajⁱ aneartarum. Niisha waantu enentáimtumasar, esaram pushin entsasar wekasatajtsar wakeruiniawai. Péprunmasha shuar shiir áujtusarat tusa wakeruiniawai. ³⁹ Israer-shuar iruntainiam penkerⁱ pujutainium pujustinian wakeruiniawai. Nampernumsha penkerⁱ pujutainium pujustinni-asha wakeruiniawai. ⁴⁰ Tura wajé jeencha atantainiawai. Túrawar aents nekaracharat tusar ti esaram chichamjajⁱ Yúsán áujainiawai. Nincha chikichjajⁱ nan^kkaamas Yus asutiawarta-tui” tímiayi.

Waje kuítrⁱn susamiania nu

(Rúkas 21.1-4)

⁴¹ Jesus Yusa Uunt Jeen kuit enketainiam naka pujus áents kuítrⁱn chumpian wáinkiamiayi. Untsurⁱ kúitrⁱntin núkap enkeawarmiayi. ⁴² Nuyá waje kuítrⁱncha taa jimiará uchich kuítian, reara áantsan, enkeamiayi. ⁴³ Jesuska unuiniamurⁱn untsuk “Nekas tájarme, ju wajé kuítrⁱnchaitiat, ashí enkeena nú nan^kkaamas núkap enkeayi. ⁴⁴ Iis, kuítrⁱnniusha nii ampirma nuna enkeenawai, tura antsu ju nuwá kuítrⁱnchaitiat, ampirmatsuk ni yurumatniurⁱn takurmakman ashí enkeayi” tímiayi.

13

*Yusa Uunt Jeen yumpuntratniun Jesus ujakmiania nu
(Mateu 24.1-2; Rúkas 21.5-6)*

¹ Yusa Uunt Jeenía Jesus jiinkimtai, unuiniamurí Nin tímiayi “Íisia, Uunta, kayasha ti shiir áiniawai. Jeasha imiá úuntchakait.”

² Tutai Jesus tímiayi “Ju imiá uunt jea wáinmek. Kaya eken-tramu au ashí mash yumpuntrartatui” tímiayi.

*Amuukatin tsawantin uruku átatna nu
(Mateu 24.3-28; Rúkas 21.7-24; 17.22-24)*

³ Nuyá Uriwiu náinnium wakar, Yusa Uunt Jee naka pujusar, Pítrusha, Jakupusha, Juansha, Antressha, nínkimias Jesusan aniiniak ⁴ “Uuntá, tímiam nu, zurutiá túrunatta. Nu túrunatin jeakuisha itiura nekaattajia? Paant ujatmakta” tiarmiayi.

⁵ Tutai Jesus tímiayi “Aneartarum, anankramawairap.
⁶ Nekaatarum, untsurí winia naarun pachisar winiartatui. Chíkich chíkich “Wiitjai Kristu” taku, untsurín anankawartatui. ⁷ Tura meset chicham ántakrumka, yajaya meset chicham ántakrumsha sapijmiakairap. Nekas túrunashtinkiait. Nujajisha amuukatin tsawantka tuke jeatsui, tímiayi. ⁸ Shuar chíkich shuarjai mesetan najanawartatui; apachcha chíkich apachjai núnisan mesetan najanawartatui. Untsurí nunkanam úurkattawai. Tsukasha ártatui, charaatum ajamusha núnisan átatui. Tura nujai itiurchatka aya yama nan kamui.”

⁹ Túmaitkui atumsha aneartarum. Akupin iruntainiumsha surutmakartatrume, tura íi shuar iruntainmasha katsumpramkartatrume. Wíi shuar asakrumin, kapitíánnium, akupniunmasha juramkittiarme. Nui jearum, Winia chichastatrume. ¹⁰ Nu túruntsajin ashí áentsnum Yus-Chicham etsernaktiniati. ¹¹ Atumín surutmaktasar juramainiakuisha, warintiajak tusarum ti enentáimsairap. Chichastin jeamtai, Yusa Wakaní jintintramattarmena nu titiarum. Iis, atumí enentájijai tíchattarme, antsu Yusa Wakaní jintintiam títiatrume. ¹² Nu tsawantin shuarsha ni yachin mantamnati tusa suruktatui. Apasha ni uchirín suruktatui. Uchisha aparíncha nukuríncha kajerak, jakati tusa suruktatui. Núnisan untsurí shuar túrawartatui. ¹³ Nuiñkia Wíi shuar asakrumin ashí nakitramprartatui. Tura shuar yawetsuk katsuntran ka uwemprattawai” tímiayi.

¹⁴ Nuyá Jesus tímiayi “Shuar juna áujeana nu nekaati. Yúsna etserin, ni naari Taniar, ti yajauch tuke emesin ana nuna yaunchu aar etserkamiayi. Nuka pujushtainiam pujan wáinkurmesha, ashí Jutía nunkanam pujarmena nu, náinnium pisartarum. ¹⁵ Jea yakiini pujana nu akaiki wariri

achiktajsa, jeen wayashti. ¹⁶ Ajanam pujana nusha ni pushirin jukitiajsa waketskisti. ¹⁷ Tura ajamtin áiniana nusha, kuírchin umuntsainia nusha, nu tsawantin timiá itiur-chatan wáinkiertatui. ¹⁸ Tuma asamtai átum pisaarmena nu yumitin achati tusarum Yus seatarum. ¹⁹ Nu tsawantinkia ti wáitsatin átatui. Yama nan̄kamtaik Yus nun̄kan najanama nuisha, yamaisha ukunmasha timiu wáitsatin pen̄ké atsut-tawai. ²⁰ Tura Uunt Yus wáitsatin tsawantan ishichik awajsattajai tíchaitkuinkia, uwempratin pen̄ké atsuinti. Tura ni shuarin anaikiamia nuna yáintajsa wakerak, nu tsawantan ishichik awajsattawai. ²¹ Nu tsawantai “júiti Kristu” túramkuinkia anturkairap. ²² Kame “Kístuitjai” ántar tuinia nu, tura “Yúsnan etserniuitjai” ántar tuinia nusha wantinkiertatui. Wantinkiar Yus anaikiamu shuárnasha anan̄katai tusar wakeruiniak, ni kakarmarin iniakmainiak aentsti tujintiamun túrartatui. ²³ Tura átum aneartarum. Aetak, túruntsain ujakchajrume’k’ tímiayi Jesus.

Aents Ajasu tutai tátintri

(Mateu 24.29-35, 42-44; Rúkas 21.25-36)

²⁴ Jesus tuke unuiniak júna tímiayi: ‘Tura nu wáitsatin nan̄kaasmatai, etsaasha nantusha etsantrashtatui. ²⁵ Yaasha nayaimpinmaya kakekartatui, tura nayaimpiniam kakaram ainia nu muchitrartatui. ²⁶ Nuyasha ashí aents Winia wáitkiartatui. Wi, Aents Ajasuitjiana jú, ti kakaran, ti wincha ajasan, yuranminiam winiái wáitkiartatui. ²⁷ Nui nayaimpinmaya suntarun akupkattajai, Wíi shuaran ashí nun̄kanmayan irurarat tusan. Arakaaniya, nun̄kaaniya, ashí nun̄ka nan̄katkamunmayan Wíi shuaran irurartatui.’

²⁸ ‘Tikiu numi nakumea nu nekaatarum. Ni chin̄kimpri pun̄kak nuke jeakuí, “jú nun̄kanam esat jeatemai” tátsurmek. ²⁹ Núnisrume’k’ Wíi tájarmena nu wáinkiumeka, ni tátintri jeatemai tu nekaattarme. ³⁰ Nekas tájarme, yamai aents pujuinia nu kajiñ amuiniatsain, ashí Wíi tájana nu túrunatniuiti. ³¹ Nayaimpisha nun̄kasha amuukatniuiti. Tura winia chichampruka amuukashtiniaiti. ³² Tura tsawantcha nekanachminiaiti. Nayaimpinmaya suntarsha nékainiatsui; Wisha Yusa Uchiríntiatan nékatsjai. Aya winia Aparuk nékawai. ³³ Atumsha anearum enentáimprarum Yus aujsa pujustarum, tsawant nékachu asarum.’

³⁴ ‘Tura Wikia jú shuarjai méteketjai. Jú shuarsha jeachat weak, ni jeen ikiuawai. Ikiuak ni shuarin wáitrukartí tusa apujas ikiuak ashí shuaran takatrin súawai. Tura wáitin wáinniun, “ameja pen̄ker wáinkia” tímiái. ³⁵ Wikia nu jea nérenniua núnisnak, urutai tátataj nékachu asarum anearum pujustarum. Kíaraimpiash, tura ajapkeash, atash

shiniukaimpiash, káshikiash tátatjai. ³⁶ Nérentin aya aneachmak taa, kanúu tepají wáitkiaí tusarum aneartarum. ³⁷ Wi atumin tájana nu, ashí shuáran tajai, anearum pujustarum” tímiayi Jesus.

14

Jesusan chichaman jurusarmiania nu

(Mateu 26.1-5; Rúkas 22.1-2; Juan 11.45-53)

¹ Jímiarchikí tsawant ajasmiayi paskua tutai námper jeatin. Paskua námpertincha wakapruachu tantan yuatin námpernasha métek najanin ármiai. Israer-patri uuntrísha, Israer-shuara jintinniurísha Jesusan anankar achikiar maatai tusar wakeriarmiayi. ² Túrasha “Jista tsawantin túrachmi, aents charaatum ajarain tusar” tiarmiayi.

Nuwá kun̄kuinian Jesusan ukatramiania nu

(Mateu 26.6-13; Juan 12.1-8)

³ Jesussha Petania péprunam tunamaru Semunka jeen misanam pujan, nuwá tarimiayi. Nartu kun̄kuinian arapástru tutai kaya najanamunam piakun itiamiayi. Nu kun̄kuin ti kuitiaiti. Mutí chuchuké kupik Jesusa muuken kun̄kuinian ukatramiai. ⁴ Tura nuí pujuarmia nu, kajerar tunaiyarmiayi “¿Urukamtai ju kun̄kuinian ántar wasurea? ⁵ Júnasha súrakka, menaintiú sian kuítnium surukminiuyi. Nu kuitcha kuítrincham súsan̄ka maak” tiarmiayi. Tusa nuwán kakerkarmiayi.

⁶ Antsu Jesus chicharainiak “Iniaisatarum. ¿Urukamtai au kajerarum? Winia shiir túrutayi, tímiayi. ⁷ Kuítríncha atumjai tuke íruntsuk. Wakerakrumka tuke péñker awajsatniuitrume. Antsu Wikia atumjai tuke pujushtatjai. ⁸ Ju nuwá ashí nii túramnia núnaka umikiaí. Wi jákatin jeatsain, iwiarsatin kun̄kuinian shiir ukatrurai. ⁹ Nekas tájarme, ashí nunkanam Yus-Chicham etsernaktatna nuí, ju nuwá túramurísha etsernaktatui, nin kajinmatkíarain tusa” tímiayi.

Jútas Jesusan suruktaj timiania nu

(Mateu 26.14-16; Rúkas 22.3-6)

¹⁰ Nuyá Jútas Iskariúti, Jesusa unuiniamuríntiat, Israer-patri uuntrín werimiayi, Jesusan suruktaj tusa. ¹¹ Niisha nuna antukar, warasar “Kuit amastatji” tiarmiayi. Jútassha Jesusan itiurak yúpichuch tsan̄kamkattaj tusa enentáimias wekaimiai.

Jesusjai iruntrar yurumáwarmia nu

(Mateu 26.17-29; Rúkas 22.7-23; Juan 13.21-30; 1 Kurintiu-nam 11.23-26)

12 Wakapruachu tantan yuatin jísat nan̄kama tsawant tsawarmatai, paskua nám̄pertin yúatin murik máatin jeamtai, Jesusa unuiniamur̄i iniasarmiaiyi “Paskuatin murikiu yúatin iwiaratai tusar ¿tūi wétataj¹. Tūi yurumattam?” tiarmiayi.

13 Tutai Niisha jimiara unuiniamur̄in akatar akupeak “Péprunam wetarum. Nūi áishman̄ yumin jukí wéa wáinkiatarme. Nūi áishman̄ nemarsatarum. 14 Wayana nūi jeá nérenniur̄i títiarum “Uunt túramui, ¿wisha, unuiniamur̄jai tūi yurumáttaj?” 15 Nūi nérentin, yakí písunam uunt tesamunam ashí iwiamun iniakturmastatrume. Nūi jísat ii najanatin iwiaratarum” tímiayi. 16 Ni unuiniamur̄i wear, péprunam jeawar, Jesus timia núnisan̄ wáinkiar̄miayi. Tuma ásar paskua nám̄peran iwiararmiaiyi.

17 Nuyá kíakui Jesus ni tuse unuiniamur̄ijjai wayawarmiaiyi. 18 Niisha misanam pekaamak, yurumáiniak pujasar, Jesus tímiayi. “Nekas tájarme, chikichík shuar Wijjai yurumna nu, surutkattawai.”

19 Nujai kúntuts enentáimprarmiaiyi. Chíkich chíkich Jesusan aniasar “wíashitiaj” tiarmiayi.

20 Jesus tímiayi “Jū misanam tuse irunar yurumprum nu, chikichik surutkattawai. Wijjai pinin̄num yurumkan ayak yuana núiti. 21 Nekas Wi, Aents Ajasuitjiana jū, jákatniunam wéajai, áarturma áintsanak. Tura áishman̄ súrutna nu ti wáitsattawai. Niisha akiinmainchu ajakuíti” tímiayi.

22 Yurumainiak Jesus Yúsan yuminkias, yurumkan achik, puuk, chicharainiak “Achiktarum, jusha winia ayashruiti” tímiayi. 23 Pinin̄nasha achik, Yúsan yuminkias, ni unuiniamur̄in súsarmiaiyi. Ashí umararmiaiyi. 24 Umararmatai Jesus tímiayi “Júiti winia numpar, untsur̄in yáintajtsa puártinia nu. Nujai Yamaram Chichaman Yus najanaiti. 25 Nekas tájarme, uwa yumir̄i ataksha jūi umarchattajai. Tura tsawant jeamtai, ukunmasha, Yus akupeana nūi yamarman umartatjai” tímiayi.

*Pítiur natsantratniua nuna Jesus ujakmiania nu
(Mateu 26.30-35; Rúkas 22.31-34; Juan 13.36-38)*

26 Yus-kantan kantámawar, jíinkiar, Uriwiu náinnium wear̄miayi. 27 Nūinkia Jesus nin tiarmiayi “Jū kashi átum natsantrurtatrume. “Murikiu wáinnium máattajai, túramtai murik tsakin̄makartatui” tu aarchamukait. 28 Tura ukunam Wi nantakin atumin Kariréanam émtuktiajrume” tímiayi.

29 Tutai Pítiur chicharuk “Ámin ashí natsantramaini-akuisha, wikia natsantrashtatjame” tímiayi.

30 Tutai Jesus tímiayi “Nekas tájame, jū kashi atash jimiara shiniatsaīn, natsantrurtatme. “Núnaka nékatsjai” menaintiú turuttiatme” tímiayi.

31 Tutai Pítiur kakaram chichaak “Ámijiai métek máantuiniakuisha, núnaka penké tíchattajai” tímiayi. Ashí ni unuiniamuri núnisan tiarmiayi.

Jesus Jitsemaní ajanam Yúsán áujsamiania nu
(Mateu 26.36-46; Rúkas 22.39-46)

32 Nuyá Jitsemaní ajanam wearmiayi. Jeawar Jesus ni unuiniamuri tímiayi “Juí pujustarum, Yúsán áujsatasa pujai”.
33 Pítrun, Jakupuncha, Juánnasha jukimiayi. Tura Jesuska ti kuntuts enentáimiar wake mesek nekapsatasa nankammiayi.
34 Tura nin chicharuk “Wi ti kuntuts enentáimjai, tura jakamnia nekapeajai. Juí iimia pujutarum” tímiayi. 35 Jesussha ishichik arantach we, nunká piniakumar tepes Yúsán aujmiayi. “Ju wáitsatin átatna nu, túrutatniuitkuinkia iniaitiusta” tu seamiai. 36 Tuke áujuk tímiayi “Apawá, ashí tujinchaitme. Piniñnumia ashí umartinia áantsañ ti nekapsatajna nú wáitsatniun, jurutkitia. Antsu Wi wakeraj nucha, ame wakeramuram túrunati.” 37 Tura ni unuiniamuri tarin, kanúu tepenan wáinkiamiayi. Pítrun tímiayi “¿Semunka kánamek. Kanutsuk ishichkisha iimia pujustin tujinkiammek? 38 Anearum Yus áujsataram, tunaanum iniaaraj tusarum. Atumí wakanjin kakarmaitrume, antsu atumí ayashjin kakarmachuitrume” tímiayi.

39 Ataksha we, nuik Yúsán áujsama núnisan áujsamiai. 40 Ataksha waketruki, ni unuiniamuri kanúu tepenan tarimiayi. Kari ti pujá asamtai, Jesusan áujsatniun tujinkiarimiayi. 41 Jesus ataksha we, tarí tímiayi “Kanarum ayampratarum. Máakete. Jeayi. Wi, Aents Ajasuitjiana ju, tunáa shuarnum surukmaitjai. 42 Nantáktiárum, wemí. Iis, Winia súrutna nu nuntumsai” tímiayi Jesus.

Jesusan achikiarmiania nu
(Mateu 26.47-56; Rúkas 22.47-53; Juan 18.2-11)

43 Jesus nuna chicháa pujá unuiniamuri Jútas tarimiayi. Nijijai untsurí aents puniá takaku, tura numincha takaku káutarmiayi. Israer-patri uuntri, Israer-shuara jintinniuri, tura Israer-shuara úuntri akupkarma asa káutkarmiayi. 44 Káuntsain Jútas chicharainiak, “Wi mukunattaj áujkin núiti Jesus. Achirum, péñker emetarum jukitiarum” tímiayi. 45 Tura Jesusan tarí, mukunuk áujas “Uuntá, Uuntá” tímiayi. 46 Túramtai aencha Jesusan achikiar emetawarmiayi. 47 Túruiniakui nuí wajatusha puniarí úkuitsañ, patri uuntri takarniuri awati ni kuishin tsupirkamiayi.

48 Túram Jesus áentsun tímiayi “Kasakaitiaj. Puniajai numijiai, kasá nútiksarmek achirkatai tusarum tarutniurme. 49 Ashí tsawant atumjai Yusa Uunt Jeen wayan unuiniakun

pujuchmakaj. Túmaj nuj achirkachmarme. Tura Yus timia nu uminkiat tusa ju túrunayi.” ⁵⁰ Nuiṅkia ni unuiniamurṅ Niniak ikiuiniak pisararmiayi.

Natsa pisarmiania nu

⁵¹ Tura áishmaṅ nátsaach aya tarachin penumas Jesusan atamprimiayi. Tura natsaach suntar achikiam ⁵² tarachrṅin ajapa ikiuak misú tsékenṅkimiayi.

Patri uuntriṅ Jesusan júkiarmiania nu

(Mateu 26.57-68; Rúkas 22.54-55, 63-71; Juan 18.12-14, 19-24)

⁵³ Patri uuntriṅ Jesusan ejeniarmiayi. Nui Patri uuntriṅsha, Israer-shuara jintinniurṅsha, Israer-shuara uuntriṅsha irunturarmiayi. ⁵⁴ Tura Pítiur íikiaṅ nemarki Patri jeen aach jeá, Patri suntarṅjiaṅ jinia anamuk pujumiayi. ⁵⁵ Patri uuntri ashí naamka uunt armia nujai iruntrar maatai tusar wakeruiniak shuar Jesusan tsanumprurat tusar eatkarmiayi. Nu chichamjai mantamnati, tiarmiayi. Túrasha wáinkiacharmiayi. ⁵⁶ Túrasha untsurṅ shuar Jesusan tsanumpruiniayatan yapajia yapajia chichainia ásarmatai wáinkiacharmiayi. ⁵⁷ Nuyá chíkich wajakiar wáitruiniak juna tiarmiayi ⁵⁸ “Yusa Uunt Jeen, aents jeamarmia nuna yumpuntiatjai. Túran menaintiú tsawantaj, chikichan, aents jeamchamun jeamtatjai” tau antukmaji” tiarmiayi. ⁵⁹ Tura tuke yapajiawar tiarmiayi.

⁶⁰ Nuṅsha Patri uuntri ajapén wajaki Jesusan chicharuk “¿Áimsatin penké tujintiamék. Warinia turamainia?” tímiayi.

⁶¹ Tura Jesus takamtak áimtsuk pujumiayi.

Patri uuntri atak chicharuk “¿Ame nekas Yusa Anaikia-murṅkaitiam. Ii Yusṅ Uunt tajinia nuna Uchirṅkaitiam?”

⁶² Tutai Jesus tímiayi “Ee, núitjai. Winia, Aents Ajasu tutaintiajna nu Kakaram Yusa untsuurṅin pujai wáitkiattarme. Tura nayaimpinmaya yuraṅminiam winiaṅ wáitkiattarme” tímiayi.

⁶³ Tutai Patri uuntri kajek, ni pushirṅin jaak tímiayi “¿Chíkich títincha warí atsumaji? ⁶⁴ Nii tana nujai Yúsán kátsekeamu antukurme. ¿Warintia enentáimprum?” tímiayi.

Takui “jakamniaiti” ashí tiarmiayi. ⁶⁵ Chíkich chíkich Jesusan usukiáwarmiayi. Jiṅ epetkar awatiar “¿Ya áitkiarma? etserkata” tiarmiayi. Patri suntarṅsha yapiniam awatiarmiayi.

Pítiur Jesusan natsantramiania nu

(Mateu 26.69-75; Rúkas 22.56-62; Juan 18.15-18, 25-29)

⁶⁶ Núnaka túruiniaṅ Pítru nunká, jea aani pujaṅ, nuwa Patri uuntri takarniurṅja nu tarimiayi. ⁶⁷ Niṅsha Pitrun jinia anamu pujaṅ wáinkiamiayi. Wáiniak, “Amesha Nasaretnumia Jesusjai wekaichukaitiam” tímiayi.

68 Tutai Pítiur chicharuk, “Nékatsjai. Ame támena nuna nékatsjai” tímiayi. Tura aa wáitiainiam jiinkimiayi. Tumai atash shiniukmiayi.

69 Nu núwasha Pitrun ataksha wáiniak, shuáran nui pujuinian tímiayi “Júiti ni shuari.”

70 Tura ataksha “atsá” tímiayi.

Ishichik árusan, shuar nui pujuarmia nu ataksha Pitrun chicharuk “Nekas ni shuarinme. Kariréanmaya shuárchakaitiam. Auya shuara nuní chichaame” tiarmiayi.

71 Tutai Pítrusha kakantar chichaak, “Ju áishman_naka átum tárumna nú_naka nékatsjai. Wáitrakui_nkia Yus íirsati” tímiayi.

72 Nuya ataksha atash shiniukmiayi. Pítrusha, Jesus nuik timian enentáimmiayi. Iis, Jesus nuik tíchamka “Atash jimiar shiniatsai_n, ame, nú_naka nékatsjai, menaintiu turuttiatme” tíchamka. Pítru nuna enentáimias ti útmiayi.

15

Jesusan Piratuí ejeniarmiania nu

(Mateu 27.1-2, 11-14; Rúkas 23.1-5; Juan 18.28-38)

1 Tura kashin káshik Patri uuntri, Israer-shuara úuntri_jiai, Israer-shuara jintinniur_jiai, ashí naamka armia nujai irunturar, chichaman jurusarmiayi. Túrawar Jesusan jinkiamun apach kapitían Piratu_jin ejeniarmiayi. 2 Ejeniarматаi Piratu aniasmiayi “¿Amesha Israer-shuara Uuntri_nkái_tiam?”

Tutai Jesussha “Amek tame” tímiayi.

3 Nuyá Patri uuntri ti tsanumprurarmiayi. 4 Ataksha Piratu aniasmiayi “¿Áimsatin penké tujintiamék? Ti untsurí etser-turmainiatsuk.” 5 Tura Jesus nunasha áikchamiayi. Túmakui Piratu ti enentáimpramiayi.

Jesusan, mantamnati, tíarmiania nu

(Mateu 27.15-31; Rúkas 23.13-25; Juan 18.38–19.16)

6-7 Shuar ámiayi, ni naari Parapás. Niisha ni shuari_jiai meset ámanum, shuaran maa asantai sepunam enkeamuyayi. Tura námper tsawantai Piratu sepunmaya chikichik shuarnak jiki akupniuyayi, aents seawarmia nuna. 8 Nuisha untsurí shuar Piratun káutkar tiarmiayi “Ame ju námpertin tuke túramna nu túratá. 9-10 Patri uuntri Jesusan kajeraru ásar surukarmiayi. Piratusha, nuna nekáa chicharainiak “Israer-shuartiram ¿atumí akupniur_in jiki akupkattajak? ¿Nu wakerarmék?” tímiayi.

11 Tutai Patri uuntri áentsun chichainiak ““Antsu Parapás jikim akúpkatá” titiarum” tiarmiayi.

12 Tutai Parapásan seawarmatai Piratu ataksha chicharainiak “Jesusnasha, átum ii akupniurj tarumna nuna, ġitiurkattaja?” tímiayi.

13 Ataksha ni kakantar tiarmiayi “Krúsnum mantamnati.”

14 Piratusha nin tiarmiayi “ġWarí tunaana túriniait?” tímiayi.

Takui niisha nú nanġkaamas kakantar tíarmiayi “Krúsnum mantamnati.”

15 Tuma asamtai, aents shiir enentáimprartí tusa, Piratu tunáa shuaran, Parapásan jiiiki akupkamiayi. Tura Jesusnasha katsumkarum krusnum ajintrurtarum tusa suntaran tsanġatkamiayi. 16 Tiniu asamtai suntar Jesusan jukiar, kapitáni jeen awayawarmiayi. Nu jea naari Piritiúriuiti. Túrawar untsurj suntaran untsukarmiayi. 17 Ashí káunkar, pushin kapaanniun Jesusan áentsrarmiayi. Tawasap janġi najanamun etsenkrumtikiarmiayi. 18 Nuisha Jesusan áujsar “Shíiraitme, Jesúsá, Israer-shuara akupniuriya” wishikiainiak tiarmiayi. 19 Muuknumsha sapapjai awatiarmiayi; nuyá usukiawarmiayi, túrawar ántar tikishmatrarmiayi. 20 Tura Jesusan wishikrar amukar, kapaantin pushin áitkiar, ni pushirin áentsrarmiayi. Túrawar krúsnum ajintrurtai tusar jiiikiarmiayi.

Jesusa jakamuri

(Mateu 27.32-44; Rúkas 23.26-43; Juan 19.17-27)

21 Semun Serini núnkanmaya shuárauyayi. Arijantruncha, Rupuncha aparíyayi. Semunġan takatnumia winian suntar emetawarmiayi, Jesusa krusrin yanaki jukiti tusar. 22 Jesusnasha Kúrkuta náinnium júkiarmiayi. Kúrkuta, shuar chichamjainkia, muuka ukunch naint, tutainti.

23 Jeawarmatai, karía, mira kunġuinjai pachimprar áartaj tusa susarmiayi Jesusan. Túrasha umarchamiayi. 24-25 Nantu yaki jatemsamtai krúsnum ayapar ajintrurar ikiusarmiayi. Túrawar suntar yaki jukit tusar nakurutaijjai nakurusar Jesusa pushirin yaruakarmiayi. 26 Urukamtai máamuit, ashí aents nuna nekaawarat tusa, ni krúsrin ju aarmauyayi: **ISRAER SHUARA AKUPNIURI**

27 Nu náinnium jimiará kasa shuaran Niijjai máawarmiayi. Chikichik Jesusa untsuurinj krúsnum, chikichik ni menarinj krúsnum máawarmiayi. 28 Yus-Papinium aarma ana nujai uminkiauyayi. Nui “tunáa shuarjai nekapmarmayayi” tu áarmaiti.

29 Shuar nanġkaamainiak, muuke pearar, Jesusan katsekainiak tiarmiayi “Íisia, amesha, “Yusa Uunt jeen yumpuntiatjai, tura menaintiú tsawantaj ataksha jeamkattajai” tíchakaitiam, tiarmiayi. 30 Amek krúsnumia

akaikim uwemprata.” ³¹ Núnisan Patri uuntrisha, Israer-shuara jintinniurisha Jesusan wishikrar chicharnaisarmiaiyi “Chikichan uwemtikraitiat, Nínki uwempratniun tujinti-awai. ³² Yusa anaikiamurí Krístuashit, ii akupniuriniashit, tiarmiaiyi. Wats, yamáí krúsnumiá akáíkití, iisha nu íisar Yus-shuar ajastai” wishikiainiak ántar nuna tiarmiaiyi. Jesusjai krúsnum ajintruamusha Nin wishikiarmiaiyi.

(Mateu 27.45-56; Rúkas 23.44-49; Juan 19.28-30)

³³ Tutupin jeamtai ti kiritin ajasmiaiyi ashí nunkanam. Tura, nantu nunkaach ajasmatai ataksha tsaapnirmiaiyi. ³⁴ Nuin Jesus kakantar untsukum tímiayi “Iruí, Iruí, rama sapaktani.” Nuka shuar chichamjainkia, “Yusrú, Yusrú, ¿urukamtai ajapa ikiurkiniam?” tawai. ³⁵ Shuar nuí pujuarmia nu, nu chichaman nékachu ásar, nuna antukar “Eriasan untsúawai” tiarmiaiyi. ³⁶ Chikichik shuar churulinian uruchjai ajamper, sapapjai ijiú mukunati tusa susamiayi. Tura tímiayi “Wajastarum, Eriás Nin jukitiaj tusa winishtimpiash. Iistai” tímiayi.

³⁷ Nuínkia Jesus kakaram untsamak jakamiayi. ³⁸ Túramtai Yusa Uunt Jeen ejamu nínki jaanakmiayi, yakíya nunká. ³⁹ Suntara kapitíántrisha Jesusan ayamtus wajamia nu, Jesus kakaram untsamak jaamun iis tímiayi “Nuka ti nekas Yusa Uchiriyayi.”

⁴⁰ Nuwasha arant ii pujuarmiaiyi. Nu nuwajai Máktara péprunmaya Marí, chíkich Marisha, Sarumáisha pujuarmiaiyi. Chíkich Marisha uchich Jakupuncha Jusencha nukuríyayi. ⁴¹ Nu núwaka, Kariréa nunkanam Jesus wekaimia nuí, Nin nemarsar yáintaisar wekasarmiaiyi. Untsurí chíkich nuwasha Jesusjai Jerusarénum wear, nu nuwajai arant ii pujuarmiaiyi.

Jesusan iwiarsarmiania nu

(Mateu 27.57-61; Rúkas 23.50-56; Juan 19.38-42)

⁴² Kiatemamtai, ayampratin tsawant jeatsain, námper iwiaratin tsawant asamtai, ⁴³ Arimiatíanmaya Jusé arantut-suk, kakaram ajas, Piratuí jeá Jesusa ayashin seatajtsa utuamiayi. Nu Jusencha ashí irunin ainia nu anturin ármiaiyi. Niisha Yus ju nunkanam akupin ajasat tusa nákasmiayi. ⁴⁴ Tura Jesusa ayashin seam, Piratusha “wárik jaka” tímiayi. Tuma asa suntara kapitíántrin untsurak “¿Nekas jakayik?” tímiayi. ⁴⁵ Tutai kapitíán “Ee” takui, Jesusa ayashin Jusen tsankatkamiayi. ⁴⁶ Jusesha puju tarachin péñkeran sumarak, Jesusa ayashin itiar áepas penuarmiaiyi. Tura yamaram kaya táurmanum ikiusmiayi. Ikius wáitiniam kayan átutmiayi.

47 Tura Máktaranmaya Marí, Jusé nukurí Marijiaí ni ikiumun ii wajarmiyi.

16

Jesus nantakmiania nu

(Mateu 28.1-10; Rúkas 24.1-12; Juan 20.1-10)

1 Tura ayampratin tsawant nankaasmatai, Máktaranmaya Marisha, Jakupu nukurí Marisha, Sarumáisha, kunkuinian Jesusa ayashin kuertai tusar sumakarmiyi.

2 Tura kashin Tumintin, ti káshik, nantu yáma jiiniaí, iwiarsamunam jeariarmiyi. 3 Wésar chichainiak “Iwiarsamu wáitiri kayancha ¿yaki akanketramkattaj?” tiarmiyi. 4 Jear uunt kaya akankekman wáinkarmiyi.

5 Iwiarsamunam wayawar, natsan esaram puju pushin entsar, untsuurnumaan pujaan wáinkiar ti ashankarmiyi.

6 Túmainiakui natsa tímiayi “Ashamkairap. Nasarétnumia Jesus krúsnum jakama nu éarme. Iniantkimiuiti. Juí pujatsui. Wátsek, ju ikiusmanum íistarum. 7 Túrarum werum Pítrusha, chíkich unuiniamurisha ju ujaktarum. Kariréanam atumin émkiiyi. Turammarumna núnisan túruna wáinkiattarme” tímiayi.

8 Niisha ti ashamainiak purushniarar iwiarsamunmaya tseke wearmiyi. Ti ashamainia ásar, chikichkinkesha ujacharmiyi.

Máktaranmaya Marin Jesus wantintiúkmiania nu

(Juan 20.11-18)

9 Émkaka Tumintin ti káshik Jesus nantaki, Máktaranmaya Marin wantintiúkmiiyi. Nu María enentáiya siati iwianchin Jesus yaunchu ajapruyayi. 10-11 Marisha Jesusa nemari kúntuts uutu matsatainian werí, “Jesus iwiaakui, imia wi wainkiajai” tímiayi. Támaitiat anturkacharmiyi.

Jesus jimiara shuaran wantintiukmiania nu

(Rúkas 24.13-35)

12 Tura urum jimiara shuar Jerusarénnumia tsanin weenan, Jesus nushaa iira ajas tarimiyi. 13 Niisha Jesusan wáinkiar waketkiar, unuiniamurin ujakarmiyi, tura ni chichamencha anturkacharmiyi.

Jesus ni unuiniamurin akupkarmiania nu

(Mateu 28.16-20; Rúkas 24.36-49; Juan 20.19-23)

14 Nuyasha Jesusa auntse unuiniamuri misanam pekaamkar pujuinian Jesus tarimiyi. “¿Atumí enentái urukamtai kásuram ainia, urukamtai Winia nekas enentáimtursachuram?” tímiayi. Ni nantakmiarín wáinkiaru chichamen anturkacharu ásarmatai kakantramiayi. 15 Nuyá chichaak “Ashí nunkanam wetarum. Túrarum ashí

shuarnum Yusa shiir chichame etserkatarum. ¹⁶ Shuar anturak imiani uwemprartatui. Shuar antukcharka, tuke sumamawartatui. ¹⁷ Shuar winia náarun pachis, Yúsán nekas enentáimtakka, juna túrawartatui, Yusa kakarmarín iniakmastaj tusa: iwianchin jiiiki akupkartatui; chíkich chichamjai chichasarukamtai Winia nekas enentáimturtatui; ¹⁸ napincha achiksha, tseasnasha úmaksha, jaa ajaschartatui. Jaa shuaran ni uwejejai antiñ, nu shuaran péñker awajsartatui.” Tu tímiayi.

Jesus nayaimpiniam wakamiania nu

(Rúkas 24.50-53)

¹⁹ Jesus chichas amukmatai, Yus nayaimpiniam jukimiayi. Túruna Yusa untsuuríni pujusmiayi. ²⁰ Ni unuiniamurisha jiiinkiar, ashí nunkanam Yus-Chichaman etserkarmiayi. Tura Uunt Yus nin yáinmiayi. Tura etserainiakui, ashí aents ni kakarmarín nekaawarat tusa, aentsti tujintiamun túratniun susamiayi. Nuke atí.

Yúsán Shiir Chichamen

RÚKAS aarmia nu

¹ Nekas iiní Jesus túramia nuna “ímiatrusan áartajai” untsurí aents tiarmiayi. ² Yámankamtaikniumiañ ísarmia nú shuar, tura Yus-Chichaman etserkatniun yáinkíarmia nusha in unuitiamprarmia nútiksaran áartinian wakeriarmiayi. ³ Wisha núnisnak esetsaran enentáimsan, yámankamtaikniumia nuna nekaamjai. Tuma asan túrunamia nuna ímiatrusnak amincha áatratajtsan wakerimjiame, winia úuntur Tiupiru. ⁴ Jintintramawarma nú nankaamas nekaata tusan wakerakun áatjame.

Imiakratin Juan̄ka akiiniatniurin ujakmiania nu

⁵ Jutía nunkanam uunt akupin Erutis akupkamia nú tsawantin Israer-shuar Yúsnan pujurin ámiayi, ni naari Sakarías. Niisha Aptías weeauyayi. Ni nuwēsha Irisapít Arun̄ weeauyayi. Irisapítia úuntrišha Israer-shuar Yúsnan pujurin ármiai. ⁶ Yúsjaisha Sakaríassha Irisapítcha mái-metek péñker ármiai. Yus akupkamia nunasha umirin ármiai. Tuma asamtai penkesha chíkich nin yajauch chicharkatin atsuarmiayi. ⁷ Yusjai péñker wekainiayat Irisapít júrechuyayi. Túrasha mai úuntach ármiai.

⁸⁻⁹ Israer-shuar Yúsnan pujurin chíkich weeanmaya nuyá chíkich weeanam, an̄kant an̄kant Yusa jeen takáu ármiai. Chíkich tsawant, Sakarías weeá takastin amia nui, Sakaríaska kun̄kuinian ekeemaktaj tusa init wayatniuyayi. ¹⁰ Init kun̄kuinian ekeemai untsurí aents aani matsamsar Yúsán áujtak pujuarmiayi. ¹¹ Sakarías init pujai kun̄kuin ekeematainiam untsuurnumaan̄j aya aneachma nayaimpinmaya suntar wajamiayi. ¹² Nuna wajan wáiniak Sakaríaska purushnairmiayi. ¹³ Túrasha nayaimpinmaya suntar chicharuk tímiayi “Sapijmiakaip Sakarías. Nekaata. Ame seamna nuna Yus anturtamkayi. Tura ame nuwem Irisapít uchin takustatui. Nii akiiniamtai, “Juan̄” anaikiata. ¹⁴⁻¹⁵ Ame uchiram akiiniattana nuka Yusjaisha nankaamantu átatui. Tuma asamtai akiiniamtai, amesha shiir enentáimsam warastatme. Tura chíkich aents untsurí warasartatui. Ame uchirmesha karia ainia nuna umarchattawai. Tura áetak akiinchanak Yusa Wakaní pimiutkattawai, tímiayi. ¹⁶ Tura ni shuarin Israer-shuar áiniana nuna, ii Uuntri Yusjai ataksha nawamtikiartatui. ¹⁷ Uunt Yúsaiya akatramu átatui. Yaunchu Yúsnan etserin Erías kakaram etserkamia núnisan̄ niisha

etserkattawai. Nujai shuaran ni uchiríjjai nawamtikiartatui. Tura umichu áinia nuna eseer enentáimtikrartatui. Ni Uuntri taakui ni enentái iwíaramu arti tusa etserkattawai” tímiayi nayaimpinmaya suntar.

¹⁸ Nuna takui Sakarías nayaimpinmaya suntaran tímiayi “¿Nunasha waríjjai paant nekaataj? Wisha nuarjai máí-metek ti úuntchichukaitiaj” tímiayi.

¹⁹ Tutai nayaimpinmaya suntar tímiayi “Wikia Kapriirait-jai, Yusa suntarintjai. Nii akatturmatai chichastájam tusan tura nu shiir chichaman ujaktájam tusan tarijme, tímiayi. ²⁰ Túrasha wi tájamna nu “nekasaiti” tu enentáimprachume. Tura asam uchiram akiintsaij muut ajastatme. Chichastin penké tujinkiattame. Tura wi tajana nu, tsawant jeamtai túrunattawai.”

²¹ Nuna tumaj Yusa jeen aani pujusar, Sakaríasan nákas pujuarmiayi. “¿Urukamtaik init we imiá menkaka?” tu enentáimprarmiayi. ²² Nuyá Sakarías jiinkimtai, áujsartaj tukamá tujinkiarmiayi. Sakaríaska, muut ajasu asa, aya úwijmiasan chichamiayi. Túmakui, Sakarías init pujus Yúsai wáimiakun nekaawarmiayi.

²³ Yusa jeen takastin tsawantri amuukamtai Sakaríaska ni jeen waketkimiayi. ²⁴ Nuyá ukunam ni nuarj Irisapít ajaprukmiayi. Tura senku nantutin aya jean pujusmiayi. ²⁵ Jeá pujus, “Aents wishikruiniakui natsantan jurutkitiaj tusa uchi takustinian Yus tsankatrukai” tu enentáimpramiayi Irisapít.

Jesusa akiiniatniurin nayaimpinmaya suntar etserkamiania nu

²⁶ Nu senku nantu nankaasmatai Yus ni suntarin Kapri-iran Nasarét péprunam akupkamiayi. Nu pepru Kariréa nunkanam pujawai. ²⁷ Nasarétnumiá nuwan, naari Marí, iyutí tusa akuptukmiayi. Nu núwaka áishmanjai pujuchuyayi. Niisha Jusejai nuatnaikiatsa anajmanair pujumiayi. Juseka uunt Tawit weeauyayi. ²⁸ Wats, nayaimpinmaya suntar Marí pujamunam wayá tímiayi “Yus pénger enentáimturma asam-tai, ámin winitjiame, Mariya. Yuska ámin nemartamuk ashí nuwá nankaamas pénger awajtamui” tímiayi.

²⁹ Tura Marisha nayaimpinmaya suntaran wáiniak, chichaamun nékatsuk “Urukamtaik tu chicháa” tu enentáimpramiayi. ³⁰ Nuyá nayaimpinmaya suntar chicharuk tímiayi “Mariya, sapijmiakaip. Yus shiir enentáimturmawai. ³¹ Antukta. Amesha ajapruktatme. Túram Uchi takustatme. Nusha “Jesus” anaikiata. ³²⁻³³ Niisha uunt átatui. Nincha “Uunt Nankaamaku Yusa Uchiri” tiartatui. Tura Uunt Yuska yaunchu Tawitian uunt akupniurj awajsamia núnisan

ame Uchirmin ame shuárumin Israer tutain Uunt akupin awajsattawai. Ni akupeamurisha Yus susamu asa penké amuukashtiniaiti” tímiayi.

³⁴ Nayaimpinmaya suntar nuna tutai Marí tímiayi “Nusha winia áishur atsaisha, ¿itiurak túrunataj?”

³⁵ Tutai nayaimpinmaya suntar Marín tímiayi “Yusa Wakaní tarutramtatui. Tura yurañmia núnisañ Uunt Yusa kakarmari ijirmattawai. Nu tuma asamtai Uchi akiiniattana nu Yúsaiya asamtai, “Yusa Uchirínti” tiartatui, tímiayi. ³⁶ Tura Irisapít ame kaná kaimia nusha núnisañ weamtanam ajaprukai. Iis, “júrechuiti” tiarmia nu, yamaikia sais nantu pujawai ajamtin. ³⁷ Yúsjaínkia itiurchatka penké atsawai” tímiayi.

³⁸ Tutai Marí tímiayi “Yus wakeramun túriniaitjai wikia. Ame tame nuna Yus wakerana nuna túrutati, tajai” tímiayi. Nuna tímiatai nayaimpinmaya suntarka wémiayi.

Irisapítian Marí iyumiania nu

³⁹⁻⁴⁰ Nu tsawant Marí wárikmas muranam Jutía nunkanam ni kaná kain Irisapítian iyutaj tusa wémiayi. Sakaríasai jeá, ni jeen wayá, Irisapítian áujsamiayi.

⁴¹ Marí áujeamun antukmatai Irisapítia ampujén uchirí muchitkamiayi. Tumaí Yusa Wakaní ni enentáin pimiutkamiayi. ⁴² Nuiñkia kakantar chichaak Marin tímiayi “Yus amincha ti shiir awajtamsaiti. Tura Uchiram akiiniattana nusha Yus shiir awajsamuiti. ⁴³ Kajrua, ame winia Uuntru nukurí áminin, Yus winia ti waitnentra asa, áujsata tusa ámin akuptamkachaik, tímiayi. ⁴⁴ Warí, wisha ame áujtamna nuna ántakui ampujrui uchi waras muchitrutkayi. ⁴⁵ Amesha Yus turámiania nu umikiu asam shiir pujame. Yus tímia nu túrunattawai auka” tímiayi.

⁴⁶ Nuna tinia iniaisamtai Marí juna tímiayi:

“Wikia tuke enentairjai “Yus timiá úuntaiti” tajai. ⁴⁷ Tura Uunt Yuska winia Uwemtikruru asamtai ti waraajai.

⁴⁸⁻⁴⁹ Wisha péejchach ain ni wakeramurin umiktajtsan wakerakui winia enentáimturayi. Tuma asamtai ashí aents, “Marincha Yus shiir awajsaiti” tuke turutiartatui. Yuska imiá penker tura imiá kakaram ana nu winia ti uuntan túrutaiti. Tuma asamtai ashí aents “Marincha Yus shiir awajsaiti” turutiartatui. Núnaka yamá nankamamunak tuke turutú ajartatui.

⁵⁰ Tura Nin umirkatniun wakerana nunasha Yus tuke waitnentrartatui. ⁵¹ Ti itiurchatan páchitsuk túrait Nii. “Nankaamantuitjai” tu enentáimtumainia nuna nu-petkaiti. ⁵² Ashí akupin ainia nuna awakkaruiti. Tura íksañ péejchach ainia nuna uunt awajsaruiti. ⁵³ Pénker ana nuna kitiainiakui Yus pénkeran súsaruiti. Tura

antsu “ashí takakjai” tuinia nuna aya júnik awa-jsaruiti. ⁵⁴ Israer-shuar Niiniu ájinia núnaka waitnen-tratniun kajinmattsuk yáinmákuítji. ⁵⁵ Yaunchu ii Uuntri Apráaman tura ní shuarnasha “túrattajai” timia nuna ímiatrusan tuke túraiti.” Nuní tímiayi Marí.

⁵⁶ Marikia Irisapítjai menaintiú nantu pujus ni jeen waketkimiayi.

Imiakratin Juan̄ka akiiniamurí

⁵⁷ Nuyasha ni jurertin tsawantri jeamtai Irisapítcha uchin áishman̄kan takusmiayi. ⁵⁸ Tura ni shuarisha, ni írutramurisha “Irisapítian Yus ti shiir yáinmiayi” tuíniak, nin iyuwearmiayi. Tura mái-metek warasarmiai.

⁵⁹ Israer-shuar túrutai júnisaiti: uchi akiiniamurí uchu tsawant jeamtai, shunichirí nuapen tsupiktin awai, sirkun-sisiún tutai. Yus nuna tú tiniu asamtai tuke túrin ármiai. Wats, Irisapítia uchirí akiiniamuríniá uchu tsawant jeamtai tsupirkatai tusar ni jeen jearmiayi. Nuínkia ni aparí naari Sakarías anaikiataitsar wakeriarmiai. ⁶⁰ Tura ni nukurí tímiayi “Atsá. Antsu ni naari Juan̄ átatui.”

⁶¹ Tutai tiarmiayi “¿Nusha urukamtia? Amée shuarumsha nu náartincha áwak’ tiarmiayi. ⁶² Nuínkia uchi aparín “¿Warí anaikiatajtsam wakeram?” tusar aya úwejejain̄ iniasarmiai.

⁶³ Tutai uchí aparísha “Nakash surusta; áartaj tusan wakerajai” tusa aya úwejejain̄ iniakmamiayi. Takui nakash susam, ni naari Juán̄kaiti, tu áarmiai. Nuna wáinkiar “Ayawā urukakun̄ ta” tu enentáimprarmiayi. ⁶⁴ Nú chichamaik Sakarías chichatsuk pujamun chichakmiayi. Tura nuín Yusa náarin̄cha shiir awajsamiayi. ⁶⁵ Nuínkia ni írutramurisha ashankarmiayi; tura ashí Jutía nuńka murá amia nuí nu túrunamun ujakam ashí nekaawarmiai. ⁶⁶ Nu túrunamun antukar ti enentáimsarmiai. Tura “ju uchin Yus nekas pujurtsuk. Tuma asamtai uunt ajas ¿urukuk ati?” tu enentáimprarmiayi.

Sakarías Yus jintintiam tímiania nu

⁶⁷ Uchí aparí Sakarías, Yusa Wakaní pimiutkam tura Yus jintintiam, júna tímiayi:

⁶⁸ “Israer-shuartí ii Yusrí naari shiir awajsatniuitji. Ii Yúsrīsha tarutmaitji. Tura uwemtikrampraitji.

⁶⁹ Yaunchu ii uuntri Tawit Yusa wakeramuríjiai uunt akupin áchamkia. Tura ni ukurín ti kakaram Uwemtikiartinian suramsaitji. ⁷⁰⁻⁷² Yuska

ii nemasriya tura in nakitramainiajnia nuyá uwemtikrampratniun enentáimsamia nuna, yaunchu ni etserniurín péńker armia nuna ujakmiayi. “Winia ti

penker chichamprun tájana nuna yapajitsuk umirkan tuke wáitnentratajrume” yaunchu ii úuntrin tímiania nunasha ni etserniurin ujakarmiayi. Yaunchu nu ujakma yamá iisha wainji. ⁷³⁻⁷⁵ Nu ujakman Yuska yámankamtaik imiá yaunchu ii uuntri Apraáman tíchamkia. Apraáman ujakmia nu júiti: “Wi wakeraj nútiksaran, Winia umirtukar penker wekainia nuna ni nemasriya uwemtikrattajai. Sapijmiatsuk winia tuke takartusarat tusan túrattajai” Yus tímiayi Apraáman. Iisha ni shuari asakrin, nuna taku incha túramaji. ⁷⁶ Tura amincha, uchiru, “Uunt Yusna etserniuiti” turamartatui. Amesha ni tátintri iwiarataj tusam Uuntai émkim wétatme. ⁷⁷ Ni shuari, ni tunaari tsankurnar uwemprarat tusam túrattame. ⁷⁸⁻⁷⁹ Yuska ashí shuaran anea asa, incha wáitnentramak ni pujamunmaya ni tsáapnintrin suramsaitji. Ni enentáin kiritniunam wekainia nuna, mesertinnium jeatemá áarmatai, ni tsáapnintri jeat tusa túraiti. Tura ashí incha ii enentáin imiatkinchanum wekasarmí tusa túraiti.” Nuní tímiayi Sakarías.

⁸⁰ Uchisha tsakarmiayi. Tura Yúsan nekaki-nekaki wémiayi. Israer shuarum etserkatin tsawantri jeatsainkia atsamunam pujuyayi.

2

Jesusa akiiniamuri
(Mateu 1.18-25)

¹ Wats, Juan akiiniamia nú uwitin uunt akupin Akustu ashí nunkanam áentsun nekapmarartí tu chichakmiayi. ² Nu nekapmartinian yaunchu túrushtain yamá túriarmiayi. Siria nunkanam Seriniu akupin pujái túrawarmiayi. ³ Ni naari áartaj tusa ashí shuar ni nunkenin wétin ármiai. ⁴ Tuma asamtai Jusé Nasaré péprunmaya Kariréa nunkanam amia nuyá jiinki Pirin péprunam Jutía nunkanam amia nui wémiayi. Juseka Tawit weeanam akiinia asa, ni nekas nunkenka Pirinkauyayi. ⁵ Nu asamtai, ni náarin áartaj tusa Jusé wémiayi Marijiai. Marisha Jusé núweyayi. Tura tsanincharuyayi. Túmaitiat Marisha Yusa Wakaní kakarmarijiai ajamtiniuyayi. ⁶ Tura nui Pirinnum pujuiniaj Marí takustintri jeamiayi. ⁷ Nui iwiairin uchin áishman kan takusmiayi. Tura uchi penutaijiai penuar, waaka yurumtainiam áepsamiayi. Írar kanutainiam pujustin ankant atsá asamtai túrawarmiayi.

Murikiun wáinnium nayaimpinmaya suntar Yus akatar akuptukmia nu

⁸ Tura Pirinnum tíjiuch murikiun wáinin kashi murikrin wáiniuk pujuarmiayi. ⁹ Túmainiai nayaimpinmaya suntar murikiun wáinin matsatainian wantintiuksiayi. Tura Yúsnumia tsáapnin ni matsatainiamunam etsantramiayi. Túrunamtai murikiun wáinniuka ti ashamkarmiayi. ¹⁰ Túrasha nayaimpinmaya suntar tímiayi “Ashamprukairap. Ashí áentsnum ti warastin atí tusan ti penker chichaman itiarjiarme. ¹¹ Júiti: yamá tsawantai uunt Tawitia péprurin Pirinnum yaunchu Yus anaikiamu KRISTU tutai, uwentikramprataj tusa akiintiurmarme. Nu Uchisha ashí áentsun akupniuiti, tímiayi. ¹² Tura jujai nekaattarme: uchi penutaijiai penuarma waaka yurumtainiam tepá wáinkiatarme. Nu wáinkiarum nekas júiti, tu nekaattarme.” ¹³ Nu chichamaik nayaimpinmaya suntar ti untsurí, nayaimpinmaya káunkarmiayi. Túrawar Yusa naarin shiir awajainiak juna tiarmiayi:

¹⁴ “Nayaimpinmasha Yus nankaamantuiti tu enentáimtusarti. Tura ju nunkanmasha Yusjai nawamnaikiaru ainia nu imiatkinchanum pujusarti.” Tu tiarmiayi.

¹⁵ Tura Yusa suntari nayaimpiniam waketkiarmatai murikiun wáinin tiarmiayi “Wats, Pirinnum wárik wetái. Nu túrunamu Yus turamajnia nu iyumi” tiarmiayi.

¹⁶ Nuna tiar wárik wearmiayi. Tura Marincha Jusencha wáinkiarmai. Tura uchincha waaka yurumtainiam tepan wáinkiarmai. ¹⁷ Wear nuna wáinkiar, nayaimpinmaya suntar uchi túrunamurin timia nuna etserkarmiayi. ¹⁸ Tura murikiun wáinin tiarmia nuna antukaruka ti enentáimtusarmiayi. ¹⁹ Túrasha Marikia ashí túrunamia nuna ni enentáijiainkia enentáimtu pujumiayi. ²⁰ Tura murikiun wáinniuka antukarmia nuna enentáimtusar, tura ísarmia nunasha enentáimtusar “Nayaimpinmaya suntar ujatmakmajnia tímiatrusan túrunayi” tiarmiayi. Tuma ásar Yusa náarin shiir awajsar kantampruawar waketkiarmiayi.

Uchin Jesusan Yusa Uunt Jeen itiarmania nu

²¹ Tura uchi akiiniamu uchu tsawant jeamtai, ni túrutairin túrin ásar, ni shunichiri nuapen tsupirkarmiayi. Túrawar Marí ajapratsain nayaimpinmaya suntar tímia nútiksai “Jesus” anaikiarmai. ²² Tura Muisais akiiniatniunam akupkamia núnisan, tsawantri jeamtai, Yusa Uunt Jeen Jerusarénnum uchin Yus iiktustai tusar júkiarmiayi. ²³ Kame Yus-Papinium ju aarma awai:

“Ashí uchi iwiari áishman akiinkiuuka Yusna átatui.” ²⁴ Tuma asamtai, Marí Yusa Uunt Jeen wáitsuk pujamu wayatniuri jeamtai, uchin Yus iistí tusa Yusa Uunt Jeen

Jerusarénum pujana nuĭ itiarmiayi. Tura yampitsan ĵimiaran súsarmiayi. Muisáis akupkamun umiiniak nuna túrawarmiayi.

25 Nu túmai Semeún naartin áishman Jerusarénum pujumiayi. Semeúnsha Yusa Wakanĭ pujurma asa péñker áishmankauyayi. Yúsan nekas enentáimtiniuyayi. Yusa anaikiamurijjai Israer-shuar ankant ajastin jeati tusa nákauyayi. 26 “Winia anaikiamur KRISTU tutai wáintsuk jákashtatme” uunt Yusa Wakanĭ tu jintintiamiayi. 27 Nú Semeún Yusa Wakani “wetá” tutai, Yusa Uunt Jeen wémiayi. Tura nú tsawantaj Muisáis tímia núnisan umirkatai tusar Marisha Jusesha uchin Jesusan Yusa Uunt Jeen itiararmiayi. 28 Itiararmatai Semeún uchin jusa miniakas Yúsan áujuk juna tímiayi:

29 “Yamaikia, Uunta, Amĭin wi jeatin ankant atí. Turutmi-amna nu ímiatrusmek umikiume. 30-31 Ju Uchi ashí aents uwemtikrartá tusam susamna nuna yamá imia winia ĵiirujai wáinkiajai. 32 Israer-shuarcha ainia nu tsáapninium wekasarat tusa akuptukmaiti ju Uchi. Tura Israer-shuar Áminiuram ájinia nuna ashí aents shiir enentáimtikrartí tusam ju Uchi akuptukmaitji. Nuna wáinkian shiir enentáimsan jákatniuitjai.”

33 Tura Semeún Uchiniun tu chicharkui Jusesha Jesusa nukurisha ti enentáimprarmiayi. 34 Semeúnsha chichaak “Yus shiir enentáimturmasartí” nin tímiayi. Nuyasha Marin chicharuk tímiayi “Nekaata. Ju Uchin Israer-shuartisha untsurĭ nakitrar iniarartatji. Tura chíkich Israer-shuartikia ju Uchin shiir enentáimtusar ti wararsartatji. Tura Uchiram Yusa kakarmarin ti paant iniakmastatui. Tuma ain untsurĭ Aun yajauch chichariartatui. 35 Nujai shuar ni enentáin warinia enentáimia nu, paant átatui. Maaj, ashí nu túmakui, iĵiumua núnismek ame enentáimin ti wáitsattame, Mariya.” Tu chichasmiayi Semeún.

36 Nuwasha Ana naartin nuĭ Yusa Uunt Jeen pujumiayi. Niisha Yúsnan etserniuyayi. Ni aparisha Panuíruyayi tura Aser shuarauiyayi nu nuwá. Niisha ti úuntchiyayi. Niisha yama nuatnaikiamujai siati uwi ni áishrijjai tsanin pujusarmiayi. 37 Tura wajemamiayi. Tura uchenta kuaru uwi takakuyayi. Tura ninĵia Yusa Uunt Jeenĭa jíintsuk káshisha tsawaisha tuke Yúsan áujniuyayi. Tura yurumtsuk Yúsan áujniuyayi. 38 Semeún tuasua amikmatai Anasha taa, Uchin wáiniak Yúsan yuminsamiayi. Tura Jerusarénum Yus uwemtikrampratai tusa nákarmia nuna áujkunĵa uchin áujmat wémiayi.

³⁹ Nuyá Yus tímia nuna ashí túrawar amikiar Kariréa nunkanam, kame nii pujumia nú peprunam Nasarétnum Jusesha Marisha Uchisha waketkiarmiayi. ⁴⁰ Uchi Jesus tsakaki, kakaram ajaki tura nú nan̄kaamas nekaki wémiayi. Tura Yus Nin ti shiir awajsamiayi.

Jesus Yusa Uunt Jeen túrunamuri

⁴¹ Jusesha, Jesusa nukurísha tuke uwitin paskua námper jeakui Jerusarénn̄num weu ármiai. ⁴² Ni túrutairi túruiniak, Jerusarénn̄num weak Jesusan tuse uwí jeamtai júkiarmiayi. ⁴³ Námper amuukamtai ni nukurísha Jusesha nékachmanum Jesuska Jerusarénn̄num juákmiayi. ⁴⁴ Marisha Jusesha “wíi shuarjai winiawai” tusa, núnaka ēatsuk chikichík tsawant wekasarmiayi. Nuyá wáinkiat̄aj tukamá, ni shuariin̄ tura ni nékamunam ēakarsha, ⁴⁵ wáinkiacharm̄iai. Nuinkia Jerusarénn̄num ataksha waketrukiarmiayi, ēaktai tusar. ⁴⁶ Tura menaintiú tsawant ēakar Yusa Uunt Jeen Yus akupkamun jintinnian anturak̄ anintrú pujan wáinkiar̄miayi. ⁴⁷ Tura nūj ashí Jesusan anturkarmiania nu, niisha ti nékakui tura áimtanash ti pé̄nker áimkiui, ti enentáimturarmiayi. ⁴⁸ Ni aparísha nukurísha tumáa pujan wáinkiar, ti enentáimprarmiayi. Tura ni nukurí chichaak̄ tímiayi “Uchiru, ¿ausha urukamtai itiurchat enentáimtikruram? Ame apasha wisha urukayik̄ tusar ti ēakjame” tímiayi.

⁴⁹ Tutai Jesus tímiayi “¿Urukamtai ēatrum? Winia Aparnan túratniuitjiana nuka nékatsrumek” tímiayi.

⁵⁰ Tura timia núnaka pen̄ké nekaacharmiayi. ⁵¹ Nuyá Jesus nijijai Nasarétnum waketkimiayi. Ninkia tuke umiriarmiayi. Ashí nu túrunamun Marikia tuke enentáimtu pujumiayi. ⁵² Jesuska tsakaki, tura nekaki wémiayi. Yussha tura aencha Nin shiir enentáimtiarmiayi.

3

Imiakratin Juanka etserkamuri

(Mateu 3.1-12; Márkus 1.1-8; Juan̄ 1.19-28)

¹ Tipiriu uunt akupin pujamu kin̄se uwí jeamtai, Jutía nunkanam Punseu Piratu akupin pujumiayi. Tura Kariréa nunkanam Erutis akupin pujumiayi. Itiurea nunkanmasha Trakuniti nunkanmasha ni yachī Jiripi akupin pujumiayi. Tura Apirinia nunkanam Risanias akupin pujumiayi. ² Tura nu uwitin Anassha Kaipíassha Israer-patri uuntrī pujuarmiayi. Nu uwitin Sakaríasa uchirí̄ Juan̄ atsamunam pujan Yúsaiyā chichaman antukmiayi. ³ Nuyá Jurtan̄ entsanam supichik̄ matsamarma nuna Juan̄ wekaatusar̄ junā tímiayi

“Winia tunaarun Yus tsankurturat tusarum, enentai yapajjárum imiantiarum.” Tu ujakmiayi. ⁴ Nu ujakman Isayas yaunchu juna áarmiayi:

Atsamunam wekaana nu untsumun ántuiniawai. Nii untsumuk juna tawai: Atumí enentái Uunta jinti iwiarturtarum; naka awajsatarum. ⁵ Jápaaka ainia nusha áimkiamu arti. Naint ainia nusha paka awajsamu arti. Jintia apijiaru ainia nusha naka jiikmia arti. Tura pujutrin ainia nusha métekrak paka awajsamu arti. ⁶ Túrunamtai ashí nunkanmaya aents Yúsaiya uwempratin aan nekaawartatui.

⁷ Untsurí aents imiatit tusar tariarmia nuna Juan chicharainiak tímiayi “Napia áaniutirmincha, ti asutniátin jeatemáttana nuyá uwempratarum tusa ¿ya ujatmakuram? tímiayi. ⁸ “Íikia Apraám weeatji, tuma asakrin Yus shiir enentáimturmají” tu enentáimtumasairap. Antsu enentáim yapajjámuítikiuinkia péñker wekaamurmijjái paant iniakmastarum. Warí, Yus wakerakka, ju kayan Apraáma shuarin páchitsuk najankainti, tímiayi. ⁹ Aneartarum. Numi ajaktinian kampuwarin jacha atuttsamuiti. Numi péñker nereatsna nuka ajakar jinium apeamu ártatui” tímiayi.

¹⁰ Tutai aentska enentáimprar “¿Nuiñkia itiurkatjik?” tiarmiayi.

¹¹ Tutai Juan tímiayi “Jimiará pushin takakna nu, takakt-suna nuna chikichan súsatniuiti. Yurumkan takakna nusha takaktsuna nuna ajamsatniuiti” tímiayi.

¹² Unt akupniu kuítrín juu armia nú shuar imiantiaj tusar Juáñkan weriar aniasarmiayi. “Uunta, ¿iisha warí itiurkatjik?” tiarmiayi.

¹³ Tutai Juan tímiayi “Kuit uunt akupin tana nu iniankasrum achikiairap.”

¹⁴ Suntarsha aniasarmiayi “Uunta, ¿iisha warí itiurkatjik?”

Juansha tímiayi “Ame kakarmarmijjái chikichna jurukip. Tura nin tsanumpruraip. Tura uunt akupin akirmana nújain warasta” tímiayi.

¹⁵ “Ju Juan Yusa anaikiamurinchuashit” tu enentáimsar paant nekaataitsar náarmiayi.

¹⁶ Tumaj Juan tímiayi “Wikia aya ayashmin entsanam imi-ajrume. Tura wijjái nankaamas ana nu tátatui. Ni sapatrì jinkiamurinkisha atitrachminiaitjai. Niisha taa, imiantinia áanis tura jíiya áanis Yusa Wakanin enketramprattarme. ¹⁷ Shuar aruusan awajtia núnisán, nusha yajauch ana nuna ajapa aya péñkernak júuktatui. Neren ikiustatui tura ya-jauchinkia ji tuke kajinchatainiam apeattawai” tímiayi.

¹⁸ Juan nu arant shiir chichaman áentsun ti núkap ujakarmi-
ayi. ¹⁹ Tura nuyasha akupin Erutisan chicharkamiayi. Ni
yachi Jiripi nuarín Jirutíasan kasarak nuatkui tura chíkich
yajauchincha túrakui chicharkamiayi. ²⁰ Tura Erutis núnaka
ántutsuk chíkich yajauchin túramiayi. Juáñkan achik sepunam
enkeamiayi.

Jesusa imianmiari

(Mateu 3.13-17; Márkus 1.9-11)

²¹ Nu túruntsain, Juansha ashí nú nunkanmaya áentsun
imiak pujurainai Jesussha imianmiayi. Niisha Yúsán áujuk pu-
jai nayaimpisha uranmiayi. ²² Tura Yusa Wakaní yámpits na-
janar paant tarurmiayi. Tura Yus nayaimpinmaya chicharuk
“Amek winia aneamur Uchiruitme; Ámin ti wararjame”
tímiayi.

Jesukrístu shuari

(Mateu 1.1-17)

²³ Jesus trainta (30) uwí takaku asa ni takatrín
nankamamiayi. “Jusé uchirínti” tiniu armiayi. Jusésha Iria
uchiríyayi. ²⁴ Irísha Matata uchiríyayi; Matat Riwí uchiríyayi;
Riwí Mirkía uchiríyayi; Mirki Jana uchiríyayi. Jana Jusé
uchiríyayi; ²⁵ Jusé Matatías uchiríyayi; Matatías Amusa
uchiríyayi; Amus Najuma uchiríyayi; Najum Esrí uchiríyayi;
Esri Nakaia uchiríyayi; ²⁶ Nakai Maata uchiríyayi; Maat
Matatías uchiríyayi; Matatías Semái uchiríyayi; Semái Jusé
uchiríyayi; Jusé Jutáa uchiríyayi; ²⁷ Jutá Juana uchiríyayi;
Juana Resa uchiríyayi; Resa Surupapira uchiríyayi;
Surupapir Saratiira uchiríyayi; Saratiir Nerí uchiríyayi;
²⁸ Neri Mirkí uchiríyayi; Mirki Atí uchiríyayi; Atí Kusama
uchiríyayi; Kusam Irmutama uchiríyayi; Irmutam Ira
uchiríyayi; ²⁹ Ir Jusué uchiríyayi; Jusué Irieséra uchiríyayi;
Iriesér Jurema uchiríyayi; Jurem Matata uchiríyayi; ³⁰ Matat
Riwí uchiríyayi; Riwí Semeúnka uchiríyayi; Semeún Jutáa
uchiríyayi; Jutá Jusé uchiríyayi; Jusé Junanka uchiríyayi;
Junañ Iriakímia uchiríyayi; ³¹ Iriakím Mirea uchiríyayi;
Mirea Mainiánka uchiríyayi; Mainián Matata uchiríyayi;
Matata Natanka uchiríyayi; ³² Natan Tawitia uchiríyayi;
Tawit Isaí uchiríyayi; Isaí Upitia uchiríyayi; Upit Puusa
uchiríyayi; Puus Saramúnka uchiríyayi; Saramún Naasúnka
uchiríyayi; ³³ Naasun Aminiatapa uchiríyayi; Aminiatap
Arama uchiríyayi; Aram Esruma uchiríyayi; Esrum
Paresa uchiríyayi; Páres Jutáa uchiríyayi; ³⁴ Jutá Jakupa
uchiríyayi; Jakup Isaka uchiríyayi; Isak Apraáma uchiríyayi;
Apraám Tarea uchiríyayi; Taré Nakura uchiríyayi; ³⁵ Nakur
Seruka uchiríyayi; Seruk Rakaua uchiríyayi; Rakau Pirikia

uchiríyayi; Pirik Epera uchiríyayi; Eper Sará uchiríyayi;
³⁶ Sara Kainiánka uchiríyayi; Kainián Arpaksata uchiríyayi;
 Arpaksat Sema uchiríyayi; Sem Nuaia uchiríyayi; Nuai
 Ramikia uchiríyayi; ³⁷ Ramik Matusarínkia uchiríyayi;
 Matusarín Euka uchiríyayi; Euk Jaritia uchiríyayi; Jarit
 Maararíira uchiríyayi; Maararíir Kainiánka uchiríyayi;
³⁸ Kainián Enusa uchiríyayi; Enus Seta uchiríyayi; Set Atańka
 uchiríyayi; tura Atań Yus najanamuyayi.

4

Jesusa nekapsamuri

(Mateu 4.1-11; Márkus 1.12-13)

¹ Jesusa enentáin Yusa Wakaní pimiutkamiayi. Jessusha
 Jurtan entsanmaya waketkimtai Yusa Wakaní aents atsamu-
 nam jukimiayi. ² Tura nuísha kuarenta tsawant pujusmiayi.
 Tura íwianch Nin tunaanum ajuaraintiajtai tusa pujurmiayi.
 Nu kuarenta tsawantin Jesus yurumsuk pujá asa ti tsukam-
 miayi. ³ Nuńkia íwianch chicharuk “Amesha nekas Yusa
 Uchiríntkiumka ju kaya apatuk najanata” tímiayi.

⁴ Tutai Jesus tímiayi “Yus-Papí tawai:

“Aya apatkujain shuar iwiaaku pujuschamniaiti. Antsu ashí
 Yus-Chicham tana nujai nekas iwiaaku pujusminiaiti,”
 tawai” tímiayi.

⁵ Tura nuyá íwianch naint yakí wájakmanum jukí, ashí nuńka
 ainia nuna ju chichamaik iniaktusmiayi. ⁶⁻⁷ Tura chicharuk
 tímiayi “Ashí ju nuńka wáinmena nu wíniaiti. Tura wi waker-
 ajna nú shuaran súsatniuitjai. Tuma asamtai tikishmatrurak-
 minkia ju nuńkanam ashí akupkatniun susattajme. Tura nui
 ni warirí ainia nusha áminiu átatui” tímiayi.

⁸ Tutai Jesus tímiayi “Yus-Papí tawai:

“Aya Nińki Yus ame Úntrum tikishmatram
 enentáimtustiniaitme.”
 Tau asamtai, werumta, iwianchi” tímiayi.

⁹ Ataksha íwianch Jesusan Jerusarén péprunam jukimiayi.
 Tura Yusa Uunt Jee yakiini iwiak tímiayi: ¹⁰ “Yus-Papí tatsuk:
 “Yuska ni suntarín wáinkiatá tusa akupturmaktatui.
¹¹ Kayanam ajintrain tusa wenkurmaktatui.”

Tuma asamtai nekas Yusa Uchiríntkiumka juyá akaikim ini-
 aata” tímiayi. ¹² Tutai Jesus áimiuk tímiayi “Yus-Papí junasha
 tawai:

Yus ame Úntrum nekapsataj tiip.”

¹³ Tuma asamtai íwianch penké tujintiak ishichik tsawant
 Jesusan iniaisamiayi.

Kariréa nuńkanam Jesus ni takatrín nankamamiania nu
 (Mateu 4.12-17; Márkus 1.14-15)

¹⁴ Jesus ni enentáin Yusa Wakaní kakarmari pimiutkamu ajas Kariréa nunkanam waketkimiayi. Nu nunkanam nankaamantu túramurín áujmatiarmai. ¹⁵ Nu nunkanam ashí péprunam Israer-shuar iruntai jea armia nui unuiniarmai. Tura anturkarmia nuka ni náarín shiir awajsarmiai.

Jesus Nasarétnum pujumiania nu

(Mateu 13.53-58; Márkus 6.1-6)

¹⁶ Ni tsakarmariin Nasarétnum Jesus wémai. Tura Israer-shuar ayampratin tsawantin iruntai jeanam wayamiayi, tuke turin asa. Tura wayá Yus-Papin áujsatat tusa wajakmai. ¹⁷ Nuinkia Yúsna etserin Isayasa áarmarín súsarmai. Nuna urak, nui juna áarman wáinkiamiai:

¹⁸ Yusa Wakaní winí pujurtawai. Shuar warainiachun shiir chichaman ujaktinian anaitiukuiti. Kúntuts enentáimiar wake mesek pujuinian tsuártinian akuptukuiti. Tura jii kusuruncha ímtiktinian, tura yajauch awajsamu ainia nuna péñker awajsatniuncha, ¹⁹ tura Uunt Yus, shuáran yaintin tsawantri jeán etserkatniuncha akuptukuiti.

²⁰ Nu áarman aujsua amik papin nukukmai. Tura iruntai jeanam yáimin pujan susa iniais Ninkia etserkataj tusa pujusmai. Tura ashí shuar pujuarmia nu émamkes ii pujuarmiai.

²¹ Jesussha chicharuk tímai “Yus-Chicham yamá antukurmena nu yamá tsawantin túrunayi.”

²² Jesusan ashí péñker áujmatiarmai. Tura Jesus ti shiir chichaakui ti enentáimprar “Juka Jusé uchirinchukait” tiarmai. ²³ Tu enentáimiaiiniakui, Jesus chicharuk “Atumsha shuar tuke tuinia núnisrumek, “tsuákratniuitkiumka amek tsuámarta,” turuttiatrume. Kapernáum péprunam aentsti túrachmin túramamna núnismek juisha túrata tusarum nu turuttiatrume. ²⁴ Túrasha nekas tájarme, Yúsna etserniun ni nunkenkikia nii tana nuna anturainiatsui. ²⁵ Nuyasha tájarme, Irías pujumia nú tsawantin, menaintiú uwí nankaamas yumi yutukcha asantai ashí Israer nunkanam ti tsuka amia nui ti untsurí waje irunmai. ²⁶ Tuma ain nu wajen yainti tusa Yus Iríasan akuptukchamiai. Antsu chíchich nunkanmaya wajen Sarepta péprunam pujumia nuna yainti tusa akuptukmai. Sarepta pepru Sítiún péprunam tíjiuch pujawai. ²⁷ Núnisan ii nunkesha Iriséu pujumia nu tsawantin ti untsurí tunamaru iruniarmai. Tura núnaka tsuárcharmiai. Antsu chíchich nunka, Sírianmaya Naaman kan tsuármiai” tímai Jesus.

²⁸ Israer-shuarsha iruntai jeen pujuarmia nu, nuna antukar ti kajerkarmai. ²⁹ Tura wajatkia Jesusan jiki péprunmaya akupkarmai. Tura pepru amia nui naint

yakí nánkatkamunam, nuyá akaki ajuatai tusar júkiarmiayi.
³⁰ Túrasha Jesuska irunar matsatainiamunman etempraktak
 jiinki wémiayi.

Iwianchrukun Jesus tsuármiania nu
(Márkus 1.21-28)

³¹ Nuyá Jesus Kariréa nunkanam Kapernáum pepru amia
 nuí wémiayi. Tura Israer-shuara ayampratin tsawantriin
 tuke etserki wémiayi. ³² Yusa kakarmarin takaku asa nujai
 etserkamiayi. Tuma asamtai “Yusa kakarmarijijai unuitiamt-
 sujik” tiar ti enentáimprarmiayi.

³³ Chíkich tsawantai áishman iwianchruku Israer-shuar
 iruntai jeanam pujumia nu untsumuk tímiayi, ³⁴ “Inikiartusta.
 Iikia Áminkia pachistin nakitiaji. ¿Warí, incha amukratkataj
 tusam táchamek? Wikia nékajme. Ámeka ti penker Tunaarin-
 cha núitme” tímiayi.

³⁵ Tutai Jesus iwianchin kakantar chicharuk “Takamatsata.
 Ju áishman ikiuktia” tímiayi.

Tutai nu chichamaik íwianch áishmannumia jiinki weak
 nunká ajuant ikiukmiayi. Túrasha nekas yajauch awajtsuk
 ikiukmiayi.

³⁶ Ashí pujuarmiania nu ti enentáimiar mai tunai ajarmiayi.
 “¿Jusha warí chichamait? Ju áishman Yusa kakarmarijijai
 iwianchin jiki awematsuk” tiarmiayi.

³⁷ Tura ashí nú nunkanam Jesusa túramurin áujmatiararmiayi.

Semun Pitru tsatsarin Jesus tsuármiania nu
(Mateu 8.14-15; Márkus 1.29-31)

³⁸ Jesussha Israer-shuara iruntai jeenia jiinki Semunka
 jeen wémiayi. Semunka tsatsari tsuer ti jáamiayi. Ti
 jaakui Jesusan “tsuárturtá” tiarmiayi. ³⁹ Jesussha jaa tepan
 tsuntsumprua tsuemun “michatrata” tímiayi. Tutai nú
 chichamaik nuwasha michatramiayi. Nú chichamaik nan-
 taki nincha ayurawarmiayi.

Untsurí jaan Jesus tsuármiania nu
(Mateu 8.16-17; Márkus 1.32-34)

⁴⁰ Etsa akaikin ai ni shuari nánkamas sunkurjai
 jaarmia nuna Jesusan ikiaatkarmiayi. Jesussha jáinian
 chikichkiniak chikichkiniak uwejéjai antinkiar tsuáarmiai.
⁴¹ Ti untsurí iwianchruku armia nunasha iwianchrin
 jirkiarmiayi. Jinkiar íwianchkia untsumainiak “Ámeka Yusa
 Uchirinme” Jesusan tiarmiayi. Tura niisha “Jesuska Yusa
 anaikiamurinti” tu nékainiakui Jesus kakantar chicharak
 itiatmamtikiararmiayi.

*Kariréa nunkanam Jesus etserkamiania nu
(Márkus 1.35-39)*

⁴² Kashin káshik tsawaak Jesus péprunmaya jiinki atsamunam Niñki wémiayi. Tura shuarsha eakiar ni pujamunam jeariarmiayi. Tura iijiai tuke pujusat tusar emetataitsar wakeriarmiayi. ⁴³ Túmaiñ Jesus tímiayi “Yus ii enentáin akupkatajtsa wakera nú shiir chichaman chíkich péprunam matsatainia nunasha ujaktiniaitjai. Nu túrata tusa akupkamuitjai” tímiayi. ⁴⁴ Tuma asamtai Kariréa nunkanam Israer-shuar iruntai jeanam Jesus tuke etserki wémiayi.

5

*Namakan ti untsurín achikiarmiania nu
(Mateu 4.18-22; Márkus 1.16-20)*

¹ Chíkich tsawantai Jesus Jinisarít antumianka tutainium káanmatkari pujai ti untsurí shuar, Yusa chichamen antuktai tusar wakeruiniak Jesusai káunkarmiayi. Antuktai tusar wakeruiniak kae ajattsarmiayi. ² Tura jimiará kanun antumiankan káanmatkariin tepan wáinkarmiayi. Ni nérenniurinkia jiinkiar ni nekarin nijiá pujuinia asamtai kánuka ankant ármiayi. ³ Tuma asamtai Jesus Semunka kanurin enkempramiayi. Tura Semunkan chicharuk “Ishichik ajapén juruktía” tímiayi. Nuinkia kanunam enkemas áentsun káanmatkanam pujuinian unuiniamiayi. ⁴ Unuinasua amik Semunkan chicharuk “Kanu kunanam jukim neka ai ajunkatarum” tímiayi.

⁵ Tutai Semun tímiayi “Túrasha, Uuntá, káshisha tuke ajujunkuar tsawarji. Túrasha penké achikchaji. Kame áankisha Ame támajai ajunkatjai” tímiayi.

⁶ Tura ajunkar namakan ti untsurín achikiarmiayi. Túram nekasha jaanaki wémiayi. ⁷ Tuma asamtai ni írutkamurin chíkich kanunam pujuinian uwejéjai “winitia, yáintkiamniuram” tusar untsukarmiayi. Niisha táarmiayi. Túrawar jimiará kanunam métej awajsarmiayi. Tura kanusha init wayastatuk ajamiayi. ⁸ Nuna túramtai Semun Pítiur Jesusan tikishmatar tímiayi “Uuntá, wikia ti tunaitjai. ¿Wíjiaisha itiurak pujustam?” ⁹ Semunsha ni írutkamurijiai namakan timiá untsurín wáinkiar ashamkarmiayi. Tuma asa Semunsha nuní tímiayi. ¹⁰ Tura Sepetéu uchirí Jakupusha Juansha Semunjai pujuarmia nusha ashamkarmiayi. Tura Jesus Semunkan tímiayi “Ashamkaip. Yamaikia namakaachinia áintsamek aents-eau ajastatme.” ¹¹ Nuyasha kanurin kukar júkiar, ashí takakmarincha ikiukiar Jesusan nemarki wearmiayi.

Tunamaru áishman̄kan Jesus tsuármiania nu

(Mateu 8.1-4; Márkus 1.40-45)

¹² Ukunam Jesus chíkich péprunam pujai tunamaru áishman̄ taa Jesusan wáiniak tikishmatar nun̄ká shushuma pankái Jesusan tímiayi “Untá, wakerutakmeka páchitsuk tsuáramniaitme.”

¹³ Nuna tutai Jesus antin̄ tímiayi “Wakerajai. Tsuaa-jme.” Tura nú chichamaik tunamarusha péñker ajasmiayi.

¹⁴ Túrasa Jesus chicharuk “Ámeka nu etserkaip, tímiayi. Antsu Israer-shuar Patrij werim ame péñker ajasmanum Muisáis akupkamia núnismek susata. Nujai ashí shuar ame péñker ajasmarmin nekaawartatui” tímiayi.

¹⁵ Tura Jesusa túramuri ti etsernamiayi. Túmakui untsurí aents anturkataj tusar káutkarmiayi. Tura ni sun̄kurin̄cha tsuámartaj tusar káutiarmiayi. ¹⁶ Núnisan̄ Jesuska aents atsuini-amunam we ni Aparin̄ áujmiayi.

Emearun Jesus tsuármiania nu

(Mateu 9.1-8; Márkus 2.1-12)

¹⁷ Chíkich tsawantai Jesus unuiniak pujai Pariséu aents tura Israer-shuara jintinniurisha Kariréa péprunmayasha, Jutía péprunmayasha tura Jerusarénnumiasha káunkarmia nu antúu pujuarmiayi. Jaa tsuártinian Yusa kakarmarin̄ takakuyayi Jesus. ¹⁸ Nuñkia emearun tampumpua kuaru shuar itiar-armiayi. Jesus pujamunam init awayattsar wakeriarmiayi. ¹⁹ Tura shuar ti untsurí piaku asamtai wayamnia atsum-iayi. Túmaitkui yakiin̄ wear jean̄ urakar, aents kaé ajas matsatmanum Jesus pujamunam emearun tampunam nená itiararmiayi. ²⁰ Nin̄ itiarmania nu, Jesus Yusa kakarmarin̄ takakui, tú enentáimtun̄ Jesus nekáa emearun tímiayi “Ame tunaarum tsan̄kuramuitme.”

²¹ Nuñkia Israer-shuara jintinniurisha, Pariséusha ni enentáin̄ enentáimsar “¿Jusha yait Yúsa náarin̄ yajauch awajtin? Warí, aya Yúsak tunaan tsan̄kurachminkiait” tu enentáimsarmiayi.

²² Tura Jesus ni enentáimsamurin̄ nekáa tímiayi “¿Urukamtai tú enentáimprarum átum? ²³ Nuñkia ¿warí imiá yúpichuchit, tsuártiniak, ni tunaari tsan̄kuratniuk? ²⁴ Wats, Aents Ajasu tutai Wisha tunaan tsan̄kuratniun̄ Yusa kakarmarin̄ takak-jai. Jujai nekaatarum tusan wats itiurchat tárugna nuna túrattajai.” Nuyá emearun chicharuk tímiayi “Amesha wa-jakim, tampuram achikiam ame jeemiin̄ wetá.”

²⁵ Nú chichamaik emearu niisha íimiainiamunman̄ tampurin̄ achik wajaki ni jeen̄ Yúsan wararki wémiayi. ²⁶ Túmakui ashí shuar ti enentáimprar Yusa náarin̄ shiir awajsarmiayi. Tura ashamainiak “aentsti tujinkiamu yamá wáinkiaji” tiarmiayi.

Riwin Jesus untsukmiania nu
(Mateu 9.9-13; Márkus 2.13-17)

²⁷ Ukunam Jesus wekas akupniu kuítrín-juu, naari Riwí, ni chíkich naari Mateu, akupin akitiai jeanam pujan wáinkiamiyai. Wáiniak “nemartusta” tímiyai. ²⁸ Tutai Riwí wajaki takakmarínkia ikiuak Jesusan nemarsamiyai.

²⁹ Nuyá ukunam Riwí namperan Jesusan najatamiyai. Tura untsurí akupniu kuítrín-juu tura chíkich shuarsha káunkar misanam pujuarmiiai. ³⁰ Tura Paríséusha Israer-shuara jintinniurísha Jesusan tsanumpruiniak Jesusa unuiniamurín tiarmiiai “¿Maaj, urukamtai atumsha akupniu kuítrín-juu ainia nújaisha tura chíkich yajauch shuarjaisha iruntrarum yurumprum?”

³¹ Tutai Jesus áimkiamiyai “Shuar jaachu péñker ainiana nu ¿tsuákratniun atsumainiawak? Antsu jaa ainia nu tsuákratniun atsumainiawai. ³² “Wikia péñkeraitjai” tuinia nuna untsuk-tajtsan táchaitjai. Antsu yajauch shuar ni enentáin yapajía Winia ajasat tusan untsuajai” tímiyai.

Yurumtsuk Yus áujsatniun Jesusan aniasarmiania nu
(Mateu 9.14-17; Márkus 2.18-22)

³³ Nuyá Jesusan aníak tiarmiiai “Juanka unuiniamurísha, Paríséu unuiniamurísha yurumtsuk Yúsán áujainiatsuk. Tura ame unuiniamurmeka ¿urukamtai ijiarma Yúsán áujainiatsu?” tiarmiiai.

³⁴ Tutai Jesus tímiyai “Nuatma nampernum, ¿ipiaamu ainia nu ijiarmamniakait, yamáí-nuatu pujai? ³⁵ Atsá. Wats Wisha ukunam junaktiatjai; nuínkia ijiarmatin átatui” tímiyai.

³⁶ Tura junasha nujai métek-taku unuiniamiyai: “¿Yamaram pushí tsupikiar nujai arut pushiniam anujtukminkiait? Nu túramka yamaram pushí yajauch ajasaintiui; túrasha shiir anujkamu arut pushijiai mai metek yamaram wáinkiachminiaiti. ³⁷ Núnisan nijiamanch yamáí nawamu nuap najanam arutnum yaraachminiaiti. Túramka nijiamanch kariak ijiakratniuiti; túmak nijiamchisha nuap najanamusha mai metek menkainiawai. ³⁸ Tuma asantai nijiamanch yamáí nawamu yamaram nuap najanamunam yaraatniuiti. Nu túramka mai metek péñker átiniaiti. ³⁹ Yaunchu nawamu úmana nuka yamarman nakitrattui. “Yaunchu nawamu imiá penkeraiti” tiártatui” tímiyai Jesus.

6

Ayampratin tsawantai trikiu neren achikiarmiania nu
(Mateu 12.1-8; Márkus 2.23-28)

¹ Ayampratin tsawantai Jessusha unuiniamurijiai araa-munam wekasar, unuiniamurísha trikiu neren majurkutak

wekainiarmiayi; tura tishisar neren yuawarmiayi. ² Nuna túruiniakui Paríséu tiarmiayi “Maaj, atumsha ayampratin tsawantaj takaschatniua nui, ¿urukantai takaarum?”

³ Takui Jesus ayak tímiayi “Yaunchu uunt akupin Tawitcha tura nemarniusha tsukamainiak túrawarmia nu ántichukaitrum. ⁴ Tawit Yusa Jeen wayá, Yus iniaktusma tantan yuámiayi; tura nemarniuncha ajamsamiayi. Tura nu tantancha aya Israer-shuara Pátrirí yúatin ármiai. Tuma ain Tawitcha yajauchin túrutsuk achikmiayi, tímiayi. ⁵ Wisha Aents Ajasuitkiun ayampratin tsawantan Nérenniurintjai” tímiayi Jesus.

Shuara uweje jakaan Jesus tsuármiania nu

(Mateu 12.9-14; Márkus 3.1-6)

⁶ Chíkich ayampratin tsawantaj Israer-shuar iruntai jeanam Jesus wayá unuiniartasa nankamamiayi. Nui shuar uweje untsuuria nu jakaa pujumiayi. ⁷ Tura Israer-shuara jintinniurisha, Paríséusha Jesusan “yajauch túrayi” titiai tusar wakeruiniak, “Ju ayampratin tsawantaj nu shuaran tsuartimpiash” tusar ii pujuarmiayi. ⁸ Túrasha Jesuska ni enentáimmiarín nekariarmiayi. Túmayat uweje jakaan chicharuk “Juí ajapén wajasta” tímiayi. Tutai áishman ajapén wajasmiayi. ⁹ Nuiñkia iruniarmiania nuna Jesus tímiayi “Enentáimpratarum. Ayampratin tsawantaj yajauch túratin, péñker túratniujai ¿tuá péñkerait? ¿Uwemtikratin, máatniujajisha tuá péñkerait?” tímiayi. ¹⁰ Nuyá téntakarmia nuna iis áishman kan tímiayi “Uwejem takuitia.” Áishman sha uwejen takuimtai nú chichamaik péñker ajasmiayi. ¹¹ Tura chíkichkia ti kajerarmiai. Túrawar “Jesus warí itirukamniakit” tusar aniniaisarmiayi.

Tuse unuiniamun Jesus anaikiamiania nu

(Mateu 10.1-4; Márkus 3.13-19)

¹² Nuyá Jesus Yúsan áujsataj tusa náinnium wakamiayi. Tura nu kashi Yúsan au-aujkua tsawarmiayi. ¹³ Tsawarmatai unuiniamurín ikiankar tuse anaikiamiai. “Winia akatramuritrume” tímiayi. ¹⁴ Ju ármiai: Emka, Semun chíkich naari Pítiur apujtusmia nu; tura nuyá ni yachi Antres, Jakupusha, Juansha, Jiripisha, Parturumísha, ¹⁵ Mateusha, Tumassha, Arpeu uchirí Jakupusha, Ásump Semunsha, ¹⁶ Jakupu yachi Jútassha, tura Jútas Iskariúti Jesusan ukunam surukmia nu. Nu tuse achikma ármiai.

Untsurí shuaran Jesus yáinkiamiania nu

(Mateu 4.23-25)

¹⁷ Nuijiaí Jesus náinniumia pakanam taawarmiayi. Nui pujusarmiayi. Nui sha untsurí unuiniamurisha, tura Jutía

nun̄kanmaya, tura Jerusarénnun̄mía tura nayaantsanam
ayamach Tiru, tura Setun péprunmaya ti untsurí aents
antuktaitsar pujuarmiayi. Jesus tsuarati tusar káunkarmiayi.
18 Iwianchrukusha tsuámararmiayi. 19 Jesus tsuártinian
tujinkiachu asamtai ashí shuar antiñtaj tusar wakeriarmiayi.

Náinnium Jesus etserkamu

(Mateu 5.1-12)

20 Ni unuiniamur̄in Jesus iis juna tímiayi: “‘Yusan atsuma-
jai’ tárumna nu, Yus akupeamunam páchitkiaitrume; tuma
asamtai warasminiaitrume.’

21 ‘Yamáí tsukamarmena nu ukunam ejemartatrume.
Tuma asamtai warasminiaitrume. Yamáí úutrumna
nu, ukunmañka wishirtatrume. Tuma asamtai
warasminiaitrume.’

22 ‘Atumin nakitramprarmatai, ajapramawarmataisha,
tura Winia Aents Ajasu tutaiya nú shuar ajasuiti tusar
tsanumprutmak katsekkramkarmataisha warasmini-
aitrume.’

23 ‘Túramtai nayaimpiniam ti shiir ana nu núkap sunastin
átatui tu enentáimsarum ti warastarum. Warí, ju shuara uuntri
yaunchu Yúsna etserniun nútiksarañ yajauch awajsachar-
makia.’

24 ‘Tura kuítrinniutiram atumsha atumí waratair̄i aya ya-
maik waintrume. Ukunmañka waraschattarme.’

25 ‘Atsumatsjai, tu enentáimprumna nu, ukunmañka at-
sumattarme. Nuñkia waraschattarme. Yamáí wishíarmena
nu, ukunmañka wáitiakrum úuttiatrume. Nuñkia waraschat-
tarme.’

26 ‘Ashí aents atumin shiir awajtamkurmin aneartarum.
Nujai waraschatniuitrume. Warí nuna uuntri ántar-yusnan
etser̄in armia nuna nútiksarañ yaunchu shiir awajsarmiayi.’

Ii nemasrī aneatniun Jesus unuiniamiayi

(Mateu 5.38-48; 7.12)

27 ‘Winia anturtarmena nuna juna tájarme: Ame
nemasrum aneata, nakitramainia nusha shiir awajsata;
28 yajauch chichartamainia nusha shiir enentáimtusarta;
katsekramainia nusha Yus áujtusarta. 29 Ame yapimin
ijiutmamtai áatú yapiruīsha ijiuti tusam iniaktusta; ame
pushirmin jurutramkitiaj tuñiakuisha sákurmencha jukiti
tusam iniaisata. 30 Seatmana nu susata, tura áminiun
jurutramainiakuisha ataksha awañturkitia tiip. 31 Chíkich
winia túrutati tusam wakeramna nútiksamek chikichcha
túrata.’

32 ‘Iista, aya atumin anenmainia nuke aneakmesha,
¿nusha warí péñkera túrarum? Yajauch shuarsha nuna
túrin áiniawai. 33 Tura atumniasha péñker awajtamainia

nuke pė́nker awajkurmesha ħnusha warí pė́nkerá túrarum? Yajauch shuarsha nuna túrin áiniawai. ³⁴ Awaṭturkimniaiti tu enentáimtarum nuke íkiakrumsha ħnusha warí pė́nkerá túrarum? Yajauch shuar nuamtak yajauch shuarjai awaṭturkimniaiti tu enentáimsar ikianainiawai. ³⁵ Tura atumsha nemasrum aneatniuitrume, tura pė́nker túratniuitrume, tura awaṭturkittiawai tu enentáimtsuk ikiastiniaitrume. Túrakrumninkia Uunt Yus pė́nker akirmaktatrume; tura ni uchiríntjai tu iniakmastatrume. Yuska, “yumiṣajme” ticha nunasha tura yajauch shuarnasha shiir awajeawai. ³⁶ Ii Aparí waitnentrarniua nútiksarmek atumsha waitnentratarum.’

Chikicha túramurí ti enentáimtusairap
(Mateu 7.1-5)

³⁷ ‘Chikicha túramurí ti enentáimtusairap. Núnisaṇ Yuska atumí tunaarín iirtamsashtatui. Chikicha tunaarín “nuke asutniatniuiti” tiirap. Núnisaṇ Yus atumín sumamtikramashtatrume. Tsankurnairatarum. Núnisaṇ Yus tsankurtamprattawai. ³⁸ Chikichcha susata. Núnisaṇ Yus atumin suramsattarme. Niisha pė́nker nekapma, tura núkap ati tusa teeka awajas tura patas núkap enkea emetsai amastatui. Atum chíkich túrarmena nútiksaṇ atumniasha túrutmattarme.”

³⁹ Tura nuyasha júna métek-taku chichaman ujakarmiayi: “jii kusurusha ħitiurak chíkich kusuruncha jukimniait. Mai metek waṇnam iniaashtatuak? ⁴⁰ Unuiniamua nu unuiniana nuna naṅkaamas áchatniuiti. Túrusha niisha ti unuimiatar unuiniana nujai métek nekaamniaiti.’

⁴¹ ‘Ĥitiurtsuk atumi jiiṇ numi enketna auk íitskesha atumí yachí jiiṇ tsuat enketusha iiyarum? ⁴² Ame jiiṇjiiṇ numi tuke enketaisha ħitiurtsuk ame yatsumi jiiya tsuátan jurustajme tame? ¡Ántraitrume! Emka ame jiiṇjiiṇ numi enketna nu jusata. Nuinkia paant wáinkiatame yatsumi jiiṇ tsuat enketna nu jurustin.’

Nerejai numi nekaatainti
(Mateu 7.17-20; 12.34-35)

⁴³ ‘Pė́nker numi yajauchin nereatsui; tura yajauch numi pė́nkeran nereatsui. ⁴⁴ Numisha ni neren nékanui. Tsachiknumiasha kushinkiap júukchamniaiti. Tura naranmaya shuinia júukchamniaiti. ⁴⁵ Núnisaṇ pė́nker shuar ni enentái pė́nker asamtai pė́nkeran chichaawai; tura yajauch shuar, enentái yajauch asamtai yajauchin chichaawai. Páantchakait. Enentáin pimiutkamu ana nuyaṇ ni wenejai chichaawai.’

*Jimiará jea ukurtin**(Mateu 7.24-27)*

⁴⁶ ‘Wi tájana nu túrachiatrumsha ĵurukamtai Winia, Uunta, túrutrum? ⁴⁷ Shuar winia chichamprun ántuinia nu jea jeam-majai méteketé. Winia anturtuk umíana nu ĵujai méteketé: ⁴⁸ Shuar jean jeamuk emka init taur kayanam ukurmai. Tura yumi ti yutuk, entsa nujan̄krua tukummaitiat pukukachmai kayanam ukuamu asa. ⁴⁹ Antsu Winia anturtukiat umi-atsna nuka ĵujai méteketé: Shuar jean jeamuk aya naik-miniam jeammai. Tura entsa nujan̄krua tukumpram nu jeaka pukukamai. Tura mash sáantramai.” Tu unuiniamiayi Jesus.

7*Suntara yáintrin Jesus tsuármiania nu**(Mateu 8.5-13)*

¹ Jesus áentsun unuiniasua amik Kapernáum péprunam wémiayi. ² Nui Rúmanmaya suntara kapitián̄tri pujumiayi. Nu kapitián̄i takarniuri, ti aneamuri, jakamnia jaamiayi. ³ Tura Jesusan pachis áujmatainian antuk, ame shuarum Jesusan itiatiti tura winia takarniun tsuárturti tusa Israer-shuara úuntrin akupkamiayi. ⁴ Niisha Jesusan weriar, umirtukat tusa ti seainiak tiarmiayi “Ju kapitián̄i nekas yáintin pénkeraiti. ⁵ Niisha yajaya apachitiat in shiir enentáimturmají. Tura iruntai jean jeamtinniasa nin̄ki chicharkaiti, tura yayawai.”

⁶ Nuyá Jesus niijiai wémiayi. Tura ni jeen jeastatuk jatem-samtai kapitián̄cha ni amikrin akatar ju titiarum tusa Jesusan akuptukarmiayi. Niisha Jesusan chicharuk juna tiarmiayi “Untá, ántam wayataj tu enentáimsaip. Ame ti nan̄kaamaku asam winia jearuĵ wayachminiaitme. ⁷ Tuma asakmin imia wiki Amiin jeatniun arantukjame. Ayatik “pénker ajastí” tákumin winia takarniusha pénker ajatrustatui. ⁸ Wi nékajai. Winia úuntur winia akuptuiniawai. Tura wisha suntaran akupenajai. Nunasha wi “wetá” takui wéawai. Tura chikich-nasha “winitia” tutai winiawai. Tura winia takartinian “ju túratá” tutai umíawai.” Tu tímiayi.

⁹ Jesus nuna antuk ti enentáimias ni nemarainian tímiayi “Nekas tájarne Israer-shuar Yúsán tímiatrus enentáimtinian wáinchaitjai.”

¹⁰ Tura kapitiani akatramuri jeá waketkiar, takarniuri pénker ajasun wáinkiarimiayi.

Wajé uchirín Jesus iniantkimiania nu

¹¹ Nuyá ukunam chíkich pepu Naín tutainium ni unuiniamurijiai tura chíkich untsurí aentsjai Jesus wémiayi.

¹² Tura péprunam nuntumas jakaan iwiarsatai tusar juínian

wáinkiamiyai. Jakáa nukurí wájeyayi, tura uchirí jakamia núchikiiyayi. Tura ti untsurí nu peprunmaya nin nemarsarmiayi. ¹³ Jesus nu wajen wáiniak tura waitnentar “úutip” tímiyai.

¹⁴ Nuínkia Jesus jakaa enkerman tarunt antinmiyai; nuna juíniasa wajasarmiayi. Nuínkia Jesus jakaan chicharuk “Umpa nantaktia, tájame” tímiyai.

¹⁵ Tutai niisha nantaki pujus chichaamiyai. Tura Jesus ni nukurín “Jujú uchiram” tímiyai.

¹⁶ Tura matsamiarmia nu, nuna wáinkiar ashamkarmiayi. Tura Yusa náarín shiir awajsarmiayi. Tura chichainiak, “Yúsna etserniuchukait Niisha. Ataksha Yúsna etserin uunt ana nu tarutramji” tiarmiayi. Tura “Israer-shuarti Niiniu ájinia nuna yáinmaktai tusa Yus tarutramji” tiarmiayi.

¹⁷ Tura ashí Jutía nunkanmayasha tura ni írutkamu nunka ármia nuyasha Jesus túramia nuna nekaawarmiayi.

Imiakratin Juan sepunam pujak ni amikrín akatar Jesusan akuptukarmiania nu

(Mateu 11.2-19)

¹⁸ Juan ni írutkamurí ujakam Jesus túramun nekaamiyai. Nekáa ni írutkamurín jímíaran untsukmiyai. ¹⁹ Tura Jesusai akupkarmiayi. “Atumsha Jesus aníastarum. ¿Amesha nekas Kristu Yus akupkamu tátinia núkaitiam. Kame chikichak nákastataji? titiarum. Nu nekáa ikiuutarum’ tímiyai.

²⁰ Tutai niisha Jesusan werí jeariar tiarmiayi “Incha imiakratin Juan akatar akuptamkaji. ¿Amesha nekas tátinia núkaitiam. Chikichak nákastataji? Nu nekaatai tusar wakeraji” tiarmiayi.

²¹ Wats, nii jeawarmia nuí Jesus untsurí jaan tsuártasa pujurmiayi. Iwianchrunkucha iwianchrín jjiirki akupkatasa pujurmiayi. Tura kusuruncha íimtikiyai. ²² Tuma asa Jesus akatramun juna tímiyai: “Waketkirum ashí átum antukurmena nusha, wáinkiarumna nusha ujaktarum. Kusurusha wáinmainiawai; shutuap ainia nu péñker wekainiawai; tunamarusha tsuámainiawai; empekusha ántuiniawai; jakaasha atak iwiaaku ajainiawai; tura kuítrinchandumsha uwempratin chicham ujakmaiti. Juan nu ujaktarum. ²³ Yawetsuk Winia tuke shiir enentáimturna nú shuar shiir átatui” tímiyai Jesus.

²⁴ Waketkiarmatai Jesus Juánkan pachis áujmatman antuk shuar matsamarmia nuí juna tímiyai: “Shuar atsamunmasha ¿warí werimiarum. Pintiu nase umpúam atúu we juní we ajana nu iistai tusarmek wémarum? Juan núnischaiti. ²⁵ Nuikia ¿warí werimiarum. Shuar péñker iwiarmampra íistai tusarmek wémarum? Warí, péñker iwiarmampraka

uunt akupniu jeen pujuiniatsuk. ²⁶ Nuĩkia ¿warí werimi-arum. Yúsna etserniuk werimiarum? Maa, nú nan̄kaamas wáinkiarne. ²⁷ Yaunchu Yus-Chichamnum ju áarmaiti:

“Winia akatramurun amiini emka akupeajai ame jintimin iwiarat tusan.”

Juan nu akatramuiti. ²⁸ Nekasan tájarme, Yúsna etserin imiakratin Juanjaj nan̄kaamas uunt atsuwiti. Túmaitiat Yus akupeamunam páchinia nu shuarka nekas imianchaitiat, Juanjaj nan̄kaamas átatui” tímiayi. ²⁹ Penké shuarsha, kuítian-juusha, Juan imiaimuijaj imianiarmia nu, Jesus timian antukar Yusa náarĩn shiir awajsarmiayi. ³⁰ Túrasha Paríséusha Israer-shuara jintinniurisha Yus yáĩntaj támaitiat Juan imiaa-mujaj imiancha ásar nakitrarmiayi. ³¹ Nuĩkia Uunt Jesus tímiayi “Yamaiya áentstiram, warijiaĩn métek árum nuna paant títiatjarme. ³² Uchijaj métek árum. Ni aijjaj iruntrar naku-rustaj tukamá tuĩniawai “Námpera áinis nakurustaitsar peem umpuarji, túrasha jantsemáchurme. Nuyá iwiarsatniua áinis nakurustaitsar íwiareakur kantamtai kantamáaji, túrasha átum úutcharme.” Tu tuĩniawai. ³³ Atumsha núnisaitrume. Kame Juan núkap yurumtsuk úmutsuk wekaimiayi. Túmakui átumka “iwianchrukuiti” tímiarme. ³⁴ Nuyá Wisha Aents Ajasan támajai. Tura yurumá úmakuisha “ti yurumin tura ti nampe-naiti; kame ashí yajauch shuaran tura kuítian-juu amikrinti” túrutrume. ³⁵ Wats, nekas neka ainia nu, Yusa nekatairĩn iniakmainiawai.” Tu tímiayi.

Pariséu Semun náartin Jesusan ni jeen ipiaamiania nu

³⁶ “Winí yurumáitia” tusa Paríséu Jesusan ipiaamiayi. Tutai Jesus ni jeen werí misanam pujusmiayi. ³⁷ Nuĩkia nu péprunmaya yajauch nuwá, Jesus Paríséu jeen yurumáttsa weyi táman antuk, kayá mutinium kunkuĩn asuiti áimkiamun takukí jearmiayi. ³⁸ Tura úutki Jesusa nawen pujuras neajkijaj niijarmiayi. Tura intiashijaj japirmiayi; nuyá nawenam mukuta kun̄kuinian ni nawen ukatramiayi. ³⁹ Paríséu Jesusan ipiaamia nu, nuna wáiniak juna enentáĩmsamiayi: “Ju nekas Yúsna etserniuitkiunka, ju yajauch nuwá ántiana nuna nekaawainti. Warí, niisha netse nuwáchukait” tu enentáĩmsamiayi.

⁴⁰ Nuĩkia Jesus Paríséun chicharuk tímiayi “Semunká, ámin titiaj tusan wakerajai.”

Tutai Paríséu chichaak “Turuttiá, Uuntá” tímiayi.

⁴¹ Tutai Jesus tímiayi “Kuítian ikiamniun jimiaar áishman tumashmakarmiayi. Chíkich kiniantus (500) tura chíkichka aya sen̄kuentak tumashmakmiayi. ⁴² Akiktin tsawant jeamtai máĩ-metek takakcha ármiai. Tuma asamtai kuítian ikiamin

jan̄ki kan̄kar ajakramiayi. ⁸ Tura chíkich jinkíáisha pé_nker nun̄kanam iniaararmiayi. Tura tsapainiar, pé_nker nerekar chíkichkia siaṅsha (100) nerekararmiayi.” Tuasua amik kakan-tar chichaak Jesus tímiayi “Kuishim ákuĩkia antuktarum.”

(Mateu 13.10-17; Márkus 4.10-12)

⁹ Nuyá ni unuiniamuri Jesusan aniak tiarmiayi “Ju métek-taku chicham tamena nu ¿warintkumēa tame?”

¹⁰ Tutai Jesus tímiayi “Atumnia Yus ni akuptairin nekaachma ana nuna nekamtikramprume. Tura chikichnaka, wáiniainiayat kusurua núnin árti tusan, tura ántuiniayat nekaacharat tusan aya métek-taku chichamjai jintintiatjai,” tímiayi.

Atsaampramu chichaman Jesus paant jintintiamiania nu
(Mateu 13.18-23; Márkus 4.13-20)

¹¹ ‘Wats, ju nekaatarum, tímiayi. Jinkíáisha Yusa chichamen nakumui. ¹² Jintíá iniaaru tana nuka shuar aya ántana nuna nakumui. Yúsan nekas enentáimtus uwempracharti tusa íwianch wárik taa nu chichaman ni enentáiyān júawai. ¹³ Kayanam iniaaru tana nuka shuar antuk waras umi-ana nuna nakumui. Tura nú shuar kan̄kape atsá asam-tai, ishichik tsawantinin umikiar itiurchatan wáinkiar wárik kanainiawai. ¹⁴ Jan̄kiniam iniaaru tana nuka tuke enentáijjai umíatsna nuna nakumui. Nu shuarsha ántuiniawai, túrasha ni wakeramurijjai wekainiawai. Ju nun̄kanman̄ ana nuna ti páchiniakui, tura kuítian ti wakeruiniakui, warastinniak enentáimtuiniakui, Yus-Chicham ni enentáin takaatsui. Nujai kan̄karma ásar nerektinian tujintiainiawai. ¹⁵ Tura jinkíái pé_nker nun̄kanam iniaaru tana nuka shuar antuk umi-inia nuna nakumui. Niisha antukarmia nuna pé_nker enentáimtusar, yawetsuk umirkar ti pé_nker nerenawai.’

Ashí iwiainiakma átatui
(Márkus 4.21-25)

¹⁶ ‘¿Shiripkin ekeemak nukuktinkiait? Peaknum waaptak ikiuschatniuiti. Antsu jeānam wáiniana nu paant wáinkiarat tusa yakí ekentsatniuiti. ¹⁷ Núnisaṅ ashí nekaachma ana nu paant átatui. Tura úukma ana nu nekanattawai. Tura iwiainiakma átatui. ¹⁸ Tuma asamtai anearum pé_nker antuktarum. Shuar takakna nu patatsamnia átatui. Túrasha takaktsuna nu, takakjai tu enentáimtumana nuka jurunkíttiawai.” Tu timiayi.

Jesusa nukurí, Jesusa yachi
(Mateu 12.46-50; Márkus 3.31-35)

¹⁹ Jesus pujamunam nukurí ni yachisha tariarmiayi. ²⁰ Turamtai Jesusan tiarmiayi “Ame nukusha yatsumsha aa wajasar untsurmainiawai.”

21 Tutai Jesus tímiayi “Ee, nukuruiti, yatsuruiti, tura Yus tana nuna antuk umíana nusha winia nukuruiti, winia yatsuruiti.”

Nasesha entsasha Jesusan umirkarmiania nu
(Mateu 8.23-27; Márkus 4.35-41)

22 Chíkich tsawantai Jesus ni unuiniamuríjiai kanunam enkemprar “Antumian amaini wetai” tímiayi. 23 Entsanam wesar Jesus kanarmiai. Tura aya aneachma nase ti kakaram násentkui chíchimi tampá tukumar kanun init awayastatuk awajmiayi. 24 Túram nuínkia Jesusan ishintiainiak “Untá, iisha entsá wayaaji” tiarmiayi. Nuínkia Jesus nantaki nasencha entsanacha chicharkamiayi. Nú chichamaik nasesha menkakamiayi, tura entsasha miaaku ajasmiayi. 25 Nuyá ni unuiniamurín chicharuk “¿Urukamtai Winia enentáimtursachuram?” tímiayi.

Tura niisha ashamainiak, ti enentáimprar “¿Ausha warí áishmankait? Nasesha entsasha Nii chicharkam umirainiat-suk” tiarmiayi.

Jatara nunkanam Jesus iwianchrukun tsuármiania nu
(Mateu 8.28-34; Márkus 5.1-20)

26 Kariréa nunka amaini Jatara nunkanam jeawarmiai. 27 Kanunmaya Jesus jiinkimtai nu péprunmaya áishman Nin taruntamiayi. Nu áishmansha yaunchu iwianchrukuyayi. Misú wekas, jeá pujutsuk aents iwiansamunam pujuyayi. 28-29 Íwianchkia nu aishman kan ti kakaram nupet wémiayi. Tura emetatai tusar uwejencha nawencha jirujai jinkiá wearmiayi. Túrasha tujinkiarmai. Niisha jiruncha tsurí wémiayi. Tura íwianch aents atsamunam útsuk awemamiayi. Nu aishman Jesusan wáiniak tikishmatar kakantar chicharuk “¿Urukamtai winiisha tarutnium, Uunt Nanakaamaku Yusa Uchiri Jesusa? Winia wáitkiarsaip tusan seajme” tímiayi. Íwianch nín pujurun Jesus jiki akupeam tu tímiayi. 30 Jesus nu áishman kan anias “¿yáitiam?” tímiayi.

Tutai nii chichaak “Wikia Untsuríntjai” tímiayi. Untsurí íwianch nín pujurma asa nuna tímiayi. 31 “In uunt wáanam ii jiinkimiai nuín akuptukam amutkaip” íwianch seawarmiai Jesusan. 32 Nui ishichik arantach náinnium untsurí kuchi shushunmak yujaarmiayi. Tura íwianch chichainiak, “Antsu kuchiniam wayatin tsankatrukta” tiarmiayi.

Tutai Jesuska “Ayu, wetarum” tímiayi.

33 Nuna takui íwianch áishmannumia jiinkiar kuchiniam wayawarmiai. Túram kuchisha nánatanam akaiki iniaawar entsanam utsanawarmiai. Túrunawar jakekarmiai.

34 Kuchin wáinniusa túrunan wáinkiar, ashamkar, péprunmasha tura arantcha etserkatai tusar tseke wearmiayi. 35 Etserkarmatai, iyutai tusar untsurí shuar wearmiayi. Tura Jesus pujamunam jeawar, íwianch jíintiukiarmia nú áishman kan pénker ajas pushí entsar Jesusa nawen pujan wáinkiar miayi. Tura ashamkar miayi. 36 Íwianch roku áishman tsuárman wáinkiar miia nu yama taan ujakarmiai. 37 Tura ti ashamainiak Jatara nun kanmaya aents ashí Jesusan “Wetá” tiarmiayi. Tutai Jesus kanunam enkemar wémiayi. 38 Íwianch jíintiukiarmia nú áishman Jesusan, wisha ame wéamunam winitiaj tusa seamiayi. Tutai Jesus nuna suritiak, 39 “Antsu ame jeemiin weme Yus ámin túrutma nu ashí etserkata” tímiayi. Tutai áishman we Jesus nin túramia nuna ashí nu péprunam etserkamiayi.

Jairu nawantríncha tura chíkich nuwáncha Jesus tsuármiania nu

(Mateu 9.18-26; Márkus 5.21-43)

40 Tura Jesus katiñki Kariréanam tatí tusar nákas pujuarmiayi. Tuma ásar Nii waketki katiñki támatai nu aencha warasar áujsarmiayi. 41 Tumaj Israer-shuara iruntai jeá uuntri Jairu naartin támiai. Nii taa, Jesusa nawen tikishmatar “Winia jearui waitneasam winítritiá” tímiayi. 42 Ni nawantri chikichik amia nu, tuse uwí takaku, jakatasa pujakui nuna tímiayi.

Jesus “ayu” tinia weakui ti untsurí aents nemariarmiayi. Tura untsurí shuar kaé ajas weena ásar chanuawarmiayi.

43 Nui nuwá páchitkia wémiayi. Niisha tuse uwí numpa ajapeak wáitias pujuyayi. Tsuákratniua nuisha ni kuítrín ashí ajapaitiat tsuámarchauyayi. 44 Jesusa úkuriini winiá weantuk ni pushirí náñkatramurin antiñmiayi. Nuna tura nú chichamaik numpé ajapeamuncha pénker ajasmiayi. 45 Nuñkia Jesus chichaak “¿Ya Winia antintkia?” tímiayi.

Tura “penkesha antiñchajme” tuñiakui Pítiur ni tsaniak-marijjai Jesusan chicharuk “Uuntá, ti untsurí antiñmasha, tura ti untsurí chanunmainiasha ¿itiura “ya Winia antintkia” tame?” tíarmiayi.

46 Tútaisha Jesus tímiayi “Nekas Winia antintkiayi. Winia kakarmarjai tsuárajna nuna nékajai” tímiayi.

47 Nuyá nu nuwasha, nekarayapi tusa kuran ki taa Jesusa nawen tikishmatramiai. Tura ashí aents ántuiniamunam urukaku antiñkia tura itiura wárik pénker ajasmia nuna ujakmiayi.

48 Nuñkia Jesus nuwan tímiayi “Nawantrú, shiir wetá. Winia nekas enentáimtursa asam pénker ajasume.”

49 Jesus tuke chichas pujaj uunt Jairu jea, ti untsurí antiñmasha, turenia taa, Jáirun tímiayi “Ame nawantrum jakayi. Unuikiartin tuke itit awajipia” tímiayi.

50 Tura Jesus nuna antuk tímiayi “Ashamkaip. Áyatik Winia nekas enentáimtursata. Túrakmin nawantrum péñker ajastatui” tímiayi.

51 Jeá jeawar Jesussha Nijijaj untsurí wayatniun surimkiamiayi. Antsu aya Pítrun, Jakupun, Juánnasha tura nuwachi aparín nukuríncha wayatniun tsan̄katkamiayi. 52 Ashí úutainiak atakka wáinkiashtatjapi tu úutiarmiayi. Túmainiakui Jesus penké jakaan nékayat tímiayi “Úutirpa. Nuwachkia jákachai, antsu kanarai” tímiayi.

53 Jakaancha urukaku ta tusar wishikrarmiayi. 54 Nuyá Jesus nuwachi uwejen achik, kákantar chicharuk “Nawantru nantaktia” tímiayi. 55 Túram niisha jakayat atak iwiaaku ajasmiai. Tura nú chichamaik nantakmiayi; túrunamtai Jesus “ayuratarum” tímiayi. 56 Nuwachi aparí nukurísha ti enentáimprarmiayi. Tura Jesus “Ju túramu penké etserkairap” tímiayi.

9

Jesus ni unuiniamurín etserkati tusa akupkarmiania nu (Mateu 10.5-15; Márkus 6.7-13)

1 Ni tuse unuiniamurín ikiaan̄ak ni chichamejaj iwianchrukun enentáiyā iwianchin jjiirki akupkatniun tura sun̄kurjaj jaa tsuártinnias̄ha ni kakarmarín súsarmiayi. 2 “Yus akupin ajastin ujaktarum, tura jaa tsuártarum” tinia akupkarmiayi Jesus. 3 Nuyá tímiayi “Wéakrum áyatik wetarum. Ushukrustincha, uyuncha, yurumkasha, kuitcha penké jukiirap. Aya chikichík pushí jukitiarum. 4 Nán̄kamas jeanam jearum wayarmeka nuin̄ pujustarum. Nuin̄ pujusrumek chíkich péprunam wéakrum jjiinkitiarum, tímiayi. 5 Tura atumin awaintiamatniun nakitiana nú péprunmaya jjiinkirum nawemiya nun̄ka akakekum ikiuktiarum. Awaintiamachma paant ati tusarum nu túratarum” tímiayi.

6 Nuyá jjiinkiar ashí péprunam uwempratin chichaman ujakiar wearmiayi; tura ashí péprunam jáinian̄cha tsuákiar wearmiayi.

Erutis “Jesusan ístaj” tímiania nu (Mateu 14.1-12; Márkus 6.14-29)

7-8 Uunt akupin Erutis Jesus túramun antukmiayi. Nu túramun chíkich shuarka “Juan̄ jakamunmaya nantaki túrawai” tu wearmiayi. Chíkichkia, “yaunchu Yúsnan etserin Erías wantiniak túrawai” tu wearmiayi. Chíkichkia, “chíkich

yaunchu etserin nantaki túrawai” tiarmiayi. Tuma asamtai Erutis penké nekaachmiayi. ⁹ Tura tímiayi “Wiki, Juan̄ka muuke tsupirkatarum, tíchamkaj. Tuma aisha, ¿ju shuar, ni túramur̄i ashí shuar chichainia nusha yátsukait?” Tu enentáimiuk “iistaj” tímiayi.

Senku mir áishman̄kan Jesus ayuramiania nu
(Mateu 14.13-21; Márkus 6.30-44; Juan̄ 6.1-14)

¹⁰ Atak Jesusa akatramur̄i waketki taar ni túramur̄in Jesusan ujakarmiayi. Nuñkia aents atsamunam Petsaitia péprunam tijiuch weak nūj júkiarmiayi. ¹¹ Tura penké shuar nuna nekaawar nemariarmiayi. Túram Jesus nin shiir áujsamiayi. Tura Yusa akuptair̄i pachis unuiniamiayi. Tura jaa armia nuna tsuáarmiayi.

¹² Tura kíakui, tuse unuiniamu Jesusan wériar tiarmiayi “Untá, shuar akupkachminiashit. Tíjiuch péprunmasha, shúarnumkesha wear ni yurumátniur̄in sumarmakarti, tura kanartintr̄in wáinkarti. Jūi pujajnia juñkia penké atsawai” tiarmiayi.

¹³ Tutai Jesus tímiayi “Atumsha ayuratarum.”

Tutai chichainiak “Iisha aya senku tanta tura namaksha jímíarchik takakji. Ju shuar ayuratin sumaktai tusar wétiniaitji” tiarmiayi.

¹⁴ Áishman̄sha ti untsur̄i senku mir (5000) jeeá ámiayi. Tura Jesus ni unuiniamur̄in chicharainak ““senkuenta senkuenta kanaarum an̄kant an̄kant pujustarum,” titiarum” tímiayi.

¹⁵ Túrawarmatai ashí pujusarmiayi. ¹⁶ Nuyá senku tantan tura jimiará namaknasha Jesus achik, yakiin̄i ímias Yúsan yuminsamiayi. Nuyá ajamsarat tusa ni unuiniamur̄in súsarmiayi. ¹⁷ Ashí yurumáwar ejemararmiayi. Tura ampírman tuse chañkinnium áimkiarmiayi.

Jesus Yusa anaikiamur̄inti ujakma amia nu
(Mateu 16.13-19; Márkus 8.27-29)

¹⁸ Jesus ni unuiniamur̄ij̄iāi áentsnumīa kanaki pujuarmiayi. Jesus Yúsan aujsua umik ni unuiniamur̄in tiarmiayi “¿Yáiti turutainia Winia?”

¹⁹ Niisha áimkiarmiayi, “Chíkich “Imiakratin Juán̄kaiti” turamainiawai; chikichcha “Iriásaiti” tura chíkichkia “yaunchu Yúsna etserin nantakniua núiti” turamainiawai” tiarmiayi.

²⁰ Tutai “Tura atumsha ¿yáiti túrutrum?” tiarmiayi.

Takui Pítiur chichaak “Ámeká Yusa Anaikiamur̄i, Kristu tutai, núitme” tímiayi.

²¹ Tutai Jesus “Penké etserkairap” tímiayi.

Ni jákatniur̄in Jesus ujakmiania nu
(Mateu 16.20-28; Márkus 8.30-9.1)

²² Nuyá Jesus tímiayi “Wi Aents Ajasuitjiana ju ti waitsat-niuitjai. Wíi shuara uuntri, tura ni Pátriri úuntri sha tura ni jintinniurisha nakitrurar maantuáwartatui. Túrasha iwiar-tusarmatai menaintiu tsawant jeamtai nantaktiatjai.”

²³ Nuyá ashí áentsun chicharuk juna tímiayi “Shuar Winia nekas nemartustajtsa wakerakka ni wakeramuriñkia ini-aisati. Tuke tsawant ni krusri yanaki nemartusti. ²⁴ Kame shuar ju nunkanam aya penker pujustaj takunka nu shuar uwemtsuk jakattawai. Antsu Winia anentu asa penker pujustinniak enentáimtsuna nú shuarka nekas iwiaakman wáinkiatstawai. ²⁵ Iimiata, shuar ashí ju nunkanam ana nuna súmakui tura jinium wétin ákuisha çitiurak penker pujusat? ²⁶ Wi Aents Ajasuitjiana ju Winiasha tura winia chicham-pruncha shuar natsantraitkuñkia, winia wincharujai, winia Aparu wincharijiai tura nayaimpinmaya penker suntara wincharijiai atak táakun shuar natsantrurmia nuna natsantrattajai Wi. ²⁷ Tura shuar Yusa akuptairin wáintsuk jákachartatna nu ju pujuiniawai. Nuna nekas tájarme” tímiayi.

Jesus nusháa iira ajasmiania nu

(Mateu 17.1-8; Márkus 9.2-8)

²⁸ Nuna tuasua amik nuyá chíkich semanatin Yúsán áujsataj tusa Jesus náinnium wakamiayi. Pítiur, Jakupu, Juanjai nemariarmiayi. ²⁹ Jesus auju pujus nusháa iira ajattsarmi-ayi. Ni pushirisha ti puju jítsumir ajasmiai. ³⁰ Nuñkia jimiara áishman Nijijai chicháa wajarmiayi. Nuka Muisáis Eríasjai áarmiayi. ³¹ Níincha wincha jítsumir téntakarmiayi. Tura Jesus wáitias Jerusarénum jákatniurin amia nuna áujmatarmiayi. ³² Pítiur ni tsaniakmarijiai kari ti pujainiajin iwiáa pujuarmiayi. Tuma ásar Jesusan tura jimiara áishmanjai jítsumir ajas wajainian wáinkarmiayi. ³³ Tura nu áishman Jesusan ikiuki weenai Pítiur Jesusan chicharuk “Uuntá, iisha ti shiir pujatsjik. Menaintiu áakmaktai, Áminiusha, Muisaisnasha, Eríasnasha áakmaktai” tímiayi. Tura Pítrusha enentáimtsuk nuna tímiayi. ³⁴ Nuna chicháa pujai yurañkim tarí kaput amuawarmiayi. Tura yurañkim amuam ti ashamkarmiayi. ³⁵ Nuñkia yurañminmaya ju chichaa-mun antukarmiayi: “Juka winia aneamu Uchiruiti. Nii an-turkatarum.” ³⁶ Chichaamun antasua amikiar Jesus ninki wajan wáinkarmiayi. Nuñkia takamtak pujuarmiayi. Tura wáinkarmia nuna penké etserkacharmiayi.

Uchi iwianchrunkun Jesus tsuármiania nu

(Mateu 17.14-21; Márkus 9.14-29)

³⁷ Kashin tsawantaj, náinniumia táarmatai, ti untsurí shuar Jesus inkiuntai tusar weararmiayi. ³⁸ Nu shuarnumia chikichik

áishman̄ Jesusan untsuak tímiayi “Uuntá, waitneasam uchir íirtústá. Uchirsha júchikiiti. ³⁹ Íwianch achik núpeteam niisha nán̄kamas untsümüi. Tura chichichiptu ajas wenunmasha saun kaput apaawai. Íwianch nin tuke yajauch awajas an̄kant awajsatniun nakitiawai. ⁴⁰ Túmakui ame unuiniamurmin iwianchin j̄iirtukit tusan seamjai. Túrasha tujinkiarmai” tímiayi.

⁴¹ Tutai Jesus tímiayi “Yus enentáim̄tichutirmin, tutupnik wekaichatirmin ĵurutmá tsawanttsuk atumjaī pujustaj. Urtmá katsuntratjatsuk? Uchiram juī itiata” tímiayi.

⁴² Tura uchi winiāi íwianch nun̄ká ajuant chichichiptu áepsamiayi. Tura Jesus iwianchin kakantar chicharkamiayi. Tura uchin péñker awajas ni apar̄in awantuki susamiayi. ⁴³ Tura ashí pujuarmia nu ti enentáim̄prar “Yuska imiá úuntchakait” tiarmiayi.

Jesus ni jákatniur̄in ataksha ujakmiania nu

(Mateu 17.22-23; Márkus 9.30-32)

Jesus túramun ti enentáim̄tu pujuiniāi Jesus ni unuiniamur̄in tímiayi ⁴⁴ “Wi tájarmena ju péñker antuktatum. Winia Aents Ajasu tútain surutkartatui.”

⁴⁵ Tura Nii timia nuna unuiniamur̄i nekaacharmiayi. Nekaawar̄ain tusa paantcha awajsamuyayi. Tura warin̄kit tusa anintrustinniasha arantukarmiayi.

“ĵYaki imiá nan̄kaamantuit?”

(Mateu 18.1-5; Márkus 9.33-37)

⁴⁶ Nuyá ni unuiniamur̄i, yaki imiá nan̄kaamaku ati tusa, nuamtak mai tunai ajarmiayi. ⁴⁷ Tura ni enentáimsamur̄in Jesus nekaamiayi. Tuma asa uchin achik ni pujamunam itiamiayi. ⁴⁸ Itiá tímiayi “Winia anentuk ju uchin shiir awajeana nuka Winia sha shiir awajatawai. Tura Winia shiir awajana nuka Winia akuptana nunasha shiir awajeawai. Kame átum nan̄kaamantuchu tárugna nu ti nekas nan̄kaamantuiti” tímiayi.

(Márkus 9.38-40)

⁴⁹ Nuyá Juan̄ tímiayi “Uuntá, shuar ame náarmin pachis iwianchin j̄iiki akupea nu wáinkiam̄ji. Tura in páchitkiachu asantai nuka suritkiam̄ji.”

⁵⁰ Tutai Jesus tímiayi “Antsu suritkiairap. Shuar in nakitramachkun̄ka in páchitkiawai.”

Jesus Jakupun Juánnasha chicharkarmiania nu

⁵¹ Jesus, nayaimpiniam waketkitniur̄i jeatemantai, enentáim̄mia ímiatrusan̄ Jerusarénn̄num we-wémiayi. ⁵² Wesa, kanartinian wáinkiarat tusa akatar émtikiarmiayi. Tura niisha

Samaria péprunam jeawarmiayi. ⁵³ Tura Samarianmaya aentska, Jerusarénum wéenan nekaawaru ásar itiaatniun nakitrarmiayi. ⁵⁴ Jesusa unuiniamuri Jakupusha Juansha nuna nekaawar, Jesusan tiarmiayi “¿Uuntá, Erías yaunchu túramia núnisrik iisha túrat tusam wakeramek. Nayaimpinmaya ji tara Samarianmaya aentsun amukarti, títiatjik?”

⁵⁵ Tutai Jesus nin ísar kakantar chicharuk tímiayi “Atumsha atumi enentái urukukit nuka nekamatsrume. ⁵⁶ Wi Aents Ajasu áentsun emesrattsan táchaitjai. Antsu uwemtikratajtsan táwitjai” tímiayi. Nuyá chíkich péprunam wearmiayi.

Jesus nemarsatin

(Mateu 8.19-22)

⁵⁷ Jintia weenai, chíkich áishman Jesusan chicharuk “Uuntá, tuí wétatam nuísha nemarsatjame” tímiayi.

⁵⁸ Tutai Jesus tímiayi “Kujanchmasha ni wáarín takaktsuk. Chínkisha pasúnken takaktsuk. Tura Wi Yusa Uchiríntiatan tepesan ayampratniur atsawai.”

⁵⁹ Chíkich áishman kan Jesus “Nemartusta” tímiayi.

Tutai nii chichaak “Antsu, Uuntá, winia apar jakamtai, iwiarsa ikiuakun nemarsatjame. Nu tsan kátrúktá” tímiayi.

⁶⁰ Tutai Jesus tímiayi “Jakaa ainia nu ni shuarín iwiarsatniunka enentáimtusarti. Tura ámeká weme Yus-shuar átin urukukit nu etserkata” tímiayi.

⁶¹ Nuyá chíkich tímiayi “Uuntá, nemarsataj tusan wakerajme. Túrashá wíi shuaran emka áujsan ikiuweartaj tsan kátrúktá” tímiayi.

⁶² Tutai Jesus tímiayi “Shuar arayát ukunmaaní apájas iimna nu, Yus akupeana nuí takaschamniaiti.”

10

Ni unuiniamurín setenta armia nuna Jesus etserkatarum tusa akupkarmiania nu

¹ Nuyá ukunam chíkich unuiniamurín setenta anaikiarmiayi Jesus. Tura jímiar jímiaran apatak émkítiarum tusa ashí péprunam ashí nun kanam ni wétin amia nuí akupkamiayi. ² Akupeak tímiayi “Nekas tájarme, Yus-Chicham étserkum, júuktinia núnisán, aents Yus-shuar awajsatin ti awai. Tura ¿yaki júukat, aya ishichik takainiasha? Tuma asamtai ni takarniuri akupkat tusarum Nerentin seatarum. ³ Wetarum. Átumka murikiua núninaitrume. Uunt yawá yujamua núnnium tsuumaí ámunam akupeajrume. ⁴ Yurumkasha, kuitcha, sapatcha júkiirap; shuarjai jintia áujmamsataj tusarum wajasairap. ⁵ Jeá wayakrum emka ju títiarum: “Ju jeanam pujuinia nuna Yus shiir awajsarti.”

⁶ Nérentin “Ee, nuna wakerajai” tákuinkia túrunattawai. Tura “Atsá, wakeratsjai” tákuinkia, “nuinkia túrunashti” titiarum. ⁷ Jeá wayattarmena nú jeanman pujustarum. Tura ajampramsattarmena nu yuatarum. Warí, takaana nu akinkiashtinkiait. Chíkich jeanam nui werum nui werum ajairap. ⁸ Awaintiamawartatna nú peprunam jearmeka ajampramsartatna nu yuatarum. ⁹ Jaa ainia nu tsuártarum. Túrarum “Yus ju nunkanam akupin ajastin ishichik ajatemsai” nu peprunmaya shuar titiarum. ¹⁰ Íksarmek itiaarmachartatna nú peprunam jearum, jintiá wajasrum ju titiarum, ¹¹ “Yusna nakitra asakrumin, atumi pépruriniá nunka ii nawen peema japirar akakekji. Túrasha ju paant nekaatarum: Yus ju nunkanam akupkatin ishichik ajatemsai.” ¹² Yusa nekapsatin tsawantri jeamtai nu peprunmaya shuaran ti asutiáttawai. Yaunchu Sutumanmaya shuaran asutiámia nujai nankaamas asutiáttawai. Núnaka paant tájarme tímiayi.

(Mateu 11.20-24)

¹³ Wáinkiatá, Kurasín péprunmayatiram. Wáinkiatá Pet-saitia péprunmayatirmesha. Atumí pépruriin aents tujintiamun ti túraitjai. Warí, yaunchu Tiru péprunmasha, Setun péprunmasha nu tujintiamu túramuitkuinkia yaunchu ni enentáin yapajjáwaraayi. Túrawar kúntuts pujutai pushin entsarar yunkunim ajakiaaraayi. ¹⁴ Tura atumsha aents tujintiamu túramu wáiniatrum yapajjachu asakrumin Tirunmaya tura Setunnumiá aentsjai nankaamas asutniáttarme. ¹⁵ Tura atumsha Kapernáumnumiatirmesha, “ti nankaamantu ajasar nayaimpiniam jeattaji” tu enentáimtsurmek. Maaj, antsu jaka matsamtainium jeattarme, auka” tímiayi.

¹⁶ Tura Jesus ni unuiniamurin junasha tímiayi: “Atumin anturtamainiakka Winiasha anturtuiniawai; atumin nakitramainiakka Winiasha nakitruiniawai; tura nú arant, Winia nakitrakka Winia akuptukua nunasha nakitiawai.” Tú áujas Jesus nin akupkarmiyai.

Setenta unuiniamu waketki táarmiania nu

¹⁷ Ukunam nu setenta unuiniamu warasar waketki táarmiyai. Tura chichainiak “Uuntá, ame náarmiin íwianch jiji akupeam umirtamkamji” tiarmiyai.

¹⁸ Tutai Jesus tímiayi “Ee, Wisha nayaimpinmaya peem peetna núnisan, uunt iwianch Satanásan akaiki iniaan wáinkiamjai. ¹⁹ Atumniaka winia kakarmarun susamjarme, napi najarmasha titin najarmasha yajauch awajtamsairum tusan; tura ii nemasri kakarmari nupetkatniuncha susamjarme. ²⁰ Túrasha íwianch umirtamkui nu enentáimsam

warasairap. Antsu atumí naari̇ nayaimpiniam aarma aa asamtai warastarum” tímiayi Jesus.

Jesus warasmiai̇

(Mateu 11.25-27; 13.16-17)

²¹ Nuĩkia ni enentáin Yusa Wakaní waramtiksam Jesus juna tímiayi: “Aparú, ashí nayaimpijiȧ nuńka Úntrinme; tuma asam ju túrunamu ti unuimiaru enentáimtumainia nuyá úukuitme; antsu uchichia núnis nańkaamantuchu enentáimtumainia nú shuar paant awajtusuitme. Ee, Aparú, núnik wakerichmakum. Tuma asamtai shiir enentáimtajme, Aparú” tímiayi.

²² “Winia Apar ashí surusuiti. Wisha ni Uchiri̇ asamtai Winia nékarui. Tura chíkich Winia nekas nekarainiatsui. Yus Apancha Wiki nékajai. Tura Wi wakeraj nú shuaran winia Aparun paant awajtajai. Nú shuarsha winia Aparun nékainiawai.” Tu tímiayi Jesus.

²³⁻²⁴ Nuyá ni unuiniamurĩn iis tímiayi “Wi tájarme, untsurí Yúsnan etserniussha tura uunt akupniussha átum yamá wáintrum nuna wáinkiatniun wakeruiniayatań wáinkiacharmiayi. Tura átum yamá ántarme nuna antuktinian wakeruiniayatań antukcharmiayi. Tura Yus achirmaku asakrumin, wáintrumna nu ti péńkeraiti” tímiayi.

Samarianmayȧ áishmań katsumkamun yaińmia nuna Jesus unuiniamiania nu

²⁵ Nuyá akupkamun jintinkiȧrtin Jesus warintiȧk chichakat tusa wajatki werimiayi. Werí iniimiayi “Uuntá, wi tuke iwiaaku átaj takun ¿warinia túratniuitiȧ?” tímiayi.

²⁶ Tutai Jesus ayak “¿Yús-Papinium Muisáis áarmanum waritia áarmait. Waritia enentáimiam?” tímiayi.

²⁷ Akupkamun jintinkiȧrtin ayak tímiayi “Juna tawai: Ti enentáimsam, tuke enentáimjȧ Uunt Yus aneeta. Ame kakarmaram, iwiaakmarmesha Yus íiktusta. Tura ame ayashim aneamna núnímek ame írutramurmesha aneeta. Núchakait” tímiayi.

²⁸ Tutai Jesus tímiayi “Péńker áimsame. Nu túrakmeka tuke iwiaaku átatme.”

²⁹ Tutai akupkamun jintinkiȧrtin ni anintramun kíštumaktajtsa wakerak “Winia írutramursha ¿ya ainia?” tímiayi.

³⁰ Takui Jesus tímiayi “Jerusaréńnumiȧ jintiȧ Jirikiú péprunam jeana nú jintianam áishmań wean, kasa áishmań tariar ni warirĩn, pushirĩncha kasarkarmiai̇. Tura katsumkar mayá̇ ashirak ajuantar ikiukiarmiai̇. ³¹ Tura Israer-shuar Patri ukunmań winis nu áishmańkan wáiniak aya íikiań iis ikiukmiayi. ³² Nuyá ukunam Patri yáintri̇sha

nu jintianam wesa, nu áishmaṅkan wáiniak, áyatik iis ikiuak wémiayi. ³³ Tura nuyá Samaria nunṅkanmaya áishmaṅsha nu jintianmaṅ wesa, nu áishmaṅkan wáiniak ní shuárinchunak wáitnéntamiayi. ³⁴ Nuyá nu áishmaṅkan weantuk ni numpamnamuriṅ asuitijiai tura wíniujai tsuar jaanchjiai penuarmiayi. Tura ni kawairiṅ ekenak jukimiayi. Tura írar kanutainiam jukí ejé nu áishmaṅkan péṅker wáinkiamiayi. ³⁵ Tura kashin tsawarmatai Samarianmaya áishmaṅ weak jimiara kuítian jusa jeá nérenniuriṅ susamiayi. Susa tímiayi “Ju áishmaṅ péṅker wáitrukta. Tura wi amaajna ju táasmataisha wi wáketkun akiktajme” tímiayi. ³⁶ Ayu, ámiijiaisha, nu menaintiu áiniana nu, ¿tuá imiá nekas katsumkamun waitnentramia?” tímiayi Jesus.

³⁷ Takui akupkamun jintinkiartin chichaak “Entá, katsumkamun wáitnentramia núa” tímiayi.

Tutai Jesus tímiayi “Amesha weme núnismek túrata.”

Marta ni kajijiai Marí jeen Jesus pujusmiania nu

³⁸ Nuyá Jesus jintiá wesa chíkich péprunam jeamiayi. Nu péprunmaya nuwá naari Marta ni jeen itiaamiayi. ³⁹ Marta kají ámiayi ni naari Marí. Marisha unuiniamun anturkataj tusa Jesusa nawen pujursamiayi. ⁴⁰ Tura Mártaka ni takatrin ti enentáimtak Jesusan weantuk tímiayi “Untá Jesusá, ¿winia kajir takatan winiak íktursainia nuka enentáimtsumek? Winia yáintá turuttia” tímiayi.

⁴¹ Tutai Jesus tímiayi “Maaj Martá, untsurí túratin ana nu ti enentáimsam itit awajtamui. ⁴² Tura aya chikichik nekas túratniuiti. Marikia nekas péṅker ana nuna achikiai. Nusha penké jurunkishtatui” tímiayi.

11

Jesus Yus áujsatniun unuiniamiania nu
(Mateu 6.9-15; 7.7-11)

¹ Chíkich tsawantaj Jesus Yúsan áujsatat tusa atsamunam pujumiayi. Áujsua amikmatai ni unuiniamuri chíkichik Nin tímiayi “Untá, imiakratin Juan ni unuiniamuriṅ unuiniamia núnismek Yus áujsatin unuitiurta.”

² Tutai Jesus tímiayi “Yus áujkuram ju titiarum:

Aparu Yus, nayaimpiniam pujamna nu, ii Aparínme. Ame náarmincha shuar ántar pachischarti. Ashí áentsnum ame akupkatin tsawantrum wari jeati. Ame wakeramuram nayaimpiniam umikma ana núnisan ju nunṅkanmasha uminkiatí. ³ Aparú, ii yurumkarí ashí tsawant amasta. ⁴ Tura winia nemasrun tsankurajna núnismek, Aparú, winia tunaaru tumashriha

tsaṅkurturta. Tunáa wakeruktin tsaṅkatrukaip. Antsu ashí tunaanumiā uwemtikrurta.”

⁵⁻⁶ Nuyá Jesus juna tímiayi. “Wats, ju titiái. Kashi ajapén amikrum werishtameash. Tura “Winia amikiur yajaya winia jearui yama tayi. Tura ajamsatniun penké takaksujai. Tuma asamtai amikru, menaintiu apatuk ajamprustá” tichatameash. ⁷ Tura nii inít pujusaṅ chichaak “Warí, wáitisha epenmi-aiti, tura winia uchirsha wijjai ashí tepeenawai. Itiur nantakniak amastaj. Itit awajtipia” turamchanpiash. ⁸ Wats, paant tájarme, niisha amikrum asa, nantaki ikiatmastinian nakitiayat, itit awajtin tusa nantaki ashí wakeramna nuna suramsattawai. ⁹ Tuma asamtai tájarme: Yus seatarum; túrakrumin suramsattarme. Eakrumka wáinkiatarme. “Wini-ajai” tákurmin awaintiamattarme. ¹⁰ Seana núnaka suíniatsuk. Eana nuka wáintsuk. “Winiajai” tuinia núnaka awainiatsuk.”

¹¹ “Wats, átum uchirtintiram, ame uchiram apatkun seatmakui ¿kayaash súsaintiam? Namakan seatmakui ¿napíash súsaintiam? ¹² Nujintian seatmakuisha ¿titiṅkiash súsaintiam? ¹³ Warí, átum imiá yajauchitirmesha atumí uchirí péñker ana nu tuke súchakaitrum. Atumí Aparí nayaimpiniam pujana nu, seakrumniṅkia nú naṅkaamas ni Wakanin suramsattawai.” Tu unuiniamiyi.

Jesusan “iwianchi kakarmarijiai túrawai” tiarmiayi
(Mateu 12.22-30; Márkus 3.19-27)

¹⁴ Shuar iwianchraku asa chichachu ámiayi. Nuna enentáyan nu iwianchin Jesus jiiki akupkamiayi. Íwianch jiinkimtai chichachu chichasmiayi. Túramtai shuar nui pujuarmia nu ti enentáimprarmiayi. ¹⁵ Tura chíkich tiarmiayi “Juka iwianchi kapitiantri Satanásan, ni chíkich naari Pirsepún umirniuiti. Tuma asa nuna kakarmarijiai iwianchin jiiki akupeawai.”

¹⁶ Tura chíkichkia, nekas Yúsnumiā taawashit tusar “Nayaimpinmaya kakaram ana nu iniakmasam aents tujintiamu túrata” Jesusan tiarmiayi.

¹⁷ Tura Jesus tu enentáimiainian neka asa tímiayi “Núu nunkanmayan shuar nuamtak kajernaiyakuṅkia nú núnka wárik meserchattawak; nuamtak shuarsha ni shuarijiai kajernaiyaksha amunaikchartatuak. ¹⁸ Wíniaka “Pirsepú iwianchi kakarmarijiai iwianchin jiiki akupeawai” túruttsurmek. Tuma asamtai tájarme, uunt iwianch Satanás naartin, ni suntarijiai kajernaiyaksha ¿itiur tuke kakaram átiñkí? ¹⁹ Tura Wi Pirsepú kakarmarijiai iwianchin jiiki akupeakuṅkia, atumí shuarisha ¿yana kakarmarijiaín iwianchin jiiki akupena? Niisha “iwianchi kakarmarijiai túrichuitji” tuiniaisha ¿itiura Winiasha,

“iwianchi kakarmarijijai túraiti” turutminiaitrum? ²⁰ Wikia Yusa kakarmarijijai iwianchin jiiikin akupeajai. Nu nekaarum Yus atumi enentáin akupin ajasuana nu nékarme.’

²¹ ‘Kakaram áishman kúishtumaktajtsa iwiarnar wajas jeen wáinkui, ni wariri init ana nusha tímiatrusan áiniawai. ²² Antsu nijijai nankaamas kakaram ana nu winiakka nupetkashtat-uak. Tura kúishtumaktinian iwiar takakman jurawai. Tura kasamkámun ni amikrin súawai. Kakaram áishman iwianchin nakumeawai. Tura nujai nankaamas kakaram áishman Winia nakumprawai. ²³ Iista. Winia nemartatsna nu winia nemasruiti. Núnisan Winia yáintsuna nuka aya itiurchat nájateawai.’

Iwianch jiiki akupkamuitiat wáketna nuna ujakmiania nu (Mateu 12.43-45)

²⁴ Nuyá Jesus juna tímiayi: ‘Shuara enentáiya iwianch jinki ayamprataj tusa yumi penké yútatsna nuí wéawai. Tura ayampratniun wáincha asa ataksha waketkitniun enentáimui. “Wi jíinkimijai nuín waketkitjai” tawai. ²⁵ Tura waketki pénger iwiamun tura ankant aan wáiniui. ²⁶ Nuna wáiniak, ni ain siati iwianchin nijijai nankaamas yajaunchin itia enkemáwartatui. Túrunamtai nu shuar nuiki nuna nankaamas yajauch ajastatui.” Tu tímiayi Jesus.

Nekas warastin

²⁷ Shuar iruniarmia nuí Jesus nuna chichaa pujai, nuwa unsumuk “Ame nukun Yus ti yáinkiai. Ni ampujén ame pujuschamkam. Ámin amuntstamachmakam” tímiayi.

²⁸ Tutai Jesus tímiayi “Antsu ni chichamen antukar umi-rainia nuna, nukurjai nankaamas Yus ti yáinkiaru áiniawai, tajai” tímiayi.

(Mateu 12.38-42; Márkus 8.12)

²⁹ Shuar untsurí Niin káunkarmatai Jesus tímiayi “Yamaiya shuarka yajauch áiniawai. Yajauch ásar, chichartuiniak “Nekas Yúsnumáitkiumka aents tujintiamua nu túram Yusa kakarmari iniakmasta” turutainiawai. Túrasha áyatik yaunchu Junas túrunamujai iniakmasmia nujain nekaatin áiniawai. ³⁰ Kame Junas túrunamujai Níniwi péprunmaya shuaran yaunchu Yus ni kakarmarin iniakmasmia núnisan yamaisha Aents Ajasu tutainjiana nu Wi túrunamujai Yuska ni kakarmarin iniakturmastatrume. ³¹ Yaunchu Sarumún uunt akupin pujai Sepa núñkanmaya nuwa akupin Sarumunka chichamen nekaataj tusa ti jeashtanmaya támiayi. Tura yamaikia Sarumunjai nankaamas pujai átumka anturtatsrume. Tuma asamtai Wi tájarne, Yus ashí shuaran nekapsattana nu tsawant jeamtai nu nuwa,

akupniun péⁿker anturka asamtai, Yus íimianum péⁿker átatui. Antsu atumsha Winia anturtukcha asakrumin Yus íimianum yajauch átatrume. ³² Tura Yúsna etserin Junas Níniwi péprunmaya shuarnum Yus Chichaman etserkamtai nu shuar ni tunaarín enentáimtusar enentáin yapajjáwarmiayi. Tura jui yamá Junasjái nan^kkaamas etserin pujajái. ¡Tuma asamtai nekapsatin tsawant jeamtai Níniwinmaya shuar yamaiya shuar árumna nuna sumamtikramattarme!’

Ayashí tsáapnintrí

(Mateu 5.15; 6.22-23)

³³ ‘¿Shirikip ekeemakar úuktinkiait? Pitiaknumsha en^kkeashtiniaiti. Antsu shuar jeá wayana nu paant íimsat tusar yakí ekensatniuiti. ³⁴ Ame jii^mmijai wáinkiam nujai wekasatin nekaattame. Tuma asamtai ame jii^mmijai péⁿker ana nu wáinkiumka péⁿker wekasattame; antsu ame jii^mmijai yajauch ana nu wáinkiumka, kiritniunam wekasatniua núnisaⁿ yajauchiniam wekasattame. ³⁵ Anearta. Enentáimin tsáapin ana nu kiritin ajaschati tusam anearam wekasata. ³⁶ Ame ayashmiiⁿ kirit ajatsuk aya tsáapniniaitkiuinkia, shirikip paant awajea núnisaⁿ ashí paant wáinkiattame” tímiayi.

Pariséuncha, Israer-shuara jintinniurisha “yajauchiitrume” tímiayi Jesus

(Mateu 23.1-36; Márkus 12.38-40; Rúkas 20.45-47)

³⁷ Jesus chichasua amikmatai Paríséu shuar, winia jearui yurumáitia tusa untukmiayi. Tutai Jesus wayá misanam pujusmiayi. ³⁸ Tura Israer-shuar ikijmiartin ana nuna túrutsuk aya pujakui Paríséusha nuna wáiniak “maa ¿urukamtia tura?” tu enentáimsamiayi.

³⁹ Tura Uunt Jesus tímiayi “Pariséutirmeka atumí yurum-tairí aya pátatek ni^jia^ktin tí wakeriniaitrume. Atumsha nu yurumtaijii^jai méteketrume. Pátatek péⁿker túrarme. Tura atumí enentáinkia kasamkatniusha tura yajauchia nusha piakuⁱti. ⁴⁰ ¡Enentáimcha! Warí, ashí pátatek wáini^jai nuna Yus najanachmakia; tura init paantcha ana nunasha Yúsak najanachmakia. ⁴¹⁻⁴² Aneartarum, Paríséutirmesha. Aya nuka méntasha, anissha tura aya apatkusha Yus súsatin tí enentáimprume. Nukasha tsuriasrum apatkusha tias ana nuyá chikichik achikrum, Yúsnaⁱti tátsurmek. Tura antsu nu túratin iniaitsuk péⁿker wekasatniusha, Yus anenmarmena nusha péⁿker enentáimsatniuitrume. Wats init, enentáimin ana nútiksarmek jusam susarta. Nuinkia ashí chamir átatui.’

⁴³ ‘Tura aneartarum Paríséutirmesha. Yus áujtai jeanam pen^kkerí pujutainium pujustin wakerarme. Tura jintiá aents íimiainiamunam tí shiir áujtusarat tusarum wakerarme.’

44 ‘Jintinniutirmesha, Paríséutirmesha mái-metek aneartarum. ¡Antar shiir chichamtinia! Iwiarsamu paantcha núniniatrum. Shuar nu nan̄kaamaksha nájamiat nékatsui. Núnisan̄ shuar atum̄i chichamē antukar yajauchia nuna nekartamtsurme.”

45 Nuikia Israer-shuara jintinniur̄i chikichik Jesusan chicharuk tímiayi “Uuntá, nu tákum incha yajauch chichareame.”

46 Tutai Jesus tímiayi “Atumsha jintinniutiram aneartarum. Atum̄i akupkamur̄ijjai káarak ti kijin entsakchamnia súarme. Tura átumka yáintaj tusarum atum̄i uwejejaisha pen̄ké ántiatsrume.”

47 ‘Aneartarum tájarme. Yaunchu atum̄i uuntri Yúsna etserniun máawarmia nuna iwiarsamur̄i átum jeamniuitrum nu etserin ti pen̄ker ásarmatai kajinmatkishtin. 48 Nu túrakrum atum̄i uuntri túrawarmia nu, “yajauchichuiti” tarume. Warí, niisha máawarmiayi, tura atumsha máawarai táyatrum niijjai méteketrum. Warí, Yúsna etserniu iwiarsamur̄in jeamkura atumek sumamarme.’

49 ‘Atum̄i túramur̄in nekáa Yus juna yaunchu tímiayi: “Winia etserturniun tura winia akatramurnasha niin̄i akuptukartatjai. Túramtai chikichnaka máawartatui, tura chikichnaka pataatukartatui.” 50 Tuma asamtai ashí ni etserniur̄in maamu ainia nuna, yamaiya áentstirmin Yus sumamtikramattarme. Nun̄ka najanamunmaya jukí 51 yamáí ímiajai maamu ainia nuna, kame Apir maamunmaya jukí yamáí Sakarías maamua tímiajai anintrustatui. Namañ maar Yus sutai ámanum tura Yus-jea ámanum ajapén atenkamunam máawarmia nú Sakaríasan tajai. Nu tuma asamtai tájarme, ni etserniur̄i maantam Nawarmia nuna yamáí matsatrumna nútirmin aninmasartatui.’

52 ‘Jintinniutiram aneartarum. Waiti asakatniua núnisrumek nekas nekaatin surimiarme. Atumkesha nékatsrume. Tura nekaataj tana nusha suritiarme” tímiayi.

53-54 Jesus nuna takui Paríséusha, jintinniusha ti kakerkarmiayi. Tura nii tana nujai “yajauch túrame” titiai tusar wakeruiniak untsur̄i anintriarimiayi.

12

1 Nu tumaj shuar ti untsur̄i káunkarmiayi. Ti kaunka ásar nawen̄ mai-najatnai ajarmiayi. Tura Jesus ni unuinia-mur̄in tútan juarkimiayi. “Pariséu ántar chichamtin áiniawai. Nuka wakaprutaiya núnisaiti. Wakaprutaikia nijiamanch yumirniun yama en̄keam páantchaiti. Tura ukunam nekaamniai. 2 Núnisan̄ ashí paantcha ana nu iwiainiakma átatui.

Uukma ana nusha nekaamu átatui. ³ Nu tuma asamtai, kiritni-unam tímiarmena nusha tsawái tsáapin ajasmanum antunkat-tawai. Tura jea init pujusrum ishishmasrum tímiarmena nusha áa ti paant etsernaktatui.'

Yusak ashamkatniuiti
(Mateu 10.28-31)

⁴ 'Amikrutiram, aya ayashmin main ainia nu ashamkairap, tájarme. Ayashmin maa nú arantka máashtatui. ⁵ Tura ya nekas ashamkatniuitrum, nuna paant jintintiattajrume. Ame ayashmi maa, nuyá ámin jinium akuptamkatniun tujintiatna nu ashamkatarum. Ee, Yus ashamkatarum, tájarme.'

⁶ 'Jimiará chin̄ki ishitiúpchich ishichik kuitjai surukchat-niukait. Túrasha Yussha nu chin̄kin pen̄ké kajinmatkishtatui. ⁷ Wats, ashamkairap. Untsurí chin̄kijiai nan̄kaamas Yuska atumin enentáimturmarime. Warí, ame intiashmin mash Yus nekapmaruiti.'

(Mateu 10.32-33; 12.32; 10.19-20)

⁸ 'Ashí shuar ashí íimiainiamunam Winia Aents Ajasu tutain, Winia natsantruiniatsna núnaka, Wisha Yusa suntari íimiainiamunam natsantrashtatjai; ⁹ antsu shuar íimiainiamunam Winia natsantrana núnaka Wisha Yusa suntari íimiainiamunam natsantrattajai.'

¹⁰ 'Winia, Aents Ajasu tutain, shuar yajauch chichar-takuinkia nusha tsan̄kuramniaiti, tura Yusa Wakan̄ncha yajauch chicharkuinkia nuka pen̄ké tsan̄kurachminiaiti.'

¹¹ 'Wats, Israer-shuar iruntai jeanmasha, tura Israer-shuar kapitíánniumsha, uuntnumsha juramainiakui, anin-mainiakuishá warintiajak tusam ti enentáimsáip. ¹² Ame áimkiatin jeamtai, Yusa Wakan̄i ame títiatmena nuna jintintra-mattawai," tu timiayi.

Kuítia enentáimtuschatniuitji

¹³ Chíkich áishman̄ Jesusan tímiayi "Uuntá, ii aparí ikiur-tamkimiaj nuna yatsur winiasha nakak surustí, titia" tímiayi.

¹⁴ Tutai Jesus tímiayi "Áishman̄ka, atumin nu túratin anaikia-mukaitiaj."

¹⁵ Nuyá tímiayi "Pénker enentáimsatarum. Nii takakna nújain̄ shuar iwiaaku, áchatniuiti. Tuma asamtai kuítrintin ajastin aya nuke enentáimsaip."

¹⁶ Nuyá juna métek-taku chichaman unuiniak tímiayi:

"Kuítrintin áishman̄ ni ajariyan arakan ti nukap juukmai. ¹⁷ Tura "¿Ti nukap asamtai tuin̄ ikiustaj. Itiurkatjak?" tu enentáimsamiai. ¹⁸ Wats, wi nékajai. Winia ikiutái-jeaun ashiran nú nan̄kaamas úuntan najanatjai. Tura nuí ashí ik-iustajai. ¹⁹ Nuinkia untsurí uwitin shiir pujustinian ikiusman

takustatjai. Tuma asamtai, ayampran, yurumán, umaran shiir pujustatjai” timiai.’

²⁰ ‘Tura Yus nin chicharuk timiai “Netse. Yamái kashi jakattame. Nuñkia imiá núkap ikiusumna nusha ¿yana átata?” timiai” tímiayi.

²¹ Nuyá Jesus tímiayi “Shuar nin̄ki kuítr̄in ikiauntumna nu, núnisaiti. Túrasha Yusj̄ai íismaka kuítr̄inchaiti.”

Yus ni uchir̄in péñker wáinkiaiti

(Mateu 6.25-34)

²² Nuyá ni unuiniamur̄in Jesus juna tímiayi: “Warí yuarik pujustaj̄i tura war̄in entsartaj̄i tusarum nuke ti enentáimsairap. ²³ Yus iwiaaku átinian amasu asa yurumkancha amastatui. Tura ju ayashniasha najana asa entsataincha amastatui. ²⁴ Ch̄inkisha enentáimsatarum. Niisha arakmainiatsui. Juuk yurumkan ikiuiniatsui. Tuma aiñ Yuska ni yurumátniur̄in tuke súawai. Atumsha ch̄inkia nú nan̄kaamaschakaitrum. ²⁵ Tura ya shuarak, ti enentáimtana nuj̄ai nú naya ajasminiait. ²⁶ Kame yúpichuch ana nusha túrachminiatiatrumsha, ¿urukamtaí ch̄íkich ainia nusha ti enentáimtarum?”

²⁷ ‘Íistá, kukujsha takaachitiat tura nájanchitiat ti shíirmach áiniawai. Yaunchu akup̄in Sarumún̄ ti shiir iwiarmamniuitiat kukujia tímianchaupyai. ²⁸ Iis, nupa yamáí tsakaawai tura kashin aents tsupikiar jiniun apeánawai. Tuma aiñ Yus ti shiir awajeatsuk. Nuna tura asa atumniasha nú péñker wáitmakchattawak. ¿Urukamtaí Yus nekas enentáimtatsrum? ²⁹⁻³⁰ Ju nun̄kanam ana nu ti pach̄iirap. Ch̄íkich shuar, Yúsán nékainiatsna nu, war̄in yuataj̄i, war̄in umartaj̄i nuna ti pach̄iniawai. Tura atumsha tu enentáimsairap. Urukatjak, ti-irap. Ame Apa nayaimpiniam pujana nu, ashí atsumarmena nuna nékawai. ³¹ Antsu emka Yusna nu enentáimtustarum. Túrakrumnin̄kia atsumamna nuna Yus suramsattawai.’

Kuítian pachis Jesus unuiniamiania nu

(Mateu 6.19-21)

³² ‘Winia murikrutiram ashamkairap. Untsur̄ichuitrume. Túrasha atumí Apar̄i ni akuptair̄iñ pachitmaktsa ti wakerutmarme. ³³⁻³⁴ Kuítrum tuj̄ aa, nuñ tuke enentáimtittiarume. Tume asamtai takakrumna nu surukrum atsumainia nu susatarum. Nuka en̄ketai arut ajatsna nuñ en̄keatniua núniskete. Túrakrum nayaimpinmaya kuit amuatsna nu íkiauwearme. Nuñsha kasa nu kuitian kasamkataj tusa wayach̄miniaiti, tura kayaasha nu kuitian yúatniun tuj̄intiawai.’

Anearar wekasatniuitji

³⁵⁻³⁶ ‘Ju enentáimsatarum. Ni uuntrī nuatnaikiatin námpernumiá taa, “uraitia” takui, takarn̄iur̄i jinia ekeemakar

wárik urattiai tusar nakáa pujuiniawai. Atumsha núnisrumek Wi atumi Uuntri támarai, shiir itiaatai tusarum anearum wekasatarum. ³⁷ Ni uuntri taak iwiáa pujuinian wáinkiarai nuka shiir pujuiniawai. Nu úuntak iwiar, “misanam pujustarum” ni takarniurin títiatui tura yurumkan súsartatui. ³⁸ Kashi ajapén taaksha tura tsawaana ai taaksha ni takarniurin iwiáa pujuinian wáinkiuiŋka, nu takarin shiir pujuiniawai. ³⁹ Tura jusha nekaatarum. Jeennia nu, kasa tátinian nékaitkiuŋka, iwiáa pujusayyi. Kasa wayá kasamkatniun suritkiayyi. ⁴⁰ Atumsha núnisrumek, anearum pujustarum. Wi Aents Ajasu tutai aya aneachmanum tátatjai” tímiayi.

Pénker takarin yajauch takarniujai
(Mateu 24.45-51)

⁴¹ Nuyá Pítiur aniasmiayi “¿Aya ínkik unuiniartaj tusam nu métek-taku chicham támek. Kame ashí nekaawarat tusamek tame?” tímiayi.

⁴² Tutai Jesus tímiayi “Atumsha pénker takatan wáinnia núnisketrume. Takatan wáinin ni uuntri takatrin takainia nuna, yurumátin jeamtai, ayurkamna núiti ni úuntrin shiir umirna nu, tura pénker enentáimtana nu. ⁴³ Ni uuntri taa, takatrin tímiatrusan túran wáinkiuiŋka nu wáinniusha shiir enentáimsamniaiti. ⁴⁴ Umirin asamtai, ni uuntri ashí ni waririn wáitrukat tusa apujsattawai. Nuna paant tájarme. ⁴⁵ Tura nu takatan wáinniusha “úuntur wau táchattawai” tu enentáimias, ni uuntri takarniurin yajauch awajeakuiŋka tura niŋki ti yurumá, ti umar nampeakuiŋka, ⁴⁶ nuiŋka ni uuntri ni nákachmanum aya aneachma taa ti asutiáttawai. Umichu pujuinia nui akupkattawai.’

⁴⁷ “Takaran ni uuntri wakera nuna nékayat, iwiartsuk umit-suk pujakka ti awatramu átatui. ⁴⁸ Túrasha takarin nékachusa, asutniámnia túrakka, ishichik awatnartatui. Núkap susamu ana núnaka núkap seawartatui. Núkap ataksamu ana núnaka núnisan nankaamas seawartatui.’

Jesusjai shuar akannartatui
(Mateu 10.34-36)

⁴⁹ Jijiai nekapsatniua nútiksanak nunkanam jinia ikiapartaj tusan tamajai. Tura túrunat tusan ti wakerajai. ⁵⁰ Imiantinia núnisan itiurchat ukatrúktatui. Nusha wárik amuukat tusan ti wakerajai. ⁵¹ “Ashí shuar shiir pujusarat tusa táwiti” tu enentáimturumek. Núchaiti. Antsu shuar tesanairat tusan táwitjai. ⁵² Yamái jukimiutak chikichik shuarnum seŋku ainia nu akannakartatui; menaintiu shuar ni shuarin jímiaran nakitrartatui. Jímiarsha ni shuarin menaintiun nakitrarta-tui. ⁵³ Apasha ni uchirin nakitrattawai. Núnisan uchisha ni

aparín nakitrattawai. Nukusha ni nawantrin nakitrattawai, nawantrisha nukurín nakitrattawai. Tsatsarisha ni najatín nakitrattawai; najatísha tsatsarín nakitrattawai.”

(Mateu 16.1-4; Márkus 8.11-13)

⁵⁴ Jesus áentsun chicharuk junasha tímiayi “Atumsha nantu akaatainmaani k̄armatai “yutuktatui” tátsumek. Nusha nekas tárume. ⁵⁵ Tura anaarania nase násenkamtai “séejik átatui” tárume. Tura nekas tárume. ⁵⁶ Yurañminmasha nunkanmasha túruna nu nékarme. Túmaitiatrumsha ju tsawan-tai túrunattana nusha ģitiura nékatsrum? ¡Maaj, áñtraitrume!”

Nemasrumjaisha nawamnaikiata

(Mateu 5.25-26)

⁵⁷ “Túrasha péñker ana nusha ģurukamtai atumek enentáimsarum wáintsuram? ⁵⁸ Irutramuram úuntnum júramkuñkia jintia wésamek “nuamtak iwiarartai” titiá. Túrachkumññkia akupniunam juramkittieme. Tura niisha suntarnum auptamkattame. Tura niisha sepunam enketmattawai. ⁵⁹ Tura nekas tajai, nu ģenkemamka ashí rearchisha akikmachkumka ģiinkishtatme” tímiayi.

13

Ii enentái yapajiátniuitji

¹ Nu tsawantin chícham ujaktai tusar Jesusan tariarmiayi. Kariréa nunkanam Israer-shuar ni waakarín máawar Yus susatai tusar pujuiniaí, Piratu nin maa, nuna numpen waaka numpejai pachimpramun ujakarmiayi. ² Tura Jesus tímiayi “Ĵwarí enentáimsarum? Kariréanmaya áishman tárumna nu, chíkich Kariréanmaya áishmanjai nankaamas yajauch ásar túrunawarai ģtu enentáimprumek? ³ Atsá; atumí enentái yapajiáchkurmeka núnisrumek atumsha jakattarme. Nuna paant tájarme, tímiayi. ⁴ Tura tiasiúchu áishman yakí jea Seruí kupiniak iniaak nekenkarmiania nu, ģwarí enentáimtarum? Chíkich Jerusaréñnumia shuarjai nankaamas tunáa ásar túrunawarai ģtu enentáimprumek? ⁵ Atsá, tájarme. Atumí enentái yapajiáchkurmeka núnisrumek atumsha jakattarme.”

Iikiu numi nereatsna nu

⁶ Junasha Jesus métek-taku chichaman tímiauyi. Júiti:

Shuar ni ajariin íikiu numin araamun takakuyi. Nerekchi-ash tusa iyumai. Túrasha nere atsumai. ⁷ Nuñkia ni ajarin wáinniun timiai “Antukta, menaintiú uwitin juna nere átai tusan waketrú pujajai; túrasha penké wáinkiachjai. Ajakta. Ĵurukamtai áñtrash wajastata?”

⁸ Tutai ajá wáinin timiai “Atsá, uuntá; ju uwitin wajastí. Wajamurín takarsatjai tura péñker nunkan matsatkatjai. ⁹ Nujai

nerekchampiash. Tura tuke nereachkuĩkia nuĩkia ajakta” timiai”, tímiayi.

Nuwan punuá kaarun Jesus tsuármiania nu

¹⁰ Ayampratin tsawantai Israer-shuar iruntai jeanam Jesus unuiniak pujumiayi. ¹¹ Nuisha nuwa pujumiayi. Nu nuwasha tiasiúchu uwitin tuke jaa pujumiayi. Íwianch nin yajauch awajas apuna tuke ikiaramiayi. Túramu asa paṅkái nakuenkataj tukamá penké tujinmiayi. ¹² Jesus nuna wáiniak, chicharuk “Nawantrú, ame jaamurmiya ankant ajasume” tímiayi.

¹³ Nuna tinia ni uwejejai antiṅmiayi. Tura nú chichamaik nuwasha paṅkái nakuenkamiayi. Tura Yusa náarin uunt awajsamiayi. ¹⁴ Tura Jesus ayampratin tsawantai tsuaru asamtai, iruntai jea uuntri kajek iruntrarmia nuna tímiayi “Sais tsawantin takaschatniukait; ayampratin tsawantai tsuámartaj tusarum táchatniuitrume. Sais tsawant ana nui tátiniaitrume.”

¹⁵ Tura Jesus tímiayi, “¡Ántar chichamtinia! ¿atumi waakarisha atumi umpuururisha yumi aartai tusarum ayampratin tsawantin atíarum júatsrumek? ¹⁶ Tura ju nuwasha, atumi shuari Apraám shuarnumiá akiiniaiti. Nii tiasiúchu uwí Satanás yajauch awajsamujai jinkiamuyayi. Nincha ayampratin tsawant ain yajauch awajsamunmaya atiachminkiait” tímiayi.

¹⁷ Jesus nuna takui ni nemasrisha natsaārarmiai. Tura penké shuar ni péñker túramurin wáinkiar warasarmiai.

Mustasa jinkíai

(Mateu 13.31-32; Márkus 4.30-32)

¹⁸ Nuyá Jesus tímiayi “¿Yusa akupeamuri warijjain métek-takuit? ¹⁹ Mustasa jinkíaijjai métek-takuiti. Mustasa jinkia-aincha shuar ni ajariin araamiayi. Tsapái, tsakaak, uunt numi ajasmiayi. Ti uunt asamtai chiniki ni kanawen pasunmarmiai.”

(Mateu 13.33)

²⁰ Tura junasha tímiayi: “¿Yusa akupeamuri warijjain métek-takuit? ²¹ Tanta wakaprutaia métek-takuiti. Arinia núkap ana nui nuwa wakaprutain ishichik enkeámiayi. Túram ashí wakapruamiayi.” Tu tímiayi.

Yupikiach waiti

(Mateu 7.13-14, 21-23)

²² Jesus Jerusarénum jeattsá weak untsurí peprunam wayá unuiniarkutak wémiayi. ²³ Weai chíkich shuar aniasmiayi “Uuntá, ¿uwemainia nu ishichikiait?”

²⁴ Tutai Jesus tímiayi “Yupikiach wáitiniam wayataj tusam ti wakeritiarum. Kame untsurí wayataj tusar wakeriarta-tui, túrasha tujinkiartatui, tájarme. ²⁵ Jeá nérenniurí wáitin epenmiatai, atumsha aa wajarum nu, wáitiniam wajasrum untsúakrum “Uuntá, uratritia” títiatrume. Túrasha “Nékatsjarme. ¿Tuyantskaitrum?” turamtatrume. ²⁶ Nuyá átum títiatrume “Túrasha, uuntá, iisha ámijíají yurumámji, ámijíají umarmaji. Tura ii pépruríncha unuiniamame.” ²⁷ Túrasha nii títiatui “Tuyantskaitrum, nékatsjarme, tátsujrumek. Yajauch túrintirmeka winiyanka kanaktiarum.”’

²⁸ ‘Nuyá Apraámsha, Isaksha, Jakupsha tura ashí Yúsnan etserin Yus akupeana nuí wayawaru wáinkiarum tura aa ajapam pujusrum ti úutkuram naim tásarara ajattarme. ²⁹ Tura Yus akupeana nuí, nantu tatainmaaniyasha nantu akaatainmaaniyasha, arakiasha, nunkaaniyasha taar, imia Israersh-uarchaitiat yurumátai tusar pujusartatui. Tura atumsha, “Apraám shuáraitjai” táyatrume, wayashtatrume. ³⁰ Nuísha yamáí ukunmaani ainia nusha emka ártatui; tura yamáí emka ainia nusha nuísha ukunmaani ártatui.”’

Jerusarénumaani Jesus wémiayi

(Mateu 23.37-39)

³¹ Nu tsawantaj Paríséu aents Jesusan tariar tiarmiayi “Erutis mantamattsa wakerutmawai. Tuma asamtai juyanka wetá.”

³² Tutai Jesus tímiayi “Werum nu kujancham ju titiarum: “Íístá. Yamaisha ishichik tsawant iwianchin júikin akupkartajai; túran jaancha tsuáartajai. Tura ukunam amuktatjai.”

³³ Tura Jerusarénumaani ishichik tsawant tuke wétiniaitjai. Yúsnan etserin aya Jerusarénuman jákatniuiti.’

³⁴ ‘Jerusarénumaitiram, Yúsnan etserin máiniaitrume; tura Yus akatar akupturmakmania nusha kayajají tukurum máiniaitrume! Tuma aín atash ni shiamprín etektana núnisnak Wisha weaktasan wakerimjiarme, túrasha nakitramarme.

³⁵ Iistarum. Atumniasha Yus ajapramaitrume. Tura “Yusa náarijn winiana nu, shiir atí” títiatrume nú tsawant jeatsain penké wáitkiashtatrume. Nuna tájarme” tímiayi Jesus.

14

Áishman eaak-jaan Jesus tsuármiania nu

¹ Ayampratin tsawantaj Paríséu uuntri jeen Jesus yurumáttsa wémiayi. Tura chíkich Paríséu wariniak túrat tusar ii pujuarmiayi. ² Nuí áishman eaak-jaa Jesus pujamunam naka pujumiayi. ³ Jintinniuncha Paríséuncha Jesus aniasmiayi “¿Warí tárú? ¿Ayampratin tsawantaj jaa tsuárminkiait. Tsuárchamniakait?” tímiayi.

⁴ Tura niisha áimtsuk pujuarmiayi. Nuĩnkia jaan antin tsuármiai. Tura “shiir wetá” tímiayi. ⁵ Nuyá Paríséun chicharuk, “Atumí umpuurarisha, waakarisha waa táurmanum akaiki iniamtai, ayampratin tsawant ain nu chichamaik júatsrumek” tímiayi.

⁶ Takui áimkiatniun penké tujinkiarmai.

Nuátnaikiatin nampernum ipiaamu ármia nu

⁷ Ipiaamusha penkeri pujutainium pujustaisar ti wakeru-iniakui, Jesus nuna wáiniak juna jintintramiayi:

⁸ “Nuátnaikiatin nampernum penkeri pujutainium puju-saip. Nui pujakminkia, chíkich ámijiai nankaamas penkeri táchatpiash.”

⁹ Tura ipiatmania nu chichartamuk “Chíkich iiktusta” turamchatpiash. Nuĩnkia chíkich nánkatkamu pujutainium wéakum natsartatme. ¹⁰ Antsu ipiatmakmin, nánkatkamu pujutainium pujustá. Nuĩnkia ipiatmamnia nu chichartamuk “Amikru, ámeke jui penkeri pujutainium pujustá” turamta-tui. Nujai chíkich ipiaamu ainia nu, “nekas penkerinti” turamartatui. ¹¹ Iimiata, “penkerintjai” tu enentáimtuma nuka péechach awajnastatui. Tura ímianchach enentáimtúmana nuka waantu ajastiniaiti.”

¹² Nuyá Nin ipiaamua nuna chicharuk tímiayi “Ame-sha yurumáiti tusam untsuktajtsam wakerakmeke, ame amikrumsha, yatsumsha, ame shuarumsha, írutramuram kuítrintin ainia nusha ipiaawaip. Nii ipiaamka, ataksha íksan ámin ipiatmashtatuak. Nujai akikma átatme. ¹³ Antsu yurumáiti tusam untsuktajtsam wakerakmeke, kuítrincha, wekaicha, shutuapsha, kusurusha ipiaawarta. ¹⁴ Niisha akirmaktinian tujintiainiawai. Péñker shuar nantakiartatna nui akinkiattame. Nu tuma asamtai warastatme” tímiayi.

Uunt namperan Jesus nekapmá chichasmiania nu

¹⁵ Nu misanam pujuarmia nuya, chikichik Jesus chichaa-mun antuk, Jesusan tímiayi “Yus akupeamunam pachiiniak, yurumkunka ti shiir ainti.”

¹⁶ Nuna takui Jesus juna jintintiamiayi: “Áishman nam-peran nájanuk, untsurí shuaran taartí tusa akatar akupka-mai. ¹⁷ Yurumátin jeamtai “Winitiarum, yurumátin jeayi” tu tiarta tusa ni takarniurin akupkamai. ¹⁸ Tura winichmini-aitji tusar ashí ujakarmai. Chíkich timiai “Nunkan yamá sumarmakjai. Iyutaj tusa wéakun winishtatjai. Tsankurturti” timiai. ¹⁹ Tura chíkich chichaak “Wisha tias waakan sumarmakjai. Nekapsatsan wakerajai. Tuma asan winishtatjai. Tsankurturti” timiai. ²⁰ Tura chíkich chichaak “Yamá nu-atnaikiai. Tuma asan winishtatjai” timiai. ²¹ Takarin

waketki ni úuntrín ashí nuna ujakmai. Nuna antuk niisha kajekmiayi. Tura ni takarniurín timiai “Ju péprunam péñker jintianmasha tura uchich jintiachinmasha weme, kuítríncha tura wekaichasha, shutuapsha, kusurusha itiaarta.” ²² Nuyá ukunam ni takarniurí taa chicharuk “Uuntá, ame turutmi-amna nútiksanak túramjai; túrasha tuke ankant awai” timiai.’

²³ “Tutai ni uuntri chichaak “Jintianam weme, chíkich jintiachiniam weme, wáinmena nu ashí awayawarta. Winia jearui piakat tusan wakerajai. ²⁴ Emka ipiaawarmajnia nuka penké chikichkíksha winínkia yurumáchartatui, tajarme’ tímiayi.”

Kristu nemarsatin yúpichuchichuiti

²⁵ Untsurí aents Jesusjai irunki wearmiayi. Niisha nuna apajas iis juna tímiayi:

²⁶ “Shuar ni aparíncha, ni nukuríncha, nuaríncha uchiríncha, yachíncha, umajíncha Wijiai nankaamas enentáimtakka, tura shiir pujustinian wakerak Winí winitniun nakitiakka winia unuiniampur ajaschamniaiti. ²⁷ Ni wakeramurín ajakeak ni krusrj yanakí nemartatsna nu winia unuiniampur ajaschamniaiti.’

²⁸ ‘Jea yakí jeamtaj tusam wakerakmek, kuítian urutmak ajapawaintiaj tusam tura urutmajaink’ amukaintiaj tusam emka enentáimsashtatmek. ²⁹ Túrutsuk aya ukura ini-aisam amuktin tujinkiakminkia, nuna wáiniainia nu, wishiki-ainiak juna tiartatui: ³⁰ “Íiskua. Nu shuar jeamtinian nankamamiayi. Túrasha amuktinian tujinkiamiayi.”’

³¹ “Tura uunt kapitíán chíkich kapitíánjai mesetan najatin áchatpiash. Emka, niisha pujus, tias mir (10.000) suntarjai painti mir (20.000) suntar winiana nuna nupetkaint-jash tusa enentáimsashtatuak. ³² Tujintiakka, chíkich kapitíán jeachat pujaanak, nawamnaikiatai tusa akatar akupkash-tatuak. ³³ Wats, “Kristu unuiniampurí ajastinjai, wi takak-jana juna warí winia itiurtawa” tu enentáimsatniuitrume. Túrachkurmeka winia unuiniampur ajastin tujinkiarne.’

Wee michumarka yajauchiiti

(Mateu 5.13; Márkus 9.50)

³⁴ ‘Weeka jeaku péñkeraiti. Tura michumarka ¿itiurak atak péñker ati? ³⁵ Wee michumarka araaakmatniunmasha yayaatsui. Tura tsuatnum ikiusmasha ántraiti. Aya ajapat-niukete. Kuishim ákuínkia antuktatum’ tímiayi.

15

Jesus murik menkakamu chichaman unuiniamiania nu
(Mateu 18.10-14)

¹ Akupniu kuítrín-juu tura yajauch shuarsha Jesusan anturkatai tusar tarú wearmiayi. ² Tuma asamtai Paríséusha, Israer-shuara jintinniurisha Jesusan áujmatainiak “Jusha tunáa shuaran itiaawai tura níjjiai yurumáiniawai” tiarmiayi.

³ Nuna tuiniakui Jesus ju métek-taku chichaman jintinti-awarmiayi:

⁴ “Shuar sian (100) murikiun takuschampiash. Nu siánnumiá chikichik menkakamtai nuwintia núwinkia ni matsatmariin ikiuak, menkaka nuna ti eakchattawak. Wáintsuk iniaiashtatui. ⁵ Tura wáiniak yakainium awankek waras jeen wáketui. ⁶ Tura jeen jeá ni amikrín, írutramuríncha ikiaanak “Wíjjiai warastarum. Murikiur menkaka nuna wáinkiajai” tawai. ⁷ Wats, nuwintia nuiwi pénger shuar akui nayaimpiniam warastin awai. Tura antsu chikichik yajauch shuar ni enentáin yapajiamtai, nú nankaamas warastin átatui, tájarne’ tímiayi.

Kuit emenkakman Jesus unuiniamiania nu

⁸ ‘Nuyá chíchik enentáimsatai. Nuwá tias kuítian takakna nuna chikichik menkakamtai, wáinkiatat tusa jinia ekeemak, jeen japimiak émamkes eakchattawak. ⁹ Tura wáiniak ni amikrín, írutramuríncha ikiaanak, “Wíjjiai warastarum. Kuit menkakamia nuna wáinkiajai” tawai. ¹⁰ Núnisan yajauch shuar ni enentáin yapajiamtai, Yusa suntari matsatmanum ti warastin awai” tímiayi.

Uchi ni aparíin waketkitniun Jesus unuiniamiania nu

¹¹ Nuyá Jesus júna unuiniamiayi:

“Áishman jimiara uchin takakuyi. ¹² Tura pátatka uchi ni aparín timiai “Apawá, surustiniaitmena nu yamá surusta.”

‘Tutai ni aparí ni kuítrín jímiapetek nakak mai uchin susamai. ¹³ Ishichik tsawant nankaamasai pátatka uchi ni warirín irur júki jeachat chíchik núnkanam wémai. Nuisha nánkamas yajauchin túrak kuítrín ashí ajapamai. ¹⁴ Ni kuitri ashí amuuka aín nu nunkanam ti tsuka ámai. Niisha núnisan tsukariin wáitsamai. ¹⁵ Túmak takatan eaktajtsa nu nunkanmaya apachiin werimiai. Nu áishmansha kuchirín wáitrukta tusa akupkamai. ¹⁶ Uchi ti tsukamak kuchi ukatramun niisha yuátajtsa ti wakerimiai. Túrasha penké súcharmai. ¹⁷ Tumáa pujus nuinkia enentáimpramai. “Winia aparuí takau shuar péngeran ti yurumáiniawai. Tura wikia júi tsukarui wáitiajai. ¹⁸ Wats, aparuí waketkitjai. Tura aparun chicharkun “Apawá Yúsjaisha ámijjaisha tunaan túrajai, titiajai. ¹⁹ Ame uchiram áchamniaitjai yamaikia. Ame takarniurmea áantsanak átaj tusan wakerajai” titiajai” tu enentáimsamai. ²⁰ Tura wajaki ni aparíin waketkimiai” tímiayi.

‘Tura ni aparísha jeachat winian wáiniak waitnentramai. Aparí tsékenki inkiun miniakak mukunámai. ²¹ Nuiñkia uchirísha timiai “Apawá, Yúsjaisha ámiñiaisha tunáan túrajai. Ame uchiram áchamniaitjai.”’

²² ‘Túrasha ni aparíñkia ni takarniurín chicharuk “Ti penker pushí itiarum áentsratarum, timiai. Tura uwejnium aweetaisha aweemtikiatarum. Tura sapatcha aweemtikiatarum. ²³ Túrarum waaka nueram ana nu maatarum. Námpér nájankur shiir enentáimsar yurumámi. ²⁴ Warí, ju winia uchir jakaapitia tu enentáimsamjai. Túrasha iwiaakui. Menkakama nuna wáinkiajai.” Nuiñkia ti warasarmai’ tímiayi.

²⁵ ‘Tumai iwiái úchikia takatnum pujumai. Tura wáketuk, jeá nuntumas jantsemáiniak túntuiyamun antukmai. ²⁶ Nuiñkia yaintrí matsatun chikichkiniak untuk “¿Warimpait?” timiai.’

²⁷ ‘Tura nii chichaak “Ame yátsum tayi. Túramtai ame apa waaka nueram maatai tawai, ame yatsum penker tau asamtai” timiai.’

²⁸ ‘Tura iwiái uchi kajak wayatniun nakitramai.’

‘Tuma asamtai ni aparí jiiintiuki “wayata” timiai.’

²⁹ ‘Tura uchisha aparín chicharuk “Wisha ámin umirkun untsurí uwitin ame takatrumin túraitjai. Nu nékame. Túrasha winia amikrujai námpér najanatin chiipiuksha penké surichuitme. ³⁰ Tura ju ame uchiram nuwajai yajauchin túrak ame kuítrumin wasurkania nu támatai, waaka nueram máachumek” timiai.’

³¹ ‘Takui aparí chicharuk “Uchirú, ámeká wijiái tuke pujame. Tura wi takakjana nusha ashí áminuít. ³² Tura ame yatsum jákaiti tu enentáimsamiai nu iwiaakuít. Menkaka nu yamaikia wáinkiaji. Tuma asamtai námpér najanar waraschatniukaitiai” timiai’ tímiayi.

16

Takatan wáinin

¹ Ju métek-taku chichamnasha Jesus ni unuiniamu ⁷ ‘Tura nii chichaak “Ame yátsrín unuiniamiai.

“Kuítrintin áishmanka takatrín wáinniurí ámai. Tura nérenniun ujainiak “Ame wáinniuram ame kuítrumin náñkamas ajapeawai” tiarmai.’

² ‘Nuna antuk ni wáinniurín untuk “¿Warinia jusha tura-mainia? timiai. Yamaikia winia wáinniur áchattame. Tuma asamtai winia kuítrujai itiurkamea nu iniaktursata” timiai.’

³ ‘Tutai takatan wáinin enentáimsamai. “Maaj, wisha itiurkatjak, timiai. Nunka táurtinniasha jeatsjai. “Kuit surusta” tínniasha natsamajai. ⁴ Winia takatur atsakui yurumkan ajamprusarat tusan túratajna nuna nekajai” tu enentáimsamai. ⁵ Nuyá nérenniun tumashmaku armia nuna

an̄kant an̄kant untſukarmai. Emka tamia nuna chicharuk “¿Winia úuntur urutma tumashmakuitiam?” timiai.’

6 ‘Niisha áimiuk “Asuitin sian̄ taru tumashiitjai” timiai.’

‘Tutai takata wáinin chicharuk “Pai. Papinium tumashrum ana nu juá: wárikmasmek pujusam, nu papí jaakam, chíkich papinium aya sen̄kuentachik aarta” timiai.’

7 ‘Nuyá chíkich tumashmaku támatai “¿Amesha urutmá tumashiitiam?” timiai.’

‘Tutai nii chichaak “Shana sian̄ taru tumashiitjai” timiai.’

‘Tutai “Pai. Papinium tumashrum ana nu júiti. Chíkich papinium aya uchentak aarta” timiai.’

8 ‘Nuyá takata wáinniu uuntri nuna nekáa “Nii yajauch túriniaitiat imiá enentáimniuiti” timiai’ tímiayi.

Nuyá Jesus tímiayi ‘Yus-shuarjai nan̄kaamas Yus-shuarcha aijjai ni túratniuriniak takainiak imiá enentáimkia áiniawai.’

9 ‘Ju nun̄kanam anan̄katin átsuk. Tura kuitsha aya ju nun̄kanmayan̄kete. Tuma asamtai atumsha kuitrumjai “shuaran yaīntaj” tu enentáimsatarum. Kuitjai yaīntin amuukamtai atumsha amuicha jeanam ipiaamu átaj tusarum túratarum.”

10 ‘Shuar ishichik takakna nujai pénker túrakka, núkap takakna nujaīsha pénker túrattawai. Tura ishichik takakna nujai pénker túrachkun̄ka, núkap takakna nujaīsha pénker túrashtatui. 11 Tuma asamtai ju nun̄kanmaya anan̄kartin kuitjai pénker túrachkurmek, tuke átin ana nujai takastincha ¿itiur takastarumek? 12 Takakme nuna Yus ikyatmasuiti. Nujai pénker túrachkurminkia, atumnia átinia nuna ¿itiurak suramsatí?’

13 ‘Takarniuri jimiara úuntrintin ajastinian tujintiawai. Warí, chikichnaka aneak chikichnaka nakitrashta túrattawai. Turya sen̄kuentachik aarta” timiaituak. Chikichan umiruk chikichnaka umirkashtatui. Yussha kuitcha mái-metek enentáimtuschnaiatrumé” tímiayi Jesus.

14 Pariséusha kuitian anen armia nu, ashí ni táman antukar Jesusan wishikrarmiayi. 15 Túmakui Jesus nin tímiayi “Atumsha aents ímmianum pénker awajmamprume. Túrashta atumí enentáincha Yus pénker nékawai. Kame winia “nan̄kaamantuiti” turutit tusa wakera nuna Yuska nakitiawai.’

Yaunchu etserkamu, yamá etserkamu

16 ‘Juan̄ étsertsain̄ Muisáis aar akupkamia nunasha tura Yúsnan etserin unuiniarmia nunasha antuktin ármiayi. Tura yamaisha tímianiaí ti shiir chicham awai. Yus akupeana nui urukukit nuka paant etserkamuiti. Tura ashí shuar nui pachiinkiatay tusar ni kakarmarijjain̄ ti takainiawai.’

17 ‘Túrasha yaunchu akupkamu ashí chicham uminkiat-niuti. Nu chicham uminkiashtinkia nayaimpisha nuṅkasha amukatniujai naṅkaamas itiurchataiti.’ *

18 ‘Áishman nuarṇ ajapa chikichan nuátkunṅka tsanirmawai. Tura nuwā ajapamu niiniurtakka nusha núnisan tsanirmawai.’

Kuítrintin áishman Rásarujai

19 ‘Áishman kuítrintin ámai. Niisha imiá shiir pushin ti kuit ainia nujai iwiarmamniuyi. Tura tuke tsawant yurumak ti kuit amia nujai namperan najannuiyi. 20 Tura kuítrincha ámai ni naarṇ Rásaru. Niisha kuchapruku tunamaruyi. Tuke tsawant kuítrinniu wáitirṇin pujuyi. 21 Ti tsukamak kuítrinniu misarinia kakekan yuattsá wakerimiai. Tura yawasha ni kuchaprṇin nukatiarmai. 22 Kuítrincha jakamai. Jakamtai jaka shiir pujutainium, Apraám pujumia nuṇi nayaimpin-maya suntar júkiarmai. Kuítrinniusha jakamai. Jakamtai iwiarsarmai. 23 Jaka pujutainium wáitias pujus, paṅkái íimias, Rásarun Apraámjai pujuinian wáinkiamai. 24 Wáiniak untsumuk “Apawá Apraamá wáitnentrurta, timiai. Rásaruka tsara uwejejai entsan uchupir winia iniairun imichturat akupturkata. Wisha juṇi jinium pujusan ti waitiajai” timiai.’

25 ‘Tutai Apraám timiai “Uchirú enentáimpratá. Ame nuṅká iwiaaku pujusam ti shiir pujumame. Antsu Rásaruka nuṇi ti yajauch pujumai. Tura niisha yamaikia juṇi áyamui tura ámeke wáitiamé. 26 Tura nú arant nánata ti uunt awai. Tuma asamtai juyá ai wétinian wakeruiniayat tujintiainiawai. Tura aiyá juṇi tátinian wakeruinia nusha tujintiainiawai.” ’

27 ‘Nuṅkia kuítrintin timiai “Nuṅkia apawá Apraamá, juna seajme. Winia aparú jeen Rasaru akupturkata. 28 Nuṇisha winia yatsur senku matsatainiawai. Niisha juṇi wáitsatniunam tácharat tusa ujákartí, tájame” timiai.’

29 ‘Tutai Apraám timiai “Muisáis áarman tura Yúsnan etserin áarman takakainiawai. Nuna umikiarti.” ’

30 ‘Tutai kuítrintin áimkiamai “Túrasha apawa Apraamá, antsu jakamunmaya nantaki, shuar we ujakam enentáin yapajáwarainti.” ’

31 ‘Tura Apraám timiai “Muisáis áarman tura Yúsnan etserin áarman anturainiachkunṅka jaka nantaki we ujakmasha an-tukchartatui” timiai.” Tu áujmatsamiayi Jesus.

17

*Yajauch túrumtikiatin ti tsúumainti
(Mateu 18.6-7, 21-22; Márkus 9.42)*

* 16:17 Mateu 19.1 ya senkuentachik aarta” timiai-12; Márkus 10.1-12

¹ Jesus ni unuiniamurⁱⁿ juna tímiayi, “Aentsun yajauchin túrumtikiattana nu tuke átatui. Tura shuar ni ain tunaan wakerumtikna nu aneartí. ² Ju shuar uchich ainia nuna yajauchinium túrumtikna nuna Yus imiá asutiáttawai. Tuma asantai nuna túratsain uunt kayajai kuntujnum jínkiá nayaantsanam ajunkam maak ainti. ³ Túrasha atumek ímiastarum. Ame yatsum ámin tunáa túrutmamtainkia chicharkata; tura niisha “tsaṅkurturta” túramkuíṅkia tsaṅkurata. ⁴ Chikichík tsawantinín siati túrutmamtai, tura “tsaṅkurturta, atakka túrashtajai,” siati túramkuíṅkia, tuke tsaṅkurata.”

Yus nekas enentáimtakrikia tujinkiashtatji

⁵ Jesusa unuiniamurⁱ Nin chicharuk “Yus enentáimtajnia nú naṅkaamas enentáimtustin yáinmaktá” tiarmiayi.

⁶ Tutai Jesus tímiayi “Mustasa jínkiái ti ishitiúpchich ana núnisan ishichkisha Yus enentáimtaitkiurmeka, sikiumuru numi wajana nu, “Wajamurmⁱyaṅka ukuiniakam nayaantsanam wajasta” tákurmin nú numi umirtamkainti.’

Yusa takatrⁱ takasar “ti penker túraitji” tíchatniuitji

⁷ ‘Atumí takarniurⁱ arakmasua amik, waakancha iis támatái, ¿nú chichamaik amesha, “Winitíá, yurumáitiá” tíintmek? ⁸ Atsá. Antsu, “yurumak iwiarturata. Wi yurumátiṅ tura umartincha surusminiam iwiarnarta. Nuyá ame yurumátá.” Nu tíchaintmek. ⁹ Nii túratin ana nunak túratsuk. Tuma asantai yumíṅsashtatme. ¹⁰ Atumsha núnisrumek Yus túramna nu ashí umíkiām “ti penker túraitjai” tíchatniuitme. Antsu “aya ii túratniurⁱ ana nuke tura asar iikia ántraitji” títiniaitme.” Tu tímiayi Jesus.

Tias áishmaṅkan tunamarun Jesus tsuáarmiania nu

¹¹ Jesus Jerusaréṅnum wesa Kariréa nuṅka ikiuki Samaria nuṅkanam naṅkaamakmiayi. ¹² Tura péprunam jeamtai, tias áishmaṅ ripra suṅkurjajⁱ tunamaru armia nu, arant wajasarmiayi. ¹³ Tura untsumainiak “Uunt Jesusá, waitnen-trurta” tiarmiayi.

¹⁴ Jesus nin wáiniak, “Pátrij werirum iniaktumastarum” tímiayi.

Tura wésar péṅker ajasarmiayi. ¹⁵ Nuyá chikichik ni tsuamarman nekáa kakantar chichaki Yusa náarⁱṅ uunt awajki waketki Jesusan tarimiayi. ¹⁶ Yumíṅsataj tusa Jesusan tikishmatar piniakumar tepesmiayi. Nu áishmaṅka Samarian-maya^uyayi.

¹⁷ Nuna wáiniak Jesus tímiayi “Tsuámaru tiáschakait. ¿Chíkich nuiwisha tui pujuinia? ¹⁸ ¿Ju yajaya áishmaṅ níṅkik Yusa naari uunt awajsataj tusa waketki tai?” ¹⁹ Nuyá áishmaṅkan tímiayi,

“Winia nekas enentáimtura asam pé_{nk}er ajasume. Wajakim shiir weta” tímiayi Jesus.

¿Yusa akupeamuri urutaik ati?

(Mateu 24.23-28, 36-41)

²⁰ Paríséu aents Jesusan aníak “¿Yusa akupeamuri urutaik ati?” tiarmiayi.

Tutai Jesus tímiayi, “Yusa akupeamuri paant wáinkiachminiati. “Yamaí nan_{nk}amnyai” tichamniaiti. ²¹ “Juí awai, nuísha awai” tichamniaiti. Warí, Yusa akupeamurí_{nk}ia atumí_{in} pujawai” tímiayi.

²² Nuyá ni unuiniamurí_{in} chicharuk júna tímiayi: “Tsawant jeattawai atumsha Winia Aents Ajasu tutain “aya chikichík tsawantkesha Nii wáinkiar_{nk}ia mak” turuttiatrume. Tú_rasha tujinkiattarme. ²³ Aents Ajasu tutai “juí pujawai, nuísha pujawai” tuíniakui weriirap. Tana nu nemariirap. ²⁴ Wi, Aents Ajasuítjiana nu tátinian tsawantur jeamtai paant wáitkiattarme. Peem péetuk ashí nayaimpin tsáapnin awajna nú_nisa_n wi taamu paant á_tatui. ²⁵ Tura nu tú_runtsa_{in} yamai pujuinia nu Winia nakitruiniakui ti wáitsatniuitjai.

²⁶ Winia atak tátiniur jeamtai, yaunchu Nuái pujumia nú tsawantin tú_runamia nú_nisa_n tú_runattawai. ²⁷ Yurumáwarmiayi, umararmiayi, nuatnaikiarmiayi, ni nawantrí nuatnakat tusa surukarmiayi. Tumáa pujuiniaí Nuái uunt kanunam en_{nk}emprantai, amarak nu aentsnasha mash amuukarmiayi. ²⁸ Tura Sutuma pé_runmasha Rauta írutramurísha nú_nisa_n Yusa asutiát_{ni}uri enentáim_tsuk pujuarmiayi. Yurumáwarmiayi, umararmiayi, sumakarmiayi, surukarmiayi, ajancha ajamarmiayi, jeancha jeammarmiayi. ²⁹ Tura Raut Sutuma pé_runmaya jiinkimtai asupri tutai kaya keek yútana áintsan nayaimpinmaya kakeetuk nu áentsun mash máawarmiayi. ³⁰ Nú_nisa_n winia atak tátiniur jeamtai enentáim_tsuk pujusartatui.’

³¹ ‘Nu tsawant jeamtai jea yakií_ni pujana nú shuar ni warirí_n achiktaj tusa akaikishti. Jeá wayashti. Tura kampunniunam wekaana nú shuar ni jeen waketkishti.

³² Rauta nuarí tú_runamu enentáim_ratarum. ³³ Aya ju nu_{nk}anmaya_n enentáimias “iwiaaku á_taj” tana nu ni iwiaakmarí_n emen_{nk}ká_tatui. Tura ju nu_{nk}anam ni iwiaakmarí_n emen_{nk}kana nu nekas iwiaakma ana nuna wáinkia_ttawai. ³⁴ Paant tájarme. Nú káshitin jimiará áishma_n nuu peaknuma_n kanú_u tepeartatui. Chikichik junaktiatui, chí_kichikia ikiunkittiwai. ³⁵ Jimiará nuwa má_i-metek nekée pujuartatui. Chikichik junaktiatui, chí_kichikia ikiunkittiwai. ³⁶ Jimiará áishma_n kampuniunam wekainiartatui. Chikichik junaktiatui, chí_kichikia ikiunkittiwai.” Tu tímiayi.

³⁷ Nuna antukar “Uunta ɬtuɪ túrunatta?” tiarmiayi.
Tutai ni chichaak “Jaka tepana nuɪ chuan káutkartatui.”

18

Shuar yawetsuk Yúsan tuke áujsatniuiti

¹ Shuar yawetsuk Yúsan tuke áujsatniua nuna unuiniartaj tusa Jesus ju métek-taku chichaman tímiayi:

² “Chíkich péprunam shuaran akupin amai. Nú áishman Yúsnasha ashamchauyi; shuárnasha péñker enentáimtichuyi.

³ Tura nú péprunam waje amai. Niisha shuáran akupniun chicharuk “Áishman winia yajauch awajtusmania nu íirtusta” tusa tuke waketrú pujuyi. ⁴ Yámankamtaikkia nin anturkatniun nakitmiiai. Tura ukunam enentáimias “Wisha Yúsan ashamachiatnak shuárnasha péñker enentáimtichuuitiatnak ju waje tana nuna túrattajai. ⁵ Warí niisha tuke taa itit awajatsuk. Tuma asamtai nin kajerkaɪj tusan wárik túrattajai” timiai” tímiayi.

⁶ Nuyá uunt Jesus tímiayi “Shuaran akupin yajauchiitiat nuna timiai. ⁷ Tura Yus ti péñker asa, ni achikmarin tsawaisha, káshisha untsuamka nú nankaamas anturkash-tatuak. ɬYaitsuk menkakatuak? ⁸ Atsá, wárik yáinkiertatui, tájarme. Tura Wi Aents Ajasuitjiana ju atak támatai, ɬshuaran tuke Winia nekas enentáimturainia nuna wáinkiatjash?” tímiayi Jesus.

Pariséusha, kuítian-juuncha Yúsan áujsarmia nu

⁹ “Pénkeraitjai” tu enentáimtumainiak chikichnaka yajauch enentáimtiarmia nuna Jesus nekapmá chichasmiayi. Juna tímiayi:

¹⁰ “Jimiará áishman Yusa Uunt Jeen Yus áujsatai tusar wearmai. Chíkichkia Pariséuuyi, chíkichkia kuítian-juuyi. ¹¹ Pariséusha wajaki Yúsan áujuk júnis tímiayi: “Yusrú, chíkich áishman kasa, yajauch, tsanirmau ainia nujai métekcha asan yuminsajme. Tura ju kuítian-juu wajana jújaisha métekchaitjai. ¹² Warí, Ame akupkamna nuna iniankasan wisha chikichík semanatiniñ jimiará tsawant ijarman áujeajai; tura wi achiajna nuna tiásnumia chikichkiniak Yúsnaiti tusan akan kan súajai.” Tu timiai.’

¹³ “Tura kuítian-juusha arant wajas, nayaimpinmaanɪ pankáɪ íimsatniunkesha natsaamak, tsuntsuma, ni netsepen awatí “Yusá, ti tunaitjai. Waitnénturrtá” timiai.’

¹⁴ “Wats tájarme, nu kuítian-juu shuar Yus íimmianum ni enentái péñker awajnas ni jeen waketkimiai. Tura Pariséuka tamia núnisañ waketkimiai. Nekaatarum. Shuar nankaamantu enentáimtumana nuka péechach awajnastatui.

Tura antsu péechach enentáimtumana nu, nan̄kaamantu awajnastatui” tímiayi Jesus.

Uchisha Jesusna áminiaiti

(Mateu 19.13-15; Márkus 10.13-16)

¹⁵ Jesus antiñkiarat tusar uchin itiararmiayi. Tura Jesusa unuiniamurisha nuna wáinkiar suritkiarmiayi. ¹⁶ Tura Jesus nin untsukar tímiayi “Uchi Winí winitin tsan̄kamkatarum, surimkiairap. Enentáimsatarum. Uchichia áintsan̄ enentáimtumana nú shuárak Yus ni enentáin akupin ajasminiaiti. ¹⁷ Uchi ni úntr̄in umira núnisan̄ shuar Yúsan umíachkunka Yus ni enentáin akupin ajaschamniaiti.” Tu tímiayi Jesus.

Kuítrintin áishman Jesusjai áujmatsamiania nu

(Mateu 19.16-30; Márkus 10.17-31)

¹⁸ Shuara uuntri Jesusan tarí áujsamiaiyi. “Uuntá, amesha péñkeraitme. Tuma asam, turuttia, ¿warinia túrakna tuke iwiaaku átataj?” tímiayi.

¹⁹ Tutai Jesus, “¿Urukamtia Winia, péñkeraitme, túrutam? Aents péñkerka atsawai. Aya Yusak péñkeraiti. ²⁰ Tura Yus akupkamu ana nu péñker nékame. Tsanirmawairap, mankar-tuawairap, kasamkairap, tsanumprurairap, ame apasha, nukusha shiir enentáimtustarum. Nusha nékame” tímiayi.

²¹ Tutai áishman̄ tímiayi “Uuntá, úchichik mash umiki tsakaruitjai.”

²² Jesus nuna antuk “Chikichik taatramsai, tímiayi. Ame takakmena nu ashí surukam kuítrinha ainia nu susarta. Nuñkia nayaimpiniam kuítrum átatui. Túram nemartustaj tusam winitia.”

²³ Tura nuna antuk, nu áishman̄ ti kuítrintin asa ti kuntuts enentáimpramiayi. ²⁴ Tura kúntuts enentáimpramtai Jesus nuna nekáa “Kuítrintin ainia nu Yus akupeamunam pachiinkiatin ti iturchataiti, tímiayi. ²⁵ Kamiriuka, uunt ana nu, auja j̄in wayatin̄ iturchataiti. Tura shuar kuítr̄in ti enentáimtana nu Yus akupeamunam pachiinkiatin nú nan̄kaamas itiurchataiti.” Tu tímiayi.

²⁶ Tura nuna antukarmia nu tiarmiayi “¿Nuñkia yaki uwempramniait?”

²⁷ Tutai Jesus tímiayi “Aents tujintiainia nuna Yuska páchitsuk túramniaiti.”

²⁸ Nuyá Pítiur Nin chicharuk tímiayi “Uuntá, iikia Ámin nemarsataj tusar ii takakmaaka ikiukj̄i.”

²⁹⁻³⁰ Tutai Jesus tímiayi “Shuar Yus akupeana nuna túrataj tusa ni j̄een ikiuakka tura núnisan̄ ni apar̄íncha, nukur̄íncha, yach̄inkisha, nuw̄enkesha, uchir̄inkisha ikiuakka ju

nun̄kanmasha núkap wáinkíattawai nu shuar. Tura tuke iwíiaaku pujustinníasha wáinkíattawai.”

Ataksha ni jákatniurín Jesus ujakmiania nu

(Mateu 20.17-19; Márkus 10.32-34)

³¹ Jesus ni tuse unuiniamurín akanki ikiaan̄ak juna tímiayi: “Jerusarénnum jeatemaji. Juísha Jerusarénnum Winia, Aents Ajasu tutain, túrunatniurun Yúsna etserin yaunchu áatrurarmia nu uminkíattawai. ³² Apachnium surutkar-tatui. Túrawar wishikrurar, katsekrurar usukruawarta-tui. ³³ Awatíar mantuáwartatui. Túramaitiatnak menaintiú tsawantai nantaktiatjai” tímiayi.

³⁴ Tura Nii tímiania nuna nekas túrunattawai, tícharmiayi. Wariniak ta tusar nekaacharmiai.

Jirikiúnmayá áishman̄kan Jesus ímtikmiania nu

(Mateu 20.29-34; Márkus 10.46-52)

³⁵ Jesus Jirikiú péprunam nuntumsai, nuí áishman̄ jii kusuru, kuítian surusarat tusa jintiá pujumiayi. ³⁶ Untsurí aents nan̄kaamainian antuk “¿warínkit?” tímiayi.

³⁷ Tutai, “Nasarénumia Jesus nan̄kaamawai” tiarmiayi.

³⁸ Kusurusha nuna antuk untsumuk “Jesusá, Uunt Kapitián Tawit weeachukaitiam. Tátiniuya núchakaitiam. Winiaja waitnentrurta” tímiayi.

³⁹ Eemak wearmiania nu chicharainiak “takamatsata” tiarmiayi.

Tutaisha nú arant untsumuk “Tawit weeachukaitiam; winiaja waitnentrurta” tímiayi.

⁴⁰ Nuínkia Jesus wajas “itiatarum” tímiayi. Tura nii támatai, ⁴¹ “¿Warí itiurtukat tusamea wakerutam?” tímiayi.

Tutai kusuru áimiuk “Uuntá, ímtiasan wakerajai” tímiayi.

⁴² Tutai Jesus chichaak “Ímtia. Winia nekas enentáímtursa asam péñker ajasume” tímiayi.

⁴³ Nu chichamaik kusuru íimmiayi. Tura Yusa naari uunt awajki Jesusan nemarmiayi. Tura ashí aents nuna wáinkíarmia nusha Yusa náarín uunt awajsarmiayi.

19

Sakíu Jesusjai

¹ Nuyá Jirikiú péprunam wayá nuí wekaikini ajamiayi. ² Nuí kuítrintin áishman̄ ni naari Sakíu pujumiayi. Nu Sakíu kuítianjuu úuntriya. ³ Aents ti káunkámtai, Sakíu ti sútarach asa, Jesusan íistaj tukamá tujinkiamiayi. ⁴ Tuma asa Jesus nuke nan̄kaamaktin asamtai, eemki tsékin̄ki sikiumuru numi wajamunam wakamiayi íistaj tusa. ⁵ Jesus nuí nan̄kaamak pañkáí íimias chicharuk “Sakíu wárik akáikitiá. Ame jeem̄in yamá kanartiniatjai” tímiayi.

⁶ Tutai Sakíusha wárik akaiki, shiir enentáimias Jesusan itiaamiayi. ⁷ Ashí aents nuna wáinkiar “Maaj, Jesus tunáa áishmanka jeen pujawai” tusa mai tunaim ajarmiai.

⁸ Nuyá Sakíu wajaki Jesusan chicharuk “Íistá Uuntá, wi takakjana juna jímiapetek nakakan kuítríncha ainia nuna susartatjai. Tura wáitruan chikichan kasarkaitkiuncha menaintiu patatsan awainkittiajai” tímiayi.

⁹ Tutai Jesus tímiayi “Ju áishman Apráama shuárintiat yamá niisha níniujai uwempra asa nekas Apráama shuari ajasuiti.

¹⁰ Wisha Aents Ajasu asan menkakarú ainia nuna eakan uwentikrartaj tusan táwitjai.” Tu tímiayi.

Kuítian nekapmá chichasmiayi

¹¹ Nu aents Jesusan anturkarmia nu “Jerusarénum jeawakrin Nii, Yus anaikiamu asa, wárik akupin ajastatui” tu enentáimsarmiai. Tuma asamtai wésar Jerusarénum nuntumsarai, nuna enentáimsaráin tusa Jesus juna métek-takun chichasmiayi:

¹² “Áishman penkeri amai. Nu áishmansha jeachat chíkich núnkam kapitíán náamkan tátaj tusa wemai. ¹³ Tura wétsuk ni takarniurín tias armia nuna unsukarmai. Tura ankant ankant kuit kurijai nankaamas penker armia nuna suíniak “Ju kuitjai wi táatsain takakmá ajatarum” timiai.’

¹⁴ “Tura ni núnkénia shuarka nakitiarmai. Túmainiak “nu áishman ii kapitíántri ajasain tusar nakitijai” nu titiá tusar áishman kan akatrar akuptukarmai.’

¹⁵ “Tuma ain kapitíán náamak ni núnkén waketki tamai. Taa “winia kuítrumjai warí túrarum” titiaj tusa ni takarniurín kuitia súsarmia nuna unsukarmai.’

¹⁶ “Ni takarniuri emka chikichik taa “ame kuítrumjai takakmasan tias patasan achikmajai” timiai.’

¹⁷ “Tutai kapitíán chichaak “Pénker túrame. Ishichik susamjamna nújaink’ wi tímiajna tímiatrusmek túrame. Tuma asakmin tias péprun akupin awajsattajme” timiai.’

¹⁸ “Chíkich taa “Íistá Uuntá, ame kuítrumjai takakmasan senku patasan achikjai” timiai.’

¹⁹ “Nunasha chicharuk “Amincha senku péprun akupin awajsattajme” timiai.’

²⁰ “Nuyá chíkich taa “Uuntá, ame kuítrumin paniiijai ijian ikiusmajai. ²¹ Amesha kakaram chichau asakmin, ikiuschiatam achin asakmin tura arakmachiatam juu asakmin ashankamjame” timiai.’

²² “Tutai kapitíán timiai “Maaj, amesha ti yajauchiitme. Ame támena nuke makurmawai. Wi kakaram chichau aisha, ikiuschiatan achin aisha tura araknasha arakmachiatan juu aisha, ²³ nuínkia ¿urukamtia kuit-ikiutainiam ikiuschamam?

Nuĩkia wi atak táakun patasan achikiaajna” timiai. ²⁴ Tura nuĩ wajarmia nuna chicharuk “Kuítian takakmarĩ juruk-tiarum; túrarum tias takakna nú shuar susatarum” timiai.’

²⁵ ‘Tura niisha chichainiak “túrasha Uuntá, tias takakja” tiarmiai.’

²⁶ ‘Tutai kapitián chichaak “Takakna nujai takaakuĩkia patatnastatui tájarme. Tura takakna nujai takaachkuĩkia ishichik takakkuisha jurunkittiwai. ²⁷ Tura winia nemasur kapitián ajasain tusar nakitrurarmania nu itiatarum. Tura wisha íimian mǎatárum” timiai.” Tu tímiayi Jesus.

Jerusarénum Jesus wayamiayi

(Mateu 21.1-11; Márkus 11.1-11; Juan 12.12-19)

²⁸ Nuna tuasua amik Jesus Jerusarénumaani wémiayi. ²⁹ Petpajái pepru tura Petania péprusha Uriwiu náinnium tíjiuchi; nuĩ jeastatuk ajatemas ni unuiniamurin jímiarman chicharuk, ³⁰ “Tíjiuch péprunam wetarum. Túrarum nuĩ umpu-uruch ekemtukchamu jĩnkiamu waja wáinkiatarme. Nu atíarum itiatarum. ³¹ Tura “¿urukamtai atíarum?” turamaini-akuisha, “ii uuntri wakerawai” titiarum” tímiayi.

³² Tutai unuiniamuri wear, Jesus timia ímiatrusan wáinkiarimiayi ³³ Tura umpuuruchin atíakui nérentin chichainiak “¿Urukamtai umpuuruchsha atíarum?” tiarmiayi.

³⁴ Tutai unuiniamusha “Íi uuntri wakerawai” tiarmiayi.

³⁵ Tura umpuuruchin Jesusan itiarimiayi. Túrawar ni pushirin umpuuruchiniam awantkar Jesusan ekenkarmiayi. ³⁶ Tura Jesus wétinnium ni pushirin jintianam ayaparar áintrarmiayi. ³⁷ Tura Uriwiu naint awan kénamunam tíjiuch ajasarmatai untsurí aents Jesusan nemariarmia nu warainiak kakantar untsumainiak aents tujintiamun untsurí túran wáinkiaru ásar Yusa náarin uunt awajsarmiayi. ³⁸ “Yusa náarin winiana ju ii uunt Akupniuiti. Nincha Yus shiir awajsati. Nayaimpiniam pujuinia nu shiir enentáimsar Yusa náarin uunt awajsati” tiarmiayi.

³⁹ Tura Pariséu aents nuĩ páchitra pujuarmia nu Jesusan chicharainiak “Uuntá, nemartamainia nu “takamatsata” tiarta” tiarmiayi.

⁴⁰ Tutai Jesus tímiayi “Nuĩkia ju takamatsarmataĩkia, kayasha untsumkarainti. Nuna paant tájarme” tímiayi.

⁴¹ Jerusarénum tíjiuch ajatemas péprun wáiniak úutuk júnis tímiayi: ⁴² “Jerusarénumia shuártiram, ju tsawantinkesha shiir pujustintrum nekaarmeka maak. Túrasha yamaikia nekaatin nan kaamasai. ⁴³ Kame ti itiurchat tsawant jeartam-tatrume. Atumí nemasri nun kajai aa-tanishan tanish-marar téntatramkattarme. Mesetan najatramattarme, tura áatusha junisha mash árenmaktatrume. ⁴⁴ Túrutma nun ká

ajunmartatrume. Tura atumiin pujuinia nuna máawartatui. Tura ashí emesrarmatai ishichkisha kaya irumpramusha penké atsuttawai. Wi Yusa anaikiamurin tarijrumna nu nekaachu asakrumin túrutmattarme.” Tu tímiayi.

Yusa Uunt Jeen suruktinian Jesus surimkiamiania nu
(Mateu 21.12-17; Márkus 11.15-19; Juan 2.13-22)

⁴⁵ Nuyá Jesus Yusa Uunt Jeen wayá suruktasa pujuarmia nuna sumaktasa pujuarmia nunasha jiiki awemarmiayi.
⁴⁶ Túrak juna tímiayi:

“Yús-Papinium yaunchu aarma awai: “Winia jearka Yus áuj satin jeaiti” tu áarmaiti. Túrash a átumka kasáa matsamtaiya nútikiarme” tímiayi.

⁴⁷ Tuke tsawantin Yusa Uunt Jeen Jesus uwempratin chichaman unuiniak pujai Israer-patri úuntrisha, Israer-shuara jintinniurisha, tura pepru úuntrisha, itiur máamniakit tusa ti enentáimsarmiayi. ⁴⁸ Túrash a ashí aents émamkes antu-rainiakui máatniun tujinkiarmiayi.

20

Yusa kakarmarijiai Jesus takasmaniania nu
(Mateu 21.23-27; Márkus 11.27-33)

¹ Yusa Uunt Jeen Jesus uwempratin chichaman unuiniak pujai Israer-patri úuntrisha, Israer-shuara jintinniurisha, Israer-shuara úuntrisha táarmiayi. ² Taar Jesusan chicharainiak “¿Yana chichamejai ju túram? ¿Ya ju túratniuncha akuptamkai?” tiarmiayi.

³ Tutai Jesus tímiayi “Wisha aniaatajrum tusan wakera-jrume. ⁴ ¿Ya Juán nasha imiakrattia tusa akupkamia? ¿Yusak? ¿Aentsuk? Turuttiarum” tímiayi.

⁵ Tútaisha niisha nuamtak warintiajik mai tunai ajarmiayi. ““Yus akupkaiti” tákurniñkia, “¿urukamtai enentáimtuscharum?” turamtatji. ⁶ Túrash a “aents akupkaiti” tákurnisha ashí aents kayajai tukurmar mantamattaji. Warí “Juan Yúsnan etserniuiti” tuíniatsuk” tiarmiayi. ⁷ Nuiñkia Jesusan áiniak “Iisha nékatsji, Juan imiakratinniasha yátsuk akupkamia” tiarmiayi.

⁸ Tutai Jesus tímiayi “Wisha núnisnak winia akuptukua nuna tichattajrume” tímiayi.

Pénker-takachu armia nu
(Mateu 21.33-44; Márkus 12.1-11)

⁹ Nuyá Jesus ju métek-taku chichamjai aentsun jintintiami-yi:

“Áishman ni ajariin uwa araa amuk, shuaran takartusti tusa ikiukmiai. Tura niñkia wau táchataj tusa jeachat wémai.

¹⁰ Tura júuktin tsawant jeamtai juukman akanak jurumkit tusa takarniurin takau shuariin akuptukmai. Tura takarniurincha katsumkar áyatik awainkiarmai. ¹¹ Nuyá nérentin chíkich takarniurin akupkamai; tura nunasha núnisan katsekkar, awatiar, sútsuk akupkarmai. ¹² Nuyá ataksha chikichan akupkamai. Tura nunasha takau shuar katsumkar akupkarmai.’

¹³ ‘Nuyá ukunam ajá nérenniuri “Itiurkatjak, timiai. Winia aneamu uchirun akupkattajai. Nin wáinkiar shiir enentáimtuschartimpiash” timiai.’

¹⁴ ‘Túrasha takau shuar nuna wáinkiar, nuamtak chichainiak “Juka ajá nérenniuri ajastatui. Maatai. Nuikia aja iiniu átatui” tiarmai. ¹⁵ Nuna tuíniak ajanmaya jiiki máawarmai.’

Nuyá Jesus aniasmiayi ‘Wats ¿warí enentáimsarum, ajá nérenniuri itiurkattawa? ¹⁶ Niisha taa, nu takau shuáran máawartatui. Tura núnkanka chikichan susattawai” tímiayi.

Nuna anturkar “Yus núnaka tsankatkashti” tiarmiayi.

¹⁷ Tura Jesus nin émamkes ísar tímiayi “¿Nuikia Yus-Papinium áarma nu warintiu? Ju áarmaiti:

Kayan pénkernak jea jeamin “yajauchiiti” tusar ajapawarmia nu ashí kayajai nankaamas pénker apujsamuiti. ¹⁸ Nu kayan tukumainia nuka kupintrattawai. Tura nu kaya shuarnum iniarka nu shuaran tsai tsai awajsattawai. Tu áarmaiti.

*Pariséu achiktai tusar wakeriarmiania nu
(Mateu 21.45-46; 22.15-22; Márkus 12.12-17)*

¹⁹ Israer-patri uuntri tura Israer-shuara jintinniurisha “nu métek-taku chichamjai in túramji” tu nekaawar nuikí Jesu-san achikiar emetatai tusar wakeriarmiayi. Tura untsurí shuar Jesusan wakeruiniakui, ashamainiak túracharmiayi. ²⁰ Tura Kapitiánnium suruktai tusar wakeruiniak mamikmau shuaran Jesusan akuptukarmiayi. Nu shuar pénker shuara núnisan jeariar, Jesus nékatsuk yajauch chichakat tusar, aniastaj tusar wearmiayi. Ni chichakmarijiajai uuntnum suruktai tusar túrawarmiayi. ²¹ Tu enentáimsar tíarmiayi “Uuntá, ame tuke nekas chicham chichaame, nu nékaji. Aents pátatek íiyatsme, antsu nekas Yusa jintí jintintíame. ²² Wats turut-tia, ¿Rúmanmaya uunt akupin ii kuitri akiktin pénkerkai? ¿Akiktinkiai? ¿Suritkiatniukai? Nu nekaatai tusar wakeraji” tiarmiayi.

²³ Tura Jesuska ni yajauch enentáimsamurin nekáa chicharainiak, ²⁴ “Kuit itiatarum. ¿Yana yapi tura yana naari jui áarmait?” tímiayi.

Tutai nii tiarmiayi “uunt akupniunu.”

²⁵ Tutai Jesus tímiayi “uunt akupniunu átinia nu uunt akupin susatarum. Tura Yusna átinia nu, Yus susatarum.”

²⁶ Aents ántamunam ni chichakmaríjiaí achiktinian penké tujinkiarmiayi. Antsu aya ímprarmiayi tura takamtak pujusarmiayi.

*Satuséusha achiktai tusar wakeriarmiania nu
(Mateu 22.23-33; Márkus 12.18-27)*

²⁷ Nuyá Satuséu “jakamunmaya penké nantakchamniaiti” tuinia nu, Jesusan aniaistai tusar tariarmiayi. ²⁸ Aniiniak tiarmiayi “Uuntá, Muisáis juna áartampramajia: “Áishman ni nuarí júreatsain jakamtainkia ni yachi nu wajen nuátkatí, yachin yajutmatratsa.” Tu áarmaiti, tiarmiayi. ²⁹ Wats, siati yachi áрмаi, tiarmiayi. Iwiairi nuwan nuatak yajutmatsuk jakamai. ³⁰ Ni yachi wajen akintiak, nuátak, niisha yajutmatsuk jakamai. ³¹ Nuna yachisha núnisan nu wajen nuátkamai; tura núnisan ashí siati nuna patainkí nuátkarmai. Yajutmatsuk yajutmatsuk kajinkiarmai. ³² Tura ukunam nuwasha jakamai. ³³ Nantaktin tsawantai, nantakiarmatai, ¿yana nuarin ati? Ashí siati nuátkacharmaka” tiarmiayi.

³⁴ Tutai Jesus tímiayi “Ju nunkanman nuatnaikiatin awai. ³⁵ Tura nantakiar atak iwiaaku ámin ainia nuka nuatnaikiachartatui. ³⁶ Warí, jákashtin áiniatsuk. Nayaímpinmaya sun-tara áintsan ajasartatui. Tura nantakiaru ásar Yusa uchirí ajasartatui. ³⁷ Tura jákaru nantakiartin ainia nuna imia Muisáis jintíamiayi. Warí, numichiniam ji wajái keamunan Yus níijiaí chichaamun, Yus-Papinium Muisaíska áarmiayi. Nú áarmanum Uunt Yus Apraáma, Isaka tura Jakupu Yúsrinti, tímiayi. Nú áishman yaunchu jákaru ain “ni Yúsrinti” tímiayi. Nuna taku nantaktin awai tu jintíamiayi. ³⁸ Kame jaka menkakatniunam pujuinia nuna Yúsrinchuiti. Tuma asamtai jakáa Yúsrinti tíchamniaiti. Antsu iwiaaku ainia nuna Yúsrinti. Ashi Niiniun iwiaarkainiawai” tímiayi.

³⁹ Nuna antukar Israer-shuara jintinniuri “pénker tame, Uuntá” tiarmiayi.

⁴⁰ Tura nuyánka aniastinian arantukarmiayi.

*¿Kristu tutai yana uchirímpiait?
(Mateu 22.41-46; Márkus 12.35-37)*

⁴¹ Nuyá Jesus tímiayi “Yus anaikiamu Kristu tutaisha, ¿itiura “Aya Tawit weeaiti” tárur? ⁴² Warí, Sarmu papinium Tawit níiki juna tátsuk:

“Uunt winia Úuntrun “Akupin pujutainium Winia untsuuru-ini pujustá, tímiayi. ⁴³ Ame nemasrumin núpeteatsain nui pujustá” tímiayi.” Tú áarmaiti.

⁴⁴ Kame Tawitkia, Krístun chicharuk, “winia Úuntur” taisha, ġitiurak Kristu tutai Tawitia pampañmarí átink’?” Tú tímiayi Jesus.

Israer-shuaran jintintin ainia nuyá aneartarum
(Mateu 23.1-36; Márkus 12.38-40; Rúkas 11.37-54)

⁴⁵ Ashí aents Nin anturkatasa pujuiniaí ni unuiniamurín Jesus juna tímiayi:

⁴⁶ “Israer-shuaran jintintin ainia nuyá aneartarum. Ni-isha esaram pushin entsarar wekasataitsar wakeruiniawai. Tura jintiá ti shiir áujtusarat tusar wakeruiniawai; tura iruntai jeanam penkerí pujutainium pujustinian wakeruiniawai. Tura nampernumsha uunt pujutainium pujustaj tusa wakeruiniawai. ⁴⁷ Túrasha wajé jeencha atantainiawai. Túrawar aents nekaracharat tusar ti esaram chichamjai Yúsán áujainiawai. Nincha chíkichjai nankaamas Yus asutiáwartatui.”

21

Wajé ni kuítrín susamia nu
(Márkus 12.41-44)

¹ Yusa Uunt Jeen kuítrintin kuit enketainiam kuítian enkeenan Jesus wáinkiamiayi. ² Tura wajé kuítríncha jimiará uchich kuítian, reara áaniun, enkean wáinkiamiayi. ³ Wáiniak tímiayi “Nekas tájarme, ju wajé kuítrínchaitiat, ashí enkeena nú nankaamas núkap enkeayi. ⁴ Warí, chíkichcha ampirma nuna enkeenawai. Tura niisha aya núchiniak takurmakman ampirmatsuk ashí enkeayi.”

Yusa Uunt Jeen saanaktinian Jesus ujakmiania nu
(Mateu 24.1-2; Márkus 13.1-2)

⁵ Yusa Uunt Jeen kaya shíirmach armia nuna tura chíkich shíirmach susamu armia nunasha chíkich shuar áujmatuk pujuarmiayi. Nuyá Jesus tímiayi:

⁶ “Átum yamáí shiir wáintrumna nu ashí emesnartatui. Kaya eken tramusha mash yumpuuntrartatui” tímiayi.

Amuukatin tsawantin uruku átata nu nekaatin
(Mateu 24.3-28; Márkus 13.3-23)

⁷ Nuyá Jesusan chicharainiak “Uuntá, nusha ġurutaik túrunat’? Ġkame ju túrunatin jeatemamtaisha warijjain nekaattaj’?” tiarmiayi.

⁸ Tutai Jesus tímiayi “Aneartarum; anannawairap. Nekaatarum. Winia náarun pachisar, “wi Krístuitjai” tau ti untsurí jjintrartatui. “Nunka amuukatin jeayi” tu etserkartatui. Tuíniakui anturkarum nemariirap. ⁹ Tura meset chichamsha, kapitián mesetan nájánmasha antukrum

sapijmiakairap. Nusha emka túrunatniuiti. Túrasha nú chichamaik amuukatin tsawant jeashtatui.'

¹⁰ Nuyá tuke chicharuk tímiayi 'Shuar chíkich nunkanmaya shuarjaj mesetnum ti nekas maaniawartatui. ¹¹ Ti uurkattawai; untsurí nunkanam tsukasha, sunkursha ti átatui. Nayaimpinmasha ti áshammai nánkamas túrunattawai. Nujaj Yus ni kakarmarín iniakmastatui.'

¹² 'Tura ju túruntsain atumin pataaturmakar achirmakartatui. Iruntai jeanmasha makurmartai tusar juramkiartatui. Sepunmasha enketmattarme. Tura winia naar páchia asakrumin, akupniunmasha, úuntnumsha juramkiartatui. ¹³ Nuinkia atumin túrutmakrumin wi

túramu etserkatin arutmattarme. ¹⁴⁻¹⁵ Tura atumí nemasri nakitramainiak "wáitaiati" titinian tujinkiarat tusan, winia nekatairjaj chichastinian amastatjarme. Tuma asamtai "Jurakuisha warinia tiniak kíishtumaktaj tusan áetak enentáimsashtatjai" titiarum.'

¹⁶ 'Tura imia atumí aparisha surutmakartatui. Atumí yachisha, atumí shuarisha amikrumsha núnisaran surutmakartatui. Tura máamunka máawartatui. ¹⁷ Tura Winia ajasaru asakrumin ashí aents nakitrampartatui.

¹⁸ Tura penké ishichkisha yajauch awajtamsachartatui. ¹⁹ Katsuntrarmeka iwiaaku átin wáinkiatarme.'

²⁰ 'Ju pepru Jerusarénka aa tanishriin suntar téntakar mat-satu wáinkiumeka, emesratin jeá nekaattarme. ²¹ Nuikia jui Jutía nunkanam pujuinia nu, náinnium pisartin áiniawai; tura jui Jerusarénnum pujuinia nusha juyanka jiinki wétin aini-awai. Tura ajanam pujuinia nusha, péprunam waketkishtin áiniawai. ²² Nu tsawantincha Yus asutiámun wáinkiertatui. Yús-Papinium nu túrunatin yaunchu aarma nu uminkiatstawai nu tsawantin. ²³ Nunkanam ti wáitsatin átatui. Tura ju aents ti asutniawartatui. Tuma asamtai nuwá ajamtin ainia nusha, tura uchi kuírchin takakainia nusha imiá itiurchatan wáinkiertatui. ²⁴ Tura juyá aents mesetnum jákartatui. Tura chikichnaka ashí nunkanam misaawar júkiartatui; tura ya-jaya apach, Yúsnan enentáimtuiniatsna nu, jui Jerusarénnum wayawar najakartatui. Nu túratniunka Yus tsankatkana nuin túrawartatui.'

Aents Ajasu tutai tátintri

(Mateu 24.29-35, 42-44; Márkus 13.24-37)

²⁵ 'Nuinkia etsanmasha, nantunmasha, yáanmasha Yuska ni kakarmarín iniakmak nusháa túrattawai. Nunkanmasha ashí aents páchim enentáimprartatui. Tura nayaantsanam chíchimi ti aku tantáa ajakui ti ashamkartatui. ²⁶ Tura túrunatin ana nuna enentáimsar mayái ashinkiertatui. Warí, nayaimpiniam kakaram ainia nusha peantrartatui. ²⁷ Nuyá Winia, Aents

Ajasu tutain, yuran_uminiam ti shiir ajasan winia_i wáitkiartatui.
²⁸ Nu túrunatin nánkamkui uwempratin jeatemayi tusarum kakaarum shiir enentáimsatarum.'

²⁹ Tura ju chichamnasha nekapmamiayi. 'Tkiu numi tura nánkamas numisha enentáimsatarum. ³⁰ Ju nun_ukanam ni nuké yama pun_ukakmatai "esat jeatemayi" tátsumek.
³¹ Núnisan_u Wi tájana nu wáinkiumeka, Wi ju nun_ukanam akupin ajastin jeatema nu nekaatarum.'

³² 'Tura aents yamaí pujuinia nu jáatsa_{in} nusha ashí túrunattawai. Núnaka paant tájarme. ³³ Nayaimpisha nun_ukasha amuukartatui. Tura winia chichampruka amuukachmini-aiti. ³⁴⁻³⁵ Nu tsawant aya aneachma jeattawai. Ashí aents ju nun_ukanam pujuinia nu, nuna enentáimtsuk pujuinia_i jeattawai. Tuma asamtai atumsha anearum wekasatarum. Ya-jauchiniam emetnarum, aya yurumátniuk, aya umartiniak enentáimtusum, ju nun_ukanam ana nu ti wakerakrumnínkia pé_unger enentáimsatin tujinkiattarme. Nu atsutí tusarum tura nu tsawant aya áwaktamkai_j tusarum pé_unger wekasatarum.
³⁶ Anearum wekasatarum. Túrunattana nu_i katsuntrataj tusarum Yus aujsa pujustarum. Túrarum Aents Ajasu tutai íimmianum pé_unger átaj tusarum túratarum."

³⁷ Tuke tsawant tsawaisha Yusa Uunt Jee_n Jesus unuiniamiayi. Tura káshikia Uriwiu náinnium we-wémiayi. ³⁸ Tura tuke tsawant Yusa Uunt Jee_n Jesus chichaamun anturkatai tusar káshik tariarmiayi.

22

Jesus achiktin chichaman jurusarmiania nu

(Mateu 26.1-5, 14-16; Márkus 14.1-2, 10-11; Juan 11.45-53)

¹ Wakaprutai en_uketaachma tanta yuatin námper, paskua tutai, jeatemamiayi. ² Israer-shuara Pátririsha Israer-shuara jintinniurisha áentsun ashamainia ásar, itiurak máawaintia_i tusar ti enentáimsarmiayi.

³ Nuínkia Iskariúti Jútasan enentáin íwianch wáintiamiayi. Nú Jútaska Jesusa unuiniamuri_{in} páchitkiauyayi. ⁴ Israer-patri úuntrin tura Yusa Uunt Jee_e kapitián pujuarmia nuna werim-iai. Tura Jesusan tu surukminiati tusa niijia_i chichasarmiayi. ⁵ Niisha nuna antukar warasar "kuit amastatji" Jútasan tiarmiayi. ⁶ Niisha "ayu" tinia, aents nékachmanum suruktaj tu enentáimsamiayi.

Kristu jakamu enentáimtustin námper

*(Mateu 26.17-29; Márkus 14.12-25; Juan 13.21-30; 1 Kurin-
 tianum 11.23-26)*

⁷ Wats, wakaprutai en_uketaachma tanta yúatin námper jeamiayi. Paskua tutainium murikchin máatin ármiayi. ⁸ Tura

Jesus Pitruncha, Juánnasha akupeak “Paskua tutai námper iwiaratarum” tímiayi.

⁹ Tutai niisha chichainiak “¿Tuí iwiarat tusamea wakeram?” tiarmiayi.

¹⁰ Tutai Jesus juna tímiayi “Péprunam wetarum. Jearum áishman yumin takaku wekáa wáinkiattarme. Nú áishman nemarsatarum. Tura jeá wayaakui, ¹¹ nú jea nérenniuri chichareakrum “Uunt chichartamuk unuiniamurjai paskua yurumátin ¿tuí aa? turamui” titiarum, tímiayi. ¹² Tákurmin nu nérentin yakí písunam uunt kuártun ashí iwiamun iniakturmastatrume. Nui ii yurumátin iwiaratarum” tímiayi.

¹³ Tutai niisha wear Jesus tímiania tímiatrusan wáinkiarimiayi. Tura paskua namperan nui iwiararmiayi.

¹⁴ Yurumátin jeamtai ni unuiniamurijjai Jesus misanam pujusarmiayi. ¹⁵ Pujusarmatai, Jesus chichaak “Wisha játsuk atumjai ju paskua najanatniun ti wakerimjai, ¹⁶ atakka ju nunkanam atumjai najanashtin asan. Tura antsu Yus akupeana nui jear atak najanattaji” tímiayi.

¹⁷ Nuyá pininkian achik, Yúsan yuminkias, ni unuiniamurin tímiayi “Ju pinin achikrum sunaisatarum. ¹⁸ Atakka ju nunkanam uwa yumirin atumjai umarchattajai, tajarme. Tura antsu Yus akupin ajastin jeamtai atak iijjai umartatji” tímiayi.

¹⁹ Nuyasha yurumkan achik, Yúsan yuminkias puuk susarmiayi. Tura chicharainiak “Juka winia ayashruiti. Winia ayashur atum pénger pujustinnium surunkattana núiti. Winia enentáimtursarum yuatarum” tímiayi.

²⁰ Tura yurumsua amikiarmatai pininkian achik, “Ju pinin winia numparun nakumea asa uwempratin yamaram chicham najanamun nakumeawai. Winia numpar atumnian puartamprattawai” tímiayi.

²¹ Túrasha winia surutkattana nu Wijjai métek ju misanam pujawai. ²² Kame Wi, Aents Ajasuitjiana ju, Yus iwiamua nútiksanak jakattajai. Túrasha Winia surutkana nu nekaatí. Ti asutniattawai” tímiayi. ²³ Nuna antukar “Wíashitiaj, yákit” tunaim ajarmiayi.

Nañkaamantu ana nu

²⁴ “¿Iijjai yaki imiá nañkaamantu aint?” tunaim ajarmiayi. ²⁵ Tura Jesus tímiayi “Ju nunkanam akupin ainia nu, waantu enentáimtumasar akupenawai. Tura akupe-nakui “pénger túrin áiniawai” tuíniawai. ²⁶ Tura atumjainkia nuka atsutí. Antsu nañkaamantu ana nu, uchichia núnik ajastiniaiti; akupeana nusha takarniua núnik ajastiniaiti. ²⁷ Enentáimsatarum. Misanaam pujus yurumna nu, yurumkan ajamana nujai ¿tuá imiá nekas nañkaamantuit? ¿Yurumna nu

nekas nan̄kaamantuchukait? Tura Wisha atumin yurumkan ajamna núnisnak pujajai.

²⁸ Winia itiurchatrun wáinmijai nūi atumsha Wijiāi tuke pujumarme. ²⁹ Tuma asakrumin akupin ajastinian winia Apar surusu asamtai Wisha nútiksanak akupkatniun súajrume. Wi akupkatjana nūi atumsha Wijiāi yurumáttarme, tura Wijiāi umartatrume, tájarme. ³⁰ Tura akupin pujutainium pujusum, Israer-shuar tuse írutkamu akupkattarme tajai.” Tu tímiayi.

*Pítiur “atsá nékatsjai” títinian Jesus ujakmiania nu
(Mateu 26.31-35; Márkus 14.27-31; Juan̄ 13.36-38)*

³¹ Nuyá Uunt Jesus tímiayi, “Nekaatá, Semunká. Trikiu neré tsatsamátniua áintsan̄ Satanás atumi enentáin páchim enentáimtikramprataj tusa seayi. ³² Tuma ain̄ Yus enentáimtustinian kajinmatkiin̄ tusan Wisha Yúsán seamjai. Tura Yúsnum waketkim ame yatsum ikiakárarta” tímiayi.

³³ Tutai Semun̄ tímiayi “Uuntá, sepunam enketmainiakuisha wisha nemarsatajme. Tura mantamainiakuisha métek jakatjai” tímiayi.

³⁴ Tutai Jesus tímiayi “Pitrú, nekas tájame, yamaik atash shiniatsaīn̄ ame menaintiú natsantrurtatme” tímiayi.

Itiurchat winiawai

³⁵ Nuyá Jesus tímiayi “Wisha yurumkajain̄chu, kuítjain̄chu, sapatjain̄chu akupkamjarmena nūi ¿táatramsamkarum?”

Niisha “Atsá penké táatramsachmaji” tiarmiayi.

³⁶ Tutai Nii tímiayi “Antsu yamaikia yurumkan takakkunka takustí, kuítniasha núnisan̄; tura puniancha takakchakka ni pushir̄in̄ suruk punian sumakti. ³⁷ Nekaatarum. Yus-Papinium yaunchu aarma ana nu wi túrunamujaī uminkiat-tawai. Juiti aarma:

Yajauch shuarnum pachikiarmiayi.

Warí, Yus-Papinium ashí Winia aarma ana nu uminkiat-niuiti.”

³⁸ Tutai ni unuiniamur̄i tiarmiayi “Uuntá, juī jimiará puniá awai.”

Tutai Niisha “Asati” tímiayi.

*Jitsemaní ajanam Jesus Yúsán áujsamiania nu
(Mateu 26.36-46; Márkus 14.32-42)*

³⁹ Nuyá Jesus jlinkimiayi. Tura tuke túrin asa Uriwiu náinnium wémiayi. Ni unuiniamur̄isha nemariarmiayi.

⁴⁰ Aj̄ jeá nin chicharuk “Itiurchat winiakui iniaraīj tusarum Yus áujsatarum” tímiayi. ⁴¹ Tuasua amik arantach, kaya nankimiam jeana núnik Jesus wémiayi. Tura Yúsán áujsataj tusa tikishmarmiayi. ⁴² Tikishmar junā tímiayi “Apawá,

pininnum yapá umartinia ántsān Wi wáitsattajna nu waker-akmekā jurutkitia. Tura Wi wakerajna nucha antsu Ame wakeramna nu atí, tajai” tímiayi.

⁴³ Nuyá, ikiakártaj tusa Yusa suntariṇ nayaimpinmayaṇ tarimiayi. ⁴⁴ Tura Jesus imiá wáitias pujak nú kakaram Yúsan áujsamiayi. Tura ni searmarisha numpá ántsān nuṇká kitiawarmiayi.

⁴⁵ Yúsan aajsua amik wajaki ni unuiniamuriṇ werimiayi. Tura kúntuts enentáimmarijiaṇ ti pimpiki kanúu tepenan tarimiayi. ⁴⁶ Nuṇkia chicharainiak “¿Urukamtai kanúu teparum? Itiurchat winiakui iniaraiṇ tusarum nantakrum Yus áujsatarum’ tímiayi.

Jesusan achikiarmiania nu

(Mateu 26.47-56; Márkus 14.43-50; Juan 18.2-11)

⁴⁷ Jesus tuke chichaa pujai, untsurí shuar táarmiayi. Tura nuní eemka Jesusa unuiniamuriṇ Jútas naartin winimiayi. Tura Jesusan mukunatajtsa tarunmiayi. ⁴⁸ Támatai Jesus chicharuk “Jútasá, ¿Aents Ajasu tutai mukunamek surutkat-tam?” tímiayi.

⁴⁹ Jesusjai pujuarmia nu, túmamun wáinkiar “¿Uunt puniajai íjiuartatjik?” tiarmiayi. ⁵⁰ Tura chikichik Patri uuntriṇ takarniuriṇ kuishin untsuriṇ tsupirkamiayi.

⁵¹ Tura Jesus tímiayi “Iniaisatarum.” Nuna tinia ni kuishin antiṇ tsuarmiayi. ⁵² Nuyá Israer-patri úuntriṇ, Yus-jea úuntriṇcha, tura pepru úuntriṇcha, Nin achiktaj tusa tari-armia nuna chicharuk “¿Wisha kasakaitiaj. Urukamtai puniajaisha numijiaisha tarutniuram? ⁵³ Nuik Yusa Uunt Jeen tuke tsawant atumjaiṇ pujumaj nuṇ achirkachmarme. Túrasha átum kiritniumia kakarmajaiṇ nupetkatin yamá tsawantin tsanṇkatkamuitume” tímiayi Jesus.

Pítiur “Jesusnaka nékatsjai” tímiania nu

(Mateu 26.57-58, 69-75; Márkus 14.53-54, 66-72; Juan 18.12-18, 25-27)

⁵⁴ Nuṇkia Jesusan achikiar emetawar Israer-patri uuntriṇ jeen júkiarmiayi. Tura Pítrusha íkian nemarki wémiayi. ⁵⁵ Tura aach jinia ikiapármarmiayi. Túrawar anamuk pujuarmiayi. Pítrusha nijiaṇ pujusmiayi. ⁵⁶ Tura nuwá, Patriṇ takarniuriṇ amia nu, Pítiur jinia anamuk pujan wáiniak “Ju áishmansha Nijiaṇ pujumiayi” tímiayi.

⁵⁷ Tutai Pítiur chichaak “Nuwá, Nin nékatsjai” tímiayi.

⁵⁸ Tura árusan chíkich nin wáiniak “Amesha Niin páchitkaiatme” tímiayi.

Tutai Pítiur tímiayi “Atsá. Wikia áinkia páchitkiatsjai” tímiayi.

⁵⁹ Chikichik ura nan̄kaamasmatai ch́kich apach chichaak “Nekas ju áishman̄sha Niij̄jai pujumiayi. Warí, niisha Kariréanmayan̄chakait” tímiayi.

⁶⁰ Tutai Pítiur chichaak “Ame támena núnaka nékatsjai” tímiayi. Nú chichamaik Pítiur chicháa pujain̄kⁱ atash shiniuk-miayi. ⁶¹ Tura nuin̄kia Uunt Jesus Pítrun apajas ísmiayi. Túra “atash shiniatsain̄ ame menaintiu natsantrurtatme” Uunt Jesus timia nuna enentáimpramiayi. ⁶² Nuyá Pítiur jiinki ti útmiayi.

Jesusan wishikrarmiayi

(Mateu 26.67-68; Márkus 14.65)

⁶³ Áishman̄ Jesusan wáiniarmiania nu ti wishikiainiak awat-tiarmiayi. ⁶⁴ Jiin epetkar yapiniam awattiar chicharainiak “Nekamata, ya awatama” tiarmiayi. ⁶⁵ Tura katsekainiak ti untsurí chikichnasha nan̄kamas tiarmiayi.

Uunt Iruntainiam Jesusan ejeniarmiania nu

(Mateu 26.59-66; Márkus 14.55-64; Juan̄ 18.19-24)

⁶⁶ Tsawarmatai, Israer-shuara úntrisha, Israer-patri úntrisha, Israer-shuara jintinniuirisha iruntrar ni iruntair̄in ejeniarmiayi. Nūi chicharainiak ⁶⁷ “Paant titiá. ¿Yus anaikiamu Kristu tutaia núkaitiam?” tiarmiayi.

Tutai Jesus tímiayi “Wi “ee” tákuisha, “nekasaiti” tíchattarme. ⁶⁸ Tura Wi aníamsha áirkashtatrumé, túrasha akuptukchat-tarme. ⁶⁹ Tura wárik Wisha Aents Ajasuitjiana nu, ashí nan̄kaamaku ajasan, Yusa untsuur̄in̄i pujustatjai” tímiayi.

⁷⁰ Tutai niisha tiarmiayi “¿Nuin̄kia amesha Yusa Uchir̄inkaitiam?”

Tutai Jesus tímiayi “Ee, Wíitjai, átum Winia túrutrum núnisnak.”

⁷¹ Tutai niisha tiarmiayi “Warí, ¿iisha ch́kich ujatkat tusar atsumajik? Imia nin̄ki chichaamu antukchajik” tiarmiayi.

23

Piratuí Jesusan júkiarmiania nu

(Mateu 27.1-2, 11-14; Márkus 15.1-5; Juan̄ 18.28-38)

¹ Nuyá ashí Uunt iruntrarmia nu wajatkiar Rúmanmaya akupin Piratuí Jesusan júkiarmiayi. ² Nūi jeawar, Piratun chicharainiak “Ju áishman̄ íi shuaran awajimtikiar enentáimtikiaiania nu nekaamji. Rúmanmaya uunt akupin Séasaran kuit akiktinian suritramaji. Tura nu arant Nīn̄ki, akupin Kristu tutaintjai, tawai” tiarmiayi.

³ Tutai Piratu Jesusan chicharuk “¿Ame Israer-shuara akup-niuir̄inkáitiam?” tímiayi.

Tutai Jesus tímiayi “Ee, núitjai, ame támena núnisnak.”

⁴ Nuyá Israer-patri úuntrincha tura aents nuj iruntrarmia nunasha Piratu chicharainiak “Ju áishman tunaan túran penké wáinkichuitjai, tajai” tímiayi.

⁵ Túrasha niisha nú kakantar chicharainiak “Antsu nekas ashí Jutía nunkanmaya aentsun ni unuiniana nujai akaje-nawai. Kariréa nunkanmaya nankaamas ímiajaisha tayi” tímiayi.

⁶ Piratusha nuna antuk “Nu áishman ¿Kariréanmayan káit?” tímiayi.

⁷ “Ee” tuiniakui, Erutisan akuptukarmiayi. Erutiska Kariréanmaya aentsun akupniuyayi. Túmaitiat nu tsawantin Jerusarénum ishichik tsawant pujusmiayi.

⁸ Erutiska Jesusan ístaj tusa ti wakerimiayi. Jesusa túramurin áujmatman ti antukmiayi. Tuma asa, “Wí íimiai aents tujintiamun túrashtimpiash” tusa Jesusan wáiniak warasmiayi.

⁹ Jesusan ti nukap aniasmiayi; túramsha penké áimkiachmiayi.

¹⁰ Nuisha Israer-patri úuntrisha, tura Israer-shuara jintinni-urisha yajauchiiti tusar charaatum awajiarmiayi. ¹¹ Tura Erutissha ni suntaríjjai Jesusan yajauch enentáimtuiniak Nin wishikiainiak ti penker pushin, akupniu entsatairiya ánniun, áentsrarmiayi. Nuyasha Erutis ataksha Piratuín akupkamiayi.

¹² Túram nu tsawant Piratu Erutisjai nawamnaikiarmiayi. Kame yáunchuka nemasnaikiau ármiayi.

Jesusan “mantamnati” tiarmiania nu

(Mateu 27.15-26; Márkus 15.6-15; Juan 18.39–19.16)

¹³ Nuyá Israer-patri úuntrin aentsu úuntríjjai tura penké aentsjai Piratu ikiaanak tímiayi ¹⁴ “Ju áishman aentsu awajimikiui tusarum itiartintrume. Túrasha átum ímprumnin anintrusan yajauch átum tárugna nuna penké nekarachjai. ¹⁵ Erutissha núnisaj yajauchin nekaachai. Warí, jui awainkichmaka. Nuikia páantchakait jú aishman jakamnia tunaanka túrichuiti” tímiayi.

¹⁶⁻¹⁷ Túraitiat tuke túrutai asamtai, jisat jeakui sepunmaya chikichik áishman kan Piratu ankant akupkatin ámiayi. Tuma asamtai, nii chichaak “juna asutián awematjai” tímiayi.

¹⁸ Tura aencha iruntrar ti unsumainiak “Atsá; jucha. Ju nakitijai. Antsu Parapás akupkata” tiarmiayi. ¹⁹ Nu Parapássha akupniun nakitiak mesetan najana asa tura mankartin asa sepunam enkeamuyayi.

²⁰ Piratuka Jesusan akupkattsa wakerak ataksha aentsun áujsarmiayi. ²¹ Túrasha nú arant unsumainiak “Atsá. Krúsnum mantamnati” tiarmiayi.

²² Tura ataksha Piratu chicharainiak “¿Urukamtai. Warí tunaan túrait? Jakamnia tunaan túrachiasht tusan, aniasan penké nekarachjai. Asutián akupkattjai” tímiayi.

²³ Tura niisha kakaram untsumainiak “Jesus mantamnati” tiarmiayi. Kame aencha tura Patri úuntriſha ti untsumaina áſarmatai ni wakeramuri tsan̄katnakarmiayi. ²⁴ Nii wakeri-armia nuna Piratu “túrattajai” tímiayi. ²⁵ Tuma asa Parapásan, mesetan najanin tura man̄kartin amia nuna akupkamiayi. Tura Jesusnaka ni wakeramun túrawarti tusa íktusarmiayi.

Jesusan krúsnum ajintrurarmiania nu

(Mateu 27.32-44; Márkus 15.21-32; Juan̄ 19.17-27)

²⁶ Jesusan jukitiasa pujuini*ai* Serini nun̄kanmaya Semun̄ ni pépruriya Jerusaren̄num yama jeamiayi. Nin achikiar, Jesusa krus*ri* ayantkar “ni ukur*i* wetá” tiarmiayi.

²⁷ Untsur*i* aents Jesusan nemariarmiayi. Tura untsur*i* nuwasha ti kuntuts enentáimiainiak úutkiar tura wawa ajakiar wearmiayi. ²⁸ Túmainiakui Jesus nin iis, “Jerusaren̄numia nuwatiram Winia enentáimtursarum úuttiirap. Antsu atumniak tura atum*i* uchir*i* enentáimtusrum úuttiarum. ²⁹ War*i*, ti iturchat tsawant jeawartatui. Tuma asamtai “Uchirtichu ainia nu, ajaprukchana nu tura amuntsachu ainia nu, chíkich aentsj*ai* nan̄kaamas pé*ñ*ker pujuiniawai” tiartatui. ³⁰ Nu tsawant*ai* aents chicharainiak “Náint in nekentmak yuturmaartai” tiartatui. ³¹ War*i*, numi sameka áinis yajauch aya nán̄kamna a*ñ*sha ju iturchat átsuk. Tura numi kukaru ainkiamtai itiurak nú yajauch túrunachat*i*.” Tu timiayi Jesus.

³² Tura Jesusj*ai* krúsnum maatai tusar jímiar yajauch áishman̄kan júkiarmiayi. ³³ Karawír nain tutainium jeawar Jesusan krúsnum ajintrurarmiayi. Tura Jesusa untsuurin*i* chikichík yajauch áishman̄kan tura ni menaarini chíkich yajauch áishman̄kan núnisa*ñ* krúsnum ajintrurarmiayi.

³⁴ Tura Jesus krúsnum ajintraku pujuram, chichaak “Apawá, tsan̄kurarta. Nii áitkiainia nuna nékainiatsui” tímiayi.

Tura suntar pujuarmiania nu, yaki Jesusa pushir*i* jukit tusar nakurusarmiayi. ³⁵ Péprunmaya aents ii wajatiarmiayi. Tura uunt armia nusha Nin wishikiainiak “Chikichnaka uwemtikniuiti. Wats, yamá*i* nekas Yusa anaikiamur*i* Kristu tútainkiun̄ka imia Ni*ñ*ki uwémprati” tiarmiayi.

³⁶ Suntarsha Nin wishikrarmiayi. Tariat churuínian aartai tusar awajiarmiayi. ³⁷ Tura chicharainiak “Amesha nekas Israer-shuara uunt akupniurinkiumka amek uwemprata” tiarmiayi. ³⁸ Tura muuknumaani, Kriaku chichamj*ai*, Rúmanmaya apach chichamjaisha tura Israer chichamjaisha ju áarar anujkam*u* ámiayi: *JÚITI ISRAER-SHUARA UUNT AKUPIN*

³⁹ Chikichík yajauch áishman̄ nui ajintruamu amia nu kátsekeak chicharuk “Amesha nekas Yusa

anaikiamurintkiumka amek uwemprata tura incha uwentikramprata” tímiayi. ⁴⁰ Tura chíkich ni tsaniakmarin kakantar chicharuk “¿Amesha Nijijai métek asutniátasa pujayatam, Yus ashamatsmek? tímiayi. ⁴¹ Iikia yajauch asar wáitsatniuitji; ii tunaari akikmakur wáitiaji. Antsu ju áishmanka yajauchin túrichuiti” tímiayi.

⁴² Nuyá Jesusan chicharuk “Amesha akupin ajasam wini-asha enentáimtursata” tímiayi.

⁴³ Tutai Jesus chicharuk “Nekas tájame, jakar shiir puju-tainium yamá tsawant Wijijai pujustatme” tímiayi.

Jesusa jakamuri

(Mateu 27.45-56; Márkus 15.33-41; Juan 19.28-30)

⁴⁴ Tutupin ai ashí nunkanam ti kirit ajasmiayi. Tura menaintiú ura nankaamasu ain, nantu nunkaach ajassha tuke kirit ámiayi. ⁴⁵ Tsawái nantusha mushatmarmiayi. Tura Jerusarénum Yusa Uunt Jeencha tarach ajamu aa jímiapetek nakaakamiayi. ⁴⁶ Nuyá Jesus untsukum “Apawá, winia wakantrun Amiin ikiuajai” tímiayi. Nuna tinia jakamiayi.

⁴⁷ Suntara kapitíantri nu túrunamun wáiniak, Yusa náarin shiir awajeak “Jusha imiá nekas péñker áishmankuyi” tímiayi.

⁴⁸ Tura untsurí aents pujuarmia nu, nu túrunamun wáinkiar ti kuntuts enentáimiainiak ni netsepen paat awatiar waketkiarmiayi. ⁴⁹ Tura Jesusa amikrisha tura nuwá Kariréanmaya Nin nemariarmia nusha íkian wajasar ii wajarmiayi.

Jesusan iwiarsarmiania nu

(Mateu 27.57-61; Márkus 15.42-47; Juan 19.38-42)

⁵⁰ Naka enentáimin péñker áishman ámiayi ni naari Jusé. Arimatéa pepu Jutía núñkanam ana nuyayuyayi. Israer-shuara Uunt Irontairin páchitkiauyayi. ⁵¹ Yus ju nunkanam akupin ajasat tusa Jusé nakas pujumiayi. Tuma asa Uunt Irontainium Jesusan túrawarmia nuna nakitmiayi. ⁵² Tuma asamtai Piratuí we Jesusa ayashin seamiayi. ⁵³ Piratu “ayu” takui, Jesusa ayashin krúsumiá jusa tarachjai pen-uar kaya táurmanum iwiarsamiayi. Nu táurmanum chíkich iwiarsachmauyayi. ⁵⁴ Iwiaratin tsawantai, ayampratin tsawant tsawastatuk ajasmatai túrunamiayi.

⁵⁵ Tura nuwá Kariréanmaya jukiniutak Jesusan nemarsarmia nusha iwiarsamunam weriar, Jesusa ayashi itiur ikiusmait nuna iisarmiayi. ⁵⁶ Iisar ikiuak ni jeen waketkiarmiayi. Tura Jesusa ayashi mejeenin tusar kunkuinian iwiarmiayi. Tura ayampratin tsawantai, Israer-shuar akupkamun umikiar ayamprarmiayi.

24

*Jesus nantakmiania nu**(Mateu 28.1-10; Márkus 16.1-8; Juan 20.1-10)*

1 Tumintin káshik kun̄kuinian iwiaramun júkiar nu nuwá Jesus iwiarsamunam weriarmiayi. Tura chíkich nuwásha atampriarmiayi. 2 Tura iwiarsamu kaya atutkamu urani aan wáinkiararmiayi. 3 Tura wayawar uunt Jesusa ayáshin wáinkiacharmiai. 4 Wáinkiachu ásar ashamkarmiayi. Tura “itiurkatjik” tiarmiayi. Tumaj̄ jimiara áishman̄kan pushin wincharpatniun entsaru nin ayaamach wajainian wáinkiararmiayi. 5 Nuna wáinkiar ti sapijmiainiak tsuntsumawarmiayi. Tumaui nu áishman̄ chicharainiak “¿Iwiaakusha urukamtai jakaanumsha earum? tiarmiayi. 6 Jui pujatsui. Antsu nantakni. Nékatsumek. Niisha Kariréanam tuke pujus 7 “Wi, Aents Ajasuitjiana nu, yajauch aentsnum surunkattajai. Túran krúsnum mantamnattajai. Tura menaintiú tsawantaj̄ nantaktiatjaj̄” turamchamkarum” tímiayi.

8 Nuna takui Jesus timian enentáimprarmiayi. 9 Tura iwiarsamunmaya waketki taar, Jesusa unuiniamur̄in auntse armia nuna tura chikichnasha ashí nu túrunamun ujakarmiayi. 10 Jesusa unuiniamur̄in ujakarmia nu ju áiniawai: Maktaranmaya Marí, Juánasha, Jakupu nukurí Marisha, tura chíkich nuwajaj̄. 11 Tura Jesusa unuiniamur̄isha nuwá tuíniakuisha nekasaiti tu enentáimtsuk “wáuruk tuíniawai” tiarmiayi.

12 Túrasha Pítrusha jiinki Jesus iwiarsamunam tséken̄ki werimiayi. Jeá, init iis, aya tárachik tepenan wáinkiamiai. Tura túrunamia nuna ti enentáimiar ni j̄en waketkimiai.

*Emaús wetaj̄ jintianmaani túrunamia nu**(Márkus 16.12-13)*

13 Nu tsawantaj̄k Jesusa nemarniur̄i j̄imiar Emaús péprunam wéarmiayi. Emaúska Jerusarénum̄ia auntse kirumitru jeá pujawai. 14 Túrunamia nuna chichaki wearmai. 15 “Itiurkit” tu aujmatki weenaj̄ imia Jesus taa nūj̄ páchiniak nij̄jaj̄ wearmai. 16 Tura wáinkiarat nekaashtin asamtai yait nekaacharmiayi.

17 We-wénakua Jesus chicharainiak “Jintiasha ¿warí áujmatkirum wéarum? ¿Urukamtai kúntuts enentáimprum?” tímiayi.

18 Chikichik, Kreupas náartin chicharuk “Jerusarénum̄ túruna nuna ashí nékainiawai. ¿Ámeke amekék túrunamia nu nékachu páchitkiam?” tímiayi.

19 Tutai Jesus tímiayi “¿Warí urukait?”

Tutai tiarmiayi “Entá, Nasarénumiá Jesusa túrunamuri taji. Niisha Yúsnan etserin asa Yusa kakarmarijiaí chichasmiayi tura nuna kakarmarijiaí takasmiayi. Núnaka ashí aents nékainiawai. ²⁰ Tura ii Pátriri uuntri tura ii pépruri uuntri “tunáa jakamnia túrayi” tusar “krúsnum mantamnati” tiarmiayi. ²¹ Tura ii Israer-aentstin uwentikrampratin tu enentáimsamji. Tura ni maamusha menaintiú tsawant nankaamasai. ²²⁻²³ Túrasha ii nuwá ni iwiarsamunam yamaí káshik weriar ni ayáshin wáinkiacharmai. Tura “Yusa suntari wáinkiaji tura “Jesus iwiaakuiti” túramji” tiarmai. Nuna tu ujatmakakrin ti enentáimpraji. ²⁴ Nuyá íi shuar iwiarsamun weriar, nuwá tiarmia tímiatrusan wáinkiarimiayi. Tura Jesus-naka wáinkiacharmai.” Tu ujakarmai Jesusan.

²⁵ Nuyá Jesus nin chicharainiak “Enentáimchaitrume. Ashí Yúsnan etserin tiarmia nu wau enentáimtatsrume. ²⁶ ¿Yusa anaikiamuri, Kristu tutai, shiir awajnatuk ti wáitsashtinkiait?” tímiayi.

²⁷ Tura nuyá Yus-Papinium Muisáis aarmia nuyá jukin ashí Yúsnan etserin ni túrunatniurín áararmia nuna jintintiatasa nankamamiayi.

²⁸ Ayu, nii wearmia nú peprunam jeawarmiayi. Tura Jesuska nui nankaamaki wétaj tau ajamiayi. ²⁹ Tura niisha chicharainiak “Weep. Iijiaí pujustá. Warí, nantu akaikiyi, kirit ajatemsai” tiarmiayi.

Tutai Jesus niijiaí pujustaj tusa wayamiayi. ³⁰ Tura niijiaí irunar misanam pujus, yurumkan achik, Yúsán yuminkias nincha puuk súsarmiayi. ³¹ Nu chichamaik, ni jii uran-niua núnikiarmatai Jesusan nekaawarmiayi. Tura Niisha nú chichamaik menkakamiayi. ³² Tura nu shuarsha mai tunai ajainiak “Jintia winis Niisha Yus-Papin jintintramuk nekas ii enentáin shiir enentáimtikramprachmakaj” tiarmiayi.

³³ Nuyá, Emaúsnumiá wárik jíinkiar Jerusarénum waketkiarmiayi. Nui Jesusa unuiniamurín auntse armia nuna tura chíkich shuar Jesusan nemariarmia nunasha iruntrar pujuinian wáinkiarimiayi. ³⁴ Auntse armia nusha tiarmiayi “Uunt Jesus nekas nantakni. Semun Nin wáinkiaiti.”

³⁵ Tutai niisha jintiá túrunamun ujakarmiayi. “Jesus yurumkan ajaamakui nui nekaamji” tiarmiayi.

*Ni unuiniamurín Jesus wantintiu kmiania nu
(Mateu 28.16-20; Márkus 16.14-18; Juan 20.19-23)*

³⁶ Nuna áujmatuk pujuiniaí Jesus aya aneachma ajapén was-jas “Shiir enentáimsatarum” tímiayi.

³⁷ Nuna antukar, ti sapijmiakar, wakanchashit, enentáimsarmiayi. ³⁸ Tura Jesus chicharainiak “¿Urukamtai sapijmiakrum wakanchashit, tu enentáimsarum? ³⁹ Winia

uwejrusha, nawersha íirtustarum. Wíkiitjai. Takarsa íirsatarum. Warí, wakancha ayashtinkiait, ukunchtinkiait” tímiayi.

⁴⁰ Nuna tinia ni uwejéncha nawéncha iniaktusarmiayi. ⁴¹ Warainiyat sapijmiainia ásar, Niimpiashit tu enentáimtusarmiayi. Tuma asantai, nin chicharainiak “¿yurumak takakrumek?” tímiayi. ⁴² Takui, namaknasha, míshkincha súarmiayi. ⁴³ Tura Jesus nuna achik niisha íimiainiamunman yuamiayi. ⁴⁴ Tura nin tiarmiayi “Winia túrutawarma nuna, Wi atumjai nuik pujusan tímiajrume. Nekas uminkiatniuyayi. Iis, wi túrunatniurun Muisáis aarmia nusha, Yúsnan etserin aarmia nusha, tura Sarmu papinium aarma ana nusha ashí uminkiatniuyayi” tímiayi.

⁴⁵ Nuyá Yus-Papinium aarman jintintiwarmiayi. ⁴⁶ Jintintiuk juna tímiayi: “Yusa anaikiamurí Kristu tutai jaka menaintiú tsawantai jakamunmaya nantaktinia nu yáunchuk áarmauyayi. Tura Wi nú Krístuchukaitiaj. ⁴⁷ Winia náarun pachisar, Jerusarénumiá nan̄kama ashí nun̄kanam nu chicham etsernaktinia nu áarmauyayi. Shuar ni tunaari tsan̄kurnarat tusar enentáin yapajiát̄niuiti. Tura tu etserkatniua nusha yaunchu áarmauyayi. ⁴⁸ Tura wi túrunamu neka asarum etserkatniuitrume, tímiayi. ⁴⁹ Tura winia Apar, winia Wakantrun susartatjai, turammarumna nuna akuptuktatjarme. Tura nayaimpinmaya táatsāin jui Jerusaré̄n péprunam pujústárum. Taa ni kakarmar̄in suramsattarme.” Tu tímiayi.

Jesus nayaimpiniam wakamiania nu

(Márkus 16.19-20)

⁵⁰ Nuyá Jesus Jerusaré̄n péprunmaya júkiar Petania péprunam ejeniarmiayi. Tura nūi ni uweje takuí, “Yus yáinmakarti” tímiayi. ⁵¹ Nuna tu pujus, nīiya kanakmiayi. Tura nayaimpiniam junakmiayi. ⁵² Ni unuiniamur̄isha Nin imiá shiir enentáimtusarmiayi. Tura nuyá ti warasar Jerusaré̄num waketkiarmiayi. ⁵³ Tura Yusa Uunt J̄een pujusar Yusa náar̄in shiir awajú pujuarmiayi. Áukete.

Yúsán Shiir Chichamen JUAN aarmia nu

Chícham aents ajasmiania nu

¹ Ashí nan̄kamamia nú yaunchu Yusa Uchirí tuke pujuyayi. Niisha Yúsán ti paant awajeakui, Chícham tíminiati. Chichamsha Yusjái pujuyayi. Chichamsha Yúsauyayi.

² Yáman̄kamtaik Niisha pujuyayi Yusjái. ³ Ashí najanamu ainia nu Niijjái najanamuiti. Nii najanachmaka pen̄ké atsawai. ⁴ Niisha iwiaaku átinia nérenniuti. Nu iwiaaku atincha tsáapninia áinis Yusna ana nuna ashí shuaran paant nekamtikiamniati. ⁵ Nu tsáapnin kiritniunam tsáapniawai. Tura kiritniusha tsáapninian ikiajniaktinian tujinkiaiti.

⁶ Áishman̄ ámiayi, Yus akupkamu, ni naari Juan̄. ⁷ Niisha tsáapnin chichaman etserkatajtsa támiayi. Nuna étseruk ashí umirkarat tusa támiayi. ⁸ Juan̄sha nu tsáapninchauiyayi. Áyatik akupkamuyayi tsáapnin chichaman etserkat tusa. ⁹ Nu tsáapninkia nekas tsaapniniaiti. Ju nun̄kanam taa ashí shuaran enentáin tsáapniartiniati.

¹⁰ Chichamsha taramiayi ju nun̄kanam. Tura nun̄kasha ni najanamu ain̄, nun̄kaya aents Nin nekaacharmiayi. ¹¹ Támiayi ni nun̄kén tura ni shuarsha ni enentáin itiaacharmiayi. ¹² Tuma ain̄ chíkich shuar Nin enentáimtuiniak ni enentáin itiaawarua nuna Yusa uchirí ajastinian Yus tsan̄katkamiayi. ¹³ Niisha Yusa uchirí ajasar ataksha númpentin ayashímkiacharmai. Áentsnúmiā akiiniachu áiniawai niisha. Áishman̄ wakeramujaisha akiiniacharmai. Antsu Yúsnumiā akiiniawaru ásar Yusa uchirí áiniawai.

¹⁴ Nú Chichamsha ayashtin ajas iijjái núkap tsawant pujumiayi. Yusa anen̄kratairijjái piakuyi. Aya nekasa nunak chichaamiayi. Núnisan̄ ni pen̄kerin̄, aya Yusa Uchirí chíkichkia nu takusminia nuna iniakmamiayi. Nusha iisha paant wáinkiaitji. ¹⁵ Juan̄sha Nin neka asa, étseruk tímiayi “Júiti wi tímiay nu: “Winia ukuruin̄ winittiana nu wíjjaīnkia émkaiti. Maa, wi atsaisha tuke pujuyayi” tiniujai.” Tu etserkamiayi.

¹⁶ Chichamsha ti anen̄kartin asa ashí pen̄ker ana nuna iniaitsuk súramji. ¹⁷ Yusa akupeamurin̄ Muisais yaunchu jintintraiti, antsu aneatniuncha tura ashí nekas ana nunasha Jesukristu jintintraiti. ¹⁸ Chikichkisha Yúsán pen̄ké wáinkiachuiti. Tura ni Uchirí chíkichkia nu tuke Niijjái tsaníaku asa Yúsán paant awajturmasuitji.

Imiakratin Juan Jesukristunun etserkamiania nu
(Mateu 3.11-12; Márkus 1.7-8; Rúkas 3.15-17)

¹⁹ Jerusarénnumiá Israer-shuar ni Pátriríncha Riwí-shuarjai Juanakai akupkarmiyai yákit tusar.

²⁰ Inintruiniakui paant ujakmiyai. “Wikia Krístuchuitjai” tímiyai.

²¹ Takui ataksha aniasarmiyai “¿Nuikia yáitiam. Yúsnan etserin yaunchu amia nú Eríaskaitiam?” tiarmiayi.

Juansha “Atsá, núchaitjai” tímiyai.

Nuyá ataksha aniasarmiyai “Nuikia ¿Yúsnan etserin tátinia núkáitiam?” tiarmiayi.

Niisha “Atsá” tímiyai.

²² Takui “¿Nu arantcha yáitiam. In akuptamkajnia nusha warí títiataj. Warintia enentáimiam?” tiarmiayi.

²³ Juansha tímiyai “Yúsnan etserin Isayas yaunchu timia núitjai. Niisha áarmiyai “Aents atsamu nunkanam shuar untsumui “Ii uuntri jintí naka awajsatarum,” tu untsumui.” Núnaka Isayas áaruiti. Tura wikia untsumna nú shuaraitjai” tímiyai.

²⁴ Juanjai chichainiakka Pariséu akupkarma ármiyai.

²⁵ Niisha tiarmiayi “Nuikia Krístuchuitiatmesha, Eríashaitiatmesha, Yúsnan etserin tátinia núchaitiatmesha ¿urukamtai imiakratam?” tiarmiayi.

²⁶ Juansha tímiyai “Wikia entsajain imiakratjai. Tura átum írutramunam shuar átum nékatsrumna nu wajaawai. ²⁷ Niisha winia ukuruiní winiyat wíjiainkia ti nankaamantuiti. Nii ti péñker asamtai wisha ni sapatri jinkiamuríncha atitrach-miniaitjai” tímiyai.

²⁸ Nuka Petapara peprunam túrunamiyai. Petaparasha Juan imiakratmia nuí Jurtan entsa amain amai.

Jesus Yusa Murikrinti

²⁹ Nuyá kashin Juan Jesusan winian wáiniak tímiyai “Iis-tarum. Núiti Yusa Murikri ashí aentsu tunaarin júana nu.

³⁰ Núiti wi timiaj nu, “Winia ukuruí winiana nu wíjiainkia nankaamantuiti. Tura wi atsaisha tuke pujuyayi” tímiajai.

³¹ Wisha Nin nekaachmajai. Tura ashí Israer-shuar Nin nekaawarat tusan imiakin támajai” tímiyai.

³² Nuyá tímiyai “Yusa Wakanin yámpitsa núnin nayaimpin-mayan táarun wáinkíamjai. Tura ekemsamai. ³³ Nu túruntsain tuke Nin nekaachmajai. Tura Yuska winia imiakrattinian akuptak turutmiai “Chikichik shuarnum Yusa Wakaní tara ekemsa wáinkiam, nujai nekaattame. Yusa Péñker Wakaníjjai imiakratniua núiti” túrutmiyai. Tura nujai Nin nekaamjai. ³⁴ Yamaikia wainkia asan ti paant nékajai tí nekas Yusa Uchirínti” tímiyai Juan.

Jesusa unuiniamuri emka armia nu

³⁵ Kashincha ataksha Juan nui wajasmiaiyi ni unuiniamuri jímíarjái. ³⁶ Jesussha nui nan̄kaamakui Juan tímiayi “Iistarum, Yusa Murikrí áuwiti.”

³⁷ Juan̄ka unuiniamuri nuna antukar mai Jesusan pataatukarmiaiyi. ³⁸ Jesussha úkumur ímias nu jímíaran wininian wáinkíamiayi.

Tura tímiayi “¿Ya earum?”

Niisha “Uuntá, ¿tuí pujam?” tiarmiayi.

³⁹ Jesussha tímiayi “Wats, iitiarum.”

Niisha wear ni pujutairin wáinkiaromiaiyi. Tura áan̄kú ajas-matai nu tsawantai nui kintiamprarmiayi.

⁴⁰ Juan̄ka chichamen antukar Jesusan pataatukaruka jímíar ármiaiyi. Chikichik Antresauyayi. Niisha Semun̄ Pitru yachiiyayi. ⁴¹ Antressha wárik ni yachi Semun̄kan eaktajtsa wémiayi. Tura wáiniak “Misías wáinkiaji” tímiayi. Misíaska ni chichamen “Kristu” tawai. Krístuka Israer-shuaran yain̄kiarat tusa Yus anaikiamuiti.

⁴² Nuyá Antres ni yachi Semun̄kan Jesus pujamunam jukimiayi. Jesussha wáiniak tímiayi “Ámetme Semun̄, Junasa uchirí. Túrasha Sépas átatme.” Sépaska Israer-shuar chicham-num kaya tawai. Tura Kriaku chichamnum nuka Pítruiti.

Jesus Jiripijiai tura Natanaérjai chichasmiania nu

⁴³ Kashincha Jesus Kariréa nun̄kanam wétajtsa pujumiayi. Tura Jiripin wáiniak “Nemartusta” tímiayi.

⁴⁴ Jiripisha Petsaitia péprunmayayuyayi. Antressha Pítrusha nu péprunmayayuyayi. ⁴⁵ Nuyá Jiripi Natanaéran eakmiayi.

Tura wáiniak tímiayi “Muisais Yus akupkamu papinium “Anaikiamu tátatui” tu áarchamkia. Yaunchu Yúsna et-serniusha ujakcharmakia. Nu shuar wáinkiaji. Jesusaiti, Jusé uchirí. Nasarét péprunmayaiti.”

⁴⁶ Natanaérsha tímiayi “¿Nasarétnumia péñker shuar áminkiait?”

Jiripisha “Winim ítiá” tímiayi.

⁴⁷ Jesussha Natanaéran tíjiuch winian wáiniak tímiayi “Ju shuar iistarum. Ti péñker Israer-shuaraiti. Pen̄ké anan̄kartichuiti.”

⁴⁸ Natanaérsha tímiayi “¿Itiur nékaram?”

Jesussha tímiayi “Jiripi tuke untsurmatsain̄ wáinkíájme ikiu numirin ejamkam wajamin.”

⁴⁹ Natanaér nuikia tímiayi, “Uunta, nekas Yusa Uchirínme. Israer-shuar akupniuitme” tímiayi.

⁵⁰ Tura Jesus tímiayi “¿Aya wi “Ikiu numirin ajamkam wajamin wáinkíájme” takui Winia enentáimturamek? Antsu nuna nan̄kaamas nekaachmin ana nusha wáinkíáttame” tímiayi.

⁵¹ Nuyasha Jesus tímiayi “Wi nekas tájarme, Aents Ajasu asan atumsha nayaim uranmianum Yusa suntarí Winin tara waka ajainia wáinkíáttarme.” Tu tímiayi.

2

Nuatnaikiatin jísat Kaná péprunam ámiania nu

¹ Menaintiu tsawant nan̄kaasmatai nuatnaikiatin jísat Kaná péprunam ámiayi. Kaná péprusha Kariréa nun̄kanmauyayi. Jesusa nukurísha nuí pujumiayi. ² Jesussha ni unuiniamurísha nu nuatnaiyamunam ipiaamu ármiai.

³ Umutai amuukamtai Jesusa nukurí tímiayi “Umutai amuukai. Pen̄ké takakainiatsui.”

⁴ Tura Jesus tímiayi “Nukuá, ¿urukamtai Winia túrutam? Iniáitiústá. Winia kakarmar iniakmastin jeaatsui.”

⁵ Nuyá umutain wáinmainia nuna ni nukurí tímiayi “Ashí ni tana nu umiktárum.”

⁶ Nuí kayajai najanamu yumi-yaraatai sais (6) ámiayi. Nu yaraatainmaya Israer-shuar ni ewejéncha ni nawéncha ni-jiamau ármiai Yus shiir enentáimtusarí tusar. Chíkich chíkich yaraatainium uchenta (80) rítrusha, sian̄ (100) rítrusha yumi wayamniauyayi.

⁷ Nuyá Jesus umutain wáinmaun “Ju yaraatai áimpratarum” tímiayi. Takui mete áimprarmiai. ⁸ Áimprarmatai Jesus tímiayi “Pai, ishichik shikikrum námper chicharu suutarum.” Tutai nútiksān túrawarmiai.

⁹ Jista chicharusha nu umutai ajasun nekáprámiayi. Yaraatainmaya yumi jusamun nekaachmai niisha tura umutai ajamau jusaru ásar nékarmai. Jista chicharusha nuwatun untuk ¹⁰ tímiayi “Jístanman̄ka pen̄ker umutain emka suíniatsuk. Tura jémararmatain̄kia tímianchan suiniatsuk. Túrashā ámeke pen̄ker umutai ikiusam yamáí júikchamek” tímiayi.

¹¹ Jesus túramu Kananum Kariréa nun̄kanam túrunamiayi. Nújain̄kia Jesus emka ni kakarmarin̄ paant iniaktusmiayi. Nuna íisar ni unuiniamurísha Nin enentáimtusarmiai.

¹² Nuyá Kapernáum péprunam wémiayi. Ni nukurísha ni yachísha ni unuiniamurísha nemariarmiai. Nuísha unturí tsawant pujusarmiai.

Yusa Uunt Jeen suruktinian Jesus surimkiamiania nu
(Mateu 21.12-13; Márkus 11.15-18; Rúkas 19.45-46)

¹³ Israer-shuara namperi, paskua tutai, ishichik ajasmatai Jesus Jerusarénn̄um wémiayi. ¹⁴ Nuí jeá Yusa Uunt Jeen súruinian wáinkíámiayi. Turuncha murikniasha yampitsnasha súrin ármiai. Chíkichcha ni misarin̄ pujusar kuítian ya-pajíniancha wáinkíámiayi.

15 Nuna wáiniak yarańken chapikmar asutkiartutain najana nujai ashí waakartiuk murikrintiuk aa jíirmiayi. Kuítian yapajniu misaríncha ayantar ni kuítrin nunká utsańkarmiayi. 16 Yampitsan súrinniasha tímiayi “Nuka júyá jíitiarum. Winia Aparu Jeen surutai jea najanawairap” tímiayi.

17 Nuna íisar ni unuiniamuri yaunchu Yus-Papinium áarman enentáimprarmiayi. Ju áarmaiti:

“Ame Jeem shiir atí tusan ti wakerukuitjai.”

18 Nuikia Israer-shuara uuntri Jesusan aniasarmiayi “Juna túramniaitjai tusam ¿warí kakarmak iniakmastatam?”

19 Jesussha tímiayi “Ju Jea sáakiakrumin menaintiú tsawantai iniantaittiajai Wikia.”

20 Israer-shuarsha tiarmiayi “Kuarentisáis (46) uwitin juna jeamtinian pujursarmiayi. Amesha menaintiú tsawantai jeamtámeash.” 21 Kame Jesus “Jea” chichayat ni ayashin tímiayi. 22 Tuma asamtai Jesus ukunam jakamunmaya nantakmiatai ni unuiniamuri ni timian enentáimprar ni chichamencha tura yaunchu Yus-Papinium áarmancha “Nekasaiti” tu enentáimtusarmiayi.

Jesus ashí shuara enentáin nékawai

23 Paskua námpertin ti untsurí Jerusarénum pujuarmia nu, Jesus aents tujintiamun túramtai, nuna wáinkiar Nin nekas enentáimtusarmiayi. 24 Tuma ain Jesus ashí neka asa ninkia enentáimtuscharmiayi. 25 Nińki ashí shuara enentáin neka asa chíkich ujatkat tusa atsumchamiayi.

3

Jesus Nikiutémujaí

1 Shuar ámiayi ni naari Nikiutému. Niisha Paríséu asa nii tuinia áintsan Yúsna takauyayi. Niisha Israer-shuara uuntriayi. 2 Niisha kashi Jesusai irastajtsa wé tímiayi “Uuntá, shuáran unuiniarat tusa Yus akúptámkaiti. Nu paant nékaji. Yúsaiyanchuitkiumka aentsti tujintiamu túramna nu tujinki-aintme’ tímiayi.

3 Jesussha tímiayi “Tí nekas tájame. Atak yamaram akiiniachuka Yus akupeamunam pachiinkiashtatui.”

4 Tutai Nikiutému aniasmiayi “¿Itiurak shuar uunta nu ataksha akiiniat. Ataksha ni nukurí ampujén enkempramniakait atak akiiniatniuna?”

5 Ataksha Jesus tímiayi “Ti nekas tájame. Shuar entsayasha tura Wakanniumiasha akiiniachuka Yus akupeamunam penké pachiinkiashtatui. 6 Ayashniumia akiinia nuka ayashchakait. Núnisan Wakanniúmiá akiinia nuka wakanchakait. 7 Wi “atak yamaram akiiniatniuiti” takui

itiurchat enentáimpraip. ⁸ Nase enentáimpratá. Nase nánkamsan umpúawai. Amesha ántame tura tuyan winiá túrasha tuin weti nékatsme. Núniskete ashí Wakanniúmiá akiinia nu.”

⁹ Tuma asamtai Nikiutémusha atak anias “¿Jusha itiurak áminiait?” tímiayi.

¹⁰ Jesus áikmiayi “Ame Israer-shuara jintinniurintiatmesha ¿itiura nékatsmea? ¹¹ Ti nekasán tájame. Nekas

nékakur chichaaji. Íismajnia nusha ujaaji. Tuma ain ii chichame ántatsrume. ¹² Aya ju nunkanmaya túramu

ujaam ántachkurmeka ¿itiurak nayaimpinmaya túramusha antuktaram?”

¹³ ‘Shuar chikichkisha nayaimpiniam waka atsawai. Aya Wiki, nayaimpinmaya taran Aents Ajasu asan, túraitjai. Tura Wikia nayaimpinmayaitjai. ¹⁴ Tura Winiasha, Aents Ajasu ain, mantuawartatui. Iis, yaunchu Israer-shuar atsamunam wekainiak napijiai ti jáiniakui tuke tsuamarti tusa Muisais napin jirú najana yakí numiniam awajaimiayi. Núnisnak Wisha awajnitniuitjai. ¹⁵ Nújainkia ashí Winia enentáimturna nuka jinium wétsuk Yusai tuke iwiaaku pujustatui.”

Yuska ashí shuaran ti aneawai

¹⁶ Yuska ashí shuaran ti anea asa, ni Uchirin chikichik ana nuna shuáran uwemtikrarat tusa tsankatkamiayi. Ashí shuar Nin enentáimtana nu, jinium wécharat tusa, antsu Yúsnum tuke iwiaaku pujusarat tusa ni Uchirín akúpturmakmiayi. ¹⁷ Yus áentsun kakerak jinium surukat tusa ni Uchirín akupkachmiayi. Antsu uwemtikrarat tusa akupkamiayi.

¹⁸ Yusa Uchirín enentáimtana nuka jinium penké surunk-ashtiniaiti. Tura Nin enentáimtsatna nuka, Yusa Uchirín chikichik ana nuna enentáimtachu asa, páchitsuk jinium surukmaiti. ¹⁹ Yusa Uchirí tsáapninia áintsan ii tunaari paant awajturmaji. Nu tsáapnisha ju nunkanam táraiti. Shuar tunáa ti tura ásar tsáapninian nakitrar kiritniun wakeriarmai. Nuna tura ásar jinium surunkaruiti. ²⁰ Ashí tunaan túruinia nuka tsáapninian muíjiainiawai. Túrawar yupitaiainiawai ni tunáa túramu paant ajasai tusa. ²¹ Antsu ashí nekas túratniun umiini-ana nuka tsáapninian weantainiawai. Yus ni enentái pujuram tsáapninium takainiawai. Nuka ti paantaiti.

Imiakratin Juan ataksha Jesusnan chichasmiania nu

²² Nuyá Jessusha ni unuiniamurijiaisha Jutía nunkanam wear nui pujusar imiakratiarmiayi. ²³ Juansha Enun nunkanam, Sarim tíjiuchia nui, imiakratuk pujumiayi entsa nui núkap aa asamtai. Tura aents táarmatai imiainiarmiayi. ²⁴ Nusha Juánkan sepunam enkenatsain túrunamiayi.

²⁵ Tura Juanka unuiniamuri Israer-shuarjai jianaiktinian nankamawarmiayi. “¿Ya imiakratma imiá pénkerait?” tusar áujmatiarmiayi. ²⁶ Juánkai inintrustai tusar wéarmiayi. “Uunta, ame nuik Jurtanñ entsa amain pujakum shuar nui pujá “núiti Yusa Murikri” tichamkum. Yamaikia imiakratui tura ashí shuar Nin nemarainiawai” tiarmiayi.

²⁷ Tutai Juanñ tímiayi “Ashí kakarmaka aya Yúsaiyañchakait. ²⁸ Wisha paant tímiajai “Wikia Krístuchuitjai antsu ni jintñ iwiarat tusan emka akupkamuitjai.” Nusha antukmarme. ²⁹ Kame shuar nuwañ nuatna nuna áishrinti. Nuatnaiyak áishmanñ nuwejai áujnainiakui, ni amikrisha nuna antuk ti waraatsuk. Wisha núnisnak aents Jesusai wénakui ti waraajai. ³⁰ Niisha tuke nankaamaku uunt ajastiniaiti antsu wikia tuke tímiancha ajastiniaitjai.” Juanñ tu chichasmiayi.

Nayaimpinmaya tara nu

³¹ Nayaimpinmaya tara nuka ashí nankaamakuiti. Nunkaya nuka, nunkaya asa juñ nunkanmayanak áujmatui. Nayaimpinmaya tara nuka ashí nankaamakuiti ³² tura nui antukmancha ísmancha áujmatui. Túrasha ni chichamen ántuiniatsui. ³³ Antsu ni chichamen ántana nuka “Yusa chichameñ imiá nekasaiti” tawai. ³⁴ Yus akupkamuka Yusa chichamen étserui. Yuska ni Wakanñ ementutsuk susa asamtai tu étserui. ³⁵ Yus Apa ni Uchirñ anea asa ashí ana nuna iistí tusa ataksaiti. ³⁶ Shuar Yusa Uchirñ enentáimta nuka yamaram iwiaakmanum akiinia asa tuke Yusai shiir pujustiniaiti. Antsu Yusa Uchirñ enentáimtatsna nuka nu iwiaakmanum akiiniachuiti antsu Yus tuke nin kajerkaiti.

4

Jesus Samaria nunkanmaya nuwajai chichasmiania nu

¹ “Jesus untsuri shuaran ni nemarin awajeawai; kame Juanjai nankaamas untsuri imiaawai” taman Pariseu shuar antukarmiayi. ² Nekaska Jesus imiakratchamiayi, antsu ni unuiniamuri túrawarmiayi. ³ Pariséu nu chichaman antukarman Jesussha nekáa Jutía nunkanmaya jiinki Kariréa nunkanam waketkimiayi.

⁴ Wáketuk Samaria nunkanmaani nankaamaktiniuyayi. ⁵ Samaria nunkanam wéak Sekar péprunam jeamiayi. Nu pepru jeastatuk Jakupa nuñke ámiayi. Jakupsha nu nunkan ni uchirñ Jusen tí yaunchu susamiayi. ⁶ Nuisha yumirmat ámiayi. Jakup taurma asamtai “Jakupa yumirmatri” tiarmiayi. Tutupin jeamtai Jesussha pimpiki winis yumirmat ayamach pujusmiayi. ⁷ Nui pujaj Samarianmaya nuwañ yumí shikiktajtsa támiayi. Tura Jesus “Entsa surusta” tímiayi.

⁸ Jesusa unuiniamurisha yurumkan péprunam sumaktajtsa wéaru asamtai aya Jesusak pujumiayi.

⁹ Samarianmaya nuwá Jesusan tímiayi “¿Itiura Israer-shuaraitatmesha Samarianmaya nuwá aisha entsa seatam?” Kame Israer-shuar Samarianmaya shuarjainkia penké chichachu ásar nuna tímiayi.

¹⁰ Jessussha tímiayi “Yus súamu nékakmeká tura entsa surusta tájam nusha nékakmeká ame antsu seattínme tura Wikia iwiaaku entsan amasaintjai.”

¹¹ Nuwásha tímiayi “Uunta, entsasha ti initiaiti tura shikik-tincha takaktsume. ¿Tuyan iwiaaku entsasha surustam? ¹² Ii uuntri Jakup jú yumirmatan taur juyanák niisha ni uchirísha ni waakarísha umararmiayi. Nuyá ikiurtamkimiaji. ¿Amesha Jakupjai nankaamas kakarmakaitiam?”

¹³ Jessussha tímiayi “Ashí shuar jú entsan umarka ataksha kitiamtiatui. ¹⁴ Antsu Wi súajna nú entsan umarka penké kitiamchattawai. Antsu nu entsa Wi susamuka ni enentáin púkunia áintsan tuke pajamtiatui nujai tuke iwaaku pujustí tusa.

¹⁵ Tutai nuwá tímiayi “Uuntá, winiasha nu entsa surusta. Wisha kitiamcha átaj. Tura jú entsancha shikiktinian táchataj” tímiayi.

¹⁶ Nuyásha Jesus tímiayi “Áishrum untsukam utitia, turam jui tatá.”

¹⁷ Nuwásha “Winia áishur atsawai” tímiayi.

Tutai Jesus tímiayi “Maa, nekas tame. Áishrum atsawai. ¹⁸ Kame ame áishrum senku (5) takusuitme. Yamái takakmena nusha ame áishrumchaiti. Nekas tame.”

¹⁹ Nuna antuk nuwásha tímiayi “Uunta, ame Yúsnan etserni-uchukaitiam. ²⁰ Ii úuntriinkia tuke Samarianam pujuarmia nu jú nainnium Yúsan tikishmatrarmiayi. Antsu átum Israer-shuar árumna nu aya Jerusarénum Yus tikishmátratniuiti tárume.”

²¹ Jesus tímiayi “Nuwá, enentáimsata. Tsawant jeattawai átum jú náinniumsha tátsuk tura Jerusarénumsha wétsuk Yus Apa tikishmatratin. ²² Átum tikishmatrum nuka nékatsrume. Iikia tikishmatrajnia nu nékaji. Israer-shuarnumia Uwemtikkiartin winiakui nékaji. ²³ Tsawant winittiana nu yamá jeayi. Ashí shuar Yus Apan nekas tikishmatainiakka tuke wakanjai tuke enentáijiaisha awajitsuk tikishmatrartatui. Núnisan tikishmatrurat tusa wakerawai Yus Apa. ²⁴ Yuska Wakaniiti tura ashí Nin tikishmatainia nuka tuke wakanjiaj tura tuke enentáijiaj awajitsuk tikishmatratin ániawai.”

²⁵ Nuwásha tímiayi “Anaikiamua nu tátiniaiti. Nusha Krístuuti. Niisha taa ashí jintintramattaji.”

²⁶ Jesus tímiayi “Wiitjai. Ámin chichaaajmena nú Kristuitjai.”

²⁷ Nuiñ ni unuiniamuri táarmiayi tura nuwajai chichaa pujan wáinkiar ti enentáimprurarmiayi. Tumaitiat “¿Warí wakerakmea nuwajai chichaam?” titinian arantukarmiayi. ²⁸ Nuyanka nuwa ni yumirín ikiuki péprunam we ashí áentsun tímiayi ²⁹ “Winiirum íitiarum, shuar ashí wi túramun túruta nu. ¿Juka Krístuittiya?” ³⁰ Tutai péprunmaya jíinkiar Jesus pujamunam wearmiayi.

³¹ Jeainiatsain ni unuiniamuri seak tiarmiayi “Uunta, yurumáta.”

³² Tura Jesus tímiayi “Wi yúatniunka takakjai átum nékachman.”

³³ Ni uniuniamurisha nuámtak anniasarmiayi “¿Chíkich shuar yurumak itiarím tátsuash?” tiarmiayi.

³⁴ Tura Jesus tímiayi “Winia akuptukua nuna wakeramuri túrakun tura ni takatrín takaakun Wíjiaínkia yurumátnua áintsan ikiakáatui. ³⁵ Átumka “Tuke kuaru nantu árak júuktin taasai” tátsurmek. Túrashá Wi tájarme, shuar wininia nu iistarum. Yus-Chicham ni enentáin araamuiti. Tura júuktin tsawant jeayi. ³⁶ Arakan júaka akinkiatniuiti. Júukmataisha nu shuar uwemprar tuke iwiaaku pujusartatui. Núnisan arakan araana nusha júana nusha mai metek warasartatui. ³⁷ Tiniu armia nuka nekasaiti: “Chíkichik araawai chíkichcha júawai.” ³⁸ Iis, chíkich araakmamu júuktinian akupkaitjarme. Átum araachiatrumek chíkich takasmanum atumsha pachiin-tiukuitrume” tímiayi.

³⁹ Tura núwaka péprunam jeá “Ashí wi túramun ujakayi” takui untsurí shuar Jesusan ti shiir enentáimtusarmiayi. Niisha Samarianmaya shuar ármiai. ⁴⁰ Nu asamtai ashí Jesusai taar níijjai pujusát tusa seawarmiayi. Tutai Jesus jimiará tsawant nuí pujusmiayi. ⁴¹ Nú shuar untsurí ni chichamen antukar Jesusan ti shiir enentáimturarmiayi. ⁴² Nuyá nuwan tiarmiayi “Yamaikia aya ame chichammijjain Jesus enentáimtatsji antsu imia iisha ni chichamen anturkaji. Tura nékaji nekas Krístuiti, ashí shuaran Uwemtikin.”

Jesus akupniu takarniuri uchirín tsuármiania nu

⁴³ Jimiará tsawant nankaamasmatai Jesus Samaria nunkanmaya jiinki Kariréa nunkanam wémiayi. ⁴⁴ Kariréasha Jesusa nunke asamtai, ainsha Jesus timia áintsan ámiayi: “Yúsnan etserniun ashí shuar péñker anturainiawai antsu nuna nunkeyanka nin anturainiatsui.” ⁴⁵ Tuma ain Kariréa nunkanam jeamtai auya shuarsha Jerusarénum paskua námpernum wearu ásar tura ashí ni túramun nuí wainkia ásar ti shiir awajsarmiayi.

⁴⁶ Nuyá Jesus Kaná péprunam atak támiayi. Nu péprunmasha nuik Jesus yumin umutai awajsamiayi. Jessussha nuí pujai yajá péprunam Kapernáumnum akupniu takarín ámiayi. Ni uchirísha jaa tepemiayi. ⁴⁷ Niisha Jesus Jutíanmaya Kariréa nunkanam taman antuk Jesusai wémiayi. Tura ni uchirí jákatin tepakui ni jeen we ni uchirín tsuarat tusa Jesusan seamiayi.

⁴⁸ Jessussha tímiayi “Aya aents túrachminian túrakui íisrum aya nújain Winia enentáimtarme.”

⁴⁹ Tura takarín tímiayi “Unta, winia uchir jáatsain wari winitia.”

⁵⁰ Nuinkia Jesus tímiayi “Jeemiin waketkitia. Yamaikia ame uchiram péñker ajasai.” Tutai nú aishman Jesus táman antuk wémiayi.

⁵¹ Ni jeen jeátémantai ni takarniuri inkiun tiarmiayi “Yamaikia uchiram péñker ajasai.”

⁵² Apasha inintrusmiayi nantu urukaim péñker ajasma.

Niisha tiarmiayi “Yau, nantu pukuntantai, tsuemun michatramai” tiarmiayi.

Nuna antuk uchí aparísha enentáimsamai. ⁵³ Nantu pukunta ai Jesus “Ame uchiram péñker ajasai” timia nuní ain michatraití. Tuma asamtai niisha ashí ni shuarísha Jesusan nekas enentáimturarmiayi.

⁵⁴ Jesus nu túramujai ni kakarmarín jimiará iniakmasmiayi. Nunasha Jutíanmaya jiinki Kariréa nunkanam jeá túramiayi.

5

Petesta amia nui tampemarun Jesus tsuármiania nu

¹ Nu nankaasmatai, Israer-shuar namperan najanainiakui Jesus ataksha Jerusarénum waketkimiayi. ² Jerusarén yama wayamunam murik wayatin waiti tíjiuch amia nui entsa pajamtai jeammauyayi. Nu pajamtain Petesta tiarmiayi. Nuna wáitirísha senku (5) ármiayi. ³ Nui untsurí jáiniak nunkanam tepearmiayi. Kusurusha shutuapsha tampemakusha tepesar entsa miartukat tusa nákasarmiayi. ⁴ Kame ni tátaj taku Yusa suntari táuyayi entsan umuchkiattsá. Nuyanka emka shuar entsá wayá nu ni jáamuriya tsuáarmiayi. ⁵ Áishman traintiúchu (38) uwi jaa tepá nui ámiayi.

⁶ Jessussha nu shuaran nui tepan wáinkíamiayi. Tura untsurí uwitin jaa tepan nekáa aniasmiayi “¿Shiir ajastiniak wak-eram?”

⁷ Tutai jaasha tímiayi “Unta, entsa muchitkiui ¿winia yaki enkétát? Kame wi enkemátaj tai chíkich emka enkemáiniawai.”

⁸ Nuyá Jesus tímiayi “Nantaktia. Ame peakrum jukim wetá.”

⁹ Nu chichamtaik áishman shiir ajasmiayi. Tura ni peakrín jukí wémiayi. Nusha ayampratin tsawantai túrunamiayi. ¹⁰ Tuma asantai Israer-shuar shiir ajasun tiarmiayi “Yamáí ayampratin tsawantaiti. Peakrum júkishtiniaitme” tiarmiayi.

¹¹ Áishmansha tímiayi “Winia tsuara nu “Peakrum jukim wetá” turutni” tímiayi.

¹² Nuinkia aniasarmiayi “¿Ya “Peakrum jukim wetá” túramam?” tiarmiayi. ¹³ Tura áishmansha Nin tsuárun nékachmiayi. Untsurí shuar nuí aa asantai tura Jesus weu asantai nin nekaachmiayi.

¹⁴ Atak Jesus Yusa Uunt Jeen áishmankan wáiniak tímiayi “Antukta. Yamaikia shiir ajasume. Atak tunáa túrawaip; nu arant ajasáim” tímiayi. ¹⁵ Nuinkia áishman Jesus nin tsuárman nekáa Israer-shuaran ujakmiayi. ¹⁶ Tuma asantai ayampratin tsawantai túramtai Israer-shuar Jesusan maatai tusar áintrarmiayi. ¹⁷ Tura Jesus tímiayi “Wina Apar tuke yamaisha takawiti. Núnisnak Wisha takaajai.” ¹⁸ Tutai Israer-shuar nuna nankaamas maatai tusa wakeriarmiayi. Ayampratin tsawantai takaakui kajerarmiayi. Tura nu arantcha “Yus winia Aparuiti” takui Yusjai métek enentáimtumawai tusar nu arant kajerarmiayi.

Yusa Uchirí túramnia nu

¹⁹ Nuyá Jesus tímiayi “Ti nekas tájarme, Yusa Uchirínkia ni enentáijiai takaatsui. Antsu aya winia Apar takaana nuna íisan métek takaajai. Ashí winia Apar túramun Wisha ni Uchirí asan métek takaajai. ²⁰ Ni Uchirí asantai winia Apar anentui tura ashí tura nuna iniakturui. Tura nuna nankaamas tujinkiamnian iniaktursattawai Wisha túratniun. Tura nuna túrakui ashamkattarme. ²¹ Winia Apar jakamunmayan iwiaaku ajasat tusa Ni wakerana nuna inianteatsuk. Núnisnak, ni Uchirí asan, Wi wakeraj nuna iwiaaku awájsámniaitjai. ²² Winia Aparka súmamtiktsui antsu shuar súmamtikiatniun ni Uchirín súsaiti. ²³ Tuma asantai ashí shuar Yus Apan shiir awajainia áintsan ni Uchiríncha métek shiir awajsatin áiniawai. Yus Apa ni Uchirín akupka asantai, Uchin shiir awajeatsna nuka Yus Apancha shiir awajeatsui” tímiayi.

²⁴ “Ti nekasaiti. Winia chichamprun ántana nú shuarka Winia Auktukun enentáimtak ni iwiaakmarin tuke amuukashtinian takakui. Nu shuarsha ayashí iwiaakuitiat jákauyi antsu yamáí nekas iwiaakuiti. Tuma asa sumamashtatui. ²⁵ Ti nekasaiti. Tsawant winittiana nu jeayi. Nu tsawant jaka ainia nu Wi untsumman antukar umirkarka iwiaaku ajasartatui. ²⁶ Iis, winia Apar iwiaaku awajsatniun takakui. Tura Winiasha, ni Uchirí asantai, iwiaaku awajsatniun surusuiti. ²⁷ Nu arantcha wi Aents

Ajasu asamtai, shuaran súmamtikiatniun surusuiti. ²⁸ “Ju chicham itiurchataiti” enentáimprairap. Atak tsawantai wi untsumman ashí jákaru ainia nu antukartatui. ²⁹ Tura ashí iwiansamunmaya jínkiartatui. Pénker túrawarusha nantakiar tuke iwiaaku pujusartatui. Antsu tunáa túrawarusha nantakiar jinium surunkartatui’ tímiayi.

“Jesus nekas Yúsaiyaiti” tu áujmatania nu

³⁰ ‘Imia Wiki takaatsjai. Antsu Yus tana núnisnak súmamtikeajai. Wi wakeraj nuna enentáimtsuk antsu winia Apar wakera nuna wakerukan, Nii akupta asamtai, awajitsuk súmamtikjai. ³¹ Aya Wiki “Yúsaiyaitjai” tákunka winia chichamur ántar ainti. ³² Chikichcha awai. Niisha “Yúsaiyaiti” túrutui. Ni chichamesha imiá nekasaiti. ³³ Atumsha Juanakai wi túramu inintrusmarme tura nii timia nu nekasaiti. ³⁴ Tuma aiñ aents táman atsumatsjai. Antsu Juanaka chichame enentáimkiuram uwempratarum tusan tájarme. ³⁵ Juansha jiya núnis keemai. Atumsha ishichik tsawantin nú tsáapninnium warastin enentáimpramarme. ³⁶ Tura Winia “Yúsaiyaiti” túrutna nu, Juanjai nankaamas péñkeran takakjai. Wi takasma núiti. Winia Apar takastinian surusma nuna takaakun nujai páantaiti Yus Apa akupkamuitjai. ³⁷ Winia Aparsha, akuptuku asa, ayamprutui. Túrashá átumka ni chichamesha antukchaitrume tura wáintiash wáinkiachuitrume. ³⁸ Yus Apa akuptukuiti. Tuma asamtai Winia enentáimturchakrum winia Aparu chichamesha atumi enentáin wayachuiti. ³⁹ Átumka Yus-Chicham yaunchu aarma nui iwiaaku átinian wáinkiatatj tusarum ti unuimiaruitrume. Nu chichamsha Wínian áujmatui. ⁴⁰ Tuma aiñ nekas iwiaaku átaj tusarum Winí tátin nakitiarme” tímiayi.

⁴¹ “Shuar Winia “shíiraiti” túrutainiakuisha nuna páchiatsjai. ⁴² Maa, Wi nékajrume. Átumka Yus aneatsrume. ⁴³ Winia Apar akuptukmatai táwitjai túrashá nakitrarme. Antsu chíkichka ní enentáijiaín jeartamkuíñkia nuka átum wakerarme. ⁴⁴ Átumka nuámtak “Shiir enentáimtursatí” tu enentáimtunaiyarme. Tura Yus enentáimturma nuka páchiatsrume. Nujaiñkia jitiurak Yus enentáimtustam? ⁴⁵ “Ti tunaarín Yusai etserturmaktatji” turutiirap. “Muisais akupkamun umirkan uwemprattajai” tátsurmek. Antsu Muisais aarma nujai atumí tunaari etsernaktatui. ⁴⁶ Iis, Muisais Winia áatrurmiayi. Atumsha ni timia enentáimtakrumka Winisha enentáimturaintrume. ⁴⁷ Tura ni aarma enentáimtachkurmeka jitiurak wi tama enentáimtustarum?” tímiayi Jesus.

6

*Jesus senku mir (5.000) áishman̄kan ayurawarmiania nu
(Mateu 14.13-21; Márkus 6.30-44; Rúkas 9.10-17)*

¹ Nu nan̄kaasmatai Jesus Kariréa antumian̄num amain katin̄miayi. Nu antumiansha Tipirias antumian̄ tuiniawai. Jimiará náartiniaiti. ² Untsurí shuar Jesus ti jáinian timiá wárik tsuan wáinkiaru ásar Nin nemariarmiayi. ³⁻⁴ Israer-shuara paskuanamperi ishichik ajasmatai Jesussha ni unuiniamurijjai náinnium waka nui pujusmiayi. ⁵ Jesussha untsurí aents wininian wáiniak Jiripin tímiayi “Timiá untsurí shuar ayuratniussha ¿tuyan̄ yurumak sumaktaj?” tímiayi. ⁶ Kame Jesuska Nii túrattana nuna neka asa Jiripi warittin̄ tusa tímiayi.

⁷ Jiripisha nuyá tímiayi “Timiá nukap kuitjai tanta sumakmesha ashí ishichik susamsha jeachaintjia” tímiayi.

⁸ Nuyá chíkich unuiniamurí Antres, Pitru yachi, tímiayi ⁹ “Uchi jui senku (5) tantan jimiará namakjai takakui. Ausha timiá untsurínmasha jeatpiash” tímiayi.

¹⁰ Nuyanka ““Ashí pujustarum” titiarum” tímiayi Jesus.

Áishmansha nuwasha uchisha irunmiayi. Tura chírichri núkap aa asamtai nuisha senku mir (5.000) áishman̄ pujusarmiayi. ¹¹ Jesussha nu tantan achik Yúsan yuminkias ni unuiniamurín susamiayi. Niisha ashí nui pujuinian súarmiayi. Namaknasha núnisan̄ ashí ni wakeriarmiania nuna súarmiayi.

¹² Jémararmataisha Jesus ni unuiniamurín tímiayi “Am-pirma júukrum chan̄kinnium chumpiatarum. Wasúrnákain̄.” ¹³ Niisha senku (5) tantanmaya ampirman júukar tuse (12) chan̄kinnium áimkiarmiayi.

¹⁴ Nu shuarsha Jesus túramun íisar tiarmiayi “Ju nekas Yúsnan etserin tátinia núchakait.” ¹⁵ Shuar Jesusan uunt akupin awajsataj tutai Jesus nekáa Nínki náinnium wémiayi.

*Jesus entsá pátatek nanamas wekasamiania nu
(Mateu 14.22-27; Márkus 6.45-52)*

¹⁶ Kíakui Jesusa unuiniamurí antumian̄num wearmiayi. ¹⁷ Káshisha Jesus tuke táchamtai uunt kanunam enkemáwar Kapernáum péprunam wéenak jíinkiarimiayi. ¹⁸ Tura nase ti umpúakui chíchimi ti wajaimiayi. ¹⁹ Ajapén ajaras Jesus entsá pátatek nanamas tíjiuch winian wáinkiar ashamkarmiayi. ²⁰ Tura Jesus “Wiitjai. Ashamprukairap” tímiayi. ²¹ Nújain̄kia ti shiir warasar kanunam itiaawarmiayi. Tura nu chícham-taik ni wéamunam jeawarmiayi.

Shuar Jesusan eq̄k wekainiawai

²² Kashincha chíkich shuar amain ayuramunam kanararu nekaawarmai. Jesusa unuiniamurì Jesusjainchu chikichik kanu amia nujai wéarun nekaawarmai. ²³ Nui chichak mat-satai Tipirias péprunmaya chíkich kanu táarmiayi. Yau Jesus Yúsan yuminkias tantan ayuramunam tijiuch táarmatai ²⁴ nu shuar, Jessussha ni unuiniamurisha nui atsuiniakui, nu kanunam enkemáwar Kapernáum péprunam Jesusan eáktajtsa wearmiayi.

Jesus apatkua áintsankete

²⁵ Entsa amain Jesusan wáinkiar aniasarmiayi “Uunta, ¿urutía juisha támam?”

²⁶ Jessussha tímiayi “Ti nekas tájarme. Aents tujintiamu nekáa asarum éatsume. Antsu tanta yuarum jémaru asarum éatsume. ²⁷ Juyá yurumak amuukatin asamtai ti pachisairap. Antsu amuukashtin yurumak tuke iwiaaku pujustinian amaana nu takarsatniuiti. Nú yurumkanka Wi, Aents Ajasu asan, susattajrume. Yus Apa nuna túratniun surus “Juka shuáran Yáinkiertiniiaiti” túrutui” tímiayi.

²⁸ Tutai inintrusarmiayi “¿Warí túratniuitiaji Yus wakerana nu umiktin?”

²⁹ Jessussha tímiayi “Yus akupta asa Winia enentáimtursarat tusa wakerawai.”

³⁰ Tutai aniasarmiayi “¿Aentsti tujintiamuka warí túratam ii ísar Ámin nekas enentáimtustin? Chikichcha túratá. ³¹ Yaunchu ii uuntri aents atsamunam maná yurumkan nayaimpinmaya susamun yurumáwarmiayi. Yus-Chichamnum núnik áarmaiti: “Nayaimpinmaya yurumkan Yus susamiayi.” Tu áarmaiti” tiarmiayi.

³² Jessussha tímiayi “Wi tájana nu nekasaiti. Muisais atumí úuntrin nayaimpinmaya yurumkan súsachmiayi. Antsu winia Apar yamáí nekas apatkun nayaimpinmaya súramui. ³³ Iis, Yusaiya apatkunka, nayaimpinmaya tára nu súramui tura nekas apatuk asa ashí shuaran nekas iwiaakman súawai.”

³⁴ Tutai “Uunta, nu apatuk tuke amasta” tiarmiayi.

³⁵ Tura Jessussha tímiayi “Wiitjai nu apatuk nekas iwiaakman súana nu. Winí winiana nú shuar penké tsukamashtatui, tura Winia enentáimturna nusha tuke kitiaarchattawai. ³⁶ Túrasha wi túramu wáinkiumesha winia chichamur enentáimtatsrume. ³⁷ Ashí shuaran winia Apar tsankatruckarmiania nu, Wíi shuar ajasartatui. Winin winiana núnaka penké nakitrashtatjai. ³⁸ Wi wakeraj nuna túratniun táchaitjai antsu Winia akuptukmia nuna umirkatniun táwitjai. ³⁹ Winia Apar akuptukuiti tura juna wakerawai. Ashí winia tsankatruckman emenkátsuk amuukatin tsawantai iniantkiarat tusa wakerawai. ⁴⁰ Yus

Apa wakerana nu júiti. Ashí shuar Winia “Yusa Uchirínti” tu enentáimturkui yamaram iwiaakman tuke takusat tusa wakerawai. Nú shuarnaka amuukatin tsawantaj iniantkittiajai” tímiayi Jesus.

⁴¹ Tura Jesus “Wiitjai, nayaimpinmaya apatuk akupkamu” takui Israer-shuar Jesusan áujmatiarmaiya.

⁴² Tura tiarmiayi “Ju Jesuschakait, Jusé uchiríya nu. Iikia ni aparísha nukurísha nékatsjik. ¿Itiurak “Nayaimpinmaya taraitjai” ta?” tiarmiayi.

⁴³ Jesussha tímiayi “Tu áujmatrukairap. ⁴⁴ Shuáran winia Apar akúpturkachuítikiuinkia penké weanturkachainti. Tura Winia akupturna nuna amuukatin tsawantaj iniantkittiajai. ⁴⁵ Yúsnan etserniu áarmarin tawai “Ashí Yus jintintiamu ártatui”. Núnisan ashí Yusa chichamen antukar unuimiataini-akka Winí táiniawai’ tímiayi.

⁴⁶ “Aya Wiki Yúsaiya tau asan Yúsan wáinkiaitjai. Chíkichka penké wáinkiachuiti. ⁴⁷ Ti nekas tájarme. Winia enentáimturna nú shuarka yamaram iwiaakman amuukashtinian takakui.

⁴⁸ Wikia iwiaakman súana nú apatkuitjai. ⁴⁹ Iis, atumí uuntri aents atsamunam maná yurumkan yúawariatcha ashí jákarmiayi. ⁵⁰ Antsu Wi tájana nú apatkun shuar yúakka jákachartatui. ⁵¹ Wikia nayaimpinmaya iwiaaku apatkuitjai. Nu apatkun shuar yuakka tuke iwiaaku átiniaiti. Nu apatkun Wi susattaj nusha winia ayashrui. Ashí shuar Yusai iwiaaku pujusarti tusan winia ayashrun susattajai” tímiayi Jesus.

⁵² Nuyá nuámtak áujmattsar tiarmiayi “¿Itiurak ni ayashinkesha ayurtamattaj?” tiarmiayi.

⁵³ Jesussha tímiayi “Ti nekas tájarme, Wi Aents Ajasu asamtai winia ayashur yúatniuitrume. Winia ayashur yúachmeka tura winia numpar umarchamka nekas iwiaaku pujatsrume. ⁵⁴ Winia ayashrun yúana nuka tura winia numparun úmakka yamaram iwiaakman amuukashtinian takakui. Tura nu shuaran amuukatin tsawantaj iniantkittiajai.

⁵⁵ Winia ayashruka nekas yurumkaiti tura winia numparsha nekas umutainti. ⁵⁶ Winia ayashruncha yúaka tura winia numparnasha úmaka Wijjai tsanin pujawai tura Wisha nu shuarjai tsaninkian pujajai. ⁵⁷ Yus Apa, Winia akuptukuka,

nu iwiaakma nérenniuiti. Tuma asamtai ni iwiaakmariin iwiaaku pujajai. Núnisan Winia yurakka winia iwiaakmarui iwiaaku pujustatui. ⁵⁸ Nayaimpinmaya apatkun tajai. Ju apatuk maná yurumka áintsachuiti. Atumí uuntri maná yurumkan yuawarsha ashí jákarmiayi. Antsu ju apatkun shuar yúakka tuke iwiaaku pujustatui” tímiayi Jesus. ⁵⁹ Núnaka Jesus Israer-shuar iruntainiam unuiniarmiayi.

60 Nu chichaman antukar Jesusa unuiniamuri chicharainiak “Nii tana nu ti itiurchat asamtai ¿yaki antukminiait?” tiarmiayi.

61 Jessusha ni áujmatman nekáa tímiayi “Átum “ju chicham itiurchataiti” tárumek. 62 Wátsek, Wi nayaimpiniam pujumiaj nuí waketkimtaisha ¿urukawaintrumek? 63 Warí, aya wakanik iwiaakman súwaiti. Ayashkia penké áantraii nekas iwiaaku awajsatniun. Wi tájana nujai imiá nekas wakankia iwiaaku awajsamniaiti” tímiayi Jesus. 64 Tura Jesus Nin enentáimtachun tura Nin suruktatna nunasha yaunchu neka asa ni unuiniamuri nímiayi “Átumíncha winia chichamprun enentáimtachu take awai. 65 Nu asamtai tímiajrume “Shuáran winia Apar akupturkachmaitkiuiníka penké wean-turkachainti” tímiajai” tímiayi Jesus.

66 Nuyasha ni nemarniuri untsurí armia nu Jesusan ik-iukiar atakka Niiijai wekasacharmiayi. 67 Nuyá Jesus ni tuse (12) unuiniamuri nímiayi chicharainiak “¿Átumsha wétin wak-erarmek?” tímiayi.

68 Semun Pítrusha áikmiayi “Uunta, ¿yáiniñ wetaji? Ame chichammijai nímiayi nekas iwiaaku áminiaiti. 69 Ame Kristu asam nekas iwiaaku Yusa Uchirínme. Nuka enentáimtusar ti paant nékaji” tímiayi.

70 Jessusha tímiayi “Ashí tuse (12) árumna nu achikiuitjiarme nekas Wíi shuar ajastin. Tuma ain atumín chikichik iwianchiiti” tímiayi. 71 Nuna taku Jútas Iskariútin, Semunka uchirín, enentáimtus tímiayi. Jútassha ni unuiniamuri nímiayi Jesusan ukunam surukmiayi.

7

Jesusa yachisha Nin enentáimtuscharmiayi

1 Nu nankaamasmatai Jesus Kariréa nunkanam wekaimiayi. Jutía nunkanam wéchamiayi Israer-shuara uuntri nuí máataj tutai. 2 Tura Israer-shuar aak aakmatai namperi jeatemamtai 3 Jesusa yachi wishikiainiak tiarmiayi “¿Urukam-tai juisha pujam? Jutía nunkanam wetá, aisha ame unuiniamuram túram nuna ísarat. 4 Ashí shuar nekaawarat tákumka úukam túrawaip. Ti tujintiamu túriniaitkiumka ashí shuar ímmianum túratá” tiarmiayi. 5 Ni yachisha ishichkisha Nin enentáimtachu ásar tiarmiayi.

6 Tura Jesus tímiayi “Winia tsawantur nampernum wétin jeatsui. Átumjainíka nánkamas tsawant wétin péñkeraiti. 7 Ju nunkanmaya aents atumniaka kajertamatsrume. Antsu ní tunaarín etsertin asamtai Wíniaka kajertuiniawai. 8 Átumka nampernum wetarum. Wikia tsawantur jeachkui wéatsjai.”

9 Juna tinia Jesuska Kariréa nunkanam juákmiayi.

Aak aakmatai nampernum Jesus timia nu

¹⁰ Ni yachi wearmatai Jessusha nampernum wémiayi. Tura nekarawarain tusa úumak wémiayi. ¹¹ Israer-shuara úuntrisha námper irunturmanum eakar “Nu aishmansha ¿tuin pujá?” tiarmiayi. ¹² Ashí shuarsha Nin áujmatiarimiayi. Chíkich “pénkeraiti” tiarmiayi. Tura chikichcha “Pénkerchaiti. Aya anankartawai” tiarmiayi. ¹³ Tura Israer-shuara úuntrin ashamainiak uuk áujmatiarimiayi.

¹⁴ Nampersha ajapén ajasmatai Jesus Yusa Uunt Jeen wayá shuáran unuiniamiai. ¹⁵ Israer-shuara úuntrisha nuna ísar ti enentáimsar chichaak “Jusha unuimiátrachiatsha ¿itiurak imiá neka?” tiarmiayi.

¹⁶ Jessusha tímiayi “Wi unuiniajna nu winia chichampruchuiti antsu Winia akuptukua Núnan unuiniajai. ¹⁷ Yus wakerana nuna shuar nekas umiktinian wakerakka winia chichamprun nekaattawai. Nekas Yúsnaikuiñkia, nuna nekaattawai. Aya wi enentáimmiabajin chichaakuisha, nuna nekaattawai. ¹⁸ Ni enentáimmiabajai chichaana nuka ashí shiir enentáimtursarti tusa chichaawai. Antsu nin akupka nuna shiir awajsarti tusa wakerak, nekas wáitratsuk tawai. ¹⁹ Muisais Yusa akupkamurin atumí uuntrin amaschamka. Tuma ain nu umitsuk mantuatin wakerutarme” tímiayi Jesus.

²⁰ Nu shuarsha tiarmiayi “Wáurtsmek. ¿Ya mantamataj tusa wakera?”

²¹ Jessusha tímiayi “Ayampratin tsawantaj chikichki túramtai ti enentáimtsurmek. ²² Muisais ashí tsupirnaktinian akupkachmiayi. Antsu ni uuntrinikia nuna akupka áiniawai. Tuma ain átumka Muisais akupkamu umiktai tusarum ayampratin tsawantajsha uchi áishman tsúpirnaitrume. ²³ Wátsek, Muisais akupkamu uminkiatí tusarum ayampratin tsawantajsha uchi áishman tsúpirkurmekaka ¿urukamtai Wi ayampratin tsawantaj áishmanka ayashí takamtsuk tsuármatai kajertarum? ²⁴ Shuar túrana nu ísam wárik súmamtekiawaip. Antsu inintrúsam paant nekaam, nekasa nu enentáimtusta” tímiayi Jesus.

Jesus Yúsnumiq akupkamuiti

²⁵ Nuyá Jerusarénnumiá shuar tiarmiayi “Maatai tuinia núchakait. ²⁶ Tura nuí ashí ántamunam étserei tura suntar páchiniatsui. ¿li uuntrisha “Nekas Krístuiti” tu enentáimtuiniawash? ²⁷ Antsu nekas Kristu taa tuyan winiá nekanashtatui tura ju pujamuka ashí nékaji” tiarmiayi.

²⁸ Jesus nuna antuk, Yusa Uunt Jeen waja kakaram chichaak tímiayi “Winia nekararum tuyá winiaj nu nékarme. Kame núnisrum enentáimprume. Tura winia enentáirjai táchaitjai antsu winia Apar akuptukuiti. Niisha ti nekas

akupniusha átumka nékatsrume. ²⁹ Antsu Winia akuptukuitk-iui aiyá tau asan Wikia nékajai” tímiayi. ³⁰ Nuyá sepunam enkeataj táyat achikcharmiayi ni tsawantri jeachu asamtai. ³¹ Tura untsurí shuar Nin enentáimtusar “Kristu ta ¿nuna nankaamas aentsti tujintiamun túratpiash?” tiarmiayi.

“Éátkáttarme tura wáitkiashtatrume” tímiayi Jesus

³² Pariséusha Israer-patri úuntrisha Jesusnan timian antukar suntaran akupkarmiai Jesusan achikiar sepunam enkeawarat tusar. ³³ Nuyá Jesussha tímiayi “Aya ishichik tsawant atumjai pujustataj. Nuyá ataksha Winia akuptuku pujana nui waketkittiajai. ³⁴ Átumka éátkáttarme tura Wi wéajna nui wéchamnaiitkiuram wáitkiashtatrume.”

³⁵ Israer-shuarsha nuamtak aniniaisarmiai “¿Yusha tui wéakuin iisha wáinkiashtataji. Israer-shuar apachnium pujuinia nui we apachin unuiniartatuak. ³⁶ Nii timia nu itiurkit. “Átumka éátkáttarme tura Wi wéajna nui wéchamnaiitkiuram wáitkiashtatrume” tana nu itiurkit?” tiarmiayi.

Yamaram iwiaakman súana nú entsa

³⁷ Jista amúamunam ti shiir najanawarmia nu tsawantai Jesus wajaki kakaram chichaak tímiayi “Shuar ni enentáin kitiamakka Winin taa umar kitiakén imíkráti. ³⁸ Winia enentáimturna nuka ni enentáiyá entsa wa áintsan yamaram iwiaakman súana nú entsa jiinkittiawai.”

³⁹ Nuna taku Jesus “Ashí Yúsán enentáimtusarun Yusa Shiir Wakaní súsatniuiti” tímiayi. Tura núnisan Yus-Papiniumsha áarmaiti. Antsu Jesus tuke nayaimpiniam wéatsain Yusa Wakaní shuar súsachmauyayi.

Shuarsha niisháa niisháa enentáimprarmiania nu

⁴⁰ Chíkich shuarsha nuna antukar “Ju nekas Yúsán etserin tátinia núiti” tiarmiayi. ⁴¹ Chíkichcha “Juka nekas Krístuiti” tiarmiayi. Tura chíkichkia Jesus Kariréanmayaiti tu enentáimiainiak tiarmiayi “Warí, ¿Kariréa nunkanmayá Kristu áminkiait? ⁴² Yus-Papinium paant tawai “Krístuka yaunchu uunt akupin Tawit weeanmayá akiiniatniuiti, tawai. Tura Tawitia pépruriyá Pirinnumiá átiniaiti” tawai” tiarmiayi. ⁴³ Tuma asamtai shuar niisháa niisháa enentáimprar kanakiarmiayi. ⁴⁴ Chíkich aiyá nuka “sepunam enkeatai” tiarmiayi túrasha túracharmiayi.

Israer-shuara uuntri Jesusan enentáimtuscharmiania nu

⁴⁵ Suntarsha waketkiarmiayi. Tura Pariséusha Israer-patri uuntrisha “¿Urukantai itiachuram?” tiarmiayi.

⁴⁶ Suntarsha tiarmiayi “Chíkichkisha ju áishman chichaa áanis chichaschaiti” tiarmiayi.

47 Nuyá Pariséu tiarmiayi “Atumsha anan̄narume.
48 Pariséutisha uuntcha nuna enentáimtuiniawash. 49 Penké
shuarka yaunchu akupkamun nékachua nuka yajauchiniam
yum̄nkramu áiniawai” tiarmiayi.

50 Nikiutémusha, kashi Jesusan tarimia nu, Pariséuitiat
tímiayi 51 “Ii shuartikia, shuar ni túramun etserkamu ántutsuk
súmamtikiachminiaiti” tímiayi.

52 Nuñkia niisha tiarmiayi “Wats, amesha
Kariréanmayanchuashitiam. Yus-Chicham áujsam
nekaattame. Kariréanmayá Yúsnan etserin penké táiniatsui”
tiarmiayi.

Nuwá wáinmakman Jesusan itiariarmiania nu

53 Nuyá ashí ni jeen waketkiarmiayi.

8

1 Tura Jesuska Uriwiu náinnium wémiayi. 2 Tura kashin tsawar
Yusa Uunt Jeen atak támatai ashí shuar Nin káutkarmiayi.
Túrawarmatai Jesus pujus unuiniarmiayi. 3 Nuyá Israer-
shuara jintinniurisha Pariséusha nuwān wáinmakman Jesusan
itiariarmiayi. Tura ashí iruntramunam ajapén awajsarmiayi.
4 Tura Jesusan tiarmiayi “Uunta, ju nuwá tsanirma pujá
achinkiai. 5 Muisais akupkamunmasha nuna túraka “kayajai
tukurar máatniuiti” tawai. ¿Amesha warintmea?” tiarmiayi.
6 Aya mamikmar nekapsatai tusar tiarmiayi. Nin sumamtiki-
atniun wakeriarmiayi.

Nuyá Jesus tsuntsumá ni uwejéjai nunká áarmiayi. 7 Tura
tuke iníam wajaki tímiayi “Ayu, atum̄iyya tunáa túrichu ákun̄ka
kayan achik nin emka tukuti” tímiayi. 8 Tura nuna ti, ataksha
tsuntsumá nunká áimiayi.

9 Tura ni chichamen antukar ni enentáin sumamawar
úuntnumia jukí chikichik chikichik jiinki wéarmiayi.

Ashí wéarmatai Jesus Niñki nuwájai juákmiai. 10 Jesussha
wajaki aya nuwānak wáiniak tímiayi “¿Ámin súmamtikramainia
nusha tuiñ pujuinia. Chikichkisha áwak?” tímiayi.

11 Niisha “Atsá, Uunta. Chikichkisha atsawai” tímiayi.

Nuyá Jesus tímiayi. “Ayu. Wisha súmamtikiatsjame. Yamaikia
weme atakka tunáa túrawaip” tímiayi.

Jesus tsáapninia áintsan̄kete

12 Ataksha Jesus Yusa Uunt Jeen iruntrarun tímiayi “Ju
nunkanam Wi tsáapninia áintsan shuara enentáin tsáapniajai.
Ashí Wijiai tsaniñ wekaana nú shuar ni enentáin kiritniunam
wekasashtatui antsu tsáapnin yamaram iwiaakman súana
nujai wekasattawai.”

13 Pariséu nuikia tiarmiayi “Ame pé_nkerum tau asam támena nu áantraiti.”

14 Jesus tímiayi “Tuyá winiaj tura tui weaj nu nékatsrume, tura Wikia nékajai. Tuma asan winia pé_nkerun táyatnak tájana nu pé_nkeraiti. 15 Ju nu_nkanmaya aents enentáimmiajai enentáimtakrum ti súmamtikrume. Tura Wikia chikichkinkesha súmamtiktsujai. 16 Tura súmamtikkiunka awajitsuk túrajai. Iis, Wiki shuar túramun pé_nkerashit tusan enentáimtsujai antsu winia Apar Winia akuptukua nusha Wijiai métek shuar túramun nékawai. 17 Atumí akupkamuriin áarmaiti: “Jimiará shuar mai nú chichamnak táku_nkia nu chicham nekasaiti.” 18 Wátsek Wisha winia Aparsha mai métek taji. Winia Aparsha akuptukuiti” tímiayi.

19 Tutai “¿Ame apasha tui pujá?” tiarmiayi.

Jesussha tímiayi “Átumka Winiasha winia Aparsha nékatsrume. Winia nékarkurmeka winia Aparsha nekaawaintrume.” 20 Nuna Yusa Uunt Je_en Yusa kuítr_in suinia nu_i tímiayi. Tuma ain sepunam en_ekeatniun achikcharmiayi ni tsawantr_i jeachu asamtai.

“Wi wéajna nu_i wé_echamnaitrume’ tímiayi Jesus

21 Jesus ataksha tímiayi “Wikia wéajai. Atumsha eátkáttarme tura wi wéamunam wé_echamnaitkiuram atumí tunaar_ijia_in jakattarme.”

22 Israer-shuarsha tiarmiayi “Wi wéamunam wé_echamnaitrume” tutai, nu_nkia máamatpiash” tiarmiayi.

23 Nu_nkia Jesus tímiayi “Átumka nu_nkayaitrume antsu Wikia nayaimpinmayaitjai. Ju nu_nkayaitrume tura Wikia juyanchuitjai. 24 Tuma asamtai tájarme “Atumi tunaar_ijia_i jakattarme.” Nekas Wi tájana núitjai. Tura nu enentáimtachkurmeka atumi tunaar_ijia_i jakattarme” tímiayi.

25 Niisha aniasarmiayi “¿Amesha yáitiam?”

Jesussha tímiayi “Yaunchu tájarme. 26 Nu arantcha atumin súmamtikiatjarum tusan ti tíminiaitjai. Winia Apar akuptukua nuka tuke nekasa nuna tawai. Tura aya ni taman antukan ashí shuaran nunak tajai” tímiayi. 27 Tuma ain ni Apar_in áujmatman pen_{ké} nekaacharmiayi. 28 Tuma asamtai tímiayi “Aents Ajasuitjiana ju, numiniam ajintruarum yakí takuriakrumin núja_nkia nekarattarme. Wi tájana núitjai tura winia enentáir_{jai}n takatsuk aya winia Apar unuitiurmanak tájai. 29 Winia akuptukua nuka tuke Wíjia_in pujawai. Winia Apar wakeramun tuke shiir túrakui ikiurkichuiti” tímiayi. 30 Tutai untsur_i shuar Nin nekas enentáimtusarmiayi.

Yus-shuarsha tura tunaanum emetamusha

³¹ Israer-shuaran Nin shiir enentáimtusarmia nuna Jesus tímiayi “Wi tájarmena nu yawetsuk túrakrumka nekas winia unuiniamur átatrume. ³² Nújaisha timiá nekas ana nu nekaat-tarme tura nekas ankant ajastatrume” tímiayi.

³³ Niisha tiarmiayi “Tisha Apraám weeitji. Chikicha takarniur átai tusar penké emetachmaitji. ¿Urukamtai “Ankant ajastatrume” tame?” tiarmiayi.

³⁴ Jesus tímiayi “Timiá nekasaiti, ashí shuar tunaan túruinia nuka nu tunaajai emetamuiti. Tuma asa takarniua núnisan ajasuiti. ³⁵ Takarniusha ajapnamnia asamtai Yus atumin ajapramamniaitrume. Tura Akupniu Uchirínkia ni Aparíjiai tuke pujawai. ³⁶ Tuma asamtai Akupniu Uchirí ankant awajtamsamtaínkia imiá nekas ankant pujustatrume. ³⁷ Átum Apraám weeitrum nekejai. Túmaitiatrum winia chichamur ántachu asarum mantuataj tárume. ³⁸ Winia Apar iniaktur-samun áujmatjai. Átumka atumí uuntri timia túrarme” tímiayi.

³⁹ Tutai niisha tiarmiayi “Iikia Israer-shuar asakrin ii úuntriínkia Apraámaiti” tiarmiayi.

Tura Jesus tímiayi “Nekas enentáimin Apraám weeitki-urmeka níiya núnis túrawaintrume. ⁴⁰ Nekas ana nuna Yus iniaktursamtai nuna ujakjarme, tuma aín mantuataj tarume. Apraámka nuní túrachmiayi. ⁴¹ Antsu atumí uuntri túrana áintsarum túrarme” tímiayi.

Tutai niisha tiarmiayi “Warí, tsanirnumia akiiniachuitji. Ii uuntri Yúskete. Niisha ii Aparínti.”

⁴² Tura Jesus tímiayi “Yus nekas atumí Aparíntkiuinikia Winiasha anentáintrume Yúsnumia tau asamtai. Wisha winia enentáimmiarjai juí táchaitjai antsu Yus akuptukuiti. ⁴³ ¿Urukamtai Wi tájana nu imiá nékatsrum? Wi tájana nu nakitia asarum winia chichamur ántatsrume. ⁴⁴ Atumí aparínkia úunt iwianchiiti. Tura niiniu asarum nii wakera nu túrarme. Yámankamtaiksha úunt iwianchkia tuke mankartiniaiti. Nekas ana nunasha nakitiawai tuke wáitrin asa. Wáitraksha níiniunak chichaawai. Iis, waitia uuntri asa tuke wáitriniaiti. ⁴⁵ Tura Wikia nekas takui átum enentáimturtsurme. ⁴⁶ ¿Yaki chikichkí tunaajai súmantikruamniait? Nuikia Wi nekasa nuna tau aisha ¿urukamtai enentáimturtsuram? ⁴⁷ Yús-shuarka Yus timian ántawai tura átum Yúsnachu asarum Wi tájana nu nakitiarme” tímiayi.

Apraám akiintsain Jesus pujumiayi

⁴⁸ Nuikia Israer-shuar tiarmiayi “Maa, ti nekas tátsujik “Ame Samarianmaya shuáraitme. Tuke yajauch áiniawai nusha. Nu arantcha iwianchrukuitme amesha” nekas taji” tiarmiayi.

49 Jesussha tímiayi “Iwianchrukchaitjai. Áyatik winia Aparun shiir enentáimtikiajai. Tura átumka yajauch chichar-tarme. 50 Wikia “shiir enentáimturarti” tátsujai túrasha Yuska ashí shuar Winia shiir enentáimturat tusa wakerawai. Niisha Yus asa ashí shuar túramun pénkerashit tusa nekaattawai. 51 Ti nekasaiti. Wi tájana nuna enentáimta nú shuarka penké jákashtiniaiti” tímiayi.

52 Nuñkia Israer-shuar tiarmiayi “Pai, yamaikia ti paant íwianch takakme. Apraámsha ashí Yúsnan etserniusha jákaruiti tura Ame “Wi tájana nuna enentáimtaka penké jákashtiniaiti” tátsumek tiarmiayi. 53 ¿Nuñkia ii uuntri Apraám nan̄kaamaskaitiam. Niisha tura Yúsnan etserniusha jákacharuk áinia. Itiurak imiá nan̄kaamantu enentáimtumam?” tiarmiayi.

54 Jesussha tímiayi “Wiki shiir enentáimtumaknaka penké áantraiti. Antsu Winia shiir enentáimturna nu winia Aparuiti. Nusha átumka “winia Yúsruiti” tárugna núiti. 55 Nusha táyatrurn Nin nékatsrume. Wikia Nin nékajai. “Nin nékatsjai” tákunka atumjai métek wáitrin áintjai. Tura Nin neka asan Nii tana nuna tuke túriniaitjai. 56 Apraámka, atumí uuntri, imiá yaunchu jákaitiat Wi ju nun̄kanam tátinian wararas nákasmiayi. Tura wáitiak ti shiir warartusmiayi” tímiayi.

57 Nuyá Israer-shuar Jesusan tiarmiayi “Warí, sen̄kuenta (50) uwí takaktsume túmaitiatam Apraáman wáinkiam̄jai tame.”

58 Jesussha tímiayi “Ti nekas tájarme, Apraámka pujatsain Wikia pujajai” tímiayi Jesus.

59 Nuna takui kayan achikar “Jesusan tukutai” tiarmiayi. Tura Jesus úumak ni matsatmanum ajapénin̄ weak Yusa Uunt Jeeniā jiinki wémiayi.

9

Kusuru akiinian Jesus tsuármiania nu

1 Jesus ni unuiniamur̄ijjai wesa áishman̄kan kusuru akiinian wáinkiamiayi. 2 Ni unuiniamur̄isha aniasarmiayi “Unta, jusha ¿urukam̄tai kusuru akiiniawit. Yana tunaar̄ijjaīn kusuru akiiniait. Niiniuj̄aīmpiash, apar̄iniuj̄aīmpiash túrunawit?” tiarmiayi.

3 Jesus tímiayi “Ni tunaar̄ij̄aīinchusha ni apar̄iniuj̄aīinchusha túrunaiti. Antsu Yus ni ayash̄in̄ túratniua nu paant atí tusa túrunaiti. 4 Tsaw̄aj̄kia takastiniaiti. Yamaikia Winia akuptukua nuna takatr̄in̄ túratniuitjai. Kashi ajasmatai takastin atsuttawai. 5 Jú nun̄kanam pujakun shuara enentáin̄ tsáapnimtikratniuitjai” tímiayi. 6 Nuna chichas nun̄ká usukmi nun̄kaj̄aī pachimiar kusuru j̄iin̄ yakarmiayi. 7 Nuyá chichaak “Siruí pajam̄tai entsanam nijiamauta” tímiayi. Siruisha nu

chichamnum “akupkamu” tawai. Kusurusha we nijiamar péñker íimiar támiayi.

⁸ Nuyá ni írutkamurisha nuik wáinin ármia nusha tiarmiayi “Juka pujus tuke kuítian seamniuya núchakait.” ⁹ Chíkich “Ee, núkete” tiarmiayi. Chikichcha “Atsá, núchaiti; kame nuash tumainti” tiarmiayi.

Tura nin̄ki “Ee, wiítjai” tímiayi.

¹⁰ Tutai aniiniak “¿Itiurak yamaikia íimiam?” tiarmiayi.

¹¹ Niisha tímiayi “Áishman̄ Jesusa nu tsakusan j̄iirun yakar-tur “Siruí pajamtai entsanam nijiamauta” turutmiai. Takui wena nijiamaran paant iimpramjai” tímiayi.

¹² Tutai “Nu áishman̄sha tuin̄ pujá” tiarmiayi.

Niisha “Cha, nékatsjai” tímiayi.

Pariséu kusuru tsuárman inintrusarmiania nu

¹³ Nuyá kusuru tsuárman Paríséunam júkiarmiayi. ¹⁴ Kame Jesus kusurun tsuarmia nuí ayampratin tsawantauiyayi. ¹⁵ Tuma asamtai Paríséusha itiurak íimnium tusar aniasarmi-ayi.

Niisha tímiayi “J̄iiruin tsakusan yakaarámtai, nijiamaran paant iimjai.”

¹⁶ Nuyá chíkich Paríséu shuarnumiá nuamtak tunaiyar “Juna tsuáruka Yúsaiyanchuiti. Kame ayampratin tsawantai túraiti” tiarmiayi.

Tura chikichcha “Tunáa shuaraitkiuin̄kia j̄únisan̄ túratniun tujinkiaayi” tiarmiayi. Nujai akannaikiarmiayi.

¹⁷ Tsuármancha ataksha aniasarmiayi “Ámin tsuármarua nu ¿warí enentáimtam?” tiarmiayi.

Tutai “Wikia “Yúsnan etserniuiti” tajai” tímiayi.

¹⁸ Tura Israer-shuar nekas kusuruitiat yamáí íimiui tu enentáimtuscharmiayi Pariseu. Tuma ásar ni aparíncha untsukar ¹⁹ inintrusarmiayi “¿Ame uchiram kusuru akiinia tárumna nukait. Itiurak yamaikia iimia?” tiarmiayi.

²⁰ Ni aparísha tiarmiayi “Ii uchirín̄kia kusuru akiiniam nu nékaji. ²¹ Tura iisha nékatsji itiurak yamaikia iimia. ¿Yátsuk péñker tsuáruit? Niisha úuntchakait, nii aniastarum. Nin̄ki ujatmakarti” tiarmiayi. ²² Sapijmiak tiarmiayi. Israer-shuara úuntriñkia “Jesus Yus akupkamu asa nekas Krístuiti” tuinia núnaka Israer-shuara iruntainmaya j̄iiki akupnakti tiniu ásarmatai tsuarma aparí ashankarmiayi. ²³ Nu asamtai ni aparí “Niisha úuntchakait, nii aniastarum” tiarmiayi.

²⁴ Nuin̄kia Israer-shuara uuntri kusuru tsuárman ataksha untsuk tiarmiayi “Yus íimmianum nekasa nu titiá, ju áishman̄kka tunaarinniuiti nékaji” tiarmiayi.

²⁵ Tutai tímiayi “Kame tunaarinchashit. Nékatsjai. Antsu junak nékajai. Yaunchu kusuruitiatan yamaikia íimjai.”

26 Ataksha aniiniak “¿Itiurtámkama. Itiur ímtikrammia?” tiarmiayi.

27 Niisha tímiayi “Yaunchu tájarme tura anturtatsrume. ¿Urukantai ataksha titi tusa wakerarum. Niiniu ajastin enentáimprurmek?” tímiayi.

28 Nuñkia katsekkar “Ámeka ní shuarinme. Tura iikia Mui-saisa shuárintji, tiarmiayi. 29 Yus Muisaisan akupkaiti iikia nékaji antsu nu áishman nékatsji. ¿Tuyantskait?” tiarmiayi.

30 Áishman tsuarma tímiayi “¿Ausha itiuartsuk áminiait? Winia ímtikrurma nu átumka nékatsrume tuyankit. 31 Paant nékaji tunaarinnium Yus anturtsui. Tikishmatar ni wakeramun túruinia nunak anturui. 32 Yáunchusha kusuru akiinian tsuáruka tuke atsuwaiti. 33 Ju áishman Yúsaiyanchuitkiunka penké túrachayyi” tímiayi.

34 Nuñkia tiarmiayi “Ámeka tunaarintin akiiniaiatmesha ¿in jintintin átaj tamek?” Nuna tiar jiki awemarmiayi.

Wakanin kusurua nu

35 Kusuru tsuárman jiki awemarma nuna Jesus nekaamiayi. Tura wáiniak “Yusa Uchiría nu enentáimtamek” tímiayi.

36 Tsuarma tímiayi “Unta, turuttia wisha nekaan enentáimtustaj.”

37 Jesussha tímiayi “Wainme. Wiitjai ámijiai chichaaajna nu.”

38 Tutai, tikishmatar “Unta, enentáimtajme” Jesusan tímiayi.

39 Nuyá Jesus tímiayi “Shuara enentáin nekaan, akantratajtsan táwitjai. Ni enentáin kusuru ain iimtiktinian tura ananmamuk “Yusnan nekaan paant iimjiai” tana nuna ukus-turtinian táwitjai” tímiayi.

40 Tutai Pariséu shuar nui pujuarmia nu nuna antukar “¿Nuñkia iikia kusurukaitiai?” tiarmiayi.

41 Jesussha tímiayi “Átum kusuruitkiurmeka atumí tunaari wáinchakrum sumamachu áintrume. Tura “paant iimjiai” tau asarum sumamaitrume” tímiayi.

10

Iikia murikiua áintsar aji

1 Jesus tímiayi “Wi tájana nu ti nekasaiti. Shuar murikiun takakna nu ni murikrin wenuimiunam kashi ikuawai. Tura murik wenuimiunam pujuiniakui yajauch shuar murikiun kasamkatniun wakerakka wáitiniam wayachmin asa tanishnum waruk yajá wayawainti. 2 Antsu murikiu wáinniuka wáitiniam wayawai. 3 Waiti wáinniuka nekas murikiun wáinnium wáitin uratui. Muriksha ni wáinniuri chichamen nékainiawai. Niisha ashí ni murikrin chikichik chikichik náarin anaitius untsúawai. Tura tsawajkia ni murikrin jiki

ayurtainiam yarumui. ⁴ Tura ashí ni murikrin jijir émtuki wéawai. Muriksha ni chichamen ántuiniak untsuam nemarainiawai. ⁵ Chíkich shuárnaka nékachu ásar nemarainiatsui. Antsu ni chichamen nékainiachu ásar pisainiawai.” ⁶ Nu métek-taku chichamnaka Jesus áujmatsamiayi tura shuar antukar nekaacharmiayi.

Pénker wáinniuka Jesusaiti

⁷ Nuyá Jesus tímiayi “Ti nekasán tájarme. Wenuimiu wáitiri murik wainia nuka Wiitjai. Shuarsha murikiu áintsar Winí wayamin áiniawai. ⁸ Wi táatsain ashí táaruka kasa áiniak winia shuarun kasamkatai tusa wakeriarmiayi. Tura winia murik-iur Wíi shuar áiniak nu shuaran anturkacharmiayi. ⁹ Wikia wáititjai. Ashí Winin wayaaka uwemprattawai. Tura murik-iua áintsan wenuimiumaya jiinki pénker yurumáttawai tura atak wayá ayamprattawai’ tímiayi.

¹⁰ ‘Kásaka aya kasamkatniuncha máatniuncha emesratniuncha wakerawai. Antsu Wikia yamaram iwiaakman tuke shiir atsumtsuk takusarti tusan táwitjai. ¹¹ Wikia pénker wáinniuitjai. Pénker wáinniuka ni murikrin uwentikrartaj tusa jakattawai. ¹² Antsu aya kuitjai takauka ni murikrichu áiniakui tura nekas wáinniuchu asa pénker wáintsui. Kame uunt yawá winiakui murikiun ikiuki pisaawai. Uunt yawasha murikiun achik tsakinmawai. ¹³ Nu shuarsha akikiam takáa asa murikiun enentáimtsui. Nu asamtai aya pisaawai’ tímiayi.

¹⁴⁻¹⁵ ‘Wikia pénker wáinniuitjai. Winia Aparsha nékarui. Wisha Aparun nékajai. Núnisnak murikrun nékajai tura winia murikrusha nékarui. Wisha murikiun uwentikrataj tusan jakattajai. ¹⁶ Chíkich muriknasha takakjai. Nusha ju wenuim-iunmayanchu áiniawai. Nunasha itiattajai. Nu muriksha Winia umirtukar ashí métek matsamsar chikichík wenuim-iunmaya ajasartatui tura chikichik wáinin átatui’ tímiayi.

¹⁷ ‘Winia murikrun uwentikrataj tusan jakattajai turan atak nantaktiatjai. Nu asamtai winia Apar anentui. ¹⁸ Wi wakerakun jakattajai. Wi wakerachkuinkia chíkichkia man-tuachminiaiti. Jákatniuncha tura nantaktinniasha winia Apar surusuiti” tímiayi Jesus.

¹⁹ Israer-shuarsha nuna antukar niisháa enentáimprar kanakiarmiayi. ²⁰ Untsurí tiarmiayi “¿Urukamtai ántarum wáuruk tausha. Yajauch wakanin takaktsuk?” ²¹ Tura chikichcha tiarmiayi “¿Yajauch wakantrinniusha núnisan chichasminkiait. Yajauch wakantrinniusha kusurun íimtikramniashit?” tiarmiayi.

Israer-shuarka Jesusan nakitiarmiania nu

22 Micha nantutin Israer-shuar Jerusarénum namperan najanainiawai. Nu nampernumsha Yusa Uunt Jee atak jeamman enentáimtuiniawai. 23 Jesussha Yusa Uunt Jee áachiniam wekasamiayi Sarumúnka wáitiria nui.

24 Israer-shuarsha Nin téntakar tiarmiayi “¿Ame nekas Krístukaitiam? Ju chichamaik etserkata. ¿Urukamtia nekas paant tátsum?” tiarmiayi.

25 Tutai Jesus tímiayi “Yaunchu tiniu ain enentáimturachmarme. Winia Apar akupkamun takaajna nu ti paant awajtawai. 26 Tura átumka winia murikruchu asarum enentáimturtsurme. 27 Wisha winia murikrun untsum anturtuiniak nemartuiniawai. Wisha winianak mash nékajai. 28 Tura yamaram iwiaakman tuke jákashtinian súajai. Nu asamtai niisha menkakachartatui antsu Wi wainkia asamtai ¿yaki jurutkit? 29 Winia Apar murikiun surusuiti. Niisha ashí nankaamas kakaram asamtai ¿yaki uwejéyan atankit? 30 Wisha winia Aparjai iisha aya chikichkiitji” tímiayi Jesus.

31 Tutai Israer-shuarsha atak kayan achikiar tukutaj tiarmiayi.

32 Jesussha tímiayi “Winia Aparu kakarmaríjjai ti untsuri péñkera nuna takasuitjai. ¿Tújaímpia mantuattarum?”

33 Israer-shuarsha Nin tiarmiayi “Pénker túra asakmin máataj tátsuji antsu Yus yajauch chicharkumin túrattaji. Ámeká shuáraitiatam Yusa nuke enentáimtumame” tiarmiayi.

34 Nuyá Jesussha tímiayi “Atumí akupeamuriin Yus timia nu áarmaiti: “Átum yúsaitrume” tawai. 35 Kame Yus-Papinium aarma nu tuke nekaschakait. Tuma asamtai ni chichamen antukarun Yuska “yúsaitrume” takui nuikia ti nekaschakait. 36 Niisha yúsaitkiuinikia nuikia Yus Apa anaikia ju nunkanam akupkamu asan ti nekas Yúschakaitiaj. Nújaínkia wi “Yusa Uchiríntjai” takui ¿itiurak “Yusan yajauch chicharui” túrutrum? 37 Winia Apar túramu túrachkuínkia enentáimtursairap. 38 Tura nekas túrakuínkia enentáimtursatarum. Tura Winia nakitrakrumsha nuikia wi túramu enentáimtustarum. Nujáínkia winia Apar Winin pujamu ashí nekaattarme. Núnisnak Wisha Níin pujajai. Iisha chikichkiitji.” 39 Tutai ataksha sepunam enkeatai tiarmiayi. Túrasha Jesus uwempramiayi.

40 Nuyá Jesus Jurtan entsa amain wé yaunchu Juan imi-akrattainium pujusmiayi. 41 Ti untsurí shuar iyuwar tiarmiayi “Nekas Juanka aentsti tujintiamun túrachiat ashí Jesusnan timia nu nekasaiti” tu tiarmiayi. 42 Nuisha untsurí Jesusan enentáimtusarmiayi.

11

Rásaru jakamu

¹ Petania péprunam áishman, ni naari Rásaru, jaa pujumiayi. Nu péprunam Marí ni kajijai Mártajai pujumiayi. ² Niisha Rásaru umai ármiai. Nu Marisha ukunmanka kunkuinian sumak Jesusan kuer ni intiashíjiai japirmiayi. ³ Tura Rásaru jaakuí ni umai Jesusan chichaman akuptuiniak tiarmiayi “Uunta, ame amikrum jaawai.”

⁴ Jesussha nuna antuk tímiayi “Tuke jakataj tusa jaat-sui. Antsu Yusa kakarmarisha tura ni Uchirí kakarmarisha jú sunkur tsuármanum paant atí tusa jaawai.” ⁵ Jesus Mártancha ni kaincha tura ni umai Rásaruncha nekas aneemi-ayi. ⁶ Túmaitiat Rásaru jaawai taman antukiat ni pujamunam jimiara tsawant pujusmiayi. ⁷ Nuyá ni unuiniamurín “Ataksha Jutía nunkanam wetái” tímiayi.

⁸ Tura ni unuiniamurisha tiarmiayi “Uunta, nuiksha Israer-shuar kayajai tukurmar mantamatai tícharmaka. ¿Nui ataksha wétai támek?”

⁹ Jesussha jú métek-taku chichaman tímiayi “Tsawaikia páantchakait. Tsawai wekaana nu paant asamtai tukumkashtatui. ¹⁰ Tura kashi wekaana nusha kirit asamtai tukumkáttawai. Núnisan Wíi tuke pujakun winia takatrun takastiniatjai. Túraknasha itiurchatan wáinkiashtatjai.” ¹¹ Nuyásha Jesus atak tímiayi “Íi amikrj Rásaru kanarai. Wi ishintiartatjai.”

¹² Tutai ni unuiniamurj tiarmiayi “Uunta, aya kanarka nuñkia péñker ajastatui.” ¹³ Jesuska Rásaru jakamu nékayat “kanarai” tímiayi. Tura ni unuiniamurj Rásaru kajinmakua áintsan kanarai enentáimprarmiayi.

¹⁴ Jesus nuikia ti paant tímiayi “Rásaru yamaikia jakayi. ¹⁵ Tura nui pujuscha asan kúntuts pujatsjai. Jean túrattajna nu ísrum ti nekas enentáimtursattarme. Nuna nekaan shiir enentáimjai. Wátsek, iyutai.” ¹⁶ Nuyá jimiampamu Tumas chíkich unuiniamurj nui armia nuna “Íisha weri Nijijai métek jakatai” tímiayi.

Iwiaaku átinniasha jaka nantaktinniasha Jesus nérenniuiti

¹⁷ Nui taa, Rásarun kuaru tsawant ikiusman wáinkiamiayi. ¹⁸ Petania pépruka Jerusarénumia menaintiú kirumitru áinis tíjiuchiiti. ¹⁹ Tuma asamtai untsurj Israer-shuar Mártasha Marísha, ni umai jakamtai uutkui atsankrataj tusa weri-armiai. ²⁰ Mártasha Jesus tíjiuch ajasun nekáa inkiuntajtsa wémiayi. Antsu Marikia jeá pujumiayi. ²¹ Tura Marta Jesusan inkiun tímiayi “Uunta, Ame pujakminkia winia umar jákachaayi. ²² Tura tuke nékajai ashí Yus seamna nuna súramui.”

²³ Jesussha tímiayi “Ame umaímisha nantaktiatui.”

²⁴ Mártasha tímiayi “Nekas, ashí amuamunam jákaru nantaktin tsawantaj nantaktiatui. Nuna nékajai.”

²⁵ Nuyá Jesus tímiayi “Iwiaaku átinia nérentin asan Wikia iniantkartiniaitjai. Winia enentáimturna nuka jakasha nantaktiatui. ²⁶ Tura ashí iwiaaku pujana nusha Winia enentáimturaka penke jákashtatui. ¿Nu nekasaiti tu enentáimtamek?”

²⁷ Niisha “Ee, Uunta, ame Yusa Uchirínme. Krístuitme, uwentikkiartin jú nunkanam tátinia nu” tímiayi.

Jesus Rásaru iwiarsamunam taa úutmiania nu

²⁸ Mártasha nuna t̃i, ni kaj̃ Marin untuk úukañ tímiayi “Unt juĩ taa unturmawai.” ²⁹ Marisha nuna antuk wárik wajaki Jesusa iyuttsa wémiayi. ³⁰ Jesussha péprunam jeatsuk Marta iñkiuñmanum pujumiayi. ³¹ Marí wari wajaki wématai Israer-shuar nu jeanam atsañkrattsa pujuiniasha nuna ísar weriarmiayi. Iwiarsamunam úuttiasa wéatsuash tusa weriarmiayi. ³² Marisha Jesus pujamunam jeá tikishmatar tímiayi “Uunta, Ame pujakminkia winia umar jákachaayi.”

³³ Jesussha Marinha tura niijjaĩ úutuncha wáiniak wáitnentaímta asa ti kúntuts pujusmiayi. ³⁴ Tura “Tuĩ iwiarsamarum” tímiayi.

Niisha “Uunta, iitia” tiarmiayi.

³⁵ Jesussha úutmiai. ³⁶ Israer-shuarsha “Ti aneatsuk” tiarmiayi. ³⁷ Tura chíkich “Kusuru tsuáruchukait. Nii pujakuisha Rásaru jákaampiash” tiarmiayi.

Rásaru iniantkimiu

³⁸ Jesussha ti kuntuts enentáimiar iwiarsamunam weankámiayi. Náinnium asa paka taurma áuyayi. Tura kaya atutkamuyayi. ³⁹ Tura Jesus “Kaya jurustarum” tímiayi.

Rásaru umãi Marta tímiayi “Uunta, kuaru tsawant jákaiti. Mejeatsuk’ tímiayi.

⁴⁰ Tura Jesus tímiayi “Yus enentáimtakmeka Yusa kakarmari wáinkiat̃tame tíchamkajam.” ⁴¹ Nuikia kayar̃in uratiarmatai Jesus nayaimpin iis tímiayi “Aparu, Winia anturtakmin yumiñsajme. ⁴² Winiasha tuke anturtame tura jũ shuaran péñker enentáimtikrataj tusan tajai. Ame akuptukuitmena nuna nekarmawarti.” ⁴³ Nuna tinia kakaram untuak “Rásaru jiinkitia” tímiayi. ⁴⁴ Nujaĩnkia penuarmartiuk jiinkimiayi. Yapinmasha jaanchjiaĩ ijamuyayi. Tura Jesus “Atirtarum. Wéti” tímiayi.

*Jesusan achiktin chichaman jurusarmiania nu
(Mateu 26.1-5; Márkus 14.1-2; Rúkas 22.1-2)*

⁴⁵ Untsurí Israer-shuar Marin nemariaru Jesus túramun íisar enentáimtusarmiayi. ⁴⁶ Tura chíkichkia Paríséunam wear Jesus túramun ujakarmiayi. ⁴⁷ Nuna antukar Paríséusha Israer-patri úuntrisha ashí naamka uunt armia nujai iruntrar tiarmiayi “¿Warí itiurkamniat? Nu shuarka aentsti tujintiamun ti túratsuk. ⁴⁸ Aya júnik iniaiyakrinkia ashí shuar Nin enentáimtuschartatuak. Nuyá Rúmanmaya apach taar mesetan najanawartatui tura in amutmakar Yusa Uunt Jeencha emes-rartatui.”

⁴⁹ Nu uwitin Kaipias Israer-patri uuntriayi. Niisha tímiayi “Átumka nékatsrume. ⁵⁰ ¿Ashí Israer-shuar mesertin péñkerkait. Antsu aya chikichik shuar jákatin péñkerchakait?” tímiayi. ⁵¹ Kaipiasa aya ni enentáimmiájain tíchamiayi. Antsu nu uwitin Israer-patri uuntri asamtai Yus nuna enentáimtikramiayi. Nújainkia Israer-shuar Jesus jaruktinian ujakmiayi. ⁵² Tura aya Israer-shuarnakcha antsu níijjaisha ashí nunkanam Yus-shuar ajasarun irurtajtsa jákatniuyi. ⁵³ Tuma asamtai nu tsawantini Israer-shuara uuntri Jesus máatai tusar áujmatsarmiayi.

⁵⁴ Nu asamtai Jesus paant wantiniak Israer-shuarnum wekaichmiayi. Antsu Jutía nunkanmaya jiinki atsamu nunkanam Eprain pepru tíjiuch wémiayi. Tura nuí pujusmiayi ni unuiniamuríjiai.

⁵⁵ Israer-shuara namperi paskua ishichik jatemsamtai untsurí shuar yajá péprunmaya Jerusarénum káunkarmiayi. Kame paskua jeatsain Muisais timia núnisan ni ayashísha enentáisha iwiarnarat tusa wakeriarmiayi. ⁵⁶ Jesusnasha eak yujarmiayi. Tura Yusa Uunt Jeen pujusar nuamtak anini-aisar “¿Warí enentáimiam. Jístanam tatimpiash?” tiarmiayi. ⁵⁷ Paríséusha Israer-patri uuntrisha akupainiak “Jesus pujá nekaamka ujakata” tiarmiayi. Jesusan sepunam enkeatai tusar tiarmiayi.

12

Marí Jesusan kunkuinian kuérmiania nu
(Mateu 26.6-13; Márkus 14.3-9)

¹ Paskua jisat jeatin sais tsawant ajasmatai Jesus Petania péprunam wémiayi. Jesus jakamunmaya iniantkimia nú Rásaru nuin pujumiayi. ² Jesus jeamtai ayurawarmiayi. Rásarusha níijjai yurumámiayi. Mártasha yurumkan iwiasmakmiayi. ³ Tura Marikia kunkuinian ti kuitjai ritru ajapén sumak itiamiayi. Tura Jesusa nawen kuer ni intiashíjiai japirmiayi. Jeasha nu kunkuinjai ti shiir kunkunmiayi. ⁴ Jútas Iskariúti, Semunka uchirí, nuí pujumiayi. Niisha Jesusa unuiniamuríntiat ukunam Jesusan surukmiayi máawarat

tusa. Niisha tímiayi ⁵ “¿Urukamtai nu kunkuinian ti kuitjaj surukchama kuítrinchan súsatniun?” ⁶ Kame kuítrinchan enentáimtak tíchamiayi. Antsu unuiniamu kuítrin wainkia asa yúpichuch kasamkamniuyayi. Tuma asa nuna tímiayi.

⁷ Tura Jesus tímiayi “Iniaisata. Wi iwiarnakui kuératniun sumak ikiurtusuiti. ⁸ Kuítrincha tuke atumjaj íruntsuk. Antsu Wikia atumjaj tuke pujuschattajai” tímiayi.

Rásaruncha máataj tiarmiania nu

⁹ Israer-shuarsha Jesus Petania péprunam pujan antukar Jesus ístaitsar weriarmiayi. Rásaruncha Jesus jakamunmaya iniantkimiua nusha iyutai tusar wearmiayi. ¹⁰ Túramtai Israer-patri uuntrinkia chichaman jurusarmiayi Rásaru maatai tusar. ¹¹ Untsurí Israer-shuar Rásaru iniantkimiun nekaawar Israer-patrin íkiukiar Jesusan enentáimtusarmiayi. Túrawarmatai Rásaruncha máatniun wakerukarmiayi.

Jesus Jerusarénnum shiir wayamiania nu

(Mateu 21.1-11; Márkus 11.1-11; Rúkas 19.28-40)

¹² Paskua namperan pachiintiuktajtsa ti untsurí shuar Jerusarénnum wearmiayi. Kashin tsawar Jesus nú peprunam tátinian nekaawarmiayi. ¹³ Niisha tintiuki nuké áinis nukan júurar Jesusan inkiuntai tusar jíinkiarmiayi. Túrawar untsumainiak “Shiir tati, tiarmiayi. Yusa kakarmarijaj winiana nu tí pénkeraiti. Israer-shuara uuntri asa shiir atí” tu untsumiarmiayi. ¹⁴ Jesussha umpuurun wáiniak entsamkamai. Núnisan áarmaiti Yus-Chichamnum:

¹⁵ “Seun péprunmaya shuara, ashamkairap. Atumí Akupniuri umpuurunam entsamak winiawai.”

¹⁶ Nu chichamaik Jesusa unuiniamuri nu túrunamun nekaacharmiayi. Tura ukunam Jesus nayaimpiniam shiir waketkimtai enentáimprarmiayi. Ashí Jesusna aarma núnisan túrunamiayi.

¹⁷ Jesus Rásarun iwiarsamunmaya iniantkimiun wáinkiarua nú shuar nuna áujmatiarmiayi. ¹⁸ Tuma asamtai shuar Jesus nu tujintiamun túramtai nekaawar Jesusan inkiunktaj tusar jíinkiarmiayi. ¹⁹ Tura Pariséusha nuamtak tiarmiayi “Íis, pénké tujinkiaji. Maa iista, ashí shuar Nin nemarainiatsuk.”

Kriaku apach Jesusjaj chichastinian wakeriarmiania nu

²⁰ Paskua nampernum Yus shiir awajsatniun Jerusarénnum weriaruka untsurí nunkanmaya shuar ármiayi. Kriaku apachcha ármiayi. ²¹ Niisha Jiripin weantukarmiayi. Kame nu Jiripi Petsaitia péprunmayayayi. Petsaitia péprusha Kariréa nunkanam awai. Nincha Kriaku apach seainiak “Unta, Jesusjaj chichastaitsar wakeraji”

tiarmiayi. ²² Jiripisha Antresan werí ujakmiayi. Nuyá niijiaí métek tsanin̄kiar Jesusan weriar ujakarmiayi.

²³ Jesussha tímiayi “Wi Aents Ajasuitjiana ju tsawantur jeayi. Túramtai shiir awájnástatjai. ²⁴ Wi tájana nu ti nekasaiti. Jinkiaia ántsanketjai. Araachmaka nin̄ki pujatsuk. Antsu araamka tsapain jinkiaichirí kaushmariat nerek ti untsurí ajatsuk. Núnisnak Wi jakamtai ti untsurí shuar yamaram iwiaakman takusartatui. ²⁵ Shuarsha jinkiaia nuke aya ju nun̄kanam péñker pujustinian enentáimkiun̄ka ántar pujak nekas iwiaakmarin̄ emen̄kaktatui. Tura ju nun̄kanam péñker pujustinian enentáimtsuk jákatniuncha ashamchaa nú shuarka nekas iwiaakman wáiniak tuke iwiaaku átatui. ²⁶ Shuar winia átaj takun̄ka nemartusti. Túranka Wi pujajna nui Wíi shuar tuke átatui. Núnisan̄ Wíi shuar winia takatrun takáa nuna winia Aparsha shiir enentáimtustatui’ tímiayi.

Jesus ni jákatniun étserei

²⁷ ‘Yamaikia enentáirui ti itiurchat pujajai. ¿Warittiajak. “Aparu, ju túrunatniunmaya uwentikrurta” titiajash? Antsu jú túrunatniun táwitjai. ²⁸ Aparu, wi túramujai ashí shuar ame náarmin shiir enentáimturarti” tímiayi Jesus.

Tutai nayaimpinmaya chichaman antukarmiayi. “Winia náarun shiir awajsaitjai tura ataksha shiir awajsattajai” tímiayi.

²⁹ Shuarsha nui pujuinia “ipiamtachuashit” tiarmiayi. Tura chikichcha “Nayaimpinmaya suntar Nin chichasai” tiarmiayi.

³⁰ Jesussha tímiayi “Wi antuktinian chichaschayi antsu átum nekaatarum tusa chichasai. ³¹ Yamaikia nun̄kanam makumatin jeayi. Tura íwianch ju nun̄kanam akupniua nu nupetnak ajapnattawai. ³² Tura numiniam awajnaintai ashí nun̄kanmayan̄ka shuar enentáimturartatui” tímiayi. ³³ Juna taku krúsnum jákatniun ujakmiayi.

³⁴ Shuarsha awajirar tiarmiayi “Yaunchu Yus akupkamu papiniumia áujsar nékaji. Kristu tutai tuke jáatsuk iwiaaku pujustiniaiti. ¿Itiurak nuikia “Aents Ajasu numiniam awajnaitniuiti” tame? Aents Ajasuka Kristuchukait, Yus anaikiamu. Núchaitkiuin̄kia Aents Ajasuka yait?” tiarmiayi.

³⁵ Nuin̄kia Jesus tímiayi “Wi tsáapninia áintsanketjai. Tsáapnisha atum̄in aya ishichik tsawantin tsáapniartatui. Tsáapin ana juik wekasatarum kirit ajatsain̄. Kame kiritniunam wekaana nusha nékatsui itiuranimpia wea. ³⁶ Tsáapnin wáinkuram nin enentáimtustarum. Túrakrum winia tsáapnintrui wekasattarme.” Jesussha nuna ti wémiayi uumak pujustaj tusa.

Untsurí Israer-shuar Jesusan enentáimtuscharmiania nu

³⁷ Jesus aentsti tujintiamun ti untsurí túramtaisha Nin enentáimtuscharmiayi. ³⁸ Yúsnan etserin Isayas yaunchu aarma uminkiatniuyi:

“Uunta, ¿ya ii ujam antukuit. Yusa kakarmarisha yana iniak-tusuit?” tu áarmaiti.

³⁹ Nuna uminiak Jesusan enentáimtuscharmiayi. Tura nu arantcha Isayas áarmiai:

⁴⁰ “Yus nin kusuru awajsaiti tura ni enentáincha kátsuram awajsaiti. Ni jiiijai íimsain tusa tura ni enentáijiai nekaawain tusa túraiti. Kame ni tunaari iisar enentáimtuiniakui Yus nin tsuáraití” tu áarmaiti.

⁴¹ Isayas yaunchu Jesusan nayaimpiniam ti shiir pujan wáiniak nuna tímiayi.

⁴² Tuma ain untsurí Israer-shuarsha tura ni uuntrinmayasha Jesusan nekas enentáimtusarmiai. Tura niisha Paríséun ashamainiak paant tícharmiayi. Israer-shuara iruntairiya jiki awetamaj tusa ashammiamiai. ⁴³ Yus shiir enentáimtursati tutsuk antsu shuar shiir enentáimtursati tusar túrawarmiai.

Shuaran sumamtikiatniun táchaitjai antsu uwemtikratniun táwitjai, timiania nu

⁴⁴ Jesus kakantar untsumuk tímiayi “Winia enentáimturuk aya Winiak enentáimturtsui antsu winia Aparun Winia akuptukua nunasha enentáimtawai. ⁴⁵ Winia wáitkiusha Winia Aparnasha wáinui. ⁴⁶ Wikia tsáapnin asan Winia enentáimturainia nuka kiritniunam wekasain tusan ju nunkanam táwitjai. ⁴⁷ Shuáran sumamtikiatniun táchaitjai antsu uwemtikratniun táwitjai. Tuma asantai shuar winia chichamprun antuk umíachkunka sumamaiti. Tura Wikia sumamtikiachuitjai. ⁴⁸ Winia nakitrur chichampruncha enentáimtachuka sumamtikiamuiti. Wi timiaj nuka amuukatin tsawantai nin sumamtikiattawai. ⁴⁹ Wi enentáimmiajai chichaatsjai. Winia Apar akattur akuptukuiti. Tura chichastinia nuna surusuiti. ⁵⁰ Wisha nékajai, ashí winia Apar akupeamuka yamaram iwiaakman tuke amuukashtinian súawai. Tuma asantai winia Apar túrutmia núnisnak tajai” tímiayi Jesus.

13

Jesus ni unuiniamuri nawen nijiatramiania nu

¹ Paskua jisat jeatin chikichík tsawant ajasmatai Jesusa tsawantri jeatemayi. Túramtai ju nunkan ikiuki ni Aparin wétiniuyi. Jessusha nuna nekaamiayi. Ashí Níiniun ju

nunkanam pujuinian tuke anea asa amúamunmasha yapajítsuk tuke aneemiayi. ² Nu tsawantaisha murikiun yúatin árimiayi. Tura yurumáin jeatsain, uunt iwianch Semunka uchirí Jútas Iskariúti enentáin Jesusan surukat tusa enentáimtikramiayi. ³ Tura Jesus Yusaiya tau asa waketkitniuyi. Tura Yus Apa ashí mash susamiayi akupin atí tusa. Jesussha nuna nekáa ⁴ chíkich yurumuk pujuiniaj wajakmiayi. Tura pushirín áimiak awankéman emenmamamiayi. ⁵ Nuyá nijiaamatainíum entsan yará ni unuiniamurí nawen nijiatramiayi. Tura awankémjai japirmiayi. ⁶ Semun Pítrunam jeamtai Pítiur tímiayi “Uunta, ¿Winia nawer nijiartaj tamek?”

⁷ Jesussha tímiayi “Wi túrajna nu yamáí nékatsme tura ukunam nekaattame.”

⁸ Tura Pítiur tímiayi “Penké winia nawer nijiarchattame.” Jesussha tímiayi “Wi nijiaachkuínia Wijíai tsanínkia pujuschamniaitme.”

⁹ Tutai Semun Pítiur tímiayi “Nuínkia, Uunta, aya nawerkechu antsu uwejrusha tura muukarsha nijiatrurta.”

¹⁰ Tura Jesus tímiayi “Yamáí mainkia ayashí shiir asamtai aya nawenin níjamártiniaiti. Atumí enentáin ashí péñkeraitrume. Túrashashí shuarcha” tímiayi. ¹¹ Kame Jútas Nin suruktinían nekáa “ashí shuarcha” tímiayi.

¹² Jesussha nijiar umik ni pushirín entsarmiayi. Tura atak pujus tímiayi “¿Atumsha Wi túrajna nu nekaarmek? ¹³ Wi atumí Uuntri asamtai nekas “Uunta” túrutrume. Nusha péñkeraiti. ¹⁴ Tura Jintinniuitiatan tura Úuntaitiatan atumí nawen nijiarchajak. Atumsha núnisrumek nuamtak náwem nijiatnairatarum. ¹⁵ Atumin nekapruatsan túramjai. Atumsha núnisrumek túratarum. ¹⁶ Ti nekasan tajai. Takarniuka ni uuntri nankaamaschaiti. Akupkamusha akupea nuna nankaamaschaiti. ¹⁷ Nu nekaarum túrakrumka shiir átatrume.”

¹⁸ “Tura tájana nuna ashí tátsujrume. Anaikiaitiaj núnaka Wi nékajai. Tura Yus-Chicham uminkiatniuiti, nékajai. Ju aarmaiti:

“Wijíai yurumna nu winia nemasur ajasai.”

¹⁹ Nuka túmatsain ujaajrume. Nuyá túrunamtai Yusa Uchiríntjai nusha paant nekaattarme. ²⁰ Wi tájana nu nekasaiti. Shuar Wi akupeaj nuna shiir itiaakka Winiasha shiir itiaarui. Tura Winia shiir itiaarna nusha Winia Akuptukuncha itiaawai” tímiayi.

Jesus Jútas Nin suruktinían étserui

(Mateu 26.20-25; Márkus 14.17-21; Rúkas 22.21-23)

²¹ Nuna tí, Jesus ni enentáin tí itiurchat enentáimpramiayi. Tura paant tímiayi “Nekas tajai, chíkichik jui atumjai pujana nu Winia surutkattawai.”

²² Tutai ni unuiniamuri nuamtak íniaisar “¿Yanak ta?” tiarmiayi. ²³ Chikichík unuiniamuri, Jesus ti aneamu, Niiijai tsaniñ yurumuk pujumiayi.

²⁴ Tuma asamtai Semuñ Pítiur ni uwejéjai iniakmas “Ani-asta, ¿yanak áujmata?” tímiayi.

²⁵ Tutai Jesusan áyanmatsan aniasmiayi. “¿Yait, Uunta?” tímiayi.

²⁶ Jesussha ayak “Tantan túumnium ajunkan susattaj núiti” tímiayi. Nújaiñ tantan túumnium ajun Semunka uchirín Jútas Iskariútin susamiayi. ²⁷ Tura wárik Jútas tantan achik-matai íwianch ni enentáin wayamiayi. Nuyá Jesus tímiayi “Túratamna nu wárik túrata.”

²⁸ Tura ashí nuj yurumainiak pujuarmia nusha wariniak ta tusa nekaacharmiayi. ²⁹ “Kuítrinchá kuit súserta” tátsuash tu enentáimprarmiayi. Tura chikichcha “nampernum yurumátin atsumajnia nu sumakta” tátsuash, tu enentáimprarmiayi. Jútas kuítian wáinin asamtai tu enentáimprarmiayi. ³⁰ Jútas tantan yua kashi ajasmanum jíinkimiayi.

Yamaram akupkamu

³¹ Jútas jíinkimtai Jesus tímiayi “Wi Aents Ajasu asamtai winia kakarmar yamaikia paant átatui. Tura wi túramujai Yusa kakarmarisha ti paant átatui. ³² Wi Yusa kakarmarín paant awajeakui Wisha ni Uchirí asamtai winia kakarmarnasha Yuska wárik paant awajsattawai. ³³ Uchichiru, atumjai ti untsurí tsawant pujuschattajai yamaikia. Wi Israer-shuaran tímiaj nútiksanak atumin tájarme. Atumsha Winia éátkáttarme tura wi wéamunam winishtatume. ³⁴ Ju yamaram akupea-mun amaajai nuamtak mai anenai ajatarum tusan. Wi atumin aneajrumna núnisrumek atumsha nuamtak mai anenai ajatniuitume. ³⁵ Anenaiyakrumniñkia nujai ashí shuar “Kristu unuiniamuri áiniawai” túramartatui.

Pítiur Nin natsantratniun Jesus ujakmiania nu

(Mateu 26.31-35; Márkus 14.27-31; Rúkas 22.33-34)

³⁶ Semuñ Pítiur Jesusan aniasmiayi “Uunta, ¿tua wéam?”

Jesussha tímiayi “Wi wéajna nuj yamaikia winichmini-atrume. Tura ukunam winittiarume.”

³⁷ Nuyá Pítiur tímiayi “Uunta, ¿urukamtai yamaikia winich-miniaitiaj? Ámin yáintaajtsan jakataj tajai.”

³⁸ Jesussha tímiayi “¿Nekasmek táme? Ti nekas tájame, atash shiniatsain Winia menáintiú natsantrurtatme” tímiayi.

¹ “Kúntuts pujusairap. Yus enentáimtustarum, Winiasha enentáimtursatarum. ² Winia Aparuǐ átum pujustin ti ankantawai. Tura nuna iwiarataj tusan Aparuǐ wéajai, nekasaiti. Nekaschaitkiuin̄kia ¿itiurak ujakaajrum? ³ Tura iwiaaran amukan ataksha tátatjai. Tura tana yaruaktatjarme, wi pujamunam atumsha pujusúk tusan. ⁴ Wi wéaj nu nékarme tura jintiasha nékarme” tímiayi Jesus.

⁵ Tumas tímiayi “Uunta, Ame weam nu nékatsji. ¿Jintiasha itiurak nekaattaj?”

⁶ Jesussha tímiayi “Wi nekas jintiaitjai. Wíjiaínchu wekaana nuka winia Aparuǐ jeatniun penké tujintiaiwei. Tura Wisha tuke nekas tiniu asan nekas ana nuna shuáran nékamtikiajai. Wisha shuáran yamaram iwiaakman tuke amuukashtinian súwitjai. ⁷ Winia nékarkurmeka winia Aparsha nekaawaintrume. Yamaisha Nii wáinkia asarum nékarme” tímiayi.

⁸ Nuín̄kia Jiripisha tímiayi “Uunta, Apasha wáinkiaraka maak.”

⁹ Jesussha tímiayi “Jiripi, atumjai ti pujusu aisha ¿tuke nékartsumek? Winia wáitkia nuka Winia Aparnasha wáinkiaiti. ¿Itiurak, nuikia, “Apasha wáinkiaraka maak” tame? ¹⁰ Winia Aparjai tsanín̄kian pujakun tura winia Aparsha Wijiai pujakui tuke chikichkiitji. ¿Nu nékatsrumek? Wi tájarmena nu Winia chichampruchuiti. Yus Apa Winí pujak ni wakeramun takaawai. ¹¹ Nekaatarum. Wisha winia Aparjai tsanín̄kia pujakur nekas chikichkiitji. “Nu chicham itiurchataiti” enentáimkiurmeka wi túramu nuikia enentáimpratarum. Wi túramujai chikichik ájinia nu páantchakait. ¹² Wi tájarmena nu ti nekasaiti. Winia enentáimturna nu Wi túrajna nuna túrattawai. Tura winia Aparuǐ wéakuí nuna nan̄kaamas tujintiamun túrattawai. ¹³ Ashí Winia enentáimtursarum seatrumna nuna amastatjai. Nújain̄kia winia Apar shiir awajnastatui. ¹⁴ Winia enentáimtursarum seakrumnín̄kia ashí túrattajai” tímiayi.

Jesus Yusa Wakanín̄ akupkattawai

¹⁵ ‘Atumsha anentkurmeka winia chichamur umiktarum. ¹⁶ Tura wéakun winia Aparun chikichan akupturmakti tusan seattajai. Niisha atumjai tuke pujak atsantamprartatui. ¹⁷ Nusha Yusa Wakaníinti. Yus-shuarcha Nin nekaachmin áiniawai. Tuma asamtai ni enentáin wayachminiaiti. Antsu átumka atumi enentáin pujakui Nii nékarme. Niisha atumí enentáin tuke pujustatui. ¹⁸ Mitiaikia áitkiasnak ik-iukchattajrume. Atumíin atak tátatjai. ¹⁹ Ishichik tsawant nan̄kaasmatai chikich shuar irunna nu wáitkiachartatui. Tura Wi iwiaaku asamtai átumka nu iwiaakmajai pujustatrume. Tuma asarum wáitkiattarme. ²⁰ Tura nu tsawantaj

ju nekaattarme. Wisha winia Aparjai tsaninkia pujakur chikichkiitji. Núnisnak Wisha atumjai tsaninkian pujajai. Tura atumsha Wijiai tsaninkia pujarme. ²¹ Shuar Winia anentuka wi akupkamun nekáa umíawai. Nú shuarnaka winia Aparsha aneawai. Wisha nin aneajai tura nekarati tusan iniaktustatjai.” Jesus nuna tímiayi.

²² Chíkich Jútas, Iskariútichu, tímiayi “Uunta, ¿urukamtai ashí shuarnum iniaktutskesha aya in iniaktustatam?”

²³ Jesus tímiayi “Winia anentuka tájana nuna enentáimtai. Winia Aparsha nu shuaran aneattawai. Tura Wisha winia Aparnum nu shuarjai tsaninkia pujustatji. ²⁴ Antsu Winia anentchaka tájana nuna enentáimtsui. Átum ántarmena nú chichamka wíniachuiti, antsu Yus Apa Winia akuptukua Núnaiti’ tímiayi.

²⁵ ‘Atumjai tuke pujakun nuna tájarme. ²⁶ Yus Apa ni Shiir Wakanin atumin yáinmak atsanamprarat tusa akupturmaktatume. Wi seam túrattawai. Nu Wakancha ashí Wi ujakjarmena nuna atak enentáimtikramprar ashí unuitiamprartatui’ tímiayi.

²⁷ ‘Imiatkinchanum pujustarum. Imiatkinchanum pujajna núnisrumek pujustarum tusan amaajai. Jú nunkanmanka warastin wáinkiashtatume. Antsu itiurchatnum pujayatrunkesha Wijiai imiatkinchanum pujustatume. Ashamtsuk pujustarum. Itiurchat enentáimprairap. ²⁸ Nuik timiaj nu antukmarme. Aparui wena atak atumiin tátatjai. Winia Aparka Wijiai nankaamas úuntaiti. Tuma asantai ti nekas anentkurmeka “Aparui wéajai” takui ashí warasaarme. ²⁹ Nuka túmatsain ujaajrume. Túrunamtai nuyá Winia enentáimtursattarme” tímiayi.

³⁰ ‘Jú nunkanmayan akupin winiakui atumjai núkap chichaschattajai yamaikia. Wíniaka nupettukchamniaiti. ³¹ Tura Wikia winia Aparun aneajai tura Nii akupturkama nuna tuke túrajai. Ashí shuar nuna nekaawarti tusa ashí túrunatniuiti. Wajaktiarum. Juyá wetái’ tímiayi.

15

Numi arakma áintsanketjai

¹ ‘Winia iwiaakmarun amaakun numi arakma áintsanketjai. Wikia kampuinjai atumsha kanawentrume. Winia Aparsha arakan wáiniua núnisaiti. ² Winia kanawernasha nereatsna núnaka tsupik ájapeawai. Tura nereana núnaka púruawai nú nukap nerekat tusa. ³ Wi ujakjarmena nujai puruarmaitume. ⁴ Numí kanawesha kampuin áchitkiachkunka niniki nerechamniaiti. Núnisrumek atumsha Winí áchitkiachkurmeka nerechamniaitume. Wi

atumjai áchitkij núnisrumek atumsha Winí tuke áchitkia atarum' tímiayi.

⁵ 'Wikia kampuintjai atumsha kanawentrume. Kampuinkia kanawen áchitkia núnisnak achiakjarme. Tura kanawe ni kampuinin áchitkia núnisrum Winí áchitkia atarum. Túrakrumka núkap nerektatrume. Antsu Wíjiainchuka péñker túratin penké tujintiarume. ⁶ Winí áchitkiachuka ajapam kukartatui. Kanawesha kukarmatai shuar irumkar áesawartatui' tímiayi.

⁷ 'Tuke Winí áchitkiaitkiurmeka tura winia chichamprusha kajinmattsuk emetarmeka átum wakerarmena nu seakrumin amastatjai. ⁸ Átum núkap nereakrumniñkia ashí shuar "Nekas Jesusa unuiniamurinti" túramartatui tura winia Aparnasha shiir awajsartatui. ⁹ Winia Apar anenna nútiksanak Wisha atumin aneajrume. Winia aneamur tuke atarum. ¹⁰ Winia Aparu akupkamurin umiakun tuke ni aneamurintjai. Núnisrumek winia akupkamur umiakrumka tuke winia aneamur átatrume' tímiayi.

¹¹ 'Wi waraajna áintsarmek warastarum tusan nuna tájarme. Tura ti shiir warastatrume. ¹² Wi akupkamu júiti: "Wi aneajrumna nútiksarmek ashí anenaitiarum." ¹³ Shuar ni amikrin yáintaj tusa jakañka ti anenkartichukait. ¹⁴ Wi akupeamu takaakrumka atumsha winia amikruitrume. ¹⁵ Takarniuka ni uuntri takaana nuna nékatsui. Tuma asamtai "winia takarniuruitrume" tátsujrume. Antsu ashí winia Apar táman ujaku asan "winia amikruitrume" tájarme. ¹⁶ Aya atumí enentáimsamurijiañ Wí shuar ajaschamarme. Antsu akatramur ajastarum tusan atumniaka achikjarme Wi. Winia takatur takastiniaitrume. Túrarum péñker túratniuitrume nerektinia áintsarmek. Tura nu nere amuutsuk tuke átiniaiti. Tuma asamtai winia Apar searmena nuna amastatui. ¹⁷ Júnaka akupeajrume: Nuamtak mai anenai ajatarum' tímiayi.

Yus-shuarcha Jesusnasha Níniuncha nakitiainiawai

¹⁸ 'Ju nunkanmaya shuar Winia emka nakitrurar atumniasha nakitramarme. ¹⁹ Atumsha ju nunkanmaya shuaraitkiurminkia niiniua nútiksan anenmaintrume. Antsu Wí shuar ajastarum tusan ju nunkanmaya achikmajrume. Túramtai nekas ju nunkanmayanchuitrume yamaikia. Nu asamtai nu shuar nakitramainiawai. ²⁰ "Takarniuka ni uuntri nankaamaschaiti" tíchamkajrum. Shuar Winia yajauch awajtusaru ásar atumniasha yajauch awajtamsartatui. Chikichcha umirtukaru ásar atumniasha umirtamkartatui. ²¹ Winia Akuptukun nékachu ásar Winia enentáimturkurmin yajauch awajtamsartatui' tímiayi.

22 ‘Wi tana Yus-Chichaman nin ujakchamtainkia tunaanum sumamacharaayi. Antsu ujakma ásar “Nékachkun túraitjai” tíchamin áiniawai. 23 Winia nakitruinia nuka winia Aparnasha nakitiainiawai. 24 Aents penké túrachman túrachuitkiunkia tunaanum sumamacharainti. Antsu wi túramun wáinkiaru áiniayat Winiasha tura winia Aparnasha nakitiainiawai. 25 Yaunchu Yus akupkamunam áarmaiti: “Penké ántar nakitrurarmai.”

Nu chicham uminkiat tusa túrunaiti’ tímiayi.

26 ‘Tura atsan̄tamprattsá yáinmana nuna winia Aparuiya akuptuktatjarme. Niisha tuke nekas tiniu Wakaniiti. Niisha Yusaiya taa atumin nekantikramprattarme. 27 Atumsha yaunchu Wijiai pujusu asarum nekantikiattarme’ tímiayi.

16

1 ‘Átum kanartukairum tusan júnaka tájarme. 2 Israer-shuar iruntainiumia jiki akuptamkattarme. Nu arantcha mantamainiaksha “Yúsan shiir awajsattsan túrajai” tiártatui. 3 Nu shuar Winiasha tura winia Aparnasha nékach ásar túrutmawartatui. 4 Núnaka yamá tájame. Tura túrunamtai “núnisan̄ átiniaiti” timiaj nu nekaarum itiurchat enentáimprairap’ tímiayi.

Yusa Wakaní túrana nu

‘Atumjai tuke pujá asan núnaka yaunchu ujakchamajrume. 5 Antsu yamaikia wáketjai winia Akuptukmia nujai pujustaj tusan. Tuma áin̄ wéajna nu inintratsrume. 6 Antsu nuna takui ti kuntuts enentáimprarme. 7 Tura Wi wématai atumjainkia nuna nan̄kaamas penker átatui. Iis, Wi wéaknaka atumin yainmaktinia nuna akupkattajai tura wéachkuunkia táchattawai. Nuka ti nekasaiti. 8 Yusa Wakaní taa ashí jú nun̄kanmaya aentsun jū maintiun nekantikiattawai. Ni tunaari aan nekantikiattawai. Penker tunaajainchu wekasamniana nunasha nekantikiattawai. Tura Yus tunaanum súmantikiamniana nunasha nekantikiattawai. 9 Winia enentáimturainiachu tunáarintin áiniawai. 10 Winia Aparui wáetkui wáitkiashtatrume. Tuma asantai ashí shuar wi penker tunaajainchu wekaamun nekaawartatui. 11 Tura jū nun̄kanam akupniunka Yus tunaanum súmantikia asa shuarnasha súmantikiamniaiti. Nuna paant nekaawartatui’ tímiayi.

12 ‘Nu arantcha núkap tíntjiarme túrasha átumka nekaachaintrume. 13 Yusa Wakaní ashí nekas tiniu asa ashí nekasa nuna unuitiamprattarme. Ni enentáimmiabaj̄ tíchattawai antsu winia Aparui antukma nuna ujatmaktatui. Ukunam átatna nunasha ujatmaktatui. 14 Ashí Wínian ujatmak Winia shiir

awajtustatui. ¹⁵ Ashí winia Apar takakna nusha Wíniati. Nu asamtai “ashí Wínian ujatmaktatui” tajai’ tímiayi.

Kúntuts pujuiniayat ukunam warasartatui

¹⁶ ‘Ishichik pujusrum Winia wáitkiashtatume. Nuyá ataksha ishichik pujusrum ataksha wáitkiattarme. Wisha winia Aparuǐ wéajai” tímiayi.

¹⁷ Nuyá ni unuiniamurǐ nuamtak aniniaisarmiayi “ǂǂ chichamsha warimpait? “Ishichik pujusrum wáitkiashtatume tura ataksha ishichik pujusrum wáitkiattarme tura Aparuǐ wéajai” tátsuk. ¹⁸ “Ishichik pujusrum” tana nusha ǂwarimpait? Nii tana nu ántatsǐ” tiarmiayi.

¹⁹ Jesussha nin aniaistai táman nekáa tímiayi “Ishichik pujusrum wáitkiashtatume nuyá ataksha ishichik pujusrum wáitkiattarme” tímiajai. ǂNúchakait átum inintrustin wak-erarmena nu? ²⁰ Ti nekas tájarme: Átumka kúntuts pujusrum úttiatrume tura Yus-shuarcha warásártatui. Tuma aǐnkǐ átum kúntuts pujayatrume ukunam warastatume. ²¹ Iis, nuwasha jurertin tsawant jeamtai najaimiak wáitiatsuk. Tura uchin jurerka ti waraak wáitsamunka enentáimtsui. ²² Atumsha núnisrumek yamaik kúntuts pujarme. Tura atak íitjarum tusan winiakui ti shiir atumí enentáin warastatume. Nu warastinian jurutramkichminia áiniawai.’

²³ ‘Nu tsawantinkia penké ininsashtatume. Ti nekas tájarme Winia enentáimtursarum winia Apar searum nuna ashí amastatui. ²⁴ Yamaisha Winia enentáimtursarum winia Apar seachurme. Seakrumniǐkia amastatui ti shiir warasaruk tusa’ tímiayi.

Jesus jú nunkanmayan nupetkaiti

²⁵ ‘Métek-taku chichamjai nakumkan nuna tímiajai. Tura ukunmaǐka nujai chichatsuk winia Aparnan paant ujaktat-jarme. ²⁶⁻²⁷ Nu tsawantai átumka Winia enentáimtursarum winia Apar seattarme. Winia Aparsha atumin anea asamtai Wi Nin áujsatin atumashtatume. Winia anentu asarum tura winia Aparuǐya taman enentáimtakrumin Niisha anenmawai. ²⁸ Winia Aparuǐya jíinkin jú nunkanam táwitjai. Yamaikia jú nunkanmaya jíinkin ataksha Aparuǐ wáketjai” tímiayi.

²⁹ Nuyá ni unuiniamurǐ tiarmiayi “Yamaikia métek-taku chichamjainchu chichaame. ³⁰ Mash nékaitme. Shuar Ámin ininmatsain penker áimkiatin nékame. Nu nekaar Ame nekas Yúsnumiaitme tu enentáimtaji” tiarmiayi.

³¹ Tura Jesus tímiayi “ǂNekasash enentáimtarum? ³² Ti warik átumka ashamkarum niisháa tsakinmaktatume tura Winiak ikiurkittiarume. Antsu winia Apar pujakui Wiki pujatsjai.

33 Winia enentáimturkuram imiatkinchanum pujusarat tusan tájarme. Jú nunkanam ti wáitsattarme. Tura Wi jú nunkanmayan nupetka asamtai warastarum” tímiayi Jesus.

17

Jesus ni unuiniamurin Yúsan áujtawai

¹ Nuna ti Jesus nayaimpinmaanì íimias tímiayi “Aparu, yamáijeayi ame Uchiram shiir awajsatin. Núnisan ame Uchirmisha péñker awajtamsattawai. ² Ashí shuara Akupniuri najaitme. Nujainkia Winia surusumna nú shuaran yamaram iwiaakman tuke amuukashtinian súsaitjai. ³ Aparu, chíkich atsawai. Amek nekas Yúsaitme. Wisha Jesuskrístuitjai Ame akuptukmamna nu. Nu asamtai ashí shuar nuna enentáimtak yamaram iwiaakman tuke amuukashtinian takakui.’

⁴ ‘Ashí túratniun akuptukmamna nuna amukuitjai. Túran ju nunkanam shiir awajsaitjame. ⁵ Nuna túramtai, Aparu, ti yaunchu jú nunka atsaisha Ámijiai pujakui shiir awajtusmamna núnismek yamaisha shiir awajtusta.’

⁶ ‘Ashí jú nunkanmaya surusmamna nú shuaran Ámin neamtikiamjai. Áminiu áiniakui surusmame. Niisha ame chichammin umirtámkaruiti. ⁷ Ashí Wi takaajna nu Amek surusuitme. Niisha nuna nékainiawai. ⁸ Ame chichamem surusmam nuna ujakam niisha umirtámkaruiti. Ame akuptukakmin Amiiníya táwitjai. Nu nekasaiti tu enentáimtuiniawai.’

⁹ ‘Nin yainkiarta tusan seajme. Jú nunkanmaya shuaran Ámin enentáimturmainiatsna nuna seattsujai. Antsu Ame surusmam nuna, Áminiu ajasarmatai, yainkiarta tusan seajme. ¹⁰ Ashí Winia ainia nuka Áminiuaiti. Tura ashí Áminiu ainia nuka Winia áiniawai. Winia péñkerusha ni túramunam paant awajsaiti.’

¹¹ ‘Wikia yamaikia jú nunkanam pujuschattajai. Tura nu shuarka juí pujuartatui. Antsu Ámijiai pujustajtsan winiakui ashí surusumna nuka, Aparu, ti shiir asam ame kakarmarmijiai wáinkiaata. Wisha Ámijiai chikichik ájinia núnisan niisha ashí iruntrar chikichik ajasarti. ¹² Juí niijiai pujakun ame kakarmarmijiai ti péñker wáinkiamjai. Antsu Yus-Chichamnum aarma uminkiaati tusa aya chikichik menkakaiti. Niisha tuke emesnartinia núiti.’

¹³ ‘Yamaikia Amiini winiajai. Tura juí tuke pujakun juna tájame. Niisha Wi waraajna núnisar ti shiir warasarat tusan tajai. ¹⁴ Wi jú nunkanmayanchuitjai. Niisha núnisan jú nunkanmayanchu áiniawai. Tuma asamtai ame chichammin Wi susamtai jú nunkanmaya shuarka nin nakitiainiawai. ¹⁵ Jú nunkanmaya júiki tusan seatsjame. Antsu íwianch nin

nupetkain tusan seajme. ¹⁶ Wi juyanchuitiaj áintsan ni-isha juyanchu áiniawai. ¹⁷ Ame chichammin ti nekasa nuna ántuiniakui péñker awajsata. ¹⁸ Juyá shuarnum akuptukmam áintsan Wisha nin chíkich shuarnum akupeajai. ¹⁹ Aya Áminiunak takastaj tusan enentáimtimjai. Túra asamtai ni-isha aya Áminiunak takastinian enentáimpratin áiniawai' áujtak tímiayi.

²⁰ 'Aya níiniunkeka seatsjame antsu ashí ni chichamen an-tukar Winia enentáimtursartatna nusha ame yáinkiarata tusan seajme. ²¹ Ashí niisha chikichkiniak enentáimtusarti tusan seajme. Wisha Amesha, Aparu, chikichik ájinia núnisan niisha Iijjai iruntrar chikichik ajastai tusar seajme. Wíi shuar chikichik najanata tusan seajme. Nuyá ju nunkanmaya shuar akuptukuitmena nuna nekaawartatui. ²² Ame shiir awajtur-samna núnisnak Wisha nin shiir awajsaitjai. Iikia chikichik ájinia núnisan niisha chikichik ajasarti tusan túraitjai. ²³ Wi ni enentáin pujakui Amesha Winin pujakmin penké chikichik ajasarti. Túramtai ashí shuar juna nekaawartatui: Ame akuptukuitme, tura Winia anenmena áintsam nu shuarsha aneame. Wíi shuar chikichik ajasmajai ashí shuar nuna nekaawartatui.'

²⁴ 'Aparu, shuar surusmam nu, Wi pujustatjana nui pujusarti tusan seajme. Tura ti shiir awajtusmamna nuna íisarti tusan nuna seajme. Ju nunka najanchamunman tuke anentin asam ti shiir awajtusuitme. ²⁵ Aparu, ti péñker áminin ju nunkanmaya shuar nekarmainiatsui. Antsu Wi nékajme. Ju shuarsha ame akuptukman nékainiawai. ²⁶ Nú shuaran Ámin nekarmawarti tusan jintintiaitjai. Tura nu arantcha jintintiattajai. Nújainkia Wisha ni enentáin pujurkui Winia anenmena áintsan niisha anenkratin ajasartatui" áujtak tímiayi Jesus.

18

Suntar Jesusan achikiarmiania nu

(Mateu 26.47-56; Márkus 14.43-50; Rúkas 22.47-53)

¹ Jesussha nuna tinia amuk ni unuiniamurijjai Setrun entsá katiñ numi arakmanum wémiayi. ² Jútassha Nin surukta-jtsa pujumia nuka nu ajan nekaamiayi. Untsurí tsawant Jesus ni unuiniamurijjai nui iruntramtai Jútas Jesusan nui wáinkiatniun enentáimpramiayi. ³ Tura untsurí suntarjaisha Jesusan tariarmiayi. Pariséusha Israer-shuar Patri uuntrisha suntarnasha Yusa Jeen wáiniuncha Jesusan achikiarat tusa akupkarmiayi. Niisha machitniasha nankincha rámparancha jiniasha júkiar weriarmiayi. ⁴ Jesussha ashí átinia nuna neka asa jiintiuki "¿Ya eaarum?" tímiayi.

⁵ Niisha “Nasarétnumia Jesus” tiarmiayi.

Jesusha “Wiitjai” tímiayi.

Jútassha Jesusan surukua nu níijai pujuarmiayi. ⁶ Tura Jesus “Wiitjai” takui ti ashamkar úkumur waketaíniak ini-aararmiayi.

⁷ Ataksha Jesus “¿Ya eaarum?” tímiayi.

Niisha “Nasarétnumia Jesus” tiarmiayi.

⁸ Nuñkia Jesus tímiayi “Wiitjai, tájarme. Winia eatkurmeka Wíi shuar ainia júka wakеткиarti” tímiayi. ⁹ Jesus nuik aujuk “Winia Apar surusma nu menkakacharai” timia nu uminkiatu tusa Jesus “wakеткиarti” tímiayi. ¹⁰ Nuyá Semun Pítiur machitian jusa Marku kuishin untsumumaani tsupirkamiayi. Markusha Israer-patri uuntri takarniuriyayi. ¹¹ Túramtai Jesus Pítrun tímiayi “Machitrumka awainki ikuista. Winia Apar wáitsatniun surakuñkia ¿wáitsashtinkaitai?”

Israer-patri úuntriniam júkiarmiania nu

(Mateu 26.57-58; Márkus 14.53-54; Rúkas 22.54)

¹² Nuñkia apach suntarsha ni kapitiantrisha Yusa Jeen wainniusha Jesusan achikiar jinkiwarmiayi. ¹³ Nuyá Anasa jeen júkiarmiayi. Anassha Kaipiasa weariyayi. Tura Kaipias nu uwitin Israer-patri uuntriayi. ¹⁴ Kaipiasa nuik “¿Ashí Israer-shuar mesertin penkerkait. Antsu aya chikichik shuar jákatin penkerchakait?” timia núiti.

Pítiur Jesusan natsantramiania nu

(Mateu 26.69-70; Márkus 14.66-68; Rúkas 22.55-57)

¹⁵ Semun Pítiur chikich unuiniamujai Jesusa uku weri-armiayi. Israer-patri uuntri nú unuiniamunka nékauyayi. Tuma asamtai ni jeen jeawar, suntar Jesusjai aa tanishnum wáiniakui niisha wayamiayi. ¹⁶ Tura Pítiur aa wáitiniam wajaamiayi. Túramtai chikich unuiniamu jiinki wáitin wáinia nú nuwajai chichas Pítrun awayámiayi. Nuí nékanu asa yúpichuch awayámiayi. ¹⁷ Waiti wáinniusha Pítrun aniasmiayi “¿Amesha nuna unuiniamurinchukaitiam?”

Pítrusha “Atsá, núchaitjai” tímiayi. ¹⁸ Tsetsek asamtai suntarsha tura nuí takarniusha jinia ikiapárar ni nawen anaak pujuarmiayi. Pítrusha nuí pachiiniak anamuk pujumiayi.

Kaipias Jesusan aniasmiania nu

(Mateu 26.59-66; Márkus 14.55-64; Rúkas 22.66-71)

¹⁹ Israer-patri uuntri Jesusan aniasmiayi “Ame unuinia-murmesha ¿ya ainia. Tura warí nin jintintiaitiam?”

²⁰ Jesusha tímiayi “Ashí íimiainiañ tuke etserniuitjai. Israer-shuar iruntainmasha Yusa Uunt Jeencha Israer-shuar irunainia nuí arantutsuk tuke etserkaitjai. ²¹ ¿Urukamtai Winia inintiam? Winia chichamprun antukua nu

aniastarum. Wi timian nii ujatmakarti. Wi timiancha niisha nékainiatsuk.”

²² Jesus nuna takui Yusa Jeen wáiniua nu nui pujá Jesusan yapiniam awati tímiayi “¿Núnisan nekas úuntnum chichastinkait?”

²³ Jesussha tímiayi “¿Warinmampa yajauch aa? Turuttia. Tura tájana nu péñkeraitkiuin̄kia ¿urukamtai awattiniam?” ²⁴ Nuyá Anas Jesusan jinkiá Kaipias takaamunam akupkamiayi Kaipias Patri uuntrī asamtai.

Pítiur ataksha Jesusan natsantramiania nu

(Mateu 26.71-75; Márkus 14.69-72; Rúkas 22.58-62)

²⁵ Tuke Anasa jeen chichainiāi Pítiur jinia anamuk puján shuar aniak “¿Amesha Jesusa unuiniamur̄inchukaitiam?” tiarmiayi.

Pítrusha “Atsá, wíchaitjai” tímiayi.

²⁶ Chíkich takarin, Marku shuari, nui pujumiayi. Pítiur Marku kuish̄in tsupirkamia nuna shuarī asa tímiayi “¿Ajanam Jesusjai wekaamin wáinkiachmakajam?”

²⁷ Pítrusha ataksha “atsá” taīn atash shiniukmiayi.

Piratu Jesusan aniasmiania nu

(Mateu 27.1-2, 11-14; Márkus 15.1-5; Rúkas 23.1-5)

²⁸ Nuyá Kaipiasajā Jesusan júkiar tsawant tsawaamunam apach kapitiān Piratu takatai jeanam ejeniarmiayi. Israer-shuarsha ni uuntrī akupkamia nunisar wapik ajasaīj tusar nu jeanam wayacharmiayi. Wayawarka paskua nampernum yurumáchmin ármiai. ²⁹ Nu asamtai Piratu niijiāi chichastaj tusa j̄inki tímiayi “¿Jú áishman̄sha warí tunáa túrait?”

³⁰ Niisha “Tunaarinchaitkiuin̄kia am̄ini itiachaaji” tiarmiayi.

³¹ Tutai Piratu tímiayi “Atumek júkirum atumí akuptammar-ijiāi ni tunaarī nekaatarum.”

Israer-shuarsha tiarmiayi “Antsu iikia Israer-shuartikia tunáa shuarsha máachminiaitji.” ³² Yaunchu Jesus ni jákatniur̄in enentáimtus “Wi awajnaitniuitjai” tímiayi. Niisha krúsnum awajnain asamtai apach máataijiāi Nii timia nu uminkiamiayi.

³³ Piratusha atak jeá wayá Jesusan untsuk “¿Ámeka Israera Uunt Akupniur̄inkaitiam?” tímiayi.

³⁴ Jesussha tímiayi “¿Amekek nu inintram. Kame chíkich túramainiatsuash?”

³⁵ Piratusha tímiayi “¿Wi Israer-shuarkaitiaj? Amee shuarak Israer-patri uuntrījiāi winin itiarmai. ¿Warí tunáa túraitiam?”

³⁶ Nuin̄kia Jesus tímiayi “Wi jú nun̄kanam akupniuchuitjai. Juyaitkiuin̄kia Winia nemartuiniana nu máanaikiarāayi.

Túrawarmatai Israer-shuarnum surutkacharaayi. Antsu juyan akupniuchitjai.”

³⁷ Piratusha “¿Nuikia ame nekas uunt akupniukaitiam?” tímiayi.

Jesussha tímiayi “Ee, ame támena nu nekasaiti. Jú nunkanam akiinian ashí shuaran nekas ana nuna ujaktinian táwitjai. Ashí shuar nekas ana nuna umirniuka Wi táman ántawai.”

³⁸ Tura Piratu “¿Nekasa nusha warimpiait?” tímiayi.

*Piratu Jesusan mantamnatniun tímiania nu
(Mateu 27.15-31; Márkus 15.6-20; Rúkas 23.13-25)*

Piratusha nuna ti, atak Israer-shuarjai chichastajtsa jiinki tímiayi “Jú aishmanka tunaarin penké wáittsujai. ³⁹ Tura ashí uwitin paskua nampernum sepunmaya shuar ankant akupkatniuiti. Núnisrum tuke searme. Tuma asantai, ¿yamaikia Israera Uunt Akupniurin ankant akupkattajak?” tímiayi.

⁴⁰ Nuinkia ashí kakantar untsumainiak “Ju akupkaip; antsu Parapás akupkatá” tiarmiayi. Nu Parapássha kásauyayi.

19

¹ Nuyá Piratu suntaran akupkamiayi Jesusan asutiáwarat tusa. ² Suntarsha Jesusan wishikrar tawasap janke najanamun etsenkrumtikiarmiayi. Yamakai pushincha uunt akupniua áintsan áentsrarmiayi. ³ Nuyá “Israera Uuntria, kakaram ajasta” tiar yapiniam awatiarmiayi. ⁴ Nuyá Piratu atak jiinki tímiayi “Átum wáinkiarum nekaatarum tusan Jesusan júktiatjai. Wikia tunaarinkia penké wáittsujai.” ⁵ Tímiatai Jesussha janke etsenkruku tura pushin yamakairman entsaru júinkimiayi. Tura Piratu nui káunkarun tiarmiayi “Pai júiti, listarum.”

⁶ Israer-patri uuntrijsa suntarsha Jesusan ísar ataksha ataksha kakantar untsumainiak “Krúsum jakati” tiarmiayi.

Piratusha “Átum júkiirum máatarum. Ni tunaarin penké wáittsujai” tímiayi.

⁷ Tura Israer-shuar tiarmiayi “Nu shuar “Yusa Uchiríntjai” takui jákatniuiti. Iiniu akupeamu aarma nui núniskete” tiarmiayi. ⁸ Nuna antuk Piratusha nu nankaamas ashamkamiayi. ⁹ Ataksha init wayá Jesusan aniasmiayi “¿Tuyampaitiam?” Tura Jesussha penké áikchamiayi. ¹⁰ Nuyá Piratu tímiayi “¿Urukamtia winia airsum. Wi jeajna nu nékatsmek? Wak-eraknaka krúsum máatniuncha tura ankant akupkatniuncha jeajai.”

¹¹ Tutai Jesussha tímiayi “Yus nuna amaschaitkiuinikia penké tujinkiaintme. Nu asantai amiin surutka nu ámin nankaamas tunaarinniuiti.”

¹² Piratusha nú chichamtaik Jesusan ankant akupkattsa wakerimiayi. Antsu Israer-shuar untsumainiak tiarmiayi “Ju ankant iníakmekame úunt akupniu amikrinchuitme. Juka “úunt akupniuitjai” taku atumí uunt akupniurí nemasrinti” tu untsumkarmiayi.

¹³ Piratusha taman antuk akupin pujutainium pujus Jesusan untsumkarmiayi. Nuí kaya ukatkamu asamtai Israer-shuara chichamen Kapata anaikiarmiayi. ¹⁴ Paskua jisat jeatsain nantu tutupin ajatsain Piratu Israer-shuara tímiayi “Uunt akupniuram ístarum.”

¹⁵ Tura ashí “Jakati, jakati, krúsnum máatá” tu untsumkarmiayi.

Tura Piratu “¿Atumí uunt akupniurín krúsnum máattajak?” tímiayi.

Tura Israer-patri uuntri tiarmiayi “Atumí uunt kapitántrumek in akuptamji. Chíkichka atsawai.”

¹⁶ Tutai Piratu Jesusan krusnum mantamnati tusa tsankatkarmiayi. Tutai niisha Jesusan júkiar wearmiayi.

Jesusan krúsnum máawarmiania nu

(Mateu 27.32-34; Márkus 15.21-32; Rúkas 23.26-43)

¹⁷ Jesussha ni krusri yanaki Kúrkuta náinnium wémiayi. Kúrkuta naarisha Israer-shuara chichamen “muuka ukunch” tawai. ¹⁸ Nuí krúsnum ajintrurar awajainiarmiayi. Tura mai pae jimiara shuara chikichik chikichik awajainiarmiayi. Tura Jesus ajapén ámiayi. ¹⁹ Piratusha Jesusa krúsriin uunt áarman anujkamiayi. **NASARETNUMIA JESUS, ISRAERA UUNT AKUPNIURI**

Tu áarmauyayi. ²⁰ Israer chichamjaisha Kriaku chichamjaisha Rúmanmaya chichamjaisha áarmauyayi. Menaintiu chichamnum aarma asamtai tura Jesusarén pepru tíjiuch asamtai Israer-shuar ti unturí áujiarmiayi. ²¹ Nu asamtai Israer-patri uuntri Piratun jeariar “Israera Uunt Akupniurí” áaraip. Antsu “Israera Uunt Akupniuríntjai tawai” tu aarta” tiarmiayi.

²² Tura Piratu nincha áikiar “Wi áaraj nuke átatui” tímiayi.

²³ Suntarsha Jesusan krúsnum awajainiar ni entsarmarin kuátru akankar ankant ankant júkiarmiayi. Tura ni pushirín apatsuk najanamu asamtai jáaktinian nakitrarmiayi. Kame yakíya nunkaaní apaiyiachma takamtsukuyi. ²⁴ Tuma asamtai suntar tiarmiayi “Juka jáakchatai. Antsu nakurakrin yának ati nu jukiti.” Nújainkia yaunchu Yus-Chichamnum aarma nu uminkiamiayi:

“Winia entsarmarun akantrarmiayi tura nakurusar awakmakua nuna winia pushirun súarmiayi” áarmaiti.

²⁵ Krúsnumsha Jesusa nukurísha Kriúpasa nuarí Marisha tura Máktaranmaya Marisha wajaarmiayi. ²⁶ Jesus ni

nukurincha tura ni ti aneamu unuiniamurincha nui wajan wainiak ni nukurin timiayi “Nukuru, ju ame uchirmea áintsan ati.” ²⁷ Nuyá ni unuiniamurincha timiayi “Ju ame nukua áintsan ati.” Nu tsawantaik nu unuiniamuri ni jeen juki awayamiayi.

Jesusa jakamuri

(Mateu 27.45-56; Márkus 15.33-41; Rúkas 23.44-49)

²⁸ Nuyá ashí uminkiamtai Jesus nuna nekáa yaunchu Yus-Papinium aarma uminkiat tusa “kitiamajai” timiayi.

²⁹ Nujsha piniinum churuin ámiayi. Tura shuar nuna uruchjai ejampar sapapjai ijiu mukunaati tusa susamiayi.

³⁰ Jesussha churuinian najekaa “ashí túrunatniua nu mash uminkiai” timiayi. Nuna ti, muuken nená jakamiayi.

Suntar Jesusan paenam nankijiai ijumiania nu

³¹ Nu tsawantai, kashinkia paskua námpér uunt tsawantri asamtai tura ayampratin tsawant aa asamtai, Israer-shuar jaka ayashí nui paant ain tusa nakitrarmiyai. Nu asamtai Piratun seainiak “Krúsnum ajintrurma ainia nuna kan kajin suntar kupirkarti. Nuyá wari jákarmatai krúsnumia júkiarti” tiarmiyai. ³² Nuyá suntarsha weriar emka krúsnum amia nuna kan kajin kupirkarmiyai. Nuyá chikichnasha Jesusjai atsankiar ajintrurma nuna kan kajincha kupirkarmiyai. ³³ Tura Jesusan weantuk yaunchu jákaiti tusa kan kajin kupirtsuk ³⁴ suntar aya paenam ijumiayi. Ijumtaisha nu chichamtaik numpa yumijiai puarmiyai. ³⁵ Wi, Juan, nuna wainkia asan nekas tajai. Atumsha Yus enentáimtustarum tusan tí nekas tajai. Wi áarajna nu nekasaiti nékajai. ³⁶ Yaunchu Yus-Chichamnum aarma uminkiat tusa túrunaiti: “Ni ukunchin kupirkachartatui” tu áarmaiti.

³⁷ Tura chikichcha:

“Ijuarmiania nuna wainkiartatui” tu áarmaiti.

Jesus iwiarsamu amiania nu

(Mateu 27.57-61; Márkus 15.42-47; Rúkas 23.50-56)

³⁸ Nuyá Arimatéanmaya Jusé Jesusa ayashin jukitiaj tusa Piratun seamiayi. Nu Jusé Jesusan enentáimtaitiat Israer-shuara úuntrin ashamak paant nemarsachmiayi. Niisha seamtai Piratu “Jukitia” timiayi. Tutai Jusé Jesusa ayashin jukimiayi. ³⁹ Nikiuté musha Jesusjai chichastaj tusa kashi tarimia nu jimiará kun kuin pachimpramun ti nukap sumak itiamiayi. Mira kun kuinniasha aruí kun kuinniasha sumakmiayi. ⁴⁰ Nuyá Jusé Nikiuté mujai Jesusa ayashin júkiar kun kuinian kuérar jaanch esarmajai penuararmiyai. Israer-shuar tuke nunisar ikiúu ármiayi. ⁴¹ Jesus krúsnum maamua nui aja tíjiuch ámiayi. Nu ajanmasha waa náinnium paka

taurma ámiayi. Nusha yama taurma asamtai jaka nuí ik-
iuschamuyayi. ⁴² Nu waasha tíjiuch asamtai tura Israer-
shuara ayampratin tsawantri jeatemamtai Jesusa ayashín
nuí iwiarsarmiyai.

20

Jesus nantakmiania nu

(Mateu 28.1-10; Márkus 16.1-8; Rúkas 24.1-12)

¹ Tumintincha káshik kirit aín Máktaranmaya Marí Jesus
iwiarsamunam ístajtsa wémiayi. Jesusan iwiarsar kaya
uuntjai waan atutkarmiyai. Tura Marí nuí jeá nu kaya
uraimiun wáinkiamiyai. ² Nuna wáiniak Semun Pítiur
pujamunam tsékenki wémiayi. Chíkich unuiniamuri Jesus
ti anemia nusha nuísha pujumiyai. Tura Marí tímiayi
“Iwiarsamunmaya ii Úuntrín júkiarai. Tura ¿tuíntsuk
ikiusara?” ³ Pítrusha chíkich unuiniamurijiai jíinkiar
iwiarsamunam iyuwarmiyai. ⁴ Mai métek tsékenkiar
Pítiur jeatsain chíkich unuiniamuri iwiarsamunam
emka jeamiayi. ⁵ Niisha wayatsuk tsuntsumá iis
penuarmarinkia nuí tepan wáinkiamiyai. ⁶ Nuyá Semun
Pítiur ukunam jeá iwiarsamunam wayá penuarmari nuí
tepan wáinkiamiyai. ⁷ Chíkich jaanchcha Jesusa muuken
penuarma nusha nanerma niisháa tepan wáinkiamiyai. ⁸ Nuyá
chíkich unuiniamuri emka tamia nusha iwiarsamunam
wayamiayi. Niisha túruna wáiniak “Jesus nekas nantakni”
tu enentáimpramiayi. ⁹ Nuna wáintsuk Yus-Chichamnum
“Jesus jakamunmaya nantaktiniaiti” áarman áujsariat
nekaacharmiyai. ¹⁰ Nuyá mai ni jeen wakеткиarmiyai.

Máktaranmaya Maríncha Jesus wantintiukmiania nu

(Márkus 16.9-11)

¹¹ Tura Marikia iwiarsamunam juak úutu pujumiyai. Ni-
isha úutiatan tsuntsumá iwiarsamunam ímsamiayi. ¹² Tura
Jesusa ayashí nuik tepesmanum nayaimpinmaya suntar puju
entsaru jímiar pujan wáinkiamiyai. Chikichik múuknumaani
tura chíkichka nawenmaani pujumiyai. ¹³ Nayaimpinmaya
suntarsha “¿Urukantai úutam?” tiarmiyai.

Marísha tímiayi “Winia Úuntrun jurutkiarai tura ¿tuíntsuk
ikiusara?” ¹⁴ Nuna tí ayanmar Jesusan wáiniak Nin nekaach-
miayi.

¹⁵ Jesus aniak “¿Urukantai úutam. Ya eeam?” tímiayi.

Marisha ajan wáinniua nuiti tusa tímiayi “Uunta, ame ni
ayashí jukimkia, tui ikiusmam ujatkata wi jurumkitiaj”
tímiayi.

¹⁶ Nuyá Jesus “Mariya” tímiayi.

Tutai niisha ayanmar “Rapuni” tímiayi. Nusha Israer-chichamnum “Uuntá” tawai.

¹⁷ Jesussha tímiayi “Emetruawaip. Winia Aparuǐ wáatsjai. Antsu weme Wíi shuar titiá “Winia Aparuǐ nayaimpiniam wéajai. Niisha atumí Aparínti. Winia Yúsruiti tura atumí Yúsrinti” tawai titiá” tímiayi.

¹⁸ Nuyá Máktaranmaya Marisha Jesusa unuiniamurǐn wáiniak “Wí Úuntan wáinkiajai, tímiayi. Niisha juna mash túrutui” tu ujakarmiayi.

Jesus ni unuiniamurǐn wantintiu kmiania nu

(Mateu 28.16-20; Márkus 16.14-18; Rúkas 24.36-49)

¹⁹ Nu tsawantai, tumǐntin, ni unuiniamurǐ Israer-shuara úuntrin ashamainiak kashi iruntrar waiti epeni pujuarmiayi. Túrasa Jesus áyatik wayamiayi. Tura ajapén wajas “shiir pujustarum” tímiayi. ²⁰ Nuna ti, nuyá ni uwejen ajintrua-muncha ni paen ijiunmuncha iniakmasmiayi. Ni unuiniamurǐsha Úuntrin wáinkiar shiir warasarmiayi. ²¹ Ataksha Jesus “Shiir pujustarum, tímiayi. Winia Apar akatar akuptukma núnisnak Wisha akatran akupeajrume” tímiayi. ²² Nuyá ni matsatmanumaanǐ umpuǐ tímiayi “Yusa Shiir Wakanǐ atumí enentáin wayati. ²³ Shuara tunaarǐnkia átum “asakárti” tákurminkia tsankurnartatui. Tura nu shuar “sumamati” tákurminkia tuke sumama pujawai” tímiayi Jesus.

Tumas Jesus nantakniun wáinkiamiania nu

²⁴ Tura chikichik unuiniamu, Jímiampramu Tumas, Jesus tamia nuj pujuchmiayi. ²⁵ Tura ukunam chikich unuiniamurǐ ujainiak “Ii Uuntri wáinkiaji” tiarmiayi.

Tura Tumas tímiayi “Ajintruamurǐ wáinkian uwejrún awáintiuatniuitjai. Tura paenumsha awáintiuatniuitjai. Penké jaka asamtai aya nujai iniantkimiun enentáimtustatjai” tímiayi.

²⁶ Chíkich tumǐntin ataksha Jesusa unuiniamurǐ iruntrararmiayi. Nuǐnkia Tumassha niijiai pujuarmiayi. Tura waiti epenmianuman Jesus wayá ajapén wajas “Shiir pujustarum” tímiayi. ²⁷ Nuyá Tumasán tímiayi “Winia uwejur íisam ame uwejem awáintiuata. Núnismek winia paeruǐ uwejem awáintiuam íistá. Tura arantutsuk nekas enentáimtursata.”

²⁸ Nuyá Tumas “Winia Úuntruá, nekas winia Yúsruitme” tímiayi.

²⁹ Jesussha tímiayi “Winia wáitkiam nuǐn enentáimtursame. Antsu Winia wáittsuk enentáimturaru nekas shiir áiniawai” tímiayi.

Shuar Yusa Uchirín enentáimtusarti tusa ju papí áarmaiti

³⁰ Aentsti tujintiamuncha Jesus túramu ti untsurí ju papinium áarchamu áiniawai. Tura ni unuiniamurí mash wáinkiarmai. ³¹ Antsu Jesuska Kristu asa Yusa Uchirínti tu enentáimtustarum tusan júnaka áarmajai. Tura enentáimtakmin Jesus ni iwiaakmarín yamarma nuna amastatui.

21

Entsá yantamnum Jesus siati (7) unuiniamurín wantintiukmiania nu

¹ Tipirias antumianka káanmatkaríin Jesus ni unuiniamurín wantintiukmiayi. Júnisan ámiayi. ² Semun Pítrusha Jímiampramu Tumassha Kananmaya Natanaérsha Sepetéu uchirísha tura chíkich jímíar unuiniamurísha métek iruntrar pujuarmiayi. ³ Semun Pítrusha “Namakan nekajai naníattsan wéajai” tímiayi.

Chíkich mash “Iisha winittiaji” tiarmiayi.

Wéar uunt kanunam enkemprar nu kashi achitsuk tsawararmiayi. ⁴ Káshik aín Jesus entsá káanmatkaríin wantinkiamiayi tura ni unuiniamurísha Jesusan nekaacharmiayi. ⁵ Jesussha tímiayi “Uchiru, ¿namak achikiurmek?”

Niisha “Atsá” tiarmiayi.

⁶ Tutai Jesus tímiayi “Neka untsuurnumaaní ajunkatarum. Nui achiktatrumé.”

Nii timia núnisan túrawar namakan ti achikiar nekan júsatniun tujinkiararmiayi. ⁷ Nújainkia Jesusa unuiniamurí Jesus ti aneemia nu Pítrun tímiayi “Ti Úuntrínti.” Takui Pítrusha áimiaku asa ni pushirín entsar entsá inianmiayi yukuak jeataj tusa. ⁸ Chíkich unuiniamurísha jeachat pujuiniachuk nekan japiki kanujai káanmatkanam jeawarmiayi. ⁹ Káanmatkanam jeawar ji kajir ámanum namakan jiámun wáinkiararmiayi. Tantan tancha wáinkiararmiayi. ¹⁰ Jesussha “Átum achikiurmena nuyá jiátin itiatarum” tímiayi. ¹¹ Tutai Semun Pítíur kanunam we nekan nekartiuk káanmatak japiki itiamiayi. Itiar namak nasha sianíu senkuenta nuyá tres (153) nekapmararmiayi. Ti untsurí áyat nekasha jáankachmiayi. ¹² Nuyá Jesussha “Yurumáitíarum” tímiayi. Ni unuiniamurísha “aya ii Untrí áminiaiti” tusar inintrustinian natsantiarmiayi. ¹³ Nuyá Jesus wajaki tantan jukí súsarmiayi. Núnisan namaknasha súsarmiayi.

¹⁴ Jesus jakamunmaya nantaki jujai menaintiu ni unuiniamurín wantintiukarmiayi.

Jesus Semun Pítrujai chichasmiania nu

¹⁵ Nuyá yurumáwar Jesus Semun Pítrun aniasmiayi “Junasa uchirí Semunka, ¿ju shuar naníkaamas anentmek?”

Pítrusha tímiayi “Ee, Unta, wi wakerajam nu Ame nékame.”

Jesussha “Nuĩnkia winia murikiur ayuratniua áintsam Winia enentáimturainia nu yaintá” tímiayi. ¹⁶ Ataksha aniasmiayi “Junasa uchirí Semunka, ¿Winia anentmek?”

Pítrusha “Ee, Unta, wi wakerajam nu Ame nékame” tímiayi.

Jesussha “Winia murikiur wáinkiatá” tímiayi. ¹⁷ Nú ataksha aniasmiayi “Junasa uchirí Semunka, ¿winia wakerutamek?”

Pítrusha menaintiu iníam kúntuts enentáimiar tímiayi “Unta, ashí nékame. Wi wakerajam nu Ame nékame.”

Jesussha tímiayi “Winia murikiur ayurata. ¹⁸ Maa, nekas tájame. Natsa asamka iwiarmampram ame wakeramunam wéuyame. Tura úuntach ajasmeka ame kunturam ayaparakin chíkich aentstamprattawai tura ame wétin nakitiam nui juramkiartatui.” ¹⁹ Jesus nújainkia Pítiur máatniun ujakmiayi. Tura núnisan jakamtai shuar Yúsán shiir awajsatniun ujakmiayi. Nuyá Pítrun “Nemartusta” tímiayi.

Juan túrunatniun Pitiur Jesusan aniasmiania nu

²⁰ Pítrusha ayanmar chíkich unuiniamurín Jesus ti anea nuna némarun wáinkiamiayi. Kame nu unuiniamuka nuik Jesus jáatsain yurumáiniakui “Unta, ¿ya surutmaktata?” timia núiti. ²¹ Nincha Pítiur wáiniak Jesusan aniasmiayi “Unta, ¿jusha warí urukatniuit?”

²² Jesussha ayak “Wi wakeraknaka iwiaaku pujain tátatjai tíminiaitjai. Nuna tákuisha ¿warí itiurtama? Ámeka nemartusta” tímiayi. ²³ Nújainkia “Nu unuiniamurí jákashtatui’ tusa Yus-shuarnum áujmatarmiayi. Túrasha Jesus “jákashtatui’ tíchamiayi antsu áyatik “Wi wakeraknaka iwiaaku pujain tátatjai takuisha ¿warí itiurtama?” tímiayi. ²⁴ Wikia nú unuiniamuríntjai. Ju papincha aaru asan “mash nekasaiti’ tajai. Ashí shuarsha núnisan tuíniawai.

²⁵ Nu arantcha juí áarchamusha ti awai. Kame ashí áamka ti untsurí papí asa ashí nunkanam ikiuschamnia ainti. Nuke atí.

Jesusa Akatramurì Yusa Wakaníjiaì

TÚRAMU

Yusa Wakanín nákasarmiania nu

¹ Amikiur Tiúpiru:

Nuik akupkamiaj nú papinium ashí Jesus túramia nuna áatramiajme. Tura unuitiampramiaj nunasha áatramiajme. Yámankamtaiknumia, ² nayaimpiniam wétsuk, ashí Nii túramia nuna tímiajme. Jesuska, nayaimpiniam wakettsuk Yusa Wakaní kakarmarijiaì túratniua nuna ni akatramurìn jintintiawarmiaiyi. ³ Tura jaka nantaki, Jesus tímiajaik wantintiukmiayi ni akatramurìn. Tura kuarenta (40) tsawant nin wantintiukarmiaiyi. Nuna tura nekas iwiaakjai tusa iniakmasmiayi, nekaawarat tusa. Tura Yusa akupeamurì urukukit nuna mash ujakmiayi.

⁴ Jesuska ni akatramurijiaì tuke pujus, nin chicharuk “Jerusarénnumiá wéerap, tímiayi. Winia Apar “amastatjai” tímia nuna, paant ujakchamkajrum. Nu túrunat tusarum Jerusarénnunum nákastarum, tímiayi. ⁵ Tuke enentáimsatarum. Juan entsajai atumí ayashìn imiatmimiarme. Túrasha wárik Yusa Wakanísha atumniasha tarutmar, atumí enentáin enkemprutmattarme. Nusha enentái imiantin áintsankete” tímiayi.

Jesus nayaimpiniam wakamiania nu

⁶ Tura Jesusjai irunar matsamas anintriarmiaiyi “Uunta, Israer-shuar ájiniá nu, ankant ajasakrin iiniuk Akupin atak naamkatin yamaí jeayash” tiarmiaiyi. ⁷ Jesus áimiuk tímiayi “Winia Apar túrattana nu warí tsawantinik túrunatí nu nekaatniusha atumniachuiti. Apar Niñki neka asa ni kakarmarijiaì túrattawai. ⁸ Tura atumsha Yusa Wakaní kakarmarìn sunastatrume. Nii taa enkemprutmamtaì kakaram ajasrum, Wíi túramu etserkattarme. Emka jui Jerusarénpérunam etserkattarme. Nuyá ashí Jutía núnkanam, tura arant Samaria nunkanmasha, tura nú arant ashí núnkanam werum, Wíi túramu etserkattarme” tímiayi Jesus.

⁹ Nuyá chichas amir, ashí ni akatramurì ii wajainiaì, Jesus nayaimpinmaani junakmiayi. Wéa-wéakui yurankim mash Nin amuámiayi. Tuma asamtaì ni akatramurì Nin wáinkiacharmiaiyi. ¹⁰ Tura Jesus waakkui ni akatramurìsha yakí ii wajainiaì, jimiará áishman puju entsaru nui wantintiukarmiaiyi. Tura ayamach wajattsarmiaiyi. ¹¹ Nu áishmansha Jesusa akatramurìn tiarmiaiyi “Kariréanmaya

áishmaṅka, ʒurukamtai nayaimpinmaani imiá ímprim? Ju Jesusak atumíya nayaimpiniam wea wáinkiarumna núnisan ataksha winittiwai” tiarmiayi.

Matíasan anaikiarmiania nu

¹² Tuasua amikmatai Jesusa akatramuri Uriwiu náinniumia akaikiar Jerusarénum waketkiarmiayi. Uriwiu naincha Jerusarénumsha tíjiuchiiti, chikichík kirumitrua núnisan. ¹³ Tura Jerusarénum jeawarmiayi. Nui jeawar, jeá wayawar yakí wákararmiayi. Nui Pitrusha, Jakupusha, Juansha, Antressha, Jiripisha, Tumassha, Parturumísha, Mateusha, tura Arpeu uchirí Jakupusha, nuyá ásump Semunsha, Jakupu yachi Jútassha, tímian wayawarmiayi. ¹⁴ Jusha mash tuke iruniarmiayi Jesusa yachijiai. Tura Jesusa nukurí Marijiai, nuyá chíkich nuwajaisha tuke iruniarmiayi, Yus áujсатаi tusar. ¹⁵ Nui siántu painti (120) aents iruntrarmia nui Pítiur chichastaj tusa wajakmiayi.

¹⁶ Pítiur juna tímiayi “Yatsurtírmesha, umarutírmesha antuktarum. Yuska yaunchu ni Papiriin Jutasnan áamtikramiayi. Jútas akiintsain Tawitkia, Yusa Wakaní jintintiam Jutasnan áarmiayi. Jesusan achik surukarmia nú shuaran nekapruamia núiti. Kame Tawitia áarmari Yus-Chicham asa tímianak uminkiatniuyi. ¹⁷ Nú Jutaska ii írutramuitiat, ii takaamuriin páchitkiaitiat, ¹⁸ tunáa tura nujai kuítian achik nunkan sumakmiayi. Tura piniakum iniaaṅ tantane páttimiayi. ¹⁹ Tuma asamtai ashí Jerusarénum pujuarmia nu, nuna nekaawar nú nunkan “Numpa Nunka” anaikiarmiayi. ²⁰ Kame Sarmu papinium Tawitkia juna áarchamkia:

“Ni jeesha itiarak atí.

Nu jeanmaṅka penké pujuschartí.” Tura

“Ni takatri chíkich atankiti.”

Tu aarmaiti’ tímiayi.

²¹ ‘Tuma asamtai yamaikia chíkich anaikiatniuitji. Tura nánkamas achikchatniuitji. Antsu ii nemartamkau atí. Uunt Jesus iijiai pujumia nui tuke Nin nemarsamia nu atí. ²² Juan Jesusan imiaimiania nú tsawantnumia jukí, Jesus nayaimpiniam wémiania nú tsawantan tímianu ejé tuke Niiijiai wekaimia nu atí. Nu shuar enentámtusar, chikichik achiktai. Iisha iruntrar Jesusa nantakmari etserkamí tusar túramí” tímiayi Pítiur.

²³ Tura nuyá jimiará shuaran anaikiarmiayi. Matíasan anaikiarmiayi. Tura chikichnasha Jusen, ni chíkich naari Parsapas, tura apach náarinṅia Justu, nunasha anaikiarmiayi.

²⁴⁻²⁵ Tura nuyá Yus-shuar Yúsan áujainiak juna tiarmiayi “Ti Uuntri, Amesha ashí shuara enentái nékame. Jui awai jimiará áishmaṅ. Jútas tunáa túrak jákatniunam wéak akatramu

takatan ikiukmiayi. Yamaikia Jútasa takatrí achikiat tusam, ¿tuá achikium, Uunta? Paant iniakmasta.” Tu aujsarmiai.

²⁶ Tura Israer-shuara túrutairí núnisan, wats yaki nupet-makat tusar túrawarmiai. Tura Matías nupetmakmiayi. Túrunamtai Matíasnak pachikiarmiai.

2

Yusa Wakaní taramiania nu

¹ Pintikiustís náartin jísat jeamtai, chikichík jeanman nuin Yus-shuar tuakarmiai. ² Tumai aya aneachma nayainpin-maya nasea áintsan téter ajaki winian antukarmiai. Ashí mash jeá pujuarmia nuka antukarmiai. ³ Tura nuí pujuiniái ji wajaí kea áaniun wáinkiarmai. Túruna ankant ankant puunak tarurarmiai. ⁴ Tuma asamtai Yusa Wakaní ashí ni enentáin pimiutkarmiai. Túram chichasarat tusa Yusa Wakaní ni nekatairí súsarmiai. Tuma asamtai nujai niisha chíkich chichaman chichasarmiai.

⁵ Nuí Jerusarénum Yus táman umirin Israer-aents ármiai. Ashí nunkanmaya Jerusarénum taar matsamarmiai. ⁶ Tura túrunamia nuna antukar káunkarmiai. Tura ashí shuar ni chichamejai chichaamun antukarmiai. Tuma ásar, warinkit, tu enentáimsarmiai. ⁷ Nekaachar ashankarmiai. “Warinkit, tunaim ajarmai. Ju aents chíkich chíkich chichaman chichainia nu, ashí Kariréanmayanchukait, tiarmiai. ⁸ Tura iisha ankant ankant ii chichamenka ántatsjik. Ausha urukainiakua, nunak chichainiawa, tiarmiai. ⁹ Jui ashí nunkanmaya aents pujuiniatsjik. Partianmaya, Eramnumiasha, Misiuputámianmayasha, Puntanmayasha, tura Asia nunkanmayasha, ¹⁰ Prijianmayasha, Pampirianmayasha, Ejiptunmaya tura Áprikianmaya Serinia nú nankaamasnumiasha pujuiniatsjik, tiarmiai. Nuyasha ii shuarsha Ruma péprunmaya yaunchu taar jui matsatainiawai. Chikichcha take Israer-shuar áiniawai. Tura chikichcha Israer-shuar ajastaj tusa Israer túrutairín mash túruiniawai. ¹¹ Kritianmayasha Arapiianmaya pujuiniaji. Tura ashí mash ii chichamejaisha Yusa pénger túramurí ántaji” tiarmiai.

¹² Ashí aents nuna nékachu ásar ashankarmiai. Tura nuámtak aniniaisarmiai “¿Warinminiait ju?” ¹³ Tura chikichcha wishikiarmiai. “Nampeku áiniatsuash” tiarmiai.

Pítiur ujakmia nu

¹⁴ Nuinkia Pítiur, chíkich áuntse Jesusa akatramurijjai wajaki, kakantar chichasmiayi. Chichaak tímiayi “Jutíanmaya shuartiram, Jerusarénumiatirmesha antuktarum. Wi títiatjana nu antukrum pénger enentáimpratarum. ¹⁵ Ju

áishman, nampekarai, tárumna nu, nampekcharai. Warí, nantu imiá ishichik takuni. ¿Aisha itiurak? ¹⁶ Antsu Yúsnan etserin, ni naari Juér, yaunchu áarmia nu, yamáí túrunayi, tímiayi.

¹⁷ Juna áarmiayi: “Yus tawai “Jú nunka amuukatin jeatemamtai, winia Wakantrun ashí áentsnum akupkattajai, yumi yaraanua áintsan. Atumí uchiri, atumí nawantrisha Yusa chichamen áujmatartatui. Tura nátsaka íimiarartatui. Tura uuntka mesekramiartatui. ¹⁸ Tura áishmansha nuwasha winia takartin ainia núnaka winia Wakantrun akuptukartatjai. Túram niisha Wíi túramun áujmatartatui. ¹⁹ Yaki nayaimpiniam, aents túrachminian iniakmastatjai. Tura nunkanmasha winia kakarmarun iniakmastaj tusan numpancha, jiniasha, mukuintiuncha yuranmia áintsan akupkattajai. ²⁰ Tura tsawái nantusha kajinkiattawai. Tura nantusha mushatmar numpa núniktatui. Uunt tsawant achikmiajna nu jeatsain, túrunattawai. Nú tsawantcha imiá nekas uunt átatui. ²¹ Nuiñkia ashí shuar nekas winia kakarmarun seana nuka uwemprartatui” tímiayi Yus.”

Núnis Juér áarmiayi’ tímiayi Pítiur.

²² Tuke chichaak: ‘Israernumiá shuartiram, wi títiatjana nu antuktarum. Nasarétnumiá Jesusnan tajai. Nú Jesusan Yus shiir enentáimtawai. Yuska, átum ti enentáimprarum ni kakarmarin paant nekaatarum tusa, nú Jesusan ti ikiakármiai. Tura Jesusjai aentsti túrachminian Yuska túramiai, átum íimnianum. Nuka ti paant nékarme, tímiayi. ²³ Tura Jesus surunkamia nuna Yuska yaunchu, túruntsain, paant nekamiayi. Túrasha Yus enentáimmia nujai métek túrawarmiai. Tura atumek emetarum Jesus jukimiarme. Nú arant, krúsnum máatarum, tunáa shuar tímiarme. ²⁴ Túramunak Yus Jesusan jákatniun nupetmamtik iniantkimiayi, tuke jákachmin asamtai. ²⁵ Iimiata, ii uuntri Tawit Jesusnan kantamprua juna áarmiayi:

Úuntan tuke pujurtan wáinmiajai. Winia pujurtakui awajkamu áhattajai.

²⁶ Tuma asamtai winia enentáirjaisha Nin shiir enentáimtusmiajai. Tura wenurjaisha shiir chichaman chichamiajai. Jáaknasha shiir enentáimsan jakattajai, aneantiniapitjia tusan.

²⁷ Winia wakaniur, Yusru, jákatniunam ikiurtuschattame. Wi ame Uchirmetjai, Tunaarincha. Túmaitkui anentu asam ayashur káurtin tsankatruckhattame.

28 Tura iwiaaku átin jintia jintintrutamame. Tura tuke pujur-takum waramtikrustatme.

Tu áarmiayi Tawit' tímiayi.

29 Pítiur tuke chichaak: 'Páantchakait. Ii uuntri Tawit yaunchu jákaiti. Tura iwiarsamuiti. Ni iwiarsamuri iini pujatsuk. 30 Túrasha Tawitkia Yúsna etserniuyayi. Tuma asa Yus tímia nuna nekaamiayi. Yus Tawitian chicharuk tímiayi "Ame akupniuitme. Nekas tájame, ukunam ame iniañnamurminian Kristu akiiniattawai. Niisha Akupin anainiaktatui, amea áintsan." Nuna Yus táman Tawit nekaamiayi. 31 Neka asa, túruntsaïn Tawit, wainkia nútiksan, Kristu nantaktintriñ áarmiayi. Kristu túrunatniuriñ chicharuk tímiayi "ni wakaníncha jákatniunam ikiukchatniuyi. Ayashíncha káurtinian tsankatkashtiniuyi." 32 Au Krístun tímia nu Jesusaiti. Nu Jesusnak Yus iniantkimiai. Nuka iisha neka asar étsereaji. 33 Yuska, Jesus nankaamantuiti tusa ni untsuuriñ apujsaiti. Tura ni Wakanín Jesusan súsaiti, Nii yaunchu tímia nútiksan. Tuma asantai jusha átum antukurmena nuna, tura ísurmena nunasha Yus suramsaiti. 34 Tawitkia ayashtiuk nayaimpiniam wákachmiayi. Tura nú Tawitiak juna áarmiayi:

"Uunt Yus winia Úntrun tímiayi "akupin pujutainium, winia untsuuriñ pujustá.

35 Ame nemasrumin nupetkattajai. Nu túruntsaïn jui pujustá' tímiayi."

Nuní áarmaiti Jesusnan, tímiayi. 36 Tura ii, Israer áentsti, Jesus krúsnum maaitji, tímiayi. Jú Jesus máamjinia nuna Yuska Uunt Akupin anaikiamiayi. Túrasha Jesussha in uwentikkiartin Krístuiti. Ashí áentstíram nu péñker nekaatarum" tímiayi Pítiur.

37 Nuna antukar wake mesekarmiayi. Tura Pitruncha chíkich akatramuncha aniasarmiayi "Yatsuru, ¿nuñkia itiurkatjik?" tiarmiayi. 38 Tutai Pítrusha chichaak "Atumí tunaari ikiuktij tusarum Yus nekas enentáimtustarum. Tura ashí shuartiram Jesukrístu naari pachisrum imiantiarum. Nuñkia atumí tunaariñ Yus tsankurtamprattarme. Túrunawakrumin Yuska ni Wakanín suramsattarme, tímiayi. 39 Yus tímia nuka atumin túramprume. Atumí uchiríncha tura ashí arant matsatainia nunasha tawai. Kame ii Yusri áentsun untsuktaj tusa wakerana nuna tawai" tímiayi.

40 Nú chichamjai tura nuyasha Pítiur tuke jintintiuk tímiayi "Yajauch shuara asutiátniuri átatna nuyá uwempratarum" tímiayi. 41 Tuma asantai nuna antukarmia nuka imianiarmiayi. Nú tsawantai menaintiú mir (3000) aents Yusshuar ajasarmiayi. 42 Ashí nu shuar Jesusa akatramuri jintintiaromia nuna tímiatrusan antukarmiayi. Tura irunar

shiir enentáimtunaisar yurumin ármiai. Túrawar, Kristu enentáimtustin namperin najanin ármiai. Túrawar Yúsán áujiarmiayi.

Yus-shuar pampararmiania nu

⁴³ Tura Yуска aentsti túrachminian Jesusa akatramurijjai túramiai ni kakarmarin iniakmastaj tusa. Tuma asantai ashí aents nuna wáinkiar ashamkarmiayi. ⁴⁴ Yúsán umirkaruka ashí métekrak pujuarmiayi. Tura ashí niiniu armia nuna sunaisarmiayi. ⁴⁵ Ni nunken surukar, ni takakmarincha surukar, atsumainia nuna súarmiayi. ⁴⁶ Tuke tsawantak Yusa Uunt Jeen káuniarmiayi. Tura ni jeencha iruntrar warainiak Kristu enentáimtustin námper najanin ármiai. Tura nankaamantu enentáimtumatsuk, yurumkan ajamnainiarmiayi. ⁴⁷ Túrawar, Yуска ti úuntaiti, tu wearmiayi. Tura ashí aents nin shiir enentáimtiarmiayi. Tura Uunt Yus tuke tsawant shuwaran uwemtikiar Yus-shuar írunmanum íkiaunki wémiayi.

3

Wekaicha wekasamiania nu

¹ Chíkich tsawantai, nantu nunkaach ajasmatai, Pítiur Juanjai, Yusa Uunt Jeen Yus áujsatai tusar wearmiayi, Israer-shuar tuke turin armia nútiksaran. ² Tura áishman, ni akiini-amurinia wekaicha amia nu, nuí aa wáitiniam tuke tsawant pujumiayi. Nu áishmanasha ni shuari entsakí júkiar nú wáitiniam apujin ármiai, nuí shuar wayan kuítian seat tusar. Nú wáitisha, Shiir Waiti, tutaiyayi. ³ Tura nú shutuapsha Pitrun Juanjai wayan wáinkiamiayi. Wáiniak kuítian seamiai. ⁴ Tura Pítiur Juanjai apajas ísarmiayi. Tura nú áishmanasha chicharuk “Íirsata” tímiayi. ⁵ Aishmansha, surustatuapi, tu enentáimias, íimsamiayi. ⁶ Nuyá Pítiur chichaak “Kuítrusha atsawai, tímiayi. Kurisha atsawai. Antsu kuítjai nankaamas takakjana nuna amastajai. Wats, Nasarétnumia Jesukristu kakarmarijiai wajakim wekasata” tímiayi.

⁷ Tinia iniais, Pítiur ni untsuuriní achik awajkimiai. Túram ni nawesha, wanusesha kakaram ajasmiayi. ⁸ Tura niisha wajaki nantent ajakmiayi. Nuyasha wekasamiayi. Tura Pítrujasha Juánjaisha Yusa Uunt Jeen wayawarmiayi. Nuik shutuapka wayá nantent nantent ajak Yusa náarin shiir pachimiayi. ⁹ Ashí aents pujuarmia nu, nin wekaan wáinkiarmai. Tura ni chichamen anturkarmiayi. ¹⁰ Tura chichainiak “Nuik Yusa Uunt Jeen wáitirin, Shiir Waiti tutainium, nu áishman tuke pujuuya núchakait” tiarmiayi. Tura ni túrunamurin nekaawar, ti ashamkar nusháa enentáimsarmiayi.

Pítiur ujakmiania nu

¹¹ Shutuapka pénker ajasu asa Pítrujai Juánjaisha penké tsurachmiayi. Tura aents nuí pujuarmia nu, warínkit tusar, jeáshkirí tsékenki wearmiayi. Nuka Sarumúnna tiniu ármiai. ¹² Aents káunkarun Pítiur wáiniak, chicharuk “Israer-shuartiram, ¿urukamtaí winiasha imiá írum? tiarmiayi. ¿Iisha pénker asarikí tsuarmají? ¿Ii kakarmarjijaiínkiki ewekam-samají? ¹³ Atsá. Antsu Yuska ni Uchirín Jesusan ashí nankaamantu awajsaiti. Ii uuntri Apraamsha, Isaksha tura Jakupsha enentáimtin armia nú Yusan tajai. Átumka Jesus nakitrarum kapitíán Piratuí surukmarme. Tura Piratu akupkataj tau atumsha suritkiamarme. ¹⁴ Jesus pénker nákak enentáimniuyana nu “akupnakchati” tímiarme. Antsu shuáran main akupnakat tusarum wakerimiarme. ¹⁵ Túrarum iwiaaku átinian Amaana nu maamarme. Tuma ain Yuska Nin jakamunmayá iniantkimiayi. Nuka iisha neka asar étseereaji. ¹⁶ Tura ju aishman juí wajaana ju tura nékarmena ju, Yusa Uchirí naari enentáimta asa kakaram ajasuiti. Jesus enentáimtusu asa nekas pénker ajasuiti. Nusha wáinnii asarum nékarme’ tímiayi.

¹⁷ ‘Wats, yatsurtiram, wi nékajai. Atumsha atumí úuntrijiai Jesusan túramarmena nu nékatsuk túramarme. ¹⁸ Tura nu túramurmijiai Yus yaunchu tímia nu tímianak umikiurme. Ni Krísturí wáitsatniuya nuna Yuska ashí ni etserniurín áamtikramiai. ¹⁹⁻²⁰ Wats, yamaikia tunaaruminiá kanaktiarum. Túrarum Yúsnumaani ayantártarum, tunaarun asakárat tusarum. Túrunawakrumniñkia, atumin uwemtikramprarat tusa Yus yaunchu anaikiamia nuna akupturmaktatrume. Nusha Jesukristuiti. Tura Nijiai enentáimin ayampratin átatui. ²¹ Tura yamaikia Jesukrístu nayaimpiniam pujustini-aiti, ashí iwiarnatsain. Yuska ukunam ataksha nunkan shiir awajsattawai. Nuna ni etserniurín tsáapin enentái takaku armia nuna yaunchu áamtikramiai. ²² Tuma asa Muisais ii aparín tímiayi:

“Atumi Uunt Yusrí ukunam etserniun akupturmaktatrume, winia akuptukmia núnisan. Nuámtaktirminiá achik akupturmaktatrume. Tura nii títiatna nu umirkatarum” tímiayi. ²³ Nánkamas aents nu etserniun chichamen umíachkunka emesnartatui. Tura Israer-shuarnum páchitkia áchattawai.

Núnisan áarmiayi Muisaishsha’ tímiayi.

²⁴ Pítiur tuke chichaak ‘Imiata, Yúsna etserin Samuer ju tsawantin túratniurí etserkamiayi. Nuyá ashí Yúsna etserniusha tuke nuna etseriarmiayi. ²⁵ Etseriarmia nuka atumin túramprume. Tuma asa átum pénker pujustinian Yuska

ii uuntri Apraáman ju chichaman susamiayi. “Nekas tájame, ame shuarum akiiniattana nujai ashí áentsnasha shiir awa-
jsattajai’ tímiayi. Tura ii úuntriñ tímia núnaka incha túramji,
tímiayi. ²⁶ Iimiata, Yus ni Uchirín iniantkimia nui, atu-
min emka akupturmakmiarme. Atumsha, atumí tunaariya
kanaktiarum tusa, tura atumin shiir awajtamsatniun wak-
erak túramiayi.” Nunak tímiayi Pítur.

4

Pitruncha Juánnasha kajerkarmiania nu

¹⁻² Pítrusha Juanjai Yusa chichamen áentsun jintintiainiak
pujuarmiayi. Jesus nantakin asamtai aencha nantaktin
áiniawai, tiarmiayi. Tura chichaak pujuiniaí Israer-patri
táarmiayi. Tura Yusa Uunt Jeen wainniu úuntriñsha Satuséu
aentcha táarmiayi. Taar Pitruncha Juánnasha kajerkarmiayi,
niisha Jesusa nantakmiarí chichaman jintintinia asamtai.
³ Yamaikia kíawai, kashin iismí tusar achik sepunam enkea
iniaisarmiayi. ⁴ Tura Pitrun nuik anturkarmia nú aents
untsurí Yus-shuar ajasarmiayi. Nuik Yus-shuaraim tura ya-
maiyaím iruram ti untsurí ajasarmiayi. Aya áishmankak,
senku mir (5000) aents áarmiayi.

⁵ Kashin tsawarmatai Israer-shuara akupniurí, ni
úuntriñsha, tura ni jintinniurísha Jerusarénum iruntrarmi-
ayi. ⁶ Nuisha Anassha, Israer-patri uuntri anaikiamu amia
nu, tura Kaipiassha, Juansha, Arejantrusha, tura Israer-
patri kapitíantri shuarísha tímian iruntrarmiayi. ⁷ Iruntrar
Pitruncha Juánnasha utitiarum tusar akupkarmiayi. Tura
itiarmatai, ajapén awajsarmiayi. Tura aniasarmiayi “Kame
yana kakarmaríjiai, yana chichamejai túrarum?” tiarmiayi.
⁸ Tutai nuyá Pítur, ni enentáin Yusa Wakaní pimiutkamu asa
tímiayi “Akupniutiram, tura úuntirmesha antuktarum. ⁹ Ju
áishman nuik shutuap amia nu péñker ajasmari anintrarme.
Kame itiurak péñker ajasuit tátsurmek. ¹⁰ Urukamtia úuktataj.
Anintrakrumin iisha paant títiatji, Israernumia shuar ashí
nekaawarat tusar. Ju áishman Jesukrístu kakarmaríjiai péñker
ajasuiti. Nasarénumia Jesukrístun, átum máamurmena nuna,
tura Yus jakamunmaya iniantkimiania nuna tajai, tímiayi.
¹¹ Nú Jesuska kayaa áintsankete. Atumsha jeamniutiram,
nú kaya yajauchiiti, tímiarme Jesusna. Túrashashuara túramaitiatan
Niisha jeanam emka apujsamua núnisan ajasuiti, tímiayi.
¹² Tura chíkichjai uwempratin penké atsawai. Ju nunkanam
ii chikicha naari pachisar uwempratin atsaji. Jesuskete ii
uwemtikrampratniun Yus suramsamiaj nu” tímiayi Pítur.

¹³ Pítrusha Juansha nánkamas shuara áintsan áarmiayi. Núkap
unuimiarcharu áarmiayi. Tura unuimiarchaitiat, arantutsuk

etseriarmiayi. Aentsu uuntri núna nekaawar “Nékachuitiat, itiura sapijmiatskesha chichainia” tiarmiayi. Tura, jusha Jesusa nemarin ármia núti tiar nekaawarmiayi. ¹⁴ Nuyasha áishman pénker ajasmia nu níjiaí nui wajamiayi. Tuma asamtai, nísha aí wajakui, Israer-shuara úuntriñkia, pénker ajaschaiti titiai tukamá tujinkiarmaiayi. ¹⁵ Tuma ásar, iik nu-amtak áujmatsatai tusar, Pítrusha Juansha shutuapsha aa awe-martai, tiarmiayi. ¹⁶ Tura áujmatainiak tiarmiayi “Ju Pítrusha ju Juansha itiurkatjik. Ju uunt túrunamun Jerusaréñnum matsatainia nu ashí nékainiatsuk. Wáitaiti titin tujintiaji, tiarmiayi. ¹⁷ Tura, ashí aents nekaawarain tusar yamaik jiaktai. “Ju Jesusa naari pachisrum penké jintintiawarairap,” titiai” tiarmiayi.

¹⁸ Tura árusan Pitruncha Juánnasha shutuapnasha ataksha untsukarmiayi. Tura chicharkarmiayi. “Jesusa naari penké áujmatsairap. Tura Jesusa túramuri penké jintintiairap” tiarmiayi. ¹⁹ Tutai Pítiur Juanjai áimkiarmiayi “Enentáimpratarum. ¿Yus warinia wakera? ¿Iikia Yus umirtsuk atumí chichamen umirkatniukaitiaji? tiarmiayi. ²⁰ Nekaatarum. Iisha íisjinia nu, tura antukjinia nusha ii etsertsuk pujustin tujintiaji.” Tu áimkiarmiayi.

²¹⁻²² Shutuáp pénker ajasmia nu kuarenta (40) uwi nankaamas takakuyayi. Ni pénker ajasmarin aents nekaawar, “juka aentsti túrachminiaitji” tusar Yusa naarin uunt awajsarmiayi. Tuma asamtai aentsu uuntri Pitruncha, Juánnasha asutiátai tukamá aentsun ashamainiak áyatik chicharkar iniaisarmiayi.

Yus-shuar Yusa kakarmarin seawarmiania nu

²³ Pítiur Juanjai ankant ajaras ni írutramuriñ wakеткиarmiayi. Tura jeawar Israer-patri uuntri tura aentsu úuntriñsha nin tiarmia nuna mash etserkarmiayi. ²⁴ Nu ujakam antukar métekrak Yúsan áujuk tiarmiayi “Winia Uunt Yusru, Amesha nayaimpisha nun_kasha najanaitme. Nayaantsasha tura jui írunna nusha najanamiamie, tiarmiayi. ²⁵ Tura Tawit ámin umirtamin amia nu ju áamtikramiamie:

“¿Urukamtai ashí nun_kanmaya aents charaatum ajainia?
¿Tura Israer-shuarsha urukamtai ántar chichaman enentáimiainia?

²⁶ Uunt kapitíán ármia nuka chichaman jurusarmiayi Uunt Yúsan.

Tura pepru úuntriñsha iruntrar Uunt Yúsan kakerkarmiayi. Ni anaikiamuriñ Krístun nútiksaiñ kakerkarmiayi.”

27 Tu áarmaiti, Uunta, tura nekasaiti. Erutis apachi kapi-tiántri Punsu Piratujai jú péprunam iruntrarmiyai. Niisha ya-jaya shuarjai tura Israernumia shuaraim nuim iruntrarmiyai. Ame Uchirmin Jesusan tunaarinchan kajerkarmiyai. Jesuska Ame anaikiamiamé, winia takatrun túrat tusam. 28 Tura ame enentáimjai iwiaramamna nu uminkiatniuiti. Tura apachcha Jesusan kajerainia ásar, Ame iwiaramamna tímianak umikiarmiyai. 29 Uunta, iisia kajertamainiaj nu. Jes, Áminiu asakrin áujmatramtsujik. Túmaitkuisha ame chichamem ii ashamtsuk etserkatin ame kakarmaram amasta. 30 Tura ame kakarmarmijjai jaasha tsuártin amasta. Ame Uchiram Jesus tunaarincha nujai ii aentsti túrachmin túratniusha amasta. Aents Yusa kakarmarín nekaawarat tusam túrata” tiarmiyai.

31 Tura Yúsán tú áujas umikmatai nuin irunar pujuiniain úurkamiyai. Túrunamtai ashí shuara enentáin Yusa Wakaní pimiutkarmiyai. Túmaitkiui ashamtsuk Yusa chichamen etserkarmiyai.

Wíniakete, tícharmiania nu

32 Yus-shuar ajasarmia nu, ti untsuritiat, ashí chikichík enentainiak enentáimainiak, ni takaku armia nuna, aya wíniakete tútsuk, júsha ashí iiniu ainiawai, tiarmiyai.

33 Tura Jesusa akatramurisha, Yus ti yayamu ásar, Yusa kakarmarijjai Uunt Jesusa nantakmiarín tuke etseras pujuarmiyai. 34 Tura ashí Yus-shuarka nunkan takakusha jean takaku armia nusha, núnaka surukar kuítian itiariarmiyai. 35 Tura itiaar Jesusa akatramurín súarmiyai. Akatramusha susam, niisha atsumainia nuna súarmiyai. Tuma asamtai shuar atsumaka penké atsuarmiyai. 36 Chikichík shuar, ni naari Jusé, nunkan takakuyayi. Jesusa akatramurisha Jusén chikich náarín apujtusarmiyai, Pirnapín. Nu náarisha, shiir enentáimtikkiartin tawai. Tura Pirnapísha Riwí áentsuyayi. Tura ni akiiniamuri núnkenka Chípriiyayi. 37 Niisha ni nunken surukmiyai. Tura nu kuítian itía Jesusa akatramurín súarmiyai.

5

Ananíasa tunaari

1 Tura chikich áishman, ni naari Ananías, ni nuwe Sapirjai ni nunken surukarmiyai. 2 Niisha nunkan suruk kuítian emeenak akanak jukí Jesusa akatramurín werí takamtsukea nútikias susamiyai. Ni nuwēsha, Sapir, nuna túran nekaamiyai. 3 Túramtai Pítiur chichaak “Ananíasa, çurukamtai uunt iwianch enentáimin enkemturmatai, Yusa Wakanín anankataj tusam nunka surukam kuit achikiumna

nu akankam ikiurmasam? tímiayi. ⁴ Entá, nuñkia nuñka áminiuchukait. Surukumna nu kuitcha áminiuchukait. Nusha, ¿urukataj tusamea tu enentaímpam? Amesha aya áentsnum wáitruachume. Antsu Yusnumsha wáitruame” tímiayi Pítur. ⁵ Tutai Ananías nuna antuk nú chichamaik jakamiayi. Tura ashí shuar nuna antuk nekaawar ti ashamkarmiai. ⁶ Nú turunamtai áishmañ taria Ananías jakan penuararmiai. Túrawar iwiarsatai tusar júkiarmiai.

⁷ Tura Ananíasa nuwe arur, menaintiú ura nankaamasaj támiayi. Túrasha ni áishri jakanka nekaachmiayi. ⁸ Támatai Pítur nuwan tímiayi “Turuttia. Átum nuñka surukurmena nui, ¿kuit itiarumna núnikik surukuram?” tímiayi. Tutai nuwa tímiayi “Ee, núnik surukji.” ⁹ Tutai Pítur tímiayi “¿Urukamtai atumsha Uunt Yusa Wakaní nekapkamsatai tusarum imiá enentáimprarum? Pai, iisiá. Ame áishrumin iwiarsatai tusar júkaria nu wininiawai. Tura yamaikia amincha juramkiar-tatui” tímiayi. ¹⁰ Tutai nu chichamaik niisha imia Pitru wajamunam jaka iniaantmiayi. Aishmañ wayaj tukamá jaka tepan wáinkarmiai. Túramtai júkiar ni áishrinin ayamach iwiarsarmiai. ¹¹ Tura ashí Yus-shuar armia nu tura ashí aencha nuna antukarmia nu ti ashamkarmiai.

Yusa kakarmaríjiai túrawarmiania nu

¹²⁻¹⁴ Tura ashí Yus-shuar Yusa Uunt Jeen shikirin irunin ármiai. Nu shikirisha, Sarumúnna, tu anaikiamuiti. Tura chikichmamtinkia nuim iruntratniun ashamiarmiai. Túmainiayatan, ti péñker áiniawai, tu wearmiayi. Tura Yus-shuar Yusa kakarmarin iniakmasarmiai. Túra asamtai imiá untsurí aents Yus-shuar ajasarmiai. ¹⁵ Tura chikich aents ni shuari jainia nuna jintiá amamtikiarmiai. Peakjai júkiar, tampunmasha enkeawar júkiar jintiá ayamach áepsarmiai. Pítur nankaamak ni wakanínsha enkemprutmawainti tusar nu shuar túrawarmiai. ¹⁶ Núnisan arantia shuarsha ti untsurí ni shuari jáinian tura iwianchrukuncha nui Jerusarénum itiarmai. Tura ashí nui táaruka tsuámararmiai.

¹⁷ Israer-patri uuntri, tura Satuséu aencha niijiai pujuarmia nu suiir iiniak ¹⁸ Jesusa akatramurin achikar enkeawarmiai. ¹⁹ Túrasha kashi Uunt Yusa suntari nayaimp-inmaya tara sepú wáitirin uraimiai. Tura Jesusa akatramurin aa júkiarmiai. ²⁰ Tura tímiayi “Wetarum. Tura Yusa Uunt Jeen wajasrum Yusjai tuke iwiaaku átinia nu et-serkatarum” tímiayi.

²¹ Nuna antukar kashin tsawar káshik Yusa Uunt Jeen wayawar jintintiawarmiai.

Nu túmainiai Israer-patri uuntri, tura niijiai pujuarmia nusha iruntrarmiai. Tura Israer-shuara uuntri, naamka

armia nuna iruntrami tusa untukarmiayi. Ashí iruntrar akatar akupkarmiayi, Jesusa akatramurí sepunmaya itatarum tusar.

²² Tura suntarsha sepunam jeariar Jesusa akatramurín wáinkiacharmiai. Atsawai tukam táarmiayi. ²³ Taar chichainiak “Sepú waiti asakamua tímianisan aa wáinkiaji, tiarmiayi. Tura suntar wáitin iimpru wajainia wáinkiaji. Tura waiti urair wayaji tukamar atsá wáinkiaji” tiarmiayi.

²⁴ Israer-patri uuntri, tura Yusa Uunt Jēen wainniu úuntrisha, nu chichaman antukar, “tsej ausha ģurutiaġ nunasha iniaisarar?” tiarmiayi. ²⁵ Nu chichamaik áishman taa tímiayi “Aishman átum sepunam enkeamarmena nu, Yusa Uunt Jēen wajasar áentsun jintintiuk pujuiniawai” tímiayi.

²⁶ Túrunamtai Yusa Uunt Jēen wainniu uuntri ni suntarijġai wear achik itiarmai. Túrasha penké aents kayajai tukurmarajġ tusar, yajauch awajtsuk itiarmai. ²⁷ Tura achik itiaar Israer-shuar naamka pujamunam naka awajsarmiayi. ²⁸ Tura Israer-patri uuntri tímiayi “Iisha atumin chicháa chicharu awajsar, Jesusa naari pachisrum etserkairap tusar akupkachmakajrum. Túrasha, ġantukurmek? Atsá. Mash Jerusarénnum átum etserkamu pampankai. Jes, átum, Jesusan máawarai, in táturmek. Nusha in makuutai tusarum tárume” tiarmiayi.

²⁹ Nuyá tutai Pítiur chíkich Jesusa akatramurijġai chichainiak “Iikia aentsjainkia iniankasar Yus emka umirkatniuitji, tiarmiayi. ³⁰ Jesus atumek krúsnum máamurmena nuna ii iwiaaku Yusri Nin iniantkimiai. ³¹ Yus ni kakarmarijġai Nin nankaamantu awajsamiayi. Tura nekas Akupniuiti tusa ni untuurinġi apujsamiayi. Tura áentsun Uwemtikniuiti. Israer-shuar enentái yapajġawar tunaarinġa uwemprarat tusa Yus túraiti. ³² Nu tuma asantai iisha nu nekaar étsereaji. Tura Yusa Wakanísha nuna étsereawai. Túrasha aya Yusa umirkarua nunak ni Wakanġn súsaruiti” tímiayi Pítiur.

³³ Tutai nuna antukar ti kajerkarmiayi. Túrawar, maatai tusar wakeriarmiayi. ³⁴ Tura nuġ Israer-shuara uuntri pujumiayi, ni naari Kamarír. Niisha Pariséunam páchitkiauyayi. Tura akupeamun jintinniuriyayi. Túmakui ashí aents nin shiir enentáimtin ármiai. Tura niisha wajakí tímiayi “Ju áishman aa ishichik wajasarti” tímiayi. ³⁵ Nuyásha irunar matsamarmia nuna chicharuk “Israer shuartiram, ju áishman tú túratai tu enentáimsarumna nu aneartarum. ³⁶ Enentáimsatarum. Nuik áishman Tiútas wantinkiaġmakia. Niisha kapitániitjai takui, kuaru siántu (400) shuar nemarkarmiayi. Tura ukunam nin maawarmatai, ni némarkamurisha pisararmiayi. Túrunawar nuní amuukamiayi.

37 Ukunmasha, iruntrar nekapmartin tsawantincha Kariréanmaya Jútas wantinkiachmaka. Tura nincha nútiksān ti untsurī nemarkarmiayi. Túman máawarmiayi. Nu túrunamtai nútiksān ni némarkamurīsha pisararmiayi. 38 Jes, tuma asamtai nu áishmañ aq wajainia nu iniaisatarum. Auka pachisairap. Au tumainia nu aya áentsnaketkuīkia amuukattawai. 39 Tura antsu Yúsnaítkuīkia atumsha amuktai tukamarum tujinkiattarme. Aneartarum. Iniaiyachkurmeka nu tumá pujusrum Yusjají máanikchattarmeash” tímiayi Kamarír.

40 Tú tutai tímianak umikiarmiayi. Túrasha Jesusa akatramurīn untsukar asutiáwarmiayi. Tura chicharuk “Jesusa naarī pachisrum penké ishichkisha etserkairap” tiarmiayi. Tú tiar akupkarmiayi. 41 Jesusa akatramurīsha Israer-shuara uuntri pujamunmaya jíinkiarmiayi. Tura wáitsamniaitrum tusa Yuska Jesusa naarī pachia asakrin ii natsantin wáitsatniun tsānkatramkaitji tusar ti shiir enentáimsar wearmiayi. 42 Tura Jesukristunun áujmatsatniun penké iniaisacharmiayi. Antsu tuke tsawant Yusa Uunt Jeencha tura chíkich jeanmasha páchitsuk etseriarmiayi.

6

Yus-shuaran yainian siati anaikiarmiania nu

1 Nú tsawantin Yusan umirkaru ti kawenkar áirmiayi. Tura tuke tsawant yurumak súsatin ámiayi. Túmakui Yusshuar Kriaku chichaman chicharmia nu, Israer-shuaran kajoriarmiayi. “Tuke tsawantin yurumak súarmena nuí atumí waje ti nukap súarme. Tura íniuka ishichik súarme” tiarmiayi. 2 Túruinia Jesusa tuse akatramurī ashí Yusshuaran irurar tiarmiayi “Íisha Yus-Chicham etserkatin iniaisar yurumak súsachminiaitji. 3 Tuma asamtai yatsurtiram, atumíiniā siati áishmañ eáktárum yurumkan súsarat tusarum. Péñker wekainia nu, tura neka shuar, Yusa Wakaní pimiutkamu ainia nu achiktarum. 4 Iikia antsu Yus áujkir unuiniakratkir Yusa chichame etserkir wétatji” tiarmiayi. 5 Akatramu tiarmia nuna ashí aents enentáimsar pujuarmiayi. Túmainiak Estepañkan anaikiarmiayi. Estepañsha Yúsan tuke enentáimtiniuyayi. Tura Yusa Wakanísha pimiutkamuyayi. Chíkich áishmañkan anaikiarmiayi, niisha jíripi, tura nuyá Purukuru, Nikianúrsha, nuyá Temuñ, Parmenassha, Nikiurássha. Nikiurássha Antiukía nunkanmayaitiat Israer-nancha ashí umirniuyayi.

6 Tura nu siati áishmañkan Jesusa akatramurīn itiariarmiayi. Táarmatai, akatramusha, Yus áujtusar, anaikiaji tusar múuknumsha ni uwejen awantsarmiayi. 7 Túrasha Yusa chichamenka tuke pampankí wémiayi. Nuí Jerusaréñnumsha

Yus-shuar ti kawen̄karmiayi. Tura imia Israer-patrisha untsur̄i Yus-Chichaman umiriarmiayi.

Estepaṇkan Israer-shuara uuntrīin júkiarmiania nu

⁸ Estepaṇsha Yusa waitnenkartutair̄i pimiutkamuyayi. Tura Yusa kakarmar̄isha pimiutkamuyayi. Tuma asa aentsti túrachminian shuar írunmanum túramiayi. Nu shuar Yusa kakarmar̄in nekaawarat tusa túramiayi. ⁹ Israer-shuar iruntai jēa, n̄i naarī Aṇkantin, ámiayi. Nuyá áishmaṇsha tura Serini nuṇkanmaȳa áishmaṇsha, tura ch̄ikich nuṇka Arijiantr̄ianmaȳasha, Serisianmaȳasha, Ásianmaȳasha, tímian Estepaṇjaī áujmatsatai tusar káutkarmiayi. ¹⁰ Estepaṇ Yusa Wakan̄i nekatair̄ijjaī tímianak chicháa asamtai, nu áishmaṇ Estepaṇjaī in̄kiunaikiar nupetkataj tukamá tujinkiar̄miayi. ¹¹ Tuma asamtai suiir enentáim̄tuiniak ch̄ikich áentsun Estepaṇkan tsanumprurarat tusar ēakarmiayi. Estepaṇ Muisais-nasha Yúsasha yajauch áujmatui, titiarum tusar akikiarmiayi. ¹² Pen̄ké áentsun, tura uunt ainia nunasha, jintintin ármia nujaīsha chichaman júsar yajauch enentáim̄tikrarmiayi. Tura Estepaṇkan jintiá akirtuawar achikiarmiayi. Túrawar Israer-shuar naamka matsamarmia nūi júkiarmiayi. ¹³ Tura wait chichamtinian itiar̄miayi. Niisha taar chicharainiak “Yusa Uunt Jēen ti pen̄ker ana nu, tura Yusa akupkamur̄incha ju Estepaṇ tuke yajauch chicharui, tiarmiayi. ¹⁴ Nú arantcha ju Estepaṇ tímia nu antukji, tiarmiayi. Estepaṇ chichaak “Nasarétnumia Jesuska Yusa Uunt Jēen sáaktiatui, tura nuyá Muisais in̄ ikiurtamkimiaj nunasha yapajiáttawai” tímiai. Nusha Estepaṇ tímia nu antukji” tiarmiayi. Tura nunasha pen̄ké ántar tsanumprurarmiayi.

¹⁵ Nuyasha ashí Israer-shuar naamka iruntramunam pujuarmia nu Estepaṇkan iiyaj tukamá ni yapin nayaimpinmaȳa suntara yapiya nuní íran wáinkiar̄miayi.

7

Estepaṇ etserkamiania nu

¹ Tuma wáiniak Israer-patri uuntrī Estepaṇkan aniasmiayi “Jū tuinia nu nekaskait?” tímiai. ² Tutai niisha áimkiamiayi “Winia úuntrutirmesha, yatsurtirmesha anturtuktarum. Ii Waantu Yusr̄i ii úuntrīn Apraáman wantintiukmiayi. Apraámka Misiuputámia-Kartea nuṇkanam pujaī, Aran nuṇkanam wéatsāin, nūi wantintiukmiayi. ³ Tura wantintiuk tímiai “Ame nuṇkemsha áminiurm̄esha ikiukim nuṇka Wi iniaktustatjamena nūi wetá” tímiai Yus. ⁴ Tutai Apraám Misiuputámia-Kartea nuṇkan ikiuki Aran nuṇkanam pujustaj tusa wémiayi. Nuyá n̄i apar̄i jakamtai “Arant wetá” tímiai Yus. Nuna taku jū nuṇkan ii pujajnia jui pujsamiai.

⁵ Túrayat nunkan ishichkisha súdachmiayi ju nunkanam. Antsu “Ukunam amastatajai. Ame jakakmin ame uchirmin susattajai” tímiayi. Tura Apraama uchirí penké atsan nuní tímiayi Yus. ⁶ Nuyasha Yus tímiayi “Ame uchirmesha írara núnisan chích nunkanam pujusartatui. Nuisha emetamu itit awajtai pujuartatui. Kuatru siántu (400) uwí, tímianu uwí wáitsartatui, tímiayi. ⁷ Túrasha, Wi asutiáttajai ame shuárumin wáitkia núnaka, tímiayi. Túram nuyá nú nunkanmaya shiákartatui. Tura Winia enentáimtursartatui jú nunkanam’ tímiayi. ⁸ Yus tuke Apraámnasha chicharuk ‘Yamaikia Wí-shuar asarum tsupirnaktiniaitrame. Tuma asam amesha uchiram áishmankach akiiniamtai, Wi tímiajna núnismek, sirkunsisiún tutai, shunichirí nuape tsupirkata, tímiayi. Tura chícham Wi yamaikia ámiijai najanaj nu nekas uminkatniuiti tusam nusha túrata” tímiayi Yus. Tuma asamtai ni uchirí Isak akiiniamtai, uchu tsawant nankaamasmatai, Apraám nin tsupirkamiayi. Tura Isaksha ukunam ni tuse (12) uchirín ii uuntri armia nunasha nútiksan túramiayi. ⁹ Tura niisha ni yachín Jusén suiir íiyarmiayi. Túmainiak Ejiptu nunkanam júkiarat tusar surukarmiayi. Túrasha Yus némarkauyayi. ¹⁰ Tuma asa, ashí ni itiurchatrijiniá uwemtikramiayi. Tura waitnenkartutairíncha nekatairíncha susamiayi. Tuma asamtai Ejiptunam uunt akupin Paraún Ejiptu nunkaa akupniurí ajasat tura ni jeén wáinniurí ajasat tusa anaikiamiyi.”

¹¹ ‘Tímiatam tsuka tura itiurchatcha ámiayi Ejiptu núnkanam. Tura juí Kanaan nunkanmasha núnisan ámiayi. Tuma asamtai ii uuntri yurumkan penké wáincharmiayi. ¹² Tura Jakup, Ejiptunam yurumak ikiusma awai taman antuk ni uchirín akupkarmiayi. Túrasha wekaicha wearmiayi. Wats, ii úuntriun ujaajrume. ¹³ Tura ii uuntri atak Ejiptunam wéenak Jusesha, wíitjai takui ni yachí Jusén nekaawarmiayi. Tura Jusé “Yatsur áiniawai” takui Paraún, antuk “au shuarapitia” tímiayi. ¹⁴ Nuyanka Jusé ni yachín chicharuk “Apar ítiatarum uchirtuk” tímiayi. Nu shuarsha untsurí, setenta senku (75) matsamarmiayi. ¹⁵ Nuní tutai Jakupsha ni shuarijiaí Ejiptunam pujustai tusar wearmiayi. Tura ukunam nú nunkanman jakamiayi. Tura ni uchirísha ii uuntri ainia nu, núnisan nú nunkanman jákarmiayi. ¹⁶ Tura atak ukunam ni shuarí Sikiam nunkanam ni ukunchín júkiar iwiarsarmiayi. Kame Sikiam nunkanam Apraámka yaunchu játsuk Amura uchirí nunken sumakmiayi. Túramtai nuí iwiarsarmiayi’ tímiayi.

¹⁷ Yus, Apraáman chicharuk “Nekas wi susattajme” tímiania nú tsawant jeatemamtai, Ejiptu nunkanam Israer-aents pam-

paṅki ti kawenḱarmiayi. ¹⁸ Nu tsawantincha Ejiptunam chíkich akupin naamka ámiayi, tura Jusen nekaachmiayi nii. ¹⁹ Nu akupin ii yaunchu úuntrin ananḱawar yajauch awajarmiayi. “Atumí uchirí kuírchich ana nu ajapa ikiuktiarum” tu wémiayi. Pampanḱarain tusa tímiayi. ²⁰ Tiri iniaisamunam Muisais akiiniamiayi. Muisaisnaka Yus shiir enentáimtimiai. Tura ni nukurí menaintiu nantu takusmiayi. ²¹ Tura nuyá ajapa ikiuktin jeamtai entsá apujsamiayi. Uunt Paraunḱa nawantri Muisaisan wainiak jukimiayi. Achik, ni uchirinia tímiatrusan jukí tsakatmarmiayi. ²² Tuma asa Muisais unuimiátrauyayi ashí Ejiptu aents nékarmia nuna. Túramurisha chichamesha kakarmauyayi.’

²³ Estepaṅ tuke étseruk juna tímiayi: ‘Nuyá Muisais kuarenta (40) uwí takaku asa Israer áentsun iyutaj tusa wakerimiayi, ni shuarí asamtai. ²⁴ Nuyá we Ejiptunmaya áishman ni shuarin máatasa pujurun wáinkiamiayi. Tura Muisais ni shuarin ayamprak Ejiptunmaya áishmanḱan máamiayi. ²⁵ Wíi tura-mujai Yuska Israer-aentsun uwemtikrattawai, tu nekaamiayi Muisais, Yus timia asamtai. Tura Israer-aencha áintsaran nékainiawai tu enentáimsamiayi. Túrasha ninḱia nekaacharmiayi. ²⁶ Kashin tsawar Muisais ni shuarí jímia maani pujuinian wáinkiamiayi. Tura nawamnaikiarat tusa “¿Urukamtai nuamtak yatsumjaisha yajauch awajniarum?” tímiayi. ²⁷ Tutai emka nanḱaama nu Muisaisan kárut shitiá “¿Ya amincha ii akuptamin tura ii chichartamin anaitiamkamam? ²⁸ ¿Winiasha maantuátaj tusam wakeramek, ya Ejiptunmaya áishman máamamna nútiksamkea?” tímiayi. ²⁹ Nuna antuk Muisaiska Matian nunḱanam pisar, nú nunḱanam kuarenta (40) uwí yajaya áintsan pujumiayi. Nú nunḱanam pujus, nuatak, jimiará uchin yajutmarmiayi.’

³⁰ ‘Kuarenta uwí nanḱaamas, nu atsamu nunḱanam Senai náinnium tíjiuch Yusa suntari nayaimpinmaya taa Muisaisan wantintiukmiayi. Numi uchich ukat-ukatin keamunam wantinkiamiayi. ³¹ Muisais, nuna kean wainiak ashamkamiayi. Tura weantuk iistaj tukamá Uunt Yusa chichamen antukmiayi. ³² Yus tímiayi “Wiitjai Yus. Ame úuntrumi Apraáma Isaka, Jakupa Yúsrintjai” tímiayi. Tutai antuk Muisaiska ti kuraimiayi sapijin. Tura íistinian tujinmiayi. ³³ Nuyá Uunt Yus tímiayi “Úuntrun shiir awajsataj tusam, ame sapatrum ukuṅḱiam ikiuktia, wajamna nui Wi pujaku. ³⁴ Nuyá nekaata, tímiayi. Wíi-aents Ejiptunam wáitias pujuinia nuna wáinkiajai. Tura úutainia nunasha antukjai. Tuma asamtai uwemtikrataj tusan tarajai. Wats, akupkatjame ámin. Ejiptunam waketkitia” Yus tímiayi Muisaisan.’

³⁵ Estepaṅ tuke étseruk: ‘Ju Muisaisan ni shuarí “¿Ya

amincha ii akuptamin tura ii chichartamin átinniasha anaitiamkamam?” tiarmia nuna Yuska akupniun anaik uwemtikrarat tusa awainki akupkamiayi. Numiniam ni suntari wantintiuikmia nuna chichamejai Yuska Muisaisan akupkamiayi, tímiayi. ³⁶ Muisaisaiti Israer-aentsun Ejiptunmayan uwemtikramia nu. Yusa kakarmarin nekaawarat tusa, aentsti túrachminian untsurín túramiayi Ejiptu nunkanam. Nuyá Kapaantin Nayaantsanmasha, tura nuyá kuarenta (40) uwitin atsamunam pujuiniaisha ti kakarman iniaktusmiayi. ³⁷ Jú Muisaisak Israer-shuaran chicharuk “Atumíiniak etserniun Yus ukunam anaikiattawai, winia anaitiukma áintsan. Tuma asamtai nu shuarsha umirkamniuram” tímiayi. ³⁸ Jú Muisais Israer-aentsjai atsamunam pujumiayi. Senái nainnium Yusa suntari níijiaisha pujumiayi. Tura Muisaiska ii úuntriijai pujumiayi. Níiyaiti iwiaaku pujustin chichaman sunasmia nu. In ujatmaktinian sunasmiayi.’

³⁹ ‘Túrasha ii yaunchu uuntri Muisaisan umirkatniun naki-tiarmiayi. Áaniuk imiá umirtaint tusar Ejiptunam waketi-niun wakeriarmiayi. ⁴⁰ Túmainiak Muisais Yusjai chichas-tajtsa murá wématai nu shuar Muisaisa yachin Arunkan tiarmiayi “Ii yusrí najanatá, ii nemarsatin. Áaniusha Muisais-sha Ejiptunmaya in juramkiyatcha tútsuk weruma” tiarmi-ayi. ⁴¹ Nuyá wáakachia áaniun najanawarmiayi. Túrawar, júiti ii yusrí tusar, kuntinian maantuawarmiayi, nu susatai tusar. Tura ni uwejejai najanamun íisar ti wararsarmiayi. ⁴² Nuna túruinian wáiniak Yus, iniaisajai taku, níiya kanakmi-ayi. Nii wakerak yaan tikishmatrarti, tímiayi. Tuma asamtai, yaunchu Yusa etserniuri juní áarmiayi:

“‘Israer-aentsu, kuarenta (40) uwitin atsamunam wekaimi-armena nui, ¿Winiak kuntin maanturtuamarum? Winia surustai tusarum penké túrachurme, tímiayi Yus. ⁴³ Antsu, Muruk naartin ántar-yusa pujamurín jukimiarme. Tura chíkich ántar-yussha, ni naari Rempan, yaa áanin najanarum nusha jukimiarme. Júkin asakrumin atumí nunkeya jukin, tímiai Papirúnia nunkan nanakaiki akupkatjarme” tímiayi Yus.”

Nuní áarmaiti’ tímiayi.

⁴⁴ Estepan tuke étseruk: ‘Yus Muisaisan tímiayi “Wi aku-peamu chicham ikiunsatin jeá áaniun Wi iniaktusjamna tímiatrusmek atsamunam najánatá” tímiayi. Tutai Muisais Yus tímianak umikmiayi. Nu jean ii uuntri yaunchu takaku áarmiayi. ⁴⁵ Nu jean ni uchiri akintkiar akintkiar wearmi-ayi. Ukunam, jú nunka achiktin jeamtai, Yuska kapitían Jusuejai jú nunkanmaya aentsun jiki akupkarmiayi. Tura

ii uuntri kapitián Jusuejai winiarmia nu, nu jeancha jú nunkanam itiarmaiya. Tura Tawit uunt akupin náamtsain, ii úuntrisha nu jean takaku ármiai. ⁴⁶ Kame Yus Tawitian yájau enentáimtichmaiya. Tuma asantai Tawit Yus shiir pujustinian jean jeamtinian seamiai. ⁴⁷ Túrasha antsu Tawitia uchiri Sarumún Yusa jeen jeammaiya. ⁴⁸ Túrasha aents jeammanuman Uunt Yus pujuschamniaiti. Jes, yaunchu Yusa etserniuri Yus tímia nuna áarchamkia. ⁴⁹ Juna áarmiai:

“Nayaimpikia winia pujutairuiti. Nunkanmasha nawer tarimiui.

¿Warí jea najatruatai tusarme tarum? tímaiya Uunt Yus.

Tura Wi ayampratniusha, ¿tui aa?

⁵⁰ Wiki winia uwejruijain ashí najanachmakiaj” tímaiya.’

⁵¹ Estepan tuke étseruk: ‘Tura átumka Israer-shuartirmeka atumí enentáijiai tuke umichuitrume. Atumí kuishisha weaktsui tura Yus nékachua núniniaitrume. Yusa Wakaníjiaisha tuke nemasnaikiaitrume. Tura atumí yaunchu úuntriijiai métek túrarme’ tímaiya.

⁵² ‘Isia, atumí úuntrisha Yusa etserniurin tuke kajerin ármiai, tímaiya. Tura nú arant atumí úuntrisha Tunaarincha tátatui tu etseru wekaan, máacharmakia. Jes, nútiksarmek yamaisha, Tunaarincha támania nusha atumek anan karum máachmakuram, tímaiya. ⁵³ Tura Yusa suntari nayaimpinmaya Yusa chichamen susamuitatrum atumsha penké umikchamarne” tímaiya Estepan.

Estepanka jakamuri

⁵⁴ Israer-aencha Estepan tu chichaamu antukar imiá karker nain kátetete awajiarmaiya. ⁵⁵ Tura Estepansha imiá Yusa Wakaní pimiutkamuyayi. Tuma asa nayaimpinmaani imias, Yusa wincharin, tura Yusa untsuurinini Jesusan wajan wáinkiamiai. ⁵⁶ Tumá wáiniak Israer-áentsun tímaiya “Núá íiskua, nayaimp uranniun wáinjai. Tura Jesusan, Aents Ajasu tutaiya nuna Yusa untsuurinini wajan wáinjai” tímaiya. ⁵⁷ Támaiati niisha kuishin akiriarmiai, tura achiktai tusar charáa tiar ashí wajatkiarmiai. ⁵⁸ Túrawar, péprunmaya arant júkiarmiai. Tura antuk etserkarmia nu pushirin áikiar, natsa Sauru wajamunam au iisti tusar áeprusarmiai. Tura máawartai tusar kayajai tukurarmiai Estepankan.

⁵⁹ Tura Estepanka tukamaitiat Yusan áujsamiai. Tura áujuk “Uuntru Jesusá, winia wakantrusha jurutkitia” tímaiya.

⁶⁰ Tura tikishmar aukuk “Uunta, ju winia túrutainiana ju makuip” tímaiya. Tura nuna ti iniais, jakamiai.

1-2 Estepaṅkan máawarmatai Sauru, péṅkeraiti, tímiayi. Tura áishman Yúsan péṅker enentáimta armiania nu, Estepaṅka ayashíncha iwiarsarmiayi, tura aneenak ti uutiarmiayi. Tura nú tsawantaj Yus-shuaran Jerusaréṅnum pujuarmia nuna ti kajerlatin naṅkamnamiayi. ³ Sáuruka Yus-shuaran kajerak ti pataat wémiayi. Túmak nuí jeá wayá, nuí wayá áishmaṅnasha nuwaṅcha wáinkiaṅka japiki júki sepunam eṅkeataj tusa túrimiayi. Tumakui Yus-shuar Jerusaréṅnumia pisarar Jutia nuṅkanam, tura Samaria nuṅkanmasha jeawarmiayi. Jesusa akatramurínkia antsu Jerusaréṅnumaṅ juakarmiayi.

Samaria nuṅkanam etserkarmiania nu

⁴ Túrasha Jerusaréṅnumia aents pisararmia nu, arant wénaksha tuke Yusa chichamen etserkini yujarmiayi. ⁵ Tura Jiripi Jerusaréṅnumia we tura chíkich péprunam Samaria núṅkanam ámiania nuí jeá, chichaak “Yus anaikiamu ana nu Jesusaiti” tu etsermiayi. ⁶ Túrakui aents iruntrar chikichík enentáijjai Jiripi étsereamun titiú pujusar antukarmiayi. Yusa kakarmarín nekaawarat tusa aentsti túrachminian túrimia nunasha wáiniarmiayi. ⁷ Ti untsurí aents iwianchruku ármia nuna Jiripi nu iwianchin jírki akuptiarmiayi. Tura íwianch jíiniainiak kakantar charáa tiar jíiniarmiayi. Tura ti untsurí emearusha shutuapsha péṅker ajasarmiayi. ⁸ Tuma asamtai nú péprunmayaṅka ashí shuar ti warasar pujuarmiayi.

⁹ Tura nú nuṅkanam uwishin Semuṅ pujumiayi. Nuikkia wí ímianaitjai tusa Samarianmaya aentsun anañniuyayi. ¹⁰ Tuma asamtai ashí aents úmamkesar uchichisha, uuntcha, nin anturiarmiayi. Tura tiarmiayi “Ju Semuṅsha Yusa kakarmarijjai áitkiawai.”

¹¹ Tura ti untsurí uwí wawekratmarijjai anañkarta asamtai, umirkarmiayi nu aents. ¹² Túrasha Jiripi Yusa aku-peamurín, tura Jesukrístununcha shiir chichaman etserkamiayi. Tura, nuna antukar nuwaṅsha áishmaṅsha umikiar imian wearmiayi. ¹³ Semuṅsha imia uwishniuitiat Yus-Chichaman enentáimtus imianmiayi. Tura Jiripijjai tsanín wekaimiayi. Yusa kakarmarín shuar nekaawarat tusa Jiripikia aentsti túrachminian túrimiayi. Nuna wáiniak Semuṅ ti enentáimsamiayi.

¹⁴ Tura Jesusa akatramurísha Jerusaréṅnum pujuarmia nuí Samarianmaya aents Yusa chichamen umirainiawai taman nekaawarmiayi. Tuma asamtai Pitruncha Juáṅnasha nekáa ikiuutarum tusa akupkarmiayi. ¹⁵⁻¹⁶ Tura Samarianmaya Yus-shuarsha aya Uunt Jesusa náariṅ imianiarmiayi. Yusa Wakanínkia tárachmiayi. Tuma asamtai Pítrusha Juanjai nuí jeawar Samarianmaya Yus-shuara enentáin Yusa Wakaní pimiutkarat tusan Yusan áujtusarmiayi. ¹⁷ Tura áujsua umikiar

Pítiur Juanjaj ni uwején nú Yus-shuaran awantsarmiayi. Nuinkia Yusa Wakaní taramiayi.

¹⁸ Jesusa akatramurí uweje awasmanum Yusa Wakaní taramtai, Semunsha nuna wáiniak, kuitjaj nu kakarman sumaktaj, tímiayi. ¹⁹ Tura Jesusa akatramurín chicharuk tímiayi “Winiasha kuitjaj surustarum nu kakaram. Wisha nútiksanak nánkamas aentsnum winia uwejur awantsam Yusa Wakaní tarurat tusan tajai” tímiayi. ²⁰ Tutai Pítiur tímiayi Semunkan “Ámeke kuítrumjaj métek menkakatniuitme. Warí, Yus amaana nu ¿kuitjaj sumaktinkiait? ²¹ Yus esetram enentáimtachu asam nu túramu pachistinha penké tujinkiaime, tímiayi. ²² Enentáimprata. Túram Yus seata. Enentáimtamna nuna Yus tsankurtamprashtimpiash. ²³ Nékaime, tsaankeke áintsan yapá enentáimin pimiutramkaiti. Tura tunaarmijn jinkiámua núniniaitme” tímiayi.

²⁴ Tutai Semun áimkiamiayi “Uunt Yus aujtursatarum. Túrutrumna nuna túrunawajj tusan tajai” tímiayi. ²⁵ Nuyasha Jesusa akatramurí Jesusa túramurín nú áentsun ujakarmiayi. Tura wésar Samaria nunkanam pepru ámunmanka Yus-Chichaman nuí etserkiar, nuí etserkiar Jerusarénum waketkiarmiayi.

Jiripi Yus-Chichaman etserkamiania nu

²⁶ Tura Yus ni suntarín nayaimpinmayan Jiripincha akup-tukmiayi. Niisha chicharuk tímiayi “Wátskea. Juyá jinkim Jerusarénumia jintia Enkasa péprunam wea nuní weme, anaraaní wetá. Nú jintiaka atsamu nunkanam nankaamawai” tímiayi. ²⁷ Tutai Jiripisha wémiayi. Jintia wesa Itiupianmaya áishmankan wáinkiamiayi. Nú áishmansha Itiupia nunka akupniurín, ni naarí Kantasen takarniuyayi. Kantaseka núwauyayi. Tura nu áishman ti neka asa nuna kuítrín írniuyayi. Nú áishmansha Yusan áujsataj tusa Jerusarénum wéu wáketmiayi. ²⁸ Karetanam enkemar wesa, Yusa etserniurí Isayas aarmia nuna aujki wémiayi. ²⁹ Wats, Jiripi nú jintianam wéakui, Yusa Wakaní nin tímiayi “Nú kareta amayánta.” ³⁰ Tura Jiripisha amayan, Yusa etserniurí Isayasa áarmarin áujun antuk, chicharuk “¿Aujeamna nu nékamek?” tímiayi.

³¹ Tutai nú áishman tímiayi “¿Itiurak nekaataj? ¿Yaki jintin-truat?” tímiayi. Tura antsu iijiaí wetái tusa, Jiripincha enker jukimiayi karetanam.

³² Nu papí áarman áujmia nu júuyayi: “Murikiua áitkiasan jákatniunam júkiarmiayi. Tura uchich murik, uré tsúpiram chichaatsna núnisan niisha chichakchamiayi. ³³ Ninha iniatsáarmiai. Túrasha penké chichamnaka tútsuk tsankamakmiayi. Niisha nunkanam iwiaaku

pujá maamu asamtai, ¿yaki nuna áujmatkatⁱ?” Nuní aarma ámiayi.

³⁴ Kantase takarniurí Jiripin aniasmiayi “Waitneasam turuttia, tu aarma nusha, ¿yana ta? ¿Yusa etserniurí níñkik túmama? ¿Chikichnash ta?” tímiayi. ³⁵ Nuyá Jiripi nu aarman áujtus “Juka Jesusnan tawai” tímiayi. Tura nú arantcha Yus-Chichaman ujakmiayi.

³⁶ Nuyá entsa ámanum nankaamak áishman Jiripin chicharuk “Jui entsá jeaji. Wikia jui imianchamniakaitiaj” tímiayi.

³⁷ Tutai Jiripisha tímiayi “Tuke enentáimjai Jesus nekas enentáimtakminkia túramniaitjame.”

Tutai áishman chichaak “Ee nekasaiti, Jesukrístuka Yusa Uchirínti tajai” tímiayi. ³⁸ Tura, karetan awajas mai jíinkiar entsá wearmiayi. Nuí Jiripikia Kantase takarniurín imiaimiayi.

³⁹ Tura kukar jíinkiar matai Uunt Yusa Wakaní Jiripinkia jukimiayi. Tuma asamtai Kantase takarniurísha Jiripin wáinkiachmiayi. Túrasha níñkia waras wémiayi. ⁴⁰ Jiripisha jeachat Asutu péprunam wantinkiamiayi. Tura nuyá jíinki péprunam nuí wayá, nuí wayá Yus-Chichaman etserki we, Sesaria péprunam jeamiayi.

9

Sauru Jesusan umirkamiayi

(Túramurí 22.6-16; 26.12-18)

¹ Nuna tumaj, Jerusarénum Uunt Jesusan umirkarmia nuna máataj tusa áujmattan Sáuruka penké iniaichamiayi. Tuma asa Israer-patri uuntri iyutaj tusa werimiayi. ² Tura jeari tímiayi “Papí ame naarmíjjiai áaram surusta. Wi nuna papí jukin timiaj Tamasku péprunam jean, Israer-shuar iruntainiam wayattajai. Túran nú papíjjiai Jesusan umirkaru ainia nuna, nánkamsan achikiartatjai. Túran áishmannasha nuwancha achikian jinkian, jui Jerusarénum enkeataj tusan ikiaankattajai” tímiayi. ³ Tura papí susam Sauru jintiá wéaj, Tamasku péprunam nuntumsaj nuí aya aneachma nayaimpinmaya tsáapin jíitsumir téntakmiayi nin. ⁴ Túrunamtai Sauru nunká iniaarmiayi. Tura nayaimpinmaya chichaamun antukmiayi. “Sauru, Sauru, ¿Urukantai yajauch awajtustaj tusam imiá pataaturam?” tímiayi.

⁵ Táman antuk “¿Amesha, yáitiam, uunta?” tímiayi Sauru. Tutai ataksha áimkiamiayi “Wikia Jesusaitjai. Ame pataaturmena núitjai, tímiayi. Wíi aents pataatamna nuí, amek enentáimin yajauch awajmamsame, waaka sankanmiak numin ijiuna núnismek” tímiayi.

⁶ Nuyanka Sauru sapijin kuraṅki tímiayi “Nuṅkia Uunta, ¿wi warinia itiurkat tusamea wakeram?” tímiayi.

Tutai Uunt chichaak “Wajakim weme péprunam wayatá, tímiayi. Nui jeawakmin ame túratamna nuna turamiartatui” tímiayi.

⁷ Tura Sáurujai irunar wearmia nu, chichaamun antukarmiayi. Tura áentsnaka penké wáinkicharmiayi. Tuma ásar ti ashankarmiayi. ⁸ Nuyá Sauru nunká tepá nantakmiayi. Tura wáinmaktaj tukamá wáinmakchamiayi. Tuma asamtai chíkich shuar uwejnun enkekiar júkiarmiayi Tamaskunam. ⁹ Nui jeá menaintiu tsawant íimtsuk tura yurumtsuk penké úmutsuk pujumiayi.

¹⁰ Nui Tamaskunam Yus-shuar Ananías ámiayi. Nin mesekranam Uunt Jesus tímiayi “Ananías.”

Tutai “¿Warí wakeram, Uunta?” tímiayi.

¹¹ Nuyá Uunt Jesus tímiayi “Wajakim jintia, Naka tutaiya nui wetá. Nuisha Jutasa jeen jeam, Társunmaya Sáurun eaktaj tusan winijiai, titiá, tímiayi. Niisha Yúsán áujuk pujawai.

¹² Tura juna mesekranam ipiatkamjai Sáurun. Aishman wayá ni uwejéjai ántiawai, ataksha íimit tusa. Nú áishmanka ámetme, Ananías” tímiayi Jesus.

¹³ Táman antuk Ananías chichaak “Túrasha Uunta, ju áishman ame áentsrumin Jerusarénnun ti yajauch awajchakait. Ni yajauch túramurín ti untsurí aents ujatainiawai, tímiayi. ¹⁴ Tura yamaisha Israer-patri chicharniun papirín takakui. Tura nujai ame náarmin páchiaj nuna achik jukitiaj tusa tímiajaisha tarutramji” tímiayi Ananías.

¹⁵ Tutai Uunt Jesus tímiayi “Áankisha wetá. Ju áishman kan winia etserniur atí tusan achikjai Wi. Niisha Israer-shuarchancha tura kapitíánniasha tura Israer-shuarnasha wínián etserin átatui, tímiayi. ¹⁶ Tura Sauru winia náarun páchia asa ti wáitsattana núnaka nin iniaktustatjai” tímiayi Jesus.

¹⁷ Tura Jesus táman umirak Ananías Sauru pujamunam wémiayi. Tura jeari wayá uwején awantas tímiayi “Yatsuru Sauru, Uunt Jesus jintiá wantinturmakmamna nusha ame ataksha íimiat tusa, tura Yusa Wakanísha enentáimin pimiutramkat tusa winia akuptukai” tímiayi.

¹⁸ Nu chichamaik ni jiiya namaká saepeya áanin iniaarmiayi. Túrunamtai ataksha íimmiayi. Túruna wajaki we imianmiayi. ¹⁹ Nuyasha yurumámiayi. Tura yurumásha kakaram ajasmiayi. Tura Yus-shuarjai Tamaskunam wárumchik tsawant pujusmiayi.

Sáuruka Tamasku péprunam Yus-Chichaman etserkamiania nu

²⁰ Nuyanka Sauru Israer-shuara iruntairin wayá Jesusa túramurin etserkamiayi. Etseruk tímiayi “Nekasaiti, ju Jesus Yusa Uchirinti” tímiayi.

²¹ Nuna ashí anturú pujuiniaka “¿Ausha urukakua aania? tiarmiayi. Entá ju áishmansha Jerusarénum Jesusan enentáimtuinian ti pataatimia núchakait. Tura tímiajaisha nuna achik Israer-patri akupniurin jukitiaj tusa tamia núchakait” tiarmiayi.

²² Tura Sáurusha sapijmiatsuk etsermiayi. “Ju Jesus nekas áentsun Uwemtikniuiti” tu etsermiayi. Tura ti paant étserkui, Tamaskunmaya Israer-aents, nekaschaiti titiaj tukamá tujinkiarmiayi.

²³ Tura ukunam, Israer-aents Sáurun maatai tusar chichaman jurusarmiaiyi. ²⁴ Tura Sáurusha nu chicham jurusman nekamamiaiyi. Israer-aents pepru jínmanum tuke tsawaisha, káshisha achikiar maatai tusar jintian akirtiarmiayi. ²⁵ Nuna antukar Yus-shuar Sáurun chiiknium kashi enkeawar itiararmiaiyi. Pepru tanishnum itiarar awemarmiaiyi.

Sáuruka Tamaskunmaya Jerusarénum wémiania nu

²⁶ Tura Sauru Jerusarénum jeá Yus-shuarjai iruntratts wakerimiayi túrasha ninkia ashamiarmiaiyi. Sáurusha nekas Yus-shuar ajaschaiti tusar ashamiarmiaiyi. ²⁷ Túmainiain Pirnapí Jesusa akatramuri matsatmanum jukimiayi Sáurun. Tura nui ejé tímiayi “Ju Sauru jintiá wesa Uunt Jesusan wáinkiaiti, Tura Yus chicharkaiti. Tuma asa Sauru Tamaskunam sapijmiatsuk Jesusa náarin etserkaiti” tímiayi. ²⁸ Tura Sauru Jerusarénum juákmiayi. Tura Yus-shuarjai irunar pujumiayi. ²⁹ Nuyasha Yus, etserkata tutai, sapijmiatsuk Jesusa túramurin etsermiayi. Tura Israer-shuar Kriaku chichaman chichau ármia nu, nui pujuarmiaiyi. Sáurusha nu shuarjai áujmatsarmiaiyi. Túrasha nu shuar Sáurun itiur máatjik tusar chichaman juriarmiaiyi. ³⁰ Tura Yusaj yachi ármia nu, chicham jurusman nekaawarmiaiyi. Neka ásar Sáurun Sesaria peprunam júkiarmiaiyi. Tura nuyasha Tarsu péprunam akupkarmiaiyi.

³¹ Tura Jutíanmaya, Kariréanmayasha, Samarianmayasha Yus-shuar shiir tímiajnisan ajasar kakaram ajasarmiaiyi. Yúsan ashamainia ásar, tura Yusa Wakani yayamu ásar kawenki kawenki wearmaiyi.

Pítiur Eneasan yáinmiania nu

³² Tura Pítiur Yusaj yachi armiania nui iráa wekaimiaiyi. Wekaak Yus-shuar Rítianam matsamarmia nuisha iraumiayi. ³³ Nuisha Rítianam jeá áishmankan Eneas náartinian wáinkiamiaiyi. Niisha emearu asa wekaicha uchu uwí aya

tépenuyayi. ³⁴ Tura Pítiur chicharuk “Eneasa, Jesukrístu tsuármawai. Nantaktia. Tura esekmatairam iwíarata” tímiayi. Tutai Eneas nu chichamaik nantakmiayi. ³⁵ Nuna túman wáinkiar Rítianmaya aents tura Sarunmaya aencha enentáimprar Uunt Yusan nemarsarmiayi.

Nuwa Túrkas nantakmiania nu

³⁶ Túrasha Jupe péprunam nuwa Yus-shuar pujuyayi, ni naari Tapitia. Tura nusha Kriaku chichamjainkia Túrkas tuiniawai. Nu nuwasha nuí pujus tuke pénger túriniuyayi. Tura niisha nútiksā yai wémiayi. ³⁷ Nu tsawantinik Túrkas sunkuran jateemak jakamiayi. Túrunamtai ayashin nijjarar yakí tesaamunam áepsarmiayi. ³⁸ Jupe péprusha Rítianmaya tíjiuch ámiayi. Júpenmaya Yus-shuar Rítianam Pítiur pu-jan nekaawar jimíará áishmañkan akatrar akupkarmiayi, Júpenam wari winití tusar. ³⁹ Nuí tutai Pítiur níjjai wémiayi. Tura támatai jaka tepemia nuí awayáwarmiayi. Nuí wayamtai waje pujuarmia nu útkiar Pítrun téntakarmiayi. Túrawar pushirín, Túrkas iwíiaaku pujus najankamia nuna iniak-tusarmiayi.

⁴⁰ Nuyanka Pítiur aa akupkarmiayi ashí. Tura niisha níñki tikishmar Yúsan áujsamiayi. Nuyasha nuwan jaka tepaan iis tímiayi “Tapitia nantaktia.” Tutai niisha íimi Pítiur wajaan wáiniak nantaki pujusmiayi. ⁴¹ Tura Pítrusha nuwan uwejnum achik awajkimiai. Tura iniais Yus-shuar ármia nuna tura wajencha untukar Túrkas iwíiaaku ajasun iniaktusarmiayi. ⁴² Nu túrunamun ashí aents Jupe péprunmaya nekaawarmiayi. Túrawar unturí aents Uunt Jesusan umirkarmiayi. ⁴³ Tura Pítruka Jupe péprunam unturí tsawant nuapen-iwíarin Semunka jeen pujusmiayi.

10

Pítiur Kurniriujai

¹ Sesaria péprunam Kurniriu naartin suntara kapitíantri pujumiayi. Ni suntari Itiaria nunkanmaya ármiai. ² Nu kapitían Kurniriu ni shuaríjjai, Yuska nankaamantuiti, tu enentáimtiarmiayi. Tuma ásar Yúsan enentáimtin ármiai. Tura nútiksā kuítniasha takakchan yáintaj tusa Israer-shuaran súuyayi. Tura tuke tsawant Yúsan áujtiniuyayi. ³ Chíkich tsawantai, nantu aan̄ku ajasai Kurniriu íimiarmiayi. Yusa suntari Yus nayaimpinmaya akupkamu, ni pujamunam utuá “Kurniriuá” tímiayi.

⁴ Kurniriuá tutai, Yusa suntarín ashamak íimia pujumiayi. Tura “¿Warimpiait, Uunta?” tímiayi.

Tutai Yusa suntari tímiayi “Ame seamun Yus anturtamkai. Tura atsumainia nu yayakmin Yus shiir enentáimturmawai’

tímiayi. ⁵ Tura Yusa suntari Kurniriun tuke chicharuk “Wats, áminiuram Júpenam akupkata. Semun, chíkich naari Pítiur, tatí tusam akuptukta, tímiayi. ⁶ Nu Semunsha chíkich Semunjai pujawai. Nuka nuapen-iwiarin Semunkaiti. Tura ni jeesha nayaantsanam ayaamach pujawai, tímiayi. Nui jeawakmin, ame túratamna nuna Semun Pítiur turamtatui” tinia ikiuk-miayi. ⁷ Tura Yusa suntari waketkimtai, Kurniriuka ni takarniurin jímíaran itiamiayi. Tura suntaran chikichkiniak nemarsat tusa itiamiayi. Nu suntar ni írutramuriyayi. Tura Yúsan enentáimtiniuyayi. ⁸ Kurniriusha ni túrunamuriñ ashí ujáa-já awajas Jupe péprunam akupkarmiayi.

⁹ Kashin tsawantai Kurniriu suntari Júpenam nuntum-sarai, tutupin ai Pítiur jea yakí wáakunam Yúsan áujsatajtsa wakamiayi. ¹⁰ Pítrusha ti tsukamak yurumátaj tusa wak-erimiayi. Túrasha yurumkan iniarainiai Pítiur íkiajtiusmak, ¹¹ nayaimp uranmianum wan̄karam tarachia áanin tura nuna tsakarín jin̄kiakman tárún wáinkiamiayi. ¹² Nu tarachnium ya-asma irunmiayi. Wekainiusha, nanamtincha, tura napisha en̄kemiarmiayi. ¹³ Tumai Yus Pitrun chicharuk “Pitru, wa-jakim maam yuata” tímiayi.

¹⁴ Tutai Pítiur tímiayi “Atsá Uunta. Ii Israer-shuartikia ya-jauch yajasma áinia nu tura yúatin surimkiamu ana nuka pen̄ké yúchaitji. Tuma asamtai júnaka wikia yuashtatjai” tímiayi.

¹⁵ Túrasha Pitrun atak Yus chicharuk “Wi, péñkeraiti, tájana nu, yajauchiiti, tiip” tímiayi.

¹⁶ Nuka menaintiú túrunamiayi. Tura nuyasha tarach atak-sha nayaimpiniam wakamiayi. ¹⁷ Nuna túrunan wáiniak Pítiur wariniak áaniuncha wáinkiaj tusa enentáimia pujai kapitíán Kurniriu ayakma armia nu, anintruiniak jeawariayi. ¹⁸ Tura jeawar kakantar unsummiar “¿Semun, Pítiur, juin̄ pujá?” tiarmiayi.

¹⁹ Tura Pítruka ímiarmariñ tuke enentáimia pujai Yusa Wakaní chichaak “Menaintiu áishman̄ untsurmainiawai, tímiayi. ²⁰ Wajakim akaikim arantutsuk au nemariarta, Wi akupkamu asamtai” tímiayi.

²¹ Nuna antuk Pítiur taramiayi. Tura áishman̄kan Kurniriu akupkama nuna wajainian wáiniak “Wiitjai Pítiur. Átum eátrumna núitjai. ¿Warí tarintrum?” tímiayi.

²² Tutai niisha tiarmiayi “Íisha kapitíán Kurniriu akupkamu taji. Kurniriuka áishman̄ péñkeraiti. Yúsan enentáimtiniaiti. Tura Israer-aencha nin shiir enentáimtuiniawai. Niiya winiaji, tiarmiayi. Kame nuik, Yusa suntari, nayaimpinmaya akupkamu, ii kapitíántrin̄ tímiayi “Pitrun untsukát akupkata. Nii tatí. Tura nii títiatna

nu péⁿker anturkata” tímiayi. Nuna ii kapitiántrⁿ takui iisha winiji” tiarmiayi.

²³ Tutai Pítiur jeá awayámiayi. Tura nu kashi nuⁱ ka-nararmiayi.

Kashin tsawarar Pítiur niijajⁱ wearmiayi. Túrasha Júpenmaya Yus-shuarsha nin nemariarmiayi. ²⁴ Nuyá tsawarar Sesaria péprunam, Kurniriu nákamun jeariarmiayi. Kurniriuka ni shuarⁿ tura ni nekas amikrⁿ, nekaatarum tusa unt^suk ikiaankamiayi. ²⁵ Tura Pítrusha jeamtai Kurniriu aa jiintiuki Pitrun tikishmatramiayi. ²⁶ Túrasha Pítiur awajki tímiayi “Wajaktia. Wisha aya áentsketjai. Ámea núnisketjai” tímiayi. ²⁷ Tura chichasar jeá wayawarmiayi. Tura wayá, unt^surⁱ aents mat-satun wáinkiamiai. ²⁸ Nuyá Pítiur chichaak tímiayi “Amikrua, atumsha nékarme. In Israer áentstinkia, chíkich áentsjajⁱ pachiniarchatniuitrume, tura ni jeencha wayashtiniait^rume in jintintramin turamainiaji, tímiayi. Túrasha Yuska ni enentáimsamurⁿ wíniaka paant iniaktursayi. Túmaitkiui wikia náⁿkasamas áentsun yajauchiiti, tura auka wapiki-aiti, tíchamniaitjai, tímiayi. ²⁹ Tuma asamtai, unt^surkurmin, páchitsuk winimjai. Túmaitkiui nekaataj tusan wakerajai. ¿Urukamtai unt^surkamarum?” tímiayi.

³⁰ Tutai Kurniriu tímiayi “Kuatru tsawant nanⁿkaamasajⁱ tura nantusha junⁱ ai, wikia yurumtsuk Yúsan áuj^samjai, kíarajⁱ áuj^satin ana nuna. Túran chichajⁱ, áishmanⁿ, ni entsatairⁱ win-charpatniun, naka wajatran wáinkiamjai, tímiayi. ³¹ Niisha chichartak turutmiayi “Kurniriu, Yus ame áuj^sman antur-tamkayi. Tura shuar atsumainia yáinmamna nunasha nekar-mayi, turutmiai, tímiayi. ³² Tuma asamtai, Jupe péprunam aka-tramuram akupkata. Semunⁿ Pítrun itiatí. Nu Semunⁿ Pítrusha, chíkich Semunⁿjajⁱ pujawai. Nuapen-iwiarin Semunⁿkaiti nuka. Tura ni jeesha nayaantsanam ayamach pujawai. Niisha taa ámin chichartamkattawai” turutmiai, tímiayi. ³³ Túrutkui, wi umikian áentsun wárikmasan ámin akuptukjame utitia tusan. Tura nékasenⁿ taume. Tuma asamtai iisha juⁱ Yus ímmianum pujuiniaji. Tuma asamtai, ashí Uunt Yus ámin au ujakarta túramna nu, iisha antuktai tusar pujaji” tímiayi Kurniriu.

Kurniriu jeen Pítiur etserkamia nu

³⁴ Nuyá Pítiur chichaak “Ayu. Yus ímmianum ashí aents métekrak áiniawai nekas nékajai, tímiayi. ³⁵ Antsu ashí nunⁿkanam náⁿkasamas aents Yúsan umirak péⁿker tura nuna, Yus nú aentsun shiir enentáimtawai, tímiayi. ³⁶ Yuska shiir chichaman Israer-aentsun akuptukmiayi. Nuⁱ chichaak “shuar Jesukrístu naarⁿ páchiakka, Yusjajⁱ nawamnaikiatin átiniaiti, tímiayi. Nú Jesukristu ashí shuara Úuntrⁿinti’ tímiayi

Yus. ³⁷ Túrasha Kariréa nuṅkanam naṅkamak ashí Israer nuṅkanam túrunamia nu paant nékarme. Imiakratin Juan imiaak etserak amukmia nú tsawantin naṅkamamiayi. ³⁸ Tura jusha nékatsrumek, tímiayi. Nasarénumiá Jesus, Yus Anaikiamu asa, Yusa Wakaní kakarmarijiai pénker túriniuyayi. Iwianchruku wáitias pujuarmia nuna pénker awajsamiayi. Yus Niin pujurma asa ashí nuna túriniuyayi. ³⁹ Tura Israer-aents matsatkamunam tura imia Jerusaréñ péprunmasha Jesus túramia nu, iisu asar, iisha étsereaji. Tura ayu, Nin achikiar krúsnum máacharmakia, tímiayi. ⁴⁰ Tura menainti tsawant jeamtai Yus Nin iniantkimiai. Tura ataksha iwiaintiurtamkachmakaji, tímiayi. ⁴¹ Ashí áentsnumka wantinkiachmiayi. Antsu íniak nuik, etserin atarum tusa Yus achirmakmij nu áentstiniak wantinturmakmij, tímiayi. Au nekas jakamunmaya nantakmiatai iisha Nijiai tsaniṅkiar yurumámji, tímiayi. ⁴² Tura Jesussha in akuptamkaitji. Jesuska “Wiitjai Yus Anaikiamun, tímiayi. Ashí áentsun, júka makuumawai, túrasha júka makuumatsui, Wiki titinaitjai. Kame ashí áentsun, jaka áinia nuna tura iwiaaku áinia nunasha, Wíkiitjai nuna titinian” tímiayi Jesus. Nusha átum werum ujatruktarum, Jesus turammaji, tímiayi. ⁴³ Ya shuarak Jesusa náarín pachia nú shuarnaka tunaarín tsanṅkurattawai, nuna ashí Yúsna etserniusha yaunchu etseriarmiayi” tímiayi.

Israer-shuarchan Yusa Wakaní tarurarmiania nu

⁴⁴ Tura Pítiur tuke chichaak pujai, tura chikichcha antúu pujuinia Yusa Wakaní tarurarmiayi. ⁴⁵⁻⁴⁶ Tuma ásar aṅkant aṅkant chíkich chichamjai chichasarmiayi. Túmainiak, Yus ti pénkeraiti, tiarmiayi. Tura Israer-shuar, Yus-shuar armia nuka Pítrujai táarmia nu, nuna antukar ti enentáimsarmiayi. Maa, Yusa Wakanísha Israer-shuarcha ainia nunasha tarurcharaik, tu enentáimsarmiayi ⁴⁷ Túmakui Pítiur chichaak “¿Yaki surimkiat ju aents imiantinian? Warí nincha ínia áintsan Yusa Wakaní tarurcharaik” tímiayi. ⁴⁸ Nuyá Pítiur, Jesukrístu náariin imiantiarum tusa akupkarmiayi. Tura nuyasha Pitrunka, nijiai ishichik tsawant pujustinian seawarmiayi.

11

Ni túrunamurín Pítiur ujakmiania nu

¹ Israer-shuarchasha Yusa chichamen umirkarai táman Jesusa akatramurisha tura Jutíanmaya Yus-shuarsha antukarmiayi. ² Túmainiak Pítiur Jerusaréñnum jeamtai, Israer-shuar Yus-shuar ármia nu chichainiak ³ “¿Urukamtia Israer-aents áiniachusha iyumam? ¿Tura aujai tsaniṅkiam urukamtai yurumámum?” tiarmiayi.

4 Tutai Pítiur ashí yámankamtaiknumiā túrunamun ujakmi-
ayi. 5 Chichaak tímiayi “Wikia Jupe péprunam pujumjai. Tura nuī Yusan auju pujusan ímiarmajai. Tura wan̄karam tarachia áanin kuatru tsakar̄in jin̄kiakma, nayaimpinmaya táarun wáinkiamjai. Tura wi pujamunam jeartimiai, tímiayi. 6 Tura nuī iiyaj tukaman init yajasman, napincha, nanamtin-
niasha en̄ketainian wáinkiamjai, tímiayi. 7 Tura chichaman antukmajai “Pitru wajakim maam yuata” túrutun antuk-
majai, tímiayi. 8 Túrutkui “Atsá, Uunta, áanin wapiknaka, Israer-aents yuatin surimkiamu ana núnaka tuke yúchaitjai”
tímiyai, tímiayi. 9 Atak nuyá túrutuk “Wi, péñkeraiti, tájana nu, ámeká, yajauchiiti, tiip” turutmiyai, tímiayi. 10 Nunasha menaintiú túrunan wáinkiamjai. Túruna nayaimpiniam mash waketkimiai, tímiayi. 11 Nuī túruna pujai menaintiú áishman̄ Sesarianmaya akupkamu, winia ēatiniak wi pujamunam tarutiarmiai, tímiayi. 12 Tura nuī Yusa Wakaní chichartak “Arantutsuk aujai wetá” túrutkui, wémajai. Tura jū sais Yus-shuarjai wi wémajai. Túrunar ashin̄kiar Kurniriu jeen wayam̄ji, tímiayi. 13 Niisha chichaak “Jearui Yusa suntari nayaimpinmaya taa wajan wáinkiamjai, tímiayi. Tura ni-
isha chichartak “Jupe péprunam Semun̄ Pítiur tatí tusam áishman̄ akatram akupkata. 14 Pítrusha taa, itiura amesha tura áminiurmesha tunaarminiā uwemprattam nuna turamta-
tui.” Yusa suntarī nuní turutmiayi” tu ujatkamiayi Kurniriu’
tímiayi.

15 ‘Wi chichastasan júarai, Yusa Wakaní tarurarmiayi, yámankamtaik in tarutrampramiaī nútiksān, tímiayi. 16 Nuin̄kia Uunt Jesus timian enentáimpramjai. Niisha tichamka “Juan̄ entsajain̄ imiakratmiayi. Tura antsu Yusa Wakanínkia imiantinia áintsān̄ atumí enentáin̄ en̄kemprutmattarme.” Nu timian enentáimpramjai, tímiayi. 17 Atumsha enentáimpratarum. Uunt Jesukristu umirkamiaī nuī, incha Yuska ni Wakanín̄ suramsamiaī. Tura in suramsamiaī núnisan̄ Yus nincha ni Wakanín̄ súsarmiayi. Nuna tura asamtai, wikia, túrashtiniaiti, Yúsan títinkiaitaij”
tímiayi Pítiur.

18 Tura Pítiur taman antukar mitiat wáinkiar “Nekasaiti, Israer-shuarchancha ni enentáin̄ yapajiáwarmatai tuke iwiaaku átinian Yuska nin súsaruiti” tiarmiayi. Tusar Yusa náar̄in ti shiir awajsarmiayi.

Yus-Shuar Antiukía péprunam wearmania nu

19 Estepañkan máawarmia nuī, chíkich Yus-shuarnasha maatai tusar pataatiarmiayi. Túram chíkichkia pisarar Pinisia nun̄kanam, Chipri nun̄kanmasha, tura Antiukía péprunmasha wearmiayi. Tura nuī jeawar Yus-Chichaman

chikichnaka ujatsuk aya Israer-aentsnak ujakarmiayi. ²⁰ Tura niijjai Chipri nunkanmaya pisararmia nu Serini nunkanmayasha Yus-shuar ármiai. Nuka Antiukíanam jeawar Israer-shuarchan Uunt Jesusa túramurín ujakarmiayi. ²¹ Tura Uunt Jesus ikiakárma ásar, nú nunkanmaya aents ti untsurí yaunchu túrutairín iniaisar Jesusan enentáimtuiniak Yus-shuar ajasarmiayi.

²² Tura nu chichaman antukar, Jerusarénumia Yus-shuar, ame iyutá tusa, Pirnapín Antiukíanam akupkarmiayi. ²³⁻²⁴ Pirnapísha jeá, Yus nú shuaran uwemtikrarma nuna wáiniak warasmiayi. Pirnapísha pénger áishmankauyayi. Yusa Wakanísha pimiutkamuyayi. Tura Yúsán nekas umirkauyayi. Tuma asamtai nu shuaran mash jintintiainiak chicharuk “Tuke enentáimjai umirkarum Yus nemarsatarum.” Tu chicharak ikiukmiayi. Tura nuísha nú arant untsurí aents Yusaj kawenkarumiayi.

²⁵ Nuna turasua amik Pirnapí Tarsu péprunam wémiayi Sáurun wáinkiatá tusa. Tura wáiniak Antiukía péprunam jukimiayi. ²⁶ Tura nuí jeawar, nú péprunmaya Yus-shuarjai iruntrar chikichík uwí pujusarmiayi. Yus-Chichaman untsurí shuáran ujaak pujuarmiayi. Tura nuí Antiukía péprunmanka Yus-shuaran émkaka, Kristu shuari, tiarmiayi. ²⁷ Nuyá Yusnan etserin Jerusarénumia táarmiayi Antiukíanam. ²⁸⁻³⁰ Túmainiai chikichík etserin, ni naari Akaapu, Yus-shuar matsatmanum ajapén wajaki chichasmiayi. Tura Yusa Wakaní nekatairijjai chichaak “Ti tsuka ashí núnkanam átatui” tímiayi. Tuma asamtai Antiukíanamaya Yus-shuar chichainiak “Jutía nunkanmaya Yus-shuar ainia nu yáintai” tiarmiayi. Ankant ankant ni wakeriarmia núnik súsarmiayi. Tura nú kuítniasha Jutíanmaya Yus-shuara úuntrín akuptukarmiayi. Pirnapísha Sáurusha nú kuítian júkiarmiayi. Tura Akaapu tímia núnisan túrunamiayi, akupin Krautiu pujai.

12

Pitrún sepunam enkeawarmiania nu

¹ Nu tsawantai akupin Erutis Yus-shuaran máataj tusa chichaman jurus áentsrín ishiakmiayi. ² Tura Juanka yachín Jakupun suen tsupirkar máawarmiayi. ³ Nuna tura máawarmatai Israer-aents wáinkiar “juka péngeraiti” tiarmiayi. Erutissha nuna antuk, Pítrusha achikrum itiatarum tusa akupkarmiayi. Núnaka wakapruachu tanta yuatin nampertin túrawarmiayi. ⁴ Pítruncha achik itiarmatai, Erutis sepunam enkeata tusa akupkamiayi. Tura sepunam suntarsha ankant ankant, kuaru kuaru, ashikia tiasisáis (16) irunar Pitrun téntakarmiayi. Tura, ju

jísat nan̄kaasmatai, mantamnati tusan j̄iiktiaitjai aents iruntramunam, tu enentáimsamiayi Erutis. ⁵ Túramu asa Pítruka sepunam pujumiayi. Tura suntarsha mijiatrutsuk iiyarmiayi. Túramunak Yus-shuarka, Pitrun yáin̄kiat tusar iniaitsuk Yúsan ti áujiarmiayi.

Yusa suntari Pitrun uwemtikramiania nu

⁶ Wats, Erutis, kashin j̄iiktiajai takui, nú kashi Pítruka jimi-ará suntar wajamunam etema tepes kanarmiayi. Tura jimi-ará jirujai j̄inkiamuyayi. Tura chíkich suntarka j̄inmanum ii wajarmiayi. ⁷ Tumai aya aneachma Yusa suntari nayaimpin-maya taa ajapén wajasmiayi. Túrunamtai jeanman̄ka tsáapin ajasmiayi. Tura Yusa suntarisha Pitrun páenum antin̄ ish-intiarmiayi. Tura jirusha Pitru uweyéya sayat atiniarmiayi. ⁸ Tura Yusa suntari tímiayi “Kaki emenmamata. Túram sap-atrumsha aweekata” tímiayi. Tutai Pítiur túramiayi. Nuyá chichaak “Pushiram entsarta. Túram nemartusta” tímiayi. ⁹ Tutai Pítiur nemarsamiayi. Túrusha Pítruka, mesekranmaapi j̄úniaja, tu enentáimsamiayi. ¹⁰ Túrusha emka suntar íimia wajan nan̄kaikiarmiayi. Tura nuyasha chíkich suntar íimia wajan nunasha nan̄kaikiarmiayi. Tura nuyasha j̄intiainium jiru waiti ámanum jeawarmatai, nú wáitisha íimia-n̄in̄ki kuat uranmiayi. Túrunamtai j̄inkiararmiayi. Tura jintiá ishichik wésan̄, Yusa suntari Pitrun níniak ikiukmiayi.

¹¹ Túram Pítiur enentáimiar tímiayi “Yamaikia nékajai. Mesekranmachuiti. Antsu Uunt Yus ni suntarin̄ nekas akupturkayi. Erutis mantuataj tusan pujurtana nuyá Yusa suntari winia uwemtikrurai. Tura Israer-aents túrutatajtsa wakeriarmia nuyasha uwemtikrurai” tímiayi. ¹² Nuna tu enentáimias nekáa, Marí jeen wémiayi. Nú Marisha Juan Márkusan nukuríyayi. Nú jeanam untsurí aents irunar Yúsan auju matsatainaij Pítiur jeamiayi. ¹³ Tura jeá aa wáitin tuntuimiayi, wayataj tusa. Túmakui nuwá uchich, ni naari Rutí, yákit tusa iyumiayi. ¹⁴ Tura jeari, Pitru chichamen̄ anturak ti shiir enentáimsamiayi. Túmak wáitin urattsuk ikiuki, init matsatainian werí “Pítiur taa wáitiniam wajaawai” tímiayi.

¹⁵ Tutai “Wáurtsmek” tiarmiayi.

Tútaisha núwaka “Atsá nekasaiti” tímiayi.

Tútaisha nú arant “Níichuiti. Antsu ni wakaní túratsuash” tiarmiayi.

¹⁶ Tu chichainiajin̄ Pítruka tuke tuntuí wajamiayi. Tura wáitin uraj tukamá Pitrun wáinkiar ashankarmiayi. ¹⁷ Ashamak chichainiakui Pítiur, uweje takuí itiat-mamtikiarmiayi. Tura nuyá Uunt Yus sepunmayan̄ uwemtikramun ujakmiayi. Tura “J̄u chicham Jakupu tura

chíkich Yus-shuarsha ujaktarum” tímiayi. Nuna t̃i iniaish jiinki arant wémiayi.

¹⁸ Kashin tsawar suntarsha Pitrun atsá wáinkiar “Chuwa urukakua menkaka. Áyawa urukattajia” tiarmiayi. Pítiur túrunamun nékachu ásar nuna tiarmiayi. ¹⁹⁻²⁰ Túrunamtai Erutis chichaak Pítiur eaktarum tusa akupkarmiayi, túrasha wáinkiacharmiayi. Túrunamtai Erutis suntaran untukar, Pítrun íisarmia nuna aniasarmiayi “¿Pítiur itiura menkakama?” tímiayi. Niisha áimiainiachkui, nu suntaran mantámnatí tusa akupkamiayi.

Erutis jakamiania nu

Erutissha Tirunmaya tura Setúnmaya áentsjaisha nemasnaikiarmiayi. Túmayatan Jutía nunkan ikiuki Sesaria péprunam pujustaj tusa Erutis wémiayi. Sesaria péprusha Tiru péprunam tíjiuchiiti. Setúnmaya aents Tirunmaya áentsjai Erutisa nunkeyan yurumkan súmainia ásar, Erutisjai nawamnaikiatniun wakeriarmiayi. Tuma asantai métekrak enentáimsar, Erutisa takarniur̃i penker̃i, ni naari Parastu, níijiai emka amikmawar nuyá Erutisan weriar shiir matsamsatniun seawarmiayi. ²¹ Tuma asantai tsawant jeamtai Erutissha akupin entsatai pushin entsarmiayi. Tura akupin pujutainium pujus áentsun ikiaanak áujmatmiayi. ²² Nui pujus chichaakui aents untsumainiak tiarmiayi “Ju chichaa pujana júka áenchaiti. Antsu nekaska yúsaiti” tiarmiayi. ²³ Tumai nuyajik Yusa suntari nayaimpinmaya tarí Erutisan jaa awajsamiai. Tuma asantai nusha aka yuam jakamiayi. Erutissha Yusan waantu awajtsuk níiki waantu enentáimtuma asa túruna jakamiayi. ²⁴ Túrunamtaisha Yusa chichamenka nú arant pampanki wémiayi. Túmakí ashí núkanam anturamiayi.

²⁵ Tura Pirnapísha Sáurusha ni takatr̃in amukar Jerusarénnumiá Antiukíanam waketainiak Juan Márkusan júkiarmiayi.

13

Yus-Shuar Pirnapíncha Sáuruncha Yus-Chichaman etserkarat tusar akupkarmiania nu

¹ Antiukíanmaya Yus-shuarnum Yusnan etserin páchitra ármiayi. Nútiks̃an Yus-Chichaman jintinniur̃isha ármiayi. Pirnapísha tura Mukusa Semunsha, nuyá chíkich, Serinianmaya Rúsiusha tura akupin Erutisa tsakatkesha, ni naari Man-aen, Sáurusha tímianu ármiayi. ² Tura chíkich tsawantaj níisha yurumtsuk Yusan áujeak pujuinĩai Yusa Wakaní tímiayi “Pirnapísha, Sáurusha akanturkitiarum, tímiayi. Wi takatan

súsaitjiana nuna takasarat tusarum túratarum” tímiayi. ³ Tutai ijiarma Yusan aujsua amikiar, shiir wetarum tusar ni uwején Sáurun Pirnapíncha awantkarmiayi. Túrawar Antiukíanmaya akupkarmiayi.

Chipri nunkanam jeawarmiayi

⁴ Tura nuyanka Yusa Wakaní akupkam Pirnapísha Sáurusha jĩinkiar Serusia péprunam jeawarmiayi. Tura nuyá uunt kanunam enkemprar Chipri nunkanam jeawarmiayi. ⁵ Juansha yáintaj tusa némarkauyayi. Nui Saraminia péprunam jeawar Israer-shuar iruntai jeanam wayawar Yus-Chichaman etseriarmiayi. ⁶ Tura Chipri nunkanam pepru ainia nui wáirkutak Papus péprunam jeawarmiayi. Nui jeawar Israer-aents uwishin ni naari Parjesúsan wáinkarmiayi. Ni chíkich náarinkia Erimiasauyayi. Niisha uwishniuitiat, Yúsnan étsereajai, tíniuyayi. ⁷ Akupin Serjiu Páurujai pujuyayi. Nu akupniusha ti pénker enentáimniuyayi. Tura Pirnapín Sáuruncha chichaman akuptukmiayi, taarti tusa. Kame Yus-Chichaman antuktaj tusa wakerak untukmiayi. ⁸ Tura uwishin Erimias nuna nakitiak “Auka pénkerchaiti” tímiayi. Akupniusha Yúsan umirkain tusa nuna tímiayi. ⁹ Nuyanka Sauru, ni chíkich naari Papru, Yusa Wakaní pimiutkamu asa, nu uwishniun úmamkemas iis tímiayi ¹⁰ “Ámeke wáitaitme. Anankartiniaitme. Yajauchiitme. Maaj, iwianchiitme. Tura ashí pénker ana nuka imiá nakitniuitme. Tsej, ¿urukamtai Yusa jinti naka ana nu emeskim weam? ¹¹ Pajj, yamaikia Uunt Yus asutiámattawai. Yamaikia amesha jiji kusurmatai unturí tsawant tsáapnin penké íischattame” tímiayi. Tura nú chichamaik jii kusurmatai kirit íimiuk chikichan eamiayi enkeki jurukit tusa. ¹² Nu túrunamtai akupin nuna wáinak, ti enentáimpramiayi. Túruna Uunt Yusa chichamen enentáimtur umikmiayi.

Chíkich Antiukíanam etserkarmiania nu

¹³ Nuyá Juan waketki Jerusarénum wémiayi. Tura antsu Pápruka ni tsaniakmarijiai kanunam enkemprar Pápus péprunka ikiukiar Pirji péprunam jeawarmiayi. Nusha amaini Pampiria nunkanam pujawai. ¹⁴ Nuyá Pirji péprun nankaikiar Antiukía péprunam jeawarmiayi. Nú Antiukíasha Pisitia nunkanam pujawai. Nui jeawar Israer-shuar ayampratin tsawantin, nuka sáwartin, Israer-shuar iruntai jeanam wayawar pujusarmiayi. ¹⁵ Tura nui Yus-Papinium yaunchu áarman áujas aminkiamtai, Israer-shuar iruntai jeanam íirniuri Páprun tiarmiayi “Yatsuru, jintiatin chicham takakkurmeka yamaik titiarum. Antukarmi” tiarmiayi.

16 Tutai Papru wajaki uweje takuimiayi. Tura chichaak “Israer-shuartiram, tura Yúsan umirkataj tusa wakerarmena nu antuktarum, tímiayi. 17 Ii Yusri ii yaunchu uuntrin Israer-shuartin achikmiayi. Tura niisha írara núnik Ejíptunam matsatainíai Yuska nin páchiniak uunt awajsarmiayi. Yus ni kakarmarijiaí nú nunkanmaya ii yaunchu uuntrin uwemtikrarmiayi. 18 Túrasha atsamu nunkanam ii uuntrin kuarenta (40) uwitin Yuska aya kátsuntramiayi. 19 Tura nuyanka siati áentsun mátsatkainian, Kanaan nunkanam matsamarmia nuna amukarmiayi. Nú nunkan ii yaunchu úuntrin susataj tusa Yus túramiayi. 20 Nuyanka ii uuntri akupniurín, juís tútain, anaikiamiayi. Tura chikichan ukunam anaiki anaiki wémiayi. Nuna tura túraakua kuaru siántu senkuenta (450) uwí ejemiayi. Samuersha Yúsan etserin náamtsáin nuna túrimiayi Yus. 21 Tura nuyanka áencha juísan nakitiainiak, uunt akupin náamkat tusar Yúsan seawarmiayi. Tuíniakui Yuska Sesa uchirín Saúran anaikiamiayi. Nú Saúra úuntriníak Pinjamínkiauyayi. Tura Saúrsha kuarenta (40) uwí nú áentsun akupkat tusa Yus tsanatkamiayi. 22 Tura Saúr náamkan ataksha Yus awainkimiayi. Tura nuyá iiksán nú nunkanam uunt akupin atí tusa Tawitian anaikiamiayi. Tura Yuska juna Tawitnian tímiayi “Isaí uchirín Tawitian winia enentáir jeamtai achirmakjai. Tura Winia umirtin átatui” tímiayi. 23 Wats, Tawit weeanmaya Jesusaiti. Tura Yuska Israer-aentsun Uwemtikrartinian Jesusan anaitiukmiayi, yaunchu timiarín uminkíat tusa. 24 Jesuska táatsáin Juan ashí Israer-shuwaran tunaaríníak enentáimtumar imiantinian ujakmiayi. 25 Tura Juansha ni jákatniuri jeatemamtai, chichaak “Átum enentáimtarmena núchaitjai. Wikia Yusa anaikiamurí, Kristu tutai, nákarmena núchaitjai. Antsu Nínkia winia ukunmaruí winittiwai. Tura Niisha wíjiainkia ti nankaamantu asamtai wikia sapatríncha atitrataj tíchamniaitjai” tímiayi.’

26 ‘Pai, yatsurtiram, Apraám weeatiram, tura ashí Yus ashamkarum umirkaitrumna nu, antuktarum. Ju uwempratin chichamka íniuiti, tímiayi. 27 Iis, Jesusa túrunatniurín Yuska yaunchu ni etserniurín áamtikrachmakia. Tura ukunam Jerusarénumiá shuar ni akupniuríjiaí tuke sáwartin nuna áujeatskesha penké nekaacharmiayi. Tuma ásar Jesuska Yusa Uchirínti tícharmiayi. Tura, jakatí, tiarmia nuí, Jesusa túrunatniurín, Yus yaunchu chichakmia nuna, tímiatrusaran umikiarmiayi, tímiayi. 28 Jesuska penké tunaamkachunak yamaikia mantamnatí tusar Piratun seawarmiayi, tímiayi. 29 Tura Yusa Papirín ashí Jesusnan tímia nuna tímiannak umikiarmiayi. Tura nuyá krúsnumiá itiarar

iwiarsarmiayi. ³⁰ Túramunak Yus jakamunmayaṇ iniantkimiayi. ³¹ Jesuska jakamunmayaṇ nantaki, yaunchu Kariréanmayaṇ Jerusarénnun Niijiaṇ irutka wéarmia nuna núkap tsawantin pujus wantintiukmiayi. Nú shuaraiti yamaikia Jesusa túrunamuriṇ etserainia nu' tímiayi.

³² 'Iisha núnisrik shiir chichaman Yus yaunchu ii apachrṇ tiarmia nu étsereaji. ³³ Iisha Israer-weeá asakrin, Yuska Jesusan iniantkimia nujai ii apachrṇ anajmatramia nuna yamá uminkiaiti. Kame Sarmu Jímiar papinium ju áarmaiti:

“Ámeke winia Uchiruitme.

Túmaitkiui yamaikia winia iwiaakmar susamuitme.”

³⁴ Tura Yuska Jesusa nantakmiarṇ jintintiak, tura ni ayashṇ káurchatniun jintintiak, chíkich Sarmu papinium juna áamtikramiayi:

“Nekas péṇkeran Tawitian anajmatramaj nuna atumin amas-tatjai.”

³⁵ Tura nú arant, nú paant atí tusa, chíkich Sarmu papinium ju aarma awai:

“Yusa, ame Uchiram aneamna nuna ayashṇ káurtincha tsankatkashtatme.”

³⁶ 'Nekaatarum, yatsurtiram, Yuska Tawitia ayashṇ tichamiayi nuna. Tawitkia Yus tímian amuk jakamiayi. Túrasha ni ayashṇkia káurmiayi. ³⁷ Tura antsu Yus iniantkimia nuna ayashṇkia penké káurchamiayi. ³⁸ Tuma asamtai, yatsurtiram nekaatarum. Jesusjainkete tunáa asakártin. ³⁹ Tura Muisais yaunchu akupkamia nujai tunáa tsankurnarchamnia nu, yamaikia Jesusjai tsankurnartiniaiti. ⁴⁰⁻⁴¹ Yúsna etserin juna áarmiayi:

“Enentáimpratarum wishikkiartintiram. Ashamkatarum. Túrarum menkatumpratarum. Wi Yus asan, átum pujarmena nui, aents túrachminian túratajna nusha penkesh nekaashtatrume, chíkich ujatmainiakuisha.”
Tu áarmaiti.

Tuma asamtai yatsurtiram, aneartarum atumin nuna túrutmawairum, Yusna etserin aarma tana nútiksana. Nuna chichaak amukmiayi Papru.

⁴² Tura nuyá Papru Pirnapíjiaṇ jiinki wéenakui aents chichainiak “Chíkich sáwartincha jútiksarmek etserkatarum” tiarmiayi. ⁴³ Tura nuyá iruntsua tsenkeenak Israer-shuarsha, tura chíkichkia Israer ajasarusha, Yúsna umirkatajtsa wakeriarmia nuka, Páprun Pirnapíncha nemarsarmiayi. Niisha nu áentsun chicharuk “Yusa anenkrattairṇ enentáimtusum kakartarum” tiarmiayi.

44 Tura chíkich sáwartinkia nu péprunmaya ti untsurí aents Yus-Chicham antuktai tusar tuakarmiaiyi. 45 Tura Israer-shuarka ti untsurí áentsun tuakarun wáinkiar, suir iiniak, ti kakerkarmiaiyi. Tuma asamtai Páprun katsekkar “Ju chichaana júka ántar tawai” tiarmiaiyi. 46 Támaitiat Pápruka Pirnapíjiai arantutsuk chichainiak tiarmiaiyi “Israer-aentstirmin, atumin emka Yus-Chicham ujaktiniuji. Túrasha átum támaitiatrum nakitramarme. Tura atumsha nakitia asarum, Yúsnum tuke iwiaaku pujuscharnia ajasurme, tímiayi. Tuma asamtai iikia yamaikia Israer-aencha ujaktai tusar weraji, tiarmiaiyi. 47 Nu túratarum tusa, Uunt Yus akuptamtsujik. Jes, ni Papiríin júna tawai:

“Israer-shuarcha Winia nekarawarat tusan anaitiukjame.

Tura ashí nunkanmaya aents uwemprarat tusan akuptajme.”

Tu áarmaiti” tímiayi. 48 Nú chichaman antukar Israer-shuarcha ti wararsar “Uunt Yus tana nuka imiá péñkeraiti” tiarmiaiyi. Tura, tuke iwiaaku pujusmin armia nu Yus-shuar ajasarmiaiyi. 49 Tú tumakí Yus-Chicham nú nunkanam ashí jamarmiaiyi. 50 Túrasha nuwán, Yúsán péñker enentáimtuinian tura péñker wekainian, Israer-shuarka yajauch enentáimtikrarmiaiyi. Áishman penkerí ármia nunasha, yajauch enentáimtikrarmiaiyi. Túram Páprun Pirnapíncha katsekkar, chichaman irunturar najatawarmiaiyi. Túturukiar ni nunkeya jiki awemarmiaiyi. 51 Túram Papru Pirnapíjiai, ju aentska yajauchiiti tusar, wéenak naweyan nunkan akakekiar ikiukiarmiaiyi. Túrawar Ikiuniu péprunam wearmiaiyi. 52 Yusa Wakanísha pimiútkamu ásar Yus-shuarka ti warasarmiaiyi.

14

Ikiuniu Péprunam túrunamia nu

1 Ikiuniu péprunam Papru Pirnapíjiai jeawar Israer-shuar iruntai jeanam wayawarmiaiyi. Túrunawar Yus-Chichaman etserkarmiaiyi. Túram ti untsurí Israer-shuar ármia nu, Israer-shuarcha ármia nuscha Yúsán umirkarmiaiyi.

2 Tura chíkich Israer-shuar, Yúsán umirkacharu ármia nu, Yus-shuwaran kakerkarat tusar Israer-shuarchan yajauch enentáimtikrarmiaiyi. 3 Tuma asamtai Papru Pirnapíjiai nú núñkanam ti nukap tsawant pujusarmiaiyi. Tura Uunt Yúsán enentáimtuinia ásar, arantutsuk Yusa waitnenkratairín etserkarmiaiyi. Tura, etserinia nu winia kakarmarjainti tusa, Yuska aents túrachminian najanmamtikiawarmiaiyi.

4 Tura Ikiuniunmaya aentska jímiar kanakarmiaiyi. Chíkichkia Israer-shuar tuinia nu nekasaiti, tiarmiaiyi tura

chíkichkia Jesusa akatramurí tuinia nu nekasaiti, tiarmiayi. ⁵ Tura nuyá Israer-shuarchajai Israer-shuarka chichasar pepru uuntrijiai chichasarmiayi. Tura Papru Pirnapíjiai katsekkar tura kayajai tukurar, yajauch awajsatniun nan̄kamawarmiayi. ⁶ Túrasha Papru Pirnapíjiai nuna anturmamkar, Ristra péprunam wearmiayi. Nuyasha Tirpi péprunam wearmiayi. Nu péprusha mai Rikiaunia nun̄kanam pujuiniawai. ⁷ Tura Yus-Chichaman etserkarmiayi.

Ristra péprunam Páprun kayajai tukurarmiania nu

⁸ Ristra péprunam tunamaru áishman̄ pujumiayi. Ni akiinia-muriya tuke wekaichauyayi. ⁹ Nú áishman̄ Papru chichaamun antúu pujumiayi. Túman Papru úmamkemas nin íismiayi. Ni-isha, Yusa kakarmaríjiai tsuamartatjai, tu enentáimiun Papru nekaamiayi. ¹⁰ Tura Pápruka kakantar chicharuk “Wajakim wewe ajasam wajasta” tímiayi. Tutai áishman̄ wiut kutsuar wajaki wekaimiayi. ¹¹ Papru túramia nuna aents wáinkiar Rikiaunia chichamjai un̄sumainiak “Yuska áishman̄ka áanin ajasaru in tarutramarji” tiarmiayi.

¹² Pirnapínkia, Júpitir náartin yúsaiti, tiarmiayi. Tura Páprunka, Mirkiuriu náartin yúsaiti, tiarmiayi. Pápruka chichau asantai tu anaikiarmiayi. ¹³ Nú pepru jeamunam Júpitir náartin yusa jeen̄ pujumiayi. Tura Júpitir náartin yusa pátriri kukujin̄ iwiarkamun, wáakajai itiamiayi. Tura niisha ni áentsríjiai wáakan maatai tusar pujuarmiayi. Tura tikishmatrar ajamsatai, tiarmiayi. ¹⁴ Tura Jesusa akatramurí Pirnapísha Páprusha nuna nekaawar, auka nakitiai tusar, ni pushirin̄ jaararmiayi. Túrawar aents írunmanum pachiniawarmiayi. ¹⁵ Tura tiarmiayi “Shuara, ¿urukamtai áitkiarum? Iisha yúschaitji. Atumea áankiitji, tiarmiayi. Pen̄ké ántrarum túrarmena nu ikiukrum, nekas Yus nemarsatarum tusar iisha taji. Nekas Yuska nayaimpincha, nun̄kancha, nayaantsancha, tura ashí nui írunna nunasha najanaiti, tiarmiayi. ¹⁶ Jes, aents ni enentáimmiaríjiajin̄ wekasarat tusa Yuska yaunchu tsan̄katkamiayi. ¹⁷ Tuma ain̄ shuaran pen̄ker awajsamujai Wiitjai Nekas Yus tusa paant awajmamsamiayi. Kame yumi yutuktinian̄ nayaimpinmayā akupturmaji. Tura ejemamar warasarmí tusa yurumak nerektinniasha súramji” tímiayi.

¹⁸ Túrasha Pápruka tímianu támaiat, nuna anturtsuk wáakan maawar nin tikishmatrar ajamsataitsa wakeriarma nuna suritkiachminiak suritkiarmiayi nu áentsun.

¹⁹ Tura nuyá Antiukíanmayā Ikiuniunmayasha Israer-shuar táarmiayi. Taar nuyá áentsun Páprun yajauch awajsatniun enentáimtikrarmiayi. Tú tutai Páprun kayajai tukurarmiayi. Tura jakayi tiar péprunmayā japiki júkiar arant áepsarmiayi.

²⁰ Túrasha Yus-shuar Páprun tariar téntakarmiayi. Túram nuñkia Papru wajaki wé ataksha péprunam wayamiayi. Tura kashin tsawarar Papru Pirnapíjiai Tirpi péprunam wearmiayi.

²¹ Tírpinium pujusar uwempratin chichaman etserkar-matai untsurí shuar Yúsan umirkarmiayi. Nú shuaran Yus-Chichaman jintintia amuukar Rístranam, Ikiuniunam, Antiukíanmasha waketkiarmiayi. ²² Waketainiak “ashí Yus tana nu tímiatrusrumek tuke umirkatarum” tuíniak Yus-shuaran ikiakáarmiayi. Tura nin tiarmiayi, “Yusa akupeamuriin pachiinkiataj tákurkia ti wáitsatniuitji.” ²³ Tura Yus-shuar írunmanum Yus-shuaran wáinniun anaikiarmiayi. Yurumtsuk Yúsan áujсар chicharainiak, “umirkarumna nú Yus iirmasarti” tiar ikiukiarmiayi.

Yaunchu jíinkiarmla nú Antiukíanam waketkiarmiayi

²⁴ Nuyá Pisitia nuñkanam nankaamakiar Pampiria nuñkanam jeawarmiayi. ²⁵ Nuí jeawar Pirji péprunam Yus-Chichaman etserkar nuyá Ataria péprunam wearmiayi. ²⁶ Nuí kanunam enkemprar, yaunchu jíinkiarmla nú Antiukía péprunam waketkiarmiayi. Páprusha Pirnapísha tuke jíintsaiñ nú Antiukíanmayá Yus-shuar chichainiak, Yusa takatri túrattarmena nuna Yus waitnentrarak yáinmakarti, tiar akupkarmiayi nuiki. ²⁷ Nú Antiukíanam jeawar, Yus-shuaran irurar, ashí Yus nin yáinkiarmla nuna ujakarmiayi. Tura nútiksai Israer-shuarchan Uunt Yus uwemtikrataj tusa untsukmla nunasha ujakarmiayi. ²⁸ Tura nuyá Yus-shuarjai Papru Pirnapíjiai núkap tsawant pujusarmiayi.

15

Jerusarénum Yus-shuara úuntriíjai iruntrarmiania nu

¹ Nu tsawantin áishman Israer nuñkanmayá wear, Antiukíanam jeawar Yus-shuaran jintintiainiak “Muisais tímia nútiksarmek tsupirnaktin ana nu túrachkurmeka uwemprashtatume” tiarmiayi. ² Tuma asamtai Papru Pirnapíjiai, núchaiti tusar, nú áishmanjai ti kakaram chicharnaikiarmiayi. Túrasha nuu enentáiniak enentáimsatniun tujinkiarmlai. Tuma asamtai Antiukíanmayá Yus-shuar Páprun Pirnapíncha, atumsha chíkich áentsjai Jerusarénum wétarum tusar akupkarmiayi. “Tura nuí Jesusa akatramurísha Yus-shuaran wáinniusha iniasrum iturmainkit tusarum péñker nekaatarum” tiarmiayi. ³ Papru Pirnapísha akupkamu ásar wéenak Pinisia nuñkanam, Samaria nuñkanmasha nankaamainiak Israer-shuarcha Yus-shuar ajasman Yus-shuaran ujakarmiayi. Tura Yus-shuarsha nuna antukar ti warasarmiayi.

⁴ Tura Páprusha Pirnapísha Jerusarénum jeawarmatai Jesusa akatramurisha Yus-shuara wáinniurisha tura penké Yus-shuarsha itiawarmiayi. Tura niisha túrunamia nuna mash etserkarmiayi. ⁵ Túrasha Paríséu aencha, Yus-shuar ajasarmiania nu, wajakiar chichainiak “Muisais tsupirnaktinian akupkamia nuna tura nú arant ashí Muisais tímia nunasha Israer-shuarchasha umirkatin áiniawai” tiarmiayi. ⁶ Nuyasha Jesusa akatramurisha Yus-shuaran wáinniusha nu chichaman nekaatai tusar iruntrarmiayi. ⁷ Chichasua umikiarmatai Pítiur wajaki tímiai, “Yatsurtiram, Yus nuik winia chichartak “Israer-shuarchasha winia chichamprun antukar umikiarat ujakarta” tu anaitiukmia nu nékarme. ⁸ Tura Yus Nínki ashí aentsu enentáin neka asa, Wíi shuar ajasmin áiniawai tusa, ni Wakanin Israer-shuarchancha susamiayi, in suramsamij nútiksā. ⁹ Yus incha aushatka awajtamsachmaji, tímiai. Antsu métekraketji. Tuma asamtai niisha Yúsān enentáimtuiniakui, Yuska enentáiyān ni tunaarīn japirarmai, tímiai. ¹⁰⁻¹¹ Tura iikia nékaji níiya áantsarik Jesukrístu waitnenkartutairijiai uwempraitji. Nuínkia ģurukamtia Yus uwempraru áiniawai taisha, átum Muisais yaunchu akupkamia nu umikiarat tusarum wakerarum? Nu túrakrumka Yus túrana nu jeatsui tarume. Tura nuka kaarka áintsānchakaait. Warí, ii úntrisha tura iisha ashí Muisais tímia nu umiktin tujinkiamji. Tuma asamtai, ģurukamtai nú káarkasha Israer-shuarchasha áentskatin wakerarum?” tímiai Pítiur.

¹² Pítiur nuna tutai Pirnapísha Páprusha chichainiak, “Israer-shuarchasha ni kakarmarīn nekaawarat tusa aentsti túrachminian túratniun Yuska ti yáinmakmaji” tú ujuam mitiat wáinkiar antúu pujuarmiayi. ¹³ Nuna ujasua amikmatai, Jakupusha tímiai “Yatsurú, antuktarum. ¹⁴ Nuik túrachman Yus túramia nuna ii yachi Semuñ Pítiur ujatmakji. Júiti: Yuska Israer-shuarcha waitnentak Winia ajasarat tusa chikishtarchiniak achikiuiti” tímiai. ¹⁵ Jusha Yúsān etserin yaunchu áarmia nu tímiatrusān túrunayi. Júiti aarma:

¹⁶ “Israer-aents meserar, jeā sáanakniua áintsān áiniawai. Tura ukunam ataksha tana, Tawitia jeēn sáanaki ana nuna, ataksha najanattajai. Juakai nuna achikian ataksha awajrattajai. ¹⁷ Ashí nunkanmayā aents, Israer-shuarcha ainia nu, winia náarun pachinia nu, Winia eātkarat tusan túrattajai. ¹⁸ Uunt Yus nuna yaunchu ujakmiayi.”

Tu áarmaiti’ tímiai.

¹⁹ ‘Tuma asamtai, yatsurtiram, wi tájarne: Israer-shuarcha Yus-shuar ajasaru áiniana nu, imiatik awajsachmi. ²⁰⁻²¹ Iimiatarum, ashí péprunam Israer-shuar iruntainiam yáunchuyān tuke sáwartin Muisaisa áarmarīn jintintiainiatsuk.

Tuma asamtai, áyatik áatratai ju “Ántar-yus susamu ana nu iniaisatarum. Ántar-yusan susamu asamtai yajauchiiti. Tura tsanirmawairap. Tura kajemtikramua nu yuawairap. Tura numpasha umarairap.” Tu áatratai’ tímiayi Jakupu.

²² Nuyá Jesusa akatramurisha Yus-shuaran wáinniusha nuyá ashí Yus-shuaraim enentáimsarmiayi. “Papru Pirnapíjiaí wéakui, shuar níijiaí nenakar Antiukíanam akupkatai” tiarmiayi. Tuma ásar Jútas Parsapasan, Sérasnasha anaikiarmiayi. Niisha mai uunt Yus-shuar áirmiayi. ²³ Tura níijiaí ju papin áarman akupkarmiayi:

“Iisha Jesusa akatramuri tura Yus-shuara wainniuri tura ashí Yus-shuaraitjinia nu, atumin Israer-shuarcha árumna nu, Antiukíanam, Sírianam, tura Sirisianmasha, ju papí akupeaji. ²⁴ Juyá aents ii chichamejainchu atumíin jeartamarai. Túrawar, tsupirnaktin ana nu, tura ashí Muisais akupkamia nu túratarum, turammiarme. Nunasha ni chichamejain turamarmayi. Nu chicham atumsha antukrum nushá enentáimprarum “entá nuyanka itiurkatjik” tárume. ²⁵ Tuma asamtai nu nekaar, iisha métekrak enentáimsar, jimiara áishman akupkatin anaikiamji. Ju áishman ii aneamu yachi Páprujai Pirnapíjiaísha atumin írmasarat tusar akupeaji. ²⁶ Papru tura Pirnapísha ii Uuntri Jesukristunam surumakarmiayi, ni takatrisha tsuumai ain túrami tusar. ²⁷ Níijiaí Jútassha tura Sérassha akupeaji. Ii chichaaajnia nuna niisha ni wenejai atumin ujatmakartatui. ²⁸⁻²⁹ Kame túratin asamtai iisha Yusa Wakanjiaí ju áartin enentáimsaji. Naman ántar-yus susamu ana nu yuawairap. Tura numpasha umarairap. Kajemtikramu ana nusha yuawairap. Tura penké tsanirmawairap. Nuyasha chíchichkia nú nankaamas tíchattaji. Tura antsu nu iniaisarmeka, péñker áatrume. Ayu, Yus wáitmakarti.” Tu áarman akupkarmiayi.

³⁰ Tura Antiukíanam akupkam wearmiayi. Nui jeawar Yus-shuaran irurar, papin súsarmiayi. ³¹ Tura Antiukíanmaya Yus-shuarsha nu papin áujsar, péñker jintíamu chichaman áarman wáinkiar, ti shiir enentáimsarmiayi. ³² Tura Jútassha, Sérassha, ímia niisha Yus-Chichaman etserin ásar, Yus-Chichaman núkap jintintiawar, Yus-shuaran ikiakáarmiayi. ³³ Tura nui ishichik tsawant pujusarmatai, Yus-shuarka, péñker waketkitiarum, tiar akupkarmiayi. ³⁴ Tura Séras juáktinian wakerukmiayi. ³⁵ Páprusha Pirnapíjiaí juakarmiayi Antiukíanam. Niisha chíchich aentsjai Yus-Chichaman étseruk pujuarmiayi.

Papru atak Yus-Chichaman ipiampártasa wémiania nu

³⁶ Nuyá ukunam Papru tímiayi Pirnapín “Ashí péprunam iisha Yus-Chicham etserkamaj nui Yusaj ii yachí ainia nusha urukák pujuinia iyutai” tímiayi.

³⁷ Pirnapíkia Juan Márkusan iijjai winiti tusa wakerimiayi. ³⁸ Tura Pampiria nunkanam Juan Márkussa niisháa weu asamtai tura Yusa takatrín iniaisa asamtai, Pápruka ayatniun nakitramiayi. ³⁹ Papru Pirnapíjjai ti kakannairar kanakarmiayi. Tura Pirnapíkia Márkusan ayaki Chípriniam wémiayi. ⁴⁰ Pápruka Sérasan ayaki wéakui Yús-shuar Yus yáinmakarti tinia akupkarmiayi. ⁴¹ Tura Siria nunkanmaani wekaráktak, Yus-shuaran ikiakárkutak Sirisianam jeamiayi.

16

Páprusha Sérasjai Timiutéun júkiarmiania nu

¹ Papru Sérasjai Tirpi pepru írkutak Ristra péprunam jeawarmiayi. Tura nui Rístranam Yus-shuaran wáinkarmiayi, ni naari Timiutéu. Ni nukurínkia Israer-shuar Yus-shuarauiayi. Tura ni aparínkia Kriaku áentsuyayi. ² Tura Ristra péprunmaya Ikiuniu péprunmayasha Yus-shuar ármia nu, Timiutéu péñker wekaawai, tiarmiayi. ³ Kame Pápruka Timiutéun uyuuntusat tusa wakera asa, Timiutéu aparí Kriaku-apachin nekaawarmatai Israer-shuar nui pujuarmia nu yajauch enentáimprarain tusa tsupirmamtikiamiayi. ⁴ Tura nuyá Papru Timiutéujai ashí péprunam nui sétur nui sétur wéenak Jesusa akatramurisha Yus-shuaran wáinniusha Jerusarénum nuik jintintian umiktarum tusa ujarkutak wearmiayi. ⁵ Tu ujamu ásar Yus-shuar nú arant Yúsán enentáimturar kakararmiayi. Tura ashí tsawant kawenki wearmiayi.

Papru iimiarmia nu

⁶ Tura Yusa Wakaníkia Páprun Yus-Chichaman Asia nunkanam ujaktinian tsankatkachmiayi. Tuma asamtai Pirijia nunkanam tura Karasea nunkanam airkutak, ⁷ Misia nunka jeatniunam jeawarmiayi. Túrunawar “Pitinia nunkanam wetai” tiarmiayi. Túrasha Yusa Wakaní nuisha wétinian suritkiarmiayi. ⁸ Tuma asamtai Misia nunkanam menantki Truas péprunam pachiniawarmiayi. ⁹ Nui jeawar Papru kashi iimiarmiayi. Masetúnia nunkanmaya áishman kan wajan wáinmiayi. Nu áishman Páprun chicharuk “Winitritia. Yáintkiamnium” tímiayi. ¹⁰ Nuyanka tu iimiarmatai, wisha Páprujai wetai tusar iwiarnarmiaji. Tura Yus incha nú nunkanam ni chichame etserkat tusa ti nekas untsurmakrin wéaji, tímiaji.

Jiripius Péprunam túrunamia nu

11 Tura nuyanka kanunam enkemprar Truas péprunmaya jínkir Samutrásia nunkanam jeamiaji. Tura kashin tsawar nuyanka katiarar Niápuris péprunam jeamiaji. 12 Tura Niápurisnumia náwek Jiripiusnum jeamiaji. Nui Jiripius péprunmanka Rúmanmaya aents matsamsa ármiai. Tura nú péprusha Masetúnia nunkanam nekas uunt pepruyayi. Tura nuisha seturmaji. 13 Nuyá sáwartin tsawarmatai pepru ik-iukir entsá supichik wémiai. Yus áujsatniun iruntrarmia nui pujasar, nuwá iruntrarmia nu Yus-Chicham ujakarmiaji. 14 Nui Tiatira péprunmaya nuwá, ni naari Ritia wáinkiamiaji. Niisha tarach yamakain péngeran súriniuyayi. Yúsnasha shiir awajniuyayi. Yus-Chichaman Papru etserkamia nuna niisha pénger anturkamiayi. Túman, Uunt Yus Papru chichaamun umirkat tusa ni enentáin takasmiai. 15 Túruna nú nuwá níniurijiai imianmiayi. Tura nuyasha chichaak “Yus-shuar nekas ajasai túrutkurmeka winia jearuí winitiarum” tímiayi. Tura nui jeawakrin setumtikrampramiai.

16 Tura nuyá ukunam Yus aujsatai tusar wekaamar nuwach nekaamin-iwianch enkemtuamu inkiunmakmiaji. Nu nuwachikia misatkauyayi. Niisha nékamkui nérenniurisha ti kuitriniawarmiai. 17 Tura nú nuwach incha Pápruncha pataaturmamiayi. Tura kakantar untsumuk “Ju áishmansha nekas Uunt Yúsán umirkaru áiniawai. Tuma asa niisha atumin uwempratin chichaman ujatmarme” tímiayi. 18 Tura nú nuwachisha ti núkap tsawant tu wekaimiai. Titmakui, Papru ayanmar iwianchin chicharuk “Jesukristu naarijjai tájame: jínkitiá ni enentáiya” tímiayi. Tutai íwianchkia nú chichamaik jiinkimiayi.

19 Tura nuwachi nérenniurisha, íwianch jiiki awematniun nekaawar, Páprun Sérasnasha kajerak achikiar pepru uuntri ísarat tusar ajapén júkiarmiai. 20 Tura pepru úuntriin ejeniar tiarmiayi “Ju áishman Israer-shuar áiniawai. Tura in páchim enentáimtikramainiai. 21 Tura iisha Rúmanmaya aents árin, ii túrachminian, iikia asumprachman jintintramainiai” tiarmiayi. 22 Tura nuyanka ashí aents Páprun Sérasnasha kajerarmiai. Túramtai pepru uuntri chichainiak “Pushiri áitkiarum numijjai asutiátarum” tiarmiayi. 23 Tura nuyá ti asutsua amikiar sepunam enkeawarmiai. Tura sepú-iinian chicharuk “Ti pénger iistá pisararain” tiarmiayi. 24 Nu chichaman antuk, sepú-iin ti init awayámiayi, tura nawen numi najanamujai tee chanuntamiayi. Tú tura ikiukmiayi. 25 Tura kashi ajapén Papru Sérasjai Yusan áujainiak kantampriarmiayi. Tura chíkich enkeamussha nuna antúu pujuarmiayi. 26 Tu pujuiniiai aya aneachma ti kakantar uurkamiayi. Tura sepusha mu-chitramiai. Túrunamtai sepú wáitirisha ashí urantrarmiayi.

Tura aents jirujai enkekar jinkiamusha mash atiniakarmiayi. ²⁷ Túrunamtai sepú-iin shintiarmiayi. Tura wáitisha mash uranar aan wáiniak, enkeamusha jiiinar shiákchariash tusa ni puniariniak ukuiniak máamattsa pujumiayi. ²⁸ Tura Papru untuak “Amek yajauch awajmamsaip. Ashí pujuiniaji” tímiayi.

²⁹ Tutai sepú-iincha jinia ekeemak tsékenki wayamiayi. Tura Papru Sérasjai pujamunam kuranki jearmiayi. ³⁰ Tura aa jiki aniasmiayi “Uunta, ¿warí itiurkattaj uwemprataj tusana?” tímiayi. ³¹ Tutai niisha tiarmiayi “Unt Jesukrístu nekas enentáimtustá. Túrakmeka amesha, tura áminiurmasha uwemprattarme” tiarmiayi. ³² Tura nuyá ashí ni jeen pujuarmia nunasha Yus-Chichaman ujakarmiayi. ³³ Tura tsawant irankai sepú-iincha Páprun Sérasjai numpamnamurin nijiararmiayi. Túramtai nuyasha sepú-iincha nuarijiai uchirijiai imianiarmiayi. ³⁴ Túramtai nuyasha ni jeen júkiarmiayi. Tura nuisha ayurawarmiayi. Tura sepú-iincha niiniurijiai Yus-shuar ajasu ásar ti shiir warasarmiayi.

³⁵ Kashin tsawar pepru uuntri, Páprun Sérasjai akupkata tusar suntaran sepú-iinian akuptukarmiayi. ³⁶ Tura nuyanka sepú-iin Páprun tímiayi “Yamaikia pepru uuntri chichaman akupturmakai, átum wétinian. Tuma asamtai yamaikia péngerak jinkitiarum” tímiayi. ³⁷ Túrasha Papru suntaran chicharuk tímiayi “Warí, iisha Ruma aents árinin, niisha chichaman iwiartsuk ashí shuar ímiainiajin asutiámamji. Túrawar sepunam enketmamji. Tura ¿urukamtai yamaikia uk akuptamkataj tusa wakeruinia? Atsá. Antsu uuntcha ninki taar jiiirmaktiai” tímiayi.

³⁸ Tutai suntarsha waketkiar nuna ujakarmiayi pepru úuntrin. Tutai niisha ti ashamkarmiayi Ruma aentsun nekaawar. ³⁹ Túmak ashamainiak Páprun Sérasan weriarmiayi tsankurturtarum titiai tusar. Nuyasha sepunmaya júkiar “Yamaikia wáitneasrum wetarum” tiarmiayi. ⁴⁰ Papru Sérasjai nuyá jinkiar Ritia jeen wearmiayi. Tura Yus-shuaran ikiakárar ikiukiarmiayi.

17

Tisarúnikianam charaatum ajarmia nu

¹ Papru Sérassha wéenak Ampipuris péprunam Apurunia péprunmasha nankaamakutak Tisarúnikia péprunam jeawarmiayi. Nuí Israer-shuara iruntai jee ámiayi. ² Tura Pápruka nuna tuke túrin asa nu jeanam wémiayi. Tura nuisha menaintiu sáwartin Yus-Chichaman paant etsermiayi. ³ Tura Páprusha Yus-Chicham tana tímiatrusan jintintiarimiayi. Tura Krístusha wáitias jákatniuyi, tura nuyasha jakayat

nantaktiniuyi, tímiayi. Tura nuyasha chicharuk “Wi Jesusnan atumin ujaajrumna nusha Yusa anaikiamurin Kristu tútain tájarme” tímiayi Papru.

⁴ Nuna takui Israer-aents chikishtarchik umikiarmiayi. Túrawar Paprujaj Sérasjaisha tsanin̄kiarmiayi. Tura Kriaku aencha ti untsurí Yúsan umirkarmiayi. Tura nuwá penkeri armia nusha nútiksaran̄ umikiarmiayi. ⁵ Tura Israer-shuarka Yus-shuar ajascharmia nu, Páprun Sérasnasha suiir ísarmiayi. Túrawar chíkich yajauch áishman̄ naki yujáu armia nujaj chichasar nu peprunam charáa charáa ajarmiayi. Tura Páprun Sérasnasha achikiar aentsu úuntrin̄ suruktai tusar Jasunka jeen̄ árenkarmiayi. ⁶ Túrasha Páprun Sérasnasha awe-trar, Jasunkan tura chíkich Yus-shuarnasha achikiar japirkutak júkiarmiayi. Tura pepru úuntrin̄ juíniak tiarmiayi “Ju áishman̄sha ashí nun̄kanam charaatum ajá wekarmia nu yamaikia tímiyajaj tarutramarji. ⁷ Tura ju Jasun̄ ni jeen̄ itiaarmiayi. Tura niisha ashí mash Rúmanmaya uunt akupniu chichamen̄ nakitiainiawai, tiarmiayi. Tura jes, chíkich akupin̄ awai, tuiniawai. Niisha Jesusaiti, turamainiaji” tiarmiayi. ⁸ Nu chichaman antukar, aents nuī pujuarmia nu, úuntrimiak charaatum ajarmiayi. ⁹ Tura Jasun̄ chíkich Yus-shuarjaj Papru nekas awemattaji tusar, pajj, kuit ikiuaji, tiarmiayi. Nuna takui pepru uuntrī nin̄ akupkarmiayi.

Piríanam

¹⁰ Nuinkia nú kashi Yus-shuar Páprun Sérasnasha Piríá péprunam akupkarmiayi. Tura nuī jeawar Israer-shuar iruntai jeanam wearmiayi. ¹¹ Piríanmaya aentska Tisarúnikianmaya áentsjain̄kia nan̄kaamas penker enentáimkia ármiai. Tuke enentáijijaj Yus-Chichaman ántiarmiayi. Túrawar tuke tsawant imia nin̄kisha Papru tana nuna nekasashit tusar Yusa papirin̄ ii wearmiayi. ¹² Tuma ásar untsurí shuar Yus-shuar ajasarmiayi. Tura Kriaku aents nuwá penkeri armia nusha áishman̄sha umikiarmiayi. ¹³ Túrasha Tisarúnikianmaya Israer-shuarka Papru Yus-Chichaman Piríá péprunam étserun antukar nuī weriar charaatum awajiarmiayi. ¹⁴ Túmainiakui Yus-shuar Páprun árutsuk nayaantsanam akupkarmiayi. Tura Séraska Timiutéujaj nuīn̄ Piríanam juakarmiayi. ¹⁵ Tura Páprun nemariarmia nu Atenas péprunam nin̄ ejeyarmiayi. Tura niisha waketainiakui, Papru chichaman akatar akupkamiayi, Sérassha Timiutéusha wárik winiartí tusa.

Atenasnum

¹⁶ Tura Papru Atenas péprunam pujus Sérasnasha Timiutéuncha nákamiayi. Nuī nú péprunam ántar-yus ti írunkui Páprusha kúntuts enentáimmiayi. ¹⁷ Tuma asa Israer-shuar iruntai jeanam Israer-shuarjaj tura chíkich aents

Yúsan enentáimtiarmia nujai chichasmiayi. Tura tuke tsawant pepru ajapén aentsjai inkiunaikiar chichasarmiai. ¹⁸ Nuyá chichaman jintin chíkich naari, ipikiuriu, armia nu, tura chikichcha, ni naari, estuikiu, armia nusha Páprun áujmatsarmiai. Chikichcha tiarmiayi “Imiá chichamtincha jusha waritramtajik.” Tura chikichcha tiarmiayi “Yajaya yusnan etserniuchuashit.” Páprusha Jesusa túrunamuriñ tura aents jakamunmaya nantaktinian étserkui nuna tiarmiayi. ¹⁹ Nuyanka aents iruntainiam, naari Ariupaku támanum Páprun júkiarmiayi. Nuisha tuke irunin ármiai. Nui Páprun aniasarmiai “Iisha ame yamaram támena nu nekaatai tusar wakeraji, tiarmiayi. ²⁰ Amesha nusháa chicham jintiniaitme. Túmaitkiui ju chichamsha warintiuak tusar nekaatai tusar wakeraji” tiarmiayi.

²¹ (Atenasnumia aencha tura chíkich nunkanmaya shuar nui pujuarmia nusha aya yamaram chicham amia nunak ántiarmiayi. Tura aya nunak áujmatiarmiayi.) ²² Nuyanka Papru Ariupakunam ajapén wajaki tímiayi “Atenasnumia áishmanñtiram, wi nékajai, atumsha atumi yusri ainia nuyá tsurakchamniaitrame, tímiayi. ²³ Kame wi nuik atumí yusri enentáimtutainiam ístaj tukaman nui jeachin iwiaramun, JU NEKAACHMA YUSNAITI, tu áarman wáinkiamjai. Wátsek, ju Yus átum nékachiatrum tikishmatrumna nuna ujaktajrume’ tímiai.

²⁴ ‘Nekaatarum, nu Uunt Yuska ashí nunkan tura nui íranna nuna najanaiti. Tura Niisha nayaimpin nunkancha nérenniurinti. Tura aents najanamun jeanam nú Yuska pujuchuiti. ²⁵ Niisha aents yáinkiat tusa atsumatsui. Warí, imia-niñki Niisha ii iwiaakmarin, ii mayattairincha tura ashí íranna nunasha súramtsujik, tímiayi. ²⁶ Nekaatarum. Nu numpanmayanak ashí áentsun najanamiayi ashí nunkanam matsamsarat tusa. Tura Yuska ii tsawantrin nekapmaiti; ii pujustinniasha nútiksan nakakmiayi. ²⁷ Winia eátkar wáitkiarat tusa Yus nuna túrayi. Túrashá Yus jeashtaka pujurtamtsoji, tímiayi. ²⁸ Jes, iisha Yusjai iwiaakji. Yusjai muchitiaji. Tura Yusjai ii kakarmari takakji. Nútiksan atumí papí-aintri tíchamka “Ashí incha Yus najatmaitji.” ²⁹ Tura iisha Yus najatma asakrin kuri najanamusha, yúsaiti, tu enentáimsashtiniaitji, tímiayi. Tura kuit-yussha, kaya-yussha aents enentáimsar najanamuka, yúsaiti tu enentáimsashtiniaitji, tímiayi. ³⁰ Aents Yúsan nékainiachuk túrawarmiania nuna Yuska yáunchuka pachischamiayi. Túrashá yamaikia Yus ashí aentsun chicharuk “Tunaaruminiá enentáimpratarum” túramji, tímiayi. ³¹ Yuska áishmanñkan anaikiaiiti. Nú áishmanñ ashí aentsti, yáki pénkeran túriniait, yáki yajauchin túriniait núnaka nekarmattaji. Nú áishmanñ

Yus akupkamun tuke enentáimtakui Yus nin anaikiaiiti. Tura tsawant nú túrunatin átatna nuna Yus Nin̄ki achikiuiti. Túrasha nekas anaikiajai tusa, tura ashí áentstiram nekaatarum tusa nú áishman̄kan jakamunmaya iniantkimiai” tímiayi Papru.

³² Tura nuna jakamunmaya nantaktinian áujmatun antukar chikichcha wishikiarmiayi. Tura chíkich “Yamaikia máakete. Antsu chíkich tsawantin antukmí” tiarmiayi. ³³ Tutai Papru iniaisamiayi. ³⁴ Tura chíkich aentska Papru táman umikiar nin nemarsarmiayi. Nūisha Tiuníseu páchitkiauyayi. Niisha Ariupaku áentsuyayi. Tura nuyasha nuwá, ni naari Támaris, tura chíkich aencha nútiksaran̄ nemariarmiayi Páprun.

18

Kurintiu péprunam

¹ Nuyanka Papru Atenas péprun ikiuki Kurintiu péprunam wémiayi. ² Tura nūi Israer-shuaran ni naari Akiran wáinkiamiayi. Akiraka Puntu nuñkanam akiiniauyayi. Tura ukunam Itiaria nuñkanam pujaí uunt akupin Krautiu ashí Israer-shuaran Ruma péprunmaya awemarmiayi. Rúmaka Itiaria nuñkanmaiti. Nūi awemamu ásar Akira Kurintiunam nuik támiayi nuwe Pirisírajai. Tura Pápruka Akiran chichastaj tusa werimiayi. ³ Akirasha Páprusha mai juna takau ármiai, tarach ti núparman jea najantain najanin ármiai. Tuma asamtai Papru Akirai seturmiayi nu takat túrawartai tusa. ⁴ Tura tuke sáwartin Papru Israer-shuar iruntai jean wéuyayi. Nūisha Israer-aentsun Kriaku-aentsnasha nútiksaran̄ Yus-Chichaman ujakar enentáimtikrarmiayi.

⁵ Tura nuyá Séras Timiutéujai Masetúnianmaya táarmatai Pápruka mijiatrutsuk Yus-Chichaman étseruk “Yusa anaikiamuri Kristu, atum nákarmena nu Jesusaiti” tímiayi. ⁶ Tura támaitiat nú chichaman nakitiarmiayi. Túmainiak Páprun katsekkarmiayi. Tuma asamtai Papru, nuñkia ikiuajrume tusa, ni pushirin pear tímiayi “Atumek makuumarme. Tura wikia Yusai makuumatsjai. Yamaikia Israer-shuarcha ainia nuna Yus-Chichaman ujakartaj tusan werajai” tímiayi.

⁷ Tura nuyanka Israer-shuar iruntai jeanmaya jiinki, Yúsan enentáimtin áishman̄ Justu jeen wémiayi. Ni jeenka Israer-shuara iruntai jeen ayamach pujumiayi. ⁸ Israer-shuar iruntai jea chicharniuri, Krispu, Uunt Jesusan nekas enentáimturmiayi. Túruna nuaríjjai uchiríjjaiisha Yúsan umirkamiayi. Tura chíkich aencha Kurintiunmaya armia nu nútiksaran̄ Yus-Chichaman antukar, Jesusan enentáimtusar imianiarmiayi.

⁹⁻¹⁰ Nuyá Uunt Yus Páprun mesekran ipiatkamiayi. Chicharuk “Peñké ímiatik awajtamsachartatui Wi ámijjai

pujakui. Ju péprunmasha untsurí aents Winia ajasartin írunui. Tuma asamtai ashamtsuk winia chichamur tuke etserkata” tímiayi Yus.

¹¹ Tura nuí Kurintiu peprunam jimiara uwí ejesattuk Yus-Chichaman étseruk pujumiayi. ¹² Tura Kariun, Akaya nunka akupniuri anaikiamu ai, Israer-aents Páprun kajerkarmiayi. Tura kajerainiak akupniunam irunturarmiayi. Túrawar Páprun júkiar ejeniarmiayi. ¹³ Tu túrawar akupniun chicharainiak “Ju áishman Yúsan umirkatniun Mui-sais akupkamia núna íkias ausháa jintíawai” tiarmiayi. ¹⁴ Tura Páprusha chichastaj táunak, Kariunka Israer-shuaran tímiayi “Jusha nekas tunáa túrakuinkia, tura akupniun umirchakuinkia, tárumna nuna anturkaintjarne. ¹⁵ Túrash aya chichamnak tura aya náariniak atumí uuntri akupkamia nunak tau asamtai, atumek nuámtak ístarum tájarne. Wikia nu chichamnum pachinkiatniun nakitiajai” tímiayi. ¹⁶ Taku aa júikmiayi. ¹⁷ Tura nuyanka Kriaku aents Israer-shuar iruntai jea úuntrin Sústinisian achikar awatiarmiayi akupniusha ímmianuman. Túrash akupin Kariunka túranak penké pachischamiayi.

Papru Antiukíanam waketki, nuyá atak Yus-Chichaman ipi-ampartasa wémiania nu

¹⁸ Tura ni jeen waketkiarmatai, Papru nu péprunam untsurí tsawant pujusmiayi. Tura nuyasha ukunam Yusai yachi ármiania nuna áujas ikiuak Pirisírajai ni aishri Akirajai Senkrea péprunam wearmiayi. Nuí Israer-shuar túrutain umiak Papru ni intiashin awampramiayi, nuik Yúsan tímiaj nuna yamá umíajai tusa. Nuinkia kanunam enkemprarmiayi Siria nunkanam waketkitiai tusar. ¹⁹ Tura nuyá Ipisiu péprunam jeawar Pápruka Pirisíran tura Akiran ikiukmiayi. Tura Israer-shuar iruntai jeanam wayá Israer-shuar irunar pujuarmia nujai chichasmiayi. ²⁰ Tura niisha Páprun juin pujustá tusar seawarmiayi. Túrash támaitiat, tujintiajai, tímiayi. ²¹ Nuyanka áujas ikiuak “Wisha Jerusarénum námper átatna nuna pachintiuktiniaitjai. Tura Yus akuptakuinkia atak tatajai atumin ístaj tusan” tímiayi. Tura kanunam enkemar Ipisiunmaya júinkimiayi.

²² Nuyá Pápruka Sesaria péprunam jeá, nuyanka Jerusarénum wémiayi, Yus-shuaran nuí áujataj tusa. Tura nuyá Antiukíanam wémiayi. ²³ Tura Antiukíanam ishichik pujus ataksha weak Karasea nunkanam tura Pirijia nunkanmaani wekaráktak wémiayi. Tura weak Yus-shuar matsamarmia nuna chicharak ikiakáarmiayi.

²⁴ Tumáa pujai Arijiántria péprunmaya Israer-aents Apurus Ipisiu péprunam jeamiayi. Niisha Yusa yaunchu papirin ti

pénker nekaamiayi. Etserkatniuncha ti nékauyayi. ²⁵ Uunt Yus tímia nunasha unuimiátrauyayi. Tura tuke enentáijiai chichasmiayi. Jesusa túramurin pénker jintinniuyayi. Túrasha aya Juan imiakratmanak nekaamiayi. ²⁶ Ju Apurus arantut-suk Israer-shuar iruntai jeanam chichamiayi. Tura Pirisíra Akirajai ni étserman anturkar, nincha akanki júkiar Yusa chichamen ni nekaachmia nuna núkap jintintrarmiayi.

²⁷ Nuyá ukunam Apurus, Akaya nunkanam wétaj takui, Ipisiunmayá Yus-shuar yáinkiar papí áarar atakas akupkarmiayi. Nú áentsnum pénkerak jeat tusar túrawarmiayi. Tura Akayanam jeá, nú áentsun Yusa waitnenkratairijiai uwempraru ármia nuna ti yáinkiararmiayi. ²⁸ Tura Apurus Israer-aentsjai paant chichasmiayi. Túrasha Yusa Papirijiai, Jesussha nekas Yusa anaikiamurinti tusa paant jintiák nincha nupetkamiayi.

19

Papru Ipsiunam jeamiayi

¹ Tura Apuruska Kurintiunam pujái Pápruka náinniumaani wekaráktak, Ipsiunam jeamiayi. Tura nuisha Yus-shuaran wáinkiamiayi. ² Tura aniasmiayi “Atumsha Yus-shuar ajasmarmena nui, ¿Yusa Wakaní atumí enentáin enkemturmakaitrum?”

Tutai niisha tiarmiayi “Atsá. Iikia nuka penke áyatkisha ántichuitji Yusa Wakaní awai támaka” tiarmiayi.

³ Tutai Papru aniasmiayi “Entá, ¿nuikia atumsha warí enentáimsarmea imianmiarum?” tímiayi.

Tutai niisha tiarmiayi “Juan jintintramamij nu iisha enentáimsar imianmijai” tiarmiayi.

⁴ Tutai Papru tímiayi “Juansha, tunaarminia enentáimprarum imiantiarum, tíchamka. Nuyá tíchamka, winia ukuruí winittiana nu nekas enentáimtustarum. Niisha Jesus Yusa anaikiamurinti, tu ujatmakchamka” tímiayi Papru.

⁵ Nuna antukar niisha Uunt Jesusa náarin enentáimtusar ataksháa imianiarmiayi. ⁶ Tura Papru ni uwejejai nin antiñmatai Yusa Wakaní tarurarmiayi. Túram chíkich chichamjai chichasarmiayi. Túrunawar Yus-Chichaman etseriarmiayi. ⁷ Nusha tuse (12) áishman ármiai.

⁸ Tura nuisha menaintiu nantutin Papru Israer-shuar iruntai jeanam werí Yusa akupeamurin pachis arantutsuk etsermiayi. Túrak nú áentsun ujaak Yúsnan nekasaiti tu enentáimtikrarmiayi. ⁹ Tura chíkichka ni enentáin ti ikiatsuáarmiayi. Túrunawar umiktinian penké nakitiainia ásar aents ántamunam Yusa jintin penké yajauch chicharkarmiayi. Tuma asantai Papru Yus-shuarnaka akanki yaruak Tiranu

iskuirariin tuke tsawant Yus-Chichaman ujaarmiayi. ¹⁰ Nuna túruki jimiará uwí etserkamiayi. Túramu asamtai ashí Asia nunkanmaya aents Israer-shuar tura Israer-shuarcha Uunt Jesusa túramurin antukarmiayi. ¹¹ Tura aentsti túrachminian túrat tusa Yuska ni kakarmarin Páprun susamiayi. ¹² Jáanchniasha pushincha Papru antinman júkiar, nánkamas jaa shuaran ejetim, nú jaa shuarsha nuna antinkiar péñker ajaarmiayi. Iwianchrukusha nuna antinkiar, íwianch jíinkimtai ankant ajaarmiayi.

¹³ Tura chíkich Israer-aents uwishin ármiaiy. Tura ni-isha chíkich chíkich péprunam wear iwianchrukun iwianchrin jíirki akuptin ármiaiy. Tuma asa niisha Jesusa náarijíai iwianchin jíiktiai tusar, iwianchin chichartuiniak “Nu Jesus Papru ujaana nuna náarijíai jíinkitiarum tájarme” tiarmiayi. ¹⁴ Tura Israer Patri uuntri Esewia náartin, siati uchirí ármia nu, nuna túriarmiayi. ¹⁵ Túrasha Jesusa náarijíai jíinkitia, tuiniakui, iwianchcha tímiayi “Jesusnaka nékajai. Tura Pápruncha nékajai. Tura atumsha, ¿yátsukaitrum?” tímiayi. ¹⁶ Nuna tinia iwianchruku áishman tsékeñki nú áishmañkan kakaram katsumak nupetkarmiayi. Túram ti katsumam niisha misú tura numpamnawar jíinkiar pisararmiayi. ¹⁷ Nusha Ipisiu péprunam túrunamiayi. Túrunamtai Ipisiu péprunmaya Israer-shuarsha tura Israer-shuarchasha nuna túrunamun nekaawar ti ashamkarmiayi. Tura Uunt Jesusa náarin shiir awajsarmiayi.

¹⁸ Túmainiai untsurí shuar Yúsan umirkaru Yus-shuar ajatsuk tunáa túrawarmia nuna paant ujakarmiayi. ¹⁹ Tura untsurí uwishniumawarmia nu, wawekratai papí ármia nuna itiarmiayi. Itiar, júka iniaiyaji tusar, ashí íimiainiain áesawarmiayi. Nú papí áesawarmia nuna kuítrisha senkuenta mir (50.000) nankaamasauyayi. ²⁰ Tu túrunamtai Uunt Yusa chichame pampañki tura nupetmaki wémiayi.

²¹ Tuma asamtai nuyasha Pápruka Masetúnia nunkanam Akaya nunkanmasha irautjai tu enentáimsamiayi. Tura nuyasha Jerusaréñnum waketkitjai, tímiayi. Tura nuyá ukunam Ruma péprunmasha wetajai, tu enentáimsamiayi. ²² Masetúnia wétin asa Papru ni tsaniakmarin Masetúnia nunkanam emka akupkamiayi. Timiutéun Erastujai akupkarmiayi. Tura ninkia Asia nunkanam seturmiayi.

Ipisiunam ti charaatum ámiania nu

²³ Pápruka tuke Ipisiunam pujái, nuyá aents Yus-Chichaman nakitiainiak charaatum ajarmiayi. ²⁴ Iis, nuí Ipisiunam kayayusa jee ámiayi. Nu yus núwauyayi, Tiana naartin. Tura

áishman, Timitriu naartin, nú jean nakumak uchichin najan-niuyayi kuitjai. Tura niisha nú takatjai ti kuítrintin ajasmi-ayi. Tura chíkich áishman nú takatan takarmia nunasha ti kuítrintin awajsarmiayi. ²⁵ Timitriusha nijijai takarmia nuna ikiaanak, chikichnasha nijijai métek-taku takarmia nunasha ikiaanak nijijai charaatum ajarmiayi. Timitriusha tímiayi “Winia írutramutiram antuktaram. Íisha ju takat takaaunia jujai ti kuit achíatsjik. ²⁶ Tura atumsha ju Papru wáintrumna nu tura ántarmena nu chichaak “Ashí aents najanamu yuska ántar áiniawai” tatsuk. Nuna tau asa, juí Ipsiunam, tura arant ashí Asia nunkanam, ni yúsri iniaisarar tusa enentáimtikrarai. Tuma asamtai untsurí aents, ii yusri Tiánan ikiuiniak, Papru tana nuna umirainiatsuk. ²⁷ Papru tu étserkui, íisha itiurchat pujuschattajik. Kuit ii achiaj nuka menkakashatuak. Tura nú arantcha ii yusri Tiana jeen shuar iniaisachartatuak. Tura nuyá Asia nunkanmayasha tura ashí nunkanmaya aencha, ii yusri Tiana shiir awajainia nuna yapajiáwar aun nakitrachartatuak” tímiayi Timitriu.

²⁸ Nuna antukar aencha ti kajekar charaatum ajarmi-ayi. Túmainiak “Ipsiu shuartikia, aya Tianak wakeraji” tu untsummiarmiayi.

²⁹ Nuinkia aents páchim enentáimprarmiayi. Túmainiak Masetúnianmaya Kayuncha Aristárkuncha Páprun nemarin ármia nuna achikiar japirkutak iruntai jeanam júkiarmiayi. ³⁰ Tura Pápruka iruntai jeanam wayá chichastaj taun, nuyá Yus-shuar ármia nu, nuna suritkiarmiayi. ³¹ Tura Asia nunkanmaya uuntri, Páprun amikri ásar, ainkia wayawain tusar chichaman akuptukarmiayi. ³² Túrasha irunar pujuarmia nu, páchim enentáimprar, chíkichka nusháa untsummiarmiayi. Tura chikichcha nútiksaran ausháa untsummiarmiayi. Tura chíkichka ti untsurí, nekaachar “wariniak irunturara” tiarmiayi. ³³ Chíkich nuí wajarmia nu charaatum amia nuna Israer-shuaran Arejántrun jintintrar eem shitiawarmiayi. Arejántrusha Kayun tura Aristárkuncha ayampruktinian wakerak takamatsatarum tusa uwején takuimi-ayi. ³⁴ Túrasha aents iruntrarmia nu, júka Israer-shuaraiti tusa nekaawar, nú arant charaatum ajainiak “Ipsiu shuartikia aya Tianak wakeraji” ímia-imiatainiakua tí nukap pujur-sarmiayi.

³⁵ Ipsiu pepru papí-aintrisha áentsun itiatmamtik tímiayi “Ipsiu shuártiram antuktaram. Ii uunt yusri Tiana jee íistinia íichukaitiaji. Tura ni nakumkamurisha nayaimpinmaya iniarmiania nusha íischatniukaitiaji. Tura nunasha ashí aents paant nékainiatsuk, tímiayi. ³⁶ Warí, núnaka ashí aents nékainia

asamtai atumsha itiatkatarum. Túrarum enentáimtsuk ya-
jauch túrawairap, tímiayi. ³⁷ Ímiatarum. Ju áishman átum
itiarumna nu, ii yúsrin yajauch chicharkacharai. Tura
ni jeen yajauch awajsacharai. ³⁸ Wats, Timitriu tura ni-
ijjai takainiana nu tunáa túramun ujaktai tusar wakeru-
iniakka pepru penkerin werishtinkiait. Nuinkia máimtek
iwiainiakartí. ³⁹ Tura chíchich chicham ákuinkia péñker irun-
trarum iwiaratarum. ⁴⁰ Kame ju yamáa túrunamun nekaawar
Rúmanmaya kapitíán “li uunt kapitíántri yajauch awajsa-
tai tusarum túrachurmeash” turamchatjiash. Warí, niisha
“¿Urukamtai charaatum ajarum?” takuisha, áimkiatin penké
tujinkiattaji” tímiayi. ⁴¹ Tura papí-aint nuna tuasua amik
“Áukete. Wétarum” tímiayi.

20

Papru Masetúnia nunkanam Krisia nunkanmasha wémiania nu

¹ Charaatum ajasua amikiarmatai Papru Yus-shuaran
untsuk Yusnan jintintrataj tusa ikiaankarmiayi. Tura áujas
ikiuki Masetúnianam wémiayi. ² Nú nunkanam wekaráktak,
Yus-shuaran jintintrar ikiakármarmiayi. Tura nuyasha Krisia
nunkanam jeamiayi. ³ Nui menaintiu nántuk pujusmi-
ayi. Tura nuyanka kanujai Siria nunkanam wétasa pujus
Israer-shuar chícham jurusman anturmamak “antsu nunkan
Masetúnianmaaní wetajai” tímiayi. ⁴ Tura Piríanmaya áishman
Súpater naartin Páprun atamprimiayi. Tura Tisarúnikianmaya
Aristárkusha Sekuntusha Tírpimaya Kayusha Timiutéusha
Asianmaya Tíkikiusha, Trújimiusha ashí nu shuar Jiripius
peprunam Páprun atampriarmiayi. ⁵ Túrawar niisha emki
wear Trúas péprunam jeawarmiayi. ⁶ Tura iisha wkapru-
achu tanta yutai jisat amuukamtai, iisha Jiripius péprunmaya
jínkir, kanunam enkemprar Masetúnia nunkanmaya jínkimji.
Tura senku tsawant nankaamasmanum emki wearmia nu
amaiyankarmiaji Trúasnum. Tura nuisha siati tsawant pu-
jusarmiaji.

Trúas péprunam túrunamia nu

⁷ Tura tumintin kíarai Jesukrístu enentáimtusar yurumátai
tusar iruntrararmiaji. Tura Papru Yus-shuaran jintintramiayi.
Kame Pápruka kashinkia wétin asa chichaa-chichaakua kashi
ajapén ejemiayi. ⁸ Tura yakí menaintiu pátaranam, tesaamu
ámia nui iruntrararmiaji. Nuisha ji ekemarma untsurí irun-
miayi. ⁹ Tura nuisha natsa Eutikiu, áankamunam ayamas
pujusmiayi. Tura Papru ti esaram chichaakui nu nátsasha
karí pujumiayi. Tumáa pujus kanaki yakí pátanmaya akaiki
iniaamiayi. Tura penké jakan júarmiayi. ¹⁰ Tura Papru

akaatuki tsuntsumprua miniakkamiayi. Tura Yus-shuaran chicharainiak “Ashamkairap. Ataksha iwiaakui” tímiayi. ¹¹ Nuyá ataksha Papru wakamiayi. Tura tantan puukar yurumáwarmatai, tuke chichaa-chichaakua tsawantmarmiai Papru. ¹² Eutikiuncha iwiaakun ni jeen júkiarmiayi. Tura ashí aents shiir enentáimsarmiayi.

Miritiunam wearmiayi

¹³ Wats, Papru Asun péprunam nunkan we jeatajtsa wakerimiayi. Tura incha, átumka kanunam wétarum, turamkurin, iikia emkir wémaji Asunnum. ¹⁴ Nui Asunnum inkiunaikiar, Páprusha kanunam enkemprantai, Mitiríniniam jeamji. ¹⁵ Tura nuyá jíinkir, kashin tsawarar Sámus péprunam jeamji. Tura nuyanka Trujiriunam jear ayampramji. Nuyasha kashin tsawarar Miritiunam jeamji. ¹⁶ Pápruka Jerusarénum wari wétajtsa wakerimiayi, pintikiustís naartin jístatin pachiinkiatat tusa. Tuma asamtai, Asia nunkanam ti núkap pujustinian nakitiak “Ipisiunam wéhattajai” tímai.

Papru Ipisiunmaya úuntrin áusamiania nu

¹⁷ Túrasha Papru tuke Miritiunam pujus, Ipisiunmaya Yus-shuara úuntrin winitiarum tusa untukarmiayi. ¹⁸ Ni taarmatai Papru tímiayi “Atumsha wi Asia nunkanam pujusan itiura túraj nu nékarme. ¹⁹ Atumjai tuke tsawant pujumaj nui, nankaamantuchu enentáimtumasan, úutchim winia Úuntrin takatrín takasmiajai. Tura Israer-shuar yajauch awajtustinian wakerutainiajn tuke takasmiajai. ²⁰ Ashí péñker ana nu nekaatarum tusan mijatrutsuk jintintiamjarme. Iruntramarmena nui tura ankant ankant atumí jeen pujumar-mena nuisha Yus-Chichaman ujakmajrume, tímiayi. ²¹ Tura Israer-shuarnasha Israer-shuarchancha nútiksanak, enentai yapajjárú Uunt Jesukrístu umirkatarum, tímiajrume. ²² Tura yamá Jerusarénum wéajai, Yusa Wakaní túrutkui. Nuisha túrunatana nunasha nekamatsuk wéajai. ²³ Tura Yusa Wakaní iniakturkui juna nékajai, ashí pepru wi jeattajna nui enketátai tusar nákarainiawai. Tura ti wáitsatniun nekapsattajai. ²⁴ Kame wikia jákashtajash. Túrasha warí winia itiurtawa. Wikia Yusa jintiín warasan wekasataj tusan wakerajai. Yusaj weawéakuan jáakun iniaisataj tajai. Tura nuyá takatan Uunt Jesus surusmia nuna péñker amuktaj tusan wakerajai. Jes, Jesus chichartak “Yus wáitnenkartana nú chicham etserkata” turutchamka’ tímiayi.

²⁵ “Tura, yatsurtiram, ashí Yúsnan atumin paant ujakjarme. Yamaikia wíniaka atakka wáitkiashtatrum. ²⁶⁻²⁷ Nekaatarum, ashí Yusa wakeramurín wisha penké

úurtsuk ujakjarme. Tuma asamtai atumin títiajtsan wakerajrume, chikichík shuara wakaní jinium wéakuisha wikia penké makuumashtatjai. ²⁸ Tuma asamtai emka atumek ímiastarum. Túrarum nuyá chikich Yus-shuar íistarum. Yus-shuaran wáinin ajastarum tusa, Yusa Wakaní achirmakurme. Yus-shuar ainia núnaka ni numpejain Uunt Jesus sumakchakait. ²⁹ Kame wi wématai, chikich táartatui. Núnaka nékajai. Tura niisha, Yus-shuaran amukartajtsa wakeriartatui, uunt yawasha murikiun amuinia áintsan. ³⁰ Túrasha nemartusarat tusar wakeruiniak atumiinian wait chichaman unuikiartin wantinkiertatui. ³¹ Tuma asamtai yatsurtiram, aneartarum. Wisha menaintiú uwitin tsawajsha káshisha úutchim ankant ankant unuiniamajrumna nu kajinmatkiirap' tímiayi.

³² 'Pai, yamaikia, yatsuru, Yus yáinmakarti. Yusa anenkrattairi nékaitrumna nú chichamsha kakarmaiti. Nú chicham átum katsuárar kakaram wekasatniun yainmakarti. Kame nú chicham atumi enentáin pujakui, Yus ni shuarin matsamsatniun anajmatramia nuí pachiinkiatarme. ³³ Wats, wisha chikichík shuara kuítrin wariríncha wakerutkachuitjai. ³⁴ Antsu winia uwejruijai takasan wi atsummiaj nuna sumarmakmajai. Tura winia írutkamuru atsumamuríncha wiki sumakmiajai. Nuka paant nékarme. ³⁵ Kame átum takasrum, atsumainia nusha yáintarum tusan jintintiajrume. Wats, Uunt Jesusa chichame enentáimsami. "Achiana nujainkia nankaamas, súana nuka shiir waraawai" tíchamka" tímiayi.

³⁶ Nuna tuasua amik Papru tikishmarmiyai. Tura ashí nuijiai iruntrarmia nú shuar Yúsan áujsarmiyai. ³⁷⁻³⁸ Tura Papru nuik chichaak "Atakka wáitkiashtatrumé" tiniu asamtai, ti kúntuts pujuiniak, úutchim Páprun miniaksarmiyai. Túrawar kanunam ejeniarmiyai.

21

Papru Jerusarénum wémiania nu

¹ Tura nuyá Yus-shuar aujsa ikiukir kanunam enkempramji. Tura ínkiuasmak Kus péprunam jeamji. Tura kashin tsawárar Rútas péprunam jeamji. Tura nuyanka Patara péprunam jeamji. ² Tura nuí Pataranam pujusar, chikich kanu Pinisia péprunam wea wáinkiamji. Túmakui nuí enkemprar wémaji. ³ Nuí wésar Chipri nunkaka wáinkiamji. Chíprikia menanmaani aa ikiuakur Sírianam jeamji. Kánuka Tiru péprunam jeá pujustiniuyi, káarak núkap ikiuktin akui. Tuma asamtai iisha Tírunam jear kanunmaya jínkir péprunam wayamji. ⁴ Nuí Yus-shuar wáinkiar nuín siati

tsawant pujusmaji. Tura Yus-shuaran Yusa Wakaní ujakam Páprun chicharainiak “Jerusaréñnumka wéchatniuitme” tiarmiayi. ⁵ Tura siati tsawant nan̄kaasmatai jínkimji. Ashí Yus-shuar ármia nu núwentuk uchirtiuk nemartamkamji, péprunam inian̄katmaktiai tusar. Káanmatkanam jear tikishmarar Yus áujsamji. ⁶ Tura nu amikiar nuñkia áujnaisar ikiukiarmaji. Tura iikia kanunam en̄kemprakrin nínkia ni jeen waketkiarmiayi.

⁷ Iisha Tirunmaya entsak wea-wéakuar Turumáitianam nuñ jíntramji. Tura nu jearsha Yusai yachí ármia nu chichasar nuñ chikichkí tsawant pujusmaji. ⁸ Kashin tsawarar nuyá jínkir nun̄kan̄ weri Sesaria péprunam jeamji. Nu jiripi jeen jear pujusmaji. Jiripikia Yus-Chichaman etserni-uyayi. Nuik Jerusaréñnum siati áishman̄kan Yusa takatr̄in wáinkiarat tusar anaikiarmia nú Jiripiiti. ⁹ Jiripisha kua-tru nawantr̄in yarumkauyayi nuatnakchan. Niisha Yusa chichamen etserin ármiai. ¹⁰ Tura iisha Jiripi jeen wárum tsawantak pujarin Jutía nun̄kanmaya aents Yusa etserniuri, Akapu náartin támiayi. ¹¹ Niisha taa Papru emenmamkar̄in achikmiayi. Tura achik nínki ni nawen tura uwejéncha jínkiamamiayi. Nuna tura tímiayi “Yusa Wakaní tawai, juna emenmamka nérenniur̄in Israer-aents jútikia jínkiáwar Israer-shuarchanum surukartatui, tawai” tímiayi. ¹² Iisha nu antukar Papru tímaji “Jerusaréñnumka weep.” Sesarianmaya Yus-shuarsha núnisan̄ Páprun tiarmiayi. ¹³ Tutai Papru tímiayi “¿Urukamtai úutkuram winia enentáirui kúntuts awajtarum? tímiayi. Wi Jesusna asamtai Jerusaréñnum jínkiatainiakuisha mántuiniakuisha ashamatsjai” tímiayi. ¹⁴ Tura iisha Papru emetatai tukamar tujinkiar “wats, nuñkia Uunt Yus wakera nu tímianak atí” tiarmaji.

¹⁵ Nu tiri iniaisar iwiarnarar Jerusaréñnum wémaji. ¹⁶ Chíprinmaya yaunchu Yus-shuar Manasun̄ ni jeen Jerusaréñnum takakuya nuna ikiatmastinian wakerimiayi. Tuma asamtai Sesarianmaya ishichik Yus-shuar nemartamainiak Manasunnasha júkiarmiayi.

Papru Jakupu jeen irastajtsa wémiania nu

¹⁷ Tura iisha Jerusaréñnum jeawakrin, nu warasar Yus-shuar ti shiir áujtamsarmaji. ¹⁸ Tura kashin tsawar Papru íimiak Jakupu jeen wémaji. Nuisha Yus-shuara uuntri matsamarmiayi. ¹⁹ Páprusha áujas amik, Israer-shuarchanum ni étsermajai Yus túramia nuna yámankamtaikniumia júki chikichkimias ujakar ujakar awajsamiayi. ²⁰ Papru taman antukar “Yus ti péñkerchakait” tiarmiayi. Tura Páprun ju chichaman tiarmiayi “Támena nu péñkeraiti, yatsurú,

túrasha Israer-shuar timiá untsurí Yus-shuar ajasu áiniayat, “ashí Muisais akupkamia nu umiktiniaitji” tuiniawai. ²¹ Nú arant yajaya aents taar, chichartamainiak “Pápruka nusháa jintintui, turamainiawai. Israer-shuar chíkich nunkanam pujuinia nuna Muisaisa akupkamurí umirkashtin Pápruka jintintui, turamainiawai. Israer-shuarti tsupirnaktin ana nu túrashtinian tura ashí Israer-shuar túrutai iniaisatniun Papru imia Israer-shuaran jintintui, turamainiawai.”

²² Wátsek, yatsuru, nuinkia itiumainkit. Ame tátintrumin aents nekaawarka juí kajertamainiak káutramkachartatuak.

²³ Wats, antsu nuinkia, ju túrata yatsuru. Juí kuaru áishman Yúsan yaunchu tiarmia nuna umiktasa pujuiniawai.

²⁴ Nii júkiarta. Túram niisha Muisais akupkamia nuna umikiar nijiaamainiakui, amesha nijiaamarta. Núnismek kuítniasha ni susatin ana nu amesha akikmatkarta. Niisha ashí umikiarmatai, ni intiashin awampratin áchattawak. Nu áishmanka intiashin awampran Israer-aents wáinkiar, anturtamkarainia nu, nekaschaiti, turamartatui. Antsu, Pápruka Muisais akupkamia tímianak túrawai, turamartatui.

²⁵ Túrasha yatsuru, nekaata, Israer-shuarcha Yus-shuarka papí yaunchu auptukmiaji. Israer-shuarti túratin ana nu ashí mash túratarum tátsuji, tu áatramji. Tura antsu namanken máawar ántar-yusan susamu yúashtiniaitrume, tímiaji. Tura numpasha umarchatniuitrume, kajemtikramusha yúashtiniaitrume. Tura tsanirmashtiniaitrume. Tu áatramji” tiarmiai.

Páprun achikiarmiania nu

²⁶ Nuyá tiniu asamtai Papru nú kuaru áishmankan júkiarmiayi. Tura kashin tsawarar nímiak nijiaamararmiayi, Muisais timia nútiksaran. Tura Yúsan tiarmia nuna wárik umiktinian tura Muisais timia nuna Yus súsatniun ujaktajtsa Papru Yusa Uunt Jeen wayamiayi. ²⁷ Túrasha nu siati tsawant amusattuk ajatemsai, Ásianmaya Israer-aents Paprun Yusa Uunt Jeen pujan wáinkiararmiayi. Túrawar charaatum ajakiar Páprun achikiarmiayi. ²⁸ Achikiar untsumainiak “Israer-shuártiram in yáinmaktarum. Ashí nunkanam Muisais akupkamuríncha Israer-shuarti túrutairíncha, ju Yusa Uunt Jeencha yajauch chicharea nu achikji, tiarmiayi. Warí, Kriaku áentsun awayáshtinia nuna awayá nujai yamá ju Jeencha yajauch awajturmají” tiarmiayi.

²⁹ Jes, nuik Ipisiunmaya Trúpimiu Páprujai péprunam wekaan wáinkiaruyi. Wáinkiaru ásar, Yusa Uunt Jeen wayayi, tu enentáimsar tiarmiayi. ³⁰ Tuiniakui aents ashí mash charaatum ajakiar tseke táarmiayi. Túrawar Páprun achikiar japirkutak Yusa Uunt Jeeya júkiarmiayi. Túrawar wáitíncha

nú chichamaik epentrarmiyai. ³¹ Tura maatai tusar matsamtuiniai suntara kapitiántri Jerusarénnumia aents ashí charaatum ajainian antukmiyai. ³² Kapitiáncha ni suntarin tura sarjentuncha irur tseke weriarmiyai aents pujuarmia nui. Aencha suntaran tura kapitiánin wáinkiar, Páprun asutíniyat iniaisarmiyai. ³³ Kapitiánka Páprun jeari achikmiyai. Tura jimiará jirujai jínkiamiyai. Nuyasha aniasmiyai “¿Niisha yait? ¿Warinia túrait?” tímiyai. ³⁴ Túrusha aencha untsurí chichaman untsummiarmiyai. Túmainiakui kapitiáncha penké nekaachmiyai. Tuma asamtai Páprunka suntar pujamunam júkiarmiyai. ³⁵ Tura suntar pujamunam wáitiniam jeawar Páprun entsaki júkiarmiyai aents imiá kajerainia asamtai. ³⁶ Tura aencha ukunmaani pataakar, mantamnatí, tu untsummiarmiyai.

Papru chichastinian seamiania nu

³⁷ Tura Papru suntarnum awayám, Páprusha kapitiánin Kriaku chichamjai chichaak “Wi ishichik chichasaintjame” tímiyai.

Tutai kapitián chichaak “Warí, ¿amesha Kriaku chicham chichastin nékamek? tímiyai. ³⁸ Nuínka amesha ¿Ejiptunmaya shuárchakaitiam? ¿Nuik kuatru mir (4000) aents, mankartin tutai atsamunam yaruakchamkam? ¿Kapitiánjai meset nanataj tusa túrachmakum?” tímiyai.

³⁹ Tutai Papru tímiyai “Núchaitjai. Antsu wikia Israer áentsuitjai. Sirisia nunkanam uunt pepru Tarsu náartin ana nui akiiniaitjai. Tura waitneasam ju aents chichastin tsankatrukta” tímiyai.

⁴⁰ Tura kapitián, ayu, tutai, Papru watainium wajas, mitiat pujustarum tusa uwején takuimiyai. Tura aents itiatkar-matai Israer-chichamjai chichasmiyai.

22

Papru áentsun tímia nu

¹ Papru chichaak juna tímiyai: “Yatsurtiram, tura úuntur árumna nu antuktarum. Wikia Pápruitjai. Kíishtumaktaj tusan títiatjana nu waitneasrum anturtuktarum” tímiyai. ² Tura Papru Israer chichaman chichaakui, aents nuna antukar nú nankaamas itiatkarmiyai. ³ Nui Papru chichaak “Wikia Israer-shuaraitjai. Tarsu pepru Sirisia nunkanam ana nui akiiniaitjai. Túmaitiatnak jui Jerusarénnu tsakaruitjai. Tura unuikiartin Kamarán chichamen unuimiaruitjai. Tuma asan ii uuntri akupkarmia nuna ashí umirkaitjai. Tura átum yamá túrarmena nuna wisha nútiksanak Yusna ana nuna tuke enentáijai wakerukuitjai. ⁴ Tura Jesusan umirkaru

ármia nuna máataj tusan pataatukni wekaimiajai. Túran áishman kan nuwancha achikian sepunam enkeataj tusan túrimiajai. ⁵ Israer-patri uuntrisha Israer-shuara uuntrisha Tamaskunam íi-shuar susatá tusar papin ataktusar akup-tukarmia nuna nin kía nékainiawai. Jesusan umirkarun achikia ikiaankan juí Jerusarénum asutniáwarat tusan wer-imjai' tímiyai.

(Túramuri 9.1-19; 26.12-18)

⁶ 'Tura wi jintiá wéai Tamaskunam jeastatuk ajasai nantu tutupin ai aya aneachma nayaimpinmaya newaat wajantruntmiayi. ⁷ Túrunamtai wisha nun ká iniaarmajai. Nuyanka chichaamun antukmajai. Chichartak "Sauru, Sauru, ¿urukamtia imiá pataaturam?" turutmiiai.

⁸ Takui wi aniasmajai "¿Amesha yáitiam, Uunta?"

Tutai "Wikia Nasarénumia Jesusaitjai. Ame pataaturmena núitjai" turutmiiai.

⁹ Wijiai pujuarmia nu, newaat wajantun wáinkiar ti ashamkarmai. Túrasha nin kía túrutun antukcharmai. ¹⁰ Tura wi tímiajai "¿Nuin kía, Uunta, warí itiurkattaj?" tímiajai.

Tutai Uunt chichartak "Wajakim Tamaskunam wetá. Nuisha ame túrattamna nuna ujatmakartatui" turutmiiai, tímiyai. ¹¹ Kame wikia nú newaat ajakun íisan jiiru kusurmai. Tuma asamtai winia tsaniakmar enkeki jurukiar Tamaskunam ejetiarmai' tímiyai.

¹² Papru tuke aujmatki wéawai. 'Tura nuí Tamaskunam áishman Ananías pujumai. Niisha Yúsan aneak, Muisais akup-kamia nuna umirkauyi. Tura nú péprunmaya Israer-shuar ármia nu nin pénger enentáimtiarmiai. ¹³ Nú Ananías winia íirsataj tusa támai. Taa turutmai "Yatsuru Sauru, pénger iimtia." Túrutkui nú chichamaik pénger íimmiyai. Túrunan Ananíasnasha wáinkiamjai. ¹⁴ Tura Ananías chichaak "Iwiaaku Yus, winia wakeramurun nekartuat tusa winia Uchirnasha, tunaarinchaa nuna, íisat tusa, winia chichampruncha antukat tusa ámin yaunchu Yus anaitiamkaiti. ¹⁵ Amesha Papru, Yusna ana nu íisumna nusha antukumna nusha ashí aents ujakartatme. ¹⁶ Tuma asamtai yamaisha ¿warí nákam? Tunaarun asakátrurat tusam Uunt Jesus enentáimtusam weme ni náari pachisam imiantia" turutmai.'

¹⁷ 'Tura Jerusarénum waketkin Yusa Uunt Jeen wémajai Yúsan áujsataj tusan. Nuí íimiarmajai. ¹⁸ Nuí Jesus chichartak "Juí Jerusarénum Wíi túramur etserkattamna nuna antukchartatui. Tuma asamtai warí jíinkim wetá" turutmiiai.'

¹⁹ 'Túrutkui wi tímiajai "Túrasha Uunta, juyá aents wi Israer-shuara iruntai jeen wayan Ámin umirtamkarmia nuna nuí

matsatun achikian awatin sepunam enkeawarmia nuna nékainiawai. ²⁰ Tura nuyá Áminiu etserniun Estepan̄kan máiniakuisha wisha wajamjai. Túruiniakui, “pénkeraiti” tímiyai. Nú arantcha ni pushir̄in írsamjai” tímiyai.’

²¹ “Túrasha Uunt Jesus winia turutmai “Wetá. Israer-shuarcha matsatainia nūi akupkatjame” turutmai” tímiyai Papru.

Suntara kapitíántrīn túrunamia nu

²² Nūi matsamarmia nu, núnaka antukarka untsumtan juáriarmiayi. “Juka mantamnatí. ¿Urukamtaik iwiaakusha pujusat?” tiarmiayi. ²³ Tura aentska Paprun kajerainiak, ti untsumainiak pushir̄in tujaat ajapawar nūnkan̄cha nan̄kimkiamaikea ajarmiayi. ²⁴ Tura kapitíán nuna wáiniak Páprun suntar pujamunam awayámiayi. Tura suntaran chicharuk “Átum asutiárum áimtikiatarum. ¿Urukamtaik aents nin kajerainiak imiá untsumainia? Nekaatarum” tímiyai. ²⁵ Tura Páprun asutiátai tusar jin̄kiárar awajsam Pápruka kapitíánin chicharuk “¿Rúmanmaya aents áyatik asutiámniakait, ni túramur̄i nekartsuk?” tímiyai.

²⁶ Nuna táman antuk kapitíán̄cha uunt kapitíánin ujaktaj tusa werí chichaak “Maaj, túrataj tamena nu anearta. Ju áishmañ Rúmanam pachitkaiti” tímiyai.

²⁷ Nuna antuk uunt kapitíán Páprun werí aniasmiayi “¿Ame-sha nekasmek Rumanam pachitkaitiam?” tímiyai. Tutai Papru “Ee” tímiyai.

²⁸ Tutai “Wikia ti kuítian akikmakmijai Rúmanam pachinkiatniun” uunt kapitíán tímiyai.

Tutai Papru tímiyai “Túrasha winia aparka Rúmanam pachitkia asamtai, wisha Rúmanam pachinkian akiiniaitjai” tímiyai.

²⁹ Nuna takui Páprun asutiátaj tiarmia nuna wárik iniaisar jín̄iar wearmiayi. Tura imia uunt kapitíán̄cha Rúmanam pachitkian jin̄kiá asa ashankamiayi.

³⁰ Tuma asa kashin tsawar uunt kapitíán, urukamtaik Páprun imiá kajerainia, nekaataj tusa wakerak Paprun werí jin̄kiámun atirmiayi. Tura Israer-patr̄i uuntrin chíkich naamka armia nújaisha ikiaankamiayi. Tura nūn̄kia ni matsatmanum Páprun itiar ajapén awajsamiai.

23

Israer-aentsu Úuntrīn Papru timiania nu

¹ Papru Israer-patr̄i naamkar̄in úmamkes iis “Wíi shuar-tiram antuktatum. Úchichik tuke yamaisha Yus íimmianum pénker wekainuitjai” tímiyai.

² Papru nuna takui Israer-patri uuntri Ananías, ni suntarín Papruí ayamas pujarmia nuna “Wenunam awatiarum” tímiayi.

³ Tutai Papru tímiayi “Tsej, jimiara chichamtinia ímiatá, Yus amincha asutiámattawai. Muisais akupeana nuna umiatsui tusam yajauch turutattsam pujame. Entá, ¿nuĩkia urukamtia Muisais tímia nuka iniaisam ame suntarum winia asutiatarum tame?” tímiayi.

⁴ Tura nuna takui nuĩ wajarmia nu Páprun tiarmiayi “¿Maaj, amesha Patri uuntri imiá yajauchisha chichaream?”

⁵ Tutai Papru tímiayi “Yatsuru, wisha Patri uuntri áutskaitia tíchamjai. Nékaitkiunka núnaka tíchaajai. Kame wisha nékajai, Yus-Chichamnum tawai “Atumí uuntri yajauch chicharkairap” tawai” tímiayi.

⁶⁻⁸ Israer-aentsu úuntriya jimiara írutka ármiai. Sat-uséu aents tura nuyá Paríséu aents nusháa írutkan Pápruka nekaamiayi. Kame Satuséu aentska, jakamunmaya nantaktincha Yusa suntarisha aentsu wakanisha tura iwianchcha atsawai, tiniu ármiai. Antsu Paríséu aentska, nuka ashí awai, tiniu ármiai. Nuna nekáa Papru kakantar chichaak “Wikia Paríséu áentsuitjai. Wíi shuarsha Paríséu áiniawai. Wikia ashí shuar jakamunmaya ukunam nantaktin átatu tu jintiamun, nekaatai tusar itiariarmiayi” tímiayi. Tura Papru nuna takui Paríséu aents tura Satuséu aencha nuámtak kajernaikiarmiayi. Túrunawar kánasarañ nusháa nusháa enentáimprarmiayi. ⁹ Nuĩkia ashí aents charaatum ajarmiayi. Tura Israer-shuara jintinniuri Paríséunam írutka armia nu wajakiar tiarmiayi “Ju áishmañ tunaan penké túrichuiti. Yusa suntari chíchich wakancha nin nekas chichaschamashi. ¿Ya neka?” tiarmiayi. ¹⁰ Ti charaatum ajainiakui suntara kapitíantri Páprun achiarchartimpiash tusa suntaran untsuk, “Jiiktiarum, túrarum suntar pujamunam awayatarum” tímiayi. ¹¹ Nuyá kashi Papru Uuntri mesekra ipiatuk “Kakaram ajasta, Papru. Juí Jerusarénum winia ujakarumna núnismek Rúmanmasha ujaktatme” tímiayi.

Páprun máatniun wakeriarmiania nu

¹² Nuyá kashin tsawarmatai Israer-aents Páprun maatai tusar chichaman jurusarmiayi. “Papru máachkurkia yurumtsuk tura penké úmutsuk matsamsattaji. Máachrikia yajauchiniam yumĩkramu atai” tiarmiayi. ¹³ Nuna tiarmia nuka kuarenta (40) nankaamas ármiai. ¹⁴ Tura Israer-patri úuntriñ tura Israer-aentsu úuntriñcha weriar “Papru máachkurkia penké yurumtsuk pujustatji. Máachrikia yajauchiniam yumĩkramu atai” taji. ¹⁵ Tuma asamtai ashí Israer-patri naamkaríjiaí suntara kapitíantri seatarum, Papru tatí

tusarum. “Kashin Papru itiata, titiarum. Papru tana nu iisha nekas nekaatai tusar wakeraji” titiarum. Túrawakrumin iisha maatai tusar nin̄kia táatsain̄ nákatatji” tiarmiayi.

¹⁶ Tura Papru awe nú chichaman antuk suntar pujamunam taa Páprun ujakmiayi. ¹⁷ Tuma asamtai Pápruka suntara kapitiántr̄in untuk “Ju uchi uunt kapitiánnium jukitia. Niisha chichaman takakui” tímiayi.

¹⁸ Kapitiáncha uchin uunt kapitiánnium ejé tímiayi “Papru en̄keamu pujana nu winia untsurak “Ju uchi uunt kapitiánnium jukitia. Chichaman takakui” túrutui” tímiayi.

¹⁹ Uunt kapitiáncha nú uchin en̄keki arantach jukí chicharuk “¿Warí turuttiaj tame?” tímiayi.

²⁰ Tutai uchi tímiayi “Israer-aents Páprun chichaman jurusarai. “Papru túramur̄i ti paant nekaatai tusar kashin Israer-shuara uuntrīin ejetarum” turamartatui. ²¹ Tura amesha nuna takui anturkaip. Kuarenta (40) nan̄kaamas jintiá akirtua pujurainiawai. Tura “Papru máachkurkia yurumtsuk tura úmutsuk matsamsattaji” tuiniawai. Tuma asamtai yamaisha ámin titi tusa nákarmainiawai” tímiayi uchi.

²² Tura uunt kapitiáncha uchin chicharuk “Ame túrutmena nu chíkich aents pen̄ké ujakaraip’ tímiayi. Nuna ti, uchin akupkamiayi.

Akupin Piriksai ejetiarmiania nu

²³ Nuyanka uunt kapitiáncha chíkich kapitiánin jímíaran itia chichaak “Urum, kashi ajapén̄ ajastatuk āi, untsur̄i suntar ikiaankarta. Jimiará sián̄ (200) aya náwek, setenta (70) kawainium eketka, nuyá chíkich jimiará sián̄ (200) nan̄kijiāin̄ Sesaria nun̄kanam wétin iwiarata. ²⁴ Páprusha kawainium ekemkatin iwiarturta. Túrarum pen̄kerak ejetarum akupin Piriksai” tímiayi. ²⁵ Tura nijiāi ju chichaman áatrar akuptukmiayi:

²⁶ “Ti pen̄ker akupin Píriks, wikia Krautiu Rísias ju papin áatjame. ²⁷ Israer-aents ju áishman̄kan maatai tusar wakeruiniak achikiarmiayi. Tura niisha Rúmanmaya áentsuitkui wikia nuna nekaan suntarjai werin jukimjai. ²⁸ Wikia ¿urukamtaik achikiaruit? tusan Israer-patri naamkar̄in jukimjai nin. ²⁹ Páprunka ii uuntrīi akupkamur̄in umiatsui tusar nin kajerarmiayi. Pápruka yajauch túrachu asa mantamnachminiuyayi. Sepunmasha en̄kemachminiuyayi. ³⁰ Tura wisha Israer-aents nin máatniun chichaman jurusman nekaan amīin akuptajme. Nuyasha nin kajerainia nunasha tajai “Atumsha Piriksai werum átum warinma kajerarum nu titiarum” tajai. Ayu. Júchiniak tájame.” Nuna tu áatar akuptukmiayi.

³¹ Tura suntarsha ni uunt kapitiántri tímia nútiksaran Páprun kashi júkiarmiayi Antipatris péprunam. ³² Kashin tsawarar suntar aya náwek wearmia nuka waketrarmiayi. Tura kawainium eketrainiaka Páprujai wearmiayi. ³³ Sesaria péprunam jeawar papin Piriksan súsarimiayi. Tura Pápruncha nuí ejenarmiayi.

³⁴ Akupniusha papí aujsua amik Páprun aniasmiayi “Ame-sha, ¿tuí akiiniaitiam?”

Tutai “Sirisia nunkanmayaitjai” tímiayi.

³⁵ Nuna takui akupin tímiayi “Wátskea kajertamainia nu taar turamainiakui anturkatjame” tímiayi. Tura nuyanka uunt akupin Erutisa jeen awayá apujsamiayi, suntar ísarat tusa.

24

Papru Píriksjai áujmatsamiania nu

¹ Tura senku tsawant nankaamasai Israer-patri uuntri, ni naari Ananías, Sesarianam támiayi. Tura Israer-aentsu uuntri tura ti unuimiaru chichamtincha, ni naari Térturu nujai táarmiayi. Ju aents Páprun kajerainia ásar akupniunam wearmiayi. ² Nuí Páprun itiarmatai Térturu chichatan juarmiayi. “Uunt akupin Píriks, amesha yaimiu asakmin iisha shiir matsatainiaji. Tura imiá neka asakmin ashí aents tímiatrusrik matsatainiaji. ³ Tuma asakmin iisha ashí matsatmanum tuke tsawant ti shiir yuminsamajme, uunta. ⁴ Tura amesha ti núkap chicham antuktin nakitiatspash. Tuma asamtai antsu ishichik waitneasam anturtukta, tímiayi. ⁵ Ju áishman Papru, sunkura utsukratniua núniniaiti. Niisha ashí nunkanam mesetan najanatniun Israer áentsun ikiakáiniaiti. Tura Jesusa aentsri, Nasarénu tuinia nuna úuntrinti. ⁶ Nú arantcha Yusa Uunt Jeen yajauch awajsataj tusa pujuru wáinkiar achikmaji. Ii uuntri tana nujai métek asutiátai tusar wakerimji. ⁷ Túrarin nuyanka kapitián Rísias taa tapit achik jurutramkimiaji. ⁸ Tura atumek akupin Piriksai werum nuí aujmatkatarum, turamaji, tímiayi. Tuma asamtai amesha Píriks, Papru aniasta. Nuinkia ii tájinia nu nekasaiti, nu nekaattame” tímiayi Térturu.

⁹ Tura Israer-aents pujuarmia nu “Nekasaiti ashí ni tana nu” tiarmiayi.

¹⁰ Nuyá Píriks, uwejejai, Papru chichasat tusa iniaktusmiayi. Túram Papru tímiayi “Amesha uunta, ju aentsu akupniuri ti untsurí uwitin pujusuitme. Tuma asamtai nuikia shiir enentáimsan páchitsuk chichastatjai. ¹¹ Wats, wi túramur nekartuata. Yúsan áujsatat tusan Jerusarénum wi wémajna nu tuse (12) tsawant nankaamasai. ¹² Nuisha yajauch áujmatki weai wáitkiacharmai. Yusa Uunt Jeencha tura Israer-shuara

aujtai jeencha tura pepru jántianmasha áentsnum charáa charáa ajá wekaai penké wáitkiacharmai, tímiayi. ¹³ Ju aents juí matsa-tainia nu wíniaka penké turutchamnia áiniawai. ¹⁴ Túrasha ju na paant ujaajme. Jesus yamarman jintíana nuna umíajai. Kame Israer-aentska wáitiaiti tuinia nuna wikia umíajai. Túrasha nuna túran ii uuntri Yusri akupkamia nunak umiktasan pujajai. Jes, ashí Muisais aar akupkamia nuna tura ashí Yúsnan yaunchu etserin aar akupkarmia nunasha uminiait-jai. ¹⁵ Tura jakaasha nantaktin átatui, tajai. Warí, péñker aents nútiksán yajauch aencha nantakiartatui imia Israer-shuar tuiniatsuk. Tura wisha nútiksának túrunatniuiti tajai. ¹⁶ Tura wisha tiniu asan, wikia winia enentáirui Yus ímmianum maku-umatsuk wekasataj tajai. Tura áentsnumsha nútiksának penké makuumatsuk wekaajai' tímiayi.

¹⁷ 'Tura, uunta, untsurí uwitin chíkich chíkich nunkanam wekaasuan amikian winia shuarui támajai. Kuítrinchán kuítian susataj tusan tura Yusa kuítríncha nin susataj tusan támajai. ¹⁸ Túran wisha, Muisais jintinmia nútiksának nijiaamaran, Yusa Uunt Jeen pujumiajai. Untsurí aents charaatum ajainiasha atsumiayi. Nuí wiki pujái Ásianmaya Israer-aents wáitkiarmiayi. ¹⁹ Tura wi yajauch túraitkuíñkia winia wáitkiarainia nu táchatniukait ámin ujatmaktasa. ²⁰ Túrachkuíñkia juí pujuinia nu, Israer-patri naamkari matsatmanum wi pujumajna nuí yajauch túramun nékainiakka turutiarti. ²¹ Kame, “jakamunmaya nantakminiaiti” tau asamtai makuurtiajtsarum pujarme” matsatmanum tímiay nujai turutchartimpiash. Nú arantka yajauch túramun penké nekartuacharmai” tímiayi Papru.

²² Táman antuk Píriks, Kristu shuari túramun paant nekáa, áanik iniaisamiayi. “Antsu kapitíán Risias támatat nuíñkia nu chichaman nekaatjai” tímiayi. ²³ Tura nuyá suntara kapi-tiántrin chichaak “Ju Pápruka tuke emetnati. Tura ishichkikia ankant apujsatarum. Tura nuyá ni amikri taa yáintaj takui suritkiairap” tímiayi.

²⁴ Tura nuyá chíkich tsawantaj ataksha Píriks ni nuwejai Tursirajai támiayi. Núwenka Israer-shuarauyayi. Pírikska “Papru itiatarum' tímiayi. Papru Jesukristunun étserkui antimiai.

²⁵ Tura Pápruka yajauchiniam wekasashtincha naka wekasat-niuncha, tura ukunam Yus tunáa áentsnaka asutiátniuiti takui Pírikska ashamak tímiayi “Antsu yamaikia máakete. Tura ataksha wi ankant pujakun unsukmijiam” tímiayi.

²⁶ Tura, ankant ajastaj tusa Papru kuítian akirkashtimpiash, tu enentáimias, Píriks tuke untsúu wémiayi, chichastai tusa.

²⁷ Tura nuyanka jimiara úwí nankaasmatai Píriks akupin náamkamu ajapnamiayi. Tura chíkich aents, ni naari Pursiu

Jistu akupin náamkamiayi. Tura Pírikska, Israer-aents péñker enentáimtursarat tusa wakerak, Páprun sepunam tuke ikiuk-miayi.

25

Papru Jístujai áujmatsamiania nu

¹ Jístusha akupkatin takatan nan̄kaamataj tusa Sesaria péprunam támiayi. Tura menaintiú tsawant nan̄kaamasmatai nuyá we Jerusaréñnum jeamiayi. ² Nuisha Israer-patri uuntri tura Israer-aentsu pen̄kerisha Páprun tsanumprurtai tusar Jístun weriarmiayi. ³ Tura tiarmiayi “Waitneasam Páprusha Jerusaréñnum akupkata” tiarmiayi. Jintiá maatai tusar wakeruiniak nuna tiarmiayi.

⁴ Tutai Jistu tímiayi “Atsá. Páprusha Sesaria péprunam sepunam en̄keamu pujawai. Tura wikia nūj wárik waketkittijai” tímiayi. ⁵ Nuyá nin tímiayi “Atumsha pen̄keri árumna nu, wijjai Sesianam wétiniaitrume. Tura nú áishman̄ka tunaari ákuñkia nuisha títiniaitrume” tímiayi.

⁶ Jístuka Jerusaréñnum ishichik tsawant pujusmiayi. Kame uchu tsawant tura tias tsawantcha pujuschiawash. Nuyá ataksha Sesianam waketkimiayi. Tura nūj jeá kashin tsawar, akupin pujutainium pujus “Papru itiatarum” tímiayi. ⁷ Tura Papru wayamtai, Israer-aents Jerusaréñnumia taarmia nu káunkarmiayi. Túrawar ti nukap chichainiak “Tunáa túrait Pápruka” tu tiarmiayi. Túrasha pen̄ké uyumamtikiacharmiayi.

⁸ Pápruka chichamprumak tímiayi “Wisha tunaan pen̄ké túrachuitjai. Israera uuntri áarmarin̄cha umirkaruitjai. Tura Yusa Uunt Jeen̄cha yajauch awajsachuitjai. Tura uunt kapi-tiánniasha yajauch pen̄ké chicharkachuitjai” tímiayi.

⁹ Jístuka Israer-aents péñker enentáimtursarat tusa wakerak, Páprun tímiayi “Wakerakmiñkia Jerusaréñnum wemí. Wisha nūj ame túramurmin nekaatjai” tímiayi.

¹⁰ Tutai Papru tímiayi “Amesha paant nékame, Israer-áentsnum tunaan pen̄ké túrachjai. Tuma asamtai Rúmanmaya uunt akupniun wisha winia túramurun ujaktiniaitjai, nekartuati tusan. ¹¹ Wisha jakamnia tímianu tunáa túranka, jákatniuncha ashamatsjai. Tura antsu turutainia nu nekaschaitkiuñkia wíniaka Israer-shuarnum surunkachminiaitjai tajai. Tuma asamtai seajme, wíi túramun uunt akupin Sésar nekartuati” tímiayi.

¹² Tutai, nuyá ní írutramurijjai chichasua amik, Jistu Páprun tímiayi “Uunt akupniui wétaj tusam seame. Tuma asamtai nūj wétatme” tímiayi.

Papru uunt akupniujai áujmatsamiania nu

13 Tura ishichik tsawant nan̄kaamasmatai akupin Akripia ni nuwejai Pirinísejai Jístun áujsataj tusa Sesarianam wearmiayi. 14 Tura unturi tsawant pujusarmiayi. Tura nuí pujuiniái Jístuka Papru túrunamun akupniun ujaak tímiayi “Juí áishman̄ pujawai. Píriks nin achik en̄kea ikiukmiayi, tímiayi. 15 Kame wikia Jerusarénn̄num pujái Israer-patri uuntri tura Israer-aentsu úuntriša, Papru yajauchin túraiti tusar káutrukarmiayi, tímiayi. Mantamnati tusam akupkata, tu seattarmiayi. 16 Takui wi tímiajai “Iisha Rúmanmaya áentstikia chícham nékatsuk, mantamnati tusar akupeatsji. Tsanumpruinia nu, emka táartin áiniawai. Tura nuyá chichamprumatsain̄ mantamnati tusar akupeatsji iisha” tímiajai. 17 Tiniu asan, táarmatai, wikia nákatsuk kashin tsawaran akupin pujutainium pujusan, Papru itiatarum tusan akupkamjai. 18 Tura Páprun tsanumprurtai tusar taar chichainiaksha, wi enentáimmiajna núnaka tícharmiayi. 19 Antsu áyatik Yus umirkar túmatairin̄ Papru nuna túrachai, tiarmiayi. Tura nuyasha áishman̄ Jesus naartin nantaki iwiaakui tawai Pápruka, tiarmiayi. Nunak tiarmiayi. 20 Tura wikia nú chichaman túratniun nékachu asan, Páprun aniasmajai “¿Amesha Jerusarénn̄num wétaj tusam wakeramek? Nuí nu chichaman nekartamawarti” tímiajai. 21 Túrasa “Atsá. Juin̄ pujustajai. Rúmanmaya uunt akupin Akustu Sésar nekartuati” tímiayi Papru. Takui, “nuinkia tuke sepunam pujustá. Tura wi ukunam uunt akupniun akuptuktatjame” tímiajai” tímiayi Jistu.

22 Nuyá Akripia chichaak “Wisha itiursanak nu áishman̄ chichaamun anturkaj” tímiayi. Tutai Jistu tímiayi “Amesha kashinkia anturkattame”. 23 Tura kashin tsawar Akripia Pirinísejai taar, iwiaa-iwiarmamu ajas wayawarmiayi. Sun-tara úuntriíjai tura nú péprunmaya úuntriíjai wayawarmiayi. Tura nuí Jistu, “Papru itiatarum” tímiayi. 24 Tura Papru támatai Jistu tímiayi “Uunt Akripia, tura ashí áentstiram matsatrumna nu, pai, ju áishman̄ íistarum. Ti unturí Israer-aents Jerusarénn̄numsha tura juí Sesarianmasha ju áishman̄kan Páprun kajerainiak yajauch chichartuiniawai. Tura tuke ini-aitsuk, mantamnatniuiti, turutainiawai. 25 Túrasa wíjiainkia tunáa jakamnianka túrachuiti. Kame niisha “uunt akupin Akustu Sésar nekartuati” takui, wisha nin akupkataj tusan wakerajai. 26 Tura wariniak uunt akupniun áatrataj nuna nékachu asan, Páprun atumin itiarjame. Tura nekaska, Akripia, ame iniasta tusan itiarjame. Túrawakmin wi wariniak áartaj nuna nekaatjai. 27 Warí wisha, ni yajauch túramurin̄ áattsuk, uunt akupniunam akupkashtiniaitjai” tímiayi.

26

Papru Akripiaí chichamprumakmiania nu

¹ Jistu nuna tutai Akripia Páprun tímiayi “Wats, amesha tu timi chichamprumakta” tímiayi. Tutai Papru uweje takuí chichatan juarmiayi. ²⁻³ Chichaak tímiayi “Uunt Akripia, ii Israer-shuarti túrutai ainia nu amesha nékame. Tura ashí ii chicharnaiyajnia nusha nékame. Tuma asamtai yamáí wisha ámin chichamprumaktaj tau asan shiir enentáimjai. Israer-aents turutainia nuna mash ujaktatjame. Waitneasam péñker anturtukta’ tímiayi.

Papru ni yaunchu túrutairin ujakmiania nu

⁴ ‘Wi úchichik winia nunkarui tura Jerusaréñnumsha pujusan wi túramajna nuna ashí wíi aents Israer ainia nu nékainiawai. ⁵ Paríséu ajasan, ni akupeamurin itiurchat ain ashí takamtsuk tuke umirniuitjai. Nunasha nékainiawai tura wakeruiniakka etserkamnia aintui. ⁶ Túrasha wikia, jaka-munmaya nantaktin átatui, tiniu asamtai wíniaka emetru-awar itiararmiayi. Túrasha núnaka Yuska ii úuntrin yaunchu tímiayi. Yus tímia nuna túrunattawai wisha tiniu asamtai itiararmiayi, tímiayi. ⁷ Tura ashí mash Israer-shuarti, tuse (12) aents matsatka ájinia nu, ju nantaktin chichaman Yus tímia nuna túrunati tusar nákainiaji. Tuma asar Yus áujkuri, tsawajsha káshisha nú enentáimtuiniiaji. Tura wisha nú chichamnak enentáimta asamtai wíniaka kajertuiniawai, uunt Akripia. ⁸ Warí, atumsha “Yus jakancha iniantkimni-aiti” tátsurmek’ tímiayi.

⁹ ‘Tura wisha yáunchuka Nasaréñnumia Jesusnan umirkaruka kakerkatniuiti, tu enentáimniuyajai. ¹⁰ Tura Jerusaréñnum Yus-shuar ármia nuna kakerkarmiajai. Israer-patri uuntri chichamejai untsurí áentsun Jesusnan umirkarmia nuna sepunam enkeamiajai. Tura nú shuaran máiniakuisha wikia péñkeraiti tu wémiajai. ¹¹ Tura Israer-shuara iruntai jeen wayan ti asutiármiajai, Jesusnan umirkatniun iniaisarar tusan. Tura imiá kakerkaran chíkich nunkanmasha pataatu wearmiajai achiktaj tusan’ tímiayi.

Tamasku jintianam túrunamun ujakmiania nu

(Túramuri 9.1-19; 22.6-16)

¹² ‘Tura Israer-patri uuntri tsankatrukmatat, papin ni surusarmia nujai, Tamasku péprunam wétaj tusan jínkimiajai. ¹³ Tura, uunta, nantu tutupin ai, jintiá wéai newaat ajaki ti tsáapin, tsawái nantujai nankaamas etsantrutramiayi. Tura wijiaí wearmia nunasha núnisaran etsantrurarmiayi. ¹⁴ Tura túrunamtai ashí nunká tepetar wáinkiarmai. Wiki Israer-chichamjai túrutun antukmajai “Sauru, Sauru, ¿urukamtai

imiá pataaturam? Amek enentáimin yajauch awajmamsame, wáaka sanġanmiak numin ijiuma núnismek. Wíi aents kajera asam túruname” turutmai.’

¹⁵ ‘Túrutkui wisha “¿Amesha yáitiam, Uunta?” tímiakai.

Tutai Uunt turutmai “Wisha Jesusaitjai, ame pataatamna núitjai. ¹⁶ Tura nantakim wajaktia. Winia takartusminiam tusan wantintiukjame. Tura ame wáinkiamna nusha etserkat-tame. Tura ukunam wantintiuktatjame. Wáinkiatamna nusha etserkamnium, turutmai. ¹⁷ Tura nuyasha turutmai, Wats yamaisha Israer-shuarchanum akupkatjame. Tura Israer-shuar kajertamainiakuisha, tura chíkich aents kajertamaini-akuisha ayampruktatjame, turutmai. ¹⁸ Péñker jintintiata tusan akupeajme. Kame aencha kiritniumiá jíinkiar tsáapninium wekasarat tusan, tura iwianchin umirtsuk Yúsan umirkarat tusan akupeajme. Tura Winia enentáimtursarmatai Wisha ni tunaarín tsankurattajai. Nuna túran Yusna ajasaru áiniana nujai apujsattajai.” Nuna Jesus turutmai’ tímiayi.

Papru mesekrampra umikman ujakmiania nu

¹⁹ ‘Tuma asamtai, uunt Akripia, Uunt Jesus nayaimp-inmaya wantintiurak turutmia nuna umirkataj tusan pujajai. ²⁰ Enentai yapajiáwar Yus-shuar ajastinian, emka Tamaskunam pujuarmia nuna ujakarmiajai. Tura nuyasha Jerusaréñnumián, Jutía nunġanmayancha tura nútiksanak Israer-shuarchancha nuna ujakarmiajai. Tura ujainiakun “Yus-shuar ajasmarum paant ajasat tusarum, péñker túratarum” tímiakai ashí shuaran. ²¹ Tura wi Yusa Uunt Jeen pujái, Israer-shuar achirkar emetruawar mántuatai tukamá tujintrukarmiayi, Yus winia yaintiu asamtai. ²² Yus winia yaintiu asamtai, iniaitsuk tuke Yus-Chichaman ujainiajai. Uunt ainia nunasha, tura péejchach ainia nunasha ujainiajai. Tura Muisaishsha, Yúsnan etserniusha tiarmia nunak étsereajai. Nú arantka tátsujai. ²³ Krístuka wáitsatniuyayi, tura jakasha émak nantaktiniuyayi, ii uuntri tiniu ármiayi. Tura Krístuka nantaki Yusa chichamen íi áentsun tura Israer-shuarchancha nútiksān ujaktiniuyayi. Nuna tu tiarmiayi. Tura núnaka wisha tu ujainiajai” tímiayi Papru.

Papru Akripian Yus-shuar awajsataj tusa wakerimiania nu

²⁴ Tura nuna takui Jistu kakantar tímiayi “Maaġ, Papru, wáurme. Imiá unuimiatu asam wáurkame” tímiayi.

²⁵ Tutai Papru tímiayi “Atsá uunt Jistu, wáurtsujai. Antsu wi tájana nuka ti nekasaiti. ²⁶ Wi tájana nuna, uunt Akripia jui pu-jana nuka nékawai. Tuma asamtai arantutsuk nin chicharea-jai. Kame ju túrunamu ti paant asamtai niisha nékawai, tajai” tímiayi.

²⁷ Nuyá Akripian chicharuk “Yaunchu Yúsnan etserin áarmari, nekasapitia tátsumek, uunt Akripia. Wikia nékajme. Nekasaiti, tame” tímiayi.

²⁸ Takui Akripia chichaak “Maaj, ishichik awajtame Papru, Yus-shuar ajastin” tímiayi.

²⁹ Tutai Papru tímiayi “Tura ishichík chichamjaisha untsurí chichamjaisha, amesha uunt Akripia, tura ashí winia antur-tukurmena nu, wijiaí métek ajasúk tusan wakerajai. Tura antsu wia núnisan jínkiámua núnaka wakeratsjai” tímiayi.

³⁰ Papru nuna tuasua amikmatai akupniusha, uunt kapi-tiáncha, Pirinísesha, tura nuí ashí pujuarmia nu wajakiarmi-ayi. ³¹ Tura arant wear, túrunamun chichasarmiayi. Tura tiarmiayi “Ju áishman mantamnamnian tunaamkachuiti tura penkesha sepunmasha enkeachminiaiti” tiarmiayi.

³² Tura Akripia Jístun tímiayi “Ju áishman “uunt akupin nekarati” tíchaitkuinkia akupmai makuitji” tímiayi.

27

Páprun Rúmanam akupkarmiania nu

¹ Tura Páprun Ruma péprunam akupkatniun enentáimsarmiayi. Rúmaka tímiai, Itiaria nunkanam pujawai. Wisha Páprujai wémiajai. Pápruncha tura chikichnasha achikma ármia nunasha Akustunu tutai suntara kapitíántrijiai nenakar akupkarmiayi. Nú kapitíáni naari Júriuiti. ² Tura Atramitiummaya kanu Asia nunkanam pepru ármia nuí wétasa pujumia nu enkemprarmiayi. Tura Tisarúnikianmaya áishman, ni naari Aristárku, in páchitkiauyayi. Tisarúnikiasha Masetúnia nunkanmaiti. ³ Nuí enkemprar kashin tsawarar Sitiun péprunam jeamiaji. Nuí jeawakrin kapitíán Juriu, Páprun waitnentak tímiayi “Ame amikrumiun wetá. Au íirmasarti” tímiayi. ⁴ Tura Sitiunnumia jínkir, kanujai wesar nase tukumpramprakrin Chipri núnkaka menanmaani aa ikiukmiaji. ⁵ Tura nayaantsanam wesar Sirisia tura Pampiria nunkanam ayamchik nankamakir Mira péprunam jeamiaji. Nuka Risia nunkanmaiti. ⁶ Nuí jear nú kanu ikiukmiaji tura chíkich kanu Arijiántrianmaya taa Itiaria nunkanam wétasa pujumiayi. Nú kanunam suntara kapitíántri, enkempratarum, turammiaji. ⁷ Tura untsurí tsawant yáitmataik we-wémiaji tura ti wiántkar Nítiumam jeastatuk ajasmiaji. Tura nuisha nase tuke tukumkarta asamtai Sarmun nunkanam ayamchik nankaamakir, Kritia nunkanam áawinini ayamchik wémiaji. ⁸ Tura Kritia nunkanam ayamchik wesar itiurchat akui wáitsar wea-weákuar “Shiir Pujutai” tutainium jeamiaji. Nusha Rasea péprunam tíjiuchiiti. ⁹ Yáitmataik wea asar ti táasmaji. Tura

yumi yututai jeatema asa ti tsúumainiuyayi nayaantsanam wétin. ¹⁰ Tura Papru chicharuk “Amikru antuktarum. Wi nékajai, yamaí wéakrikia ti tsúumainti. Kanusha tura káarak kanunam enketainia nusha menkarattawai. Tura iisha núnisrik kajinchatjiash” tímiayi. ¹¹ Suntara kapitíántrin^{ka} Páprunka anturtsuk, kanú wianniurⁱⁿ kapitíántrin^{cha} tura kanú kapitíántrin^{cha} chichamen anturkarmiayi. ¹² Tura nuí Shiir Pujutai tutainium yumitin pujustin pénkerchaitkui “Nuín^{ka} juyanka wéartai. Pinise péprunam jeamainchuashit” ashí tiarmiayi. Nú péprusha Kritia nunkanam nayaants ayamach pujawai. Nú péprunam yumitin pujustinian wakeriarmiayi, arakia nunkaani kakaram nase nú péprunam jeachu asamtai.

Tsúumainium wekasarmiania nu

¹³ Tuma asamtai ukunam nase nunkaaniá tápiriri ajakui, ii wétin yamaikia pénkeraiti, tu enentáimsarmiayi. Túmakui kanu emetai jiru júusar jíinkir Krítianam ayamchik wear^{mi}-aji. ¹⁴ Túrasha árusan arakiá kakaram nase, Nuristi tuinia nu tukumpramiayi. ¹⁵ Nase kanun tukumpra asamtai iisha atsantratin penké tujinkiamiaji. Túmakui, áankisha juramkitiai tusar iniaisamiaji. ¹⁶ Tura Kritia nunkanam áawinini nan^{ka}amakur nuín^{ka} nase ishichik mijiantmatai, uchich kanu japikir wémiaj nu ti takasar uunt kanunam en^{ker}miaji. ¹⁷ Tura enkerar chapikjai uunt kanun jin^{ki}árarmiayi wewe najanatai tusar. Tura náikim mukutniunam, Serti tutainium nase juramkishtajiash tusar, kanunam yakí tarach aan itiararmiayi. Nu tarach nase útsuktin tusar nenarma ármiaji. Túrawar áyatik nase juramkitiai, tiarmiayi. ¹⁸ Tura kashin tsawarmatai nasesha chíchimisha tímiatrusan kakaram aa asamtai kanunmayan káarak irunmia nuna nayaantsanam ajapawarmiayi. ¹⁹ Menaintiú tsawant nan^{ka}amasmatai iisha ii uwejéjain kanunam káarak iruniarmia nusha entsá ut^{sa}nkarmiaji. ²⁰ Tura untsurí tsawant tsawáisha etsantrach^{mi}ayi tura káshisha yaasha tsaparcharmiayi. Tura nasesha ti kakantar tukumpramkurin “Yamaikia uwempratin atsawai” tiarmiayi. ²¹ Tura iisha ti untsurí tsawant yurumtsuk matsatu asakrin, Papru ajapén wajaki tímiayi “Amikru winia nuik Krítianmayan^{ka} jíintsuk anturtukuitkiurmin^{ka} yamaí ju itiu^r-chatnum pujutsuk tura emen^{kat}matsuk puju^aaji” tímiayi.’

²²⁻²⁴ ‘Yamáí kashi winia Yusru suntari nayaimpinmaya wantintiurkayi. Nú Yúsan umirkaitjiana nu akupturkayi. Tura nu taruti “Ashamkaipia Papru, turutui. Amesha Ruma péprunam uunt akupniunam jeattame. Tura chikichnasha ámijiai kanunam enketainia áarmatai uwempratniun Yus tsan^{kat}karai” turutui. Tuma asamtai, amikru,

shiir enentáimsatarum. Atumsha mash uwemprattarme. Túrasha kánuka mesertatui. ²⁵ Wisha winia Yúsrn nekas enentáimtajai. Yusa suntari turutainia nuna nekas tu túrunattawai, tajai. Tuma asamtai kakartarum. ²⁶ Tura chíchimisha nunka uchich pújakmanum nuí patatmittiaji” tímiayi.

²⁷ Ayu, katurse (14) tsawant nankaasmatai nú kashi Atria nayaantsanam jeamiaji. Nuí nase nánkamas juram wémiaji. Nuyanka kashi ajapén wiantin armia nu nunka ámunam jeateman nekaawarmiaji. ²⁸ Tura urutmá kúnakit tusa nekapmamiayi. Túram tráinta sais (36) mítruuyayi. Nuyasha ékemañ ataksha nekapmamiayi. Nuinkia painti siati (27) mítru nekapmamiayi. Tuma asa nunká anum-satuk ajasun nekaawarmiaji. ²⁹ Tura kayanam ijiukai tusar ashamainiak kuatru jirun kijinian chapikjai kanú senkarin jinikiáwar entsá ajunkarmiaji. Kijin asamtai, init tepeámtai nase juramkichmi tusar túrawarmiaji. Tura wake mesekar, tsawarti tusar matsamarmiaji.

³⁰ Tura matsatainai wiantin armia nu, iikia uchich kanunam enkemprar pisarchatjiash tu enentáimsarmiaji. Túmainiak kanú nujinia chích jirun ajuntai tawa nútiksarañ uchich kanun ajuntai tusar pujuarmiaji. ³¹ Tura tuma wáiniak Papru suntara kapitíañtrín tura ni suntaríncha ujakmiaji. “Ausha uunt kanunmañ enketainiachkuinkia atumsha uwemprashtatrume” tímiayi. ³² Tutai suntarsha uchich kanú chapikrín tsupirkar entsá ajunkarmiaji.

³³ Tura kashin káshik Papru ikiakártasa wakerak tímiayi “Ishichkisha yurumátarum. Atumsha katurse (14) tsawant kánutsuk yurumtsuk pujarme. ³⁴ Seajrume, ishichkisha yurumárum kakaram ajastarum, uwemprataj tusarum. Iimiata, nekaatarum, imiatkisha túmatsuk péemkattarme” tímiayi.

³⁵ Nuna tuasua amik Papru apatkun achik Yúsan yu-mínsamiayi ashí ímmianumañ. Tura puuk yuamiayi. ³⁶ Tura apatkun yuan wáinkiar, ashí aents shiir enentáimsar yurumáwarmiaji. ³⁷ Nusha ashí aents irurmaka jimiará sián nuyá ataksha setenta sais (276) ármiaji. ³⁸ Yurumáwar ejemakar, yurumkanka entsá utsankarmiaji, uunt kanu wampú ajasat tusar.

Kanu penké mesermiania nu

³⁹ Tura tsawarmatai wiantin armia nu, nunkan nekaacharmiaji. Túrasha énkentamunam káanmatak aan wáinkiar “Aí kanu anuntai” tiarmiaji. ⁴⁰ Nuyá jiru entsá ajunman chapikrín tsupirkar entsá ikiukiarmiaji. Tura kanait jinikiárma ármia nuna chapikrín tsupirkarmiaji. Tura tarach kanú nujiin amia nuna nenakarmiaji.

Túram kanu káanmatkanam anumsatuk ajasmiayi. ⁴¹ Tura wainchi jímiar ámunam jeá kanu entsá wayá tepeamiayi. Tura kanú senkarĩkia chíchimi yakí takuir ajíamu asa kupintramiayi. ⁴² Suntarsha, achik júamu armia nú shuaran máataj tusa wakeriarmiayi, yukuak pisararain tusar. ⁴³ Tura kapitíáncha Páprun uwemtikrataj tau asa nuna túratniun tsan̄katkachmiayi. Antsu chichaak “Emka yukuaktin nékarmena nu yukuakrum péemkatarum, tímiayi. ⁴⁴ Nuyá chíkichkia kanunmaya numi, kame nánkamas numi achikrum awamkarum péemkatarum” tímiayi. Tu túrawar ashí iwiaakuk jíintrarmiayi.

28

Marta nun̄kanam túrunamia nu

¹ Tura ashí iwiaakuk jíintrar, nu nun̄ka Marta naartin nekaamiayi. ² Tura nuĩ matsamin armia nu, shiir awaj-tamsarmiayi. Tuma asamtai iisha tsetsema asakrin, tura yumisha yútakui, uunt jinia ikiapáramiayi. Tura “ana-maitiarum” turammaji. ³ Pápruka jinia kukarun ikiaan̄ak jinium pataamiayi. Túmawai napi tsuéran ashamak jiinki, Papru uwejēn nemaramiayi. ⁴ Tura nú nun̄kanmaya aents, Papru uwejēn napi nedaran wáinkiar “Ju áishman̄sha shuáran maj̄chuashit, tiarmiayi. Nayaantsanmaya uwempraitiatan̄ ni yusri iwiaaku átinian suritiawai” tiarmiayi. ⁵ Páprusha ni uwejēn pear napin jinium awan̄miayi. Tura pen̄kesha yajauch ajaschamiayi. ⁶ Tura niisha eáchatpiash tusar ii pujuarmiayi. “Túmatskesha jaka inianchatpiash” tiarmiayi. Túrash̄a ti núkap pujussha pen̄ké najaweachmiayi. Túrunamtai, nuĩnkia nusháa enentáimpr̄ar “Pápruka yúschashit” tiarmiayi.

⁷ Nú nun̄kanam aentsu pen̄keri ámiayi ni naari Pupriu. Nú Pupriu ni jēen in itiaarmamiayi. Tura menaintiú tsawant yurumkancha suramsarmiayi. ⁸ Tura nuĩ pujarin Pupriu apar̄i tsuer, numpajaī ijiarki jáamiayi. Túmakui Papru weri iyumiayi. Tura Yús̄an áujtus amik uwejēn nin awantkamiayi. Túram pen̄ker ajasmiayi. ⁹ Nu túramun nekaawar, nú nun̄kanmaya aents jaa armia nu tariar, niisha pen̄ker ajasarmiayi. ¹⁰ Túram incha ti shiir enentáimturmasar núkap ajampramsamiayi. Túram ukunam ii wétin jeamtai ashí ii atsumamun suramsarmiayi.

Rúmanam jeawarmiania nu

¹¹ Ii wétsuk nú nun̄kanam menaintiú nantu pujusmiayi. Tura nuyá chíkich kanunam en̄kempramiayi. Nu kanusha Arijiántrianmaya yaunchu tau menaintiú nantu yumi yútakui nuĩ pujumiayi. Nú kanu nujiin̄ numi-yus najankamu jímiar

ekemiarmiayi, ni náarin̄kia Kástur tura Púruks. ¹² Iisha nū en̄kemprar weri Serakúsa péprunam jeamiaji. Nū menaintiú tsawant pujusarmiaji. ¹³ Tura jíinkir nuyanka nayaantsa ayamach weri Rijiu péprunam jeamiaji. Nū kanarmiaji. Tura kashin anariā nase suut umpuunti támiayi. Tuma asamtai nú kashinkia Putiuri péprunam jeamiaji. ¹⁴ Nū jeawakrin Yus-shuar pujuarmia nu, ni jeen juramkimiaji. Tuma asamtai nūn̄ chikichkí tumiñ pujusmiaji. Tura nuyanka nun̄kan Rúmanmaani wémiaji. ¹⁵ Tura Rúmanmaya Yus-shuar, ii jeatniur̄in neka ásar jintiá in̄kiunmaktai tusar winiarmi-ayi. Chíkichkia Apiu pepru támanum táarmiayi, tura chíkichkia, Menaintiu Jeā tutainium táarmiayi. Nuna káunkan wáiniak Papru shiir enentáimias Yúsan yuminsamiayi.

¹⁶ Tura ii Rúmanam jeawakrin kapitíán Juriu achikia yarum-man Rúmanmaya uunt kapitíánin ejetimiayi. Túrasha, Pápruka jeā ikiamas niisháa pujustí, tiarmiayi. Tura Páprun íisat tusa chikichík suntarnak ni jeen apujtusarmiayi.

Rúmanam Papru Yus-Chichaman etserkamiania nu

¹⁷ Nuyá menaintiú tsawant nan̄kaamasmatai Pápruka Rúmanmaya Israer-aentsu pen̄ker̄in untuk ikiaan̄ak “Yatsurtiram antuktarum. Wisha Israer-áentsun yajauchin pen̄ké túrachmiajai. Tura ii uuntri akupkarmia nunasha yajauch chicharkachmiajai. Tuma aín Jerusarénn̄um winia achirkar Rúmanmaya áentsnum surutkarmiayi. ¹⁸ Tura nu aencha winia anintsar, akupkatai, turutiarmiayi, wisha pen̄ké yajauchin, mantamnamnia tímianu túrachu asamtai. ¹⁹ Túrasha Israer-shuarka “Atsá, akupkairap” turutiarmiayi. Nu tuma asamtai, “antsu uunt akupin nekarati” tímiajai. Wikia wíi shuara tunaar̄in kapitíánin ujaktinian táchaitjai. ²⁰ Tuma asamtai, yatsurtirmin, atumin untukjarme chichastaj tusan. Yusa anaikiamur̄i, Israer-shuarti náakajnia nu táwiti wi tu étserkui, jūi achikiar jin̄kiámu pujajai” tímiayi Papru.

²¹ Tutai niisha tiarmiayi “Iisha Jutía nun̄kanmaya aentsti, ame yajauch túramu papí pen̄ké wáinkiachuitji. Tura ii shuar nuyá táarainia nusha “au yajauch túraití” tu ujatmakcharmaji. ²² Túrasha ashí nun̄kanam yamaram chichaman jintinian ya-jauch chicharainiawai tama antukji. Tuma asamtai amesha nu warintia enentáimtam nekaatai tusar wakeraji” tiarmiayi.

²³ Nú tsawantai iruntrami tiarmia nú tsawant jeamtai, ti untur̄i aents Papru pujamunam iruntrar̄miayi. Papru jintintiainiak Muisais yaunchu aar akupkamia nujāi tura chíkich Yúsnan etserniu aarmaríjiāisha, Jesus nekas Yusa Anaikiamur̄inti tusa paant jintintiawarmiayi. Nuna tura

Papru RÚMANMAYĀ SHUARAN papí akuptukma

Papru Rúmanmaya Yus-shuaran áatramania nu

¹ Wi Papru Jesukrístu takarniuitjai. Núnisan Yus achirak ni Shiir Chichamen etserkat tusa akatar akuptukmiayi.

² Nu Chichamun Yus yaunchu “akupkattajai” tímiayi. Núnaka Yúsnan etserin Yus-Papinium paant ujakarmiayi. ³ Nu Chichamnum Yus ni Uchirín áujmatui. Ayashijíaiñkia Tawit weeanum akiiniamiayi. ⁴ Tura ni tishiir wakaníjiañkia Yusa Uchirínti. Tura ti kakarmaiti. Jakamunmaya nantakmiajai nekas Yusa Uchiría nu, paant nekanamiayi. Niisha ii Uuntri Jesukrístuiti. ⁵ Ni túramujai Yus shiir enentáimturuk nu Shiir Chichaman etserkat tusa akuptukmiayi. Núnisan ashí nunkanmaya shuar nu chichaman umirkar Jesusa náarín shiir awajsarat tusa akuptukmiayi. ⁶ Atumsha nuyá shuaraitrume. Tura Jesukrístunu ajasarat tusa Yus achirmakuitrume.

⁷ Ashí Yus aneamutirmincha Rúmanam matsatrum nuna ju papin áateajrume. Yus ti péñker awajtamsatniun wakerutmarme. Ii Aparí Yussha ii Uuntri Jesukrístusha waitnen-tramainia ásar imiatkinchanum ti shiir pujustinian yainmakarti.

Papru Ruma péprunam irautinian wakerimiania nu

⁸ Émkasha, átum Yus nekas enentáimtamun ashí nunkanam áujmatenan nekaan Jesukrístun pachisan Yúsan ti shiir yu-mínsajai. ⁹ Tuke enentáirjai Yusa Uchirín ashí shuarnum et-sertajai. Túrakui wi atumin ti Yus aneamutirmincha Rúmanam matsatrum nuna ju papin áateajuke áujtamun Yus nékarui. ¹⁰ Ashí tsawant ni wakerutakuñkia íitjarum tusan Yúsan sea-jai. ¹¹ Nekas íitniun wakerajrume. Nuí jean wakanmin yainkian Yusjai kanakchamin ajasúk tusan wakerajrume. ¹² Kame atumsha tura wisha Yus nekas enentáimtuinia asar mai ikiakánai ajatai tusan wakerajai.

¹³ Yatsurú, tuke íitjarum tusan wakerimjiarme. Túrusha iyatsjarme. Kame Yus-Chichaman ujaakun chíkich shuarnuma áintsan atumíincha Yus kakaram takasman wáinkiatniun wakerajai. ¹⁴ Wikia Yus akuptuku asamtai ashí shuaran ujákártiniaitjai. Unuimiaruncha tura unuimiarchancha, ti nékainia nunasha tura nékachuncha, métekrak ujakartiniaitjai. ¹⁵ Tuma asan atumniasha Rúmanam

pujarmena nunasha Uwempratin Chichaman ujaitjarum tusan pujajai.

Uwempratin Chicham kakarmaiti

16 Nu Shiir Chicham Yusa kakarmarijiai ti kakaram asa ashí shuaran uwemtikramniaiti. Tuma asamtai natsantatsajai. Nekas Israer-shuarnasha tura chíkich shuarnasha núnisan uwemtikramniaiti. 17 Nu chichamnum Yus enentáimsamia nu páantaiti. Júiti: Áyatik Yúsán nekas enentáimtuiniakui Yuska “pénkeraitme” tíminiaiti. Yus-Papiniumsha núnisan tawai: “Yúsán nekas enentáimta nuna Yus “pénkeraitme” tutai tuke Yusjaj shiir wekasattawai.” Tu áarmaiti.

Aentsu tunaari

18 Shuar nekas chichaman nakitrar yajauchin túrataj tusar suriimiainiawai. Túrawar tuke tunaarintin áiniawai. Nu shuaran Yus ti kajerkar ti asutiátniun nayaimpinmaya paant awajsaiti. 19 Tura nu shuarka ashí Yusna nekaamnia nuna Yus paant awajsa asamtai pénker nékainiawai. 20 Kame yámankamtaikniumia Yus wáinchataitiat ni najanamurijiai júka paant nekaamniaiti: Nekas Yus asa tuke kakarmaiti. Nusha ti paant asamtai nu shuar tsankurnarchartatui. 21 Yúsán nékainiyat shiir awajsacharmiayi tura yuminsacharmiayi. Tuma ásar aya ánta nunak enentáimtuiniak ni enentái tunaajaj piakai. 22 Tura ti nekajai tuíniyat enentáimcha núnin ajasaraí. 23 Túmainiak jákachmin Yus imiá shiira nuna iniaisar shuar jakamnia nakumkamun shiir awajenawai. Tura nu arant nanamtinnisha napincha kuntinnisha yajasmancha nakumkar nuna shiir awajenawai.

24 Nu asamtai imiá yajauch enentáimiainiakui “áanik asati” tímiayi Yus. Túramtai ti natsanmainian túrunainiawai. 25 Yusna imiá nekasa nuna nakitrar antsu wait-chichaman anturkar nuna túrin áiniawai. Tuke Yúsak shiir awajsatniun iniaisar antsu ni najanamun tikishmatainiak shiir awajenawai. “Antsu tuke Yúsak shiir awajnasti” tajai.

26 Nuna túrin ásarmatai Yus natsanmainia nuna wakeruktnian tsankatkarmiayi. Túramtai nuwasha áishmanjaj tsanintinian nakitrar nuamtak yajauch awajnainiawai. 27 Núnisan áishmansha nuwajaj tsanintinian iniaisar nuamtak áishmankak tsanirmanainiawai. Ti wakerunainiak ti natsanmainia nuna yajauch túrunainiawai. Tura yajauch túruiniak ni ayashí wáitsatniunak sumamawarmiayi.

28 Tura tuke Yúsán nakitiainia asamtai ti yajauch enentáimiainiak penké túrachminia nuna túrawarti tusa Yus tsankatkarmiayi. 29 Nu shuar ti tunaajaj piaku áiniawai. Tsanirmausha aya kuítniak wakerincha tura

yajauch awajin áiniawai. Nu arantcha awakmakun kajerniusha maṅkartincha tuke máanaincha ananṅkartincha pēṅkercha awajkartincha, tsanumniusha áiniawai. ³⁰ Nu arantcha chikichnasha yajauch áujmatin áiniawai. Yúsnasha nakitiainiawai. Áimniusha áiniawai. Tura “pēṅkeraitjai” tiar naṅkaamantu enentáimtumainiawai. Tunáa túratniun eainiawai. Aparincha nukuríncha umirainiatsui. ³¹ Enentáincha áiniawai. Tana nuna umichu áiniawai. Anenṅkartichu ásar waitnenṅkartichu áiniawai. Tsanṅkurcha áiniawai. ³² Yuska “Shuar nuna túrinkia jákatniuiti” taman nékainiyat tuke túrukin wénawai. Tura nu arantcha chíkich yajauch túramtai ti shiir wararenawai.

2

Shuar tunáa túramun Yus paant nékawai

¹ Amesha enentáimtumastá. “Shuar nu yajauchin túrana nu imiá tunáa shuaraiti” tákumka amesha métek túrakum imiá nekas sumamame. ² Yuska nu tunaan túrin ainia nuna súmamtikiashtinkiait. ³ Amesha nuna túrin “imiá ya-jauchiiti” táyatam amesha métek túrakminkia Yus sumamtiki-attana nuyá ĵitiurak uwemprattam? ⁴ Yus ti waitnentrampa asa nu tunáa ikiukim Nin enentáimtustinian katsuntramuk nákarmawai. Tura pēṅker asa wárik asutiámchakui sumamash-tinaitjai ĵtu enentáimtumamek? Tu enentáimkium ni waitnen-trammari ántar awajsaitme. ⁵ Tura tunaarum enentáimtutsuk tuke túrakmeka súmamtikiatin tsawantai ti tunáa irutmampramujai ti asutniáttame. ⁶ Nu tsawantai ni túramujai métek Yus ashí shuaran akirartatui. ⁷ Shuar tuke pēṅker túrak ashí shiira nunasha tura tuke amuukachmin ainia nunasha wakeruiniana nuna Yus tuke iwiaaku Niiĵiai shiir pujustinian sústartatui. ⁸ Antsu pēṅkera nuna wakerutsuk antsu aya ya-jauchin wakeruiniak Yúsan nakitiainia nuna Yus ti kajerak asutiáwartatui. ⁹ Nekas Israer-shuarsha tura núnisan Israer-shuarchasha tunaan túrin áiniakka ti wáitsartatui. ¹⁰ Antsu nekas Israer-shuarnasha tura núnisan Israer-shuarchancha pēṅker túrin áinia núnaka Yus ti shiir imiatkinchanum apu-ĵsartatui. ¹¹ Yus ashí shuaran akantsuk mai metek iyawai. ¹² Shuar Muisais akupkamun nékatsuk tunaan túraka aya júnisan sumamawartatui. Tura shuar Muisais akupka-mun nékayat tunaan túranka nu akupkamujai sumamawarta-tui. ¹³ Akupkamun aya antukarua nuka Yusai pēṅker áiniatsui antsu antukar umirainia nuna Yuska “pēṅkeraiti” tawai. ¹⁴ Israer-shuarchaka Muisais akupkamun takakaini-achkusha aya ni enentáijiai nu akupkamun umirainiak ¹⁵ nu umireamujai Yus nu akupkamun ni enentáin ikiur-sarua nuka paant nekaamniati. Nujai métek túruiniak shiir

enentáimiainiawai. Tura métek túruiniachkunka péñkercha enentáimiainiawai. ¹⁶ Wi Uwempratin Chichaman étsereaj nui ashí shuar uukrishá túramun ashí paant awajsartatui. Tura nuna etserkatniun Jesukrístun anaitiukmiayi. Nu tsawantai tunaan túrin sumamawartatui.

Israer-shuarsha Muisais akupkamun umircha áiniawai

¹⁷ Ámeka “Tura Israer-shuaraitjai. Muisais akupkamun takakkui winia Yúsruka ti shiir enentáimturui, tátsumeash. ¹⁸ Yus wakeramuncha nékajai. Tura akupkamun nekaan péñkera nuna wakerajai, tátsumeash. ¹⁹ Wakannium kusuraru áinia nunasha jintintiamniaitjai. Tura tsáapninian nekamtikiawarminiaitjai, tátsumeash. ²⁰ Akupkamu ti penker neka asan nekasa nuna unuimiaruitjai. Tuma asan nékachuncha ántuiniachuncha jintintiamniaitjai” tátsumeash. ²¹ Pai, chíkichka unuiniatmesha ¿urukamtai imia ámeka unuimiatsum? “Kasamkashtiniaiti” tu étsereatsmek. Táyatmesha ¿urukamtai ámeka kasamam? ²² “Tsanirmashtiniaiti” tátsumek. Enta, ¿urukamtai ámeka tsanirmam? “Ántar-yusan nakitiajai” tátsumek. ¿Urukamtai ámeka nu yusa jeenia kasamam? ²³ Akupkamun takakjai tusam shiir enentáimtumayatam nu akupkamu umireachkum Yus yajauch awajeatsmek. ²⁴ Yus-Papiniumsha núnis áarmaiti: “Átum péñker umirchamujai Israer-shuarcha Yúsán yajauch chicharainiawai.”

²⁵ Muisais akupkamia nu ashí umireakmeka nii timia núnismek tsupirnaktin péñkeraiti. Tura takamtsuk umireachkumka tsupirnakcha núnisketme. ²⁶ Chíkich shuarsha tsupirnakchaitiat Muisais akupkamun umireakka tsupirnatskesha tsupirnakua áintsankete. ²⁷ Nu shuar tsupirnakchaitiat akupkamun ashí umireak atumin tsupirnakutirmin akupkamu takakuitiatrum umircha asakrumin súmamtikramawartatui. ²⁸⁻²⁹ Kame nekas Israer-shuarka aya pátatkechu antsu tuke enentáijiai Yúsán wakera núiti. Núnisan nekas tsupirnaktinkia aya ayashíjiainchuiti antsu enentáiniam shiir átinia núiti. Nekas akupkamu aya áarchamuiti antsu nekas enentáijiai umirkamua núiti. Nekas tú tura núnaka aents shiir enentáimtuiniachkuisha Yus shiir enentáimtawai.

3

¹ Núnis aisha Israer-shuar ainia nu ¿warí péñkernak takakainia? Tura tsupirnaktincha ¿wariniak yayá? ² Ti péñkeraiti. Warí, émkaka, Yus ni chichamen Israer-shuaran súsacharmakia. ³ Kame chíkich chíkich umichu áiniakui Yus tsanatkamia nuna nú shuaran súsachmatainkia nuikia “Yus umichuiti” ¿títinkiait? ⁴ Péñkea. Antsu Yuska nekas túratniua

nujaj métek ashí túriniaiti. Shuar umichu áiniakuisha ni támarin mash umiktatui. Ni tamajaj shuáran wáitrin awajeakka nusha péñkeraiti. Núnisan atí. Yus-Papisha métek tawai:

“Támena nuna “imiá nekasaiti” tiartatui, tura súmamtikramataj túniakuisha nupetmaktatme” tawai.

⁵ Nu arantcha, “Wi tunaan túramujaj Yus imiá péñkera nuna paant awajeakka ¿urukamtai winia asutiua? ¿Nuka péñkerkait?” tíchatapash. (Kame aents chichainia núnisnak tajai.) ⁶ Warí, Yus péñkerchaitkiunka ¿itiurak ashí shuara tunaarin súmamtikiawarat? Kame imiá péñkeraiti.

⁷ Núnisan, “Wi umirkachmajaj Yus tuke umiiniana nuna paant awajeaknaka nuikia nujaj in shiir awajsamta ¿urukamta “tunaitme” túruta?” tíchatapash. ⁸ Warí, “tunáa túramujaj Yúsan péñker awajeajaj,” tú nekas enentáimpramniaitkiunkia shuar nuikia “Wats, ashí péñker áti tusar tunáa túratai” tumin ainti. Kame chikich shuar in kajertamainiak “nuna jintinti-ainiawai” túramji. Nu shuar sumamawartin áiniawai.

Ashí shuar tunáa túraitji

⁹ Nuikia Israer-shuartikia chikichjaj nankaamas ¿péñkerkaitiaj? Penkesha. Warí, Israer-shuartisha Israer-shuarchajaisha ashí métekrak tunaan túrin áiniawai. Núnaka jú áarmajaj paant awajsaitjai. ¹⁰ Yus-Papisha núnisan tawai: “Péñkeran túrin chikichkisha atsawai.

¹¹ Yúsnan nekaatniun nakitiainiawai. Yusnasha eainiatsui.

¹² Yusnumia kanakiar menkakatniunam wénawai. Chikichkisha péñkeran túrin penké atsawai.

¹³ Ashí yajauch chichainiak iwiarsamu yama urainiua núnisan áiniawai. Ni chichamejaj tuke anankartin áiniawai. Chichame napía áintsan najamin áiniawai.

¹⁴ Aya yajauchin kakaram áujmatin áiniawai.

¹⁵ Máataj tusa wárik yujarin áiniawai.

¹⁶ Aya ti itiurchat ti yajauch awajin áiniawai.

¹⁷ Shiir pujustinian nékainiatsui.

¹⁸ Ishichkisha Yúsan ashamenatsui.”

¹⁹ Yaunchu akupkamun umirkatin ainia nú shuar aya tákamtak umirkatin áiniawai. Tuma asamtai ashí shuar umirkachu ásarmatai Yus nujaj súmamtikiawartatui. Túrakui niisha pachischamin áiniawai. ²⁰ Akupkamuka aya ii tunaarin paant awajturmajaj. Tuma asamtai akupkamu péñker umirkatniujaj Yus “péñkeraitme” turamchamniaitji.

Aya Yus shiir enentáimtusar uwempramniaitji

²¹ Yus-Chicham yaunchu áarmanum itiura Yus in “péñkeraitme” túramminiaitaj nuna paant tawai. Kame akupkamujajinchuiti. ²² Antsu iisha ashí shuarsha núnisan aya Jesukristu shiir enentáimtakrin Yus “péñkeraitme”

túramminiaitji. ²³ Kame ashí shuarti tunáa túraitji. Tuma asar Yusjaj métek pénker ajastin penké jeatsji. ²⁴ Tura Yus in waitnentrama asa kuítchajaj “pénkeraitme” túramji. Jesukristujaj uwentikrampra asa túramji. ²⁵ Tura Krístun akupkamiayi ni jakamujaj ashí tunaan asakátratniun. Túramtai shuar Nin nekas enentáimtuiniakui Yus tsan̄kuramniaiti. Yaunchu tunáa túramun katsunteak enentáimtuschamiayi. Yamái tsan̄kuramnia nuna yaunchu nekáa, nuna túramniuyayi. ²⁶ Tura yamaiya tunaancha tsan̄kureak ashí shuar Jesusan nekas enentáimtuinia nuna “pénkeraitme” tuke tíminiaiti. Kristu jakamujaj nuka paant ajasai.

²⁷ Nújajinkia ii pénker ajasjina nu “winia kakar-marjaj túrunajaj” tíchamnia asar Ɂan̄kaamantu enentáimtumarminkaitiaji? Penkesha. Warí, akupkamu umitsuk aya Kristu nekas enentáimtakrin Yus “pénkeraitme” túramji. ²⁸ Nujaj páantaiti. Akupkamu umirtsuk aya Jesukristu shiir enentáimtakrin Yus “pénkeraitme” túramminiaitji.

²⁹ Warí, Yuska Israer-shuarnasha tura núnisan Israer-shuarchancha mai ni Yúsr̄inchukait. ³⁰ Kame aya chikichik Yúschakait. Tura tsupirnakuncha tsupirnakchancha mai metek aya Jesukristun nekas enentáimtuiniakui “pénkeraitme” tíminiaiti. ³¹ Shuar Yúsan shiir enentáimtamujaj pénker ajastin áiniakui nujaj Ɂakupkamu ántar awajsamukait? Atsá. Antsu nuna nan̄kaamas umirkatin awajsamuiti.

4

Apraámsha Yúsan shiir enentáimtamujaj pénker ajasmiania nu

¹ Ashí Israer-shuara uuntri Apraám enentáimtustai. Niisha Ɂitiurak Yusjaj pénker ajasma? ²⁻³ Ni pénker takasmajaj Yusjaj pénker ajasuitkiun̄ka nan̄kaamantu enentáimtumarainti. Antsu Yus-Papí tawai: “Apraám Yúsan shiir enentáimtakui Yus “pénkeraitme” tímiayi” tawai. Nu túramu asa Apraámsha Yus ímmianum nan̄kaamantu enentáimprachminiaiti. ⁴ Shuar íniamna nu takasmatai Ɂaya tsan̄ka asam akiktatmek? Warí, ni takasmanum páchitsuk akikchatniukait. ⁵ Antsu shuar ni pénker turamuri enentaimtsuk áyatik “Yus tunáa shuaran pénker awajniuiti” tu enentáimtakui Yuska tsan̄ka asa “pénkeraitme” tawai. ⁶ Tura pénker túrachunak Yus “pénkeraitme” takui nu shuar shiir warasminiaiti. Núnisan tawai uunt akupin Tawit:

⁷ “Shuar ashí ni tunaarin Yus asakátar tsan̄kuramu ana nuka shiir enentáimpramniaiti.

⁸ Uunt Yus ni tunaarin enentáimtachma asa ti warasminiaiti.”
Tu tímiayi Tawit.

9 ¿Aya tsupirnakukeash warasminiait? Tura tsupirnakchasha waraschamniakait. Warí, Apraám Yúsán shiir enentáimtakui Yus “pénkeraitme” tímiayi. 10 Tura Apraám tuke tsupirnatsajin Yus nuna tímiayi. Emka Yus “pénkeraitme” timia nú ukunam Apraám tsupirnakmiayi. 11 Apraám tsupirnatsuk Yúsán shiir enentáimtusmatai Yus “pénkeraitme” tusa “tsupirnaktiniaitme” tímiayi. Nújainkia ashí Yúsán shiir enentáimtuinia nú shuar tsupirnatskesha Apraám weeá áiniawai. Tura nu shuaran Yus “pénkeraitme” tawai. 12 Tsupirnakusha aya tsupirnakusa asa Apraám weeá áiniatsui antsu nu arant Apraámjaj métek Yúsán shiir enentáimtuinia nuka Apraám weeá áiniawai. Kame Apraám tuke tsupirnatsuk Yúsán shiir enentáimtusmiayi.

Yus shiir enentáimtamujaj Nii timia nu uminkiattawai

13 Yaunchu Apraáman Yus chicharuk “Amincha amée weeá shuarnasha jú nunkan susattajai” tímiayi. Nunasha Apraám Yus akupkamun umireakui tíchamiayi. Antsu Apraám Yúsán nekas enentáimtakui Yus “pénkeraitme” taku nuna tsan̄katkamiayi. 14 Kame aya akupkamun umirniun súsatniutkiniukia nuikia Yus enentáimtustin ántrai. Tura Yus Apraáman timia nusha ántrai. 15 Akupkamu akui shuar umirkachka ti asutniáshtatuak. Tura atsakuinkia ¿asutniátniukait? ¿Itiurak umirtsuk ikiuktin?

16 Tuma asamtai Yus ti anenkartin asa Nin nekas enentáimtuinian ashí tsan̄katkai. Nújainkia Apraám weeasha Yus Apraáman timia nuna páchitsuk wáinkíártatui. Iisha Apraámjaj métek Yus nekas enentáimtakur ní weeitji. Tuma asamtai Muisais akupkamun umirniuncha tura umirniuchuncha mai metek ashí in Yus ashí Apraáman timia nuna tsan̄katramkattaji. 17 Kame Yus-Papinium Apraám áatramuiti: “Untsurí shuarsha amée weeá ajasartatui.” Nu asamtai iisha Apraámjaj métek Yus shiir enentáimtakrinkia Yus incha Apraám weeá áintsan̄ íirmaji. Nú Yуска ti kakaram asa jakancha iwiaaku awajniuiti; tura atsana nunasha ana nútiksā nājanui.

18 Yus “ti pampañtatme” takui Apraám ti uuntach áyat Yus timian enentáimtak yajutmartinian nákasmiayi. Nujaj untsurí shuar ní weeá ajasarmiayi, Yus timia áintsan̄. 19-20 Apraámsha sian̄ (100) uwí takakuitiat tura ni nuwé Sarasha júretsuk uunt ajasmataisha tuke iniaitsuk Yus tímia nuna nekas enentáimtusmiayi. “Yus nekasash ta” tútsuk shiir awajsamiai. Nujajsha nuna nan̄kaamas kakaram ajasmiai. 21 Tuma asa “nekas Yus tana nuna páchitsuk umiktatui” tu enentáimpramiayi. 22 Nu asamtai Yus “pénkeraitme” tímiayi.

23 Tura Yus nekas enentáimtamunam Yus “pénkeraitme” tana nu aya Apráámnak áatrachmaiti. ²⁴⁻²⁵ Antsu incha túramji. Iisha núnisrik ii Uuntri Jesus nekas enentáimtakrinkia Yus incha “pénkeraitme” turamtatji. Jesuska ii tunaarín jarutramkatniun surunkamiayi. Tura nujai Yus in “pénkeraitrume” taku Jesusan ataksha iniantkimiayi.

5

Yus “pénkeraitme” túramkurin shíiraiti

1 Tuma asamtai Yus nekas enentáimtakrin Yus “pénkeraitme” túramji. Nujai iisha Yusjai shiir nawamnaikiar pujaji. Núnaka ii Uuntri Jesukrístu ni jakamujai sumartamkamiayi. ² Tura Nii shiir enentáimtakur Yusai weankaitji. Tura Kristu jarutramkakrin Yus ti anenmaji. Tura tuke anenma asakrin Niiijai métek shiir ajastin náakur waraaji. ³ Nu arantcha yamá itiurchat pujayatrik nu itiurchatjai unuimiartatji tusar waraaji. Katsuntratniuncha unuitiamji. ⁴ Tura nu unuimiarar ii katsuntramu paant átatui. Tura nuyá Yus ti shiir awajtamsattajnia nuka shiir enentáijjai nákastatji. ⁵ Nu ti shiir enentáimsar nákamujai ananmamtsuji. Yuska ni Shiir Wakanin ii enentáin pujurtamuk ni anenkartutairin ti paant awajturmaji. Tuma asamtai Yus túratin náakajnia nu imiá nekas wainkiattaji.

⁶ Iikkea penké uwemprachmin asakrin tsawant jeamtai Kristu ashí shuara tunaarín jarukmiayi. ⁷ Shuar chíkich shuuran uwemtikratniun ¿jaruktatuak? Pénker shuar ain jarukchattawai. Kame ti penkeraitkiuinikia jarukchaintiaash. ⁸ Antsu ii tuke tunáa árinin Kristu jarutramkamiayi. Nujai in ti anenmajnia nuna ti paant iniakturmaji. ⁹ Tura ni numpejai tunaaríncha awajsamu asar imiá nekas Yus asutiámatniua nuyá uwempraitji. ¹⁰ Yusa nemasri áyatar Yusa Uchiri jaka-mujai yamaikia Yusjai shiir nawamnaikiar pujaji. Nu arant nuikia Kristu tuke iwiaaku asa iijiai tsaninkiu asa ashí ya-jauchinmaya uwemtikramar tuke shiir awajtamsattaji. ¹¹ Ii Uuntri Jesukrístu jakamujai Yusjai shiir nawamnaikia asar ti waraaji.

Atansha tura Krístusha túrawarma

¹² Ayu. Yámankamtaik emka áishman Atan niniki tunaan túramtai nú tunaajai ashí shuar tunaarintin ajasarmiayi. Tura ashí tunaarintin ajarar mash jákatin áiniawai. ¹³ Akupkamu atsakuinkia umirkachma nekaachminiaiti. Tuma ain Muisais akupkamu atsaisha tuke tunaan túrin ármiai. ¹⁴ Atan pujumia nuyá Muisais tuke akupeatsain shuara tunaari paantcha ain ashí shuar tunaan túrawar jákarmiayi. Kame ni tunaari

Atanna áintsachauyayi. Ataŋka Yus akupkamu paant ujakman umirkachmiayi. Antsu nu shuar Yus akupkamu paant nékainiachiatan tunaan túrin áiniak jákarmiayi. Tura Ataŋka Krístujai apatkar enentáimpratai.

¹⁵ Ataŋ tunáa túramia nujai apatka iisam, Yus in tsankatramaj nuka nankaamas péŋkeraiti. Kame Ataŋ nínki tunaan túramujai ashí aents untsurí armia nu, tunaarintin áiniak, jákarmiayi. Tura Yus in ti anenma asa chikichik áishmanjai nuna nankaamas tí shiiran tsankatramaji. Jesukrístujainkia untsurí shuaran uwemtikrar ti shiiran tsankateawai. ¹⁶ Ataŋka tunaari imiá yajauch ain nuna nankaamas péŋkeran Yus tsankatramkaitji. Iis, aya chikichik tunaan túramujai aents sumamawarmiayi. Antsu Yus uwempratniun tsankatramaj nújainkia ti untsurí tunaan asakáruit, tura “péŋkeraitme” túramji. ¹⁷ Chikichik áishman tunaan túramujai aents jákatin áiniawai. Tura nuna nankaamas chikichik áishman Jesukrístu túramujai ti shiir pujustatji. Kame Yus ti anenma asa ii péŋker túratsrini “péŋkeraitrume” túramji. Nu asamtai yamaram iwiaakmanum kakaram ajaji.

¹⁸ Ataŋ tunaan túramujai ashí tunaarintin ajaras jákarmiayi. Núnisan Jesukrístu péŋker túramujai ashí shuar Yus “péŋkeraitme” timia nuka yamaram iwiaakmajai tuke pujusartatui. ¹⁹ Núnisan chikichik áishman umirkachmajai untsurí tunaarintin ajararmiayi. Tura chikichik áishman umirkamujai untsurí shuar péŋker awajnasarmiayi.

²⁰ Wats, tunáa ti paant atí tusa Yus ni akupkamurin susamiayi. Túrasa ti tunáa pampaakui Yus nuna nankaamas waitnentramak nu tunaan asakátramji. ²¹ Shuar tunaan túrin ásar jákatin árimiayi. Tura núnisan ii Uuntrí Jesukrístu túramujai Yus in “péŋkeraitrume” túramkurin iisha tuke iwiaaku pujustiniatji.

6

Krístujai jaka asar tunáa túrachminiaitji tura Krístujai tsanínkiu asar iwiaakuitji

¹ Núnisaitkiuinikia Yus nankaamas waitnentrampratai tusar ¿tunáa túrattajik? ² Péŋkea. Warí, iikia tunáa túrashtin jákaitji. Jáka ¿itiurak tunaan túramniait? ³ Imianniutikia Krístujai tsanínkiu asar imianir Nijijai métek jaka áintsar aji. ⁴ Tura imianir Krístujai jaka áintsar métek iwiarnasuitji. Tura Yus ti kakaram asa Krístun jakan iniantkimia núnisan incha nu kakarmajai yamaram enentáijiai péŋker wekasatniun iniantankimiaji.

⁵ Krístujai tsanínkiu asar Nijijai métek jaka áintsanketji. Tura núnisan Nijijai métek nantaktiniaitji. ⁶ Yaunchu

enentáimtai_nkia Krístujai métek jaka asamtai ii yajauch wakerutain emen_kátrutmakuitji. Tuma asamtai yamaikia pen_{ké} umirkashtiniaitji. ⁷ Kame ¿jáka itiurak tunaan túrat? Yamaikia an_kant ajasuitji. ⁸ Iisha nekas Krístujai jákaitkiurkia Nii_jjai métek tuke iwiaaku pujustin enentáimji. ⁹ Kame Krístuka chikich_{kí} jaka nantakin asa atakka jákashtatui. Túmaitkiui atakka ajakrachminiaiti. ¹⁰ Kristu chikich_{kí} jaka asa ashí tunaajai itit awajsachmin ajasuíti. Tura yamaikia iwiaaku pujá asa Yúsan shiir awajsatniun pujawai. ¹¹ Atumsha núnisrumek jaka áintsarum tunáa túrachmin enentáimtumastarum. Antsu ii Uuntri Jesukrístujai tsani_nkiu asarum iwiaaku pujakrum Yus shiir awajsatarum.

¹² Nu asamtai tunaaka ayash_{miin} akuptamkashtiniaitrum. Ayashí wakeramuri umirkashtiniaitrum. An_kantaitrum. ¹³ Atumi ayashí tunaan túrat tusarum ikiasairap. Antsu jakamunmaya nantakin asarum Yus wakeramu túratin surumaktarum. Tura ayashmisha aya pen_kernak túratí tusarum Yus íktustarum. ¹⁴ Akupkamu umirkatniujai iwiaaku pujatsrume. Antsu atumin Yus ti anenma asa yamaram iwiaakman suramsaitrum. Tuma asamtai yamaikia tunaaka nupettamkachminiaiti.

Tuke umireajnia nuna takarniur_intji

¹⁵ Nuikia akupkamu umirtsuk antsu Yus ti anenma asakrin iwiaaku pujakur ¿“Páchitsuk tunaan túramniaitjai” títiatjik? Pén_kea. ¹⁶ Tuke umireajnia nuna takarniur_intji. Nuka nékatsrumek. Tura ni takar_in ajasam umirkatniuitme. Tuma asamtai tunáa umirkurkia ni takarniur_intji tura umirkar jakattaji. Tura Yus umirkurkia pen_ker wekasattaji. ¹⁷ Atumsha yáunchuka tunáa umirniuiatrum ikiukrum yamaikia nekas chicham antukurmena nu nekas atumí enentáij_jjai umirkaitrum. Tuma asamtai Yus ti yum_insatniuiti. ¹⁸ Yamaikia tunaanumiá an_kant ajasu asarum ti pen_ker wekasatniunam pachiinkiaitrum. ¹⁹ Paant nekaak tusan takarniun pachisan tájarme. Wats, yaunchu atumí ayashí mu_jjmiainian tura ashí yajauchin túrat tusarum tsan_kamakmarme. Núnisrumek yamaikia atumí ayashí pen_keran túrat tusarum tura tuke Yusjai shiir wekasat tusarum tsan_kamaktarum. ²⁰ Atumsha tunáa umirniuyarme nuikia pen_ker wekaichauyarme. ²¹ Tura nújaisha ¿warí pen_kerna yáinmakmarum? Iista, yamá natsanmainchakait. Nusha jákatniunam júawai. ²² Antsu yamaikia, tunaanumiá uwempra asarum Yus umirniuitrum. Antsu júka Yusjai shiir wekasatniunam júawai tura nuyá tuke iwiaaku pujustatrum. ²³ Tunáa takarkumka tuke jákatniun akirmaktatui. Antsu Yuska

iikia takaatsriniñ penké ántar tuke iwiaaku pujustinian suramsattaji. Ii Uuntri Jesukristujai tsaninkia pujá asakrin nuna túrutmattaji.

7

Akupkamujai ankantaitji

¹ Enentáimpratarum yatsuru. Jáka akupkachminiaiti. Aya iwiaakna nu akupkamniaiti. Nu paant nékatsrume. ² Wats, nuwa nuátkamu ni aishri iwiaakkui niijiai tsanin pujustini-aiti. Tura aishri jakamtai ankant ajawai. ³ Tuma asamtai aishri iwiaakañ chích áishmanjai tsaníakka tsanirmawai. Tura ni aishri jakamtai chích áishmanjai páchitsuk nuatnakminiaiti tura nuikia tsanirmatsui.

⁴ Núnisrume atumsha, yatsuru, Kristu ayashí muchit-marí ajasu asarum akupkamu emettachmin jaka áintsarum ajasuitrume. Túrakrum Krístujai nuatnaikiatin áintsarum ankantaitrume. Niisha jakamunmaya nantakniuiti. Yamaikia Krístunu ajasu asar Niijiai tsaninkiar Yus wakeramu péñker túratniuitji. ⁵ Yaunchu wakerutai umirniuyaj nuí akupkamu enentáimtusar nuna nankaamas yajauchia nu wakerimji tura jákatniunam juramkimji. ⁶ Antsu yamaikia akupkamu emettachmin jaka asar ankant ajasuitji. Túrunar akupkamu yaunchu áarma nu iniaisar yamaikia Yusa Wakanijiai tsaníakur yamaram iwiaakmajai péñker wekasamniaitji.

Winia enentáiruñ tunáa ana nu

⁷ Núnisaitkiuinikia “Akupkamu yajauchiiti” ¿titiajiash? Atsá. Warí, akupkamuka tunaan ti paant awajeawai. Akupkamu “Chikichna wakerukaip” táchakuinikia wakerukchaajai. ⁸ Tura nu akupkamun enentáimtakui winia enentáiruñ tunáa ana nu ashí yajauchin ti wakerumtikrimiayi. Kame akupkamu atsakui tunaan ti enentáimtichaintjai. ⁹ Yaunchu akupkamun nékachkun nánkamsanak enentáimniuyajai. Tura akupkamun nekaan tunaan nekaamjai tura jaka áintsanak ajasjai. ¹⁰ Tuma asamtai akupkamujai péñker wekasatniuitiatan umirkatniun tujintiakuí aya jákatniunam jurukni. ¹¹ Kame tunáa wakerutainkia nu akupkamujai anankrua péñker iwiaaku pujustinian surutsuk nu akupkamujai jákatniunam jurukmiayi.

¹² Tuma asamtai akupkamuka Yusna asa ti penkeraiti. Yajauchichuiti. ¹³ Nuikia ¿pénkera nu jákatniunam júrawak? Atsá. Antsu tunáa wakeruktin jákatniunam jurukmiayi. Nuna tura asa tunáa imiá yajauchia nu nekaamniaiti. Tura tunáa wakerutai péñker akupkamujai jákatniunam jurukmiatai, nujai Yus “tunáa wakerutai imiá yajauchiiti” tusa paant awajsamiayi. ¹⁴ Akupkamuka Yúsnaiti. Nu paant nékaji.

Antsu wikia ayashna nuna wakerakun tunaan umirea-jai. ¹⁵ Kame túrajna nuna itiurchat enentáimtajai. Pénker túratniun wakeraj nuna túratsjai. Antsu nakitiaj nuna nekaska túriniaitjai. ¹⁶ Akupkamu pénkeran nekaan umirkatniun wakerajai. Túrayatnak umirchaitjai. ¹⁷ Tuma asamtai wíchaitjai tunaan wakerakun túrajna nuka. Antsu winia enentáirui tunáa wakerutai pujá asa nu túrumtikriniaiti. ¹⁸ Yaunchu enentáimtai winia enentáirui pujana nu penké yajauchiiti. Nuna ti paant nékajai. Tuma asamtai pénker túratniun wakerayatnak penké tujintiajai. ¹⁹ Pénker túratniun wakerayatnak túratsjai. Antsu tunaan nakitiaj nuna túrajai. ²⁰ Nu asamtai nakitiaj nuna túrakun wíchaitjai antsu winia enentáirui tunáa wakerutai pujana nu túriniaiti.

²¹ Júnisaiti. Pénker túratniun wakerakun aya tunaan ínkiuajai. ²² Nekas enentáijjai Yusa akupkamurin wakerajai. ²³ Tumaj yaunchu enentáimtai winia enentáirui pujurtak nupettawai tura nekas wakeraj nuna akirturui.

²⁴ Maa, ti waitiajai. Jú ayash wakeramujai jákatniunmaya zyaki uwemtikrurat? ²⁵ Yuska ii Uuntri Jesukristujai túrutmamniaitji. Tuma asamtai Yúsán ti yumínkiajai. Ayu. Winia enentáirjai Yus akupkamun umirniuitjai. Antsu winia ayashrujai tunaan umirea-jai.

8

Yusa Wakaníjai pénker wekasatin

¹ Jesukristujai tsanínkiarun Yuska “tunaan túrawar jákatniunam wémin áiniawai” tatsui. Nu shuar ni ayashi wakerana nuna umirtsuk Yusa Wakaní wakerana nuna umirainiawai. ² Jesukristujai tsanínkiu asakrin Yusa Wakaní nekas iwiaaku awajtamsaitji. Tuma asamtai tunáa túratniunmaya tura jákatniunmayasha ankant ajasuitji. ³ Ayash wakerutainkia, wi akupkamun enentáimtakui, nuna nankaamas tunaan wakerumtikrimiayi. Tuma asamtai akupkamuka yáinkiachminiuyi. Antsu akupkamu tujinkiamia nuna Yus túraiti. Ni Uchirín ayashtin awajas tunaan jarukat tusa akupkamiayi. Tura nujai ayash tunáa wakeramun nupetkamiayi. ⁴ Túramtai ii yamaikia ayash wakerana nu umirtsuk tura Yusa Wakaní wakeramu túrar akupkamu tana nu umirniuitji. ⁵ Ayash wakeramun umirainia nu, ayashnia nunak enentáimtuiniawai. Antsu Yusa Wakaní wakeramun páchinia nuka Yúsán enentáimtuiniawai. ⁶ Ayashnia nuna enentáimtuinia nú shuar jákatniunam wénawai. Antsu Yúsán enentáimtuinia nuka Yusjai shiir nawamnaikiar tuke pujusartatui. ⁷ Aya ayash wakeramun enentáimtuinia nú shuar Yusa nemasri áiniawai. Yus akupeamun nakitiainia

ášar ni taman umirkatniun penké jeainiatsui. ⁸ Tuma asamtai shuar ni ayashí wakeramurí warareakka Yúsán shiir awajsachminiaiti.

⁹ Tura átumka ayash wakeramu umirtsuk tura Yusa Wakaní pujurtamkurmin ni wakeramu enentáimtiniaitume. Ashí shuar Krísturtin ainia nu ni Wakanin takaku áiniawai. Takakchaitkiunka nuikia Krístunuchuiti. ¹⁰ Tura Kristu atumin pujurtamkurminkia atumí ayashí tunaajai jakamnia ain Yus “pénkeraitme” túramu asamtai atumí wakanínkia nekas tuke iwiaakuiti. ¹¹ Yus Jesukrístun jakan iniantkimiayi. Tuma asamtai ni Wakaní atumí enentáin pujurtamkurminkia Jesusan iniantkimia núnisan nu Wakanjai yamaram iwiaakmajai iniantamkittiarne.

¹² Tuma asamtai, yatsuru, ayash wakeramu penké umirkashtiniaitji. ¹³ Ayash wakeramu umirniuitkiurmeka jakattarme. Antsu Yusa Wakaní pujurtamkurmin ayash wakeramu nupetkarmeka pénger wekasarum nekas iwiaaku átatume.

¹⁴ Ashí shuar Yusa Wakaní timiajai métek wekainia nu, nu shuar nekas Yusa uchirínti. ¹⁵ Yusa Wakaní in pujurtamkurin Yusa uchirí ajasar sapijmiatsuk Yusai weamkar “Aparú” tímimniaitji. ¹⁶ Nu Wakan “nekas Yusa uchirínme” ii enentáin túramji. ¹⁷ Tura ni uchirí ajasu asakrin Yus tímia núnisan ashí Níiniun suramsattaji. Krístun ashí susattana núnisan incha suramsattaji. Yamái Krístunu takaakur wáitiakrikia ukunam Krístujai métek ti shiir awajnastatji.

¹⁸ Maa, yamá ti wáitiakrishá ukunmanka nayaimpiniam ti shiir pujakur nu wáitsamu kajinmatkittiaji. ¹⁹ Tsawant jeamtai Yus ashí ni shuarin Niiijai métek ti shiir awajsartatui. Nuin nekas Yusa uchirí ainia nu ti paant nekanattawai. Nu tsawantan wáinkiatniun ashí Yus najanamu írunna nu ti nákainiawai. ²⁰ Ashí Yus najanamia nuna yámankamtaik ti pénger najanamiayi. Túrusha yajauch ajasmiayi. Nusha ní neaskeka túrunachmiayi. Antsu Yus ukunam ataksha iwiarnartin atí tusa tunáa wayamunam yajauch ajasat tusa tsankatkamiayi. Tuma asamtai iwiarnartin tsawantan nákawai. ²¹ Nu tsawantai ashí Yus najanamu emesnartinniumiá uwemprartatui. Tura ashí Yus najanamuka shuar Yusa uchirí ajasarua nujai métek shiir awajnasar ankant ajasartatui. ²² Yamaisha ashí Yus najanamu ainia nu, nuwá jatema wáitia nunis ti wáitiainiawai. ²³ Yus najanamuka ashí wáitiainiawai. Iisha Yusa Wakaní takakiatar ti wáitiaji. Tura Yusa Wakaní takakkur ashí Yus suramsattajnia nu nékaji achiktin. Tuma asar nekas Yusa uchirí paant awajnastin tsawant nákaji. Nuisha ii ayashísha ankant awajnastatui. ²⁴ Nu tuke enentáimtuki

wéakur takamtsuk uwemprattaji. Yamái nu wáinchiatar tuke nákaji. Warí, ¿wáinjinia nu nákajik? ²⁵ Tuma asar tuke waincha asar katsuntrar nákaji.

²⁶ Nu arantcha ii kakarmachu nekapeakrin Yusa Wakaní yáinmaji. Kame Yus áujsatniusha nékachkurin in yáinmaji. ¿Warí seattaji tura itiur seatjik? Nu nékatsji. Tura itiurchat pujakur ti wáitiakrincha Yusa Wakaní in áujturmají. ²⁷ Tura Yus ii enentáin enentáimtaj nuna nékaiti. Tuma asa ni shuari asakrin ni Wakaní ni wakeramujai métek seatramkurin ántawai.

Ti nupetmakuitji

²⁸ Yus anea asakrin ashí nan̄kaatamjinia nujai Yus pujurtamji. Tura nujai pen̄ker awajtamji. Nu paant nékaji. Tura Ni wakerimia núnis̄an̄ Ní shuar awajtamsaitji. ²⁹ Yámankamtaiknumīa in nekarmak ni Uchirí Jesukristujai métek ajasat tusa achirmakmiaji. Nujai Yusa uchirí untsurí ajasji. Tura Kristu ii iwiairinti. ³⁰ Tura Yus achikmia nuna Niiniu awajsamiayi. Tura nu shuaran “pen̄keraitrume” tímiayi. Tura ti shiir awajsamiayi.

³¹ Wats, nuikia Yus in yáinmakrin ¿yaki in nupettamkattaji? ³² Ni Uchirín̄cha suritramkachmiaji antsu in jarutramkat tusa akupturmakmiaji. Tura asa ni Uchiríjiaí métek ti shiira nuna ashí suramsashtatjik. ³³ Yus achikmia nú shuaran ¿yaki sumamtikiat? Yus Ápaka “pen̄keraitrume” tiniu asa pen̄ké túrashtatui. ³⁴ Tura ¿yaki “jiniun apenáti” titi? Warí, Kristu pen̄ké túrashtatui. Antsu nu shuaran jarukmiayi. Tura nantaki Yusa untsuurin̄ ekemas in áujturmají. ³⁵ Kristu ti anenma asakrin in akantamkitin atsawai. Wáitiakrish̄a, itiurchat ín̄kiuakrish̄a, shuar áin̄tramkurnisha, tsukamakrish̄a, entsat̄i atsakuisha, tsúumain̄jaish̄a, tura mantamnakrish̄a, nujai “Kristu anentsui” tíchamniaitji. Nuka Kristu anen̄krattairiyā akantamkitin jeatsui. ³⁶ Yus-Papniumsha júnis áarmaiti: “Amée-shuar asar tuke mantamnatin pujaji. Murik máatniua áints̄an̄ enentáimturmají.”

Tu áarmaiti.

³⁷ Tuma aín̄ Kristu in anenma asakrin Niiijai ti nupetmakuitji.

³⁸ Kristu anen̄krattairiyā akantamkitin pen̄ké atsawai. Nuna ti paant nékajai. Jákatniusha, iwiaakmasha, nayaimpinmaya suntarsha, ashí nayaimpinmasha tura nun̄kanmasha akupin ainia nusha, yamáí írunna nusha, ukunam átatna nusha, ³⁹ yakí írunna nusha, nun̄ká írunna nusha, kame ashí Yus najanmu írunna nusha Yusa anen̄krattairiyā pen̄ké akan̄tamkichminiaitji. Yusa anen̄krattaīsha ii Uuntrī Jesukristu túrunamujai paant wainji.

9

Yus Israer-shuaran ni shuari arti tusa achikiarmiania nu

¹ Yamái tájana nu Kristu shuari asan imiá nekas wáitrutsuk tájai. Winia enentáirsha tura Yusa Wakanísha “nekas tawai” turutainiawai. ² Israer-shuaran waitnentakun ti kuntuts enentáimjai. ³ Wíishuar áiniakui Krístunmayá kanakin yumínnaraintjai nujai wíishuaran yáimíniatkiunka. ⁴ Israer weeá shuar áiniawai. Tura ni uchiríá áinis Yus achikiaruiti. Yusa wincharísha níijiai pujumiayi. Yaunchu Chicham ni weatrijiai iwiaramuncha tura Muisais akupkamuncha susamiayi. Tura Yusa Jeen Nin shiir awajsatniun jintintiamiayi. Tura ukunam shiir tsan̄katkattana nunasha ujakmiayi. ⁵ Ni weatrín Yúsan ti péñker enentáimtin irunmiayi. Krístusha aents ajas nú shuarnum akiiniamiayi. Krístuka Uunt Yus asa tura ashí akupin asa Niñki tuke shiir awájnastí. Núnisan̄ atí.

⁶ Kame Yus ashí Nii timia nuna Israer-shuaran súdachmataisha nujai “Yus timia nu uminkiachuiti” tíchamniaiti. Antsu júnis enentáimpratniuiti: ashí Israer weeá áiniayatan Yusjai íismaka ashí nekas Israer-shuar áiniatsui. ⁷ Núnisan̄ Apraám weeá shuarsha ashí nekas ni shuar áiniatsui. Iis, Yus Apraáman tímiayi “Aya Isak pampan̄ma amee shuarum ártatui.” ⁸ Nujai páantaiti. Shuar aya Apraam weeá akiinia asa Yus timian wáinkiashtiniaiti. Antsu Yus timiajai métek akiinia nu nekas Apraám weeá shuar áiniak Yus timian wainkiattawai. ⁹ Kame Yus Apraáman tímia nu júiti: “Tsawant jeamtai jeartiatjame, tura ame nuwem Sara uchin takustatui.” Tu tímiayi.

¹⁰ Nu arantcha, ii weatrí Isaka nuwé Ripikia jimiampramiayi. ¹¹⁻¹³ Nu uchisha akiiniainiatsain̄ péñkernasha tura yajauchincha túruiniatsain̄ Yus Ripikian tímiayi: “Iwiairía nu ni patain̄ umirkattawai.” Ataksha núnisan̄ Yus ni Papirín̄ chichak “Jakupan aneakun Esaun nakitramjai” tímiayi. Nujain̄kia páantaiti. Yus wakerak aya ni enentáijiaín̄ shuaran achikminiaiti. Nu shuar túrunamu enentáimtutsuk túramniaiti.

¹⁴ Túriniaitkiui “Yus péñkerchaiti” ¿titiajiash? Atsá. ¹⁵ Yus Muisaisan̄ júnis tímiayi:

“Wi wakerajna nunak waitnentrattajai.”

¹⁶ Tuma asamtai shuar ti wakerakuisha tura kakaram takaakuisha aya nujai Yus waitnentatsui. Antsu aya ní enentáijiaín̄ wakerak waitnentawai. ¹⁷ Ataksha Yus-Papininum tawai “Yus Ejiptu nun̄ka akupniurín̄ tímiayi

“Ámijiai ashí nun̄kanam winia kakarmarun nekaawarat tusan uunt akupniun awajsamjame” tímiayi” tawai.

¹⁸ Tuma asamtai Yus Nii wakera nuna waitnentawai. Túrasha Ejiptu akupniurín túramia núnisan Nii wakera nú shuaran enentáin kátsuram awajtai.

¹⁹ Tura “Núnisaitkiuinkia ¿urukamtai shuaran Yus súmamtkia? turutchatapash. Nii wakerakuinkia ¿itiurkattajik?” turutchatapash. ²⁰ Warí, aents asam Yusjái ¿tunaiminkiaitiam? Nuwá pininkian nájankui núweka “¿urukamtai júnis najatam?” tíminkiait. ²¹ Nuwá wakerakka nu nuwejái amamkuncha tura yukunnasha nusháa takakmastinian mai najanachminkait.

²² Yajauch shuar ti asutiátin áiniak emesnartinnium wétin áiniawai. Yus nu shuaran asutiá ni kakarmarin iniaktustaj tayat ti katsuntramiayi. ²³ Tura katsunteak ni anenkrattairín iniakmasmiayi. Nú arant nuikia in waitnentramak shíir enentaijjái péñker awajtamkur ni anenkrattairí ti paantchakait. Nekas shíir enentaijjái péñker ajasat tusa yaunchu iwiartampramiayi. ²⁴ Tura incha, Israer-shuarnumiasha Israer-shuarchanumiasha, ni shuari ajasat tusa achirmakmiayi. ²⁵ Núnisan yaunchu Yúsnan etserin Useas Yus-Papinium tawai:

“Wíishuarchan Wíishuar awajsattajai. Aneachmancha aneamu awajsattajai.

²⁶ Tura Yus “Wíishuarchaitrume” tímia nú shuaran “Nekas iwiaaku Yusa uchiríniuitrume” ukunam títiatui.”

Tu áarmaiti. ²⁷ Antsu Isayas Israer-shuaran páchis tímiayi:

“Israer weeá ti nankaamas untsurí áiniayat penké ishichik uwemprartatui. ²⁸ Kame Yus yajauchin akupkataj timia nuna takamtsuk wárik umiktatui.”

²⁹ Núnisan Isayas ataksha tawai:

“Ashí akupeana nú Yus in waitnentramachkurninkia Sutuma péprusha Kumura péprusha takamtsuk jákarmia núnisan jákaaji.”

Israer-shuar uwempratin chichamjai tujinkiarmiania nu

³⁰ Wátsek, Israer-shuarcha, Yus iisam ni túramurijjai “pénkeraitji” tu enentáimtumainiachunak, Yuska, Nii enentáimtusam, “pénkeraitrume” tímiayi. ³¹ Antsu Israer-shuarka péñker akupkamun umiktinian wakeruiniayatan tujintiainiakui nujái péñker ajastinian tujinkiarmiayi. ³² ¿Urukamtai tujinkiarma? Yúsán enentáimtutsuk aya ni péñker túramujái péñker ajastinian enentáimtuiniak tujinkiarmiayi. Kristun enentáimtustinian nakitiainiak shuar kan kapen awankemtuktinia núnisan iniararmái. ³³ Tura kaya tukumkar iniarachamniakait. Nu asamtai Yus-Papinium Krístun pachis tímiayi:

“Seun péprunam kayan ikiuajai, tawai Yus. Nu kayanam Israer-shuar tukumkar iniarartatui. Antsu Nin shiir enentáimtuinia nú shuar natsaarchartatui” tawai.” Tu áarmaiti.

10

¹ Yatsuru, Israer-shuar uwemprarat tusan ti wakerakun Yúsan áujtajai. ² Maa, uwempratniun nékachiatañ Yúsan shiir awajsatniun ti wakeruiniawai. ³ Túmaitiat shuáran Yus péñker awajsatniun nékachu ásar aya ni péñker túramujajñ péñker ajastinian wakeruiniawai. Tuma ásar Yus péñker enentáimtamujaj péñker ajastinian jeacharai. ⁴ Aya Kristu enentáimtamujaj péñker ajastin asamtai akupkamu umirkat-niujaj péñker ajastin ántraiti.

⁵ Akupkamujaj péñker ajastinian pachis Muisais tímiayi: “Nuna takamtsuk umirniuka nujaj péñker pujustatui.” Tu áarmaiti. ⁶ Antsu Krístun enentáimtus péñker pujustinian pachis shuar juna tíminiati: “Ti itiurchata áinis “¿Yaki nayaimpiniam waka Krístun itiarat?” tiirap,” tawai. ⁷ Tura ¿Yaki jakamunam we Krístun iniantkit?” tiirap” tawai. ⁸ Tura junasha tawai: “Yus-Chicham yúpichuch umirkamniati. Aya enentáimjaj enentáimtakum wenumjaj ujaktiniaitme.” Nu Chicham “Yus enentáimtustiniati” tawai. Nu Chicham tuke étseraj núiti. ⁹ Yus Jesusan jakan iniantkimia nu enentáimtakum tura wenumjaj “Jesus winia Úuntruiti” takum uwemprattame. ¹⁰ Kame Kristu enentáimtakmin Yus “pénkeraitme” turamtatui nuyá wenumjaj “Jesukrístun enentáimtajai” tákum uwemprattame.

¹¹ Ataksha Yus-Papinium tawai: “Nin shiir enentáimtuinia nú shuar natsaarchartatui.” ¹² Tuma asamtai ashí shuar, Israertisha Israerchasha, mai metek Yúsan shiir enentáimtuinia nuna Yus ti aneak ashí péñkeran súawai. Tura ashí métek ni Úuntrinti. ¹³ Nu arantcha “Ashí shuar Uuntan áujea nu uwemprattawai” yáunchu Krístunun tu áatramuiti. ¹⁴ Tura Krístun enentáimtuiniachusha ¿itiurak Nin áujsarar? Tura Krístun nékainiachusha ¿itiurak Nin enentáimtusarar? Tura Yus-Chicham ujaachmasha ¿itiurak nekaawarat? Shuar Yus-Chichaman ujaktiniati. ¹⁵ Tura akupkachmasha ¿itiurak Yus-Chichaman ujararat? Tura shuar Yus-Chichaman etserkataj tusa wéana nuna Yus-Papinium tawai:

“Shuar Yusa Shiir Chichamen etserki weana nu ti shírchakait.”

¹⁶ Tura ashí shuar uwempratni chichaman ántuiniayatan umirainiatsui. Isayassha yaunchu aak tímiayi:

“Uuntá, ¿yaki ii étserman antukaruit?”

17 Paantchakáit. Kristu túramu ujakam antuktiniaiti. Tura antukar Krístun shiir enentáimtustiniaiti.

18 Tura ¿Israer-shuar Yus-Chichaman antukcharu ásarán Yúsan enentáimtuscharma? Atsá. Warí, Yus-Papí tawai:

“Ashí nunkanam ni chichame antunkaiti.”

19 Tura “Israer-shuar nu chichaman antukariat ¿paant nekaawarmaashi?” inintrusminiaiti. Tura nekas nekaawarmai. Tuma asamtai Muisais tawai:

“Israer-shuarchan nékachu ainiana nuna shiir awajeakun akajkattajrume.”

20 Nuyá Isayas ashamtsuk áarmiayi:

“Eatkacharua nu wáitkiarmiayi. Inintruiniatsain wantintiuk-miajai.”

21 Tura Israer-shuaran áujmatuk tímiayi:

“Tuke iniaitsuk Winin winiarti tusan nu shuaran untsúajai. Tura nakitrurar umirtuiniatsui.”

11

Chíkich Israer-shuarsha uwemprartatui

1 Tura Israer-shuar Yúsan umiiniachkui ¿Yus nin iniaisaashit? Péñkea. Warí, wi Israer-shuarchakaitiaj. Wi Apraámsha tura Pinjamin weeá akiiniachukaitiaj.

2 Yámankamtaikniumiá Yus Israer-shuaran ni shuar arti tusa achikiu asa yamaikia iniaiashtatui.

Ti yaunchu Yúsnan etserin Erías Israer-shuaran pachis Yúsan áujtak tímiayi: 3 “Uuntrú, naman awasar Yus sútaincha mash saákiarai. Áminiun etserniuncha mash máawarai. Tura wiki juakjai. Tura winiasha “mantuatai” turutainiawai.” Tu áújsamiayi.

4 Tura Yus ayak tímiayi “Siati mir (7000) áishmankan Israer-shuarnumiá apujtumsaruitjai. Nu shuar ántar-yus Páaran tikishmatrachu áiniawai” tímiayi Yus.

5 Núnisan yamaisha Yus ti waitnentainia asa ashí Israer-shuarnumiá ni shuarin achikiuiti. 6 Yus ni enentáijiajin waitnentak túrait. Nú shuar péñker tura asamtai waitnentatsui. Yus aya péñkernak waitnentakka nuikia waitnenkratchainti.

7 Ayu. Nuikia ashí Israer-shuar péñkeran eakaru aijn aya Yus achikmia nú shuar wainkiarmiayi. Antsu ni achikchamuka nuna nankaamas nekaachmin ajaras kuserua núnin awajnasarmiayi. 8 Yus-Chichamsha núnisan tawai: “Yus enentáimchatai enentáin súsarmiayi. Wáinmashtai jijncha tura ántushtai kuishniasha súsarmiayi. Yamaisha núniskete.”

9 Tawitcha yaunchu aak tímiayi:

“Tuke tunáa túrin ásar namperan najanainiaksha achinkiar ti asutniáwarti.

10 Ni enentáin kusurarti tura wainmakcharti. Itiurchat ana nusha, káarak kijinia áintsan, tuke áentskatá.” Tu áarmiayi.

Israer-shuarcha uwempramin áiniawai

11 Watsek, Israer-shuar kayá tukumkar ¿tuke iniaararuk áinia? Atsá. Antsu Israer-shuar umirkachmajai Israer-shuarcha yamaikia uwempratín jeainiawai. Nujai Israer-shuarsha nujai métek uwempratniun enentáimsartatui.

12 Israer-shuar umirkachmajai ashí shuar, Israercha ainia nusha, uwempramnia ajasarmiayi. Nuna nan̄kaamas Israer-shuar atak Yúsan enentáimtuiniak uwemprarmatai nujai ashí shuar ti pen̄ker ajasartatui.

13 Israer-shuarchatirmea, atumin uwempratín chichaman etserkatniun Yus akupkamu asan nu takatan ti takaa-jai. 14 Nuna túrakun átum uwemprarmena núnisan̄ niisha, wíshuar ainia nu, nuna ísar uwemprarat tusan wakera-jai. 15 Kame Israer-shuaran iniaisamujai ashí shuar Yusjai shiir nawamnaikiarmatainkia nuikia atak nin achikmajai jakamunmaya nantaktinia áintsan̄ ti shiir átatui. 16 Emka apatuk ana nu Yus súakur yum̄nsamuitkiun̄ka nuikia ashí apatkunam Yus yum̄nsamuiti. Núnisan̄ numí kan̄kapé pen̄keraitkiun̄ka numi takamtsuk pen̄keraiti.

17 Yuska chíkich chíkich Israer-shuaran, numí kanawen tsupik ajapniua áinis, iniaisamiayi. Tura nuyá atumin niisháa numinmaya árumniñ nu numiniam anujtamkamarme. Nujai pen̄ker numijiai tsanínkrum nu kakarmajai iwiaakrume. 18 Tura kanawē tsupikmajai nan̄kaamantu enentáimtumasaip. Warí, ame kakarmarmijiai numi wajatsui antsu ni kakarmarijiai iwiaakme.

19 “Túrasha wi anujnaktinian kanawen tsupikchamka” tíchainmeash. 20 Nekasaiti, túmaitiat niisha Yúsan enentáimtuiniachu ásar tsupinkiarimiayi. Atumsha aya Yus nekas enentáimta asam anujnakuitme. Tuma asamtai nan̄kaamantu enentáimtumatsuk aya anearta. 21 Yus nekas kanawē pen̄kercha túrawarun tsupikkia páchitsuk amincha tsupirmakchamniakait. 22 Iista, Yus atumjai ti tsán̄kaiti tura Israer-shuar umichua nuna ti wari asutiaiti. Tura pen̄ker wáinmamkata. Yus tuke nekas enentáimtachkurminkia atumniasha páchitsuk tsupirmaktatrume. 23 Núnisan̄ Israer-shuar ataksha Yúsan enentáimtuiniakui páchitsuk ataksha anujkachminkait. Nekas túrattawai. 24 Túram Israer-shuarcha asam niisháa numinmaya tsupikiar pen̄ké numiniam anujnakuitrume. Nuna tura asa nekas ni kanawē tsupikia ajapamun páchitsuk atak anujkamniaiti.

Israer-shuarsha uwempratín áiniawai

25 Yatsurú, nan̄kaamantu enentáimtumara_{irum} tusan yaunchu nekaachman ujaajrume. Júiti: Israer-shuarnumia_{nka} chíkich chíkich Yúsan nekas enentáimtustinian nakitiainiawai. Tura aya Israer-shuarchasha Yus-shuar ajasarat tusa túrunamiayi. 26 Tura Israer-shuarchasha ti untsurí Yus-shuar ajasarmatai nuyá Israer-shuarsha ashí uwemprartatui. Tuma asamtai Yus-Papí tawai:

“Seúnnumiá Uwemtikkiartin tátatui. Israernumiá tunaan asakátrattawai.

27 Jú Chichamnasha niijiai najanattajai: ni tunaarín asakturtatjai.”

28 Uwempratin chicham atumsha nekaatarum tusa Israer-shuaran Yus ni nemasrī awajsaruiti. Tura yaunchu ni weatrin achikiu asa nincha tuke anenawai. 29 Kame Yus amáa nuna ataksha ataatsui. Shuáran achiksha atak ini-aiyatsui. 30 Átumka yaunchu Yus umirchauyarme. Tura yamaikia Israer-shuar umirainiachkui Yus atumin waitnentrarmarme. 31 Núnisañ nii yamaikia Yúsan umirainiatsui. Tura atumin waitnentrampmarum núnisañ nincha waitnentrattawai. 32 Nujai ashí métek sumamtikiak métek waitnentrar uwemtikrattawai.

33 Maa, Yus imiá shiirchakait. Tí nekachukait. Ni túramu penké nekaachminiaitji.

34 “Uunt Yus enentáimmian ¿yaki neka? Tura ¿ya Nin uniniaruit. 35 Yaki Nin penkeran susa shiira nujai yapajniuit?” Tu áarmaiti.

36 Ashí najanamu áinia nu Yus najanamu áiniak Niiniu áiniawai. Tura Nin shiir awajsatniun najanawarma áiniawai. Yus tuke iniaitsuk shiir awájnástí. Núnisañ atí.

12

Yusaj surumaktarum

1 Atumsha Yus-shuar árumna nu, atumek Yusaj surumaktarum. Yus ti anenma asakrumin nuna seajrume. Yaunchu Israer-shuar ni waakarín maa Yúsan suu ármiayi. Atumsha núnisrumek iwiaaku árumna nuñ Nii túrutataj taku túrutati tusarum tuke enentáijiai Yusaj tsankamaktarum. Yusaj íisam ti shiir atí tusarum túratatum. Nu túrakrumka pátatkechu antsu ti nekas enentáimjai Yus shiir awajin átatrume.

2 Chíkich shuar aya jú nunkanmaya ana nuna enentáimtusar wekainiawai. Tura átumka nu túrawairap. Antsu Yus winia enentáimmiarun yapajtiurat tusarum tsankatkatarum. Nu túrakrumka Yus wakera nu nekaattarme. Ni wakeramusha yajauchihuíti antsu imiá nekas penkeraiti.

3 Yus winia waitnentrak akatar akuptuku asamtai júna tájarme. Atumek wíkitiajtai tu enentáimtumatsuk jeamna nujai

métek enentáimtumasta. Yus enentáimta asakmin takastinian suramsana nujaj apatkam nekaamata. ⁴ Ii ayashí chikichkiitiat ii muchitmari untsurjinti. Tura métekrak muchitiáiniatsui. ⁵ Núnisrik iisha, Yus-shuarti, ayashí muchitmariya áintsarik untsurjitiatar chikichik ayashtinia áintsar takaaji. Nusha Krístujaj tsaninkiu asar áitkiamuitji. Túramu asar nuamtak atsumnaiyaji.

⁶ Ii túratniun Yus nusháa nusháa súramji Nii wakera nujaj métek. Wats, Yus ámin suramsamna nu túratniuitme. Yus ni chichamen etserkatniun suramsaitkiuinikia Yus enentáimtakum unuimiarmam nujaj métek etserkata. ⁷ Chikich shuar yáintinian Yus suramsaitkiuinikia nekas enentáimjaj yáintá. Unuiniartiniaitkiumka yawetsuk unuiniarta. ⁸ Chikich shuar ikiakártiniaitkiumka nekas péñker ikiakárta. Súsatniuitkiumka shiir enentáijjaj ementutsuk súsarta. Shuaran wáinin atí tusa Yus apujtamsaitkiuinikia ti enentáimsam túratá. Tura shuar itiurchat pujuinia nu yáintinian Yus suramsaitkiuinikia shiir enentáimsam túratá.

Yus-shuar túratniua nu

⁹ Nekas enentáijjaj mai anenai ajatarum. Yajauch naki-trarum péñkera nu túratarum. ¹⁰ Nuamtak yachi asarum núnisrum mai anenai ajatarum. Chikich wijaj nankaamas úuntaiti tu enentáimtunaistarum.

¹¹ Nakittsuk kakaram ajasrum ashí enentáimjaj ii Uuntri wakera nu túratarum.

¹² Ukunam Yus tsankatramkattajnia nu enentáimtusrum warastarum. Wáitiakrumsha katsuntratarum. Tuke iniaitsuk ashí túrunamujaj Yus áujsatarum.

¹³ Yus-shuar atsumainia nujaj yáintarum. Írarsha péñker itiaatarum. ¹⁴ Yajauch awajtamainia nu shiir awajsatarum. Yus yajauch yumintsuk nu shuaran péñker túrawarat tusarum seattiarum.

¹⁵ Warainia nujaj warastarum. Kúntuts pujuinia nujajisha úuttiarum.

¹⁶ Chikichik enentáijjaj métekrak shiir enentáimtunaitiarum. Nankaamantu enentáimtumasairap. Antsu péejchach ajastarum. “Ti nekajai” tu enentáimtumasairap.

¹⁷ Shuar ámin yajauch awajtamkuisha nincha yapajkiataj tu enentáimsáip. Aents ísam péñker áminia nu amesha tuke túratá. ¹⁸ Ame jeamna nujaj ashí shuarjaj nawamnaikiam wekasata. ¹⁹ Yuska ni Papirjin juna áamtikramiayi: “Wítjai tunaan asutiátniun. Wisha yapajkiattajai” tawai Uunt Yus. Tuma asamtai yatsuru, kajertamkuisha atumsha yapajki-airap. Antsu yajauch awajtamkana nuna Yus íistí. Yus asutiáti. ²⁰ Tura nu arantcha tawai: “Ame nemasrum tsukamakuisha ayurata. Kitiamakuisha umartin susata. Nu

túrakum pénker ajachua nu iniatsaartatme.” ²¹ Yajauch nupettamkain. Antsu pénker túrakum yajauchia nu nupetkata.

13

¹ Akupniunka ashí shuar umirkatniuiti. Akupniuka Yus apujsamuiti. Yus apujdachma akupin atsawai. ² Tuma asamtai shuar akupniun umirtsuna nu, Yus apujsamun umireachu asa nekas asutniátniuiti. ³ Kame akupniuka pénker shuar sapijmiakarat tusar apujdachma áiniawai. Antsu yajauch shuar ashamkarat tusar apujsamu áiniawai. Nii ashamtsuk pujustin wakerakmeka pénker túratá. Túrakminkia akupin shiir enentáimturmartatui. ⁴ Yainmakat tusa Yus apujsamuiti. Antsu yajauch túrakmeka akupin nekas ashamkatniuitme. Warí, Yus ántar apujdachmaiti. Tunáa shuaran asutiátniun Yus apujsaiti. ⁵ Nu asamtai akupin tuke umirkatniuiti. Aya asutiúawain tusar umirkashtiniaitji. Antsu shiir enentáijjai wekasatin umirkatniuiti. ⁶ Tuma asamtai núnisan akupniun kuit súsatniua nu páchitsuk susatarum. Nu takatan pujursarat tusa Yus apujsaruiti.

⁷ Ashí túratniua nu túratarum. Akiktiniaitkiumka páchitsuk akikta. Akupniusha uuntcha ashí núnisan írunna nusha shiir enentáimtikratarum. ⁸ Kuitjai tumashrintin airap. Antsu mai anenai tuke ajatarum. Chíkich shuar aneakum nin pénker túrattame. Túram ashí akupkamu páchitsuk umirkattame. ⁹ Akupkamusha tawai: “Tsanirmawaip, mankartuawaip, kasamkaip, chíkich shuar tsanumpruraip, chikichna wakerutkaip” tawai. Tura nusha ashí chikichik chichamjain tminiaiti: “Ame ayashim aneam núnismek ashí shuar aneata.” ¹⁰ Shuar chíkich shuaran aneakka yajauch awajsashtatui. Tuma asa akupkamun ti shiir umirkattawai.

¹¹ Ii yámankamtaik Yus nekas enentáimtusmiaj nui “Ii ti shiir ajarar tuke uwempratin ukunam átatui” tu enentáimprachmashiaji. Antsu yamaikia nu tsawant yuntumsamtai ashí túrajnia nujai shintiarar enentáimpratniuitji. ¹² Tuke káshiitiat tsawaatemprai. Ii Uuntri Kristu jú tunáa nunkanam tátin ishichik ajasai. Tuma asamtai ii túrutairi kiritniua núnisan yajauch túrutai ana nuka túrutsuk tsáapninium pénker wekasatin kakaram ajastai. ¹³ Túratniua nujai métek wekasatai. Tsawai wekaakur kiritniunam uumkar tunáa túrutai túrashtai. Nampetsuk, yajauch warartsuk, tsanirmatsuk, jianaitsuk, tura kajernaitsuk aya pénker túratái. ¹⁴ Ii Uuntri Jesukristu túramia núnisrik túratái. Tura ii ayashí wakeramu umikiat tusar tsankatkashtiniaitji.

14

Ame yatsum kakantraip

¹ Shuar Yúsán ishichik enentáimtana nu itiaatarum tura kakantrairap. ² Iis, chíkichka ashí yuamniaiti tuiniawai. Tura chikichcha, Yúsna awajirar, naman yúashtiniaiti tuiniawai. ³ Tura ashí yúa nuka namanken yúatsna nuna wishikrash-tiniaiti. Núnisan ashí yucha nu ashí yuun kakantrashtini-aiti. Warí, núnaka Yus ni shuarin awajsachukait. ⁴ ¿Ámeke timiataash péñkeraitiam chíkich shuar kakantinia? Antsu ni úuntrin ni péñker túramuncha tura yajauch túramuncha íschatniukait. Enentáimpratá. Yus kakaram asa nin péñker awajsamniaiti.

⁵ Chikichcha enentáimpratái. Chíkich shuar tsawantan achikiar “Jú tsawantái Yus nankaamas shiir awajsat-niuiti” tuiniawai. Chikichcha ashí tsawantan métek enentáimtuiniawai. Ayu, tura ni enentáimtamun nekas paant nekaatniuiti. ⁶ Chikichik tsawantan enentáimtakka Yusan shiir awajsatniun túrawai. Tura ashí métekrak enentáimtakka Yúsán shiir awajsataj tusa túrawai. Yurumkajajsha ashí yúana nu Yúsán yuminkias shiir awajsataj tusa túrawai. Núnisan ashí yúatsna nusha Yúsán yuminkias shiir awajsataj tusa túrawai.

⁷ Iikkia ii enentáijjain iwiaaktsuji. Tura jáakrishha ii enentáijjain jaatsji. ⁸ Kame iwiaaku pujakrishha ii Uuntri Kristu shiir awajsatai tusar pujurji. Tura jáakrishha tuke Níniuitji. Nu asantai iwiaaku pujakrishha tura jakarsha tuke Krístunuitji. ⁹ Kame jakancha iwiaakuncha ashí ni Uuntri ajastaj tusa Kristu jaka nantakmiayi.

¹⁰ Tura ¿urukamtai ame yatsum “yajauchiiti” tame. Urukam-tai nakitiam? Warí, ashí iikia ii túramu paant awajnasat tusar Kristui naka wajastatji. ¹¹ Nu asantai Yus-Papinium tawai: “Wi nekas iwiaaku pujá asan ashí Winí tikishmatrurartatui.

Tura ashí “Yus asa tuke péñker túriniaiti” túrutiatatui” tawai.” Tu áarmaiti.

¹² Tuma asantai iisha chikichik chikichik ashí ii túramu Yus paant ujakartatji.

Ame yatsum tunaanum ajuraraip

¹³ Nu asantai “yajauch túriniaiti” tu áujmatnaisashtiniaitji. Antsu ii yachi tunaanum ajurarchatin ti enentáimturtiniaitji.

¹⁴ Jesukrístu jintintiamu asan juna nékajai: Yus najanamuka péñkerchaka atsawai. Ashí túramniaitjai. Túrashha shuar chichaak “Nu túrushtainti” táyat nuna túrakka níjjai tunaiti. ¹⁵ Tuma asantai shuar chichartamuk “Nu yúakminkia Yusjai péñkerchaiti” taj, ame yúakminkia nu shuar itiurchat enentáimsashtatuak. Tura níisha tunaanum iniaar menkakamniaiti. Nu shuar aneakum túratsme. Enentáimpratá. Aya ame yuamna nujain ame yatsum

Kristu jarukmia nu emenkákaip. ¹⁶ Tura “yuamnaitjai” táyatam wi yúakui yajauch áujmatrusarain tusam iniaisata. ¹⁷ Kame Yus umirkatin yurumátuijaisha umartinjaisha enentáimtuschatniuiti. Antsu Yusa Wakaníjjai shiir wekasar Yusjai tura shuarjai nawamnaikiar ti péñker wekasatniuitji. ¹⁸ Ashí shuar Krístun núnis umireakui Yussha tura chíkich shuarsha péñker enentáimtuiniawai.

¹⁹ Nu asamtai tuke shiir pujusminia nu túrakur Yusjai kakaram ajastin yáiniaiktai. ²⁰ Yus iisam ashí yuamni-aitji. Antsu ame yuamna nujai chíkich shuar tunaanum ajuartin tunaiti. Tuma asamtai ame yuam nujai Yus nu shuara enentáin takarsamu emesraip. ²¹ Nu túrashtin nuikia naman yúashtincha karía umarchatniusha péñkeraiti. Warí, túrushtaijjai ame yátsum itiurchat enentáimtikram tunaanum ajuarchatapash. Tura nu shuar Yúsan nekas enentáimtuschania ajastatui. Nuka atsutí. ²² Ame Yus nekas enentáimtakum ashí túramniaitkiumka Yúsak wararsata. Shuar Yus íimmianum shiir enentáijjai mash túramnia nu nekas shíiraiti. ²³ Tura araantushim yua nuka Yúsan shiir enentáimtutsuk yua asa sumamattawai. Kame ashí Yus shiir enentáimtutsuk túramu tunaiti.

15

Chíkich shuar wakeramuk enentáimtustiniaiti

¹ Yusjai katsuaru ájini nu iik enentáimtumatsuk kakarmachu ainia nu yáintiniaitji. ² Chíkich shuar wakeramu enentáimtustiniaitji. Tura Yusjai nu nankaamas shiir wekasatniun yáinminiaitkiui túratniuitji. ³ Krístusha ni wakeramun túrachmiayi. Antsu Yus-Chicham tana núnisan chikichnan enentáimtusmiayi. Nu asamtai Yúsan umirin asa wáitiak timia nu áarmaiti: “Ámin katsekramainiak Winiaja katsekrukarmiayi.” ⁴ Núnisan ashí yaunchu Yus-Papinium aarma in jintintramatniun áararmiayi. Nujai atsantamkurin shiir wáinkiattajnia nuka katsuntrar nákastatji. ⁵ Yus atsantamar katsuntratniun jintintramji. Tuma asa Jesukrístu túramia áintsan atumniasha chikichik enentáijjai enentáimtunaisar pujustinian yáinmakartí. ⁶ Nujai ashí métekrak Yus shiir awajsatarme. Niisha ii Uuntri Jesukrístuncha Aparínti.

Israer-shuarchanmasha Uwempratin Chicham etserkamu

⁷ Tuma asamtai chíkich shuarjaisha shiir awajnaisatarum. Kristu núnisan Yúsan shiir awajsat tusa incha shiir awajtam-samiaji. ⁸ Juna tajai. Kristu Israer-shuaran yáintaj tusa támiayi. Tura Yus ti yaunchu nuna weatrin “túrataj” timia nu uminkiat tusa támiayi. Nujai Yus timia nuna umikmia nu nekaamniaiti. ⁹ Tura nu arantcha Israer-shuarchasha

Yus waitnentrartin ásarmatai nin shiir awajsarat tusa támiayi. Tura Yus-Papisha tawai:

“Ámin kantamprakun ashí shuarnum shiir awajsattajme.”

¹⁰ Tura nu arantcha tawai: “Ashí nun^{kan}maya shuartiram ashí Israer-shuar Yúsna ainia nujai warastarum.”

¹¹ Tura ataksha tawai: “Ashí aents ii Úun^{tr}in shiir awajsarti. Tura ashí shuarsha Nin “Ti úuntaiti” tiartí” tawai.

¹² Isayassha áarmiayi: “Tawitia aparí Isai weatriya akupin akiinkiattawai. Niisha ashí nun^{kan} akupeakui ashí shuar niiniak shiir enentáimtusartatui.” Tu áarmaiti.

¹³ Yus ashí shíiran suramsattakrin nu shiir nákaji. Tuma asamtai Nii nekas enentáimtakrumin warasa shiir pujustinian yamá suramsati. Nuyá Yusa Wakaní kakarmarijjai ti shiir enentáijjai katsuntrarum, nu nákastarum.

¹⁴ Yatsurú, atumsha anenainiaitume. Tura ashí Yusna nekaarum nuamtak chicharnaikiatin nékarme. ¹⁵ Tuma ain kajinmatkⁱrum tusan ataksha ti paant áakun jú enentáimtikeajrume. Yus winia waitnentrak ni Chichamen etserkat tusa akuptakui nuna áatjarme. ¹⁶ Kame Jesukrístu Israer-shuarchanum Yusa shiir chichamen etserkat tusa akuptukuiti. Nuna túrakun Israer-shuarchan Yusa Wakaníjjai shiir awajsamu ásarmatai Yusai juiniajai. Tura Yussha shiir enentáijjai itiaiiniawai.

¹⁷ Jesukrístu yaintiu asamtai Yusna takarsamaj nuna wararsamnaitjai. ¹⁸ Tura chíkich shuarjai Kristu túramun pachischattajai. Aya wi chichasmajaisa tura wi túramujaisa Israer-shuarchan Kristu umimtikiamia nunak áujmatsattajai. ¹⁹ Yusa Shiir Wakaní kakarmarijjai aents tujintiamun túran ashí shuaran Jerusaréñ péprunam nan^{kan}aman etserkin Iririkiu nun^{kan}am ejekamjai. Kristu-chichaman ashí nu nun^{kan}am etserkaitjai. ²⁰ Nuna túrakun chíkich shuar etserkachmanum Krístunun ántichu áiniamunam Uwempratin Chichaman etserkaitjai. Nujai chíkich takasmanum takarsachuitjai.

²¹ Yus-Papisha núnisan tawai:

“Chichaman penké antukcharuka nekaawartatui. Nin áujmatman anturkacharusha unuimiarartatui.”

Papru Rúmanam wétaj tawai

²² Nuna pujuru asan íitjarum táyatan íichmajrume. ²³ Tura yamaikia juyá takatrun umikian tura yáunchusha tuke íitjarum tiniu asan ²⁴ Ispania nukanam wéakun íistatjarme. Tura atumⁱin shiir irasan Ispanianam wéakui atumsha yaintkⁱarum shiir akuptukchattarpash. ²⁵ Tura yamaikia kuitjai Jerusaréñnumia Yus-shuaran yáintaj tusan wéajai. ²⁶ Masetúnianmaya shuarsha tura Akayanmaya shuarsha kuítian irurar Jerusaréñnumia Yus-shuaran atsumainia

nuna akuptuktai tuiniawai. ²⁷ Ti wakeruiniak túrawarmiayi. Nu nekas túrashtinkiait. Israer-shuarnumiá Yus-Chichaman antukaru ásar yamaikia ni kuítrijai páchitsuk yáinchatniukait. ²⁸ Tuma asamtai jú kuitian súsaran umiran nuikia Ispanianam wéakun íktiatjarme. ²⁹ Tura nuí winiakun Kristu Shiir Chichamen nujai shiir yáintajrum tusan ejeettiajrume.

³⁰ Yatsurú, ii Uuntri Jesukristunu asarum tura ni Wakaní pujurtamkurmin anenia asarum Yus áujtursatarum. Núnisrum wijjai métek Yusna takastin yaintkiattarme. ³¹ Jutia nunkanmaya Israer-shuarnumiá uwemtikrat tusarum Yus áujtursatarum. Tura jú kuitian júajna nunasha Jerusarénnumiá Yus-shuar shiir achikiartí tusarum Yus áujtursatarum. ³² Nujai, Yus wakerakuinka, péñker wampú enentáimsan warasan íttiajrume. ³³ Yus ti shiir pujustinian súana nu atumjai tsanin pujurtamsati. Núnisan atí.

16

Amikmaamun akupramiania nu

¹ Ii umai Jépeka Senkrea péprunmaya Yus-shuaran yáiniaiti. Ti péñker Yus-shuaraiti. ² Kristu náariin shiir wáinkiatarum. Nuamtak yachí wáinkiatniua núnisrum wáinkiatarum. Niisha chikichnasha tura winiasha ti péñker wáitin asamtai atumsha ni atsumamusha yaintarum.

³ Pirisirasha Akirasha wijjai métek Jesukristunun takasaru ásar amikmaatainiajai. ⁴ Niisha winia uwemtikrurtai tusar jáninkiarimiayi. Tuma asamtai yuminkiniajai. Tura aya wíkichu antsu ashí Israer-shuarchanumiá Yus-shuar áinia nusha yuminkiniawai. ⁵ Núnisan ashí Yus-shuar Pirisiran tura Akira jeen irunainia nusha amikmaatarum. Tura winia aneamu amikiur Epenetu amikmaatruatarum. Niisha Akaya nunkanam emka Krístun nekas enentáimtusmiayi. ⁶ Marisha, atumjai ti takasua nu amikmaatruatarum. ⁷ Tura wíi shuarsha Antrunikiusha Júniassha amikmaatruatarum. Niisha wijjai sepunam pujusarmai. Wijjai emka Krístun shiir enentáimtusar chíchik akatramujai nankaamas takasaru áiniawai.

⁸ Ámpriassha Krístunam winia aneamu amikiur asamtai amikmaatruatarum. ⁹ Urpanujaisha Jesukristu takatrí tsaninniuitji. Niisha tura aneamu Estakisssha amikmaatruatarum. ¹⁰ Apirissha amikmaatruatarum. Niisha Krístun ti shiir enentáimtam ti páantaiti. Núnisan Aristúpuru shuarsha amikmaatruatarum. ¹¹ Wíishuar Erutiúnsha tura Narsisu shuarsha Kristu shuari ásarmatai amikmaatruawarta. ¹² Tripiniasha tura Tripiusasha Yúsnan takainia ásarmatai amikmaatruatarum. Núnisan ii umai

Pírsitia Yúsnan ti takasu asamtai amikmaatruatarum.
 13 Rúpusha, nusha ti penker Yus-shuar, tura nukurísha
 amikmaatruatarum. Niisha wijíají nekas winia nukurua
 núnisaiti.

14 Asínkritiusha, Pirikiuntisha, Érmassha,
 Patrupassha, Érmessha, tura ashí níijíají Yús-shuar ainia
 nu amikmaatruatarum. 15 Núnisan Jírurukusha, Júriasha,
 Néreusha, ni umajíajísha, Urimpiassha, tura ashí Yus-shuar
 níijíají pujuinia nu amikmaatruatarum.

16 Nuámtaksha shiir aujnaisatarum. Ashí juyá Kristu
 shuari amikmaatmainiawai. 17 Yatsurú, shuar nusháa
 enentáimtuiniak Yus-shuaran akanainiak itiurchat awaje-
 nawai. Nu shuar wáinkiarum kanaktiarum. Ni yajauch túramu
 átum péñker takastin unuimiarmena núnischaiti. 18 Nu shuar
 ii Uuntrí Jesukrístunun takainiatsui. Antsu ni wakeramun
 uminiawai. Tura ti shiir chichasar nékachun anankenawai.
 19 Átum umirma ashí shuar nékainiakur ti waraaji. Yajauch
 túrutsuk aya péñker túratin enentáimsarum pujustarum. 20 Yus
 tuke shiir pujustinian amawa nu ti wárik uunt iwianchin nu-
 petturmaktatui. Tura ii Uuntrí Jesukrístu shiir yainmakarti.

21 Timiutéusha, wijíají takau, amikmaatmarme. Núnisan
 Rúsiusha, Jasunsha, Susipatresha, mash wíishuar ainia nu
 amikmaatmarme. 22 Wi, Tersiu asan, Papru chichamen ju
 papinium áateakun Kristu náariin amikmaajrume.

23 Káyusha amikmaatmarme. Ni jéen pujaji tura juísha
 ashí Yus-shuar irunainiawai. Erastusha ju pepru kuítrín
 wáinniuiti. Niisha ii yachí Kuártujají amikmaatmarme.

24 Ii Uuntrí Jesukrístu ti shiir yainmakarti. Núnisan atí.

Yus shiir awajsatai

25 Watsek, Yus shiir awajsatai. Niñki nekas kakaram
 awajtamsamniaiti. Wi Uwempratin Chichamnum
 Jesukrístunun étsereaj nujají ikiantamprattawai. Nu chicham
 yámankamtaiknumia nekaachmanak Yus yamaikia paant
 awajsaiti. 26 Yaunchu Yúsnan etserin ni áarmanum nu
 chichaman etserkarmiayi. Tura yamaikia Yus wakerak
 ashí nunkanmaya shuar Nii enentáimtusar umirkarat tusa nu
 Chichaman yamaikia paant awajsaiti. Yus amuutsuk tuke
 pujuwiti.

27 Yúsak Niñki ti neka asa tura Jesukrístu ti penker tura
 asamtai Niñki tuke shiir awájnástí. Nuke atí.

Papru KURINTIUNMAYA SHUARAN Emka papin aar akuptukma

Kurintiunmaya Yus-shuaran Papru áatramiania nu

¹ Wi Pápruitjai, Jesukrístu akatramu. Yus nuna wakerak, ni akatramurí atí tusa anaitiukmai. Wi, ii yachí Sústinisjai, ju papí akupeaji. ² Ashí Yus-shuar Kurintiu péprunam iruntrumna nu ju papí akupeaji. Átumka Jesukrístujai tsaniñkiu asarum Yusna árume. Atumsha tura ashí shuar Jesukrístun enentáimtuiniana nunasha Yus ti penker awajsatniun wakerawai. Nincha incha Jesukrístu mai metek Úuntrinti. ³ Yus ii Aparí tura ii Úuntrí Jesukrístusha waitnentrmainia ásar yainmakarti imiatkinchanum tuke shiir pujustinian.

Ii Uuntri Jesukrístujai tsaniñkia pujustin

⁴ Yusan áujkun yuminsan atumin shiir enentáimtajrume. Jesukrístujai tsaniñkia pujakrumin Yus shiir enentáimturmawai. ⁵ Jesukrístujai tsaniñkia pujakrumin Yus atumin ti yáinmawai ashí penker ana nu enentáimtakrum tuke shiir chichastinian. ⁶ Kristu juna túramniaiti tíchamkají. Ashí yamaikia uminkiaiyi. ⁷ Tuma asamtai ashí Yus súramna nu atsumatsrume. Nu túrakrum ii Uuntri Jesukrístu tatin tuke nákarne. ⁸ Tura iniaitsuk tuke emettamattawai ii Uuntri Jesukrístu támatai atumi tunaarín pachischatin. ⁹ Jesukrístu ii Uuntrinti. Niijjai tsaniñkia pujusúk tusa Yus achirmakmarme. Tura Nii tana nuna tuke umiktatui.

Yus-shuar akantram

¹⁰ Yatsuru, ii Uuntri Jesukrístu naari pachisan, seajrume métek enentáimpratarum tusan. Níisháa níisháa enentáimprairap antsu chikichik enentáijjai métek enentáimsa pujustarum. ¹¹ Átum yajauch chicharnaisarum pujarme. Kruí shuari tu uatkarmatai tájarme. ¹² Kame júnis awai: Chíkich “Wi Páprunuitjai” tuiniawai. Chíkich “Apurusnaitjai” tuiniawai. Chikichcha “Wi Pítrunuitjai” tuiniawai. Chikichcha “Wi Kristu-shuaraitjai” tuiniawai. ¹³ ¿Warí, nuñkia, Kristu akantramukait. Páprusha krúsnum jarutramkamaashi. Tura Papru naari pachisa imiaimiukaitrum? ¹⁴ Atumin untsurí imiaichu asan shiir enentáimjai. Aya Krispu Káyujai jímiarchiniak imiaimjai. ¹⁵ Nújainkia shuar “Papru náariin imiaimiuitjai” tíchamniaiti. ¹⁶ Maa, nekas, Estepanasa shuaríncha imiaimjai tura chíkich wi imiaimiun nékatsjai.

¹⁷ Kristu imiakrattia tusa akuptukchamai antsu uwempratin chichaman etserkat tusa akuptukmai. Tura ti neka chichainia núnisan chichaatsjai shuar wi shiir chichaamun enentáimprarain tusan. Antsu yúpichuch chichaajai Kristu krúsnum jakamuk paant atí tusan.

Kristu Yusa kakarmarincha ni nekatairincha paant iniakmasmiania nu

¹⁸ Kristu krúsnum jarutramkamu étsereaji. Antsu Yus-shuarchaka menkaakatniunam wéana nu, “ántraiti nu chicham” tu enentáimainiawai. Antsu Yus-shuarti, uwempratniunam wéakur, “nu chichamjaj Yusa kakarmari takusminiaiti” tu enentáimji. ¹⁹ Núnisan tawai Yus-Chicham yaunchu aarma: “Ju nunkanmayan ti neka áiniana nuna chichamen emesrattajai; ti unuimiararu áinianak ántar awajsattajai” tawai Yus ni chichamen. ²⁰ Iis, ju nunkanam uwempratin chicham íruntsuk. Nu chichaman ashí mash Yus ántar awajsaiti. Ti neka áiniana nusha, jintinkiartin áiniana nusha, ashí ju nunkanmayan unuimiar ti chichastinian nékana nusha, nu shuar mash “wi tájana nujaj pé_nker pujusam uwemprattame” tu enentáimiainiawai. Tura núnaka mash Yus pé_nké ántar najanaiti. ²¹ Aya ni nékamujaj aents Yúsan nekaacharmiayi. Núnisan atí tusa Yus túramiayi, timiá neka asa. Antsu ashí aentsun Yus ni chichamejaj uwemtikratniun wakerimiayi. Chíkich “ántraiti” tuiniana nu chichamjaink¹ Yus Nin enentáimtuinia núnaka uwemtikratniun wakerak túramiayi. ²² Israer-shuar “aentsti túrachminian iniakmasta, wi nekaataj” tuiniawai. Kriaku shuarsha “ti enentáimsam, mash pé_nker jjikim turuttia wisha métek enentáimprataj” tuiniawai. ²³ Iikia antsu Kristu krúsnum jarutramkamuk étsereaji. Israer-shuarsha “ju chicham natsantaiti” tu enentáimiainiawai. Israer-shuarchasha “ju chicham ántraiti” tu enentáimiainiawai. ²⁴ Tura Yus achikiarma, Niiniu ajasarat tusa, Israer-shuarsha Israer-shuarchasha mai metek “Kristu krúsnum jarutramak Yusa kakarmarincha ni nekatairincha paant iniakmasmiayi” tu enentáimji. ²⁵ “Yusa nekatairj ántraiti” tuiniawai aents, túrasha imiá nekas pé_nkeraiti. “Yusa kakarmarisha jeatsui” tuiniawai aents, túrasha imiá nekas kakarmaiti. ²⁶ Enentáimtumastarum yatsuru. Yus achirmakmarme Niiniu ajastinian, tura ju nunkanam ti neka áinia núnisan atumin ti neka íruntsui. Ti akupniusha ti nankaamakusha atumin íruntsui. ²⁷ Antsu ju nunkanam nékachua núnis ana nuna Yus achikiuiti ti neka nuna iniatsáartinian. Tura ju nunkanam kakarmachua núnis ana nunasha Yus achikiuiti kakarma nuna iniatsáartinian. ²⁸ Pé_ejchachincha, nakitsamuncha, ánt_rachincha, Yus achikiuiti

ashí nan̄kaamantu írunna nuna amuktinian. ²⁹ Nújain̄kia chikichkisha Yúsjaí waantu enentáimprachminiati. ³⁰ Tura Yus atumin Krístujai tsaniñ apujtamsaiti. Tura Kristu enentáimtusar Yus nekas nekatain̄kia nekaattaji. Kristu enentáimtakrin Yus shiir enentáimturmají, péñker awajtamji, tura uwemtikramji. ³¹ Yus-Papinium yaunchu aarma núniskete: “Shuar nan̄kaamantu enentáimprataj tákuñka ii Uuntri Yus túramun wararsati.”

2

Kristu krúsnum jakamu etserkamu

¹ Wisha, yatsuru, atumjín jeamaj nuí Yus-chichaman ti neka chichainia áintsan tura íwiasanak ujakchamajrume. ² Tura atumjai pujakun aya chikichkiniak nekaatniun enentáimpramjai. Júiti: Jesukrístu, tura Jesukrístu krúsnum jakamu. ³ Né kayatan kakarmachu sapíjmiashím jearmiajrume. ⁴ Yus-Chichaman ujaakun ti neka chichainia áintsan nupetkataj tu enentáimturchamajrume. Antsu Yusa kakarmaríncha tura ni Wakaníncha paant iniakmasan Yus-Chichaman ujakmajrume. ⁵ Aentsu nekatairíjjai Yus enentáimtuschatniuiti antsu Yusa kakarmari paant nekaarum Yus enentáimtustiniaitrume. Nuní asantai Yus-Chichaman tu ujakmajrume.

Aya Yusa Wakaníjjai Yúsnan nekaamniaiti

⁶ Túmaitiat Yusa nekatairí átsuk. Yúsnan unuimiararujai Yusa nekatairín áujmatji. Tura Yusa nekatairínkia aentsu nekatairí áintsachuiti. Ju nun̄kanam akupin ainia nuna nekatairínchuiti Yúsna. Ju nun̄kanam akupniuka ishichik pujus amuukachartatuak. ⁷ Yaunchu ju nun̄ka atsain Yus in uwemtikrampratniun enentáimpramiayi ti shiir pujusarmi tusa. Ju Yusa enentáimmiari yaunchu nekanachmiayi, tura yamaikia nu nekaar áujmatji. ⁸ Ju nun̄kanam akupniuka nuna pen̄ké nekaacharmiayi. Né kainiakka ii Uuntri timiá shiira nuna, krúsnum máacharu aayi. ⁹ Yaunchu Yus-Papinium áarchamukai: “Shuar Yúsna aneana nuna Yus ti shíiran susattawai. Susattana nuka timiá péñker asantai shuar wáinkichman, antukchamuncha, enentáimtachmancha Yus susattawai” tu áarmaiti. ¹⁰ Tura Yusa Wakaní ii enentáin pujurtamuk Yus suramsattajnia nuna yamá paant jintin-tramji. Nu Wakancha imia Yus enentáimmiiancha mash nékawai.

¹¹ Shuar enentáimna nuna chíkich shuar nekaamniakait. Antsu aya ní enentáijjain̄ nékatsuk. Núnisan̄ aya Yusa Wakaní Yúsna paant nékawai. ¹² Ju nun̄kanmaya aents enentáimiainia nujai Yusna nekaachminiati. Antsu Yusa Wakanín in súramaj

nujai Yus shiir tsankatramajnia nu nekaamnaitji. ¹³ Yusa Wakaní jintintramji Yúsna chichastinian Nii wakera áintsan. Ni chichamen súramji. Túramtai ii nékamujai Yúsna étsertsuji. Tuma asantai imia Yusna nuka Yusjai péñker wekainia nu jintíaji.

¹⁴ Yus-shuarcha Yusa Wakaníniun ántatsui ántraiti tusa. Aya Yusa Wakaní jintintiamnaitkiui Yus-shuarcha nuna penké nekaachmin áiniawai. ¹⁵ Antsu Yusa Wakanin takaku ashí mash iis, péñkera nuna nekaamnaiti. Nii túrana nunasha chíkich shuar súmamtikiachminiaiti. ¹⁶ Yus-Papinium yaunchu áarmaiti: “¿Yusa enentáimmiari ya neka. Tura Yúsna ya jintintiamnait?” tu áarmaiti. Tuma aijn iikia Yus-shuar ájinia nu, Kristu enentáimna núnisrik enentáimji.

3

Páprusha Apurussha Yusa takatrín mai tsanínkiar takaini-awai

¹ Tura wikia, yatsuru, nuik ai atumjai pujakun Yusa Wakanin umirniun chichastinia áintsanak atumjai chichastinian tujinkiamjai. Antsu ayash wakeramu umirin asakrumin Krístunam katsuarcharujai chichastinia áintsanak atumjai chichasmajai. ² Uchi kuírach naman ayurachminiaiti antsu aya umuntsatniuiti. Núnisan aya yúpichuchin ujakmajrume, itiurchat ana nu tujintiakrumin. Tura yamaisha itiurchat ana nu tuke tujintiarme. ³ Tuke ayash wakeramu umirniuitrume. Yajauch enentáimtunaiyakrum tura katsumnaiyakrum akantramuitrume. Nujai páantaiti átum ayash wakeramu umirniuitrume. Yúsna enentáimticharujai métek wekainiaitrume. ⁴ Atumíinkia shuar “wi Páprunuitjai” tuiniatsuk. Chíkichcha “wi Apurusnaitjai” tuiniatsuk. Tu chichaakrum ayash wakeramu umirniuitrume. ⁵ Wátsek. Wi Papru ti péñkeraashitiaj. Apurussha ti péñkeraashit. Antsu iisha aya Yusa takarniurintji. Yus-Chicham étserkurin ii Uuntri enentáimtuschkuram. Ii Uuntri takatan chíkich chíkich suramsamajnia nuke takasmaji. ⁶ Wi Yus-Chichaman étserkun arakan araktinia áinis takasmajai. Apurussha entsan ukatramai. Tura Yus nu arakan tsakatmarmai. ⁷ Arakan araana nusha, entsan ukatna nusha ánrachukait. Antsu Yusak arakan tsakatmaru asa ashí túrachukait. ⁸ Arakan araana nusha, entsan ukatna nusha métek áiniawai. Túmaitkiuisha takasmajai métek Yus akiktatui. Péñker takasmatainkia péñker akiktatui. ⁹ Wisha Apurussha Yusa takatri mai tsanínkiar takaaji. Tura Yus atumí enentáin takaakui atumsha Yusa núnkea áintsaitrume.

Jeasha enentáimpramnaiti. Yus atumjai takaak jeá jeamtinia áintsan takaawai. ¹⁰⁻¹¹ Jeá jeamainiak, emka

uunt kaya nunká init ikiursar kaki awajsatin áiniawai. Tura nuyanka nu kayanam ekeniar júkitniuiti jea wewe atí tusa. Wikia jea jeammin ti unuiniamiarua áintsanak uunt kaya nunká emka ikiustinian nekaan, núnisnak Jesukristunun emka ujakmajrume. Tura Jesukristu uunt kaya kaki ikiusma áinis asa Nínkiti nuj jea ekenkatin. Iis, ashí enentáimtustinia nankaamas Jesukristu enentáimtustiniaiti. Nu asamtai Jesukristunun emka ujakmajrume. Yus nuna etserkatniun tsankatrukuity. Wi emka, uunt kaya ikiursatniua áintsan, Jesukristunun ujakmajrume. Tura nuyanka chíkich shuar ekeniar jeammin áiniawai. Tura anearti pénger jeamtinian. ¹² Tura jea jeamainiak nii wakerak pénger ana nujai jeamminiaiti. Nii pénger jeamtinian wakerak kurijjaisha, kuítjaisha, shírmach kayajaisha jeamminiaiti. Chíkich jeamkuka numijjaisha, kenkujaisha, nukajaisha jeamminiaiti. Núnisan shuar Yúsna takaa pénger takasminiaiti túrasha nánkamas takasminiaiti. ¹³ Tura amuukatin tsawant jeakui ashí ni takatri paant átatui. Nu tsawantaisha Yúsaiya ji átatui tura nu jisha ni takatri péngera nunasha tura yajauchia nunasha nekapsattawai. ¹⁴ Tura shiir jeamuka tura nu jeasha esaachmatainkia shiir akinkiattawai. ¹⁵ Antsu nánkamas jeamuka imianiniki jiniumia uwemprattawai, tura ni jeamma esaa penké atsuttawai.

¹⁶ Enentáimpratarum. Yusa Wakaní atumíin pujá asamtai Yusa Jee ajasuram nu nékatsrumek. ¹⁷ Shuar Yusa Jeen émesekuinkia Yus nu shuaran emesrattawai. Yusa Jeenka timiá shiir asamtai túrattawai. Nu Jea atumketrume.

¹⁸ Ju nunkanmayan unuimiarua núnisrum “ti nekaitjai” tu enentáimtumasrum ananmamawairap. Antsu ju nunkanmayan nékachu áinis ajas Yúsna ti shiir unuimiártiniaiti. ¹⁹ Ju nunkanmaya aents nékainia nuna Yus “ántrai” tawai. Yus-Papinium áarmaiti:

“Ju nunkanmayan unuimiarun ni enentáimmiajain Yus sumamtikiattawai.”

²⁰ Tura nu arantcha áarmaiti:

“Uunt Yuska “unuimiaru enentáimmiancha penké ántrai” tawai.”

²¹ Tuma asamtai “Páprunuitjai tárugna nusha, “Apurusnaitjai”, tura “Pítrunuitjai” tárugna nusha ántar enentáimprume, nii aya aents áarmatai. Tu enentáimprarum warasairap. Antsu nekaatarum. Ashí írunna nu atumin yainmaktini-aiti. ²² Páprusha, Apurussha, Pítrusha, ju nunkanmayasha, iwiaakmasha, jákatniusha, yamá írunna nusha, ukunam átatna nusha, mash atumniaiti shiir yainmaktin. ²³ Atumsha Krístunuitrume, tura Krístusha Yúsnaiti.

4

Yus akatramu takatri

¹ J^unisan ashí shuar enentáimturmastiniaitji. Iikia aya Kristu yáintrintji. Kristu akatramurin'tji Yusna yaunchu nekaachma ana nu yamáí etserkatin. ² Wátsek, akatramuka tána nujai métek umiktiniaiti. ³⁻⁴ Wi umikmancha umikchamuncha ii Uuntri Kristu nékawai. Átum enentáimturarmena nusha tura chíkich aents enentáimturainia nusha wíjiainkia ánki Yus iirui. ⁵ Tsawant jeamtai ii Uuntri Kristu atak tátatui. Tura ashí yamáí kiritniunam uukma nuna tura shuar ashí enentáimprarma nunasha paant awajsattawai. Nu tsawant jeatsain shuar umikiuashit tusarum enentáimtusairap. Tura nu tsawantai Yus ashí pénker umikiarun shiir awajsattawai. Pénker umikiuncha ishichik umikiuncha takasmajai métek Yus shiir awajsattawai.

⁶ Átum “Ju shuar pénkeraiti tura chíkich pénkerchaiti” tu akannáirarum penké tíchatniuitrume, yatsuru. Nuka paant atí tusan “Átum “Wi Páprunuitjai” tura “Wi Apurusnaitjai” tírap” tajai. Antsu aya Yus-Papinium áarmajai métek enentáimsatarum. ⁷ Ámeke chíkich shuarjai méteketme. Tura ashí takakmena nusha Yus amasmaiti. Tura Yus amasu asamtai çitiurak áminiukea áintsam nujai nankaamantu ajai tu enentáimtumam?

⁸ ÇTi kuítrinnia áintsan tura ashí takakua áintsan enentáimtsurmek. In nankaakarum uunt kapitíán ajasua áintsan enentáimtsurmek? Nekas uunt kapitíán ajasrumka maak. Nuínkia iisha atumjai akupkaintji. ⁹ Chíkich shuar mash nankaamantu áinis áiniakuisha Yus in ni akatramurin ashí amúamunam apujtamsaitji. Tu enentáimpramniaiti. “Yajauch áiniawai, máatái” tu pujurtamji shuar. Tura Yusa suntarisha ashí juyá shuarsha in íistai tusar káutramkaitji. ¹⁰ Iikia atumjai jeatsji. Kristu shuari asakrin nékachua áinis enentáimturmajai shuar. Átum antsu Krístunam tí nékachuashitrum. Iikia kakarmachuitji. Átum timiá kakarmaitrume. Átumka ti penkeraitrume. Antsu iikia muíjtiaintji. ¹¹ Tuke yamaisha tsukamaji, kitiamaji, entsartin atsumaji. Katsumpramji. Jeasha atsumaji. ¹² Ii ewejéjai takaakur ti pimpíaji. Shuar katsekramainiaji túrasha iikia shiir chichamjai aiyaji. Itiurchat awajtamainiakuisha katsunteaji. ¹³ Tsanumprutmakrincha tuke shiir chichaaji. Tsuata áintsarik tuke yamaisha ashí yajauchia núnisan ajapratmatniun enentáimturmainiaji.

¹⁴ Atumin aya iniatsaartajtsan juní áattsujrume. Antsu winia aneamu uchirua áintsan jintintjarme. ¹⁵ Atumin Yus-Chichaman ujaakun Yus-shuar ajastinian unuiniamjarme. Nujaj Jesukrístu enentáimtakrumin atumí aparíá áintsan ajas-majai. Chíkich shuar Krístunun jintintrámatin timiá untsurí ákuisha aya wiki atumí aparíntjai. ¹⁶ Tuma asamtai wi wekaa-jna áintsan wekasatarum atumsha.

¹⁷ Nu túratarum tusan winia aneamu uchirun Timiutéun akuptukmajrume. Niisha ii Uuntrí Krístun enentáimtamunam winia uchiruiti tura Krístun enentáimtak tuke shiir wekaawai. Túrasha wi Krístujaj wekaamun ataksha enentáimtikramprattawai. Núiti ashí Yus-shuarnum wena jintíajna nuka. ¹⁸ Papru yamaikia iraishtatui enentáimturainiak chíkich chíkich nankaamantuitjai tu enentáimtumainiawai. ¹⁹ Antsu Yus wakerakuinkia wárik íitjam tusan wakerajai. Nuiinkia nankaamantu chichamen antukchattajai antsu wátskea, ni túramurísha íistái. ²⁰ Yus akupeana nú shuar aya chíchainiatsui antsu Yusa kakarmarín iniaktuiniawai. ²¹ Wátsek, ¿warí enentáimprum? Átum tuke núnisan enentáimkiurminkia wi winin asutiátniuitjarme. Tura péñker enentáimkiurminkia, aneakun shiir chichasminiaitjarme. ¿Atumsha túa wakerarum?

5

Tsanirmamu ti tunaiti

¹ Atumíin shuar ti tunáa tura awai. Ju yamá ashí nekanaiti. Nu shuar ni aparí nuwé achikiuiti. Timia tunaaka nu tsanir-mamu Yus-shuarchanumsha atsawai. ² ¿Nu tunaajaisha tuke nankaamantu enentáimprumek? Antsu úttiniaitrume. Nu shuar tunáa túraka atumíiniá akankatniuiti. ³ Ayashur pu-jachkuisha wi nuí pujáa áintsan nuna tunaarín paant nekaam-jai, tura asutiátniuiti tajai. ⁴ Tuma asamtai átum káunkakrumin ii Uuntrí Jesukrístu kakarmaríjjaj tura wi nuí pujáa áintsanak, ii Uuntrí Jesukrístu kakarmaríjjaj ⁵ nu shuar uunt iwianch-num surunkatniuiti ni ayashi wakeramurí amukati tusa. Nujaj ni wakaní uwemprattawai ii Uuntrí Jesukrístu támatai.

⁶ “Íikia péñkeraitji” tárugna nu ántrai, tunáa atumíin tuke akui. Iis, “Karía ishichik yuminnium enketam mash karimtiktsuk” tiniu áiniawai. Núnis átatui ju tunaajaj. ⁷ Tuma asamtai nu karía ukartarum yajauch awajturmasajj tusarum. Núnisrum ju tunaanumiá kanakrum péñker átatrume. Yaunchu enentái karía núnis amuukatniuiti. Ashí yamarmak yuminia áintsan ajasuitrume. Tanta wakapruachusha enentáimpratai. Israer-shuar paskua nampernum aya wakapruachu tantan yuu áiniawai. Atumí

tunaari atsakui atumsha nu námper-tantaa áintsar péñker ajasuitume. Paskua nampertincha Israer-shuar murikiun main áiniawai. Núnisan̄ Kristu jaka ii murikrja áinis ajasuiti. ⁸ Tuma asamtai iisha paskua námper nájanku pujakur tuke núnisan̄ shiir wekasatniuitji. Tuma asamtai ashí yajauch tunaasha írunna nuka karía yaunchu nawamua áintsan̄kete. Nuka atsutniuiti. Antsu nekas ana nuka shiir enentáimsar wekasatniuitji. Nuka yuminia áintsan̄kete.

⁹ Nuik papin áatramajrumna nui “Tsanirma shuarjain̄kia íschatniuitume” tímiajrumne. ¹⁰ Ju nun̄kanam Yus-shuarchaka aya tsanirma, aya kuitniak ikiauwin, aya kasak, aya ántar-yusan tikishmatin áiniatsuk. Nú shuarjain̄kia pen̄ké íschatniuitkiurmeka ju nun̄kanmaya jínkintrume. Núnaka tátsujai. ¹¹ Antsu wi tájana nu júiti, Shuar “Yus-shuaraitjai” tákuñka tura tunáa túriniaitkuin̄kia níijiai íschatniuitume. Tsanirmasha, kuítian ikiauwincha, ántar-yusan tikishmatniusha, tsanumniusha, nampencha, kasasha “Yus-shuaraitjai” tákuñkia íschatniuitume. Pen̄ké níijiai yurumáshtiniaitume. ¹²⁻¹³ Yus-shuarcha tunaari pachischatniuitjai. Yus núnaka íistatui. Átumka antsu atum̄jin Yus-shuar ainia nuna tunaari íistiniaitume. Tuma asamtai nu shuar tunaarintin atum̄jiya akankatarum.

6

Yus-shuar nuámtak itiurchat awajnaisarka Yus-shuarchajai nuna iwiarash̄tin áiniawai

¹ Yus-shuarka chíkich Yus-shuarjai itiurchat pujakka kapitán̄jai chichas iwiarash̄tiniaiti Yus-shuarcha asamtai. Antsu Yus-shuar írunna nujai iwiarati. ² Enentáimpratarum. Amuukatin tsawantai Yus-shuarka ashí ju nun̄kanmaya shuara tunaari mash nekaawartatui. Tura ashí tunáa nekaatniuitkiurmeka itiur yúpichuchia nu nekaashtatrum. ³ Nu arantcha Yusa suntari túramurisha nekaattaji péñkerashit tusarⁱ. Nayaimpiniam túrawarma nekaatniuitkiurkia itiura ju nun̄kanmaya nu tujinkiattaji. ⁴ Pai, itiurchat ákuin̄kia Yus-shuar pen̄ké tujintiainiana nujai iwiaratarum antsu. ⁵ Natsaruk tusan nuna tájarme. Warí, ¿atum̄jini chikichkisha atsawak ni yachi itiurchat̄ri péñker iwiaramnia? ⁶ ¿Urukamtai Yus-shuar ni yachijiai itiurchat pujakka Yus-shuarchanum wea iwiaratniun? ⁷ Atumí itiurchat̄ri kapitannium jukirmeka nujain̄kia átum tujinkiamu páantaiti. Natsantchakait. Itiurchat ana nusha ¿urukamtai antsu katsuntram asakáatsum? Kasamkamusha ¿urukamtai katsuntram asakáatsum? ⁸ Antsu átumka nuámtak yachijiai itiurchat awajnáiyarme tura kasárnáiyarme.

⁹ Tunáa túrinkia Yus akupeamunam pachiinkiachmin ainia nu nékatsrumek. Anañnawairap. Ashí tsanirma nusha, ántar-yusan tikishmatniusha, nuamtak áishmanjaj tsanirmasha, ¹⁰ kasasha, ashí kuítian ikiauwincha, nampencha, tsanumniusha, yajauch chichainia nusha, chíkich shuaran anankawar atantin ainia nusha Yus akupeamunma nuí penké wayashtin áiniawai. ¹¹ Atumíiyasha chíkich chíkich nuna túrin armai. Tura yamaikia ii Uuntri Jesusa kakarmarijiaisha tura ii Yusri Wakaní kakarmarijiaí atumi enentái shiir ajasuiti, atumsha Yusna ajasurme, tura tuke penker ajasurme.

Ii ayashi yajauch áchatniuiti

¹² “Ashí túramniaitjai” tiniu áiniawai tura nekasaiti. Tuma ajñ mash yáinkiashtatui penker wekasatniun. Nekas ashí túramniaitjai tura nánkamas túratniujai nupetnakchattajai. ¹³ Junasha tiniu áiniawai: “Apatuk wakejainchu tura wake apatkujainchu mai ántraití.” Apatkujai wakesha nekas mai metek enentáimpratin áiniawai tura Yus mai metek amuktatui. Núnisan ii ayashi ii Uuntri Krístunuiti tura Kristu ii ayashi nérenniuiti. Tuma asamtai ii ayashíjjai tsanirmash-tiniaiti. ¹⁴ Tura Yus ii Uuntri Jesusan iniantkimia núnisan ii ayashíncha nu kakarmarijiaí iniantkittiwai.

¹⁵ Ashí ii ayashiin Kristu ayashímkiaiti. ¿Nu átumka nékatsrumek? Winia ayashrusha Kristu ayashíyya asamtai ¿itiurak nuna tsanirí ayashín najanattaj? Penké túrachminiaitjai. ¹⁶ Kame ¿jusha nékatsrumek? Áishman tsanirijiaí tsanínkiar chikichik ayashtinia áinis ajainiawai. Núnisan Yus-Papinium áarmaiti: Mai chikichik ayashtinia áinis ajasartatui. ¹⁷ Tura shuar ii Uuntri Krístujai tsanínkia mai chikichík wakantin ajainiawai.

¹⁸ Tuma asamtai tsanirmatniunmaya yajáyañ wainkiarum tsékentiarum. Chíkich tunáa írunka nu ii ayashínkia ti yajauch awajeatsui. Túrasa shuar tsanirmakka ní ayashiniak yajauch awajeawai. ¹⁹ Yusa Wakaní ame enentáimin pujurtamu asamtai, ame ayashim ni jeente. Nu Wakanínkia Yus amasuiti. ¿Nuka nékatsrumek? Tuma asamtai ame ayashmi nérenchaitme. ²⁰ Kristu numpejai sumakma asamtai, ayashmisha wakanmisha Yusna áiniawai. Yusna asamtai ayashmijiaí penker túratniuitme, Yus shiir awájnásti tusam.

7

Nuatkatniusha penkeraiti, nuatkashtincha penkeraiti

¹ Ayu. Átum áatrurmarmena nuna yamaikia ujaktajrume. Shuar nuatteachkusha péñkeraiti. ² Tura ti tsanirmatniun enentáimtuinia ásar ashí áishman ní nuwenak nuatkati tura ashí nuwá ní áishrin iniumkati. ³ Áishmansha ni áishri asa nuwen túratniua nuna umiktiniaiti. Núnisan nuwasha ni nuwe asa ni áishrin túratniua nuna umiktiniaiti. ⁴ Núwaka nínki ni ayashí nérenniuchuiti, antsu ni áishriniuiti. Núnisan áishmansha nínki ni ayashí nérenniuchuiti, antsu ni nuwénuiti. ⁵ Ni ayashí suritnaikiashtin áiniawai. Tura mai itit awajnaitsuk Yus áujsatin wakeruiniak ishichik tsawant kanakmin áiniawai. Tura nuñkia atak tsanin pujustin áiniawai. Túracharmatañkia uunt iwianch, Satanás, tunaanum iniartinian útsutkattawai katsuntratniun tujintiakui.

⁶ Ayu. Tura nuna áarayatan nújainkia “ashí shuar páchitsuk nuatkatniuiti” tátsujai. Nuatkatniuitkiumka péñkeraiti. ⁷ Túramtai “ashí wijjai métek nuatkachuitkiuñkia maak ainti” tajai. Tura Yus ashí shuaran imiá métek najanachuiti. Chikichan nuatkatniun súsaiti, tura chikichan yúpichuch katsuntratniun súsaiti.

⁸ Natsancha wajencha juna tájai, “Wijjai métek nuattsuk pujusrumka péñkeraiti.” ⁹ Tura katsuntratniun tujinkiarka nuatkarti. Ti katsuntrachmin nekapeakum nuatkatni péñkeraiti.

¹⁰ Nuatnaikiarun antsu tájai, “Nuwa nuatkamuka ni áishrin ikiukchatniuiti” tajai. Núnaka ii Uuntrí Kristu akupkaiti aya winia chichampruchuiti. ¹¹ Túramtai ni áishrin ikiukkia nínki atak nuatnatsuk pujustí tura tsanin pujustinian wakerakka ataksha ni áishrin waketkiti. Núnisan áishmansha ni nuwen ajapashtiniaiti.

¹² Chíkich shuaran juna tájai wikia, ii Uuntrí Kristu juna akupkachuiti. Yus-shuara nuwenka Yus-shuarchaitkiuñka tura ni áishrijjai pujustinian wakerakka péñkeraiti; ajapashtiniaiti, tájai. ¹³ Núnisan Yus-shuara aishri Yus-shuarchaitkiuñka tura ni nuwejai pujustinian wakerakka péñkeraiti; ikiukchatniuiti. ¹⁴ Nu nuwaka “Yus-shuarchajai tsanin pujakun Yusjai yajauch ajastatjai” tu enentáimprashtiniaiti. Antsu nii Yus-shuar asamtai ni aishri nijjai pujá asa péñker ajasminiaiti Yusjai. Núnisan núwaka Yus-shuarchaitiat ni aishri Yus-shuarchaitkiuñka nijjai tsanin pujá asa péñker ajasminiaiti Yusjai. Núnisan ni uchirísha péñker ajasmin áiniawai Yusjai. Núnischaitkiuñka ni uchirí Yus-shuarcha uchiría áintsar ainti. ¹⁵ Tura áishmansha nuwasha Yus-shuarcha ana nu kanaktinian wakerakka túratí. Yus-shuar nujai ankantaiti. Núnisan asati. Tuke máaniaktinian Yus nakitramaji. ¹⁶ Núwaka ni aishri Yus-shuar

ajastatna nuna nekas nékawak. Tura áishmansha ni nuwé Yus-shuar ajastatna nuna nekas nékawak? Yus-shuarcha nuka wétinia wakerakka wetí.

¹⁷ Wátsek. Shuarka Yus-shuar ajaska Yus nin najanama áintsan tuke átiniaiti. Pujumia áintsan pujusminiaiti. Núnaka ashí Yus-shuarnum akupeajai. ¹⁸ Iis, Yus-shuar ajasuka Israer-shuaraitkiunka tuke Israer-shuar atí. Tura Israer-shuarchaitkiunka Israer-shuar ajastin enentáimprashtiniaiti. ¹⁹ Israer-shuaraitkiumsha tura Israer-shuarchaitkiumsha nuka enentáimtuschatniuiti. Aya Yus tana nu umirkatin nekas enentáimtustiniaiti. ²⁰ Yus-shuar ajasuka nuik pujumia áintsan pujusminiaiti. ²¹ Chíkich shuara takarniurí asam ti itiurchat pujakmesha itiurchat enentáimpráip. Tura ankant jínkimniaitkiumka jínkitiá. ²² Ankantchaitkiumka ankantaitkiumsha jú enentáimpratá. Takarniuka Yus-shuar ajas tuke chíkich shuara takarniurínkiusha shiir enentáimpratniuiti Kristu nin tunaanumiá ankant awajsamtai. Tura shuar takarniuchua nu, Yus-shuar ajas Kristu takarín ajasuiti. ²³ Ti wáitsamiayi Kristu in ankant awajtamsatniun. Ni numpejai sumakma asarum shuar emetamu áirap. ²⁴ Tuma asamtai shuar Yus-shuar ajas nuik pujumia áintsan yamaisha pujústí tura Yusan enentáimtus wekasati.

²⁵ Nuwá natsa túratniua nuna yamaikia áujmatjai. Kristu júna akupkachmai tura Kristu anenkratmarí ti nekapsa asamtai wi tájana nu antukminiaiti. ²⁶ Tuma asamtai júna tájai. Ti iturchatnum pujá asakrin shuar aya júnisan nuattsuk pujustin péñkeraiti. ²⁷ Nuatkaitkiumka núwem ik-iukip. Nátsaitkiumka nuwá eakaip. ²⁸ Tura nuatkumka tunáa túratsme. Nuwasha iniurtukka niisha tunáa túrachuiti. Túrash nuatnaikiaru itiurchatan ti wáinkiertatui jú nunkanam. Nú itiurchatnumiá wi uwentikraintjai.

²⁹ Yatsuru, júna tájarme. Ishichik tsawant taasai. Juyanka nuatkaru ainia nuka aya ni nuarín enentáimprashtiniaiti antsu Yúsna enentáimtustiniaiti. ³⁰ Núnisan tuke Yúsna enentáimsar úutainia nusha uutcha áintsar pujustin áiniawai. Warainia nusha warascharua áintsar pujustin áiniawai. Súmainia nusha sumakcharua áintsar pujustin áiniawai. Jú nunkanmayajainkia itit awajmamsashtiniaitji. ³¹ Núnisan aya jú nunkanam péñker pujustin ti takaschatniuiti. Ashí jú nunkanmayanka amuukatniuiti.

³² Jú nunkanmayajain itit ajaschak tusan wakerajrume. Nátsaka Yúsna enentáimtawai ni wakera nuna umiktinian. ³³ Túrash nuatkaka jú nunkanman enentáimtawai ni nuarín shiir enentáimtiksattsá. ³⁴ Núnisan nuwá nátsasha nuatkamusha niisháa enentáimiainiawai. Nuwá natsa Yúsna

enentáimtai ni ayashísha ni wakanísha tuke Yúsjaí shiir atí tusa. Tura nuátkamuka ju nunkanmayan enentáimtai ni áishrín shiir enentáimtikattsatsa.

³⁵ Atumin yáintajtsan juna tájarne. Itiurchat awajsattsan wakeratsjai antsu shiir wekaakrum itit awajtsuk Yus shiir enentáimtustarum tusan wakerajai.

³⁶ Tura shuar ni nawantri natsan nuatnaikiati takunka péñkeraiti. Nawantrin natsa tuke apujsatniun nakitiakka surukminiaiti. Nusha tunaachuiti. ³⁷ Tura chíkichka tuke natsan apujsataj takunka nekas péñkeraiti. Apujsatin itiurchatchaitkiuinka tura ni nawantri nuatnakchatniuitkiuinka apujsatniuiti. Apujsanka nekas péñker túraití. ³⁸ Tuma asamtai nuatmamtikianka péñker túrayi tura apujsanka nu nankaamas péñker túrayi.

³⁹ Nuwa aishri iwiaaku pujakuinka tuke niijjai tsanin pujustiniaiti. Tura ni aishri jakamtai ankant ajas ni wakerajai Yus-shuaran iis nuatnaikiamniaiti, ⁴⁰ tura tuke nuatnatskesha nu nankaamas nekas shiir pujustatui. Tú enentáimjai wikia tura Yusa Wakanísha métek tátsuash.

8

Yurumkasha namansha ántar-yusnum susamu

¹ Ayu. Yamaikia yurumkasha namansha ántar-yusnum susamun áujmatsattajai. Jujai túratniua nuka mash nékaji. Tura shuar “ti nékaitjai” enentáimkiunka nujainkia “neka asan nankaamantuitjai” tu enentáimiui. Antsu shuar chíkich shuaran aneakka nin péñker atí tusa yayawai. ² Shuar “ti nékaitjai” takunka nekas nekaatniua núnaka unuimiarchaiti.

³ Tura Yúsán aneana núnaka Yus péñker nékawai.

⁴ Wátsek. Ántar-yus susamu yúatin junis enentáimpratniuiti. Yuska aya chikichkiiti. Tura chíkich Yus atsakui, ⁵ aentsu yusrí nayaimpinmasha nukasha írunna nuka penké ántar áiniawai. Kame aentsu yúsrísha tura úuntrísha ti írunui. ⁶ Tura iikia nékaji, aya chikichik Yus awai, nusha ii Aparínti. Ashí írunna nuna najanaiti tura ni wakera nuna umikiat tusa najatmamji in. Ii Úuntrísha chikichkiiti, Jesukrístu. Niijjainkia ashí najanamuiti. Tura iisha ni kakarmarijjai iwiaaku pujaji.

⁷ Tuma asamtai ántar-yus susamu yuamniaiti tura Yus-shuar awai juna nékainiatsna nu. Nu shuar ántar-yusan yaunchu tikishmatraru ásar nú yusan susamun yuawarka itiurchat enentáimprar “enentáiruí yajauch ajasjai” tiartatui.

⁸ Watsek, yuamujai Yus in shiir enentáimtikrampratniun jeat-sui. Yuarkia nujai péñker áchattaji tura yúachrikia yajauch áchattaji. ⁹ Ankantaitme yúatin wakerakmeká. Tura anearta. Ame yúakmin chíkich shuar itiurchat enentáimna nusha

ámin wáitmak yúanka ni enentáin tunáa ajastatui. ¹⁰ Íistá. Ámeká neka asam ántar-yusa jeen wayam tura nuí yúakminkia ame yatsum nuí wáitmákchanpiash. Tura niisha itiurchat enentáimiat ántar-yus susamun yúashtimpiash. ¹¹ Nújainkia ame nékamujai ame yatsum Kristu jaka uwentikramia nu yajauch ajastatui. ¹² Túramtai ame yatsum itiurchat enentáimna nu yajauch awajeakum Krístunmasha tunáa túraitme. ¹³ Nu asamtai winia yatsurun wi yúajna nujai yajauch awajeak-naka namannaka penké yuashtatjai nii tunáa ajasain tusan.

9

Kristu akatramu túramnia nu

¹ Ashí Kristu akatramurí túratniua nuna wisha túramniaitjai ni akatramurí asan. Iis, wisha ii Uuntri Jesusan wáinkiaitjai tura wisha Jesukrístu takatrín takaaajai. Winia takatrujain átumka Yus-shuar ajasuitrume. ² Chíkich shuar “Kristu akatramurínchuiti” túrutainiakuisha átumka winia takatrujai Yus-shuar ajasu asakrumin nujai wi nekas Kristu akatramuríntiaj nu paant nekaamnaiti. Tura tu enentáimtursatniuitrume.

³ Ashí shuar “Kristu akatramurínchuiti” túrutainia nuna juna tájai. ⁴ Wisha Yus-Chichaman etserkataj tusan shuárnum iraakun ashí ajampruinia nuna yuamnaitjai tura umarmini-aitjai. ⁵ Tura Pítrusha, Jesusa yachísha, tura chíkich akatramusha irainiak ni nuwen Yus-shuar ainia nuna jukimnia áiniawai. Wisha núnisnak túramniaitjai. ⁶ Chíkich akatramuka kuit susamujai Yus-Chichaman etserainiawai. Wisha Pir-napísha núnisrik túramniaitji. Kame ¿aya íchikik takastiniaitiaj? ⁷ Suntarka ¿ní kuítrijaiimpiash takaa? ¿Tsanimpian aráa nu nuna neren yúatsuk. Wáakan wainiua nusha muntsurin úmatsuk? Núnisan Yus-Chichaman étsera nusha nú takasman-umiá yurumámnaiti. ⁸ Aya aents enentáimmian chichaatsjai. Muisais akupkamunmasha métek tawai. ⁹ Muisais akupkamunam áarmaiti:

“Turu takaak jínkiaia saepen pakartaj tusa nájakui ni nuí jínkiatáshtiniaiti. Antsu ni wakerak yuati.” Tu áarmaiti. Tura Yus aya túrunak enentáimprachmiayi jujai. ¹⁰ Antsu in jujai nekaawarat tusa tímiayi. Jínkiai araana nusha tura júukmatai saepen pakaana nusha nuna jínkiai mai yurumátin áiniawai. Paant atí tusa Yus nuna áarmiayi. ¹¹ Tuma asamtai Yus-Chicham atumiin etserkakrin nuyá átum takakrumna nujai in ajamsatniuitrume. ¿Nusha itiurchatkai? ¹² Chíkich akatramu atumiin irutainiak ajamsamun yuamnaitkuinkia iikia nekas túramniaitji ii etserkamujai Yus-shuar ajasakrumin.

Tura wikia antsu túrachuitjai. Atsumaknasha ashí itiurchat ana nuna katsuntramjai Kristu shiir chichamen étserkui shuar itiurchat enentáimturain tusan. ¹³ Ashí shuar ni yúsriniun tuke pujurin ainia nu, ni yusri jeen írunna nuyan yurumáiniawai. Tura yus-sutai namanken maawar nuyá yurumáiniawai. ¹⁴ Núnisan Yus-Chichaman etserniua nuka Yúsnan takasu asantai penker ajamsatniuiti. Nuna Kristu akupkamiayi. ¹⁵ Tura wisha ajamsamun yuamniaitiatan tuke winia kuítrujai yurumámjai. Tura yamaisha surúsúk tusan áattsujrume. Antsu nuna túrutsuk jakaŋka maak aintjai.

¹⁶ Uwempratin chichaman wi étserkun aya nújain “ti penkeraitjai” enentáimtumatsjai. Kame Yus nuna túratniun surusuncha itiurkatjak. Nuna túrachkunka ti itiurchat pujusaintjai. ¹⁷ Wakerakun étserkunka, warasminiaitjai. Tura nakitiaknasha tuke Yus surusmanka umiktiniaitjai. ¹⁸ Tura jujai antsu nekas warasminiaitjai: Wi túramnian iniaisan chikichnan takatsuk aya winia kuítrujain uwempratin chichaman étserjai. Nujai waraakun akikma áintsan̄kete.

¹⁹ Chíkich shuara takarniuchuitiatan ashí shuara takarniur̄iya áintsan̄ketjai Kristu shuar̄i untsur̄i ajasarat tusan. ²⁰ Israer-shuar̄jai pujakun niisha Yus-shuar̄i ajasarti tusan Israer-shuara áintsan̄ ajai. Kame Muisaisa akupkamur̄i umirkatin áiniakui wisha aun umirkashtiniaitiatnak umirniuitjai. ²¹ Tura Israer-shuarchasha Yus-shuar̄i ajasarti tusan, nu shuar̄i Muisaisa akupkamur̄in umirkashtin̄ áiniakui, wisha nuna umirkashtinia áintsan̄ ajai. Tura Kristu akupeana nuna umirkatin asan nekas Yus akupkamun umirniuitjai. ²² Yus̄jai katsuarchasha ti penker Yus-shuar̄i ajasarti tusan wisha katsuarcha áintsan̄ ajai. Chíkich chíkich shuar̄jai métek ajajai ishichkisha Yus-shuar̄i ajasarti tusan. ²³ Ashí wi túraj núnaka uwempratin chicham tuke shiir atí tusan túrajai. Tura nu chicham̄jai wisha atsumtsuk shiir wekaajai.

²⁴ Shuar̄i nekapnaisatniusha untsur̄i tsékeŋtin̄ átsuk tura aya chikichik awakmatsuk. Niŋki, awakmakun súsatniua nú shiirmachin achiktatui. Núnisrum kakarum ajasrum awakmak shiirmachin achiktinia áintsarum Yusna takastarum. ²⁵ Shuar̄i nakurak nekapnaisatin̄ ainia nuka nupetmaktaŋ tákunka ashí itit awajea nuna ikiuiniawai. Iisha núnisrik nu enentáijjai Yusna nu takastiniaitji. Nakuruinia nu shuar̄i awakmakun tawasap súsatniua nuna achikiarsha nú tawaspan wárik kajinmatkimniaiti. Antsu Yus in̄ amastatjinia nú tawasap tuke amuukashtatui. ²⁶ Wikia aya nánkamsan̄ tsékeatsjai. Nasejai maania áintsan̄ máaniatsjai. ²⁷ Antsu winia ayashrun awatinia áitkiasnak umimtikiajai. Túrachkunka chikichan unuiniariatan winiasha awakmakun súsatniua nú shiirmachin Yus surus-tinian nakitrurainti.

10

Ántar-Yus tikishmatrashtiniaiti

¹ Enentáimpratarum, yatsuru. Yus yaunchu ii úuntrin ashí métek yáinmiayi. Nusháa yurañmijai jintian nekapruamiayi. Tura ashí ii uuntri nu yurañmin apapekar wearmiayi. Ashí núnisar Kapaaku Nayaantsan Yus akankamunam wekasar katitkiarmiayi. ² Tura Muisaisan umirkar yurañminiam tura nayaantsanam ashí imiaimiu áintsan ajasarmiayi. ³ Núnisan ashí mash Yusnumia yurumkan yuawarmiayi. ⁴ Entsanचा ashí mash Yus susamunak umararmiayi. Kame Yus kayan-maya entsan akupkamtai ashí umararmiayi. Krístusha, nú kaya áintsan, nijiai tuke weakui ni wakaní atsumamurin Krístunmayan takusarmiayi. ⁵ Tuma ain Yus ti yáinmaitiat ni wakeramun umikcharmiayi. Tura ásar ni nunkeen jeatsuk atsamu nunkanam ti untsurí jákarmiayi.

⁶ Iisha nujai unuimiartiniaitji. Iikia ni wakeriarmia áintsari yajauchia nu wakerukchatniuitji. ⁷ Nu asamtai ántar-yus ni túrawarmia áintsarum tikishmatrairap. Iis, jiru yusrí shiir awajenakui Yus-Papinium áarmaiti, “Nu shuar yurumáwar nampekar námper ti najanawarmiayi.”

Tu áarmaiti.

⁸ Nii túrawarmia núnisrik iikia tsanirmashtiniaitji. Nuna túrawar paintitres mir (23.000) chikichik tsawantai jákarmiayi. ⁹ Iisha tunáa túrar “Yus asutiúáshtatui” tu enentáimprashtiniaitji. Niisha nuna túrawar napijiai esaim untsurí jákarmiayi. ¹⁰ Yussha yajauch áujmatsashtiniaiti. Nuna túrawarmatai Yus ni suntarin akupak untsurin maawarmiayi.

¹¹ Yaunchu ii úntrijiai túrunamu in amúamu tsawantnum pujajnia nuna jintintramat tusa áarmaiti. ¹² Tuma asamtai shuar “Tunaanum iniaarchattajai” tákunka anearti. Anearchamka iniaarminiaitme. ¹³ Tura ame itiurchatrumka aya amek nekapeatsme. Chikich shuarsha nu itiurchattajai métek nekapsatin áiniawai. Jusha ti enentáimpramniaiti. Ame katsuntratin tujintiamna nuna nankaamas itiurchatan Yuska pénger asa tsankatramatsui. Antsu itiurchat tarutrammatai, nu itiurchatnum pujamin Yuska uwempratniun jintintramattawai. Nújainkia katsuntrattame.

¹⁴ Nu asamtai aneamu yatsuru penke ishichkisha ántar-yus enentáimtusairap. ¹⁵ Atumsha nékatsrumek. Wi tájana nu nekaschakait. ¹⁶ Kristu jakamu enentáimtustin námper najanar Yus áujeaji Kristu numpen nakumea nu shiir atí tular. Tura métek umarar nujai Kristu numpé métek enentáimtaji taji. Tura apatkusha púurarⁱ tura métek yuarⁱ nujai Kristu ayashí in jarutramkamu métek enentáimtaji taji. ¹⁷ Apatkusha chikichkiitiat púuram untsurí ajatsuk.

Iisha núnisrik untsuríitiatar nu apatuk métek yuarⁱ métek enentáimprar chikichik ayashtinia áintsar aji.

¹⁸ Israer-shuartisha enentáimpratai. Yus-sutai naman^{ken} yuinia nu, métek yuawar Yusan métek enentáimtuiniatsuk. ¹⁹⁻²⁰ Núnisan Yus-shuarcha ántar-yus sutai naman^{ken} suiniak nekas-Yusan suiniatsui antsu yajauch wakanin suiniawai. Kame ántar-yus áiniak pen^{ké} ántar áiniawai, iwiaakuchu áiniawai. Nu naman^{sha} sutai naman^{ketiat} pen^{ker} naman^{kete}, yajauchichiiti. Aya jun^{ak} tajai. Yus-shuarcha ántar-yus sutai naman^{ken} suiniakui amesha niij^{iaj} métek yuamka yajauch wakanniasha niij^{iaj} métek enentáimtajai tame. Nu antsu yajauchiiti. ²¹ Kristu numpen nakumea nu úmakrum íwianch susamua nuka umarchatniuitrume. Kristu ayashⁱⁿ nakumea nu yúakrumka íwianch susamua nuka yúashtiniaitrume. ²² ¿Warí, Yus akajkatin wakeramek. Iisha nin nupetkamniashitiaji?

Aya aneakur takastiniaitji

²³ “Ashí túramniaitjai” tiniu áiniawai. Ayu, tura mash yáintkiashtatui pen^{ker} wekasatniun. Nekas ashí túramniaitjai tura mash yáintkiashtatui wakaniur kakaram ajastin. ²⁴ Nú arantcha chíkich yáintincha enentáimpratniuitji. Aya íniuk pachischatniuitji.

²⁵ Naman^u súmakum inintrutsuk sumakta. Tura ántar-yusan susamusha yajauchichuashit enentáimtsuk páchitsuk yuata. ²⁶ Ashí ju nun^{kasha} tura ashí írunna nusha Yúsachuk ainia. Tuma asamtai pen^{ker} áiniawai.

²⁷ Yus-shuarchasha yurumkan ajampramkuisha ashí mash yajauchichuashit tu enentáimtsuk páchitsuk yuamniaitme. ²⁸ Tura chíkich chichaak “Juka ántar-yus susamu naman^{kete}” túramkuinkia nuikia yuawaip. Yúakminkia nu shuar itiurchat enentáimprattawai. ²⁹ Ame páchitsuk yuamniaitkiumnisha nii antsu yúachmin asa itiurchat enentáimprattawai.

Tura amesha tíchatameash “¿Urukamtia nii tujintiakui wi yúachminiaitaij. ³⁰ Wi Yúsan yuminsan yúakuisha urukamtia itiurchat enentáimturainia. Yus yuminsachmakait?” tíchatameash. ³¹ Ayu, yúakmesha úmakmesha ashí túramna nusha ashí shuar Yúsan shiir enentáimtusarti tusam túratá. ³² Tuma asamtai ii túramujai chíkich shuar tunaanum ajuashtiniaitji. Israer-shuarsha, Israer-shuarchasha, Yus-shuarsha ashí yáintiniaitji. ³³ Wisha ashí shuaran yáintinian tuke enentáimjai. Ashí shuar uwemprarti tusan wi wakeraj nuna enentáimtsuk nin yáintinian tuke pujurjai.

11

¹ Kristu turamia áintsan takaajai wisha. Atumsha núnisrum wi takaajna áintsarum takastarum.

Nuwa Yusa jeen túratin

² Yatsuru, átum winia tuke enentáimturarum wi tímiajurmuna nu umirniuitrume. Tuma asakrumin shiir enentáimturajume.

³ Nu arantcha ujaajume. Yus Apa Krístun akupea áintsan Krístu ashí áishmankan akupeawai. Núnisan

áishmansha ni nuwen akupeawai. ⁴⁻⁵ Íjjiainkia shuar Yus áujenak tura núnisan Yus-Chichaman étseraniak áishman etsenkrukchatniuiti antsu nuwá múuknum nukumaktiniaiti. Tuma asamtai áishman nui etsenkrakka natsantaiti. Tura nuwá múuknum nukumakchanka natsantaiti. Intiashin tsupimiarua áintsankete.

⁶ Nuwá múuknum nukumaktinian nakitiakka intiashin tsupírtí́ nuikia. Watsek, nuwá ni intiashin tsupirtinian nakitiakka, tura awampratuniun natsamakaka múuknum nukumakti nuikia.

⁷ Áishmanka Yúsan nakumeawai. Yusna shiir ana nuna nakúmkáttsa Yus áishmankan najanamiaiyí. Tuma asamtai áishmanka etsenkrukchatniuiti. Antsu nuwanka áishmanna shiir ana nuna nakúmkáttsa Yus najanamiaiyí.

⁸ Iis, Yus áentsun najaneak nuwanmayan áishmankan najanachmiaiyí antsu áishmanka ukunchíjjiai nuwan najanamiaiyí. ⁹ Nuwan yáinkiát tusa áishmankan najanachmiaiyí antsu áishmankan yáinkiát tusa nuwan najanamiaiyí.

¹⁰ Tuma asamtai núwaka múuknum nukumaktiniaiti, nayaimpinmaya aencha ísarti tusa. ¹¹ Ayu, tura áishman nuwajainchu atsuinti tura nuwasha núnisan áishmanjainchu atsuinti. Yus ju nunkan núnisan atí tusa najanaiti.

¹² Iis, Yus nuwan áishmannumia najanamiaiyí tura áishmansha nuwanmaya akiiniaiti. Tura Yus mai najanaiti.

¹³ Enentáimpraturarum atumsha. Nuwá múuknum nukumasuk Yus áujsatin ¿penkerkait? ¹⁴ Ii shuartinkia áishman intiash ajakin natsantchakait.

¹⁵ Antsu núwaka intiash ajakin penkerchakait. Múuknum nukumaktinian susamuiti. ¹⁶ Watsek, shuar tuke umiktinian nakitiakka juna nekati, iisha tura ashí Yus-shuartisha aya tu enentáimji.

Kristu jakamu enentaímtustin nampernum yajauch túramu

¹⁷ Yamái áaratajarumina nujain shiir enentáimturatsjarme. Átum irunkuram yáiniaiktiniaitrume tuke penker wekasatin. Átum antsu iruntrurarum yajauch awajanaiyarme. ¹⁸ Wats, Yusa Jeen irunkuram atumsháa enentáimprarum kanakurme. Kame tu ujatkarmai. Nekaschashit. ¹⁹ Tuke tupartatrumek Yúsnan ti nekana nu shuar paant nekanat tusarmea. Antsu kajenaikaiar kanaktin penkerchaiti.

²⁰ Kanakin asarum Krístu jakamu enentaímtustin nampernum atum iruntrurarum yúarmena nu nekas Yúsnachuiti. ²¹ Iis, ashí ní yurumken itiaawai ai yurumattsa tura chikichan nákatsuk níá níá wari yuattsa wakerawai. Chíkichkia ishichik itiaana

nu tsukamawai tura chikichcha nampekarai. ²² Yurumkan ishichik itiaana nu iniatsáarchamek. Atum áitkiarum núnisan Yusa jeen yurumáshtiniaiti. Natsantaiti. Warí, chíkich jea átsuk ai yurumátin. ¿Warimpait. Jujaí shíirash áujsatjarum? Atsá. Jujaí shiir áujdachminiaitjarme.

Kristu jakamu enentaimtustin námpet

²³ Ii Uuntri Kristu jintintruama núnaka ujakmajrume. Jútas tuke súratsain, nu kashi ii Uuntri Jesus apatkun júki ²⁴ Yusan yuminsamiayi. Nuyá puur tímiayi “Yuatarum. Jusha winia ayashruiti; atumin jarutramkatta núiti. Ju yúakrum Winia enentáimtursatarum” tímiayi. ²⁵ Núnisan yurumá umik pininsha achik tímiayi “Ju pinin Yamaram Chichamaiti. Tura winia numpar puármatai Yamaram Chicham nekas uminkiattawai tawai. Ju tuke úmakrum Winia enentáimtursatarum’ tímiayi. ²⁶ Tuma asamtai ju apatuk yúakrum tura pininsha úmakrum ii Uuntri Kristu jakamuri enentáimtarme. Kristu táatsain ju tuke túratniutrume.

Shiir enentaijii ai Kristu jakamu enentaimtustin namper-numyuatniuiti

²⁷ Tuma asamtai shuar Yusan enentáimtutsuk ju apatkun yuawar tura ju pininnumiancha umarar Kristu ayashincha ni numpencha yajauch enentáimta asa tunáa túraiti. ²⁸ Nu asamtai ashí shuar ju apatkun yútsuk tura ju pininnumiancha úmutsuk ni enentáin iwiaratniuiti Yusjai. ²⁹ Kristu ayashí jakamu enentáimtutsuk yúakka tura úmakka nuna tura asa asutniáttawai. ³⁰ Atumsha tura asarum jaarne tura pimpiruitrume. Chikichcha jákaru áiniawai. ³¹ Ímia-iik íimiakrinkia Yus in asutiámachaintji. ³² Tura ii enentáin Yus yajauchia nuna wáiniuk asutiámaji. Túrachkunka ashí Yus-shuarchajai súmantikramawaintji.

³³ Tuma asamtai, yatsuru, iruntrar yurumáttsa matsatkurmeka nákastarum métek yurumátin. ³⁴ Shuar tsukamakka ni jeeniink’i yurumáti. Nújainkia yajauchijjai irunchakrumin Yus asutiámashtatrume. Ayu, chíkich áatrururmena núnaka wi ai jean iwiarattajai.

12

Yusa Wakaní ni shuarin susamu

¹ Yusa Wakaní ashí ni shuarin súana nuna yamáí ujaktatjarme. Nekaatarum, yatsuru. Yus-shuar shiir takasarti tusa Yusa Wakaní juna súasaiti.

² Yaunchu átum Yus-shuar tuke ajatsuk chíkich shuarjai métek ántar-yus tikishmatramarme. Niisha ántar-yus ásar áujmattramsachmin ármiai. ³ Tura jújain shuar Yusa

Wakaní kakarmarijiaí chichaana nu nekaamniaiti. Yusa Wakaníjiaínkia shuar “Jesus yajauchiiti” tíchamniaiti. Núnisan aya Yusa Wakaníjiaín “Jesus winia Úuntur asa akuptuktiniaiti” tíminiaiti.

⁴⁻⁵ Yusa takatrí íruntsuk. Tura Yusa Wakanínkí ashí nuna takastinian súsaiti. Tura shuar Yus-shuara Uuntrí chikichik aín ashí Yusa takatrín métek takaatsui. Antsu chikichkin ashí nankaamas péñker takaawai. Yusa Wakanísha nuna shiir takasat tusa súawai. Tura Nii wakera nuna Nínki ni shuarín chikichik chikichik niisháa niisháa súawai. ⁶ Yúskete ashí ni shuarín niisháa takamtikeana nu. Nínki ashí ni shuarí enentáin takaak takatnasha shiir takamtikeawai. ⁷ Yusak túratin súam Yusa Wakaní kakarmari paant átatui nu takasmanum. Tura ashí shuar ní takatríjiaí yáiniaiktin áiniawai. ⁸ Júnaka Yus takamtikeawai. Nékana nu shuar-nasha, unuimiarua nunasha Yúsnan ujaktinian súawai. Tura mai shuaran Yusa Wakaní kakarmarijiaí nuna túratniun súsaiti. ⁹ Chikichnasha Yúsan áujenak Yúsan ti enentáimtusar nekas itiurchat ana nuna iwiaratniun súawai. Nincha Yusa Wakaní kakarmarijiaí nuna takastinian súsaiti. Chikich-nasha jaan tsuártinian súawai. ¹⁰ Chikichnasha aents nínki túrachminian túratniun súawai. Chikichnasha Yúsnan etserkat-niun súawai. Chikichnasha shuar wari yajauch wakannia péñker wakanniasha apatka nekaatniun súawai. Chikich-nasha niisháa chichaman chichastinian súawai. Chikich-nasha niisháa chichasman jintiatniun súawai. ¹¹ Tura ashí shuara enentáin nu Wakanik takaawai. Tura Nii wakera nuna ankant ankant súawai takastinian.

Ashí Yus-shuar Kristu ayashía áintsan ajainiawai

¹² Iikia Kristu ayashía áintsarí ayashímkiaitji. Kristu ayashí muchitmarísha írunui. Niisha túmaitiat chikichik ayashtiniaiti. ¹³ Tura imianiakrin Yusa Wakaní chikichik awajtamsamji, Kristu ayashía áintsan. Israer-shuarsha, Israer-shuarchasha, ti itiurchat takaana nusha, ankant ainia nusha, ashí yamá chikichik ajasuitji. Tura Yusa Wakaní pimiutkamuitji Níjiaí tsanínkia pujakur.

¹⁴ Ayashi muchitmarí aya chikichkichiiti. ¹⁵ Tuma asam-tai, winia nawer uwejruchuitiat tuke winia ayashrunuiti. ¹⁶ Winia kuíshrusha jíiruchuitiat tuke winia ayashrunuiti. ¹⁷ Wátsek winia ayashur aya jíikitkiuiníka ¿itiurak antukain-tiaj? Winia ayashrusha aya kuíshkitkiuiníka ¿waríjiaín nekap-saintiaj? ¹⁸ Nu asamtai Yus winia ayashru muchitmarí ni wakeramunam ikiusuiti. ¹⁹ Chikichik muchitmajain ¿ayash áminkiait? ²⁰ Antsu untsurí muchitma akuisha chikichik ayashkiiti. Iisha núnisrik chikich chikich iisháa takayatrik métek takasar Yus wakeramu takamtsuk umíaji.

²¹ Winia jiiru pénker ain winia uwejrúncha wakerish-tajak. Winia muukarsha pénker ain winia nawernasha wakerishtajak. Núnisan Yus-shuar shiir enentáimtumak ni yachin “atsumatsjame” tíchamniaiti. ²² Antsu ii muchit-mari ishichik enentáimtajnia nu atsakuínkia ti atsumawaintji. ²³⁻²⁴ Chíkich muchitmasha, ímiancha nu, shiir iwiarmamtaji. Tura nu muchitmaka shiir ísminia nujai nankaamas pénker wainji. Iis, shiircha nu antsu pénker wainji. Yus ii ayashín núnisan atí tusa najanamiayi. ²⁵ Nujainkia ayashí muchitmari máanaitsuk métek yáiniainiawai. ²⁶ Chikichik muchitmaram najaimiakum ashí ayashnium wáitiatsmek. Núnisan chikichik muchitmaram ayap ajakum ashí ayashnium shiir átsumek.

²⁷ Núniskete Kristu ayashíjiai ayashímkiaji nu. Tura chíkich chíkich ni muchitmari aji. ²⁸ Ayashnium muchitma írunna áintsan Yus ni shuarín untsurí takatan súsaiti. Emka Yus akatramu, nuyá ni chichamen etserin, nuyá jintinkiartin, nuyá aents túrachminian túrin, nuyá tsuákratin, nuyá yáínkratin, nuyá akupin, nuyá niisháa chichamjai chicharin, mash írunui. ²⁹ ¿Ashí Yus akatramuk ainia. Ashí Yus-Chichaman etserniuk ainia. Ashí jintinkratniuk ainia. Aents túrachminian ashí túriniak ainia. ³⁰ Ashí tsuákratniuk ainia. Ashí niisháa chichamjai chichamtiniak ainia. Ashí niisháa chichamjai chichasman jintínkratniuk ainia? Atsá. Túmachuiti. ³¹ Túmaitkuínkia pénkera nu takastin wakeruktarum. Tura imiá pénkera nuna juí jintintiatjarme.

13

Aneatin

¹ Ju nunkanmaya aentsu chichamen untsurí chichayat-nak tura nayaimpinmaya aentsu chichamencha chichayat-nak anenkratchaknakaka tampur meserua áintsanak aya ten-ten ajajai. Penké ántranak chichaajai. ² Yus-Chichamnasha ti shiir étersiatnak, túrasha ashí uukmancha tura ashí nekaam-niancha nékayatnak, túrasha Yúsan ti enentáimtusán murá umuchiayatnak, anenkratchaknakaka penké ántraitjai. ³ Ashí wi takakjana nuna atsumainian súayatnak tura Yus shiir awa-jsattsan winia ayashrúncha áesawarti tusan surumayatnak tura anenkratchaknakaka ántranak túraitjai.

⁴ Anenkartaka wari kajeatsui, tsánkaiti, chíkich shuaran shiir awajniuiti, péechach asa waantu enentáimtumsui. ⁵ Anenkartaka natsanta nuna túrichuiti, níiniunak enentáimchaiti, kajechuiti, páchichuiti. ⁶ Chikicha tunaarín wararchaiti antsu pénker shuaran wararniuiti. ⁷ Anenkartaka aya katsunteawai. Tsanú chichamnasha

nakitiawai antsu aya péñker ana nuna nákwai. Tunáa shuar shiir ajastí tusa tuke nákwai.

⁸ Anenkrattainkia tuke amuukashtiniaiti. Antsu ju nunka amuukmataisha Yus-Chicham etserkatin atsuttawai, tura ni-isháa chichamjai unuimiatsuk chichastincha amuukattawai, tura ashí nekanamtai unuimiartintcha atsuttawai. ⁹ Kame yamaikia aya ishichik nékaji. Yus-Chichamsha amutsuk étsereaji. ¹⁰ Túra ukunam mash nekanamtai yámankamtaik nekaamuka ántar átatui.

¹¹ Yaunchu wi uchich asan uchichia áintsan enentáimkiun chichasmajai. Antsu yamaikia uunt ajasan uchiniun iniaisaitjai. ¹² Núnisrik yamáí ju nunkanam Yus paant wáintsuji. Íspik kusurunam íimsatniua áintsan ketete. Antsu ukunam mai métek paant wainniaikiattaji. Yamaikia aya ishichik nékaji. Nui antsu Yus winia nékara áintsanak nekaattajai. ¹³ Watsek, menaintiu amuukashtin áiniawai. Ju áiniawai: Yus shiir enentáimtustin, shiir ana nu nákastin, tura anenkrattai. Ju menaintiunmasha anenkrattainkia ashí nankaamakuiti.

14

Niisháa chicham unuimiatsuk chichastin

¹ Nu asamtai, anenkratin atarum. Tura núnisrumek Yúsnan péñkera nu takastin wakeruktatum. Imiankaska Yus-Chicham etserkatin péñkeraiti. ² Nujainkia niisháa chichamjai unuimiatsuk chichastin péñkerchaiti. Iis, nu shuar chíkich shuarjai chichatsuk aya Yusjai chichaawai. Ni chichame penké antukchamniaiti. Yusa Wakaní nin chichastinian súawai túrasha tana nu nekaachminiaiti. ³ Antsu Yus-Chichaman étserea nuka shuaran yayawai. Shuaran ikiatsuártasa, tura ikiakártasa, túrasha atsankrattsa yayawai. ⁴ Niisháa chichamjai unuimiatsuk chichaana nuka aya nínki katsuartinian yáinmamui. Antsu Yus-Chichaman étserea nuka ashí Yus-shuaran ikiatsuáwai.

⁵ Atumsha ashí mash niisháa chichamjai chichastinian wakerajrume. Túrasha nuna nankaamas Yus-Chicham etserkatniun wakerajrume. Aya chichastinjinia ju imiá péñkerchakait. Kame chichasma jintiákmeka maak. Nujai Yus-shuar tsakarartatui. ⁶ Enentaimpratarum, yatsuru. Nui iraakun aya niisháa chichamjai chichaaknaka ¿itiura yáintatjarum? Antsu Yus winia jintintruamuncha tura wi nékajna nunasha étserkunka yáintatjarme. Yus-Chichamnasha tura ashí Yúsnancha jintinkiuuncha yáintatjarme.

⁷ Peemsha tura tumansha wi tájana áintsan áiniawai. Péñker tuntuíyamuka paant nekaamniaiti. Tura péñker tuntuíyachkuinkia, nu tuntuíyamu nekaachminiaiti.

⁸ Santarsha mesetnum wéenakui ni kapitiántri ni wakeramun

ujaktinian kachun umpuawai. Paant umpuakuinkia suntarsha ni wakeramun nekaawartatui. Tura paant umpuachuinkia suntarsha ġitiurak mesetnum wétinian iwiarat? ⁹ Atumjaisha núniskete. Nekaachmin chichamjai chichaakminkia ġtámena nuna itiur nekaawartata? Nase chichartsumeash. ¹⁰ Ju nunġkanmaya chichamka ti untsurí irunui. Nu chichaman nékakka ashí antukmin áiniawai. ¹¹ Tura chíkich shuara chichamen ántachkunka níjiainkia yajaya apachia áintsanak ajajai. Niisha wíjiainkia yajaya apachia áintsanġkete. ¹² Tuma asamtai, Yusa takatři ti wakera asarum ashí Yus-shuaran ikjarartatna nú takat nekas wakeruktarum.

¹³ Nu asamtai niisháa chichamjai chichaitkiumka chichasumna nu jintiartin Yus seata. ¹⁴ Niisháa chichamjai Yusan áujeaknaka nekas winia wakantrujai áujeajai tura áujsajna nuna nékatsjai. ¹⁵ Antsu wikia júnisan enentáimjai. Yusan áujeakun winia wakantrujajsha áujsattajai tura enentáimtsuk áujsashtatjai. Kantamkuncha kantamaj nuna enentáimkiun winia wakantrujajsha kantamattajai. ¹⁶ Amesha shuar iruntramunam aya wakanmijjai niisháa chichamjai Yus shiir yumınsakmincha nekaachmin asamtai nékachuka ámijjai métek áujsatniun jeatsui. ¹⁷ Ti shiir Yus yumınsam áujeatsmeash tura chíkichka Yusjai ikiakáatsme. ¹⁸ Ashí átum nusháa chichamjai chicharmena nuna nanġkaamas wikia chichaajai. Nuna Yusan yumınsajai. ¹⁹ Túmaitiatnak untsurí chichamjai chichasan ántumtikiashtinjainġkia nanġkaamas Yus-shuar iruntramunmanġka aya senġku chichamchijiaın tiıntjai, paant jintintiawartaj tusan.

²⁰ Yatsuru, uchia áintsarum enentáimprairap. Kuirchia áintsarum tunáa túrashtin enentáimpratarum tura chíkich írunna nujai uunt enentáimpratniua áintsarum enentáimpratarum. ²¹ Yus-Papinium áarmaiti:

“Yajaya shuaran akupkan niisháa chichamjai chichastatjai. Tura nújajsha anturtukchartatui” tawai Yus.” Tu áarmaiti.

²² Nújainġkia páantaiti, nusháa chichamjai chichastinkia Yus-shuarchan ashamtikiar enentáimtikratniun Yus súsaiti. Yus-shuaran tu enentáimtikratniun súsachuiti. Antsu Yus-Chichaman etserkatniunka Yus-shuarchan enentáimtiktsuk Yus-shuaran yáintinian súsaiti. ²³ Tuma ajın, nékachusha tura Yus-shuarchasha Yus-shuar iruntramunam wayanġka tura ashí niisháa chichamjai chichainianak wáinkianġka “mash waurka ajasarai” enentáimturmarshartatuak. ²⁴ Tura Yus-Chicham étserkurminkia nékachusha tura Yus-shuarchasha nui wayanġka ashí tárumna nujai ni tunaarın íimias enentáimturtatui. ²⁵ Nújainġkia ni enentáın úumak ana nuna

paant wáiniak tikishmatar Yusan shiir awajsattawai. Tura “nekas Yus atumjai pujawai” títiatui.

Ashí tuke shiir takastarum

²⁶ Ayu, júnisaiti, yatsuru. Átum irunkurmin shuar takastinian Yus nin susamu túratí. Kantamátنيuncha, jintintiatنيuncha, Yus iwiainiakman ujaktinniasha, nusháa chichamjai chichastinniasha, nusháa chichasman jintíatنيuncha, ashí Yus-shuar Yusjai tsakararti tusar júna mash takasarti. ²⁷ Nusháa chichamjai chichainiakka chikichik chikichik chichasarti. Tura jímíarchik menaintiuchiksha chichasarti. Tura ni timianka jintiartiniaiti. ²⁸ Jintiartin atsakuinkia nusháa chichamjai iruntramunam chichaschatniuiti. Antsu níñki Yusjai chichasti. ²⁹ Núnisan jimiarchiksha menaintiuchiksha Yus-Chichaman etserkarti. Tura chíkich shuar núj iruntrar ni etserkamun enentáimprarti péñkerashit tusar. ³⁰ Tura chikichik chichaakui Yus chíkichan núj pujana nuna yamaram chichaman súakuinkia emka chichaa nu iniáisatí. ³¹ Núnisrum Yus-Chicham etserkatin wakerarmena nu chíkichik chíkichik chichasrum ashí jeattarme. Nújaiisha Yus-shuar unuimiarar kakarartatui. ³² Yúsna étsérainia nuka tuke enentáimprar chichastin áiniawai. Enentáimtsuk náñkamsa chichasmin áiniatsui. ³³ Yuska pachimtak chichaman nakitiak shiir chichasmanak wakerawai.

Chíkich nuñkanmasha ashí Yus-shuar iruntramunam túrainia áintsarum túratniuitrume atumsha. ³⁴ Yus-shuar iruntramunam nuwá chichastin surimkiamuiti. Yus akupea núnisan núwaka chichatsuk umin átin áiniawai. ³⁵ Inintrustininian wakerakka ni jeen waketkin ni aishrin núj aniasti. Ashí iruntramunam nuwá chichastin natsantaiti.

³⁶ Jusha enentáimpratarum. Yus-Chicham atumjai nanñkamnachmai. Núnisan aya atumjini Yus-Chicham jeartamchaiti. Chíkich nuñkanmasha Yus-shuarti túrutai enentáimpratniuitrume atumsha. ³⁷ Atumjín shuar “Yus-Chichaman tuke etserniuitjai” enentáimtumatsuash. Tura chíkich shuarsha “Yusa Wakaní tuke winia akuptaiti” enentáimtumatsuash. Nu shuarka wí áatjarmena nuna enentáimprar “nekas Yúsna tíniuiti” tiartí. ³⁸ Tu táchakuinkia niisha ántrar áiniawai.

³⁹ Nu asamtai, yatsuru, Yus-Chicham etserkatin wakeruktarum. Nusháa chichamjai unuimiatsuk chichastincha surimkiairap. ⁴⁰ Túmaitiat antukchamin awajtsuk ashí shiir túratarum.

¹ Ataksha, yatsuru, uwempratin chichaman wi etserkamaj nuna atumín enentáimtikrattsan wakerajrume. Nu chichamsha atumsha enentáimturarum tariarurme. ² Nu chichamsha átum ántar enentáimtachkurmeka uwempraitrume. Wi ujakmajrum nu tuke enentáimtaitkiurmeka nekas uwempraitrume.

³ Winia ujatkamunak ujakmajrume. Nu chichamsha ashí nan̄kaamas úuntaiti. Júiti nu chicham: Ii tunaarín asakártasa Kristu jarutramkamiaji, Yus-Papinium tana núnisan̄. ⁴ Tura jakamtai iwiarsarmiaji. Nuyá menaintiú tsawant tsawarmanum Yus Nin iniantkimiayi, Yus-Papinium tana núnisan̄. ⁵ Nantakisha Pítrun wantintiukmiayi, nuyá ni akatramurín wantintiukmiayi. ⁶ Nuyanka kiniantusa (500) nan̄kaamas Yus-shuaran wantintiukmiayi. Nú shuarnumiasha ishichik jákaru áiniawai tura untsurí tuke pujuiniawai. ⁷ Nuyasha Sántiakun tura nuyá ashí ni akatramurín wantintiukmiayi.

⁸ Ashí amúamunmasha winiasha wantintieurkamiaji, wi ya-jauch wekaa aín̄. ⁹ Wisha Yus-shuaran ti yajauch awajsa asan chíkich Yus-akatramujai ímianchaitjai. Nekas winia péñkerujai ni akatramuríntjai tíchamniaitjai. ¹⁰ Antsu Yus ti shiir anentak winia enentáirui pujurtus péñker najataiti. Nu asamtai winia kakarmarjai takaschaitjai, antsu Yus, anenkartin asa, winia enentáirui takaakui ashí ni akatramurín nan̄kaamas takasuitjai. ¹¹ Tura wi takaakuisha tura ní takainiakuisha mai péñkerkete. Nu chichamka mash étsereaji tura nu chichamsha átum enentáimtusmarme.

Jákaru nantakiartatui

¹² Isha “Kristu jakamunmaya nantakniuiti” tu étsereaji. ¿Itiur nuikia shuar jakamunmaya nantakchatniuiti tuinia? ¹³ Jakamunmaya nantakchatniuitkiuñkia nuikia Krístusha nantakchaiti. ¹⁴ Tura Kristu nantakchaitkiuñkia ii ujajnia nu penké ántraiti, atumsha Kristu enentáimtarmena nusha ántraiti. ¹⁵ Núnisaitkiuñkia iisha “Yus Krístun iniantkimiayi” tákur waitruamji. Iis, nekas jakamunmaya nantakchamniaitkiuñkia nuikia nekas Yus Krístun iniantkichuiti. ¹⁶ Jáka nantakchatniuitkiuñkia imia Krístusha iniantkichmaiti. ¹⁷ Tura Kristu iniantkichmaitkiuñkia átum Kristu enentáimtamusha penké ántraiti. Tunaarmisha asakárchamu áiniawai. ¹⁸ Núnisaitkiuñkia Yus-shuar jákaru ainia nu tuke menkaru áiniawai. ¹⁹ Iikia Kristu enentáimtusar tuke Niiijai shiir pujustin nákaji. Tura aya jú nunkanam pujustiniaitkiurkia Kristu ántar enentáimtakrin ashí nan̄kaamas waitnentramptratniuitji.

²⁰ Antsu imiankas Kristu jakamunmaya nantakniuiti. Ashí ukunam jakanmaya tuke jákashtinian nantakiartatna nuna Nii émtukuíti. ²¹⁻²² Yaunchu Atan tunáa túramtai ashí shuar jákatin áiniawai. Núnisan yamaikia Krístujain tuke atakka jákashtinian nantakiartiniaiti. Iis, chikichik áishmanjain jákatin nan̄kamnamiayi. Nuka Atan̄kauyayi. Núnisan̄ chikichik áishmanjain nantaktin nan̄kamnamiayi. Nuka Krístuít. ²³ Yus wakerana nui Yusna nu mash nantakiartatui: Kristu emka-juukma áintsan̄ émtukim nantakniuiti tura atak ju nun̄kanam tara ashí ni shuarin̄ júuktinia áintsan̄ iniantkitiawai. ²⁴ Nuīnkia mash amuukattawai. Nuī Kristu ashí kapitíánniasha, ashí akupniuncha, ashí núnisan̄ jú̄ nun̄kanam írúnna nunasha nupetak emesrattawai. Krístusha ashí mash ni Aparin̄ susattawai. Tura Yus Apa ashí akupin̄ átatui nuikia. ²⁵ Iis, jú̄nisan̄ átatui. Emka Yus Apa ashí ni nemasrin̄ nupetak Krístun̄ susattawai akupin̄ atí tusa. ²⁶ Tura ni nemasrin̄ nupetak ashí amúamunam jákatniuncha nupetkattawai. ²⁷ Yus Apa ashí Krístun̄ súsaiti ashí akupin̄ atí tusa. Yus-Papinium tu áarmaiti. Tura “ashí Krístun̄ súsaiti” táyat Yus Apancha susamuiti tátsui. Antsu Yus Apa ashí Nin̄ susa asa Nīnki súsachmaiti. ²⁸ Tura Yus Apa ashí mash ni Uchirin̄ Krístun̄ nekas susamtai Kristu nuikia ashí akupin̄ ajas atak ni Aparin̄ mash awantuki núnisan̄ surumaktatui. Nuīnkia Yuska tuke ashí nan̄kaamantu átatui.

²⁹ Ayu. Tura shuar jakan enentáimtusar imiantinniasha ħurukamtia nuna túruinia? Jákaru nantakchatniuncha ħurukamtai imianainia?

³⁰ Iikia ħurukamtai tuke jánīnkiaruitiaji? Nantakchatniuitkiuin̄kia ánta wáitsaintji. ³¹ Atsá, pen̄ké áintsachuiti. Nu asamtai átum ii Uuntrī Jesukrístu enentáimtakrumin̄ wi shiir enentáimtajrume. Tura wisha tuke tsawantin̄ ti itiurchat pujakun̄ jákatniua áintsan̄ pujajai. ³² Jakamunmaya nantakchatniuitkiuin̄kia wi ántranak kajen shuarjaī Ipisiunam máaniakuitjai. Maa, uunt yawáa áinis kajen áрмаi. Wats, núnisaitkiuin̄kia antsu “yurumár nampektai, kashin̄ jákashtatik” titiai nuikia.

³³ Anañnawairap. “Pénkeraitiatam yajauch shuarjaī tsanīnkia wekakmeka yajauch máatrattame” tiniu áiniawai. ³⁴ Tunáa ikiuakrum pen̄ker wekasatin̄ shiir enentáimpratarum. Iis, shuar Yúsan̄ nékainiachu tuke awai. Atumin̄ natsāaruk tusan̄ tájarne.

Iniantkimiú ayash átatna nu

³⁵ Shuarsha inintruschaimpiash ħjákarusha itiurak nantakiarat. Nantakiarsha warí ayashniak takusarat?

³⁶ Enentáimtsuk inintrawai. Jínkiaí araamsha jaka

áintsan amúatsuk. Túrayat tsapaatsuk. ³⁷ Tsapaitniurisha araatsme antsu trikiu jínkiaichisha chíkich árika jínkiaichirisha araame. ³⁸ Nuyá tsapaakuisha Yus wakerana núnisan ní tsapaitniuríncha súawai. Tura ankant ankant tsapaitniurínkia súsaiti. ³⁹ Núnisan ashí ayash métekcha áiniawai. Áentsnaka niishaaiti. Kuntinniasha niishaaiti. Nanamtinniasha namaknasha niisháa áiniawai. ⁴⁰ Nayaimpiniam yaa írunui tura ju nunkanam írunna nujai nusháa ímtin áiniawai. Nayaimpinmayasha nun kayasha shírmari nushaiti. ⁴¹ Etsá wincharisha nantunusha yáanusha mash nushaaiti. Nuamtak yaaksha chikicha wincharínkia chikichnajaínkia nushaaiti. ⁴² Núniskete jaka nantaktíncha. Káurtinnium iwiarsam jákashtinnium nantaawai. ⁴³ Antra nu iwiarnawai, shiira nu nantaawai. Kakarmachua nu iwiarnawai, kakarma nu nantaawai. ⁴⁴ Juyá ayash iwiarnawai, nayaimpinmayá ayash nantaawai. Juyá ayash átsuk. Núnisan nayaimpinmayá ayashsha awai.

⁴⁵ Yus-Papinium nuní áarmaiti:

“Emka áishman ni naari Atan, aents ajas iwiaaku ajasmiayi.”

Tu áarmaiti.

Ukunmanka, yamaram Atanka áintsan, Kristu, wakan asa, ashí áentsun nekas iwiaaku átinian susamniaiti. ⁴⁶ Nayaimpinmayá ayashkia émkachuiti antsu juyá ayash émkaiti tura nuyá nayaimpinmayá nu. ⁴⁷ Emka áishman nun kajai najanamu asa nun kayaiti. Ukunmayá áishmansha ii Uuntri Kristu asa nayaimpinmayaiti. ⁴⁸ Atanka áintsan ainia nusha juyá ayashtin áiniawai. Kristu áintsan ainia nusha nayaimpinmayá ayashtin áiniawai. ⁴⁹ Yamái juyá áiniakur ukunam nayaimpinmayá ayashtin ajastatji.

⁵⁰ Juna tájarme, yatsuru. Ayash númpentin asa nayaimpiniam, Yus akupeana nui, wayachminiaiti. Iis, káutainkia káurchatniunam wayachminiaiti. ⁵¹ Yaunchu uukma nu yamá nekaatarum. Ashí jákashtatji, túmaitiatar ashí yapajniáttaji. ⁵² Tura pusari muítsarnin ti wárik yapajniáttaji. Tura ashí amuukai tusa umpuariatui. Nú umpúamunmasha Yus-shuar jákaru ainia nu atak jákashtinian nantakiartatui. Iisha nuin yapajniáttaji. ⁵³⁻⁵⁴ Jú kautainkia yamá jákatniuiat káurchamnia ajastiniaiti. Túrasha jákachmin átatui. Nu túrunamtaisha Yus-Papinium aarma uminkiattawai: “Jákatniun Yus nupetak amukuiti. ⁵⁵ ¿Itiur jákatjik yamaikia.

Jákatniusha itiur nupettamkan mantamataji?” Tu áarmaiti.

⁵⁶ Yaunchu Yus akupkamu tiniu asantai shuar tunáa tura jákatniuiti. ⁵⁷ Yamái antsu ii Uuntri Jesukristu túramujai jákatniunka Yus nupetkaiti. Tura incha nujai uwempratniun amaakui shiir yúminkiaji.

58 Nu asamtai, aneamu yatsuru, kakaram ajasrum yawetsuk nan̄kaamas Yusa takatrī takastarum. Ii Uuntrī Krístujai tsanīnkia takaarum nuka pen̄ké ánrachuiti. Nu paant nékarme.

16

Yusa kuitrī irurtin

¹ Yusa kuitrī irurtinkia, Yus-shuaran Karasea nun̄kanam tímiaj núnisnak atumniasha tájarme. ² Ashí tumīntin, Yus súramna áintsam akankam ikiusta. Nújain̄kia wi jeattaj nui yaunchu akankamu mash irurmin átatui. ³ Nui jeancha átum anaiyarmena nu shuaran papijjai Jerusarénum akupkattajai. Tura atumí kuítrumin aisha ii yachin súsartatui. ⁴ Wisha wéminiaitkiuin̄kia wijjai wéartatui.

Papru irastatna nui

⁵ Wi Masetúnia nun̄kanam wétiniaitjai tura nuyá Kurintium jeattajai. ⁶ Nujsha untsurī tsawant pujuschatjash. Ishichik nantusha wéchnamianum pujuschatjash. Tura wi atak wéakui atumsha yáintkiarum shiir akuptukchattarpash. ⁷ Aya wárik nan̄kaamaktinian nakitiajai. Antsu Yus wak-erakuin̄kia untsurī tsawant atumjai pujustaj tajai. ⁸ Tura juin̄ Ipisiunam pintikustís nampernum pujustatjai. ⁹ Juin̄kia Yusa takatrī tí shiir takastin awai. Tura untsurī shuar wi takaamun nakitiainiawai.

¹⁰ Timiutéu nui jeamtain̄kia, shiir awajsatarum; sapijmi-akain̄. Niisha wijjai métek Yusa takatrīn takaawiti. ¹¹ Nu asamtai nakitirairap. Antsu yáinkrum winí shiir akup-katarum. Chíkich yachijjai tatí tusan nákaiai.

¹² Apurusnasha chíkich yachijjai winí írmasartí tusan ti seamjai tura pen̄kesha nakiarmai. Kame nii an̄kant aku nui winishtimpiash.

Áujmamsamu

¹³ Aneara tariatum Yus nekas enentáimtustarum. Áishman̄chakaitrum, kakaram ajastarum. ¹⁴ Anen̄kartamujai mash túratarum.

¹⁵ Ayu, yatsuru. Estepanasa shuari ashí emka Akaya nun̄kanam Yus-shuar ajasarman nékarme. Niisha Yus-shuaran yáintaitsar tuke takainiawai. ¹⁶ Niisha tura ashí nijjai métek yáinkiar takainia nú shuar seatmana nu tuke túratarum. ¹⁷ Estepanassha Jurtunátusha Akaikiusha atumíiya táarmatai shiir waraajai. Átum yajá pujakrum tujintiarmena nuna túrawarmai. ¹⁸ Niisha winia shiir enentáimtikrurarai. Núnisan̄ shiir enentáimtikramprattarme. Nuní aents tuke shiir enentáimtustiniaiti.

¹⁹ Asia nun^ukanmaya Yus-shuar amikmáatmainiawai. Aki-rasha ni nuwe Prisirajaisha ashí Yus-shuar ni jeen Yus-Chichaman irunturarusha Jesusa náariin amikmáatmainiawai.

²⁰ Ashí ii yachisha amikmáatmainiawai. Nuámtaksha shiir awa-jnaisrum amikmáaniatarum.

²¹ Wi Papru asan júchiniak winia uwejrújai áaran amik-maajrume.

²² Ii Uuntri Jesukrístun aneachuka yajauchiniam yuminkramu atí. “Ii Úuntri, wari tatá.”

²³ Ii Uuntri Jesukrístu yainmakarti. ²⁴ Jesukrístunu asakru-min atumin ashí ti aneajrume. Nu atí.

Papru KURINTIUNMAYA SHUARAN Ataksha papin aar akuptukma

Kurintiunmaya Yus-shuaran Papru áatramiania nu

¹ Wi Pápruitjai Jesukrístu akatramu. Yus nuna wakerakui ni akatramurí anaikiamuitjai. Ii yachi Timiutéujai Yus-shuar Kurintiu péprunam íruntrumna nuna áatjarme. Kame ashí Akaya nunkanam Yusna ajasurmena nunasha áatjarme. ² Apa Yussha, ii Uuntrí Jesukristusha shiir enentáimturma ásar imi-atkinchanum tuke shiir pujustinian yáinmakarat tusan waker-ajrume.

Papru wáitsamurí

³ Ii Uuntrí Jesukrístu Aparí, ii Yusrí ana nuna naarí uunt awajsatai. Niisha ii Aparínti. In waitnentrámaji. Tura Niisha ii Yúsrinti. Tuma asa in tuke atsanťamji. ⁴ Ii wáitíajnia nuí Yuska in atsanťamji. Tura in atsanťamjinya nútiksarik iisha chíkich shuar wáitíainia nuna atsanťkrarat tusa túrutmaji. ⁵ Warí, Kristu wáitsamurí núkap pachiíinkiaitjinya núnisrik ni atsanťkramurín núkap pachiíinkiaitji. ⁶ Tuma asamtai, wáitíajnia nu, Yusa uwemtikrampratniurí tura ni atsanťkratniurí atumsha takustarum tusar wáitíaji. Tura Yus in atsanťampramjinya nu, Yusa uwemtikrampratniurí tura ni atsanťkratniurí átum takustarum tusar atsanťkramuitji. Wats, átum uwemtikramu tura atsanťkramu asarum, ii wáitsajnia nútiksarmek wáitíayatrum shiir enentáimsarum katsuntramni-aitrume. ⁷ Tura “túrattawai” tu enentáimtajrume. Warí, átum iijíají métek wáitsaitrume. Núnisan iijíají métek Yus atsanťamturmek.

⁸ Yatsurtiram, iikia Asia nunkanam ti itiurchat wáinkiamjinya nu nekaatarum tusar wakeraji. Imiá itiurchat wáinkiar iikia katsuntratin jeachmaji. ⁹ Nu itiurchatnumiá “íwíiaaku jíinkisťatji” tu enentáimsamji. Túrasha “iikia tujinchaitji” tu enentáimtumatsuk, antsu jakamunmayan inianníua nú Yúsan enentáimtusarat tusa nu túrunamji. ¹⁰⁻¹¹ Jakamnia itiurchatnumiá Yuska uwemtikrampramji. Tura yamaisha uwemtikrampratajtsa pujurtamji. Tura atumsha in Yus áujtakrumníkia “Yuska tuke uwemtikramprattaji” taji. Tura untsurí shuar Yus aujsa asakrumin, ii uwempra asakrin untsurí shuar Yúsan yumínsartatui.

Kurintiunam wau wéchatniun Papru ujakmiania nu

12 Yatsurtiram, ju nekaatarum tusar wakeraji. Ju nunkanam pujusar tura nekaska atumjai pujusar anantsuk tura Yus umirkar wekaimji. Aya ii nekatairijiai wekaichamji. Antsu Yus in waitnentra ma asa penker wekasatniun yainmakmaji. Nu nekaar shiir enentaíimji. 13 Áatjarmena nu páantaiti. Átum áusarum nekaatin jearmena nunak aarjai. Chikichan nekaachminian aatsjai. Penker nekaatarum tusan wakerajrume. 14 Ishichik nékayatrume k nú nukap tuke nekaki wetarum tusan wakerajrume. Nuinkia Jesukrístu tátinia nú tsawantai átum winia shiir enentaímtursattarme. Tura átum penker wekasa asakrumin shiir enentaímtustatjarme. 15 Tura ii shiir enentaímtuniaj nuna nékakun ataksha Yusa waitnenkartutairi nekapsak tusan ataksha atumiin irastinian wakerimjai. 16 Masetúnia nunkanmaani wéakun íirkuta nanikaikitjiarum tusan enentaímmiajai. Tura wáketkuncha ataksha íistajrum tusan wakerimjai. Túramtai wi Jutía nunkanam weakui átum yáintkiatarum tusan atumin íistinian wakerimjai. 17 Nuinkia zurukamtai túrachmaj? ¿Penker enentaímtsukek “wetajai” tímiaj? ¿Wi Yus-shuarcha nunisan, jimiara chichamtiniaiti, tú enentaímtursarumek? 18 Núchaiti. Yus tana nuna tímiatrusan umíana nútiksarik iikia ii chichame umiktai tusar wakeraji. Jú chichamaik, “Ee, atsá” tátsuji. 19 Wisha Serpanujai Timiutéujai Yusa Uchiri Jesukristunun ujakmajrume. Niisha jú chichamaik, “Ee, atsá” tíchaiti. Antsu nii tana nuna tuke umíawai. 20 Niijiaisha Yus tana nu tímiatrusan uminiui. Tuma asamtai Jesukrístu enentaímtakur “nii tana nuna nekas túrattawai” tu enentaíimji. Tu enentaímsar Yusa naari shiir awajeaji. 21 Atumniasha incha ikiakátmajnia nu Yúsaiti. Krístunu ajasu asakrin túrutmaji. Tura anaitiamak Niiniu awajtamji. 22 Tura ukunam ii achiktatjinia nuna, nekas amastatjai tusa Yus ni Wakanin ii enentaín apujturmaji. Nujai Níiniuitji tusar paant nékaji.

23 Atumiin itiurchatan wáinkiajj tusan nakitiakun atumi péprurin Kurintiunam jeachmajai. Wáitrakuinkia “Yus iirsati” tajai. 24 “Aya wi tájana nútiksarmek Yus enentaímtustarum” waantu enentaímtumasar nu titin nakitiaji. Yus nekas enentaímtusmaajai kakaarme. Antsu nekas warastarum tusar wakeraji.

2

1 Tuma asamtai, atak kúntuts awajsajjrum tusan nakitiakun, “atumí tunaari íwiartsurminin jeashtatjai” tímiajai. 2 Wi atumin kúntuts awajkuncha, ¿yaki winia waramtikrusat? Aya atumek, wi nuik kúntuts awajsamjarmena nuke

waramtikrusminiaitume. ³ Wi jeakun atumí tunaari íwiartsurminiñ kúntuts enentáimsajj tusan nakitiakun, nu papin áarmaj nútiksanak áarmajai. Warí, atumketruma winia waramtikrustin. ⁴ Nekaatarum. Nu papin áarmiajai. Kúntuts awajsatjarum tusan áarchamjai; antsu ti aneajrumna nu nekaatarum tusan wakerakun áatramajrume.

Yajauchin túrana nu tsankuratin

⁵ Túrasha kúntuts awajtusmia nu, aya wíniak kúntuts awajtus-chamai. Antsu atumniasha ishichik kúntuts awajtam-sayi. Patasa chichasajj tusan “ishichik” tajai. ⁶ Kame nu áishmañkan iruntra chicharkarum wáitkiasmarum nuke máakete. ⁷ Antsu yamaikia tsankuratniuitume. Shiir enentáimtikratniuitume. Niisha imiá kúntuts pujus nú arant ajasáin tuserum túratniuitume. ⁸ Túrakrum nii nekas anear-mena nu paant iniaktustarum tusan seajrume. ⁹ Kame “aa-jna nuna umirtukartimpiash” tímiajai. Kame nuna nekaataj tusan wakerakun nu papin nuik áatramjarme. ¹⁰ Átum tsankurearmena nú shuaran wisha núnisnak tsankureajai. Tura tsankuratin ákuñkia, wi tsankurajna nu ashí atum-nian enentáimtusan, Kristu ímmianum túrajai. ¹¹ Kame uunt iwianch Satanás in emestampratajtsa wakerana nusha nékaji. Tuma asamtaí, túrawain tuser tsankuratniuitji.

Trúas péprunam Papru juákchamiania nu

¹² Krístunu shiir chichaman Trúas péprunam etserkatajtsan jean, ti péñker takastinian wáinkiamjai. ¹³ Túrasha ii yachi Titium wáinkiachu asan, shiir enentáimsatniun tujinkiamjai. Tura asamtaí Trúasnumiá aentsun áujsan ikiukiaran Masetúnia nunkanam wémiajai.

Krístujai nupetkamniaitji

¹⁴ Kristu Jesusjai Yuska incha nupetmamtikramak ewekat-masuitji. Tuma asamtaí Nincha ti shiir yúminsa pujajai. Tura kukují kun_kúakui, ashí nékainia núnisan ii etserkamujai Kristu shiir chichamen Yuska ashí aentsun nekamtikiaini-awai. ¹⁵ Kristu in pujurtamu asamtaí Yusjai nekapsamka iikia kun_kúaji. Ii kun_kúajnia nuna uwemtikramu ainia nusha tura uwemtikrachma ainia nusha nekapramnia ainiawai. ¹⁶ Menkakatniunam weena nuka ii kun_kúajnia nuna jakam-nia mejea nekapramji. Tura iwiaaku átinnum weena nuka iwiaaku átin kun_kúa nekapramji. Maa, nu túratniuncha ¿yaki jeá?

¹⁷ Kame untsurí aents kuítian achiktaj tuser Yusa chichamen yapajinia núniskechuitji. Antsu Krístunu ajasu asar, Yus akupkamu asar, Yus ímmianum anantsuk esetsar étsereaji.

3

Yamaram chícham najanamu

¹ ¿Nu tákurninkia, “ataksha nin̄ki waantu enentáimtumainiawai,” tu enentáimsarmek? ¿Chíkich túruinia núnisrik, “Ju áishman̄ nekas Yus-Chichaman etserin áiniawai” tusa papí aarma atumin iniaktustinkiaitiai? ¿Chíkich iniaktustin nú papí atumin seatniukaitiaij? ² Atsá. Átumka ii papirja núniskechukaitrum. Ii enentáin nu papí áarmaiti. Tura nú papí áujsatniua núnisan̄ ashí aents atumí túramuri wáinkiar ii etserkamaj nu, Papru nekas Yusa takatr̄in takaawai tusa nekaamnia áiniawai. ³ Iis, tátsujak. Papí aarma núnisketrume. Nu papí Kristu áarmaiti tura iisha nú papí atumin súaji. Tíntiajaínchu antsu iwiaaku Yusa Wakaníjjiaí áarmaiti. Kayanmasha áarchamuiti; antsu shuara enentáin, auka, áarmaiti.

⁴ Kame Krístunu asar, Yus enentáimta asar, nusha tíminiaitji, taji. ⁵ Ju nékaji; imia iik penké tujinkiaitji. Antsu ii túrajnia nu Yus ni kakarmar̄in súramkurin túrajni.

⁶ Yamaram chichaman Yus najanamia nuna, incha péñker etserkatniun suramsaitji. Yaunchu aarma chichamnum, ashí takamtsuk umirkachrikia tuke jakamniuyaji. Antsu yamaram chichamnum, Yusa ni Wakaníjjiaí yamaram wekasatniun súramji. Yusa kakarmar̄ijiaí nu chicham étserji. ⁷ Yaunchu chichamnaka kayanam aar Yus Muisaisan susamiayi. Susamia nu, Muisaisa yapi ti wincha ajasmiai. Túrunamtai Israer-shuar ni yapin íistinian tujinkiar̄miayi. (Túrasha nu wincha mushatmaki wémiayi.) Túrasha nu chichaman shuar umirkatniun tujintiakuí, nu chichamsha aya tuke jákatniunam shuáran ejemiayi. Túmayatan̄ winchajai susamuyayi. ⁸ Tura yamaram chichaman Yusa Wakaní súramna nu, nujai nan̄kaamas shíiraiti. ⁹ Kame mesertinnium ejeana nú chícham winchajai susamuyayi. Tura nujai nan̄kaamas Yúsnum ejeana nú chichamka Yus íimmianum péñkeraiti. ¹⁰ Iista; yamaram ana nu imiá shiir asa, yaunchu wincha amia núnaka mushatmam̄tikiui. ¹¹ Núkap arur pujuschamnia nu wincha áchamkia. Kame tuke átinia nuke nujai nan̄kaamas shíiraiti.

¹² Nu nékakur ti paant étserji. ¹³ Muisais túramia nútiksarik túratsji. Ii uuntri Israer-shuar ni yapin wincha ajas men̄kaan wáinkiar̄in tusa tarachjai ni yapin Muisaiska nukumak̄miayi. ¹⁴ Tura nu arantcha Muisaisan anturkarmia nuna enentáisha nukukmauyayi. Nekaatniun tujinkiar̄miayi. Tura yamaisha núnisan̄ yaunchu aarma chichaman áujsam antukar nekaatniun tujintiainiawai. Kristu enentáimtuschatin ni

enentáin nukukma nu yapajiáchmaiti. Aya Krístujai nuka yapajiámniaiti. ¹⁵ Yamaisha Muisaisa áarmarín áujsar nékainiatsui, ni enentáimmiari nukurkamu asa. ¹⁶ Tura aencha ni enentái yapajiá Uuntna ajasmataikia ni enentáimmiariya nukurkamu ana nu jusamuiti. ¹⁷ “Uunt” tájinia nu, Yusa Wakaníiti. Uunt Yusa Wakaní pujana nuí ankant ajastiniaiti. ¹⁸ Nuke asamtai, iisha ii yapí tarachjai nukukchamu asar íspikia núnisketji. Uunt Kristu péñkeri iniakmaji. Kristu péñkeri nú núkap takaki wéakur, Krístujai métek ajastasa pujaji. Yusa Wakaníkia nuna túrawai.

4

¹ Yus in waitnentrana asa ni chichamen etserkatniun atak-tamsaitji. Tuma asamtai yawetsuk takaaji. ² Uuka túratin ana nuyá tura natsanmai ana nuyasha kanakmiaji. Anan katai tusar wekaatsuji. Tura Yus-Chichamjai nakuratsji. Étserkur aya Yus-Chicham tana núchik étserji. Ashí aents nuna antukar, “nekas núiti Yus-Chicham” tiarat tusar túraji. Wi tájana nuna Yus nékawai. ³ Uwempratin Chicham ii étserjinia nu páantaiti. Áyatik menkakatniunam weena nu “páantchaiti” tuíniawai. ⁴ Uunt iwianch, ju nunká uuntri ana nu, nu aentsu enentáin ukusturuuti. Uunt Krístunu shiir chichaman ii étsermajai tsáapnin enentáimpraraín tusa ukustawai. Nu Kristu Yúsan ímiatrusan nakumui. ⁵ Iisha étserkur, Jesukristu ii Úuntriñti tu étseraeji. Iikia atumí úuntriñtji tátsuji. Antsu, Jesus ii uuntri asamtai, atumí yáintriñtji, taji. ⁶ Yaunchu kiritin aan Yus tsáapin ati tusa tsáapnin awajsachmakia. Nú Yúsaiti ii enentáin tsaapnin awajtamsamia nu. Nu tsaapnijai ni shiirmarín, Jesukristu iniakmia nuna, ashí aents nekaawarat tusar Jesukristunun étseraeji.

Yusak enentáimtusar wekasatin

⁷ Nu tsáapin imiá péñker ana nuna ii ayashíin Yus ikiusuiti. Tura ii ayashí kakarmachu, nuwe najanamua áanin asamtai, warí, kakaram ájinia nu Yúsnumiächukait. Ii ai nuna nekaawarat tusa Yuska ni tsáapnintrin ii ayashíin ikiusuiti. ⁸ Tuma asamtai ii itiurchatri árentmaku árinin tuke jiinkimniaitji. “Itiurkatjik” taji, túrasha Yus yáinmaji. ⁹ Aents pataatur-mainiakrincha Yus ikiurmatsji. Emesrataj tukamá tujintiainiawai. ¹⁰ Kame Krístun máataj tusa tuke wakeriarmia núnisan incha tuke mantamataj turamainiaji. Túrasha jákachu asar Kristu kakarmari ii ayashíin iniakmaji. ¹¹ Iisha Jesusna ajasu asar wekaajnia nuí tuke tsawant tsúumainium jasattuk ajaji. Túrar ii ayashí jakamniaitiat nu ayashnium Jesusa iwiaakmari paant iniakmaji. ¹² Iisha Yus-Chicham étserkur

ii ayashiin jasattuk ajaji, tuma aīn atumsha umikiu asarum nekas iwiaaku atin wáinkiarne.

¹³ Yus-Papinium yaunchu áarmanum: “Yúsan enentáimtusmajai, tuma asan etserkamjai” tátsuk. Iisha núnisrik Yus enentáimtusar wekaaji. Tuma asar étserji. ¹⁴ Yus kakarmaiti. Uunt Jesusan jakamunmayan iniantkimiayi. Incha núnisan Jesusjai iniantamkittiaji. Tura atumjai métek ni pujamunam juramkittiaji. Nusha paant nékaji. ¹⁵ Atumsha untsurí aencha Yus-Chicham antukakrumin, Yus yáinmakurme. Tuma asantai atumsha nútiksarmek Yus yuminsarum pujarme. Nujai Yusa naari uunt awajsamuiti. Nu nekaar wáitsatin ashamatsji. ¹⁶ Tura yaweatsji. Ii ayashi amuiki wéakuisha ii enentáinkia yamaram ajaki wéawai. ¹⁷ Warí, ukunam tuke shiir pujustatjinia nu enentáimtakrikia, ju nunkanam wáitiajnia nu, ti itiurchataitiat, aya yamaiya asa tiikia itiurchatchaiti, tura wárik nankaamawai. Túrasha ii itiurchatrijjai Yuska ti shiir ana nuna amuukachmin ana nuna núkap suramsattaji. ¹⁸ Tuma asantai wáinjinia nu ti enentáimtatsji. Antsu wáintsujnia nu nekas enentáimtaji. Wáinjinia nusha aya yamaiyaiti. Antsu wáintsujnia nuka tuke amuukachminiaiti.

5

¹ Wats ju nékaji. Nayaimpiniam ii shiir pujustinian amuukachmin ayashin Yus najanamun ikiurtamsaitji. Aents najanachmaiti nu. Tuma asantai ii ayashi emesnakuisha warí itiurtamajia. Nuka aaka núnisan amuukamniaiti. ² Ju ayashnium pujusar wáitiaji, taji. Yamaram ayash nayaimpiniam pujana nu achiktai tusar wakeraji. ³ Ayashtichu ajasaij tusar, yamaram ayashin ajastaitsar wakeraji. Pushía núnik yamaram ayash in nukurmaktai tusar wakeraji. ⁴ Tura juu ayashjai pujusar wáitsar pujakur shiir enentáimtsuji. Arut pushí áiktinia núnisrik ju ayash ikiuktiaitsar tátsuji. Antsu yamaram pushí entsartinia núnisrik yamaram ayashnium tuke pujusmí tusar taji. Iista, ju ayash amuukachminkiait. Yamaram ayashnium pujusar tuke iwiaaku pujustaji. ⁵ Yamaram ayashintin ajastinian iwiarturmaruitjinia nu Yúsaiti. Tura nekas túrattajai tusa ni Wakanin suramsaitji.

⁶⁻⁷ Ju nékaji. Ju ayashnium pujajnia juinkia Uunt Jesusjai pujatsji. Tuma asantai, wáinjinia nu ti enentáimtutsuk Yus enentáimtusar tuke shiir enentáimsar wekaaji. ⁸ Tura ju ayashniumia jíinkir Uunt Jesusjai tuke pujustaitsar wakeraji. Tura túrattaji tu nékaji. ⁹ Tuma asantai ju ayashnium pujakrishat tura ju ayash ikiukrishat Uunt Jesus tuke waramtiksatat taji. ¹⁰ Warí, ju ayashjai ii túramajnia nu ujakam, “pénkeraiti”,

“yajauchiiti” Kristu turutit tusar, ashí iisha Uunt Kristuj̄ jeatniuitji. Tura ii túramuj̄ai métek akirmaktatji.

Krístun waramtiksat̄aj taji

¹¹ Tuma asamtai j̄u nékaji: Uunt umirkashtin ti tsúumainti. Nu nekaar ashí shuar Yus-shuaran awajsataj tusar ti takaaaji. Tura incha Yus nékarmaji. Tura ii túramuj̄ átumka atumí enentáin paant nékarme, taji. ¹² Ataksha, “wi pénkerait̄jai” tusar nu tát̄suji. Antsu, ii túramu nekáa asakrumin enentáiniam ana nuna enentáimtsuk aya pátatkea nuj̄ai warainia nú shuar tsanumprutmainiakui yaintkiatarum tusar taji. ¹³ “Wáurkaiti” turamainiajiash. Nusha warí, itiurtamajia. Ashí túrajnia nu, Yus aneakur tura atumin yáint̄ai tusar túraji. ¹⁴ Kame ashí ii túrajnia nu Kristu anenkrattair̄ij̄ai túraji. Kame j̄u nékaji: Kristu ashí shuaran jaruku asamtai, Yus íimmianum ashí iisha jaka núnisait̄ji. ¹⁵ Kristu ashí shuaran jaruk nantarkimiayi. Tuma asamtai Krístunam iisha iwiaaku pujajnia j̄ui, iik wararmamtsuk, Kristu umirkatniuitji. ¹⁶ Tura yamaisha aya ni ayashí íirsar, “nu shuar pénkeraiti” tura “nu shuar yajauchiiti,” titin tujint̄iaji. Kame yaunchu aya ni ayashí íirsar “Kristu yajauchiiti” tu enentáimsam̄iaji. Tura yamaikia yapaj̄iár, esetsar enentáimkiur “Kristu Yusa Uchir̄inti” taji.

Krístuj̄ai yamarmait̄ji

¹⁷ Tuma asamtai, Krístunu ajasúka yamaram najanamuiti. Yaunchu enentáimtair̄i men̄kakayi. Antsu núnaka íikias ni enentáimtair̄i nekas yamarmaiti yamaikia. ¹⁸ Nunasha Yus túrait̄i. In nawampramkatts̄a Krístun akupturmakuit̄ji. Tura nu etserkatniun incha ataktamsait̄ji. ¹⁹ Yuska in tunaar̄inniutin asutiámatniun nakítiak Krístuj̄ai nawampramkam̄iaji. Tura incha Yus-shuartin nu ujaktinian ataktamsait̄ji. ²⁰ Krístunu ataksamu asar, Yuska “winia Uchir̄j̄ai nawamnaikiatarum” tusa ii wenej̄ai atumin seatmarme. Tuma asakrin, Kristu náar̄īn “túratarum” tájarme. ²¹ Krístuka tunaan pen̄ké túrachmiayi. Túmanak ii tunaar̄īn Yus Krístun makuumiayi. Nuna tura Krístunam makuuchmin awajtamsam̄iaji.

6

¹⁻² Ni Papir̄īn Yus yaunchu Isayasan j̄una tímiayi:

Tsawant jeamtai, ame seatmena nuna anturkamjame.

Uwempratin tsawant jeamtaisha yain̄majme.

Wats yamaikia Yus seatin jeayi. Yamái Yúsnum uwempratin jeayi. Tuma asamtai, iikia Yusa takatr̄in pachitkiajn̄ia nu, Yusa anenkrattair̄i pen̄ker achiktarum tusar seajrume. ³ Tura

“Papru etserkamuri ántraithi” tíarain tusar chíkich yajauch enentáimtiktsuk péñker wekaaaji. ⁴ Nekas Yusa takarniurintji nuna paant nekaawarat tusar wáitiayatrik, atsumayatrik, itiurchatnum pujayatrik shiir katsunteaji. ⁵ Ju itiurchat wáinkiamji: katsumpramkarmaji; sepunam enketmáwarmiaji; charáa-charáa awajtamiarmiaji; takatcha ti itiurchat takasmiaji; kanutsuk pujumiaji; tura tsukasha ti tsukammiaji. ⁶ Tunáa nakitrar wekaaaji; Yus-Chicham unuimiátraitji; shiir enentáijjai katsuntrar wekaaaji. Chíkich shuar péñker awajeaji; Yusa Wakaní pujurtamkurin shuar nekas aneaji; ⁷ nekas chicham ana nu étsereaji; tura Yusa kakarmarisha nú paant iniakmaji. Tura ni nemasrin nupettukain tusa suntar ni tantarin júana núnisrik iisha ii nemasri íwianch nupettamkajj tusar ii Yusrí tuke umirkar wekaaaji. ⁸ Shuar shiir enentáimturmainiakrincha, yajauch enentáimturmainiakrincha, péñker chichartamainiakrincha, yajauch chichartamainiakrincha tuke Yusjai shiir wekaaaji. “Wáitruiniawai” turamainiakrincha tuke nekas chichaaaji. ⁹ “Nu aents nékatsji” turamainiakrincha Yusnumka nékanji; jákatin tsúumainnium wekayatrik tuke iwiaaku pujaji; asutiámuitiatrik mantamnat-sji. Yusa takarniurintiaj nu ashí nujai paant nekaamnaiiti. ¹⁰ Kúntuts pujayatrik ii enentáinkia waraaji; kuítrinchaitiatrik chíkich shuar kuítrintin awajeaji; penké takakchiatrik ashí wáinji.

¹¹ Yatsurtiram, Kurintiunam pujarmena nu, ashí paant ujakchamkajrum. Ti aneajrumna nu nékarme. ¹² Wikia atumin paant chichastajtsan wakerajrume; antsu átumka anenttsuk paant chichastin nakitrarme. ¹³ Winia uchirua núnisnak chichaajrume; wi tuke paant chichaarjarmena núnisrumek atumsha atumí enentáin ana nu, paant ujatkataram tusan seajrume.

Yusa jeentji

¹⁴ Yus-shuar Yus-shuarchajai tsanin̄ktinian enentáimsashtiniaiti. Warí, ¿Yusan umirna nú shuar, iwianchin umirna nú shuarjai métek enentáimiainiawak? ¿Tsáapnisha kiritjai máimtek áminkiait? ¹⁵ ¿Kístuka uunt iwianchjai nawamnaikiamniakait? ¿Yus-shuar Yus-shuarchajai tsanin shiir pujusminkiait? ¹⁶ ¿Iwiaaku Yusa jeencha ántar-yus pujustinkiait? Tura atumsha iwiaaku Yusa jeentrume. Yus Nin̄ki ni Papirijn juna tíchamka:

Niijjai tsanin̄kia pujusan, niijjai wekasartatajai tura ni Yusrí átatjai; tura niisha Wíi aents ajasartatui.

¹⁷ Tuma asamtai junasha tímiayi:

Nii matsatainia nuyá jíinkitiarum, tura níiŷa kanaktiarum, tawai Uunt Yus; tura yajauch ana nu antínkaiirap. Túrakrumninkia awayattajrume.

¹⁸ Tura atumí Aparí átatjai; átumka winia uchir áatrume. Nuna Wi imiá kakaram uunt Yus asan tajai. Tu áarmaiti.

7

¹ Tuma asamtai aneamur yatsurtiram, nusha, Yus tímia nu, in túramji. Nu tuma asamtai ii ayashí tura ii enentáisha ya-jauch ajasáin tusar, ashí tunáa ana nuyá kanaktiniaitji. Túrar “Yusak nekas ii úuntrinti” takur, ii ayashísha, ii enentáisha takamtsuk tuke tsawant Yus íktustiniaitji.

Kurintiunmayá shuar enentáimprarmatai Papru warasmiai

² Ataksha nawamnaikiatai. Iikia shuar yajauch awajsach-maji; yajauch jintintrachmaji; anan̄kachmaji. ³ Makuutai tusan nuna tátsujai. Antsu nuik tíchamkajrum, iwiaaku pujakrishá jakarsha átumka ii enentáin áchitkiarme. ⁴ Araantutsuk áatjarne; shiir enentáimjai. Itiurchatnum pujayatnak, atumin enentáimtusan enentairuí kakaram enentáimsan waraajai.

⁵ Jui Masetúnianum penké ayamprachmaji. Antsu ti wáitsamji. Áentsnumiá itiurchat wáinkiamji, tura ii enentáijiaínkia ashamkamji. ⁶ Tura kúntuts pujakrincha Yus ikiakátmartinian nékawai. Tuma asamtai Titiún akupturkamai. Nujai winia enentáirun ikiakármai. ⁷ Tura átum nii ikiakármarmna nuna Titiu ujatkamai. Nuna antukan ti warasmajai. Títiuka átum írsatin wakerarmena nuna ujatkamai; túrunamia nuna kúntuts enentáimmiarumna nusha, tura winia anentu asarum enentáimturumna nuna ujatkamai. Nuna antukan nú nan̄kaamas warasmajai.

⁸ Papí nuik akupkamaj nu áujsarum kúntuts enentáimprarme; núnaka nékajai. Túrasha ii akupmainchu túraitjai tátsujai. Eta, nuikkia tímiajai, túrasha yamaikia tátsujai. Papí áujsarum ishichik kúntuts enentáimprarmna nuna nekaan waraajai. ⁹ Kame kúntuts enentáimprakrumin waraatsjai. Antsu atumí tunaari nekaarum kúntuts enentáimprarm atumí enentái Yusjai yapajjá asakrumin nuna nekaan waraajai. Kame Yus wakerana nútiksarmek kúntutsrum katsuntearme; tuma asamtai iikia nu papijiai yajauch awajsachji. ¹⁰ Nekaatarum. Yus wakerana nútiksán kúntuts katsunteakka ni enentái Yúsnum yapajjáwai. Nuínkia ni tunaariya uwempraiti. Nuka “túrurmainchu túraitjai” tíchamniaiti. Antsu Yusan enentáimtutsuk kúntuts pujakka ni enentái yapajjáshatui; yapajítsuk ni tunaariya uwemtsuk jakattawai. ¹¹ Tura iistarum; Yus wakerana nútiksarmek atumí kúntutsri katsuntearme. Tuma asarum wi áatjarmena

nu esettsarum enentáimtusurme. Atumí túramurj ujatkatajtsa wakerimiarme. Tura nu tunáa nakitramarme; tura ashankamarme. Tura yajauchin túramia nu asutiámarme. Tura winia anentu asarum wi timia tímiatrusrumek turatai tusarum ti wakerimiarme. Nu tura asakrumin péñker túarmena nu, paant iniakmarme. ¹² Kame yajauchin túramia nuna ni tunaarj iniaisat tusan wakerakun, tura wáitias pujumia nu atak shiir enentáimsati tusan wakerakun nu papin áatramjarme. Tura nú nankaamas átum Yúsnum in anearmena nu nekamatarum tusan áatramjarme. ¹³ Atum umikiu asarum waraakrumin iisha shiir enentáimji. Tura shiir itiaamarumna nuna Titiu waraak ujatkamtai nú nankaamas shiir waraaji. ¹⁴ Atumin shiir enentáimtajrumna nuna Titium ujakmajai. Tura nuna nekas aan Titiu nekaamai. Tuma asantai atumin natsantrachmajrume. Kame atumin tuke nekas ana nuna tímiajrume. Núnisan atumnian Titium tímiaj nusha nekasauyi. ¹⁵ Tura Títiuka atumin enentáimturmas ti waraawai. “Jiatmaktajtsa winiatsuash” tusarum ti ashankachurmek. Túmayatrum, nii péñker tati tusarum pachischarme. Tura nii taa seatmarmu nu umikiurme. Títiuka nuna enentáimias waraawai. ¹⁶ Tura wikia, átum péñker túramurmin nekaan tura péñker túrawartatui tu enentáimsan waraajai.

8

Yus-shuarti ii kuitri súsatin

¹ Yatsurtiram, Masetúnia núñkanmaya Yus-shuaran Yus waitnentainia nuna yamá ujaktatjarme. ² Ti itiuurchatnum nekapsamu ainiawai. Túmayatan warainiawai. Tura ti kuítrinchá áiniayatan emeentutsuk kuítrinniua núnisan suiniawai. ³ Juna wi paant nekaan ujaajrume. Niisha wakeramujai súsatniun jeainia nuna súiniawai; tura nú nankaamassha súiniawai. ⁴ Yus-shuaran kuítrinchan súsartaitsa ti wakeruiniak, nu túratniun ti seatmarmaji. ⁵ Tura ii enentáimmiyaj nú nankaamas túrawarmiayi. Emka Yúsnum niñki sumamawarmiayi. Tura Yusa wakeramurj túrattaji tusar incha “yáintajrume” turammiaji. ⁶ Tuma asantai, “Masetúnia nunkanam kuit júuktin nankamamamna nu, Kurintiu peprunmasha amukta” tusar Titiu seamiaji. ⁷ Atumsha ashí péñker túratin ti nékarme. Yus enentáimtustincha, unuiniartincha, ju nunkanmaya nekaatniusha, in aneatniusha nuka ashí nékarme. Wats, jusha túratarum. Yus-shuar kuítrinchá ainia nu achikiarat tusarum Titium támatái núkap susatarum.

⁸ Kame atumí úuntria núnisnak akupeatsjarme, túratniuitrume tusan. Antsu chíkich shuar ni kuítrin susartasa

ti wakeruinia nuna atumin ujakan, atumí anenkrattairi nekaspathi tusan nekapsatajtsa pujajai. ⁹ Ii uuntri Jesukristu waitnenkartutairi nékarme. Ashí takakuyayi, tura atumin anenma asa kuítríncha núnisan ajasmiayi. Ju nunkanam kuítríncha núnis ajasmatai átum nayaimpiniam kuítriniak tusa túramiayi.

¹⁰ Juna enentáimjai. Nuik uwitin, “yáintatji” tíchamkarum. Tura nu túratin ti wakerimiarme. ¹¹ Nan kamamarmena nu yamaikia amuktarum. Nuik ti wakerimiarmena núnisrumek yamaisha súsatin jearmena nu susatarum. ¹² Iistarum. Ni kuítrin Yúsán nekas susatajtsa wakerakuinkia, nii jeana nuna susat tusa Yus wakerawai. “Jeana nú nan kaamas susati” tátsui Yus.

¹³ Chíkich ti núkap susarum atumnia táasat tusan tátsujai. ¹⁴ Antsu ashí métek takusarat tusan tajai. Iis atumsha yamaikia ti nukap takakrume; nujai atsuma nu súsatniuitume. Ukunam chíkich tsawantai átum atumashtarmesh. Nuinkia niisha atumin suramsarti. Nu túratin ákuinkia ashí métek takustin átatui. ¹⁵ Yusa Papiriin yaunchu áarman núnis tátsuk: Núkap takusmia nu ampírchamiayi; tura ishichik takusmia nu atumachmiayi.

Titu chíkich Yus-shuarjai Kurintiunam wetin ármiai

¹⁶ Tura wi aneajrumna núnisan atumin aneatniun Yus Tituun susamiayi. Tuma asamtai Yúsán yuminsan pujajai. ¹⁷ Iis, wi takui wétinian wakerimiayi. Tura nú nan kaamas, atumin anenma asa, ni enentáijiai wéawai.

¹⁸ Tura chíkich Yus-shuar Tituujai akupkatajtsa pujaji. Nu shuar Yusa Chichamen ti penker etserainakui, ashí Yus-shuar iruntramunam nin pénger áujmatainiawai. ¹⁹ Tura nú shuar naka ii tsaniakmari atí tusar ashí Yus-shuar iruntramunam nuna anaikiarmiayi. Iijai kuítian jukiarti tusar anaikiarmiayi. Iis Yusa náarin ashí aents uunt najanawarat tusar tura ashí shuar atumí tsankarin nekaawarat tusar nu takat túratsjik. ²⁰ Iis, ju kuit ii jukittiajnian nu, núkap asamtai, aents tsanumprutmawarajj tusar, Tituujai tura ju shuarjaisha wéaji. ²¹ Yus ímmianumsha, aents ímmianumsha ii naka wekaajnia nuna nekaawarat tusar túraji.

²² Nu jimiara shuarjai chíkich Yus-shuar akupeaji. Yusa takatrin takastasa ti wakerana nu nekas nékaji. Tura átum yáintin ti wakerarmena nuna nekáa niisha atumiin jeataj tusa ti wakerawai. Nuna túmak Yusa takatrin takastinian wakerana nuna paant iniakmawai. ²³ Tura aisha chíkich shuar Tituun nekaataitsar anintruiniakuisha, “Titu Papru tsaniakmarinti. Incha yáinmaktajtsa Páprujai takaawai”

titiarum. Chíkich Yus-shuaran nekaataitsar anintruini-akuisha, “Yus-shuar akupkamu áiniawai, tura Kristu náarin shiir awajin áiniawai” titiarum. ²⁴ Tura atumí anenkrattairi ashí Yus-shuar nekaawarat tusarum, nu shuar péñker iti-aatarum. Nu túrakrum, atumnia ii shiir tímiaj nu nekasaiti tu iniaktustatrume.

9

Yus-shuaran kuítrinchā súsarmia nu

¹⁻² Kame átum Yus-shuar kuítrinchā súsatin wakerarme; nuna nékajai. Tuma asan núnaka áatrachminiaitjarme. Atumsha súsatin wakera asakrumin wi nunasha shiir enentáimsan, “Akaya nunkanmayā shuar nuik uwitinia wakerusmatak yáintinian wakeruiniawai” tusan Masetúnianmayā shuáran ujaajai. ³ Tura “kuítniasha súsatniun ti wakeruiniawai” tímiaj nuna, “wáitiaiti” tíarain tusan nakitiajai. Tuma asan, kuit susatajtsa wakerarum nu iwiaratarum tusan nu menaintiu Yus-shuaran nuna yáinmakarat tusan emka akupenajai. ⁴ Wi ukunam Masetúnianmayā shuarjai atumiin jean, kuit súsatin tímiarmena nuna iwiarachman wáinkian natsaraj tusan, tura atumsha natsarairum tusan túrajai. Warí, “súsatniun ti wakeruiniawai” tuke tu wéatsjak. ⁵ Nu tuma asamtai, au takui súarme tu enentáimsarain tusan ju Yus-shuaran emka akupenajai. Niisha nu kuítian iwiaratniun yáinmakarti, tajai. Nuñkia wisha Masetúnianmayā shuarjai ukunam jeawakrin, nu kuit atumsha nekas atumí enentáijjainkí súsatin wakerarmena nu nekaamnia átatui.

⁶ Tura junasha paant tájarme: ishichik araana nu ishichik júuktatui. Núkap araana nusha núkap júuktatui. Kuit súsatniusha núniskete. ⁷ Tura ashí shuar ni enentáin enentáimsana nunak susati. “Nakitiayatnak susatjai” tíchamniaiti. “Turutainiakui susatjai” tíchamniaiti. Shiir enentáimias súana nuna Yuska shiir enentáimtawai. ⁸ Ashí péñker ana nuna suramsatniun Yus tujintiatsui. Nujai átum atumashtatrume. Tura chikichan yáintin núkap takustatrume. ⁹ Yus-Papinium ju aarma awai: Kuítrinchā núkap susayi; nuna tura, tuke túratin átatui.

¹⁰ Arakmaun araakan súana nusha Yúsaiti. Tura yurumkan súana nusha Yúsaiti. Niisha átum péñker araatniun suramsattarme. Tura araarumna nujai péñker túratarum tusa araakrumin ipiampartatui. ¹¹ Tuma asamtai núkap juukma takaku asarum, núkap súsatin jeattarme. Nuñkia súarmena nuna ii uwejeñan chíkich Yus-shuar achikiar Yúsan yumiñsartatui. ¹² Warí, ju kuit Yus-shuar kuítrinchā súakrin ni atsumamurinchā atsumachartatui. Tura nú nankaamas Yúsan ti yumiñsartatui. ¹³ Nu shuar yáintai tusarum tura

ashí Yus-shuar yaintai tusarum súatsrumek. Nujai Kristu shiir chichamen umiarmena nuna nékainiawai. Tura kuítrum emeentutsuk sua asakrumin niisha Yusa náarin uunt awajsartatui. ¹⁴ Kame Yus atumin ti waitnentramainiakui kuítrum súatsrumek. Sua asakrumin nu shuar atumin ti anen-mainiak Yúsan áujturmasartatui. ¹⁵ ¡Tura ashí iisha ii Yusrí ti yumínsatniuitji! ¿In súramjinia nuna yaki jintíartinian jeá?

10

Papru nekas jintintiamniaiti

¹ Wats, “Papru iijjai pujak péejchach ajawai, tura yajá pujak kakaram chichaawai” chíkich shuar turutainiatsuk. Kame imia wiki Papru Kristu anenkartutairijjai juna seatjarum tusan pujajai. ² Atumí weatkamuriya shuar chichainiak “Papru ni tsaniakmarijjai ju nunkanam akupin ajastai tusar wakeruiniak jintintiainiawai” turutainia nuna kíishtumaktajtsan enentáimjai. Wisha atumjin jean kakaram chichaschataj tusan, nu antukairap tu seajrume. ³ Áentstańka nunkanmaya áentsuitji, túrasha jú áents maania aintsar máaniatsji. ⁴ Ju nunkanmaya nanķijjai máaniatsji antsu ii nanķiri Yusa kakarmarinti. Nujai iwianchi kakarmari núpeteaji. ⁵ Ju nunkanmaya aentsu jintíamurińkia tura waantu enentáimtumamurińkia, Yus nekaatniun itit awajea nuka, nu nanķijjai núpeteaji. Tura ashí ju nunkanmaya enentáimsatin yapajniak, emetamu áintsan, Kristun umirkarat tusar nu nanķijjai núpeteaji. ⁶ Nekas umirkatin átum jeawakrumnińkia nuńkia umirkatniun tuke nakitiainia nu, Yusa kakarmarijjai asutiáttaji, tajai.

⁷ Atumsha aya pátatek ana nu iiyarme. Wats, shuar nekas Krístunu ajasman nekamaka, núńisan winiasha Krístunuiti tu enentáimtursatniuiti. ⁸ Yusa kakarmarijjai akupeaji tuke tákuncha natsaamatsjai. Nu kakarman atumin péńker jintintiatarum tusa Kristu suramsaitji. Kame atumin emesratniun suramsachuitji. ⁹ “Ni áarmarijjai awaktamkatajtsa wakerutmaji” tátsurpash. Núchaiti. ¹⁰ “Papru áarmari ti kakaram áiniawai, tura jui pujak kakarmachuiti; tura etserkatniuncha nékatsui” turutainiawai. ¹¹ Wats, tuinia nuka junasha nekaawarti. Yajá pujakur kakaram áajinia núńisrik atumjai pujakrishu kakaram túrattaji.

¹² “Wiki imiá péńkeraitjai” tuinia nujai méteketji tátsuji. Ní shuaraitji tátsuji. Warí, niisha imia nińki nekapmainiawai. Tura ni ai íisar “nu nanķaamas péńkeraitjai” tu wéenawai. Nuna túruiniak netse túruiniawai. ¹³ Antsu iikia, ii nekamatin jeajnia nú nanķaamas waantu ajaschat-taji. Ii takastatjinia nui Yus Nińki jintintramji. Nu arant

wéatsji. Kame atumjin takastinian Yus tsankatramkaitji.
 14 Tuma asamtai, tájinia nu Yus tsankatramka nú iniankas
 túratsji. Warí, iisha emka Kristu chichamejai atumjin jeach-
 makají. “Emka jeamji” tájinia nu ánt_{rar} tátsuji. Kame
 Yus tsankatramakrin jeamji. 15 Chíkich takasmanum iikia
 waantu enentáimtumasar, “ii takatrínti” tátsuji. Antsu yamá
 enentáimtarmena nú nankaamas Yus enentáimtustarum tusar
 wakeraji. Nu túrakrumninkia atumjin tuke takasminiaitji.
 16 Nuyasha chíkich takaana nui takatsuk átum pujarmena nú
 arant pujuinia nusha Yus-Chicham ujaktaj tusar wakeraji.
 Nu túrar chíkich shuar takasma “íiniuiti” tíchattaji.

17 Tura pénker enentáimtumastaj tusa wakerakka, Yúsnaítjai
 tusa pénker enentáimtumasti. 18 Warí, ninki “pénkeraitjai”
 tumamna nuka anturkachminiaiti. Antsu Uunt “pénkeraiti”
 tana nú shuar nekas pénkeraiti.

11

Ántar etserniun Papru áujmateawai

1 Waurua núnisnak chichastatjana nu anturtukain-
 trumeash. Ee, anturtuktarum tusan seajrume. 2 Atumniasha
 Krístunak anajmamtikrajrume. Tura nuwá chíkich
 áishmankan nékatsuk ni áishrijainki nuatnaiya núnisrumek
 átum chikicha chichame umirtsuk aya ni chichamenki
 umiakrumin Krístui ejetaj tusan wakerajrume. Nuna
 túrataj tusan atumin akasmatajrume. Nu akasmaktinian
 Yus surusuiti. 3 Túrasha íwianch ni nekatairíjiai emka nuwá
 Epan anankamia nútiksan atumniasha Yusa jintíya awa-
 jimtikramar Kristu aneashtinian enentáimtikramprarmatai
 anankamu ajrum tusan tsuutajrume. 4 Warí, chíkich
 shuar Jesusnan nusháa étserkamujai táiniakuisha pénker
 ántarme. Tura nusháa wakan achikiam, nusháa chichamjai
 uwempramniaiti tu etserainiakuisha, nekasapitia tárume.
 5 Kame “Yúsnumia akatramu asar etserkatin imiá nékaitji”
 tuinia nujai nankaamas nékaitjai, tu enentáimjai. 6 Ti pénker
 chichastinian nékachiatsnak winia nekaatairsha taamtsui.
 Núnaka ii túramuríjiai tuke paant iniakmaji.

7 “Akirkata” tútsuk Yus-Chichaman atumin ujakmajrumna
 nui ¿tunáa túrajak? Átum ankant ajastarum tusan
 wikia péejchach ajasu asan, “etserkamunam akirkata”
 tíchamjarme. 8 Antsu atumin yáintaj tusan pujakun chíkich
 Yus-shuarnumia kuítian suruiniakui achikmiajai. Nuna
 túran ni kuítrín emeentukmiajai. 9 Tura atumjai pujusan
 atsumaknasha atumniaka seachjarme. Masetúnianmaya Yus-
 shuar taar, wi atummiajna nuna surusarmiaiyi. Nu tuma
 asamtai tájarme, seachjarme tura seashtatjarme. 10 Ashí

Akaya nun^ukanam nuna ujaktinian suritrukchartatui. Nuna tákun Kristu nekasrijaiⁱ tajai. ¹¹ ¿Urukamtai nuna taja? ¿Atumin aneachu asanak taja? Atsá. Aneajrumna nuna Yus nékawai.

¹² Tú^urasha wi tú^urajna nuna tuke turu wétatjai. “Papru tú^urana nú^unisrik tú^uraji” tuinia nuna tí^ura^uiⁿ tusan tú^urattajai. ¹³ Warí, niisha Yúsnumiá akatrachma á^uniawai. Anan^ukartin á^uniawai. “Kristu akatramurintji” tumá á^utaj tusar wekainiawai. ¹⁴ Nusha urukaku tú^umait tí^uchamniaiti. Warí, imia Satanáskesha “nayaimpinmaya akatramuitjai” tumá á^utaj tusa wekaatsuk. ¹⁵ Nu^uinkia imia ni suntarisha pé^unkeran tú^urawai tumá atai tusar wekasachartinkiait; tú^urasha ni amuamur^uinkia tunáa tú^uriarma nujai métek nekapmá asutiátin á^utatui.

Papru wáitsamia nu

¹⁶ Ataksha tájarme “wáurkaiti” tu enentáimtursacharti. Kame “wáurkaiti” tu enentáimturiatrumek, chichastin tsan^ukatruktarum. Ishichik waantu enentáimtumastaj tusan wakerajai. ¹⁷ Tura waantu enentáimtumastaj tájana nu, Uunta tsan^ukatramurijaiⁱ tátsujai. Antsu waurka nú^unisnak chichaajai. ¹⁸ Untsurí ju nun^ukanam uunt ajasar ti waantu enentáimtumainiakui wisha ishichik waantu enentáimtumastatjai. ¹⁹ Imiá nékayatrum waurka ainia nu shiir enentáimtusum á^unturearme. ²⁰ Niisha atumin takamtikramainiakuisha, kasartamainiakuisha, atumí nérenniurí ajainiakuisha, yajauch chichartamainiakuisha, yapimin awattamainiakuisha ashí nu katsuntearme. ²¹ Natsamayatnak tájarme jikia nu tú^uratin kakarmachuuji! Wats, niisha araanainiatsna nuna wisha araantatsjai. (Waurka nú^unisnak chichaajai.) ²² Niisha Ipríu-shuar á^uniakuisha wisha nú^unisnak Ipríu-shuaraitjai. Israer-shuar á^uniakuisha wisha nú^unisnak Israer-shuaraitjai. Apraáma weeatrí á^uniakuisha pai, wisha nú^unisnak. ²³ Kristu takarniurintji, tuiniawai. Wikia aujai nan^ukaamasaitjai. Kame nuna tákun waurka nú^unisnak chichaajai. Kame nijjaiⁱ nan^ukaamas takasuitjai; nijjaiⁱ nan^ukaamas asutiámuitjai; nijjaiⁱ nan^ukaamas sepunam en^ukeamuitjai; ti nú^ukap já^uninkiamjai. ²⁴ Israer-shuar chikichkí achirkacharmai. Antsu tí^umiajni sen^uku jea achirkarmai. Tura emka achirkarmia nuí awa-awatatkua trainta nuiwi ejeyarmiayi. Tura nu tí^umiajni sen^uku jea achirkarmia nuísha nú^utiksán nujai métek awatturarmiayi. ²⁵ Numijjaiⁱ menaintiú awatturarmai. Kayajaisha mantuatai tusar chikichkí tukurarmai, kanusha menaintiú wayamai wi en^ukempran wekaimiaj nuí. Tura nayaantsanam ajapén chikichik kashi nuí pujusan tsawarmajai tura nu tsawantcha tuke pujusmajai. ²⁶ Ti nukap wekasaitjai. Tura entsá wekasán tsú^uumainian wáinkiaitjai. Tura kasa shuarjaisha, wíi

shuarjaisha tura yajaya shuarjaisha tsúumainian wáinkiaitjai. Péprunmasha, kampuniunmasha, nayaantsanmasha tsúumainian wáinkiaitjai. Wait Yus-shuarsha yajauch awajtustaj tusar wakeriarmai. ²⁷ Itiurchatnasha ti wáinkiaitjai; takatnasha ti takasuitjai. Ti untsurí kánutsuk pujusuitjai. Tsukamaknasha, kitiamaknasha wáitsaitjai. Ti ijiarmaitjai. Pushir táasmatai tsetsekruí wáitsaitjai.

²⁸ Tura nuna nan̄kaamas, kaarka kijin júkitniua núnisnak Yus-shuar péñker wekainiawash tusan ashí tsawant ti enentáimsan pujajai. ²⁹ Chikichik Yus-shuar kakarmachu pujakui wisha kakarmachu nekapeajai. Shuar chikichan tunaanum ajuawarmatainkia wisha natsamakun kajekan wáitiajai. ³⁰ Maa, waantu chichastin ákuin̄kia, antsu winia kakarmachu awajtuinia nuna ujakan waantu ajasaintjai. ³¹ Yus, ii Uuntri Jesukristu Aparí ana nu (ni naari tuke shiir awajsamu atí) wi wáitratsjana nuna nékawai. ³² Tamasku péprunam pujai nu nun̄kanmaya akupin winia jinkia juruktiaj tusa wakerak pepru tanish téntakma wáitirijn suntaran apujсамиayi. Aretas uunt kapitian̄ pujai túramiayi. ³³ Túrasha uunt chankinnium enketawar pepru aa tanishri áan̄kamunam jiki itiararmiayi. Tu uwempramiajai.

12

Papru wáinkiamia nu

¹ Kame wiki shiir chicharmamsatniun nakitiajai. Túmayatnak ímiarjana nuna tura uunt Yus iniaktursamia nuna ujaktiniaitjarne. ² Krístun umirin ana nú áishman̄kan nékajai. Nu áishman̄ jimiara nayaimpin nan̄kaikin menaintiú nayaimpiniam junakniuiti. Nusha katurse uwí nan̄kaamasuiti. Kame ayashtiuk wakaashit, tura ayashtichu wakaashit. Núnaka nékatsjai; aya Yúsak nékawai. ³ Tura nekas junakniua núnaka nékajai. Ayashtiuk wakaashit, ayashtichu wakaashit, núnaka aya Yúsak nékawai. ⁴ Yus-shuara wakaní shiir pujutainium junakmiayi. Nuisha paant awajsachmin ana nuna antukmiayi. Nii antukmia nú chicham paant awajsatniun suritkiamuiti. ⁵ Nu áishman̄ka túrunamuri nan̄kaamakuiti tajai. Tura wikia nan̄kaamakuitjai túmamtsuk, kakarmachuitjiana nuna paant ujaajai. ⁶ Nan̄kaamakuitjai túmantiaj tusan wakeraknaka nekas tíminiaitjai, ántran tíchaintjai. Túrasha túratsjai. Winia túramuruk wáinkiarum winia chichampruk antukrum, waritia enentáimsarum nujai métek enentáimtursatarum tusan wakerajai.

⁷ Wi nayaimpiniam wáinkiamajna nu timiá péñker asam-tai ántar waantu enentáimtumaschatniun, jan̄ki mesertinia

núnisan winia ayashruj najaimiatniun sunasmiajai. Nuka wi wáitsatin Satanásnumia akupkamuiti. ⁸ Nuka jurutkitia tusan Úuntan menaintiú seamjai. ⁹ Tuma ain Uunt winia turutmiayi “Atsá. Jaa pujayatmek winia waitnenkartutairjai shiir pujame. Shuar kakarmachun winia kakarmarun Wi suakui ashí aents nu shuara ayashjin winia kakarmarun wáiniainiawai.” Tuma asamtai, Kristu kakarmari winia ayashruj paant ati tusan kakarmachuitiatnak araantatsjai. ¹⁰ Tuma asamtai, wi Krístun aneakui shuar katsekreuini-akuisha, kajertuiniakuisha, winia kuítrusha, kakarmarsha atsain waraajai. Kame ashí itiurchat ana nuj kakarmachuitiatnak kakaram nekapeajai.

¹¹ Wi “pénkeraitjai” túmamkun waurua núnisnak chichaa-jai. Tura atumsha winia pénker chichartusminiaitiatrumek, túrachu asakrumin tu chichasjai. Warí, wi penké ántraiatnak, “ti pénker akatramuitji” tumamainia nú nuñkaachichuitjai. ¹² Atumjai pujumiaj nuj, itiurchat ámanman katsuntran takas-miajai. Yuska ni kakarmarin iniakmastaj tusa ti uuntan aents tujintiamun túratniun surusmiayi. Nujai “Papru nekas winia akatramuruiti” tusa paant iniakmasmiayi. ¹³ Warí, chíkich Yus-shuaran yáinmiaj núnisnak atumniasha yáinmajrume. Áyatik atumin “kuit surusta” tíchamjarme. ¡Nu yajauchiitk-iuinia tsankurturtarum!

Papru atak tátinrin ujakmiania nu

¹⁴ Jújainkia menaintiú iwiarnarjai atumin íistaj tusan. Tura jeaknaka, “etserkamun akirkatarum” tíchattajrume. Atumí kuítrin wakeratsjai. Antsu atumin wakerajrume. Warí, winia uchirchakaitrum. Uchisha aparín kuítian ikiauntukchatniuiti. Antsu aparí ni uchirín kuítian ikiauntuktiniaiti. ¹⁵ Atumniasha yáintaj tusan ashí takakjana juna ajapawaintjai, tura winia kakarmarnasha ashí emenkakaintjai. Wi ti wakeramaitiatrum átumka ishichik wakerutarminiú túrawaintjai.

¹⁶ Túrasha chíkich shuar chichainiak “Nekasaiti; Papru niniki ii kuítrin jurutramkichmaji. Túrasha anankartuatniun neka asa in ananframachmiashia” turutainiatsuk. ¹⁷ ¿Nusha itiura? ¿Shuáran wi akupkamaj nujai kuítrumin achikjak? ¹⁸ Atumin írmasat tusan Titium “wetá” tímiajai. Tura nin atamprit tusan chíkich Yus-shuaran akupkamjai. ¿Titiusa kuítrumin juruttramkimkiarum? ¿Wisha niisha mai metek enentáimsar métek takaschamkaji?

¹⁹ ¿Warí enentáimsarum? ¿Átum pénker áiniawai turutik tusar nu tájik? Antsu, aneamu yatsurtiram, ii tájinia nu atumin Yúsnum ikiakártajrum tusar taji. ²⁰ Wi atumjin jeaknasha, wi

wáitkiataj tusan wakeraj nuna wáinkiashtatjai, tu enentáimsan itiurchat enentáimjai. Tura atumsha wakerarmena núnisrumek wáinkiashtatrume, tu enentáimjai. Yajauch chicharnaikiatniuncha, yajauch enentáimtunaistinniasha, kajernaikiatniuncha, nínki enentáimtumastinniasha, tsanumpratniuncha, mái-tunai ajatniuncha, waantu enentáimtumastinniasha, yajauch wekasatniuncha, ashí nuna wáinkiashtajash tusan itiurchat enentáimjai. ²¹ Tura wi jeaknasha, átum yajauch túratniusha, tsanirmatniusha tura yajauch ti wakerarmena nu, yaunchu túriniarmena nu, untsurí shuártiram iniaisachurmena nuna nekashtajash. Tura enentáim yapajitsuk tuke tura asakrumin úutchatjash tajai. Kame wi átum umikchamun nekaamtai Yus winia iniatsátrattawai tusan tsúumajai.

13

¹ Jujai menaintiú íistajrum tusan winiajai. Ashí iwiaratin ana nu, jimiara tura menaintiú shuara chichamejai iwiarnartatui. ² Wi atumjai pujachiatnak, atumjai pujáa núnisnak áatjarme. Yaunchu tunáa túrimiarmena nuna tura ashí shuártirmin wi nuik tímiajrumna nuna ataksha tájarme, wi atak tana tunaarum iwiareachkurminkia iniaisashtatjarme. ³ Nuiñkia wi Kristu kakarmarijjai chichaajna nu nekaattarme. Nu nekaataj tusarum wakeratsrumek. Tura Krístuka kakarmachuchuiti. Antsu atumí enentáin kakaram takaawai. ⁴ Kristu nekas kakarmachua nútiksā krúsnum máamuitiat, Yusa kakarmarijjai iwiaakuiti. Ayashnium Kristu kakarmachu nekapmia núnisrik iikia kakarmachuitji. Túrashā Yusa kakarmarijjai ni takatři takaaaji. Nu atumin iniakmastatji.

⁵ “Nekas Yúsān umirniuashitiaj” tusarum nekamatarum. Íimiastarum. Ántar Yus-shuarchaitkiurmeka Jesukrístu atumí enentáin pujurtama nu nekaattarme. ⁶ Tura iikia ántar Yus-shuarchaitji nu nekaatarum tusan wakerajai. ⁷ Tura átum tunáa túrawáirum tusar Yus seaji. Aents in pénker enentáimtikramprat tusar tátsuji. “Ántar áiniawai” túrampriniñ, átum pénker wekasatarum tusar wakeraji. ⁸ Warí, Yusa nekas chichame emesratin tujintiaji. Antsu ii túrajnia nu Yusa nekas chichamejai túraji. ⁹ Tuma asamtai, átum kakarmaitkiurminkia iikia kakarmachuitiatar shiir enentáimji. Atumsha nekas kakaram ajasúk tusar Yus tuke seaji. ¹⁰ Atumin emesratin Yuska winia akuptatsui. Antsu Yus akuptukuiti atumin ikiakártinian. Tuma asamtai, wi atumíin jeaknaka kakaram chicharkajirum tusan winitsuk ju papin áatjarme.

¹¹ Ayu, yatsurtiram, shiir pujustarum. Krístunam tuke kakaram ajastarum. Yus shiir enentáimtikramprarti. Chikichík enentáik enentáimsatarum. Shiir awajnalisarum pujustarum. Tura Yus anenmarmena nu, shiir enentáimtikramna nu atumjaj pujurtamsattarme. ¹² Yúsnum shiir enentáimtunaisrum amikmaanaisatarum. ¹³ Ashí Yus-shuar ainia nu amikmaatmarme. ¹⁴ Uunt Jesukrístu waitnenkartutairi, Yusa anenkrattairisha atumjijn pujurtamsati. Tura Yusa Wakanisha tuke nemartamsarti. Nu atí.

Papru KARASEANMAYA SHUARAN Papí aar akuptukma

Karaseamaya Yus-shuaran Papru áatramiania nu

¹ Wi Pápruitjai, Yus akatramu. Yúsak winia akatturuiti. Shuarka akatturchamai. Yusscha chíkich shuáran akupturak akatturchamai, antsu Nun^{ki}, Yus Apa, Jesusan jakamunmaya iniantkimia nu, tura Jessusha winia akatturarmai Yusa shiir chichamen etserkatniun. ² Wisha, ashí Yus-shuar wiji^{jai} pujuinia nusha, ju papí akupeaji. Ashí Yus-shuar Karasea nun^{kanam} pujarmena nu áujsatarum tusan ju papin akupta-jrume.

³ Yus Apa tura ii Uuntri Jesukrístusha waitnentrmainia ásar yainmakarti imiatkinchanum tuke shiir pujustinian. ⁴ Yus ii Aparí nuna wakera asamtai, Jesus ni ayashin surumak wáitsamiayi ii tunaari asakártinian. Nuna tura ashí tunáa ju nun^{kanam} ana nuyá an^{kant} awajtamsatai tusa in yáinmaji. ⁵ Tuma asamtai tuke Yus shiir atí. Ayu.

Chíkich uwempratin chichamka atsawai

⁶ Maa, nekasaash timiá wárik Yus ikiukmiarum. Kristu in ti anenma asamtai Yus ni shuari ajastinian in anaitiamkamji. Urukamtaitasuk nuikia imiá wárik ni chichame inaisamarum nusháa chicham umikrum uwemprataj tusarum. ⁷ Wátsek, nekas chíkich chicham penké atsawai shuar umikiar uwempratin. Antsu yajaya shuar atum^{jin} taar pé^{nkercha} awajtamainiawai. Tura nusháa chichaman etserkar Yusa shiir chichamen yapajilatniun wakeruinaiwai. ⁸ Tuma asamtai Yus nin yajauchiniam yumⁱⁿkrattawai. Wisha Yus-Chicham yapajiamun etserkamtaⁱⁿkia Yus winia yumⁱⁿkrurtatui. Nayaimpinmaya suntarsha nusháa chichaman wi etserkachmaj nuna étserkuⁱⁿkia nunsha yumⁱⁿkrattawai. ⁹ Paant ujakjarme túmaitiatnak ataksha ujaajrume: Náⁿkamas shuar niisháa uwempratin chichaman, wi etserkachmaj nuna étserkuⁱⁿkia Yus yumⁱⁿkrattawai.

¹⁰ Ti kakaram chichaatsjak. Nuna chichaakun shuar shiir enentáimtursarti tusan chichaatsjai. Antsu Yus shiir enentáimtursati tusan nuna tajai. ¿Shuar wakeruinia nuna enentáimsan chichaajak? Nuna enentáimkiunka Kristu wakera nuna umirkachaintjai.

Papru júnis Yus akatramu ajasmiayi

¹¹ Antsu nekaatarum, yatsuru. Uwempratin chichaman wi étserjana nuka áentsnumiānchuiti. ¹² Aentska ujatkmach-mai. Unuitiutnasha unuitiurchamai. Antsu Jesukristuk winia paant jintintruamai.

¹³ Tura wi yáunchu ti yajauchin túramiaj nuka antukchakaitrum. Israer-shuar Yúsna takainia nútiksanak wisha takasmajai. Tuma asan Yus-shuaran ti kajerkan tuke pataatukmajai amuktaj tusan. Nusha nékarme. ¹⁴ Tura kakaram ajasan, ii uuntri yaunchu tiarmia nuna yawetsuk umiktinian ti enentáimpramjai. Tura untsurí shuaran wijíaj métek uunt armia nuna nankaamas Yúsna takasmajai. Túmaitiatan aya winia úuntru chichamen ti umirniuyajai. ¹⁵ Túrasha wikia akiintsain Yus winia achirkamiayi, tura ti anenkratmaríaj winia anaitiukmiayi. ¹⁶ Nuikia shiir enentáimiuk ni Uchirín paant nekamtikruamai. Tura Israer-shuarchanum ni shiir chichamen etserkat tusa akuptukmiayi. Tuma asamtai chíkich shuaran aniaschamjai. ¹⁷ Uunt péprunmasha, Jerusarénumka, wéchamjai winí emkaru Yus akatramujai chichastinian. Antsu wárik Arapia nunkanam wémajai. Tura nui Yúsna enentáimtasuan atak Tamasku péprunam waketkimjai. ¹⁸ Tura menaintiú uwí nankaasmatai, nuyá Pítrujai áujmattsataj tusan Jerusarénum jeamjai. Tura jímíará semanachik pujusmajai Pítrujai. ¹⁹ Tura Jakupuncha, ii Uuntri Jesusa yachia nuna, wáinkiamjai. Nú arantka chikichnaka Yus akatramunka wáinkíachmajai. ²⁰ Yus iirui. Wi tájana nu nekasaiti, wáitchaiti.

²¹ Nú ukunmasha Siria nunkanmasha, Sirisia nunkanmasha wémajai. ²² Tuma asamtai ashí Yus-shuar Jutía nunkanam pujuarmia nu winia nekaracharmai. ²³ Aya antukarmai. “Yaunchu in ti áintrammiaj nu yamaikia Yus-Chichaman étseruk wekaawai. Yáunchuka in amutmaktinian wakeriniaitiat yamaikia iniaisaiti” tiarmai. ²⁴ Túrawar winia enentáimtursar Yúsna shiir yumínsarmai.

2

Chíkich Yus akatramu Paprun shiir enentáimtuiniawai

¹ Tura katurse uwí nankaasmatai wisha Pírnápíajai Jerusarénum wémajai. Titiuncha jukimjai wijíaj. ² Yus akupta asamtai Jerusarénum wémajai. Tura nui jean aya Yus-shuara úuntriíajai áujmattsamjai. “Júnísnak ashí Israer-shuarchan Yus-Chichaman ujainiajai” tímiajai. Takasmajna nusha tura tuke takastin enentáimjiana nusha ántar aín tusan tu áujmattsamjai. ³ Niisha Yus-shuara úuntriñtiat itiurchat enentáimpracharmai. Antsu chíkich shuarka Titíu Israer-shuarchaitiat wijíaj pujakui niisha

Israer-shuar ajastí tusa tsupimiamtikiatniun wakeriarmai. Túrasha tujinkiarmai. ⁴ Tura nu shuar ántar yachi áiniak antuktai tusar wayawarmai. Tura ii chichamen antukar itiurchat awájtámsatai tusar wakeriarmai. Iis, Kristu Jesus in uwentikrampra asamtai ti shiir iisha Yus yúpichuch umíaji. Tura nuna nekaawar, atakka, aya yáunchu akupkamu itiurchat ana nujai uwentikrampratniun wakerutmakarmaji. ⁵ Túrasha penké ishichkisha umikchamji. Antsu atumín Yus-Chicham yapajniátsuk métek jeartamat tusar ni chichame penké anturkachmaji. ⁶ Nu arantcha Yus akatramu uuntriñkia yamaram túratniunka suruscharmai. Nincha ashí aents ti neka ainiawai tu enentáimtuiniawai. Kame nu shuar ti nékainiakuisha ti enentáimtatsjai. Yus ashí shuwaran mash métek iyatsuk. ⁷ Yus akatramu uuntriñsha Yus winia Israer-shuarchan Yus-chicham ujaktinian akuptukma nuna nekarawarmai. Tura Pítruncha akupkamai Israer-shuwaran Yus-Chicham ujaktinian. ⁸ Pítrun Israer-shuarnum akupkama nú Yusak winiasha akuptukmai Israer-shuarchanum. ⁹ Tuma asamtai Jakupusha, Pítrusha, Juansha, Yus akatramu uuntri ásar, Yus winia ti paant akuptan nekaawar, winiasha Pirnapínsha, “Ayu, átum, Israer-shuarchanum Yus-Chicham etserkatarum, tiarmai. Iisha Israer-shuarnum Yus-Chicham etserkattaji” tiarmai. Túrawarmatai shiir áujnaisar ii uwejejai achirnaikiamji métek enentáimji tusar. ¹⁰ Áyatik “Kuítrincha enentáimtusum tuke yáíntarum” tiarmai. Wisha núnaka ti wakerakun tuke túriniaitjai.

Papru Pítrun chicharkamai

¹¹ Tura nú ukunam wi Antiukía péprunam pujain Pítiur tamai. Tura nui yajauch túramtai, Yus-shuara úuntriñiak chicharkamjai. ¹² Iis, Israer-shuar tuiniawai, “Israer-shuarcha Muisais timia núnisan tsupirnakcha asamtai, nu shuarjai yurumáshtiniaiti” tuiniawai. Túmaitiat Pítiur yurumámñian nékaku, emka Sántiak shuar táatsain Israer-shuarchajai yurumámai. Tura nuyá Sántiak shuar Jerusaréñnumiá Antiukíanam jeawarmatai Pítiur ashamak tsupirnakcha shuarnumiá kanakin yurumáchmai. “Tsupirnaktniaitme” tiniu ainia nuna ashamak túramai.

¹³ Tuma asamtai chíkich Yus-shuar, Israer-shuar armia nu, Pítrujai métek emka yurumáwaru áiniayat jimiará enentai takusar ukunam iniaisarmai. Pirnapísha neka áyat nútiksan nupetnakmai. ¹⁴ Tura nuna íisan ashí íimiainiaín Pítrun chicharkamjai. Yus Shiir Chicham tana nujai métek wekasachu ásarmatai tímiajai “Ame Israer-shuaraitiatam

Israer-shuarti ikiukim tsupirnakchajai yurumám Israer-shuarcha áintsamek túrame, tímiajai. Nuikia “Israer-shuarcha Israer-shuartijai métek wekasatin áiniawai” tiip” tímiajai.

Israer-shuarsha Israer-shuarchasha mai métek Yúsan enentáimtusar uwemprartatui

¹⁵ Iikia nekas Israer-shuaraitji. Israer-shuarcha, tunáa ainia áaniuchuitji. ¹⁶ Túmaitiatar ju nékaji. Akupkamu umíamujai uwemprachminiaitji antsu Jesukrístu nekas enentáimtakum uwemprattame. Nu nekaar iisha Jesukrístu nekas enentáimtusmaji tunaajainchu atai tusar. Aya Kristu nekas enentáimtusar péñker átatji. Akupkamu takasar umirkarsha tuke nujai péñker ajaschattaji. Akupkamunka shuar umiktaj táyat, chikichkí shuarkesha nujai péñker ajaschamniaiti. Nu nekaar antsu Jesukrístu nekas enentáimtusmaji péñker ajastai tusar. ¹⁷ Tura Israer-shuar enentáimprashtimpiash, “Wátsek, núnisaitkiuinikia wisha Krístun enentáimtustaj tákunka, emka tunáa shuaraitjai tu enentáimtumastiniaitjai” tíchanpiash. Nuka nekasaiti tura nuyá “Nu asamtai Kristu winia tunáa shuaran najataiti” penké tu enentáimprashtiniaiti. ¹⁸ Antsu yaunchu, wi túrashtiniaitjai tímiaj nuna awainkin túratniuitjai tákunka nuikia nekas tunaitjai. ¹⁹ Iista, akupeamun umiktaj tukaman penké tujinkiamjai. Umiktinian tujinkian jaka áintsanak ajasmajai akupeamunam. Antsu Yusjai iwiaaku pujajai ni wakera nuna umiktinian. ²⁰ Wisha Krístujai krúsnum jákaitjai. Tuma asamtai yamaikia wikia iwiaaktsujai wi wakeraj nuna túratniun antsu Kristu wini iwiaakui ni wakera nuna túratniun. Tura ju ayashnium pujayatan aya Kristu enentáimtakun iwiaakjai. Krístusha Yusa Uchiríntiat winia ti anentuk jarutkamiayi. ²¹ Yus ti péñker asamtai itiurak “Kristu ántar jakamiayi” títiaj. Iis, aya akupkamun umirkan péñker ajasminiaitkiuinikia, nuikia Kristu ántar jákaayi.

3

Yus akupkamu tura Yus enentáimtustin

¹ ¿Warin aa Karaseanmayatirmea. Waweamukaitrum netse enentáimprarum Yus tama umirkashtin. Kristu krúsnum máamun ti paant étserkun atumin iniaktuschkamajrum? ² Wátsek, aniastatjarme, enentáimpratarum. ¿Warijiajn Yusa Wakaní atumí enentáin achikmarum. Akupkamu umirkarmek enentáimin achikmarum, antsu Yus enentáimtusrum ni Wakaní achikchamkuram? ³ ¿Tuke nétsekaitrum. Yusa Wakaní emka atumí enentáin wayá takasmatai atumek yamaikia nu takat aya ayashí kakarmarijjai umiktin enentáimprarmek. ⁴ Penké ánrarmek

wáitsamarum tura antsu ishichkisha unuimiarchamkarum?
 5 Naka enentáimpratarum. Yus ni Wakanín súramtsuk tura aents túrachminian atumín ti takaatsuk. Átum aya akupkamun umirkurmin Yus nuna túrachuiti. Antsu ni chichame antukrum Yus enentáimtakrumin Yus nuna túraiti.

6 Yaunchu ii uuntri Apraám enentáimpratai. Yus-Chicham nin tawai:

“Apraám Yúsan enentáimtusmatai Yus “Ayu, pé_ñkeraitme” tímiayi” tawai.

7 Iis, nujai páantchakait. Ashí shuar Yúsan enentáimtuinia nuka Apraámjai métek enentáimpraru ásar, ni uchiría áintsan ajasaru áiniawai. 8 Yamái páantaiti. Yus ashí Israer-shuarchancha tawai “Aya winia enentáimtursarum pé_ñker átatrume”. Israer-shuarchasha nujai pé_ñker ajastinia nuna ti yaunchu neka asa, Apraáman ujakmiayi,

“Ámijiai ashí aents ti shiir ajasartatui.”

Tu ujakmiayi. 9 Tuma asamtai ashí shuar Yúsan enentáimtuinia nuke Apraámjai métek pé_ñker ajasar shiir warasartatui.

10 Antsu ashí shuar “akupkamun umirkan uwemprattajai” tuinia nuka yajauchiniam yumiñkramu áiniawai. Yus-Papinium áarchamukait

“Ashí shuar Yus akupkamun ashí aarma nuna takamtsuk umirkachka yajauchiniam yumiñkramu áiniawai.” Tu áarmaiti.

11 Nújainkia páantaiti. Akupkamu umirkatniujai pé_ñker ajaschamniaiti Yusjai, antsu aya Yus enentáimtusam pé_ñker ajasam uwemprattame. 12 Shuar akupkamu umirkatniun enentáimna nuka aya nujai pé_ñker ajastinian enentáimiui; Yúsan enentáimtak pé_ñker ajastinian enentáimtsui.

13 Tura Kristu yamaikia uwemtikrampramji. Akupkamun umirkachu yumiñkramuiti tana nuka in túramtsuji. Antsu Kristu in yainmaktin krúsnum jaka yumiñkramu ajasmiayi. Kame áarmaiti:

Shuar jakati tusa numiniam nenasma yumiñkramuiti.

14 Tuma asamtai Jesukrístu jakamujai ashí Israer-shuarchasha Apraámjai métek pé_ñker shiir warasartatui. Iisha núnisrik nu shuarjai Yusa Wakaní, Yus akupkataj timia nusha, achiktatji Yus enentáimtusar.

Yus akupkamu tura Yus túrattana nu anajmarma

15-16 Iis, yatsuru, Yus Apraáman Chichaman najana anajmatuk,

“Ámijiai tura amée weeá akiinkiatana nujaisha ashí aents ti shiir ajasartatui” tímiayi.

Kame ‘amée weeá akiinkiertatna nujai” tíchamiayi, antsu ‘akiintiatta nujai’ tímiayi. Nuna taku chikichik átinia nuna enentáimpramiayi. Nusha Krístuiti. Aentstisha enentáimpratai. Shuar chichaman najana tura papinium aar nuyá ni naari apujas nuikia nekas yapajítsuk umiktiniaiti. Umitsuk ini-aisachminiaiti. Patattasha patattsachminiaiti. ¹⁷ Wátsek, Yus núnisan Chichaman Apraámjai najana, ukunam umitsuk iniaisachminiaiti. Tura Chichaman najanamia nú ukunam, kuatru sian̄tu nuyá trainta (430) uwí nan̄kaasmatai, Yus ni akupkamur̄in Muisaisan susamiayi. Túramaitiat nujai Yusa yaunchu Chichamen yapajíachmiayi iniaisatniun. ¹⁸ Tuma asamtai Yus timia nuka tuke uminkiatatawai, Yus yaunchu Apraámjai Chichaman najana asamtai. Nújain̄kia páantaiti, péñker ajastajtsar akupkamu umikrikia shiir pujuschartatji antsu Yus timia nujai iikia takatsuk shiir pujustatji. Nuna tsan̄katkamiayi Yus Apraámjai Chichaman najaneak̄.

¹⁹ “¿Nuikia Yus urukamtai akupkamun susamia?” tíchaintmeash. Ayu, Apraám weean, Kristu táatsain̄ Yus tímia nu uminkiachminiuyayi. Tuma asamtai nii táatsain̄ ashí tunaan túrawarmia nu timiá yajauchiiti tusa Yus akupkamun susamiayi. Tura Yusa suntarī ju akupkamun ashí iwiarar Muisaisan susar akatrarmiaī Israer-shuaran susártī tusar. ²⁰ Antsu chikichik shuar n̄n̄ki takastinian enentáimkiun̄ka chikichan atsumatsui. Tura Yus aya chikichkiiti. N̄n̄ki chikichan akattsuk ashí aentsun Apraámjai péñker áwajsatniun Apraáma anajmatar n̄ijjaī Chichaman najanamiaī.

Yus akupkamu itiúrkátin

²¹ “¿Tura Yus jimiarā chichamjaī chichaawak, tíchaintmeash. Emka Apraáman “Jujaī uwemprattame” tíchamkia, nuyá Muisaisan ni akupkamur̄in súsachmakia?” tíchaintmeash. Tura áintsachuiti. Nekaata, akupkamu umirkatniujaī Yusjaī tuke péñker pujusminiaitkiumka nuyá aya akupkamujaī uwempram tunaajain̄chu ajasaintme. ²² Tura Yus-Chicham paant “Ashí tunáa áiniawai” tawai. Nu asamtai yamaikia ashí Jesukristu enentáimtuinia nú shuar, aya Yus timiá asamtai, uwemprartatui. ²³ Tura Kristu táatsain̄ Nin enentáimtusachamniauyayi. Tuma asamtai Nii táatsain̄ akupkamuka in emettama pujurtamji aya akupkamu tana nu umirkatin. Tura ukunam ju nekanayi: Kristu enentáimtusar uwempratniuitji. ²⁴ Akupkamu, nuika, in waitmakmaji uchin kuírchin wainnia áintsan̄. Kristu tatí tusa waitmakmaji. Tura Kristu támatai ashí nekas Nin enentáimtuinia nuka Yúsjaī péñker áiniawai. ²⁵ Yamái Kristu nekas enentáimtustiniaiti tuma asamtai yamaikia akupkamu

kuirchia áintsan wáitmatsji. ²⁶ Antsu Jesukrístu enentáimtusar, nujai Yusa uchirí úuntmaru ajasuitji. ²⁷ Ashí Kristu náariin imiaimiutirmeka Kristu áintsan ajasuitrume. ²⁸ Jesukrístujai tsaninkiu asar' imiá métek aji. Israer-shuar, Israer-shuarcha, ankant ainia nu, ankantcha ainia nu, áishman, nuwa, ashí mash Jesukrístunuitkiuinikia yamaikia "niishaaiti" tu enentáimprashtiniaiti. Ni shuari mash chikichik áiniaji. ²⁹ Tura Krístunuitkiurmeka Apraám weeá áintsan ajasurme atumsha. Tuma asarum, Yus Apraáman anajmatramia nu atumsha jurumkitniuitrume.

4

¹ Kuítrinniu uchirí ashí ni aparí takakna nuna niiniu áchattawak ukunam. Tura uchichitkiunka ni aparí takarni-uríya núkete. ² Tuke uunt ajatsuk ni wáinnia nuna umirkat-niuiti. Tura uunt ajasmatai tura ni aparí "Ayu" takui nuyá nii antsu ni aparíniu ashí wáinkiatniuiti. ³ Núnisrik iisha úchichik asarkia ashí aentsu akupkamurí umirkatniuji. ⁴ Tura tsawant jeamtai, Yus ni Uchirín akupkamiayi ju nunkanam. Niisha Yúsaitiat nuwanam akiiniamiayi. Tura aents ajas-miayi. Tura aents ajas yaunchu akupkamuncha umirkat-niuyayi. ⁵ Nujai ashí aents akupkamun umirkatin armia nuna uwemtikrataj tusa támiayi. Tura iisha yamaikia nujai ni uchirí uunt ajasminiaitji. ⁶ Atumsha nekas ni uchirí ajasakru-min Yus ni Uchirí Wakanín atumi enentáin akupturmakuiti. Tura nu Wakan atumí enentáiyá Yúsán "Aparú" tawai. ⁷ Tuma asamtai yamaikia aya takarniuchuitme antsu Yus ni uchirín najatmaiti ámin. Tura ni uchirí asakmin ashí Yus takakna nuna amastatui Krístuiyan.

Papru nu Yus-shuaran yáintinian wakerawai

⁸ Yaunchu átum nekas Yus nékachkuram, ántar-yus írunna nu umirkamarme nekascha yúsak. ⁹ Tura yamaikia nekas Yus nékarme, kame Yus atumin nekarmarme. Núnis asamtai itiurtsuk atak aentsu akupkamurí umirkatin enentáimprum. Nujai kakaram ajaschamniaitme tura umikmesha yain-makchattawai uwempratin. ¹⁰ Átumka jisat ti najanearme. Yaunchu jisat najanatin amia nú tsawantcha, nantusha, uwisha, jisat tuke najanearme Yus shiir enentáimtursati tusarum. ¹¹ Ashamajai, atumín ánttrankeash takasmaj tusan. ¹² Yatsuru, wi atumea áintsanak ajaschamkaj; atumsha ya-maikia wi wekaajna áintsarmek wekasatarum. Wi nuí pu-jakui ishichkisha yajauch awajtuscharmarme. ¹³ Antsu neka-marme ayashruí itiurchat pujayatan Yusa shiir chichamen emka ujakmajrume. ¹⁴ Tura winia sunkur ti yajauch awajtajín atum winia nakitrurum muíjrukcharmarme, antsu

Yusa suntarjá áintsarmek itiamarmeme. Jesukrístu anturkat-niua áintsarum anturtukmarme. ¹⁵ Maa, wi nékajai, nuik atumí jiiimi ukuinkiarum surusaarme, túramniaitkiurmeka. Tura shiir enentáimpramarmena nusha itiurtsukait yamaisha. ¹⁶ Yamaikia nekas chichaman étserkun žatumí nemasrī ajasjak? ¹⁷ Chíkich yajaya taaru ti shiir awajtamainiawai tura atumin yainmaktasa áitkiarmainiatsui. Aya winíya akantamkitiai tusa wakerutmainiawai, winia antsu shiir enentáimtursat tusar. ¹⁸ Niisha nekas yainmaktinian wakerutmainiakka atumin shiir awajtamsatin tuke péñker ainti, wi atumjai pujajinsha tura pujatsainsha. ¹⁹ Uchirú, nuwá jurertaj tana núnisnak ataksha wáitijai Kristu atumjín paant atí tusan. ²⁰ Atumjai pujaknaka maak aintjai. Yamái pujaknaka nekas nusháa chichasaintjarme. Itiurkatjarmetsuk nékatsjai.

Akarsha, Sarasha jimiará Chichaman nakumainiawai

²¹ Ayu, “akupkamu umirkatniuiti” támena nu nekaata; akupkamuka júnisaiti. ²²⁻²³ Aarma awai: Apraám jimiará uchirtiniuyayi. Emka ni takarniurī jurermiayi Ismaeran. Nuyá Apraáma nuwé jurermiayi Isakan. Ismaera nukurī Apraáma takarniuriyayi. Tura Apraám Yusan enentáimtutsuk nijiiai kanarmatai, ni takarniurī jurermiayi. Tura antsu Isaka nukurīnkia takarniurīnchuyayi, antsu nekas ni nuwé áuyayi. Niisha ti úuntchiniak, Yus “jurertatme’ tímiayi. Tuma asamtai Yus timiajai Isakan jurermiayi. ²⁴ Ayu. Yamái tájana nuka Yusa Chichamen jímíaran nakumui. Ismaera nukurī Akar chikichik Chichaman nakumui. Yaunchu Senái muranam Yus ni akupkamurīn áarmiayi Israer-shuar, takarniua áintsan, umirkarti tusa. ²⁵ Senái murasha Akara nunķe Arabianam wajaawai. Akarsha Senái muran nakumak, ashí Israer-shuaran “Akupkamujai uwempramniaiti” tuinia nuna nakumui. Yamaisha Israer-shuara uuntri Jerusarénum pujuinia nuka tu chichainiawai. Tuma asamtai Akarsha, ashí nu shuarsha núnisar, akupkamu umirkatin ásar, ti takarniu áintsan wáitsar takainiawai. ²⁶ Antsu ashí Yus-shuarti uwempra asar imiankas ankant pujaji. Nayaimpinmayá Jerusarénumia áentsuitji. Nuyá áentsti tuke ankant pujuiniaji. Nuyá aents asakrin, nu yakiya Jerusárēnka ii nukurīa áintsan enentáimpramniaiti. ²⁷ Júnis áarmaiti: Warasta, misurma, uchi takakchiatmek; Ti shiir warasta, uchi najawé nékachiatmek. Nuwá ajapamu uchin jurertatui; Nuwá áishrinniua núnaka nankaamas uchirtin átatui.

²⁸ Iisha, yatsuru, Isaka áintsarī, Yus timiajai akiiniaitji. ²⁹ Yaunchu Ismaer Isakan kakerak itiurchat awajsamiayi. Núnisan yamaisha Ismaera áintsan aya ayashnumia ainia nú

aents Yusa Wakaníya akiinia nuna yajauch awajenawai.

³⁰ Tura Yus-Papinium áarmaiti:

“Takarniusha, ni uchiríjiaí, ajapam awemata. Nekas péñker nuwá uchiríjiaí tsanín pujuschamniaiti. Aparí kuítríncha achikchamniaiti,” tawai Yus-Papí.

³¹ Ayu, yatsuru, nekaatarum. Takarniu uchirínchuitji antsu ankant pujaji nekas péñker nuwá uchirí asarí.

5

Yusjai tuke ankant atarum

¹ Kristu uwemtikrampramiaji tuke ankant átinian. Tuma asamtai kakaram ajasam tuke ankant pujustá. Ataksha nu itiurchatnum waketkip.

² Wi Papru asan ujaajrume. Átum Muisais timia núnisrumek tsupirnakrumníkia ¿Kristu nuikia warí itiurtamkamniait?

³ Ataksha tájarme, ashí tsupirnakua nu shuar ashí Mui-sais timia nuna takamtsuk umirkatniuiti. ⁴ Atum “Akup-kamu umíakmin Yus shiir enentáimturmastatui” tárugna nu, nu shuartiram Krístuiya tupañniuitrume. Yusa anenkrattairíya kanakniurme. ⁵ Iikia, antsu, Yusa Wakaníjiaí tura Yus enentáimtakrin Yus shiir enentáimturmastatji, tu enentáimji. ⁶ Nekas Krístunuitkiurkia tsupirnaktin atsumatsji. Antsu aya Yus nekas enentáimtakur ashí anenaitniuitji.

⁷ Atumsha Krístujai péñker wekaimiarme. ¿Urukantai nekas Yus timia nu iniaisatin enentáimprum ataksha akupkamu-nam waketkitin? ⁸ Nú enentai Yúsaiyanchuiti. Níijiaí wekasatniunka Yus achirmakuitrume. ⁹ Ju enentáimpratarum: Karía ishichik yuminnium enketam mashí karimtiktsuk. An-eartarum atumsha. ¹⁰ Ayu, Yus yáinmakrumin wi tájana nu nusháa enentáimprashtatrume, nékajai. Tura atumin yajauch áujmatramainia nuna Yus asutiáttawai páchitsuk.

¹¹ Wikia, yatsuru, yamaisha “tsupirnaktiniaiti” tuke tákuíñkia Israer-shuar yajauch awajtuscharainti. Antsu Kristu jakamun étseeratnak “tsupirnaktiniaiti” tákuíñkia kajertukcharainti. ¹² Atumin yajauch awajtamsatin wakeruiniana nú shuar antsu níñki tsupimiakar yajauch awajmamsarti.

¹³ Atumniasha, yatsuru, Kristu tuke ankant awajtamsarme. Tura ankant ajasrum, “Aya wi wakerajna nuna túramniaitjai” tu enentáimprairap. Antsu nuámtak aneniakrum péñker yáiniáiktarum. ¹⁴ Ju chichamjai ashí akupkamu mash uminki-attawai: Ame ayashim aneamna áintsamek chíkich shuar-sha aneata. ¹⁵ Tura aneartarum. Aneniachkurmeka, antsu esanairum mai yunai ajakrumka nuámtak amunaiktatrume.

Ayash wakeramu tura Yusa Wakaní wakeramu

¹⁶ Ju ná tájarme: Atumí ayashí wakerana nu umikíají tusarum Yusa Wakaní kakarmaríjiaí wekasatarum. ¹⁷ Yusa Wakaní wakera nuna ame ayashim nakitiawai. Tura ame ayashim wakerana núnaka Yusa Wakaní nakitiawai. Mai maanai ajainiawai. Túmaitkui péñker wekasataj tukamam tujintiame. Páantchakait. ¹⁸ Tura Yusa Wakaní jintin-tramkuíñkia, aentsu akupkamuríjiaí itit áchattame.

¹⁹ Wats, ayash túramu ti paant áiniawai. Ju áiniawai: tsanirmatin, wapik túratin, yajauch túratin, ²⁰ ántar-yus ainia nu tikishmatratin, wawekratatin, nemasnaikiatin, katsumnaikiatin, akasmaktin, wari kajektin, nan̄kaamantu enentáimtumastin, aya niisháa niisháa enentáimsartin, níniunak íistin, ²¹ yajauch enentáimtunaistin, man̄kartuatin, nampektin, nampernum aya ti yurumin, tura ti nampen átin. Chíkich nujai métek áiniawai. Nuik ujakmajrumna núnisnak ataksha tájarme: Shuar nuna túrakka Yusai pujustinian pen̄ké tujinkiattawai.

²² Ayu, yamaikia Yusa Wakaní kakarmaríjiaí túratin enentáimsatai. Yusa Wakaní ii enentáin pujak, péñker túratniun nerektinia áintsan̄ neremtikramji. Ju áiniawai: aneatin, shiir enentáimsatin, Yusjai tura shuarjai nawamnaikiar wekasatin, shiir enentáijiaí katsuntratin, chíkich shuar shiir awajsatin, tsan̄ka átin, tana nuna tímiatrusan̄ umiktin, ²³ péechach ajastin, iik íimiasar tunáa túrashtin. ¿Ju túratniuncha yaki surimia? ²⁴ Shuar Jesukrístunu ainia nu, ni ayashí wakeramuríncha tura nunisan̄ ni túramuríncha surimiak wekaawai. Ni ayashí krúsnum maatniua áintsan̄ túraiti.

²⁵ Yusa Wakaní kakarmaríjiaí Yus-shuar ajasu asar, núnisrik Yusa Wakaní kakarmaríjiaín̄ wekasatai. ²⁶ “Wats, nekapnaisatai. Wi imiá péñkeraitjai” nuámtak túnaitasuk, yajauch enentáimtunáischatniuiiti.

6

Yáinniaiktaram

¹ Túrasa, yatsuru, Yus-shuar tunáa túrashtimpiash. Atumsha nekas Yusjai wekaarumna nu, nu wáinkurmeka, yátsum Yusjai iwiarat tusarum yáintárum. Tura nan̄kaamantu enentáimtumatsuk túratarum. Tura amesha nekamata. Tunaanum iniaraij̄ tusam anearam wekasata. ² Káarak kijin akui nuámtak yáiniaiktin átsuk. Núnisrumek atumsha, itiurchatrij̄ akui nuámtak yáiniáiktaram. Túrakrumka Kristu akupeamurí umíarme.

³ Shuar tujintiyat “nan̄kaamantuitjai” tákun̄ka anan̄mamui. ⁴ Shuar ní túramuríniak enentáimtumastiniaiti.

Níiniunak enentáimtumakuĩnkia tura péñkeraitkiuĩnkia chikicha túramurĩ iirtsuk, antsu níiniun péñker iis wararsattawai. ⁵ Iis, ashí ní káarkariniak júkishtinkiait.

⁶ Shuar Yus-Chichaman unuimiatna nu, nu shuar nin jintiána nuna ashí takakna nujai yáinti.

⁷ Ananmamawairap. Shuar Yúsán anankatniun tujintiawai. Ame araamna nuna neren júuktatme. Chíkich nere áhattawai. Atumi enentáincha núniskete. ⁸ Iista. Shuar ni ayashĩ wakeramunak tuke enentáimtakka, jatai nereá áintsan araaiti. Nerekmatai jákatniun júuktatui. Tura Yusa Wakanĩ wakerá nuna tuke enentáimtakka Yusjai tuke shiir pujustinian júuktatui. ⁹ Nu asamtai péñker túratin yawetkishtiniaiti. Tura pimpitsuk takasar júuktin tsawant jeamtaí, páchitsuk júuktatji. ¹⁰ Tuma asamtai yáinmin ákuĩnkia ii jeajnia nu túratniuitji nekaska ii yachi yáinkiait, Yus-shuar ainia nu. Tura ashí shuarsha yáintinaiti.

Jesukrístunu ajasar yamaram akiiniatin nekas péñkeraiti

¹¹ Íimsakua, winia uwejrui urutá uuntna áatjarum. ¹² “Nekas tuke tsupirnaktiniaitme” tuinia nuka áyatik shuar shiir enentáimtursartí tusa tuiniawai. Kristu krúsnum jakamun étsereakuĩnkia itiurchat awajtusarain tusar “tsupirnaktiniaitme” tuiniawai. Shuar “ashí akupkamun umiktajai” tusa, Muisais timia núnisan tsupirnaktiniaiti. ¹³ Pai. Tura nú shuar tsupirnaku áiniayat ashí akupkamun umiiniatsui. Muisais timia nuna ajapén ikiuiniawai. Túmaitiat tsupirnaku tusa wakerutmainiawai. Áyatik atumin “Pai, niisha tsupimiakji” titiai tusar wakerutmainiawai. ¹⁴ Wikia, antsu, aya ii uuntri Jesukrístu krúsnum jakamunak wararsatniun enentáimjai. Tu enentáimkiun Kristu krúsnum jakamia áintsanak ju nunkanmaya ana nuna jaka áintsan páchiatsjai; tunaanum winia útsutkatin atsawai. ¹⁵ Krístunu ajasrikia tsupirnaktincha tsupirnakhaitkiursha mai ántrai antsu yamaram akiiniatin nekas péñkeraiti. ¹⁶ Ashí nekas Yus-shuaran, wi tájana nujai métek wekainia nuna, Yus shiir enentáimias yáinti tuke shiir pujustinian.

¹⁷ Yamaikia itiurchat najatawarain. Jesusa takatri takaakui asutiuawarma paant ayashruj chimikma írunui.

¹⁸ Yatsuru, ii uuntri Jesukrístu atumin shiir yainmakarti. Nuke atí.

Papru IPISIUNMAYĀ SHUARAN papí akuptukma

Ipisiunmayā Yus-shuaran Papru áatramiania nu

¹ Yus nuna wakerakui Jesukrístu akatramuitjai. Jesukrístu nekas enentáimtusum Yus-shuar ajasrum Ipisiunam pujar-mena nuna ju papin áatjarme. ² Yus ii Aparísha tura ii Uuntri Jesukrístusha waitnentramainia ásar imiatkinchanum shiir pujustinian yainmakarti.

Krístujai tsanínkiu asakrin Yus ti shiira nuna tsan̄katramji

³ Ii Uuntri Jesukrístu Apari Yus nekas shiir awajtustiniaiti. Iisha Krístujai tsanínkiu asar ii enentáin ashí nayaimpinmaya ana nujai warasminiaitji. Túmaitkiui Yus nu waratain ashí suramsaitji. ⁴ Krístujai uwemprar ti shiir tunaajainchu Niijjai pujusarat tusa Yus, ju nun̄ka atsaisha, anaitiamkamiaji. ⁵ Yámankamtaiksha incha ti anenmak Jesukrístu túrunamujai ni uchirí ajasat tusa wakerutmakmijai. ⁶ Ni aneamu Uchiríjjai tsanínkiu asakrin nekas ti anenmaji. Nu enentáimsar ti shiir awajsatniuitji. ⁷ Yus ti anenmakrin ni aneamu Uchirí numpé puarmatai, nu jakamujai ii tunaarin akikmatramak uwemtikrampraitji. ⁸ Tura ti anenmak ni enentáimtain tura nekatairíncha suramsamijai. ⁹ Nujai shiir enentáimturmak in uwemtikrampratniun wakerutmakmijai nuna, yaunchu nekaachman, yamá paant awajturmaji. ¹⁰ Ashí jú nun̄kanam írunna nunasha tura nayaimpiniam írunna nunasha Kristu ashí akupin ati tusa Yus tsan̄katkattawai. Nunasha Yus yaunchu enentáimturú asantai tsawant jeamtai ashí uminkíáttawai.

¹¹ Iisha Krístujai tsanínkiu asakrin Yus yaunchu achirmakmijai ashí Niiniu ana nuna tsan̄katramkatniun. Nunasha, ashí Nii túrana núnisan̄, aya Nii wakera asa túramiayi.

¹² Iikia Israer-shuar asar Kristu emka umirkakrin in imiá péñker túrutmamun nekaawar ashí shuar Yúsan ti shiir awajsamín áiniawai. ¹³ Núnisan̄ atumsha nekas uwempratín chicham antukrum Kristu nekas enentáimtusurme. Túrarum Kristu-shuar ajasakrumín Yus ni shiir Wakanín akuptuktaj timia nuna akupturmakmai. Nuna tura “nekas Wíi shuaraitrume” tawai. ¹⁴ Yamá Yusa Wakaní ii enentáin pujuruk tuke uwemtikramji. Tura takas umik nu tsawantai ashí tsan̄katramkattaji. Tura ii enentáin pujá asantai Yus

ukunam Niiijaisha ashí tsan̄katramkattaj nu paant nékaji. Maa, Yus ti pen̄ker asamtai Nin ashí ti shiir awajsarti.

Papru Yus-shuaran áujtusmiania nu

¹⁵ Átum ii Uuntri Jesukrístu nekas enentáimtamuncha tura ashí Yus-shuarjaj shiir awajnaiyamuncha antukjai. ¹⁶ Túran shiir enentáimkiun Yúsán áujkun tuke yúmin̄kiajai. ¹⁷ Ii Uuntri Jesukrístu Apari Yus ti shiir asamtai Nin áujeakun ni Wakan̄i ni nekatair̄in suramas ashí jintin̄tramawarti tusan seajai. Nujaj nuna nan̄kaamas Yus nekaattarme. ¹⁸ Tura enentáiminchā paant enentáimtikramprarti tusan seajai. Nujaj shiir túrutmataj tusa achirmakuitrum nu nekaattarme. Nu arantcha imiá shíira nu, Yus ni shuar̄in ashí tsan̄katkattana nusha nekaattarme. ¹⁹ Nu arantcha Yus umirkurin ti kakaram tujin̄cha asa in yáinmaj nu nekaattarme. Tura nu kakaram ti kakaram asamtai ²⁰ nujaj Krístun jakamunmaya iniantkimiaiyi. Tura nayaimpiniam jukí ni untsuurin̄i akupin pujutainium apuj̄samiayi. ²¹ Tura ashí ju nun̄kanam akupin ainia nújaisha tura ukunam nun̄ka átatna nui akupin áminia nújaisha tura ashí akupin ainia nújaisha tura ashí naari nékamu ainia nujajsha Yus Krístun ashí nan̄kaamas akupin najanamiayi. ²² Tura ashí írunna nu, Krístun umirkartin áiniawai. Tura Yuska Krístunak ashí Yus-shuara Akupniur̄i awajsamiayi. Túramtai Kristu ni shuari muuké áintsan̄kete. ²³ Tura ashí nun̄kanam Yus-shuar ainia nu Kristu ayashí najanainiawai. Tura Kristu ashí ni ayash̄in pimiutkaiti tura nu arantcha ashí írunna nunasha pimiutkaiti.

2

Yus anenma asa uwemtikramji

¹ Átum yajauch túrakrum tunaanum tuke wekaakrum Yúsnumiā kanakin asarum jákauyarme. ² Nu tunaanum jú nun̄kanam pujuinia nujaj métek tuke wekainiuyarme. Túrarum uunt iwianchi wakeramur̄i umirniuyarme. Uunt iwianch ashí Yúsán umirainiatsna nuna akatenawai. ³ Ashí iisha núnisrik yaunchu nu shuarjaj métek ii ayashí wakerakmu umirniuyaji. Tura íi enentái wakeramusha umirniuyaji. Tuma asar tura tunaajaj akiinia asar chíkich shuarjaj métek ti kajernakmiaji. ⁴ Antsu Yus ti waitnen̄kartin asa in ti anenmamiaji. ⁵ Tuma asa ii tunaanum tuke jaka pujarnin̄ Krístujaj métek iwiaaku awajtamsamiaji. Aya ti anen̄kartin asa uwemtikrampramiaji. ⁶ Tura Krístujaj métek iniantamkimiaji. Nuyá Jesukrístujaj métek, akupin pujutainium yamaisha apuj̄tamas tuke nupetkatniun tsan̄katramkaitji. ⁷ Nujaj ni ti anen̄kratmar̄in̄cha tura Kristu túrunamujaj waitnentrampmuncha tuke iniaktusmin̄ átatui.

⁸ Jesukrístu nekas enentáimta asakrumin Yus waitnentramar uwemtikrampraiti. Juka átumkeka túrunachuitrume. Antsu Yуска Nínki kuítchajai suramsaitrume. ⁹ Shuar ni takatríjiai uwempratniuitkiunka nan̄kaamantu enentáimsainti winia kakarmarjai uwemprajai tusa. Nu enentáimsatniuka atsutí tusa Yуска átumka takaatsrumniñ uwempratniun suramsamiarme. ¹⁰ Yus najanamuitji. Kame Jesukrístujai tsaníakrin yamaram iwiaakman suramas tuke péñker túratniun najatmamji. Yáunchuk nuna enentáimturmasmijai.

Krístujai tsaniñkiu asar shiir nawamnaikiar pujaji

¹¹ Nuik ámarum nu enentáimpratarum. Ashí Israer-shuar ni ayashín tsupirnaku ásar ashí Israer-shuarchan, tsupirnakcha áiniakui, penké Yúsnachua núnis enentáimtuiniawai. Tura atumsha Israer-shuarcha asakrumin “tsupirnakcha” turamniuyarme. ¹² Nuik Krísturtinchauyarme. Israer-shuarcha asarum ashí ni túrutairísha tura ashí Yus nin tsan̄katkarmasha nekaachuyarme. Tura jú nun̄kanmaya asarum nekas Yusa nu enentáimtichuyarme tura shiir pujustin nan̄kamsarum enentáimpramarme. ¹³ Antsu yamaikia Krístujai tsaniñkiu asarum, yaunchu Yusaíya yajá pujuwitiatrum, yamaikia Kristu numpé puármatai ni jarutramkamujai tántaitrume. ¹⁴ Israer-shuarjai Israer-shuarchajai nemasmanaikiar ajapén péen̄kramu ámijai. Tura Kristu nuna sáaki nawamnaintikramkamijai. Tura chikichik shuar najatmamijai. ¹⁵ Nuik aya Israer-shuar Muisais akupkamu untsurí armia nuna umirkatin ániak nujai chikich shuarjai nemasmanainiarmiayi. Tura Kristu jaka nu akupkamun ántar awajas chikichik shuar yamaram awajtamsamijai. ¹⁶ Núnisan̄ ámiayi. Kristu krúsnum jaka nemasjai mai apattamak chikichik awajtamas Yusjaisha nawamnaintikramkamijai.

¹⁷ Kristu taa nawamnaikiatniun chichaman Israer-shuaran ujakmiayi. Tura nu chichamnak atumin Yus nékachuyarmena nunasha ujaktinian akupkamiayi. ¹⁸ Yamaikia Israer-shuartisha tura Israer-shuarchasha mai metek Kristu túrunamujai tura Yusa Wakan̄ takaku asar Yusaj̄ jeatniuitji. ¹⁹ Tuma asamtai yamaikia chikich shuarchaitrume, antsu ashí Yus-shuarjai métek ajasuitrume. Nekas Yusa shuarin̄trume.

²⁰ Átum uunt jea jeamma núnisaitrume. Uunt jea jeamtin, emka kaya apujtuktiniaiti jea ti wewe atí tusa. Núnisan̄ yaunchu Yúsnan etserniusha tura Kristu akatramurísha Yus-Chichaman etserainiak imiá nekas enentáimtustinia nuna apujtukarmiayi. Tura ashí nujai nan̄kaamas Jesukrístu enentáimtustiniaiti. ²¹ Jea apujtukmarí Kristu asamtai Nii ti

penker ekeniar jea jeamnaki wéawai. Tura ii Uuntri Krístujai Yusa Jee ti shiir átatui. ²² Núnisrumek atumsha Krístujai tsaninkiu asarum átum ashí Yus-shuarjai Yusa Jeeya áintsan ajasuitrume. Tura Yusa Wakaní ashí Yus-shuara enentáin pujú asamtai nekas Yusa Jeente.

3

Papru Israer-shuarchanum Yus-chichaman etserkatniuya nu

¹ Nu asamtai atumin Israer-shuarchatirmin yáintaj tusan Jesukrístunu étserkun sepunam pujajai. ² Yus anentak Yus-Chichaman atumin etserkatniun akatar akuptukuiti. Nu nékatsrumek. ³ Yus nuna túrutak yaunchu nekaachmancha paant awajtursamiayi. Núnaka ishichik áatraitjarne. ⁴ Nu áujсарum Krístunu yaunchu nekaachman yamaikia paant nékajna nu nekaattarme. ⁵ Nú chichaman yáunchusha chikichkinkesha ujankachmiayi. Túrasha yamaikia Yusa Wakaní Kristu akatramuríncha etserniuríncha nu chichaman paant awajtusarai. ⁶ Nu chicham júiiti: Uwempratin chichaman umirkar Israer-shuarcha Israer-shuarjai métek Krístujai tsaninkiaru ásar chikichik shuar ajasartatui. Tura nu arantcha Yus ni shuarín ashí shíiran tsankatkatniun anajmatrama nuí métek pachiinkiatatui. ⁷ Yus ni kakarmarijiai winia yáintiuk tura ti anentu asa nu uwempratin chichaman etserkat tusa akatturmiayi. ⁸ Ashí Yus-shuarjai nankaamas wí penkercha aín Israer-shuarchanum shiir chichaman etserkat tusa Yus tsankatrukmiayi. Krístujainkia kuitjai nankaamas penker, enentáimtustin jeatsjinia nu, takakji. Nusha ti shiir chichamaiti. ⁹ Yuska, ashí najana nu, nu enentáimmian yáunchusha etsertsuk yamaikia ashí shuar nu chichaman nekaawarat tusa winia akatturmiayi. ¹⁰ Yamaikia ashí nayaimpiniam pujuinia nuka Yus ni shuariín túrunamun íisar Yuska imiá neka asa ashí enentáimniua nuna paant nékainiawai. ¹¹ Yus júnis túratniun yáunchuk enentáimpramiayi. Tura ii Uuntri Jesukrístujai mash uminkiamiayi. ¹² Tura Krístujai Yusai yúpichuch jeaji. Tura Nin nekas enentáimtusar sapijmiatsuk Níin tantamniaitji. ¹³ Tuma asamtai tájarne, atumin yáintaj tusan sepunam pujakui kúntuts enentáimprairap. Antsu nujai Yus atumin ti shiir awajtamkurmin átum warasuk tusan wakerajrume.

Kristu ti anenkratniuiti

¹⁴ Nu asamtai ii Uuntri Jesukrístu Aparín tikishmatran áujtajrume. ¹⁵ Ashí nayaimpinmasha tura nunkasha Yus-shuar ájinia nu nekas ni shuari áiniaji. ¹⁶ Yus ti kakaram

asa ni Wakanjijai atumí enentáin pujureak ashí ni kakarmariyan atumin suramsarat tusan áujtajrume. ¹⁷ Yus nekas enentáimtakrumin Kristu atumí enentáin pujusat tusan áujtajrume. Tuke yapajítsuk anenkratin átarum tusan áujtajrume. ¹⁸ Túrakrum ashí Yus-shuarjai Kristu anenkrattairi nekaattarme. Imiá uunt asa nan̄kantsuk tuke amuukachminiati. ¹⁹ Nu anenkrattai ashí takamtsuk nekaachmin aīn nekaatarum tusan áujtajrume. Nujai Yus takamtsuk pimiutramkattarme.

²⁰ Nekas Yus shiir awajnasti. Ni ti kakaram asa ii seajnia nuna nan̄kaamas tura enentáimprachminia nunasha nan̄kaamas iin pujurtamuk ashí túramniati. ²¹ Ashí Yus-shuarjaisha tura Krístujaisha Yusa péñkeri tuke paant wantinin atí. Yus tuke iniaitsuk shiir awajnasti. Núnisañ atí.

4

Yusa Wakanjijai tsanin̄kiar pujakur túratin

¹ Atumsha ni shuari ajastin Yus achikma asarum péñker wekasatarum tájarme. Ii Úuntriniun étserkun sepunam pujakun seajrume. ² Nekasmiancha ajasrum aneniakrum kat-sunnairatarum. ³ Yusa Wakanj chikichik shuar awajtamkurmin shiir awajnaisarum pujustarum. ⁴ Yusa Wakaninkia chikichkiiti. Tura ashí métek Yus achikma asar métek Nijjai shiir pujustin enentáimji. Iisha Kristu ayashí ayashímkia asar chikichik ayashkiitji. ⁵ Ii Uuntri chikichkiiti. Niñki nekas enentáimtusar métek imiantiniaitji. ⁶ Chikichkiiti Yus, ashí Yus-shuarti ii Aparínti. Ashí akuptamniuitji. Ashí ni shuariin pujak ii enentáin pujurtamji. Ti nekas ashí mash, Israer-shuartisha Israer-shuarchasha, imiá chikichik ajasuitji.

⁷ Tura chikichik chikichik niisháa shiir takastinian suramsaitji. Tura Kristu wakerimia núnisañ suramsaji. ⁸ Nu asamtai Yus-Papiniumsha tawai:

“Achikman jukí nayaimpiniam wakamiayi. Tura shuáran shíiran susamiayi.”

Tu áarmaiti.

⁹ Tura “wakamiayi” tana nu ¿warintiua? Kristu nayaimpiniam pujá asa yakí wákan̄ka emka tárashtinkiait. Nekas nun̄ká taramiayi. ¹⁰ Niñki ataksha nekas nayaimpiniam wakamiayi. Nuna tura asa ashí ni shuarin pimiutkarmiayi. ¹¹ Tura nujai chikichan akatramun awajsamiayi. Chikichnasha Yúsna etserniun awajsamiayi. Chikichnasha uwempratin chichaman etserniun awajsamiayi. Chikichnasha Yus-shuara wáinnun awajsamiayi. Tura chikichnasha unuikiartinian awajsamiayi. ¹² Túramtai ashí Yus-shuar ni takatrijjai

yáiniaikiar ti penker shuar ajainiakui Kristu ayashi takamtsuk katsuarartatui. ¹³ Nujai Yus nekas enentáimtamunam Yusa Uchiri ashí métekrak penker nekaattaji. Nu túrakur katsukir Krístujai métek penker ajastatji. ¹⁴ Tura uchía áintsar áhattaji. Úchikia ashí yamaram chichaman antukar wari yapajiniawai. Tura anankartinia chichamen antukar waaku áiniawai. Kame nu anankartin shuar ti paant chichayatan ni shiir chichamejai anankatniun pujurenawai. ¹⁵ Antsu nekas aneniakur nekas chicham ujanaiktiniaitji. Túrar Krístujai tsaninkiar tuke tsakakir ashí penker túratniujai Niiijai métek ajastatji. Krístuka ashí ni shuari muuké áintsankete. ¹⁶ Tuma asa ni ayashin wáinkui ashí nuna muchitmari penker yáiniaikiar ashí ni túratniurin shiir takasartatui. Nujai nu ayashnium muchitmari chíchich chíchich penker takainiak métekrak shiir tsakartatui. Tura anenainiakui nu ayashsha penker úntmartatui.

Krístujai tsaninkiu asar yamaram iwiaakmanum wekaaji

¹⁷ Ii Uuntri Kristu íimmianum juna akatjarne: Chíchich aents Yúsan nékachu ásar ántar ni enentáimmiajain wekainia núnisrum wekasairap. ¹⁸ Ni enentáin kusuru ániak Yusna nuna nekaatniun wakeruiniatsui. Tuma ásar shiir wekasatniun, Yus amaana nuna, nékainiatsui. ¹⁹ Nu arantcha, ni túramurijjai natsamtichu ásar ti yajauchiniam surumakar ashí tunaan wararainiak túrin áiniawai. ²⁰ Antsu átumka núnisrum enentáimtustin unuimiarchamarme. ²¹ Nekas Nii anturkaitkiurmeka tura Jesus nekas tama Kristu unuiniarmaitkiurmeka Nin shiir enentáimtustin unuimiarmarme. ²² Yaunchu enentáimtairmeka ayash wakeramu anankramin ainia nujai piaku asa imiá yajauchiiti. Nu enentáimtairmesha yaunchu túrutairmesha ajapa iniaisatarum. ²³ Túrarum penker enentáimsarum wakannium yapajiátarum. ²⁴ Tura yamaram enentáimtairam emetatarum. Nuka Yusjai métek najanamu asa nekas penker tura shiira nuna tuke túriniaiti.

²⁵ Nu asantai chikichik ayashi muchitmari asarum wáitrutsuk nekas chicham chicharnaisatarum.

²⁶ Kajeakrum tunáa túrawairap. Tura nu kajekmasha tsawant takamtsuk áchatniuiti. ²⁷ Uunt iwianch yajauch awaj-tamsatin tsankatkaip.

²⁸ Kasasha kasamtsuk kakaram takakmasti. Tura ni uwejejai penker takaak atsumainia nú shuarnasha susati.

²⁹ Muijmiais chicham chichasairap. Antsu chichastin akui penker chicham, chíchich shuar penker awajsamnia nu chichastarum. Anturtuinia nuna yáintaj tusarum nu chicham ujaktarum. ³⁰ Yusa Shiir Wakaní kúntuts awajsairap. Warí, Yúsnaiti tusa pujurtamji. Tura pujurtamuk takamtsuk uwemtikramprattaji.

³¹ Ashí yajauch ana nuyá kanaktiarum. Nakitratniusha, kajernaikiatniusha, tura kakantrar charáa charáa ajatniusha, katsekmaktincha, tsanumpratniusha mash atsutí. ³² Antsu shiir awajkartin ajasrum waitnennairarum, Kristu jakamujai Yus atumí tunaarín tsan̄kurtampra nútiksarmek tsan̄kurnairatarum.

5

Yus-shuar túratin

¹ Nekas Yusa Uchirí aneamu asarum Nii tura núnis túratin wakeruktarum. ² Kristu in anenmaj núnisrum anenaitiarum. Kame ii tunaarín akikmaktaj tusa jákatniunam surumakmiayi. Túramtai Yus shiir enentáimtusmiayi.

³ Yusna asarum tsanirmatniusha yajauch túratniusha tura jú nun̄kanmayan̄ ikiaun̄katniusha ishichkisha enentáimtuschatniuitrume. ⁴ Natsanmaincha, ántar chichamsha yainmakchamnia asamtai chichaschatniuitrume. Antsu Yus shiir yum̄nsatniuiti. ⁵ Shuar chíkich nuwajai tsanirmakka tura ashí yajauchin wakerakka tura jú nun̄kanmayan̄ ikiaun̄katniun wakerakka Yusai Kristu akupea nui pen̄ké pachiinkiachminiati. Kame ju nun̄kanmayan̄ ikiaun̄katin ántar-yus tikishmatratniua nujai métekete. ⁶ Nu túramniati tusar ántar chichamjai anañkramacharti. Warí, nuna túruiniakui Yúsan umirainiachun Yus ti asutiáwartatui. ⁷ Tuma asamtai nu shuar pen̄ké pachischatniuitrume.

⁸ Yáunchuka atumsha kiritniunam wekainiuyarme. Tura yamaikia Krístujai tsaniñkiu asarum pen̄ker tsáapninium wekaarme. Shuar tsáapninium wekainia nujai métek wekasatarum. ⁹ Tsáapninium wekainiaka shiir awajkartincha tura nekas chichamtincha tura pen̄ker túrin áiniawai. ¹⁰ Ii Uuntri Kristu wakeramu nekaatin wakeruktarum. ¹¹ Kiritniunam wekainia nu túramu pachisairap. Antsu nu shuar tsáapninium en̄keatarum. ¹² Ni uuk túruinia nu áujmatsatin natsanmainiati. ¹³ Tura ashí tsáapninium itiamu ashí paant ajawai. Tsáapnikia ashí paant awajeatsuk. ¹⁴ Nu asamtai Yus-Papinium tawai:

“Kanáruitme nu shintiártá. Jakamunmaya nantáktiá. Tura Kristu tsáapin awajturmastatui.”

Tu áarmaiti.

¹⁵ Nu asamtai átum túramu ímiastarum. Nékachu áintsarum pujusairap. Antsu pen̄ker enentáimprarum wekasatarum. ¹⁶ Pen̄ker túratin tsawant wasúrkaíp. Tunáa ti pampaatsuk. ¹⁷ Enentáincha áirap. Ii Uuntri Kristu warinia wakera nu

enentáimtustarum. ¹⁸ Nampekairap. Nampeakmeka aya ya-
jauch ajame. Antsu Yusa Wakaní winia enentáirui takamt-
suk pujurtusti, tu enentáimsatarum. ¹⁹ Túrarum Yus shiir
enentáimtakrum Yus-kanta kantamkirum shiir áujnaisatarum.
²⁰ Ii Uuntri Jesukrístu náarijjai ashí irunna nu Yus Apa tuke
yuminsatarum.

Yus-shuar túratin

²¹ Yus-shuar asarum nuámtak umirnaikiatarum. Túrakrum
Kristu shiir awajsattarme.

²² Núwaka Krístun umirna núnisan ni áishrincha umirkat-
niuiti. ²³ Kristu ni shuarin akupeana núnisan áishmansha
ni nuwen akupkatniuiti. Kristu ni shuarin ayashimiak ni
muuké áintsankete. Tura nin uwemtikiartiniaiti. ²⁴ Nu asam-
tai Yus-shuar Krístun umirin áiniawai. Núnisan ashí ana nujai
nuwa ni áishrin umirkatniuiti.

²⁵ Kristu ni shuarin ti aneak nin yáintaj tusa jákatniun
surumakmiayi. Núnisrumek áishmantirmesha atumi nuwé
aneatniuitrume. ²⁶ Kristu ashí ni shuarin ni Chichamejai tura
entsajai nijjar ní shuar péñker árat tusa jakamiayi. ²⁷ Nujai
ashí ni shuarin tunaarinniuchu tura yajauch máatrachu antsu
ti péñker shiir awajas Niini ejetaj tusa túramiayi. ²⁸ Núnisan
áishman ni ayashín anea núnisan ni nuwen aneatniuiti. Shuar
ni nuwen aneak nujai ni ayashíncha aneawai. ²⁹ ¿Yaki ni
ayashín nakitniuit? Antsu péñker wáiniuk áyureatsuk. Kristu
núnisan ni shuarin wainiui ³⁰ ni ayashí asantai. Kame
ni ayashí muchitmarintji. ³¹ “Tuma asantai áishman ni
aparíncha nukuríncha ikiukin ni nuwejai tsaniñkiar chi-
kichik ayashtin ajainiawai.” Tu áarmaiti. ³² Nusha Kristu
ni shuarijjai tsaniñmán tawai. Nuka yaunchu nekaachma
yamaikia nekanaiti, tura ti enentáimturtniiaiti. ³³ Tura núnisan
ashí áishmantiram atumí nuwé atumí ayashía nútiksarmek
aneatniuitrume. Nuwasha ni áishrin umirkatniuiti.

6

¹ Uchitirmesha, Yus-shuar asarum apasha nukusha
umirkatarum. Nuka ti péñkeraiti. ² Emka akupkamu
“umirkam nekas shiir átatme” tana nu júiti:

“Apasha nukusha umirkata.

³ Túrakmeka shiir átatme tura jú nunkanam untsurí tsawant
pujustatme” tawai.

⁴ Atumsha, uchirtintirmesha, atumí uchirí ánttarum aka-
jkairap. Antsu Yúsán shiir enentáimtusarat tusarum ti péñker
jintinkirum tsakatmartarum.

⁵ Takakmautirmesha, atumí uuntri ju nunkanam pu-
juinia nu ti péñker umirkatarum. Kristu umirkatniua

áintsarum wishiktsuk ashamakrum tuke enentáijiai takarsatarum. ⁶ Aya wáitmakui shiir enentáimtursat tusarum pénker takarsairap. Antsu Kristu takarniuria núnisrum ashí ame enentáimjai Yus wakera nu túratarum. ⁷ Aya shuárnak yayá nútiksarum takasairap. Antsu ii Uuntri Kristu takarsatniua nútiksarmek ásump enentáijiai takastarum. ⁸ Kame chíkich chíkich ni takasmajai métek akinkiertatui. Ii Uuntri Kristu nu shuar pénker túramujai métek akiktatui.

⁹ Tura atumsha, iniamniutirmesha, atumí takartamu wakaní mántutsuk shiir enentáijiai iniartarum. Nekas enentáimpratarum. Ii Uuntri nayaimpiniam pujana nuna niisha atumjai métek umirainiawai. Tura Yuska ashí shuaran akantsuk métek iyawai.

Yusa kakarmarijiai íwianch taritratatum

¹⁰ Wátsek, yatsuru, ii Uuntri Yusjai tsanínkiu asarum ni ti kakarmarijiai iwianchjai máanaiktin kakaram ajastarum. ¹¹ Apach máanainiak jiru entsarua núnisrum Yus susamujai entsartarum. Nujai íwianch nupettamkui tariartatme. ¹² Kame Yusna takáa asar penké áentsjai máaniatsji antsu yajauch wakan kakaram írunna nujai máaniaji. Niisha ju nunkanam, kiritniunma áintsan, tunaanum wekainia nuna akupin áiniawai. ¹³ Jiru entsartinia áintsarum Yus súramna nu entsartarum. Nu entsarmajai itiurchat tsawant taritra nupetkarum tuke tariarum wajastatrum. ¹⁴ Wats, nekas tariartin nekas chicham emenmamatarum. Tura pénker túratniujai jatairum ajaktarum. ¹⁵ Suntar iwiarnak sapatan aweá áintsarum Yusa shiir chichame etserkatin iwiarnartarum. ¹⁶ Nuyasha ashí nankaamas, tantar takustinia áintsan, Yus tuke nekas enentáimtustarum. Nujai íwianch eketrámkamusha uwemturtatme. ¹⁷ Múukem ajaktincha Kristu uwemtikrampramu múukmjín etsenkruktatum. Tura Yus-Chicham puniáa áintsan achiktatum. Nuka nekas Yusa Wakaní puniarínti. ¹⁸ Yusa Wakaníjiai Yus áujeakrum tuke seatniuitrum. Tura tuke aneara pujustarum wake mesetsuk, tura ashí Yus-shuar ainia nusha Yus áujtustarum. ¹⁹ Núnisan winiasha áujtursatarum. Wi sepunam pujayatan Yus winia chichastinian surusat tusarum seatritiarum. Tura wi chichaakun sapijmiatsuk Shiir-chichaman yaunchu nekaachma paant awajsat tusarum áujtursatarum. ²⁰ Yus nu chichaman etserkatniun akuptukuiti. Nuna túrakun sepunam pujajai. Sapijmiatsuk etserkat tusarum Yus áujtursatarum.

Amikmaamu

²¹ Ii aneamu yachi, Tíkikiu, ashí wi túramun ujatmaktatui. Niisha Ii Uuntri Krístunu etserkatniun ti penker yáinniuiti.

²² Tuma asamtai ii jui pujamun ujatmak ikiantamprarat tusan akuptajrume.

²³ Yus Apasha tura ii Uuntri Jesukristusha ashí Yushuartirmin anenmak shiir imiatkinchanum pujustinian suramsarti. Tura Nin tuke nekas enentáimtustinian suramsarti.

²⁴ Ashí ii Uuntri Jesukristun tuke enentáijiai aneana nuna Yus shiir yáintí.

Nuke atí.

Papru JIRIPIUSNUMIA SHUARAN papí akuptukma

Papru sepunam pujus Jiripiusnumia Yus-shuaran áatramiania nu

¹ Wi Papru Timiutéujai Jesuskrístu takarín asar ashí Yus-shuar Jiripius péprunam pujarmena nu jü papí akuptaji. Yus-shuaran wainin árumna nusha tura Yus-shuaran yain árumna nusha ashí Yus-shuarsha nunisan Yusna asarum tura Jesukrístujai tsanínkiu asakrumin jü papí áateajrume. ² Yus ii Aparísha Jesukrístu ii Úuntrisha atumin waitnentramainia ásar imiatkinchanum tuke shiir pujustinian yainmakarti.

Papru Yus-shuaran Yúsan áujtawai

³ Ashí tsawant atumin enentáimtakun Yúsan tuke shiir yúmínkijai. ⁴ Yúsan áujeaknasha ti warasan seatjarme. ⁵ Kame iikia yámankamtaiknumia Yus-Chicham métek yáiniáikiar iniaitsuk takasuitji. ⁶ Yus atumín ti péñker awajsatniun nan̄kama asa núnisan Jesuskrístu táatsain̄ tuke shiir awájtámki nekas péñker najatmattarme. Nuka ti nekasaiti. ⁷ Atumin ashí ti aneajrume. Kame wi sepunam pujakun Yus-Chichaman akasmatkun tura Yus-shuar kakararti tusan takaakuí átum yáintiarme. Yus ti anen̄kartin̄ asa nu túratniun mai metek tsan̄katrámkaitji. Tuma asamtai atumin júnisan enentáimtustin ti pen̄keraiti. ⁸ Jesukrístu anen̄krattairijiai wi atumin aneamun Yussha paant nékarui. ⁹ Yúsan áujeakun anearmena nú nan̄kaamas aneak tusan seatjarme. Tura nújaisha ti neka ajasrum ¹⁰ ashí péñkera nu achikiuk tusan Yúsan áujtajrume. Atumin nu túrunamtain̄kia yamaisha tunáajain̄chu pujustatrume tura Kristu támatat sumamashtatrume. ¹¹ Núnisan Jesukrístu kakarmarijiai ashí péñker túrin̄ áatrume. Tura nújai ashí shuar Yúsan ti shiir enentáimturartatui.

Wi jü nun̄kanam aya Krístunak enentáimtakun pujajai

¹² Winin túrunamu itiurchat ain̄ nujai uwempratin chicham nekas pampaawai. Nu nekaatarum tusan wakerajrume, yat-suru. ¹³ Iis, uunt akupniu suntarisha tura ashí shuarsha wi Krístunun etseru asan sepunam pujamun paant nékainiawai. ¹⁴ Ti untsurí Yus-shuar wi sepunam en̄ketman nekaawar ii Uuntri Jesusan nekas enentáimtusar sapijmiatsuk Yus-Chichaman etserainiawai.

¹⁵ Kame shuar awai winia kajertuiniak tura nan̄kaamantu enentáimtumainiak Krístun páchiniawai. Antsu chíkich shuarka nekas enentáijjaj Krístun etserainiawai. ¹⁶ Yajauch shuarka Krístun shiir enentáimtutsuk antsu ashí shuar ní chichamenak anturkar wíi shuar ajasarat tusar etserainiawai. Túruiniak wisha sepunam pujakui nu arant itit awajtustinian wakerutainiawai. ¹⁷ Antsu péñker shuar Krístun nekas aneenak etserainiawai. Nu uwempratin chicham imiá péñkeraiti wi titin asamtai winiasha anentainiak shiir etserainiawai. ¹⁸ Wats, mai metek chíkich yajauch enentáijjaj tura chíkich shiir enentáijjaj Krístun etserainiakui shiir enentáimjai.

Tura nuna nan̄kaamas shiir enentáimprattajai. ¹⁹ Kame Yus áujtursa asakrumin tura Jesukrístu Wakanísha yaintiu asamtai ti péñker uwempran jiinkittiajai. ²⁰ Nekas juna wakerajai: Natsamtsuk uunt akupniun Jesukrístun paant ujakartinian wakerajai. Nujaj winí Krístu kakarmari pujamu ti paant nekanattawai. Mántuiniakuisha tura mántuiniachkuisha ashamatsjai. Aya Krístu kakarmari winí nan̄kaamas nekaawarat tusan wakerajai. ²¹ Wíjjaiñkia ju nun̄kanam iwiaaku pujakun aya Krístunak enentáimtakun pujajai. Tura jákatniusha jui pujajnia nuna nan̄kaamas péñkeraiti. ²² Ju nun̄kanam pujakun Uunt Jesusnan takasminiaitjai. Nu asamtai tunatsuk achiktaj nékatsjai. ²³ Wíjjaiñkia itiurchataiti mai achiktin. Jákatniuncha wakerajai Krístujaj tsaniñkian pujustaj tusan. Wíjjaiñkia nu imiá péñkeraiti. ²⁴ Túrasha atumin yáintaj tusan tuke ju nun̄kanam iwiaaku pujusmini-aitjai. ²⁵ Kame tuke pujustajai nékajai. Núnisnak atumjai pujakun Yus nekas enentáimtakrum nan̄kaamas waraakrum tuke katsuaruk tusan yáintatjarne. ²⁶ Nu asamtai wi atumjai pujakui Jesukrístu yumínsarum shiir warastatrume.

²⁷ Krístu chichame ti péñker asamtai atumsha aya péñkera nuke túratarum. Wi atumjai pujaknasha tura yajá pujaknasha átum ti shiir túrarmena nuna antuktinian wakerajai. Ashí shuar uwempratin chichaman nekaawar umirkarat tusarum chikichik enentáijjaj kakaram ajastarum. ²⁸ Atumí nemasrisha ishichkisha sapijmiamtikramkarajñ. Nu túrakrumin nu shuar emesratniunam weena nusha tura átum uwempratinusha paant nekanattawai. Núnisan atí tusa Yus túrait. ²⁹ Krístunu asarum Nii nekas enentáimtustinniasha tura Niiniu asarum wáitsatniusha Yus anenma asa tsan̄katramkaitrume. ³⁰ Yus-Chicham pamparat tusar maimetek ti takáa asar wáitiaji. Wi nuik ti takasmaj nu nekamarme. Tura yamá tuke takaaj nusha ántarme.

2

Kristu péejchach ajasmatai Yus ti uunt awajsamiayi

¹ Kristu ikiantamkuisha, ni anenkrattairi atsantamkuisha, ni Wakanj atumjai pujakuisha, anenkratniuitkiurmesha, waitnenkratniuitkiurmesha ² waramtikrustarum. Métekrak takastarum. Mai metek anenaitiarum. Yusa Wakanj atumi enentain pujá asamtai chikichik enentaik enentaimsatarum.

³ Átum wakeramuk túrawairap. Nankaamantu ajastaj tírap. Antsu péejchach ajasrum chíkich shuar atumjai nankaamas penker enentaimtusta. ⁴ Aya níniak penker átatna nunak shuar túrashti. Antsu chíkich shuar yáinminia nuna túrati.

⁵ Kristu Jesus enentaímpromia núnisrum enentaímpromtarum.

⁶ Niisha Yúsaitiat ju nunkanam winiak tuke Yusjai métek átinian emettsuk ⁷⁻⁸ antsu nuna ikuak aents ajas péejchach asa ashí aentsu takarin ajasmiai. Tura aentsu ayashin ayashimiak tura Yúsán umireak jákatniuncha surimiakchamiayi. Maa, imiá tunaarinnia áintsan krúsnum natsanmainium jakamiayi. ⁹ Túramtai Yus nekas nankaamantu awajsamiayi. Ni náarincha ashí paant awajsamiayi. ¹⁰ Tuma asamtai ashí nayáimpiniam írúnna nusha, nunká írúnna nusha, tura iwiarsamusha Jesusa náarin antukar tikishmatrartatui. ¹¹ Tura ashí shuar Jesukristu ashí akupin ajasman paant nekaawartatui. Nújainkia Yus Apá kakarmarisha paant nekanattawai.

Yus-shuar kiritniunam keeák tsáapin awajeana áintsan áiniawai

¹²⁻¹³ Nu asamtai, aneamu yatsuru, wi atumjai pujaku umirtukmarmena nuna nankaamas yamaikia arant pujakuisha umirtuktarum. Iis, Yus atumi enentain takaak ni shiir wakeramu wakeruktinniasha tura umiktinniasha pujurtamprume. Nu asamtai atumsha kakaram ajastarum Yus ti penker awajtamsatniun wakera nu túrunati tusarum. Tura péejchach enentaímpromarum awajirminiaitjai tusarum aneara wekasatarum.

¹⁴ Ashí yajauch tunaitsuk tura jianaitsuk wekasatarum.

¹⁵ Túrakrum makuumatsuk tunaajainchu átrume. Antsu Yusa uchirí átrume. Ju nunkanmasha shuar imiá tunaan túrinjaisha máatrachu asarum kiritniunam ji keeá áintsan ketrum ¹⁶ iwiaaku pujustin chicham paant awajeakrum. Nújai Kristu támatat atumjin ántan takascha asan ti shiir wararsattajrume. ¹⁷ Winia takatrujai Yus-shuar ajasakrumin wi jákatniuitkiuncha nújaisha warasaintjai. Atumsha wi waraajna jui núnisrumek warastarum tusan wakerajrume. ¹⁸ Atumsha waraakrumin métek wararnaisatai.

Timiutéuncha Epaprutítiuncha Papru ujatkamiania nu

¹⁹ Ii Uuntri Jesus wakerakuĩkia Timiutéun írmainerat tusan ti warik akuptuktatjarme. Tura átum shiir pujamu ujateakui warastatjai. ²⁰ Kame Timiutéu wijiai métek enentáimna áinis chíkich shuar atsawai. Niisha átum shiir pujusuk tusa ti nekas enentáimturmarme. ²¹ Chíkichka Kristu wakeramun iniaisar ní wakeramunak páchiniawai. ²² Túrasha átumka Timiutéu tuke péñker túramu nékarme. Uchi ni aparíjjai takaana áinis Yusa shiir chichame etserkatniun yáintkiaiti. ²³ Winia itiurtukartiñ nuna nekaan Timiutéu írmainerat tusan akuptuktatjarme. ²⁴ Kame Kristu yáintkiui wíkisha wárik íimniaitjarme.

²⁵ Wi atsumaj nuna írsati tusarum Epaprutítu akup-turkamarme. Wijiai métek tsaniñ takasuiti. Tura métek wáitsaitji. Áunkesha akupkamnia enentáimjai. ²⁶ Nii jaawai taman átum antukman nekáa, írmaitniun ti wakerutmarme. ²⁷ Maa, nekas ti janiñkiamai. Túrasha Yus nin waitnen-tramai. Kame winiasha wi jui wáitiakun nii jakamtai nu arant ti kuntuts pujuschatniun waitnentrurmai. ²⁸ Tuma asamtai akuptuktinian wakerajrume. Tura atumsha ataksha wáinkiarum waraakrumin wisha ti kuntuts enentáimchakun akuptuktatjarme. ²⁹ Kristu yumiñsarum ti shiir warasrum wáinkiatarum. Chíkich shuar niijjai métek péñker Yus-shuar ainia nusha shiir enentáimtustarum. ³⁰ Kristu takatrñ takaak ti janiñkiamai. Átum yáintkiachminia nuna winia yáintkiataj tusa pujus janiñkiamai.

3

Kristu nekaatin ashí nankaamas péñkeraiti

¹ Ayu. Warastarum, yatsurtiram, ii Uuntri Kristu ti penker asamtai nuik áatramajrum nuna ataksha títiatjarme. Ataksha ujam yainmakminiaitkiuĩkia wíjjaiñkia itiurchatchaiti atak enentáimtikratin. ² Yajauch shuarjai aneartarum. Nu shuar Muisais timia núnis tuke yamaisha tsupirnaktiniaitrum tuiniawai. ³ Antsu iikia ayash tsupirnakmajai péñker átiniaitji tu enentáimtatsji. Iikia antsu ii wakaníjjai Yus shiir awajeaji tura Jesukristunu asar Niñki shiir wararji. Nu túrakur Muisais timia nu umintikia iitji. ⁴ Ju nunkanam írunka nujai waantu enentáimpramniaitkiuĩkia ashí shuarjai nankaamas wikia waantu enentáimtumaraintjai. ⁵⁻⁶ Israer-shuar asan Muisais timia núnisñ wi akiiniamtai uchu (8) tsawant nankaasmatai tsupirtukarmiaiyi. Israer-shuarum Pinjamín weeitjai. Winia aparsha nukursha mai Israer-shuar áiniakui wi imiá Israer-shuaraitjai. Wisha Paríséu tuinia núnisar Muisais akupkamun ti umirin asamtai

chíkichka winia sumamtikiatniun tujintrin ármiai. Tura Pariséu asan Kristu-shuarin ti kajerkan áintramjai. ⁷ Ashí nujainkia waantu enentáimtumauyajai. Antsu yamaikia Krístujainkia penké ántar áiniawai tajai. ⁸ Ashí enentáimpramnia ákuisha winia Úuntur Jesukrístu shiir enentáimtustin nekas pénkeraiti. Nu asamtai Krístunu ajakun wi takusmaj nu muijmiai ajasmatai núnaka iniaisamjai. ⁹ Nuna túran Niijjai tsaninkian pujajai. Tura akupkamu umirkatniujai pénker ajaschaitjai antsu Krístun enentáimtakui Yus “pénkeraitme” túrutui. ¹⁰ Tuma asamtai ashí nankaamas wakeraj nu júiti: Krístun pénker nekaan nekas enentáimtustinniasha tura ni iniantkimiu kakarman takustinniasha wakerajai. Tura Niijjai métek ajastinian wakerakun ni wáitkiamunam tsanintinniasha tura Nii jakamia núnisan jákatniuncha wakerajai. ¹¹ Túraknaka Krístujai métek jakamunmaya nantaktiaj tusan wakerajai.

Papru kakaram ajasmiayi Kristu wakeramun umiktinian

¹² Kame wakerukuitjia nuna mash umirkachuitjai. Krístujai métek nekas pénker shuar ajaschaitjai. Túrasha Kristu Jesus “nuj ejetajam” emka túrutkui, wisha nuj jeataj tusan kakaram ajasan pimpitsuk takaajai. ¹³ Yatsuru, wisha nuj jeajai tátsujai. Antsu yaunchu túrutain kajinmatkin kakaram ajasan Kristu wakeramunam jeatniun takaajai. ¹⁴ Tura nuna umikmatai nayaimpiniam Jesukrístujai tsaninkian shiir pujustinian Yus surustatui.

¹⁵ Ashí shuar Yusjai katsuaru ájina nu wi tájana núnis “jeachuitjai” tu enentáimpratniuitji. Tura “jeaitjai” enentáimkiurminkia Yus nunasha atak enentáimtikramprattarme. ¹⁶ Tura aneartarum. Naki pujutsuk jeajnia nujai métek umirkatin pimpitsuk takastiniaitji. ¹⁷ Yatsuru, wisha tura chikichcha wijjai métek pénker túrajnia nu wáinkuram atumsha núnisrumek túratarum. ¹⁸ Tura yajauch shuarsha írunui. Wi nuiksha ti ujakmajrume tura ataksha úutkun ujaajrume, nu shuar Kristu krúsnum jakamun mujjaiiniawai. ¹⁹ Tuma ásar emesratniunam akupnakartatui. Ni ayashí wakeramun, ni yusrja áintsan, tuke umirainiawai. Natsanmainian túruiniayat wararainiawai. Tura ju nunkanmayanak enentáimtuiniawai. ²⁰ Antsu iikia nayaimpinmaya shuar asar ii Uuntri Jesukrístu in uwemtikrampra asamtai nayaimpinmaya tatí tusar nákaji. ²¹ Nii taa, ii yajauch ayashin yapajia ni ayashijjai métek ti shiir awajsattawai. Ashí uunt akupin ajas nu kakarmajai túrutmattaji.

4

Krístujai tsanĩkia wekáa asarum warastarum

¹ Nu asamtai, aneamu yatsuru, ii Uuntri Krístujai tsanĩkiu asarum kakaram ajastarum. Maa, ti aneakun atumin enentáimtakun ti waraajai tura íistajrum tusan wakerajrume. Tawasap achikiar shiir enentaímsatniua núnisnak shiir enentáimtajrume.

² Ewautiancha tura Séntikíncha, ii Uuntri Kristu shuari ásar, mai metek enentáímsarat tusan seajai. ³ Amincha, winia ajírú, nu nuwá yáin̄kta tusan seajme. Niisha wi iwiaaku chichaman étsereakui wijjaj métek takasarmai. Tura Krimintisha tura chikichcha wijjaj métek takasarmai. Nuna náarĩn iwaaku átin̄nium Yus áatraiti.

⁴ Nu asamtai Uunt Jesusjai tsanĩkia pujá asarum warastarum. Ataksha “warastarum” tájarme. ⁵ Uunt Jesus tátin ishichik ajasai. Tuma asamtai tsan̄ka enentái takakrum nu paant nekanati.

⁶ Itiurchat enentáímsatin atumjai pen̄ké atsutí. Antsu tuke Yus áujkum ashí itiurchatrum ujakta. Atsumamuram Yus seata. Túram Yus yumĩnsata. ⁷ Nuĩkia atumí enentái an̄kant átinian, áentstikia pen̄ké nekaachminia nuna, Yus amastatui. Yus atumin an̄kant awajtamsa asa atumí enentáin tura atumí enentáímsamurĩncha yajauch wayawain̄ tusa shiir waitmak-tatrume Jesukrístujai tsanĩkiu asakrumin.

Ashí pen̄ker ana nu enentáímsatarum

⁸ Yamaisha yatsuru, jũchiniak títiatjai. Yus-shuarti enentáímsatniun chichastatjai yamaikia. Ashí nekas ana nu enentáímsatarum. Tura ashí anturkamnia ana nusha, naka chicham ana nusha enentáímsatarum. Tura yajauch chichamsha enentáímsairap. Tura antsu ashí shiir ana nusha, chíkich shuarnasha pen̄ker enentáímtusminia nusha, kame ashí pen̄ker ana nu enentáímsatarum. Nuyáša chíkich shiir anturkamnia ana nusha enentáímsatarum.

⁹ Wi unuiniarmajrumna nu umiktarum. Tura wi túramur íisurmena nu tura antukurmena nusha umiktarum. Túrakrumnĩkia Yuska an̄kant átinian amastaj tusa pujurtamsattarme.

Jiripiusnumiq Yus-shuar Páprun kuítian akuptukarmiania nu

¹⁰ Ii Uuntri Kristu anea asarum winiasha ataksha enentáímturu asakrumin ti waraajai. Kame kajinmatrukmi-arme tátsujai antsu kuítium atsakuí yáintkiatin tujinkiamarme.

¹¹ Tura kuítian atsumakun tátsujai. Antsu wi takakjana nujain̄ warastinian unuimiáruitjai. ¹² Kuítrinchati pujustinia nuna nékajai tura ti nukap takustinia nunasha nékajai.

Tsukamaknasha jéemarnasha, itiarar takustinniasha tura penké takutsuk pujustinniasha unuimiáruitjai. ¹³ Kristu ni kakarmarín surakui ashí túramniaitjai. ¹⁴ Tuma aín atumsha wi atsumamu akupturkarum ti péñker túramarme.

¹⁵ Jiripiusnumiá shuartiram, ju ti penker nékarme. Masetunia nunkanam Yus-Chichaman etserumtai aya atumek kuit akupturkamiarme. Wi etserkamujai atumí wakanín yáinma asamtai yumínsarum akupturkamiarme. ¹⁶ Atumek wi Tisarúnikia nunkanam atsumakun pujaisha kuit akupturkamiarme. ¹⁷ Aya kuit akupturkakrumin tu enentáimtsujai. Antsu nu kuit Yusai kawentramkaku tusan wakerajrume. ¹⁸ Epaprutítiujai akupturkamarum nujaiasha atsumamaj nuna nankaamas tiaruncha wáinkiajai. Akupturkamarum nusha ti kunkuin Yus susamua áinis ti shiir auyi. ¹⁹ Winia Yúsrusha ti péñkeran núkap takakui. Atumsha Jesukristunu ajasu asarum Yus seamniaitrume. Tura Yuska ti takakna nujai ashí atsumarmena nuna suramsattarme. ²⁰ Ii Aparí Yus tuke shiir atí. Nuke atí.

Amikmaamu

²¹ Winia náaruisha tura Jesukristu náarincha ashí Yus-shuarainia nu chícham ujatruktarum. Niisha shiir pujusarti. Wi írutramusha núnisan shiir pujusarti tusa akupturmainiawai. ²² Tura ashí akupin Sésarai pujuinia nuyá Yusna ajararuka tura chíkich Yus-shuarsha shiir pujusarti tusa chichaman akupturmainiawai.

²³ Ii Uuntri Jesukristu atumniasha ti shiir yainmakarti. Nuke atí.

Papru KURUSENMAYA SHUARAN papí akuptukma

Kurusenmaya Yus-shuaran Papru áatramiania nu

¹ Wi Pápruitjai. Yus wakerutak Jesukristunun etserkat tusa akatra akupkamuitjai. Wisha ii yachi Timiutéujai ² ju papí áarar nui Kuruse péprunam Kristu péñker umirkarum Yusna ajasuitrumna nu akuptaji. Yus ii Apari atumin wáitnentaimiturma asa yainmakarti imiatkinchanum tuke shiir pujustinian.

Papru Yus-shuaran Yúsan áujtusmianis nu

³ Iisha atumin Yus áujtakur ii Uuntri Jesukristu Apari Yus ashí tsawant yúmiñkiai. ⁴ Atumsha Jesukristu ti shiir enentáimtamusha tura ashí Yus-shuar aneamusha antukji. ⁵ Uwempratin chicham nekasa nu antukrum atumsha nayaimpiniam atumnian Yus ti shiir ikiusman wáinkiatatí tusarum nákarne. ⁶ Nu chicham ashí nunkanam pampaakui shuara enentáin nereá áinis nusháa ajasar yamaikia péñker túrin áiniawai. Núnisan atumíincha túrunaiti. Yus ti nekas anenkartiniaiti tu etserkamu ántakrumin nu chicham atumí enentáincha nerekmiai. ⁷ Nu chichaman Épapas ujatmakmarme. Niisha iijjai métek takasu asamtai ti aneamuiti. Atumniasha Kristu takatrín ti shiir takartamsaiti. ⁸ Niisha átum Yus-shuar asarum mai anenai ajamun ujatmakmaji.

⁹ Iisha nu antukar Yus ashí tsawant áujtajrume. Yus ni wak-eramun ti paant nekaprutnawarat tusar seaji. Ashí Yúsnan ni enentáimtai*riijai* ashí Níiniun paant nekaatniun Yus jintin-tramat tusar seaji. ¹⁰ Atumsha Krístunu ainia núnisrum péñker túrutak tusar seaji. Tura ashí ni wakerana nu umíakrum ashí péñker ana nu, nerektinia áintsarmek, túrattarme. Núnis túrarum Yus unuimiati wéakrum Nin ti péñker nekaak tusar seaji. ¹¹ Yus ti kakaram asa ikiantamprat tusar seaji. Nujai ashí itiurchat ákuisha páchitsuk ti shiir warasrum katsun-trattarme. ¹² Yus ni shuarin tsáapninia nui ashí péñkeran susattawai. Tura incha nui pachiinkiatniun tsankatramka asakrin Yus Apa yuminsamnaitrume. ¹³ Yus iwianchin nu-petak íwianch akupeana nú kiritniunmaya uwemtikramar ni aneamu Uchiri akupeana nui wearmakmiai. ¹⁴ Ni Uchiri krúsnum jaka ii tunaarín nijiar tsankurtamar uwemtikram-pramiaji.

Kristu jakamujai Yusjai nawamnaikiar shiir pujustin

¹⁵ Yus wáinkiachminiaitiat ni Uchirí akiiniamai tura ayashimkiamiayi. Túmaitiat ashí najanamua nuna yaunchu pujú asa ashí akupniuiti. ¹⁶ Nijijai Yus ashí nayaimpiniam írúnna nunasha nunká írúnna nunasha, ashí wáiniaj nunasha núnisañ wáintsuj nunasha mashi najanamiayi. Nu arantcha ashí akupin ju nunkanam írúnna nusha, nayaimpiniam írúnna nusha, iwianchnium írúnna nusha, ashí Nijijai najanamu áiniak Nin umirkarti tusa najanamu áiniawai. ¹⁷ Ashí najanamua nuna yaunchu, Krístuka tuke pjuwiti. Ashí najanamu írúnna nuna emestsuk wáinniuiti. ¹⁸ Ashí Yus-shuar métekrak chikichik ayashinia áinis enentáimkiumka nuna muuke Krístuiti. Tura nu ayashín ni iwiaakmarijai iwiaaku átinian súsaiti. Niisha ashí jakamunmaya nantakniujai imiá nankaamantuiti. Nújainkia ashí enentáimpramnia írúnna nunasha akupniuiti. ¹⁹ Yus ashí takamtsuk Kristui shiir pujumiayi. ²⁰ Núnisañ Yus Kristu krúsnum jakamujai ashí nayaimpinmasha tura ju nunkanmasha írúnna nuna Nijijai nawamnaikiar shiir pujusarat tusa wakerukmiayi.

²¹⁻²² Atumsha nuik tunáa túrin asarum atumí enentáin Yusa nemasri ámarne. Tuma asarum yajá wekaimiarne. Antsu Kristu, aentsu ayashín ayashimiak, krúsnum wáitias jakamujai ii tunaari asakármatai yamaikia Yusjai nawamnaikiar shiir pujaji. Nujai Kristu in péñker ajasuncha tunaan máatrachmancha tura sumamachuncha Yúsai ejetamatjái. ²³ Tuma asantai Jesukrístu shiir enentáimtusum kakaram ajasrum katsuartiniatrum. Tura uwempratin chicham antukuitrum nuyá kanakchatniuitrum. Ju uwempratin chichaman ashí nunkanam etsernakuiti. Wisha, Papru asan, etserkatniun yaimjai.

Papru ashí Yus-shuaran yáinkratniuiti

²⁴ Atumin wáitiaknasha ti shiir waraajai. Kristu ni shuarin nekas péñker awajsat tusa wáitiana nuí pachiinkia asan waraajai. Ashí Yus-shuar Kristu ayashí áintsan áiniakui Yus-shuaran yáintajtsan ayashrujai wáitiakun shiir enentáimjai. ²⁵ Atumin yáinkiai tusa Yus akattur Yus-Chichaman takamtsuk ujakai tusa akuptukmai. Nuna takaakun ashí Yus-shuara yáintrintjai. ²⁶ Yámankamtaiknumia nekaachman Yus yamaikia ni shuarin paant awajsaiti. Nu chichamnasha ujakarai tusa winia akatar akuptukuity. ²⁷ Nu chichamsha júiti: Kristu atumí enentáin pujak Nijijai métek ti shíiram awajtamsat-tawai. Nu imiá shiir chichamnum Israer-shuarchasha pachiniainian Yus ashí ni shuari nekawaarat tusa wakerimiayi.

²⁸ Iisha Kristu étseaeji. Túrar ashí enentáimtikrar péñker nekaawarat tusar jintintiainiaji. Nujai Krístujai tsaninkiar

ashí pénker tsakarartatui. ²⁹ Tuma asamtai Kristu ni kakar-marín tí surakui nekas kakaram takaajai.

2

¹ Nekaatarum, yatsuru. Yus-shuaran yáintaj tusan ti takaajai. Tura atumíncha, Rautiséanmaya shuarnasha, tura ashí winia waitcha ainia nunasha yáintaj tusan ti takaitjai. ² Ashí shiir enentáimtikratniun ti takaajai. Núnisan aneniarum chikichik enentáijiai métekrak wekasatarum tusan wakerajrume. Nu arantcha, ashí Yusna ti pénker nekaarum tuke katsuáruk tusan takaajai. Nujai Kristu ti pénker nekaattarme. Tura yaunchu nekaachman Yus yamá paant awajsaiti. Nuka Krístuiti. Tura Nii nekaatin nekas shíiraiti. ³ Tura kakaram ajasam Kristu pénker nekaam ashí shiir enentáimpramnia nusha tura ashí Yusna nekaamnia nusha nekaattarme. ⁴ Atumin chíkich shuar niisháa chichamjai shiir chichartamas anan̄kramawarain tusan nuna tájarme. ⁵ Wi nui atumjai pujachkuncha nui pujajna áintsanak enentáimtajrume. Tuma asan átum métek enentáimprarum tura kakaram ajasrum Kristu nekas enentáimtururmena nuna íisnaka shiir enentáimjai. ⁶⁻⁷ Nu asamtai átum ii Uuntri Jesukrístu nekas enentáimtusrum Yus-shuar ajasmarmena núnisrum yamaisha Nii nekas enentáimtusrum Niiijai tsanínkrum ashí túratarum. Nu túrakrum Nii enentáimtakrum tuke tsakaki wétatrume. Tura te tariara wajasrum Yusjai kanakchattarme. Yus-Chicham núnisan̄ etsernakmatai nekamarme. Tuma asarum Yus tuke yumínsarum, núnisan̄ pénker wekasatarum.

Krístujai yamaram iwiaakma takakji

⁸ Aneartarum atumsha. Shuar aentsti enentáimmiabajai ashí ju nun̄kanmayan enentáimprar tura Krístun enentáimtutsuk niisháa chichaman áujtamainiak nekaschajai anan̄kramataj tusa wakerutmainiawai.

⁹ Krístunam Yus ashí takamtsuk pjuwiti. ¹⁰ Túmakui atumsha Krístujai tsanínkiu asarum ni iwiaakmarí takamt-suk takakuitrume. Krístusha ashí akupniun akupniuiti. Áentsnumsha iwianchniumsha tura nayaimpinmasha ashí akupin írunna nuna akupniuiti. ¹¹ Nu arant átum ayashnium tsupirnatskesha Kristu shuari ajasakrumin ashí ayash wak-eramun, tsupirkatniua áintsan̄, Kristu ajapamiayi. ¹² Tura atumsha Yus ni kakarmariijai Kristu jakan iniantkimia nu enentáimtusrum imianmiarme. Túrarum Krístujai métek

iwiarnasmarme. Tura núnisrumek Krístujai métek nantakmiarme. ¹³ Nuikkia átumsha tsupirnatsuk atumí tunaari tuke akui atumí wakanin jákauyarme. Tura yamaikia Jesukrístujai tsaninkiu asakrumin Yuska atumí tunaari tsankur yamaram iwiaakman suramsaitrume. ¹⁴ Tura ashí ii tumashrin sumamtikramatin amia nuna japiruiti. Kristu krúsnum jakamtai ashí akupkamujai sumamtikramamun tsankurtampramiaji. ¹⁵ Núnisan Kristu krúsnum jaka, iwianchnium ashí akupin ainia nuna nupetak ashí íimiainainiatsararmiaji.

Nayaimpiniam írunna nu enentáimtustarum

¹⁶ Akupkamunmaya Yus ankant awajtamsamtai chíkich shuar ame túramujai yajauch enentáimturmarin. Yúamna nujai, úmamna nujai, uwitinha, nantutinha, tura tsawantinha nampermam nujai chíkich shuar yajauch áujmatramkuisha ¿warí urukatin? ¹⁷ Nu nampernum Israershuar Kristu túrattana nuna nakumainiak túrin ármiayi. Tura Kristu taa imia Ninki pujá asamtai nakumkamuka ántrait. ¹⁸ Tura shuar “Péejchach ajasam Yus áujtsuk aya Yusa suntari shiir awajsatniuiti” túramkuinkia anturkairap. Nu shuar mesekranam wáinkiamun áujmatenak ántar nankaamantu enentáimtumainiawai. Aya aentsti enentáimian chichainiawai. ¹⁹ Tuma ásar Krístujai tsaninkiar wekainiatsui. Kristu ashí akupin asa ni shuarin Yúsnan jintintiá shiir tsakarat tusa péñker wáiniui. Nu arantcha ashí ápateak Yus wakerana áintsan chikichik awajeawai.

²⁰ Atumsha Krístujai jaka asarum aya aentsti enentáimtai ikiukniuitrume. Nuikia ¿urukamtai ju nunkanmaya ana nu tuke páchiarum? Nii tuinia nu umirkashtiniaiti. ²¹ “Ju antinchatniuiti, tuiniawai. Ju yúashtiniaiti. Tura ju achikchatniuiti” tuiniawai. ²² Nusha ¿warí, takasam amuukashtatuak? Kame áyatik aents akupkamu áiniawai. ²³ Shuar nu akupkamu umiiniak Yúsnan ti nékaitjai tura Yus shiir enentáimturui tu enentáimtumainiawai. Nu arantcha péejchach ajasan winia ayashrun ti asutiájai tu enentáimtumainiawai. Túrasha ayash wakeramunka nupeteatsui.

3

¹ Nuikia Krístujai nantakin asarum nayaimpinmaya írunna nu wakeruktarum. Nui Kristu pujawai Yusa untsuurini. ² Ju nunkanam ana nu enentáimtsuk aya nayaimpinmaya ana nu enentáimtustarum. ³ Atumsha Krístujai tsaninkrum jakamarme. Tuma asarum Krístujai tsaninkrum Yusjai iwiaaku pujarme. ⁴ Krístukete ii iwiaakmarj. Nii nayaimpinmaya

wantinkiuisha atumsha Niijiai métek wantinkiattarme. Tura Niijiai métek ti penker átatrume.

Yaunchu iwiaakmasha tura yamaram iwiaakmasha

⁵ Tuma asamtai ju nunkanmayá ana nu ajakratniua áintsarum iniaisatarum. Tsanirmatniusha, tunáa wakeruktincha, tura takakna nujai nankaamas wakeruktincha ántar-yus tikishmatratniua áintsanan asamtai iniaisatarum. ⁶ Shuar Yúsán umirtsuk aya nuna túrin ásarmatai Yus nin kajerak ti asutiáttawai. ⁷ Atumsha núnisrumek túriniuyarme. ⁸ Tura yamaikia jusha iniaisatarum: kajektincha, yajauch wakeruktincha, yajauch túratniusha, katsekmaktincha, yajauch chicham chichastincha, mash iniaisatarum. ⁹ Yushuar ajasrum yaunchu enentáimtairam iniaisamarme. Tura yaunchu túrutairmesha iniaisaitrume. Tuma asarum nuamtak tsanumprunairairap tura wáitruawairap. ¹⁰ Yaunchu enentái, pushí mamuru áiktinia áintsarum, iniaisaitrume. Núnisrum yamaram enentái, shiir pushí entsartinia áintsarmek, wekasaitrume. Tura Yus nu yamaram enentáin najana asa ashí tsawant pujurtawai nuna nankaamas Niijiai métek shiir atí tusa. Túramtai Yus ti penker nekaki wéaj*i*. ¹¹ Krístuka ashí írúnna nujai nankaamas ashiyaiti. Niiniun pujurui. Tuma asamtai ashí ni shuari enentáin pujá asamtai nusháa enentáimtunairchatin áiniawai. Kriaku-shuarsha tura Israer-shuarsha, tsupirnakusha tura tsupirnakchasha, apachcha tura yajaya shuarsha, takarin ainia nusha tura ankant ainia nusha, Kristu ashí ni enentáin pujakui nusháa enentáimtunairchatniuiti.

¹² Yus atumin anenmak Niiniu arti tusa achirmakmarme. Túrutma asamtai jujai shiir iwiarmampratniua áintsarum tuke túrin atarum: waitnenkanartin, shiir awajkanartin, péejchach átin, émtin áchatin, tura katsuntin átin. ¹³ Kristu atumí tunaarin tsankanuramia núnisrumek nuamtak tsankanúrnáiratarum. Chíkich yajauch awajtamkuisha shiir katsuntram yapajniaitsuk tsankanúrnáiratarum. ¹⁴ Tura ashí nankaamas anenaitiarum. Túrakrumka chikichik ajasrum mash penker túrattarme. ¹⁵ Kame chikichik ayashtinia áintsarum ajastarum tusa Yus ni shuari ajasat tusa achirmakmarme. Tuma asamtai Yusa shiiri atumí enentáin pujurtamsati. Nujai Yus yuminsatarum.

¹⁶ Kristu shiir chichame atumí enentáin piakti. Nekas naka enentáimprarum jintinniaiyarum mai ikiakánai ajatarum. Yus kanta kantamárum tuke enentáijiai Yus yuminsarum shiir awajsatarum. ¹⁷ Tura takaakmesha, chichaakmesha, kame ashí túramna nuka Jesukrístu shiir awajsataj tusam ni kakarmarijjain túrata. Túrakum Krístujai Yus Apa yuminsata.

Yus-shuar túratniua nu

¹⁸ Nuwətiram, atumí aishrī umirkatarum Uunt Yus nuna wakerakui. ¹⁹ Áishmantiram, atumí nuwé aneatarum. Atumí nuwejajī kajernaikairap. ²⁰ Uchitiram, ame apa nukusha tuke umirkatarum. Nu túrakrum Yus shiir enentáimtiksattarme. ²¹ Uchirtintiram, atumí uchirī ti kakantrairap. Ti kakanteamka uchisha ti kuntuts pujus pēnker wekasatniun nakitchanpiash. Nu túrunawajīn tusarum ántrarum atumí uchirī kakantrairap. ²² Takarniutiram, atumí uuntri shiir umirkatarum. Ju nunkanmaya uuntri aīn aya nii iimkiui shiir enentáimturati tusarum takaschatniuitrume. Antsu Yus enentáimtakrum tuke pēnker takastiniaitrume. ²³ Ashí túramna nu asump enentáijjajī takakmasta. Aya aentsuk yáin̄tinia áintsachu antsu nayaimpinmaya Úuntrum yayá áitkiasrum takastarum. ²⁴ Ame Úuntrum Kristu asa nayaimpiniam ashí shiir takustinian tsan̄katramkattawai. ²⁵ Antsu tunáa túrin ni yajauch túramujajī métek akinkiáttawai. Yus ashí áentsun métek iyawai.

4

¹ Úunttirmesha, atumí Uuntri atumin wáiniuk nayaimpiniam pujatsuk. Tuma asamtai atumí yáinma jiatsuk pēnker iniar̄tiniaitrume.

² Yus áujkuram Nii yum̄nsarum asummiarum iniaitsuk áujsatarum. ³ Incha Yus áujtustarum. Kristu-chicham yaunchu nekaachman yamáí étserkun sepunam pujajai. Tuma asamtai nuna shiir an̄kant etserkat tusarum áujtursatarum. ⁴ Tura wi paant etserkatniuitiaj núnisan etserkat tusarum áujtursatarum.

⁵ Yus-shuarchajajī shiir túratarum Yus-Chichaman yajauch enentáimturajīn. Kakaram ajasrum tsawant ántrarum inian̄kasairap. ⁶ Ti shiir chichamtin átiniaitrume tura anturújamin átiniaitrume. Núnisrum chíkich chíkich Yus-chicham paant ujak̄tin nekaattarme.

Amikmaamu

⁷ Ii aneamu yachi Tíkikiu ashí wínian ujatmaktatrume. Ni-isha wijjajī métek Yúsnan pimpitsuk ti pēnker takasuiti. ⁸ Nu asamtai ii juī pujajnia nuna ujatmak ikiantamprarat tusan akuptajrume. ⁹ Núnisan̄ ii aneamu yachi Unisemu niijjajī winiawai. Niisha atum wéeaiti, tura Yusjajī shiir wekaawai. Nu shuar ashí juī túrunamun ujatmaktatrume.

¹⁰ Aristarku wi sepunam tsan̄n̄kia pujamur amikmaatmarme. Núnisan̄ Markus, Pirnapí kaná yachia nu, amikmaatmawai. Niisha nuī jeamtai antukmarum núnisrum pēnker wáinkiatarum. ¹¹ Justu Jesus náartin amikmaatmarme.

Júchik áiniawai Rúmanmaya Israer-shuar winia Yúsna et-serkatin atutkaru ainia nu. Túmainiak ti shiir ayamtikru-iniawai. ¹² Épaprasha, atum weeá, Krístunun etserin asa atumin amikmaatmarme. Niisha ashí tsawant Yúsan áujeak Yusjaj kakaarum tuke shiir Yus wakera nu túrak tusa seatramprume. ¹³ Wisha Épapras atumin ti enentáimturman nékajai. Núnisañ Rautiséanmaya shuarnasha tura Iarapurisn-umiá shuarnasha ti páchiniawai. ¹⁴ Rukas, aneamu tsuákratin, núnisañ Témassha amikmaatmarme.

¹⁵ Tura Rautiséanam pujuinia nú Yus-shuarsha amikmaatruatarum. Núnisañ Nímpiassha tura ni jeen irunainia nú Yus-shuarsha amikmaatruatarum. ¹⁶ Átum ju papí áujсарum umikrum Rautiséanmasha nuyá Yus-shuar áujсarti tusarum akupkatarum. Tura atumsha núnisañ Rautiséanmaya papí támatai atumsha áujсatarum. ¹⁷ Tura ju Arkipiu titiarum: “Ti Uuntri Jesus ni takatrin suramsa nu péñker umikta” tawai, titiarum.

¹⁸ Wi, Papru, winia uwejrujaj júchiniak áatkun amikmaajrume. Sepunam pujajna ju enentáimturatarum. Yus shiir yainmakarti.

Nuke atí.

Papru

TISARÚNIKIANMAYA SHUARAN

Emka papín aar akuptukma

Papru ni tsaniakmarijiai Yus-shuaran áatramiania nu

¹ Wikia Pápruitjai. Wisha Serpanujai tura Timiutéujai Tisarúnikianmaya Yus-shuar ajasuitrumna nuna áatjarme. Atumsha Yus-shuar asarum Apa Yúsnaitrume, tura Uunt Jesukristunuitume. Ii Apari Yus, tura ii Uuntri Jesukristu waitnentrana ásarmatai, ti shiir imiatkinchanum pujustarum, tu wakerajrume.

Tisarúnikianmaya shuar Yus nekas enentáimtusar umirkat-niun jintintiarmiania nu

² Iisha Yus áujkurkia atumniasha tuke enentáimtusar Yus shiir yumiñsaji. ³ Atumsha Yus nekas enentáimtakrum umirkarumna nu nékaji. Núnisrumek, Yus aneakrum takaarme. Tura Jesukristu tatí tusarum tuke tsawant nákarne. Nu neka asar, ii Apari Yus áujkur, nusha ashí enentáimsar áujtajrume. ⁴ Yatsurú, Yus anenmarmen. Anenma asa Winia arti tusa achirmakurmena nusha nékaji. ⁵ Enentáimpratarum. Iisha Yúsai Uwempratín Chicham atumin ujakmajnia nusha aya chíchamjaiñ tíchamji. Antsu nú arant, nu chicham nekasaiti tusar Yusa Wakaní kakarmarijiai tímiaji. Tura átum péñker matsamsarat tusar atumjai pujusar shiir iruntrar wekasarmiaji. Nusha paant nékarne.

⁶ Atumsha yamaikia íksarmek ii túramiaj nu, tura ii Uuntri Jesukristu túramia nu túrarme. Itiurchat ain Yus-Chicham umikiurme. Tura wáitiayatrume Yusa Wakaní shiir enentáimtikramkui warasrum pujarme. ⁷ Nu túrakrum ashí Masetúnia tura Akaya nunkanmaya Yus-shuarsha shiir wekasatin jintintiarne. ⁸ Tuma asarum Uunt Yusa chichame ti ipiamparurme. Tuma asamtai Masetúnia tura Akaya nunkanmaya shuar nuna nékainiawai. Tura nú nankaamas Yus nekas umirkarmena nuna ashí aents nékainiawai. Nuna nékainia ásar ii étserman atsumainiatsui. ⁹ Antsu átum in péñker itiaamun nii íksañ ujatmainiaji. Tura nuyasha ántar-yus enentáimtustin iniaisarum nekas iwiaaku Yus nekas enentáimtusarum umirkarumna nunasha ujatmainiaji. ¹⁰ Tura nuyasha Yusa Uchiri Jesus jakamunmayan Yus iniantkimia nu, nayaimpinimaya tatí tusarum átum nákamuncha ujatmainiaji. Iis, Jesus Nínkiti Yusa kajetáiri tsawantri jeattana nuyá uwentikrampratín.

2

Yus-chichaman paant ujakarmiania nu

¹ Atumsha nékarme, yatsurú, iisha ánrar atumjín jeachmaji.
² Antsu itiurchat wáinkiaitiatar arantutsuk shiir Uwempratin Chichaman ujakmajrume. Iis, nuik Jiripius péprunam incha katsekramkarmiaji. Tura nú arant, ti itiurchat wáinkiamiajai. Túmaitatan Yus yáintkiui Yusa chichamen ujakmajrume. Nuka atumsha ti penker nékarme. ³ Warí, iisha Yus-Chicham atumin ujakmiaj nu nekasauyi. Tura yajauch enentáimsan, anankatjarum tusan tíchamjarme.
⁴ Antsu Yus in pénger enentaimturmas Uwempratin Chicham etserkatarum tusa akatrampramiaji. Tuma asamtai núnisrik étsereaji. Túrasha aya aents waramtiksatat tusar étsertsuji. Antsu Niñki Yúsak ii enentáin nekartamin asamtai, shiir enentáimtiksatatsar túraji. ⁵ Átumka nékarme, penkesha shíirmach chichasan anankachjarme. Nuyasha, kuit achiktai tusar ánrar chichaschamji. Núnaka Yus nékawai.
⁶ Iisha Kristu akatramurintji. Tuma asar ni kakarmarijjai akupkatin takakuji. Páchitsuk túramniauji. Túrasha waantu ajastaj tíchamji. Nuyá atumsha tura chikichcha in waantu awajtamsataj tákuisha iikia nakitmiaji. ⁷ Antsu uchi kuírchin ni nukurí pénger iis tsakatmana áintsarik iikia atumniaka shiir íismajrume. ⁸ Iisha ti shiir aneajrume. Tuma asar Yus-Chicham ujaktai tusar ti wakerukmaji. Tura aya ujakar iniaisatin wakerukchamji. Antsu ii jákatniuitkiursha iniaisachajji, atumín ti anea asarⁱ. ⁹ Yatsurú, ii atsumaj nu sumarmaktai tusar kakaram takakmasmaj nu ¿kajinmatkintrumek? Atsá. Nékarme. Iis, Yus-Chicham étserkur, tsawajsha káshisha takasmiaji. Nusha, akirkata, tiiij tusar takakmasmiaji.

¹⁰ Yatsurú, atumjai pujumiaj nu iisha Yus wakerana nu túrimiaji, tura yajauch túrutsuk shiir wekasamiaji. Nujai incha chikichkisha yajauch chichartamkatniusha atsumi-ayi. Nuka atumsha nékarme tura nú arant Yus nékawai.
¹¹ Tura atumniasha ankant ankant Yúsnum ikiakármajrumna nu nékarme. Tura uchin ni aparí átsankeana nútiksarik shiir enentáimtikramajrumna nusha nékarme. ¹² Tura Yúsjai shiir wekasatarum tímiajrume. Yus nankaamas uunt asa ashí aku-peawai. Tura Yus-shuaraitrumna nuna, Winin pachiinkiarat tusa, Yus untsurmarme. Yus untsurma asamtai Níiniuitrumek. Niiniu asarum Yusa uchirja núnisrumek wekasatniuitrumek.

¹³ Yus-Chicham ii étserma antukrum, aya áentsnumianchaiti tímiarme. Yúsnumiáiti tímiarme. Nu tiniu asarum umirkamarme. Kame nekas tárume. Ii étserjinia nu nekas Yusa chichamente. Átum nu chicham umirka asakrumin,

atumí enentáin kakaram ajastinian amaawai, Yus-Chicham asa. Átum Yus-Chicham umirkaru asakrumin iisha tuke tsawant Yus yúminkiaji. ¹⁴ Yatsurú, ju nekaatarum. Aya atumek wáitiatsrume. Ashí Jutía nunkanam Israer-shuar, ni shuarinketiat, Yus-shuaran wáitkiascharmakia. Iis, Yus-shuaran Kristu Jesusan umirkaru ásarmatai wáitkiasarmiayi. Yamaikia atumniasha atumí shuárin wáitkiarmainiawai. Nujai Jutía nunkanmaya Yus-shuarjai métekrak ajasurme. ¹⁵ Niisha Israer-shuaraitiatan Yus-Chichaman etserin armia nuna nuamtaketiat máawarmiayi. Tura nú weeák Uunt Jesunasha máawarmiayi. Tura incha aa jiiiki akuptamkarmiaji. Maaj, niisha Yúsan shiir enentáimtikiainiatsui. Tura núnisan ashí áentsun kajerainiawai. ¹⁶ Warí, Israer-shuarcha Uwempratin Chicham ujaktaj takurnisha niisha suritramainiaji. Nuna túruiniak yaunchu tunaan túriarmia nújainkia nankaamas yamaikia túrawarai. Pai, túrasha yamaikia Yusa kajetairii imiá tsumai ana nuí pujusarai.

Papru ataksha Tisarúnikianam irautajtsa wakerimiania nu

¹⁷ Iisha, yatsuru, ishichik tsawant atumíya kanakir jeachat pujayatrik, atumjaisha wáinniaiyachiatrik tuke ii enentáinkia enentáimtimjarme. Tuma asar ataksha atumin iistai tusar ti wakerimji. ¹⁸ Nekas winitiaitsar wakerimji. Imia wíkisha winitniun ti nukap enentáimsamjai. Tura iwianchi uuntri Satanás tuke nuna suritrammiaji. ¹⁹⁻²⁰ Atumsha shiir wekasa asakrumin iisha ti shiir enentáimsar waraaji. Nu tuma asar Uunt Jesukrístu tátintri shiir enentáimsar nákaji. Nii támatai imiá warastatji. Atumin Yus-shuar awajsa asar, Nii támatai atumsha iijiai Jesus shiir inkiuntatji. Tuma asamtai nu enentáimsar tawasap achiktinia áintsar waraaji.

3

¹⁻² Iisha ataksha atumin íistaitsar ti wakerimji. Tura tujinti-akur iikia Atenas péprunam juákur ii yachi Timiutéu atumin íirmainiarat tusar akupkatai, timiaji. Iisha Kristui Uwempratin Chicham etsermiaj nuí, Timiutéuka iijiai métek takasuiti. Tuma asa niisha Yusa takatrin takáa asa atumni-asha Yusai kakartarum turamarti tusar akupkamji. ³ Tura nú arant, itiurchatan wáiniuk iniaisarain tusa ikiakátmararti tusar Timiutéu akupkamji. Yatsurú, átumka nékarme, ashí Yus-shuaraitjinia nuka páchitsuk wáitsatniuitji. Iis, tuma asamtai atumsha ti nekas itiurchatnum pujarme, Yus-Chicham umirka asarum. ⁴ Iimiatarum, atumjai nuik tuke pujumjinia nuí “iisha wáitsartatji” tíchamkajrum. Iis, túrunachaik. Nuka nékarme. ⁵ Tura atumin íwianch tunaanum ajunmarchariash

tusan, wisha kúntuts enentáimsamijai. Tura ánrar takaschajash tu enentáimsamijai. Tuma asamtai nekaataj tusan ti wakerakun, wisha ti nukap tsawant nákaschamijai. Antsu wárik Timiutéun akupkamijai. Yúsjaí pénkerash wekainia tusan, “nu inintrusam ikiuuta” timiajai.

⁶ Tura yamaikia Timiutéu Tisarúnikianmaya waketki tayi. Niisha taa, átum Yus aneakrum shiir enentáimtamuncha ujatmaji. Tura átum in anenma asarum tuke enentáimsar pujamuncha tura ii atumin ístaitsar wakerajnia núnisrumek atumsha incha írmaitiai tusarum wakeramuncha Timiutéu ujatmaji. ⁷ Tuma asamtai, yatsuru, ashí itiurchat tura wáitsatin wáiniatrik átum Yus shiir enentáimta asakrumin iisha shiir enentáimji. ⁸ Atumsha Yúsjaí тариара weká asakrumin, shuar jaa pénker ajas enentái chinkiana áintsarik enentáimji. ⁹ Yus pénker umirka asakrumin, iisha shiir waraaji. Warasu asar ii Yusri ti yúminkiaji. ¹⁰ Incha Yus akuptamkurninkia atumijn tímiajaik jeartiai tusar wakeraji. Túrar Yusna nekaatin mash nékatsrum nu jintintiatai tusar tuke ti seaji.

¹¹ Atumijn weri ístinian ii Apari Yusscha tura ii Uuntri Jesukristusha in yáinmaktai tusar wakeraji. ¹² Atumin ii aneajnia núnisan Yus atumniasha mai anenai ajatniun tura chikichcha aneastinian enentáimtikramprartí. Tura nú nukap anenkrattain Yus amasartí tusar wakeraji. ¹³ Yus ikiakátmakui átum tunáa túrutsuk Yus umirkarum wekasatarum tusar ii Apari Yus seaji. Ii Uuntri Jesus Níniurijjai winiak pénker wekaarmin tati tusar taji.

4

Pénker túratniun Yus wakerana nu

¹ Iikia Uunt Jesus akupkamuitji. Tuma asar nu kakarmajai atumniasha ju túratarum tusan akupeajrume. Atumsha iwiaaku pujarmena nuí Yus shiir waramtiksatarum tura tuke pénker túrukum wetarum tusar seajrume. Iisha nuik atumin unuiniarmajrumna nútiksarmek túratarum. ² Uunt Jesusa akupeamurijjai tura nu kakarmajai atumniasha nuik unuiniarmajrumna nu átumka nékarme. ³ Atumin Yus wakerutmarmena nu júiti: “Shuar aya Winin sumama pujusat tusan chikichkinkesha shuar tsanirmaashti”. ⁴⁻⁵ Yus-shuarcha ainia nu, Yúsan nékainiachu ásar, aya nínki enentáimtumasar aya ni ayashí wakeramunak umiktinian wakeruiniak nuwan enentáimtuiniawai. Atumsha núnisrumek túrawairap. Antsu atumsha atumí nuari pénker enentáimtusrum shiir aneasrum ayastarum. ⁶ Nú arant, amesha ame yatsum anankam ni nuari yajauch awajtusaip. Nu túrakrumninkia ii tímiajrumna nútiksán Uunt Yus ti kakaram asutiámawartatui. ⁷ Warí, Yus

incha pénkercha yajauch túratarum turamchaitji. Antsu aya pénkerak túratarum turamji. ⁸ Tuma asamtai shuar ju chichaman nakitiakka áentsun nakitiatsui, antsu Yúsán nakitraiti. Tura nu Yussha ni Wakanin amaawiti tunaan túrashtinian.

⁹ Tura yamaikia nuamtak Yus-shuar aneniastin ana nuna ti neka asakrumin áatrashtatjarne. Warí, imia Niní Yus atumin mai anenai ajatniun jintinramawarmatai nékarme. ¹⁰ Iis nútiksarmek aneniatsrumek ashí Masetúnianam matsatainia nujai. Túrasha, yatsuru, atumí anenkrattairi nú nukap ajasti tusan, seajrume. ¹¹ Yamaikia tímiaj nútiksarmek, yayauchin túruinia nuí wekatsuk, chíkich shuarna pachittsuk, atumí takatriin shiir ankant pujusrum atumí uwejejain takakmá pujutarum. ¹² Átum táasairum tusan tájarne. Túrakrumniñkia atumniasha chíkich shuar pénker enentáimturmasartatui.

Kristu tátintri

¹³ Yatsuru, Yus-shuarcha ni shuari jakamtai “atakka wáinkiashtatjai” tusa ti kuntuts enentáimainiawai. Tuma asamtai atumsha nútiksarmek kúntuts enentáimsairum tusan juna tájarne. Jákaru ainia nu urukawartinkit paant nekaatarum. ¹⁴ Jesus jákayat nantakchamkia. Núnisañ Yus Jesusan iniantkin Nin umirkar jákaru áiniana nunasha iniantkittiawai. Paant nékaji nusha. ¹⁵ Tuma asamtai Yus-Chicham nekaprutamnia nuna atumniasha jintintiajrume. Iisha tuke iwiaaku pujarin Kristu táakuisha jákaru ainia nuka ikiuakur émkishtatji. ¹⁶ Antsu Yus akupeakui, Yusa suntari uuntri untsumkui tura Yusa kachurin umpuarmatai Uunt Jesukristu untsumuk Yus pujamunmaya tarattawai. Nuñkia Krístunu ajarar jákaru áiniana nu iwiarsumunmaya nantakiartatui emka. ¹⁷ Tura nuyá iisha Yus-shuar tuke iwiaaku pujajnia nu Krístujai yurañminiam ajapén inkiunaikiartatji. Nuní ashí nayaimpiniam ii Uuntri Jesukristujai tuke iwiaaku pujusartatji. ¹⁸ Tuma asamtai ju shiir chicham atumin ujakjana jujai mai ikiakánai ajatarum.

5

¹ Túrasha, yatsuru, ni tátintri waritin tura warí tsawantaj, nuka áatratin atsumatsrume. ² Ni tátintri júnis átin nékarme. Kiritniunam kasá shuar kasamkataj tusa tátatna nu nekaachminiaiti. Núnisañ nákatsuk pujuiniaj Uunt Kristu tsawantri jeattawai. ³ Ashí shuar “Pai, yamaikia ti nekas shiir pénker pujuiniaji” tu matsatainiaj, aya aneachma nuñka mesertin tsawant jeattawai. Nuwá ajamtin aya aneachma jatema áintsañ, nékachmanum átatui. Túmakui pisartin penké atsuttawai. ⁴ Túrasha, yatsuru, átumka ujakmaitrume. Nu

tsawant atumsha aneara pujarmin jeattawai. Atumsha aneara pujá asakrumin kasá áintsan tarutrámashatui.
⁵ Enta, átumka tsáapninium wekáa asarum Yus-shuartirmeka nékaitrume. Iikia kiritniumiānchuitji. ⁶ Nu tuma asar, chíkich uruka núnisrik, ii enentáin kanartinia núnisrik “Wari, winia itiurtawa” tíchami. Antsu naka enentáimsar anearmi.
⁷ Iis, kashi kanarchatniukait. Tura nampeena nu kashi nampeenawai. ⁸ Túrasha iikia shiir tsáapninium wekainiaj nuka naka enentáimprar tuke nampetsuk pujustiniaitji. Suntar ni nemasri anankruawain tusa anear wekasatniuiti. Tura iisha núnisrik íwianch yajauch awajtamsaij tusar anearmi. Yus enentáimtusar aneetniuitji. Tura núnisrik iisha, ju nunkanmaya uwemprar Yúsai tuke pujustatji, tu enentáimprar wetái. ⁹ Páantchakait. “Jinium wéchatniuitrume” Yus incha túramji. Antsu ii Uuntri Jesukristujai uwempratniun tsankatramkaitji. ¹⁰ Niiijai métekrak iwiaaku ami tusa Jesukristu in jarutramkami. Nu tuma asamtai iisha ii ayashijiai iwiaaku pujakrishia Niiijai iwiaakji, tura ii ayashijiai jáakrishia Niiijai tuke iwiaakji. ¹¹ Tuma asamtai tuke túarmena núnisrumek, shiir enentáimtiknaisarum mai ikiakánai ajatarum.

Papru Yus-shuaran jintintiamiania nu

¹² Yatsurú, juna seajrume. Atumjai pujuinia nú shuar Yúsnan takakmainiakui shiir enentáimtustarum. Jintintra-muk chichartamainiakui umirkatarum. ¹³ Yúsnan takainia ásarmatai ti péñker enentáimtusarum aneestarum. Tura yajauch awajnaitsuk ti shiir nawamnaikiarum matsamsatarum. ¹⁴ Tura junasha seajrume, yatsuru. Takastinian nakitiana nusha chicharkatarum. Tura yaweena nusha ataksha enentáimtikrarum ikiakártarum. Kakarmachu ana nusha yáintarum. Tura ashí shuarjai kajetsuk katsuntrarum wekasatarum.

¹⁵ Aneartarum, yatsuru. Chíkich yajauch túrutmamtai amesha nútiksarmek yapajkiaip. Antsu nuka túrutsuk átumka mai péñker awajnai ajatarum. Tura nú arant, ashí nunkanmasha ashí shuarsha nútiksarmek túratarum. ¹⁶ Tuke shiir warasrum pujustarum. ¹⁷ Tuke tsawant iniaitsuk Yus áujsatarum. ¹⁸ Péñker pujakmesha, itiurchat pujakmesha ashí wari wáiniam nuisha Yus shiir yuminsatarum. Kristu Jesusai Yus-shuar ajasutiram nu túratniun Yus wakerawai.

¹⁹ Ji ikiajniaktinia núnisan Yusa Wakaní enentáimin keana nuka tunaajai téenmantikiarum ikiajniakairap.

²⁰ Yus jintintrar akupkamu asa péñker chichaman etserainia nu nakitirairap.

²¹ Ashí etserkamu ana nu nekasashit tusarum nekaatarum. Túrarum aya pé_nker ana nuke achiktarum. ²² Ashí yajauch ana nuy_anka kanaktiarum.

²³ Yuska, imiatkinchanum wekasatin amaana nu, atumin takamtsuk shiir awajtamsartí. Tura ii Uuntri Jesukrístu táats_ai_n, atumí wakaní atumí enentai tura atumí ay_ash_isha mash métek tunaaj_ai_nchu awajtamsati. ²⁴Yus atumin untsur-makmarumna nu tímianak uminiaiti. Nii tana nuna yaw_etsuk túrattawai.

Amuamunam amikmaatin

²⁵ Ashí yatsurtiram winiasha Yus áujtursatarum. ²⁶ Ashí Yus-shuar árum nu, amikmaaniatarum. ²⁷ Winia Uuntru Jesukrístu chichamej_ai j_una tájarme. Ju papí ashí Yus-shuar antukarti tusarum ashí iruntramunam áuj_satarum. ²⁸ Ii Uuntri Jesukrístu atumin yáinmákartí. Nu atí.

Papru

TISARÚNIKIANMAYA SHUARAN

Ataksha papin aar akuptukma

Papru ni tsaniakmarijiai Yus-shuaran áatramiania nu

¹ Wikia Pápruitjai. Wisha Serpanujai tura Timiutéujai irun-tran atumin Tisarúnikianmaya Yus-shuar árumna nuna ju papin áatjarme. Atumsha ii Apari Yusna tura Uunt Jesukristunu ajasuitrume. ² Tuma asakrumin ii Apari Yus tura ii Uuntri Jesukristusha waitnentrama ásarmatai yáinmakar péñker awajtamsarat tusan wakerajrume.

Kristu támatai tunáa shuáran Yus asutiáttawai

³ Yatsurú, átum péñker matsatu asakrumin iisha Yus tuke yúminkiaji. Átumka Yus nekas enentáimtustin nú núkap nekaakrum wéarme. Tura nuamtak aneniasincha nú núkap nékarme. Nu tuma asamtai Yus yuminsatniuitji. ⁴ Átum Yus-shuar asakrumin chíkich shuar atumin yajauch awajta-mainiawai. Tura itiurchat wainiu asarum ti wáitiarme. Nu tuma aji átumka katsuntearme, tuke Yus enentáimta asarum. Nu tuma asakrumin, iisha Yus-shuar matsatainia nuka warasar ujainiaji. ⁵ “Yusa akupeamurin pachiinkiamni-aitrume” Yus túramprume. Nui pachiinkiatat tau asarum ju nunkanam wáitiarme. Tura wáitiakrumsha nuna nankaamas iwiarnaruitrume nui pachiinkiatin. Kame nújainkia Yus atumin achirmak péñker túrait, nuka páantaiti. ⁶ Núnisan atumin wáitkiarmainia nunasha Yus tímiatrusan wáitkiasartincha nekas péñkeraiti. ⁷ Tura wáitiarmena nusha Yus íijiaisha ayamtikramprartin péñkeraiti. Ii Uuntri Jesukristu ji keana ímianisan kakaram suntaríjiai nayaimpinmaya tara wantinkiamtai, nu tsawantai Yus ayampratniun suramsartatji. ⁸ Tura nú tsawantajsha Yúsán nékainiatsna núnaka ii Uuntri Jesukristu ti asutiátajtsa tátatui. ⁹ Taa, nincha menkakatniunam akupkartatui. Chichaak “Wi pujajna juyá akupeajrume” títiatui. Tura winia ti kakarmar atsana nui akupeajrume, átum winia umirtukcha asakrumin” nin tiartatui. ¹⁰ Kame Uunt Jesukristu tátin tsawantri jeamtai, ni shuari, ni enentái péñker awajsaru áinia nu, ni náarin shiir pachisartatui. Tura Yúsán umikiaru ásar, ti shiir enentáimsar Jesukristun íisartatui. Ii ujakmajrumna nu antukrum umirka asarum atumsha nui pachiinkiatarme. ¹¹ Nu tuma asamtai ii Yusrin atumin tuke áujtajrume. Yus atumin achirmakuitrume. Nuinkia Yuska atumí enentáin takas Nii wakera nujai métek awajtamsati,

taji. Yus umirka asarum péñker wekasataj tusarum wakerarme. Túrarum Yus enentáimtusurum péñker túratin wakerarme. Tura wakerarmena nu umiktin Yuska ni kakarmarijjai yáintí, tu áujtaji. ¹² Átum péñker wekasa asakrumin chíkich shuarsha ii Uuntri Jesukrístu náarin nan̄kaamantu enentáimtusartatui. Nusha auka ii Yusri tura ii Uuntri Jesukrístu waitnentáimturmasar péñker wekasatniun yáinmakui túrarme. Túramtai chíkich shuar shiir enentáimturmasartatui.

2

Tuke Tunaarintin wantinkiattana nu

¹ Tura, yatsuru, ii Uuntri Jesukrístu tátatna nuna tura Niijjai in̄kiunaiktatjinia nunasha ujaktinian wakerajrume. ² Chíkich shuar anan̄kramawar “Uunt Jesukrístu tsawantri jeayi” tu ujatmaktaj tusar wakeruiniawai. “Iimiarmaj nujai nékajai” turamainiakuisha, “chícham étserman antukmaj nujai nékajai” turamainiakuisha, tura “Papru papí áarmari nuna takui nékajai” turamainiakuisha, páchim enentáimprairap. Tura sapijmiakairap tusan seajrume. ³ Penké anan̄nawairap. Nekaatarum. Nu tsawant jeatsain̄ Yúsnumiá kanaktin átatui. Tura nú arant, Tuke Tunaarintin, emesnartatna nu wantinkiattawai. ⁴ Niisha aya wíniak enentáimtursarat tusa wakerak, ántar-yusnasha tura nekas Yúsasha shuar tikishmatrarain̄ tusa ti nakitrattawai. Nínki ti nan̄kaamantu enentáimtumasa, Yusa nuke ajas, Uunt Yusa Jeen wayáa pujustatui. “Júiti Yus” shuar turutiarat tusa mash túrittaiawai. ⁵ Yatsurtiram, wí atumjaī pujakun nuna ashí ujakmajrume. ¿Nuka kajinmakniurmek? ⁶ Yámaikikia, ni tsawantri jeatsain̄, Tuke Tunaarintin wantinkiain̄ tusa surimia nu nékarme. ⁷ Tunaasha yamaisha awai, tura paantcha. Túrasa tunaan surimia nu juramkitniuk taasai nu tunaaka paant átin. ⁸ Nuinkia nu Tuke Tunaarintin wantinkiattawai. Tura Uunt Jesus ni wenejaī umpuí aun máattawai. Tara ni wincharijjaī nuna amuktatui. ⁹ Nu Tuke Tunaarintin, iwianchi uuntri Satanás akupkam tátatui. Ni kakarmarī iniakmastaj tusa, aentsti túrachminian túrak anan̄kawartatui. ¹⁰ Jinium wémin ainia nú shuaran ashí tunáa ana nujaī anan̄kawartatui. Nu shuar Yus-Chichaman nekas ana núnaka nakitraru ásar uwemprachmin áiniawai. ¹¹ Iis, nekas ana nuna nakitia ásarmatai, ti anan̄mamawar wait-chichaman umirkarat tusa Yuska tsan̄katkattawai. ¹² Warí, niisha ni tunaarin wararainiak, nekas ana nuna nakitraru ásarmatai, Yuska “jiniun wétatrume” tiartatui nuna.

Uwempramin ainia nu

¹³ Tura, yatsuru, Uunt Jesus aneamu árumna nu, iisha atumin enentáimtusar ii Yusri yumiñsaji. Átum nekas ana

nuka umikiurme. Tuma asakrumin Yusa Wakaní atumí enentáin penker awajtamsaitrume. Nu tuma asamtai yámankamtaikniumiá Yuska “átum uwempramniaitrume” túramprume. ¹⁴ Nu túrunat tusa Yus wakerutmarme. Krístujai Uwempratin Chicham ii ujakjinia nujai Yus untsurmakmarme. II Uuntri Jesukrístu ti penker pujana nuí pachiinkiamniuram tusan ujakmajrume, nú chichaman.

¹⁵ Wátsek, yatsuru, Yusjai katsuartarum. Yus-Chicham etserkamu antukurmena nu, tura wisha áaran akuptukjarmena nusha kajinmatkiirap. ¹⁶ Ii Uuntri Jesukrístusha tura ii Apari Yussha ti penker ásar incha anenmatsjik. Tura waitnentrama ásar incha shiir enentáimtikramji. Tura nú nankaamas ii tuke penker pujustinian ikiurtamsaitji. ¹⁷ Nu tuma asamtai, penker chichastarum tusa, tura penker takastarum tusa Jesukrístuka shiir enentáimtikramar ikiakátmarartí.

3

Papru “áujtursatarum” tímiania nu

¹ Nuyá, yatsurú, Yusa chichame shiir pampartí tusarum Yus áujtursatarum. Átum Yus-Chicham wakerukmarmena áintsan ashí nunkanam wakerukartí tusarum Yus seatarum. ² Tura yajauch shuar, penker ana nuna ti nakitiainia nu, incha yajauch awajtamsachartí tusarum Yus áujkartustarum. Kame chíkich aents Yúsan umirkacharu áiniawai. ³ Túrasha Uunt Jesusak atumin iniaitsuk wáitmaktatrume. Tura atumin ikiakátmartatrume. Tura íwianch anankramataj takui kíishturmaktatrume. ⁴ Kame Yus atumin yainmaktatrume, taji. Ii tájinia nu yamáí umíarme. Tura tuke umirkattarme. Nusha nekaar shiir enentáimji. ⁵ Uunt Yus yainmakartí ni anenkrattairin nekaatniun. Kristu itiurchatan katsuntramia núnisan atumniasha katsuntratniun Yus yainmaktí.

Takastiniaitji

⁶ Yatsurtiram, antuktarum. Ii Uuntri Jesukrístu chichamejai ju taji: “Nuyá Yus-shuar wi jintintramun nakitiak aya wékana nu ikiuktiarum.” ⁷⁻⁸ Ii túrajnia núnisrumek túratin nékarme. Júiti: atumjai pujusmaj nuí tuke takakmasmiaji. Atumí yurumkari iisha akikmakar yurummiaji. Atumjai itiurchat áchatí tusar tsawaisha káshisha tuke takakmasmiaji. ⁹ Kame iisha, Kristu akatramu asar “yáintkiatarum” tíminiuji; túrasha nu tútsuk, ii túrajnia núnisrumek túratin nekaatarum tusar, iisha tuke tsawant takaamiaji. ¹⁰ Warí, atumjai pujumiaj nuí “Takastinian nakitiana nuka yurumáshti” tíchamkaji. ¹¹ Iis, atumiinia weeá, nanamas enentáimiainiak tura nanamas túruiniak penké

takatsuk pujuiniawai, túramainiaji. ¹² Nú shuáran ii Uuntri Jesukrístu chichamejai “Táamtak shiir takakmasartí” tajai.

¹³ Yatsurtiram, yawetsuk shiir túratarum. ¹⁴ Ju papinium ii tájinia nuna, shuar umiktinian nakitiakuinkia “umichuiti” tákuram, ni natsarat tusarum ikiuktiarum. ¹⁵ Túrasha “Yusshuara nemasrinti” tiip. Áyatik jintintrata, tura Yúsai enentáimtikrata, ame nekas yatsumeja áitkiasmek.

Papru aujsua ikuiamu

¹⁶ Uunt Yuska, imiatkichu enentái susamniaiti. Jú Yus, itiurchatnum pujarminiñ atumin tuke imiatkichu enentáimtikramsarti. Uunt Yuska atumin pujurtamsarti, tajai.

¹⁷ Jui wi Papru juna aajai. Wi papin akupeaj nuñ júnisnak winia náarun áaran apujeajai, wíniaiti tusan. ¹⁸ Íi Uuntri Jesukrístu atumin ashí yainmakarat tusan wakerajrume. Nu atí.

Papru TIMIUTÉUN Emka papin aar akuptukma

¹ Wi Papru Jesukristu akatramurintjai. In uwemtikkiartin Yussha tura ii Uuntri Jesukristusha winia akuptuku áiniawai. Jesukristujai métek ti shiir ajastai tusar nákaji. ² Timiutéu, ju papin áateajme. Wi ujakam Yus-shuar ajasu asam nekas winia uchirua áinkiaitme. Tuma asakmin Yus Apasha tura ii Uuntri Jesukristusha ti anenma ásar waitnentramainiak imiatkinchanum ti shiir pujustinian yainmakarti.

Wait chichamjai anearta

³ Masetúnia nunkanam wéakun “Ipisiu péprunam pujuuta” timiaj núnisnak tájame. Shuar nuí wait-chichaman jintin ainia nu suritkiarta. ⁴ Niisha Israer-shuara weatrin áujmatsamunak tura ni weatri naari ti untsurí irurtinniak Yus-Chichamjai nankaamas enentáimtuiniawai. Nunak áujmatsar tuke ántar tuiniawai. Nu túramuka Yus enentáimtusar Nin shiir umirkatniun yáinmatsji. Tuma asantai nusha surítkiatá.

⁵ Yus-shuar tuke enentáijiai Yúsan shiir enentáimtusar tura tunáa túrutsuk aya péñkera nuna wakerukar anenkartin ajastin áiniawai. Núnisanj péñker ajasat tusar Yus-Chicham étsereaji. ⁶ Chíkich shuar júna iniaisar ántar chichaman áujmatainiawai. ⁷ Yúsnan nékachiat “jintinniuitjai” tuiniawai. Tura unuiniainia nuna nékainiatsui.

⁸ Yus wakeramun nekaatin tura tunaan suritkiatin akupkamuka nekas péñkeraiti. Nu paant nékaji. ⁹ Kame akupniuka péñker shuaran itit awajsatniun akupenatsui. Antsu yajauch shuar júna túrin ainia nuna itit awajsatniun akupenawai: Tunáa shuarnasha, umichuncha, Yúsnasha tura ashí Yúsnancha nakitiainia nunasha, aparín máinniasha, nukurín máinniasha, kame mankartinniasha, ¹⁰ nuwancha tura áishmanasha tsanirma áinia nunasha, shuaran kasamak juu ainia nunasha, wáitrinniasha, tsanumniuncha, ashí nuna itit awajsatniun akupenawai. Kame ashí péñkercha nuna iwiaratniun akupenawai. ¹¹ Núnisanj tawai ti shiir uwempratin chicham Yus suramsamajnia nu. Nu chichamnaka etserkatniun Yus péñker asa tsankatrukuiti.

Yus waitnenkartin asantai Papru yuminsamiayi

¹² Ii Uuntri Jesukristu shiir enentáimturu asa Níiniun etserkat tusa kakarman surusuiti. Túruta asantai yúminkiajai. ¹³ Wi Yúsan imiá yajauch chicharniuyajai. Yus-shuarnasha

áintrarmiajai. Yushasha katseknuiyajai. Túrin aiñ Yus winia waitnentrurmiayi. Kame Jesuska Yus Anaikiamun nékachu asan wi túramu yajauchiiti tu enentáimchauiyai. ¹⁴ Tura ii Uuntri Jesukrístu ti nekas waitnentrurmiayi. Tura Jesukrístujai tsaniñkia pujakuí Yus nekas enentáimtustinniasha tura anenkartin ajastinniasha surusuíti.

¹⁵ Ju chicham ti nekasaiti. Tunáa shuáran uwentikrataj tusa Jesukrístu ju nunkanam taramiayi. Nunasha ashí shuar nekaatin áiniawai. Tura wikia ashí shuarjai nankaamas tunáan túriniaitjai. ¹⁶ Ti tunáa aiñ Jesukrístu ti anenkartin ana nu paant nekanati tusa Yus winia waitnentrurmiayi Tuma asamtai chíkich shuar, wijiai métek, Yúsan nekas enentáimtusar Niiijai tuke iwiaaku pujusartatui. ¹⁷ Yus tuke jacha asa tuke iniaitsuk akupniuiti. Wáinchataitiat imiá nankaamas nékaiti. imia Niñki Yúsaiti. Tuma asamtai imia Niñki tuke iniaitsuk ti shiir awajsatniuiti. Núnisan tuke atí.

¹⁸ Uchiru, Timiutéu, yáunchuya Yus-shuar ámin “Ju shuar péñkeran túrattawai” túramarmia nútksam yamaikia kakaram ajástá. Nii timia enentáimsam suntara áintsam Yúsna kakaram takastin asumprurta. Nuna tájame. Tura Yus tuke nekas enentáimtusam tura tunaan túrawaij tusam anearam túrata. ¹⁹ Chíkich shuar tunaajai anearcharu ásar Yúsan ikiukiarmai. ²⁰ Iminíusha tura Arejántrusha núnisan Yúsan ikiukiarmatai uunt iwianchnium surukarmajai. Nuñjai Yúsan ti yajauch chicharsacharat tusan túraitjai.

2

Yus áujsatin

¹ Wátsek, emka seajrume Yus áujeakum Yus yuminsam ashí shuar yaiñkiat tusam áujtusarta. ² Imiatkinchanum pujusar Yusjajisha tura áentsjajisha shiir túratai tusar tura ashí akupin ainia nusha péñker akupkarat tusar Yus áujtustiniaitji. ³ Áitkiasar seatin péñker asamtai, uwentikramajnia nú Yus wakerawai. ⁴ Ashí shuar nekas chichaman nekaawar uwemprarat tusar wakerawai Yus. ⁵ Aya chikichik Yus awai. Tura Jesukrístu aents ajas Yusjai áentsun nawamnaimtikiartiniaiti. ⁶ Ashí shuara tunaarñ akikmatkataj tusa jákatniunam Jesukrístu surumakmiayi. Tura tsawant jeamtai nu chicham ashí shuarnum etsernaktiniuyi. ⁷ Nuna túratniun Yus winia akatar akuptukuíti. Israer-shuarcha nekas chichaman enentáimtusarti tusa Yus akuptukmiayi. Krístunu asan wáitrutsuk nekas tajai.

⁸ Nu asamtai áishmanñka kajetsuk yajauch tunaitsuk antsu péñker enentáijijai uweje takuiniar Yúsan áujsarti.

9-10 Núnisan núwaka iwiarmamuk nekasniancha pé_ñker enentáijjaj entsararti. Chíkich shuar nu nuwān iis temashmarmarincha, sháukríncha, kurimkiamuncha, iwiarmampramuríncha núnaka enentáimtutsuk antsu ni pé_ñker túrunamun enentáimtusarti. Núnisan áchatniukai_t nuwā Yús-shuar ainia nujaj. Ni pé_ñker túramujaj nekas shiir awajmamsashtinkiait. ¹¹ Núwaka takamtak pujusar umiiniak unuimiararti. ¹² Nuwanka ashí iruntramunam unuiniartinniaasha tura ni áishrín akupkatniuncha suritiajai. Antsu takamtak pujustiniaiti. ¹³ Yus emka áishman_{kan} Ata_nkan najanamiayi. Nuyá nuwān Épan najanamiayi. ¹⁴ Tura Yus timian umirkach Ata_nka anannachmiayi. Antsu Épa ananna asa tunaan túramiayi. ¹⁵ Túmaitiat jurertin asa, emesnartinniumiā uwempraiti. Tura Yúsan nekas enentáimtak anenkartiniaitiuk tura esetar enentáimiuk pé_ñker wekasatniuiti.

3

Yus-shuaran wáinin

¹ Shuar Yus-shuaran wáinkiatniun wakerakka pé_ñker takatan achikiuiti. Nuka nekasaiti. ² Tura Yus-shuaran wáinin ajastinian wakerakka chíkich shuar nin yajauch áujmattsachmin átiniaiti. Nuwá apatka áchatniuiti. Niisha pé_ñker esetar enentáimin naka wekasatniuiti. Íraran ni jéen ti shiir itiaatniuiti. Pé_ñker jintinkratin átiniaiti. ³ Nampechusha tura suiir enentáimtichusha átiniaiti. Aya kuítian ikiaun_{kat}niun enentáimtuschatniuiti. Antsu tsan_{ka} átiniaiti. Kaje_{ch}usha átiniaiti. Chikichnancha wakerutkashtiniaiti. ⁴ Ni shuarin shiir akupeakui ni uchirísha umin tura shiir awajkartin ártiniaiti. ⁵ Kame ni shuarin akupkachminiaitkiun_{ka} žitiurak Yus-shuaran wáinkiat? ⁶ Yus-shuaran wáinniuka yama Yus-shuar ajasu áchatniuiti. Túmaitkiun_{ka} ti nan_{ka}amantu enentáimtumak iwianch_{jaj} métek tunaan túrak sumamattawai. ⁷ Yus-shuarchasha nin shiir enentáimtustin áiniawai. Núnischaik_{tiun}kia nin yajauch chicharainiakui íwianch wárik tunaanum ajuartatui.

Yus-shuaran yain

⁸ Núnisan Yus-shuaran yaincha pé_ñker asamtai ashí shuar nin shiir enentáimtustin áiniawai. Nii tana nuna tímatrusan umin átiniaiti. Nampechu átiniaiti. Aya kuítian ikiaun_{kat}niun enentáimtuschatniuiti. ⁹ Yúsnan ti pé_ñker nekaatniuiti. Tura esetar enentáimsatniuiti. ¹⁰ Emka pé_ñker ístiniaiti nuyá pé_ñker wekaakka Yus-shuaran yain átiniaiti. ¹¹ Nuwasha pé_ñker asamtai ashí shuarsha nin shiir enentáimtustin áiniawai. Tsanumniuchu antsu esetar enentáimiar nii chichaa

ímiatrusan umin átiniaiti. ¹² Yus-shuaran yainkia nuwan apatkachu átiniaiti. Tura ni uchiríncha ni shuaríncha ashí shiir akupin átiniaiti. ¹³ Yus-shuaran yaya_k nekas pénker takaakka shiir enentáimtusmin asa páchitsuk Kristu Jesus enentáimtamun arantsuk etserkamniaiti.

Yusna ana nu imiá nan_kaamas pénkeraiti

¹⁴⁻¹⁵ Wárik ítniun wakerajme. Túmaitiatnak sétaknasha Yus-shuarjái takastin nekaak tusan juna áatjame. Ashí Yus-shuar, iwiaaku Yusna ainia nu, nekas chichaman tuke emetawar akasmatainiawai. ¹⁶ Maa, imiá nekasaiti, Yus iwiainturmakma ashí nan_kaamas ti pénkeraiti. Tura júiti:

Yuska aents ajas jú nun_kanam paant wantinkiamiyi.

Yus Wakancha “ti shiiraiti” Nin tímiayi.

Yusa suntarísha Nin wáinkiarmai.

Ashí nun_kanam nu etsernakmai.

Túramtai ashí nun_kanmayá shuar umirkarmai.

Tura nayaimpiniam waketkimi.

4

Amuukatin tsawantin

¹ Yusa Wakaní ti paant tawai, amuukatin tsawant jeaakui untsurí aents Yus enentáimtustinian iniaisar antsu yajauch wakanin nemarsar íwianch jintíamun anturkartatui. ² Yajauch shuaran anturkartatui. Nu shuar ni enentái narúa áinin ásar ni tunáa túramun pen_ké enentáimtichu áiniawai. Tuma asa shiir chichainiayatan wáitrin áiniawai. ³ Nu shuar nuatnaikiatniun suritiainiawai. Núnisan chíkich chíkich yurumak yúatniuncha suritiainiawai. Warí, Yus ashí yurumkan najana asamtai Yus-shuar nekas chichaman nékainia ásar Yúsán yumi_nsar páchitsuk yuámin áiniawai. ⁴ Ashí Yus najanamu pénker asamtai nakittsuk antsu Yusan yumi_nsar yúatniuiti. ⁵ Yus-Chicham tana nújaisha tura yuuniak Yúsán yumi_nkias áujsamujái ashí pénker ajasuiti.

Jesukrístu pénker takarin

⁶ Wi tájamna nu chíkich Yus-shuar jintintiakmeka Jesukrístu pénker takarin átatme. Tura ashí Yus-Chicham pénker jintíamu unuimiaru asam nujái kakaram ajastatme. ⁷ Antar chichamsha tura netse chichamsha enentáimtutsuk nekas Yusna ana nu túratin kakaram ajasta. ⁸ Kame ayásh kakaram awajsatniusha ishichik pénkeraiti. Antsu Yusna nu túratin kakaram ajastinkia imiá pénkeraiti. Yamái ju nun_kanmasha yáinmaji tura ukunmasha Yusjái pujustin asakrin nan_kaamas pénkeraiti. ⁹ Nu imiá nekas asamtai ashí shuar nuna enentáimtustiniaiti. ¹⁰ Nekas iwiaaku Yus ashí shuaran uwemtikramniaiti, tura ashí Nin enentáimtuinia nú shuaran

nekas uwemtikratniuiti. Nu chicham imiá nekasaiti tu enentáimtakur katsekramainiakrincha kakaram takaaji.

¹¹ Nuka ashí ame jintíakum akupkatniuitme. ¹² Ti úuntchaitkiumnisha nakitrampraraín. Antsu péñker túrakum Yus-shuar unuiniarta. Chichammijíajisha, túramurmijíajisha, anenkratmarmijíajisha, nekas Yus enentáimtamujíajisha, tura esetra enentáimsam Yusna péñker túramujíajisha níisha túrawarat tusam iniaktusarta. ¹³ Wi jeatsaín Yus-Chicham áujeakum shuar jintintiata. Túram Yus-shuar ikiákárarta. ¹⁴ Yus-shuara uuntri Yúsna takastin anaitiamak uwejen awantramsarmái. Nuna túramainiak “Ju shuar kakarman Yúsnumían takustatui” túramarmia nu, kakaram ajasam tímiatrusam túratá.

¹⁵ Tuke enentáimjai wi tájamna nu enentáimtakmin ame péñker túruki wéamun nekaawartatui. ¹⁶ Túramna nusha tura unuiniamna nusha péñker wáinmamkata. Nu túratin pimpikiip. Nu túrakmeká uwemprattame amesha tura ujainiam nusha uwemtikrattame.

5

Yus-shuarjai itiur túratniuit

¹ Unta nu kakantraip. Antsu nekas ame apa nútiksamék chicharkata. Nátsasha nekas ame yátsumeá nútiksamék shiir awajsarta. ² Nuwá úuntchisha nekas ame núkua nútiksamék shiir awajsarta. Nuwá nátsasha nekas ame umaimia nútiksam shiir enentáimjai péñker awajsarta.

³ Waje nekas atsumin ainia nusha yáínkiarta. ⁴ Tura waje uchirtiniatkiuínkia tura tirañkrinniuitkiuínkia, nu shuar wajen wáinkarti. Emka ni shuarín péñker wáinkiatniun unuimiararti. Ni aparí anemia núnis awantuiniak shiir wáinkarti. Núnaka Yus ti shiir enentáimtawai. ⁵ Nekas waje níñki pujana nu Yúsna enentáimtak tsawáisha káshisha iniaitsuk Yúsna áujeawai. ⁶ Antsu aya wárastiniak wakera nuka iwiaakiat jaka áintsankete. ⁷ Tura wajenka ni shuari wáinkarti. Yus-shuaran yajauch chicharnaktin atsutí tusam wi tájamna nu ashí Yus-shuar ujakarta. ⁸ Shuar ni jeen pujuinia nuna nekaska wáinkiatniuiti. Tura nuyá chíkich shuárnasha yáíntiniaiti. Túrachkunka Yus tana nuna umíatsui, tura Yus-shuarcha nujai nankaamas yajauchiiti.

⁹ Yusa kuítrijíaj yáinniaiktiniatkiunka waje sesenta (60) uwi nankaamas takustiniaiti. Tura chikichik aishriniak takusu átiniaiti. ¹⁰ Ti paant péñker túrin átiniaiti. Ni uchirín péñker tsakatmaashit, íranan péñker táata tíniuashit, nekasmiancha enentáimtumar Yus-shuaran yáiniaashit, wáitiainia nuna wait-nenniuashit, tura chikichnasha péñker túriniaitkiunka maak.

¹¹ Tura sesenta (60) uwí takakchaka chíkich wajejaj iruraip. Ni ayashí wakeramurí Krístuiyá kanamtikiainiawai tura ataksha nuatnaikiatniun wakeruiniawai. ¹² Tura emka enentáimtiarmia nuna iniaisar sumamainiawai. ¹³ Nu arantcha nakimiainiak ántar irauwear chíkicha itiurchatrín áujmatsachminia nunasha áujmatin áiniawai. ¹⁴ Nu asantai waje úchipiak ainia nuka uyurtukar uchin takusarti. Tura nuwá nuatkamu takastinia nuna túrawartí. Tura ni túrunamurijjaj in kajertamainiaj nú shuar yajauch enentáimturmarcharti. ¹⁵ Kame nuik chíkich chíkich waje Krístuiyá kanakiar iwianchin nemarsaru ásarматаi nuna tájai.

¹⁶ Áishmansha nuwasha Yus-shuar ainia nu ni shuariin waje ákuinkia Yusa kuítrín seatsuk nii yaintí. Nujaj chíkich wajén nekas atsumainia nuna Yusa kuitri yáintatui.

¹⁷ Yus-shuara uuntri Yus-shuaran péñker wáinkiarua nu, nekas shiir enentáimtustin áiniawai. Tura akinkiamniasha áiniawai. Nekaska Yus-Chichaman etserkatniuncha tura unuiniartinniasha tuke takaaka imiá shiir enentáimtustinaiti. ¹⁸ Yus-Papiniumsha núnisan áarmaiti:

Jinkiaia saepen pakartaj tusa turu takaak nájakui ni nuji jinkiatáshtinaiti. Antsu ni wakerak yuati. Tu áarmaiti.

Tura nu arantcha áarmaiti:

Takakmasua nu nekas akinkiatniuiti. Tu áarmaiti.

¹⁹ Chikichik shuarak Yus-shuara uuntri tunaarín etser-tukmatainkia anturkaip. Antsu jímiarsha menaintiusha tsanumtsuk métek tuiniakui anturkata. ²⁰ Chíkich shuasha ni tunaarín ikiuktinian nakitiainia nu, ashí iruntramunam chicharkarta. Chikichcha, nuna ísar, ashamkarti. ²¹ Yussha ii Uuntri Jesukrístusha tura nayaimpinmayá suntarsha íimiainiamunam “túrata” tájame. Ashí shuarjaj niisháa enentáimtutsuk métekrak túrata. ²² Yus-shuara uuntri atí tusam wárik anaikiaip. Wárik túramka chikicha tunaarín sumamatame. Ashí tunaanum penké pachiinkiaip.

²³ Wakemjaj jau asam aya éntsak úmutsuk karía ishichik pachimpram umarta.

²⁴ Chíkich shuara tunaari wáitsatin imiá paant áiniawai wáitsatin tsawant jeatsain. Tura chíkich shuara tunaarinkia paantcha áiniawai antsu ukunam paant nekanawartatui. ²⁵ Núnisan péñker túramusha ti paant áiniawai. Tura yamá páantchaitiat tuke paantcha áchamniaiti. Páchitsuk nekanat-tawai.

6

¹ Takarniutirmesha, atumí uuntri ti shiir umirkatarum. Túrachkumñkia chíkich shuar Yusnasha ii unuiniamuncha yajauch áujmattsartatui. ² Atumí uuntri Yus-shuar áiniakka aya Yusjaj yatsum asantai nakiarchatniuitrume. Antsu nuna

naṅkaamas péṅker takarsatniuitrume. Warí, ame yayamna nu Yus-shuarchak ainia, tura ame aneamu yatsumchak ainia. Ame, Timiutéu, tu jintintiata.

Yusna wakeruktincha tura kuit wakeruktincha

³ Shuar ti shiir naka chichaman ii Uuntri Jesukristunu ana nuna nakitiak antsu niisháa chichaman étserkuṅka ⁴ nu shuar naṅkaamantu enentáimtumayat ántraiiti. Ni enentáimmianak chichaak aya ántar chichaman antumtik-naikiatniun chichaawai. Tura nu chichamjái nupetmak-taj tusar naṅkaamas áujmatainiak kajernaikiar tura katsekaikiar péṅker enentáimtunaituk ⁵ tuke kakannainiawai. Tura tu aujmatnaisatniun wakeruiniana nú shuar nekas-chichaman nékachu ásar aya tunaan enentáimtin áiniawai. “Yusna ana nujái kuítrintin ajasminiaiti” tuiniawai. Nu shuar pachisaip. ⁶ Shuar takakna nujaiṅ waraakka Yusna ana nujaiṅsha waraak ju nuṅkanmasha tura nayaimpinmasha nekas kuítrinniuiti. ⁷ Iis, ju nuṅkanam misuk támaji; núnisar misuk jiinkittiaji. ⁸ Tuma asamtai yurumkasha tura entsa-taisha takakkurkia nujaiṅ warasa pujustiniaitji. ⁹ Antsu kuítrintin ajastaj tuinia nu, tunaanum awaṅkemkar iniaini-awai. Tura antra nuna wakerukar itiurchatan wáiniainiawai. Nujái emesratniunmasha jeainiawai. ¹⁰ Kame kuit aneat-niuka ashí tunáanum útsutmakminiaitji. Chíkich shuar nuna wakerukar Yus enentáimtustinian iniaisar ti itiurchatjai ya-jauch awajmamsarai.

Yusna nu túrunat tusam kakaram ajástá

¹¹ Antsu ame Yus-shuar asam nuyá pisarta. Yus nekas enentáimtakum péṅker túrata. Waantu enentáimtsuk Yus péṅker umirkata. Aneakum katsuntrata. ¹² Yusna nu túrunat tusam kakaram ajástá. Tuke amuicha iwiaakma emetata. Nu túratniun Yus anaitiamkaiti, tura ame Yus nekas enentáimtamun untsurí shuar iruntramunam etserkaitme. ¹³ Yuska ashí iwiaaku átinian súwiti. Jesukristusha Punsu Piratuṅ nekas nuna ti paant ujakmiayi. Tuma asamtai Yusha Jesukristusha írainiamunam nuna tájame. ¹⁴ Ii Uuntri Jesukristu táatsaiṅ wi tájamna nu yapajítsuk tura yajauch chicharnakchamnia péṅker umiktá, tájame. ¹⁵ Tsawant jeamtai Jesukristu tatí tusa Uunt Yus, imiá penker asa, akup-kattawai. Nínkiti Yus. Akupniuncha Akupniuiti. Uuntjai naṅkaamas Úuntaiti. ¹⁶ Iwiaaku átinia nérenniuri Nínkiti. Ti tsáapninnium pujakui nuntumtuachminiaiti. Wáinchatai asamtai shuar penké wáinkiacharu áiniawai. Nínki ashí shiir awajsatniuiti tura Nínki tuke ashí akupin atí. Núnisaṅ ati.

¹⁷ Jú nuṅkanam kuítrintin ainia nusha naṅkaamantu enentáimtumascharti. Kuitcha yúpichuch menkakamnia

asamtai kuítniak enentáimtusar pujuscharti. Antsu iwiaaku Yus ashí in ti penkeran núkap súramaj nuna nekas enentáimtusarti. ¹⁸ “Pénker túratarum” tiarta. Tá kumin niisha shiir enentáijijai ni takakman ajamsarti. Nuyá nú pénker túramujai Yusai ikiáunkartí. ¹⁹ Nuna túruiniak kuítriniawartatui. Núnisan tuke iwiaaku átinian wáinkartatui.

Amuak Timiutéun akatramu

²⁰ Timiutéu, ashí ame túratniua nu tuke enentáimturta. Jú nunkanmaya ántar chichainia nu anturkaip. Tura wáitruiniak “wi imiá nékajai” tuinia nusha anturkaip. ²¹ Chíkich shuar nuna umirkar Yusaiya kanakiarai.

Wátsek, Timiutéu, Yus shiir yainmakti.

Nuke atí.

Papru TIMIUTÉUN Ataksha papin aar akuptukma

Papru Timiutéun áatramiania nu

¹ Wi Pápruitjai. Yus wakerakui Jesukrístu akatramuri aja-suitjai. Ashí Jesukrístujai tsaniñkiarun “Nekas iwiaaku átinian susattajai” tíniuiti Yus. Tuma asa nuna etserkat tusa akup-tukuiti. ² Aneamu uchiru, Timiutéu, ju papín áateajme. Yus Apasha tura ii Uuntri Jesukrístusha ti anenma ásar waitnen-tramainiak imiatkinchanum shiir pujustinian yainmakarti.

Krístunu takastiniaitjinia nu

³ Tsawaisha káshisha Yúsan áujeakun ámin tuke enentáimtusan ti shiir Yúsan yúmiñkijai. Winia weatur túrawarmia nútiksanak Yúsan enentáimtakun ti shiir awajeajai. ⁴ Kanakmiaj nui eantramiam nuna tuke enentáimtajme. Ataksha wararnaisatai tusan íitniun wakerajme. ⁵ Yus nekas shiir enentáimtiniaitmena nuna nékajai. Nukuchrum Ruítiasha tura ame nuku Eunisiasha emka Yúsan nekas enentáimtin ármiai. Amesha núnisketme.

⁶ Tuma asakmin tájame: Yusna takasái tusan winia uwe-jrun ámin awanteakui Yus kakarman suramsamia nujai atak kakaram takasta. ⁷ Yus sápij enentáin suramsachuitji. Antsu kakaram ajastinniasha anenaitniuncha péñker wekasatni-uncha suramsaitji. ⁸ Ii Uuntri Jesukrístunu etserkatin nat-santraip. Níiniun étserkun sepunam pujamusha étserkum nat-santruraip. Antsu Yus kakaram awajtamkui ame étseream nujai shuar yajauch túramainiakui surimiamtsuk wáitsatin enentáimtumarta. ⁹ Ii péñker túrichu árinin Yus in anenma asa uwemtikramar péñker túratniunam apujtamsaitji. Iisha Jesukrístujai tsaniñkiaru asakrin tura Yus nuna túratniun wak-erak túramiai. Yaunchu ju nunka atsaisha in tuke waitnen-trampramiai. ¹⁰ Turá yamá in Uwemtikkiartin Jesukrístu támatai nu anenmamu paant ajasuiti. Niisha jákatniun nu-petak emesramiai. Tura uwempratin chichamjai jáchatai iwiaakman paant awajturmajai.

¹¹ Nuna etserkat tusa Yus anaitiukmiai. Tura akattur Israer-shuarchanum akuptukmiai. ¹² Túruta asantai ti wáitiajai. Túrasha Yúsan nekas enentáimta asan natsamatsjai. Imiá kakaram asa amuukatin tsawant jeatsain ashí wínian susamaj nuna ti péñker waitruktatui.

¹³ Shiir chichaman jintintiamajmena nuke emetata. Jesukristujai tsaninkiu asar Yus nekas enentáimtaji tura nujai anenkratniuitji. Tuke núnismek túrata. ¹⁴ Yus ámin takasat tusa suramsamu shiir takasta. Tura Yusa Wakani in pujur-tamaj nuna kakarmarijjai túrata.

¹⁵ Asia nunkanmaya shuar mash iniaitiusarmai. Nu nekaachmaashum. Nu shuarnumia Pijirusha Ermujenessha armai. ¹⁶ Antsu Unisépuru niisháa shuar amai. Ti nukap shiir enentáimtikrurmai. Tura wi sepunam pujamuncha natsantruchamai. Ii Uuntri Kristu ni shuarincha waitnentrarti. ¹⁷ Rúmanam taasha natsantrutsuk eatak wáittsuk ini-aitiúschamiayi. ¹⁸ Ipiisu péprunam pujarin ti yainmakmiaj nu paant nékame. Tuma asamtai amuukatin tsawant jeamtai nincha Uunt Yus waitnentrati.

2

Kakaram ajasta

¹ Amesha, uchirú, Jesukristujai tsaninkiu asam nu kakarmajai kakaram ajasta. ² Untsurí ántuiniamunam wi etserkamaj nu, shuar umikmin ainia nu jintintiawaram chikichnasha jintintiawarat tusam akupkarta.

³ Ame ti penker Jesukristu suntari asam wáitsatin kat-suntrata. ⁴ Suntarka ni uuntri tana nunak umiktin asa chikich takatan pachintiukchatniuiti. ⁵ Núnisan nakurincha nakurustinia nujai métek nakurachkunka nekas penkeran awakmakun súsatniua nuna achikchamniaiti. ⁶ Ataksha núnisan shuar ajan takaana nu, ashí shuara nankaamas nuyan yúashtinkiait. ⁷ Wats, ju menaintiu métek-taku chicham áiniawai. Penker enentáimtakmin ii Uuntri Kristu paant awaj-turmastatui.

⁸ Jesukristu jaka nantakmia nu enentáimprata. Tura Uunt akupin Tawit ni weatri asamtai Jesussha uunt akupin átiniaiti. Núiti wi uwempratin chichaman étseraej nu. ⁹ Nuna étseraeakun sepunam jirujai jinkiamu pujakun wáitajai. Túrasa Yus-Chicham jinkiaichminiaiti. ¹⁰ Ashí shuar ni shuari arti tusa Yus achikiarua nuna yáintajtsan ashí itiurchatan katsunteajai. Nujai Jesukristujai tsaninkiaru ásar uwemprar tuke shiir pujusartatui Yusiai.

¹¹ Ju imiá nekasaiti:
Jesukristujai jákaitkiurkia Níjjajisha tuke iwiaaku pujustatji.

¹² Wáitiakrishia Níjjajai akupkattaji.

Natsantakrinkia Niisha natsantramprattaji.

¹³ Umichuitkiurniisha Ninkia tuke uminiaiti. Warí, Yuska ni enentáimmiyajin yapajniátsuk tuke umiktiniaiti.

Yusai natsaaraqij tusam ashi túrata

14 Shuar jintintiakum ju enentáimtikrata. Ii Uuntri Yus íimmianum chichamjai yajauch tunaiyarain tusam chicharkarta. Nu tunaitin penké áantrai antsu ántuiniana nuna yajauch awajenawai. 15 Yus-Chicham tuke enentáimjai penker unuimiátram shiir jintintia warta. Túrakum Yus penker írsat tusam penker takarin atá. Túramka Yusai natsaarchattame. 16 Jú nunkanmayanak ántar áujmatin ainia nujai kanaktia. Shuar nuna áujmatainiak tunaanum nuna nankaamas wáiniawai. 17 Ni jintiniamusha sunkurjai métek pampaawai. Íminíusha tura Piritiusha nu shuar áiniawai. 18 Niisha nekas chichaman iniaisar tura ashí Yus-shuar nantaktincha nankaamasai tuíniakui chíkich chíkich shuar Yúsan naka enentáimtuiniatsui yamaikia. 19 Túrasa Yus ashí nankaamas enentáimtustinia nuna paant awajsaiti. Júnisaiti: “Uunt Yus ni shuarin nékainiawai,” tura nuyá “Ashí Kristu shuari ainia nu tunaanumiá kanakiarti.”

20 Kuítrinniu jeen kurijiai najanamusha kuitjai najanamusha írunui. Nújainkia ti shiira nu takastin áiniawai. Tura numijiai najanamusha nuwejai najanamusha írunui. Antsu nújainkia nekasmiancha ainia nu takastin áiniawai. 21 Núniskete Yusa takatríjjai. Ashí tunaanumiá kanakir penker wekasar shiira nu takasmin átatji. Kame ashí penkera nu takasmin asakrin ii Uuntri Jesukrístu wakerak penker takata nuí apujtamsamniatji.

22 Natsá wakerutai iniaisam esetram penker wekasata. Amesha ashí shuar shiir enentáijiai Yúsan áujena nujai Yus nekas enentáimtakum aneniakum ti shiir pujustá. 23 Enentáimtsuk chichainiak aya ántar tunaitinian chichainia nu pachisáirap. Nusha aya némasmanainiawai. 24 Ii uuntri Jesukrístu takarniuka chíkich shuarjai nemasmanaikiashtiniaiti, antsu ashí shuarjai penker nawamnaikiatniuiti. Tura waitnentáimturar penker jintintiatniuiti. 25 Tura umircha shuarnasha Yus ni enentáin yapajtiakui nekas chichaman shiir enentáimturar tusa penker enentáijiai jintintiatniuiti. 26 Nujai íwianch ni wakeramu túrawarat tusa achikmaitiatan uwemprartatui.

3

Amuukatin tsawant jeatemamtai aents ti tunaan túrawartatui

1 Amuukatin tsawant jeakui ti itiurchat átatui. 2 Shuar aya níñki enentáimtumasartatui. Kuítian ti wakeriartatui. Nankaamantu enentáimtumarartatui. Yúsnasha yajauch chicharsartatui. Aparíncha umirkachartatui. Yumiñsatniuncha nékachu ártatui. Ashí Yúsnancha

enentáimtuschartatui. ³ Aneetsuk waitnenkartichu ártatui. Tsanumin ártatui. Ni ayashí wakeramun katsuncha ártatui. Aya kajen ártatui. Ashí péñker túrinia nuna nemasrí ártatui. ⁴ Amikríncha surukartatui. Arantsuk tunaan túrawartatui. Waantu enentáimin ártatui. Yúsan nakitrar aya ni wakeramunak enentáimtusartatui. ⁵ Yusa kakarmari “ántraiiti” tuíniak péñker umirkachartatui. Túrasha Yúsan umirua núnisar túrawartatui.

Nu shuar penké pachisáip. ⁶ Nu shuarsha shiir chichayatan anan̄kawar jeá wáiniawai. Tura nuwá esetar enentáimchan nekas tunaarinniun anan̄kainiawai. Nu nuwá ashí yajauch wakeramujai anan̄nainiawai. ⁷ Tuma ásar ashí shuara chichamen tuke ántuiniayatan nekas-chichaman nekaatniun tujintiainiawai. ⁸ Yaunchu Ejiptu nunkanam Muisais uunt akupniujai chichaakui jimiará iwishin, Jánissha Jámprissha, Muisaisan kajerainiak “ántar tawai” tiarmiayi. Núnisan̄ ju shuar nekas-chichaman nakitiainiawai. Naka enentáimiainiachu ásar Yúsnan naka jintiátniun penké tujintiainiawai. ⁹ Túrasha nuna nan̄kaamas kuakchartatui. Shuar ti paant ni netse túruiniamurín nekarawartatui. Núnisan̄ nu jimiará iwishniujai túrunamiayi.

Amúak Papru Timiutéun akatramiania nu

¹⁰⁻¹¹ Tura ámeká wi tímiaj nu umireame. Wi Yusjai shiir wekaamusha métek túriniaitme. Wi enentáimmiasha nékaitme. Áintruiniakui wáitsamaj nu nékame. Tura Yúsan enentáimtakun tura anen̄kratkun shiir enentáijjai katsuntramjai. Antiukía péprunmasha, Ikiuniu péprunmasha, Ristra péprunmasha ashí yajauch túrutawarmatai wáitsamaj nu paant nékame. Túrasha ii Uuntri uwemtikrurmiayi. ¹² Nekasaiti, shuar Jesukrístujai shiir túrataj tákun̄ka ni nemasrí áintiam ti wáitsatniuiti. ¹³ Tura ashí anan̄kartin ainia nusha kame ashí yajauch shuarsha nú yajauch túrukiar wétatui. Iwianchjai anan̄kamu ásar chikich-nasha anan̄kiar weartatui.

¹⁴ Antsu ámeká unuimiam nu imiá nekasaiti tu enentáimtakum tuke emetata. Jintinramawarmia nú shuarsha wáitrichua nu nékame. ¹⁵ Úchichinmayan̄ Yus-Chicham nékame. Yus-Chichamka uwempratniun jintinramamniaiti. Nusha “Jesukrístu nekas enentáimtakum uwempratame” tawai. ¹⁶⁻¹⁷ Ni Papirín áarat tusa Yus ni shuarín áamtikramiayi. Ashí shuar ni Chichamen nekaawar péñker túrawarat tusa túramiayi. Tuma asamtai Yus-Papí shuartin unuiniakartin asa imiá penkeraiti. Tunáa túrajnia nu Yus-Papíjjai nekatatniuitji. Tura awajiakrincha Yus-Papí núnaka paant jintinramji. Nuyá naka wekasatniun jintinramji.

4

¹ Ii Uuntri Jesukristu amuukatin tsawantaj Uunt Akupin ajas iwiaakuncha tura jákaruncha ashí péñker túramuncha tura yajauch túramuncha nekaattawai. Tuma asamtai Niisha tura Yus Apasha íimiainiamunam juna akateajme. ² Uwempratin chicham etserkata. Yúpichuchia nuisha tura itiurchata nuisha tuke etserkata. Yus-Chicham nekas enentáimtikrarta. Tura shiir enentáimtusam chicharkam yáintaj tusam unuiniararta. ³ Ukunmanka péñker chichaman nakitrar ii wakeraj núchik nekaatai tusar, shuar teremak péñker pujuschamnia nekapea áintsan, nankaamas unuimiaru atai tusar, nánkamas unuikiartinian ti untsurí eakartatui. ⁴ Nekas shiir chichaman iniaisar ikiuiniak ántar áujmatsamun enentáimtusartatui. ⁵ Antsu ámekatuke péñker túratin wakerakum ashí itiurchat katsuntrata. Uwempratin chicham étserkum takatrum péñker umikta.

⁶ Ishichik ajasai winia iwiaakmar Yusaj surumaktin. Mantamnan nayimpiniam wétin jeatimiai. ⁷ Shuar kakaram maanainia núnisnak tuke kakaram takasmajai. Tséken péñker tsekea áintsanak yawetsuk takasmajai. Tura Yus-Chichaman nekas akasmatkun péñker wáinkiaitjai. ⁸ Tuma asamtai tawasap nukajaj najanamu tsékena susamua áintsan wisha péñker túramunam akinkiaittajai. Tura aya wíniak akirkashtatui. Antsu ashí ni tátinian shiir enentáijijaj nákainia nunasha nekas péñkera nuna akikiartatui.

Timiutéu túratin akatmamturma

⁹ Wárik iiraitin enentáimturata. ¹⁰ Témas aya jú nunkanmayanak wakerak ajapa ikiuruk Tisarúnikia péprunam weyi. Tura Kresentisha Karasea nunkanam weyi. Núnisan Títiusha Tarmasia nunkanam weyi. ¹¹ Túrawarmatai aya Rúkas wijijaj pujawai. Márkus eaka wáinkiam ame itiartitia. Jui ti penker yainkiamniaiti. ¹² Tura Tíkikiunka Ipisiu péprunam akupkamjai. ¹³ Tura winiakum nuparam pushí Trúas péprunam Karpu jeen ikiukmiaj nu takurtuktia. Núnisan nuparam papísha tura nekaska penké papí takurtuktia.

¹⁴ Arejántruca jirujaj takawa nu ti yajauch awajtusuiti. Túrutaitkiuisha ni túramujaj métek Yus akiktí. ¹⁵ Nu amesha péñker wáinkiatá. Ii étsereamun penké nakitiawai.

¹⁶ Emka akupniunam ayamprumaktaj tusan chichaakui chikichkisha yáintkiacharmiai. Antsu sapijmiainiak ikiurkiarmiai. Yus nu shuaran yajauch enentáimturcharka maak. ¹⁷ Tura ii Uuntri Jesukristu ni kakarmarin surus yaintkiamiyai. Nujaj uwempratin chichaman ashí nunkanam Israer-shuarcha antukarti tusan etserkamjai. Tura núnisan akupniunmayasha ii Uuntri uwemtikrurmiyai. ¹⁸ Tura

núnisan ashí yajauchia nuyá uwentikrurmatai Nii akupeana nui nayaimpiniam jeattajai. Nin̄ki tuke shiir awajnasti. Núnisan atí.

Amikmaamiania nu

¹⁹ Piriskancha ni áishri Akirancha amikmainiajai. Núnisnak Unisépuru shuarincha amikmainiajai. ²⁰ Erastu Kurintiu péprunam juakmai. Tura Trúpimiunka Miritiu péprunam jaan ikiukmiajai. ²¹ Michá nantu jeatsain̄ iiraitin enentáimturata. Tura Eupurusha Putentesha Ríniusha Kráutiasha tura ashí Yus-shuarsha amikmaatmainiawai.

²² Ii Uuntri Jesukrístu ámijiai tsanin̄ pujustí. Tura Yus ashí pénker waitmakarti.

Nuke atí.

Papru TITIUN papí áatramu

Papru Titiun áatramiania nu

¹ Wikia Pápruitjai Yusa takarniurí. Tura Jesukrístu akatramuríntjai. Yus achikma ainia nú shuar niisha antukar Yúsán umírkarat tusan akatramuitjai. Shuar nuna nekaawar péñker wekasartatui. ² Tura nú arant, nú shuarsha tuke iwíiaaku pujusarat tusan étserējai. Nú shuarnasha, nuñkan najantsuk, “uwemtíkrattajai” Yus tímiayi. Tura Niisha wáitruatniun tujintiawai. ³ Tura yamaikia, tsawant jeamtai, nuna nekaawarat tusa ii Yusrí uwemtíkkiartinia nu, winia chichamur ujakarta tusa, winia akatturmiayi.

⁴ Titíu, wí Yusna étserma umíkiu asakmin winia uchirua áitkiasnak papin áateajme. Iis, iíjjai métek Yus nekas enentáimtatsjik. Yus waitnentrama asa shiir awajtamsati tusan wakerajme. Tura ii Aparí Yussha, ii Uuntri Jesukrístusha, Uwemtíkkiartin ana nu, enentáimin imiatkincha awajtamsati, tajai.

⁵ Wats, wí iwíarachmajna nu ame iwíarata tusan Kreta nuñkanam ikiukchamkajam. Tura “ashí péprunam Yus-shuar írunmanum, Yus-shuwaran wáinkíarat tusam shuar anaikiarta” tíchamkajam.

Yus-shuwaran wáinin

⁶ Yus-shuwaran wáinin júnis atí. Niisha makuuchmin ti péñker wekasatí. Tura chíkichík nuwéntin átiniaiti. Tura ni uchirísha Yusna ártiniaiti. Tura shuar yajauch chicharsachmin niisha tutupnisan wekain ártiniaiti. ⁷ Enentáimprata. Yus-shuwaran wáinin Yusna ana nuna wáinkiat tusa anaikiamuiti. Tuma asantai nekas makuuchmin wekasatniuiti. Waantu enentáimtumatsuk, kajetsuk, tura nampechu átiniaiti. Chíkichan waitkiau áchatniuiti. Tura ananma kuítrintin ajastaj tusa wakerukchatniuiti. ⁸ Antsu shuar ni jeen írar wini-ana nuna itiaatniuiti. Tura ashí péñker ana nuna wakerin, esetas enentáimin átiniaiti. Tura ju nuñkanmaya akupeamuncha, núnisan Yús akupeamuncha umírkatniuiti. Tura níñki ímiastiniaiti. ⁹ Tura nú arantcha, chíkich shuáran péñker jintintrataj tusa tura Yus-Chichaman nakitin áinia nuna nupetkataj tusa, Yúsnumia nekas chichaman, nii unuímiátramiania nuyá kanakchatniuiti. ¹⁰ Nekaata. Umichu ti irunui. Niisha ántar chichau ásar ananmau áiniawai. Israer-shuar weenam ti irunui nú shuar. ¹¹ Niisha kuítian achiktaj

tusar wakeruiniak, yajauch unuiniarchatniua nuna unuini-
ainiawai. Nuna túruiniak untsurí shuáran, ni írutkamurijíai
yajauch enentáimtikiaiiniawai. Tuma asamtai auka, ni wene
epetkatniuiti, ántar chichainiakui. ¹² Warí, imia Krétanmaya
chichaman etserin júna tíchamka: “Krétanmaya aentska tuke
wáitrin áiniawai. Tura nákitiat tí yurumin áiniawai. Yajasma
núnisarú áiniawai.” Nuna tíchamka. ¹³⁻¹⁴ Maa, niisha nékasan
tímiayi. Nu tuma asamtai, Titíu, Israer-shuar ántar tuinia
nuna, Yus-shuar anturkachartí tusam, tura nekas chichaman
nakitiana nuna akupeamurín umirkachartí tusam, antsu
Yúsar nekas umirkarat tusam, umichu shuar kakaram
chicharkarta.

¹⁵ Enentáimprata. Yus-shuarka, ni enentái chamir ajasu
ana nuka, ashí ni wainnia nuna péñkernak enentáimtaiwai.
Tura chíkich shuar, Yúsar umirkachu asa, ni enentái wapik
asa, péñker ana nuna enentáimtustinian tujintiawai. Achapai
enentáimiuk, péñkercha ana nuna “péñkeraiti” tawai. ¹⁶ Tura
niisha “Yus-shuaraitjai” tuíniayatarú, Yúsar umirtsuk niisháa
túruiniawai. Tuma ásar mujjmiaí áiniawai niisha. Umichu ásar
péñkeran túratniun penké tujintiainiawai.

2

Péñker jintintiatin

¹ Tura amesha, Titíu, péñker chicham etserkata. Yus-
Chicham tátsuna nu etserkaip. ² Antsu áishmarú katsunt Yusna
ainia nu, jú jintintrata. Nampechu, nánkamas enentáimcha,
esetas enentáimin arti. Yus tana nuna umirin tura anenain
arti. Ni itiurchatríin Yúsar enentáimtusar katsuntin arti.
³ Tura núnismek nuwá katsunt Yusna ainia nusha jú jintin-
trata. Niisha núnisararú Yus-shuarti túramnia nuna péñker
túrawartí. Tsanumin tura nampen áchartí. Antsu péñker
wekasatniun unuinin arti. ⁴ Niisha yama nuatnakua nuna ni
áishrín ni uchiríncha nekas aneetniun unuiniarartí. ⁵ Júnasha
jintintrartí. Esetas enentáimin, péñker wekain ártiniaiti. Ni
takatrín péñker takastin áiniawai. Ni áishrín umirin ártiniaiti.
Tura waitnentin ártiniaiti. Yus-shuarcha Yus-Chichaman ya-
jauch chicharkararú tusar túrawartiniaiti. “Tu jintintrarta”
titiá.

⁶ Nuyá, Titíu, natsa áinia nu “nánkamsar enentáimsarum
wekasairap” titiá. ⁷⁻⁸ Tura amesha, Titíu, ashí tsawant péñker
wekasatá. Nu natsa wí túramun júkiar nunak túrawarmi tusam,
nu túrata. Tura anturtamna nu “nekaschapitia” tíjín tusam, es-
etsam enentáimsam, Yus-Chicham tana nu ímiatrusmek jintin-
tiata. Nú túrakmínkia, Yus-Chichaman nakitiana nu shuar
“Titíu nánkamas chichaawai” titiaj tukamá, natsaamak tujin-
tramkattawai.

⁹ Takarin ainia nu, ni takartairin umirkarat tusam jintintrarta. “Shiir enentáimsarum, yajauch áimtsuk shiir umirkatarum” titiá. ¹⁰ “Kasamkairap, tura anan̄kawairap. Iis, péñker túrakrumka, takarniuitiatrum, shiir tura asarum ii Uwemtikramin Yusr̄ chichamen̄ shíiraiti, tu enentáimtikrattarme” titiá.

¹¹ Yus in waitnentrana asa ashí áentstin uwemtikramprataj tusa wakerutmaji. ¹² Kame Yus waitnentrana asamtai, tunáa ana nu iniaisatniuitji, nu nékaji. Tura ju nun̄kanmaya yajauch ana nu wakerukchatniuitji. Tura antsu ju nun̄kanam pujayatrik esetsar enentáimsar anan̄ma wekatsuk tuke tsawant Yus anear wekasatniuitji. ¹³ Túrar ii Yusr̄ Jesukristu, uwemtikramajnia nu, imiá shiir iwiarnar tatí tusar nákastiniaitji. ¹⁴ Jesukristuka in jarutramkamiaji, ii tunaarin̄ia uwemtikrampratajtsa. Tura, Winia ajasar tuke enentáijjai péñker túrawarat tusa, ii tunaarin̄ japirtampramiaji.

¹⁵ Titiu, anaikiamu asam arantutsuk nu jintintrata. Yajauch ana nuna túrawarain̄ tusam chicharkarta. Péñkeran túruinia nu ikiakárta. Tura yajauch chichartukarain̄ tusam tuke péñker wekasata.

3

Yus-shuarti túratin

¹ Titiu, shuar enentáimtikrarta. “Ashí akupin ainia nusha tura chikich uunt akupena nusha antukrum umirkatarum” titiá. “Péñkeran túratin ana nuna páchitsuk túrattajai” titiniaitrume” titiá. ² “Tsanumprairap, kajernaikiairap, antsu shiir enentáimtunaistarum” titiá. Nan̄kaamantu enentáimtumatsuk ashí shuar péñker awajsatarum tusam tu jintintrarta. ³ Warí, iisha núnisrik Yus-shuar ajatsuk nan̄kamsar wekaimji, Yuska umirtsuk. Tura iwianch emetamu pempée wekaimji. Tura ii ayash̄i wakeramu tuke túriniuyaji. Tunaasha túriniuyaji. Chíkich atankittsar wakeriniuyaji. Chíkich shuar kajerkar tura nuamtaksha kajernainiuyaji. ⁴ Túrasha Yus in uwemtikkiartin ana nu, anen̄kratin asa, ni anen̄krattairin ashí áentsun iniaktus in uwemtikrampramiaji. ⁵ Yus in waitnentrana asa, iikia júkesha péñker túrachma ain̄ uwemtikrampramiaji. ¿Itiurak uwemtikrampramiaj? Ii tunaarin̄ asakátrampramiaji, nijiaktinia áintsan̄. Tura Yusa Wakan̄i pujurtamkurin, ii iwiaakmarin̄ yamarman amasmaji. ⁶ Jesukristu jakamujai Yus in emeenturmatsuk ni Wakan̄in suramsamiaji. ⁷ In anenma asa nuna túramiayi. Nuñkia iisha yamaram awajsamu asar tuke iwiaaku átin, ti wakerimiaj nu íniuiti. ⁸ Nuka ti nekasaiti. Tuma asamtai Yús̄an umirkarmia nu, péñker túratniun tuke wakerukarat tusam tuke jintinki

wetá. Wi tímiajna nu, pé_uker asamtai, ashí aents nuna nekaatniun atsumainiawai. ⁹ Shuar netse áujmatainiakui ameja pachisaip. Tura “aya winia úuntruk pé_uker áiniawai” tu chichasaip. Tura Israer-shuara akupkamur_i itiurkit tusa shuar ti áujmatainiakui nusha pachisaip. Ántraiti nuka. Pé_uker wekasatniun yayatsui.

¹⁰ Shuar tsanumprur yajauch enentáim_tunaimtikiana nu chicharkata. Ántachku_iñkia ataksha chicharkata. Tura penké tujinkiamka j_iiki akupkata. ¹¹ Nuj_i j_una nekaamniaitme: nuna tura asa awajiruiti. Tura ni tunaar_iñiñ jakattui.

Papru wakerana nu

¹² Wisha Artemasan akatran akuptukchatjameash. Nin akupeachkunka Tíkikiun akuptuktatjame. Nii jeamtai amesha wari winitritia Nekapuris péprunam. J_ui Nekapuris-num yumí nantu asamtai seturan pujuttajai. ¹³ Senas, chichaman ti unuimi_aru pujana nu, amikiur Apurusj_i jeamtai, nii atsumtsuk shiir weartí tusam, ame túratin jeamna nu yaiñta. ¹⁴ Iiní Yus-shuar ainia nusha pé_uker túratniun tura atsumainia nunasha yáin_tinian nekaawartí. Ántar pujusar_iñ tusan nuna tajai.

¹⁵ Ashí wijj_iai pujuinia nu amikmaatmainiawai. Tura ii amikr_i Yus-shuar ainia nu amikmaatruata. Atumniasha Yus shiir yainmakat tusan wakerajrume. Nuke atí.

Papru JIRIMIÚÑKAN papí áatramu

Papru Jirimiúñkan papin áatramiania nu

¹ Wi Papru ju papin áaran akuptajme ámin, Jirimiúñká. Ii yachi Timiutéusha juna akupturmawai. Wi Jesukrístu takaru asan sepunam pujajai. Ame iijiai tsanínkia takáa asakmin ju papin akuptajme. ² Núnisan ame jeemiin Yus-shuar irunainia nunasha tura ii umaí Apiancha tura Arkipiuncha iijiai ti kakaram takasu asamtai ju papin akuptajrume. ³ Yus ii Apari tura ii Uuntri Jesukrístu shiir enentáimturma ásar yainmakarti imiatkinchanum tuke shiir pujustinian.

Jirimiúñ pénker Yus-shuar ámiayi

⁴⁻⁵ Ame Uunt Jesus shiir enentáimtakum ashí Yus-shuar ainia nusha aneamun antukjai. Nuna antukan ámin ti shiir enentáimtakun Yúsan áujeakun yúminíajai. ⁶ Áujeakun chíkich shuarsha ámijiai métek Yúsan nekas enentáimtuiniak ashí pénker ana nuna ti paant nekaawarat tusan seajai. Ashí pénker ana nuka Jesukrístu shiir awajsamujai takakji. ⁷ Wisha ame anenkratmajai ti shiir enentáimtakun waraajai. Yatsurú, ámijiai ashí Yus-shuarsha shiir enentáimiainiawai.

Papru Unisemun waitnentratniun Jirimiúñkan seamiani nu

⁸ Nu asamtai kakaram tátsujme. Kame wakeraknaka Kristu akatramu asan “Ju túrata” túminiatiame. ⁹ Antsu aneakun aya júnisan tájame. Wi Papru úuntach asan tura Krístun takarkun sepunam pujakun ¹⁰ Unisemu waitnentrati tusan seajme. Niisha wi ujakmajai Yus-shuar ajasu asa winia uchirua áintsankete. Sepunam pujayatan ni aparíya áintsanak ajasjai.

¹¹ Nuikkia Unisemu ántrauyi antsu yamaikia aminiisha winiisha yáimniuiti. ¹² Ataksha awantajme. Wi ti penker aneamu asamtai pénker itiaata. ¹³ Wi Yus-Chichaman étserkun sepunam pujajai. Túmakun ame yaja pujakun yáintkiatin tujintiakmin nii antsu wijiai pujus yáintkiat tusan wakerimjai. ¹⁴ Túrashá ámin ujatsuk túrachmin enentáimpramjai. Kame ame wakerakum útsukchamujai “pujustí” tákumnínkia maak. ¹⁵ Júnissha enentáimpramniati. Unisemu ishichik tsawant menkakamai tura yamaikia waketki ámijiai tuke pujustatui. ¹⁶ Kame yamaikia emetachma antsu ame aneamu yátsumeá áinis átatui. Nuka

ti peñkerchakait. Wisha nin ti aneajai. Tura yainmakmin asamtai tura Krístunam ame yatsum ajasu asamtai winia iniankattsam aneashtapash.

¹⁷ Wisha ti peñker amikrumchakaitiaj. Tuma asam winia itiaarua nútiksam shiir awayáta. ¹⁸ Yajauch awajtamkaitk-iuĩkia tura ámijiaj tumashitkiuisha wi akiktatjai. ¹⁹ Wi Papru nekas winia uwejrujaj juna áaran ti nekas akiktatjame tájame. Túrasha winia tumashitmena nuna páchittsujme. Kame wi ujakam Yus-shuar ajaschamkum. ²⁰ Wátsek, yat-surú, amesha Yus-shuar asam wi seajme jú túrutata. Kristu enentáimtakum shiir enentáimtikrurta.

²¹ Ti peñker uminiaitme nuna nékakun júnisan áatjame. Tura wi seajmena nuna nan_{ka}amas túrattamna nuna nékajai. ²² Ayu. Átum Yus áujturkurmin Yus winia tsan_{kat}ruk_{tat}tui atum_{jin} iiraitniun. Tuma asamtai wi nu_j jean pujustin iwiarturata.

Amikmaamiania nu

²³ Épaprassha niisha Jesukrístunu étseruk sepunam wiji_{aj} pujus amikmaatmarme. ²⁴ Núnisañ Márkussha Aristárkusha Témassha tura Rúkassha Yus-Chichaman etserkatniun yáintiainia nusha amikmaatmainiawai.

²⁵ Ii Uuntri Jesukrístu atumniasha ti shiir yainmakarti. Nuke atí.

ISRAER-SHUARAN papí akuptukma

Yus ni Uchiríjiaí ni chichamen ujatmakji

¹ Yáunchuka Yúsnan etserniujai chichas Yus ni enentáimmian ii úuntrin ujakmiayi. Tura untsurí nunkanmasha tura untsurí uwitincha niisháa niisháa chichas ujakmiayi. ² Antsu ju amúamu tsawantajkia ni Uchirí Jesukristujain ashí Niiniu ana nuna ujatmakji. Yus Niijiaí ashí írrunna nuna najana asa mash Nin súsaiti. ³ Níyaiti Yúsán imiá métek nakumeana nu. Tura Níyaiti Yus nankaamas shiira nuna paant awajeana nu. Niisha aya ni chichamejai kakarma nujai ashí írrunna nuna wáiniuk emeta pujurui. Tura ii tunaarin nijiatramak akupin pujutainium, Yusa untsuurinj, pujusmiayi.

Nayaimpinmaya suntarjai Kristu nankaamantuiti

⁴ Yusa Uchirí nayaimpinmaya suntarjai imiá nankaamantu awajnasuiti. Tura ti nankaamantu asamtai Yus nayaimpinmaya suntar nankaamas Nin ti shiir awajtawai. ⁵ Wátsek, nayaimpinmaya suntaran chikichkinkesha juna tútsuk Krístun tímiayi:

“Ame winia Uchiruitme. Túmaitkiui yamáikia winia kakar-marun átakeajme.”

Tura núnisan tímiayi:

“Wi ni aparí átatjai, tura Nii winia uchir átatui.”

⁶ Tura jú nunkanam ni Iwiairín akupeak tímiayi:

“Ashí Yusa suntarj tikishmatrarti.”

⁷ Nayaimpinmaya suntarnan júnis chicharui:

“Nayaimpinmaya suntarín takartursarat tusa nasea áintsan awajsaiti. Ni suntarín chárpia áinis akupeawai.”

⁸ Antsu ni Uchiríniun tímiayi:

“Ame, Yusá, tuke akupniuitme. Ame akuptairmesha aya péñkeraiti. ⁹ Péñkera nu anenaitme, tura yajauchia nu muíjniuitme. Tuma asamtai ashí shuar shiir warartamu asamtai Yus, ame Yúsrúm, ashí akupniujai nankaamas uunt awajtamsaiti.”

¹⁰ Nu arantcha tawai:

“Uuntá, yámankamtaik Ame ju núnka najanamiamé. Túram ame uwejmijiaí nayaimpisha najanaitme. ¹¹ Nusha mai amuukarmataisha Ame tuke pujuttame. Tarachjai métek mamurartatui. ¹² Tura ipijram ikiustatme. Pushiya áintsam yapajiáttame. Túrasha Ámeká núnismek átatme. Játsuk tuke pujuttame.”

¹³ Ataksha tímiayi:

“Akupin pujutainium, winia untsuuruini, pujusam nákarsatá. Ame nemasrumin nupetkan Ámin umirtamkarti tusan amastatjai.”

Núnisan̄ nayaimpinmaya suntaran penké tíchamiayi. ¹⁴ Antsu Yusa suntarí wakan ániak ashí shuar uwemprartatna nuna yáinkiarat tusar Yus akupkamu áiniawai.

2

Anearta. Uwempratin Chicham nakitrashtiniaiti.

¹ Nuikia Kristu ti uunt asamtai ashí Niiniu antukajnia nujai kanakchatin ti enentáimtustiniaitji. ² Yaunchu nayaimpinmaya suntar Muisaisan súsarmia nú akupkamu nekas uminkiatniuyayi. Shuar umitsuk tunaan túramtai ti kakaram asutniáwarmiayi. ³ Antsu ii Uuntri Krístuka Uwempratin Chichaman emka itiamiayi. Tura imiá nekas tuíniak Nin anturkaru in ujatmakarmaji. Tuma asamtai Uwempratin Chicham nakitiakrikia nuna nan̄kaamas uwemtsuk asutniáttaji. ⁴ Kame nu arantcha, Uwempratin Chicham ujatmainiakrin imiá nekas tuíniawai tusa aents túrachminian kakarman Yus iniakmasmiayi. Núnisan̄ ni Shiir Wakan̄ ni wakerana núnisan̄ niisháa niisháa kakermajai takamtikeawai. Nujai Yus-Chichama nu paant nekanamni-aiti.

Jesukrístu aents ajasmiania nu

⁵ Ayu. Nuik áujmatkur “jú nun̄ka amuukattawai” taji. Tura yamaram nun̄kanam nayaimpinmaya suntar akupkacharta-tui. ⁶ Antsu ii akupkattajnia nu, Yus-Papinium áarmaiti:

“¿Shuarti warimpiaitiaj ame imiá enentáimtitniusha?

Kame, ¿shuar warí asamtai pujursataj tamea?

⁷ Ishichik tsawant nayaimpinmaya suntarjai péejchach awajsamiame. Túram ti shiir nan̄kaamas uunt awajsattame. Ame najanamun ashí akupkati tusam tsankatkattame. ⁸ Ashí nin umirkarti tusam susattame.” Tu áarmaiti.

Yus “ashí nin umirkarti” takui nin umirkashtinkia atsawai. Túrasha yamaikia ashí umirainiaka wáintsuji. ⁹ Tura wáinjinia nu Krístuiti. Niisha aents ajas ishichik tsawant nayaimpinmaya suntarjai péejchach ajasmiayi. Yus ni shuarin ti aneak jarukarti tusa wakerimiayi. Tura ni wáitias jakamujai yamaikia ti shiir nan̄kaamas Uunt awajsamuiti.

¹⁰ Ashí írúnna nu Yus najanamun ásar ni wakeramun umiktin ainiawai. Tura ashí ni uchirisha ni shíirmarin pachiinkiarat tusa wakerawai. Tuma asa Yuska Jesukrístun, nu shuaran Uwemtiknia nuna, ni waitsmujai nekas Uwemtikkiartin awajsamiayi. ¹¹ Yusna atí tusa shiir awajsamuncha tura Kristu

nin shiir awajea nunasha Yuska mai metek ni Aparínti. Nu asamtai Yusa Uchirí nu shuaran “yatsur” títinian natsantat-sui. ¹² Yus-Papinium núnisan tawai:

“Ame náarmin winia yatsurun ujakartatjai. Ashí iruntramunam kantampruattajme.”

¹³ Ataksha ni shuarijiai métek enentáimtamun tawai:

“Yúsan ti shiir enentáimtustatjai.”

Tura ataksha:

“Yus surusmia nú uchirjai Yúsan umirkun pujajai” tawai.

¹⁴ Tura nu uchi aents ásar matai núnisan Jesussha aents ajasmiayi. Tura aents ajas jaka, iwianchin, jatai nérenniurín, ashí emesramiayi. ¹⁵ Tura ti untsurí shuaran uwemtikrarmiayi. Nu shuar yaunchu jákatniun ashamainiak tuke wáitin ármiai. Antsu ni jakamujai yamá ankant áiniawai. ¹⁶ Maa, imiá nekasaiti, nayaimpinmaya suntaran yáintaj tusa táchamiayi. Antsu ashí Apraám weean, ashí Yus-shuar ainia nuna yáintajtsa támiayi. ¹⁷ Túratin asa penké métek ni yachía áinis ajasmiayi. Nujai in tuke waitnentrampramniaitji. Tuma asa Yúsnan pujurniu uuntri ajas Yúsan tuke penker chichartamsamniaitji. Núnisan murikiun maa Yus súsatniua áintsan ni jakamujai ashí shuara tunaarín tsankurniuiti. ¹⁸ Tura imia nínki waitsa asa tura íwianch nekapsamu asa yamaikia iisha wáitiakrincha tura íwianch nekapramkurnisha yainmakminiaitji.

3

Jesus Muisaisjaisha nankaamantuiti

¹ Tuma asamtai, penker yatsuru, atumniasha Niiniu atí tusa Yus achirmakuitrume. Tuma asarum Kristu Jesus penker enentáimtustarum. Niisha Yus nekas Akatramuyayi. Tura ashí Yus-shuar ajasarua nujai Yúsnan pujurniu uuntri núnisaiti. ² Nu atí tusa Yus anaikiamiayi. Túramtai Kristu nuna ti penker takasuiti. Núnisan Muisais ashí Yusa aentsrín, Israer-shuar armia nuna ti shiir wainkamiayi. ³ Túrash Muisaisjai nankaamas Kristu ti shiir awajnasuiti. Jeajai nankaamas jea jeamniuka nekas penkerchakait. Núnisan Kristu Muisaisjai nankaamas penkeraiti. ⁴ Kame ashí jean shuar jeamtsuk. Tura Yus ashí írunna nuna najanaiti. ⁵ Wats. Muisais Israer-shuaran wáiniuk Yusa Jeen takastinia áintsan penker takarniuyayi. Tura ni takaak ukunam Yus títiatna nuna etserkatniuyayi. ⁶ Túrash Kristu Yusa Jeen takarniuchu asa antsu Yusa Uchirí asa nuí ashí akupeawai. Nu jeasha iitji. Tura tuke iniaitsuk kakaram ajaras Yus suramsattaj nu wararsar nákastiniaitji.

Yusa shuari shiir pujustin

⁷ Nu asamtai, Yusa Shiir Wakaní Yus-Papinium tawai:

“Yamaikia, Yus tana nu ántakrumka ⁸ nakittsuk shiir an-turkatarum. Israer-shuar yaunchu aents atsamunam wekainiak Yus taman nakitrar Yúsán nekap-sar akajkarmiayi. ⁹ Túramtai Yus tímiayi “Nuí atumí uuntri nekaprusar akajtukarmiayi. Kuarenta (40) uwitin wi kakaram túramun ísarsha nakitrurarmiayi. ¹⁰ Tuma ásarmatai nu shuaran kajerkan tiarmajai “Nu shuar ní enentáin tuke awajiniawai. Tura Wi taman umirkatniun nakitiainiawai” tímiajai. ¹¹ Tura ka-jerkaran nekas tákun “Wijíai shiir pujustinian penké tsan̄katkachartatjai” tímiajai” tímiayi Yús.”

Tu áarmaiti.

¹² Anearta, yatsuru. Yajauch enentáimsarum tuke iwiaaku Yus enentáimtutsuk kanakiirap. ¹³ Kame kashinkia tunaajai anannam enentáimin Yúsna nakitrashtapash. Tuma asamtai yamaik tura ashí tsawant ikiakánairatarum. ¹⁴ Yámankamtaik Kristu shiir enentáimtusmaj núnisrik tuke iniaitsuk émeteakrikia Krístujai shiir tsan̄n̄kiar pujustatji. ¹⁵ Nu asamtai Yus-Papí tawai:

“Yamaikia, Yus tana nu ántakrumka nakittsuk shiir an-turkatarum. Israer-shuar yaunchu Yus taman naki-trarua núnisrum ajasairap.”

¹⁶ Muisais Ejiptu nun̄kanmaya jiīkmia nú shuar Yusa chichamen anturkariat nakitrarmiayi. ¹⁷ Tura umiiniachkui kuarenta uwí kajerkarmiayi. Tunaan túrawaru ásar untsurí shuar aents atsamunam kajin̄kiarmiayi. ¹⁸ Kame umirkacharunka Yus “Wijíai shiir pujustinian penké tsan̄katkachartatjai” tímiayi. ¹⁹ Iis, Yúsán enentáimtachu ásar Niījiai shiir pujustinnium wayat̄niun tujinkiararmiayi.

4

¹ Nu asamtai, ii wayat̄in tsan̄katkamu áyatar Yusjai shiir pu-justinnium páchitkiachu aij̄ tusar aneartiniaitji. ² Yaunchu nu shuaran ujakarmia núnisan̄ incha Uwempratin Chichaman uatmakuitji. Nu shuar Yúsán enentáimtutsuk antukaru ásarmatai nu chicham yáin̄charmiayi. ³ Antsu iikia ní chichame enentáimta asar Yusjai shiir pujustinnium nekas wayaji. Tura chikichan Yus tímiayi:

“Nu asamtai kajerkan nekas takun “Wijíai shiir pujustinian penké tsan̄katkachartatjai” tímiajai” tímiayi. Kame Yus jú nun̄kan najana umik nuyá shiir pujus ayamprami-ayi. ⁴ Yús-Chichamnum ayampramun júnis tawai.

“Yus sais tsawant takakmas nuyá tsawantai ayampramiayi.”

⁵ Tura ataksha tawai:

“Wijíai shiir pujustinnium wayá ayamprashtatui.”

⁶ Shuar nuĵ wayawar ayampratin tuke awai. Tura emka Uwempratin Chichaman antukarmia nuka umichu ásar wayacharmiayi. ⁷ Nu asantai ataksha Yus wayatin tsawantan áanturmaitji. Nusha yamá tsawantaiti. Wats, Israer-shuar ni nunké Yus susamunam wayáwarmiayi. Tura nuna ukunam Üunt Tawit timiajai Yus ni chichamen ujatmaji:

“Yamaikia, Yus tana nu ántakrumka nakittsuk shiir anturkatarum. Israer-shuar yaunchu Yus taman nakitrarua núnisrum ajasairap” tímiayi.

⁸ Kame ni kapitíantri Jusué Israer-shuaran ni nunkeen awayá ayamtikraitkiuinkia Yus ukunam ataksha tsawantan áanturmachaaji. ⁹ Nujai páantaiti, ashí Yus-shuar Yusjai shiir pujusar ayampratin tuke awai. ¹⁰ Yusjai ayampra nu, ni kakarmaríjjai takastinian ayampraiti Yus ni takatríjjai ayampramia núnisan. ¹¹ Nu asantai iisha Yusjai shiir pujustinnium pachiinkiaachajj tusar Yus shiir enentáimtusar kakaram ajastiniaitji. Israer-shuar yaunchu Yus taman nakitrarua núnis ajaschatniuitji.

¹² Yusa chichame iwiaaku chichamaiti, imiá kakarmaiti. Puniá mai érea núniniaiti. Tuma asa shuara enentáin init wayá ashí ni enentáimmian tura wakeramurĵn ti paant awajtai. ¹³ Yus najanamuka penké Nin umprukchamniaiti. Ashí írunna nu Yus ímmianum misúa áintsan paant áiniawai. Tura ii túramu ashí paant ujakartatji.

Jesus nekas Yúsnan pujurniu úuntri

¹⁴ Jesus Yusa Uchiri nekas Yúsnan pujurniu uuntri ajas Yusai wayá iiniun chichartamji. Nu asantai iniaitsuk tuke nekas enentáimtustiniaitji. ¹⁵ Niisha iijjai métek ashí tunaanum nekapsamuiti. Túrasha tunaan túrachmiayi. Tuma asa ii tujintiaj nuna paant nékak ii itiurchatrĵn waitnentrarniuitji. Tura Yúsnan pujurniu uuntri asantai ¹⁶ Yúsakuptainium shiir enentáijjai sapijmiatsuk jeamniaitji. Tura Yus in anenma asa waitnentrarnak itiurchat pujajnia nui yainmaktatji.

5

¹ Tura Yúsnan pujurniu úuntri_{nia} shuar anaikiamuiti tura ni takatrĵ jímiaraiti. Yusai shuárnan chicharsatniuiti. Nuyasha Yus suńiamun súsatniuiti tura núnisan namanken maa Yúsán súsatniuiti shuara tunaarĵn asakátratniun. ² Tura Yúsnan pujurniu uuntri niisha shuar asa ni tujintiamun nékak shuar nékachuncha tura waak yujainia nunasha waitnentrarniaiti. ³ Tura niisha tujintia asa ni tunaarĵncha chíkichnajaĵ métek tsanĵkurnarat namanken maa Yúsán súsatniuiti.

4 Shuar ni enentájjia_{in}kia Yúsna_n pujurniu uuntri_i ajaschamniaiti. Antsu Yus nu shuaran anaikiatniuiti. Núnisa_n Arun_{ka}n anaikiamiayi. 5 Núniskete Krístujai. Niisha ni enentájjia_i Yúsna_n pujurniu uuntri_i ajaschamiayi. Antsu Yus Nin anaik nujai_i shiir awajsamiayi. Tura tímiayi: “Ame winia Uchiruitme. Túmaitkui yamaikia winia kakarmarun átakeajme.”

6 Tura ataksha Yus-Papinium júnis tawai:

“Mirkisetékka Yúsna_n pujurin amia núnismek Amesha tuke Yúsna_n pujurin átatme.”

7 Kristu jú nu_nkanam pujak kakantar útuk Yúsna_n ti seamiayi. Nin jákatniunmaya_i uwemtikramnia asamtai seamiayi. Tura Yusa wakeramuri_n tuke enentájjia_i enentáimtakui Yus anturak ti yáin_{mi}ayi. 8 Nujai_i Kristu Yusa Uchiríntiat ni wáitsatniujai_i umirkatniun unuimiarmiayi. 9 Nujai_i ti nekas Uwemtiki_n ajasmiayi. Tura shuar umirainia nuna tuke uwem ataksha Yus-Papinium júnis tawai:

“Mirkisetékka Yúsnantikrarminiaiti. 10 Túramtai Yus Nin Yúsna_n pujurniu uuntri_i Mirkisetékjai_i métek awajsamiayi.

Anearta. Yusjai_i kanakchatniuiti.

11 Ju ti nukap áujmatsatin awai. Túrasha ántichu asakrumin mashi ujakchamniaitjiarme. 12 Átumka yaunchu mash nekaa-maintrume. Túmaitiatrum ataksha yaitiás Yúsna_n jintintruat tusarum atsumarme. Warí, kuirchia núniniaitrume. Kátsuram yútsuk muntsu muntsúatniuitrume. 13 Kuírchikia Uwempratin Chichaman áujenak pé_nker unuimiainiatsui. Ti_nkiamnumia ásar tujintiainiawai. 14 Apatuk kátsurman aya uunt yuámniaiti. Uunt ainia nuka pé_nkernasha tura yajauchincha apatkar paant nékainiawai.

6

1 Uunt ajastai. Krístunu ana nuyá aya yúpichuchia nuke enentáimtutsuk nu arantcha unuimiartai. Kame emka unuimiartinia nu ju áiniawai: shuar ni tunaar_in jákatniunam júana nuna kúntuts enentáimtur Yúsna_n shiir enentáimtustincha, 2 imiantinnium nekaatniuswai:

“Mirkisetékka Yúsna_nha, Yus-shuar yai_nmanum uweje_i awantsatnius_{ha}, jakamunmaya_i nantaktincha, tura sumamtikiatin tsawanta nu nekaatnius_{ha}. 3 Tura Yus yáinmakrin nuna na_nkaamas nekaattaji.

4 Shuar Yusna nuna nekaa_nka tura Yus susamun takakkun_{ka} tura Yusa Shiir Waka_ni kakarmari_n nekapsaitkiun_{ka} 5 tura Yusa chichamen_{cha} pé_nkeraiti nekaa_nka tura Yusa kakarmari_i ukunam nu_nka yamarmanum takastatna nuna yamá_i nekapeak_{ka}, 6 nu shuar nuna nakitiak kanakniaka atak ni tunaar_in

enentáimtak ikiuktinian wakerachuk tujinkiattawai. Warí, ní enentáijjaj Yusa Uchirín krúsnum máiniati túrak ashí íimiainiaj natsanmain awajeawai. ⁷ Nu shuar yajauch nunka áintsan áiniawai. Yumi yútakui péñker nunka arakan péñker tsapatmakka arakmaun yayawai. Túramtai Yus shiir enentáimiui. ⁸ Antsu janí nupan tsapatmakka nu nunka yajauchiiti. Yus áeseak emesrattawai.

Yus tsan̄katramkattajnia nu enentáimtakur kakaram ajaji

⁹ Aneamu yatsurú, tu chicharkursha, nú shuarchaitrum nu nékaji. Antsu uwempra asarum nú péñker túrattarme. ¹⁰ Yus ti péñker asa átum takasmancha tura ni aneakrum Yus-shuar yain̄mancha kajinmatkishtatui. Tura yamaisha tuke túrarme. ¹¹ Tura nuik túrarmena núnisrumek tuke ini-aitasuk kakaram takasrum ashí Yus tsan̄katramkatta nu wáinkiatarme. Núnisan̄ atí tusar wakerají. ¹² Nakimtsuk kakaram ajastarum. Niiniua nuna Yus ni shuarin̄ susattawai. Tura shuar Yús̄an enentáimtak shiir enentáijjaj nákakka nuna wainkiattawai. Tu takastarum tusar wakerají.

¹³⁻¹⁴ Yus yaunchu Apraám̄jaj chichaak “Ti nekas shiir awa-
jsattajme tura ti nukap pampamtikrattajme” tímiayi. Nuna taku imiá nekas tajai tusa tura chíkich Nijjaj nan̄kaamas uunt atsakui imia Niñki pachiimias tumammiayi. ¹⁵ Tutai Apraám̄ yáitmataik nákas Yus timia nuna wáinkiamiayi. ¹⁶ Shuar “nekas tajai Yus íirui” tákun̄ka chíkich nijjaj nan̄kaamas úuntan páchiawai. Tura tu chichasmatain̄kia nuyán̄ka imiá nekas tana nu nekaamniati. ¹⁷ Tuma asantai Yuska “ti nekas̄an yapájítsuk túrattajai” tusa imia Niñki pachiimias tumammiayi. Nujaj ni tsan̄katkamun júkiartatna nu shuar Yus ti nekas umiktatna nuna nékainiawai. ¹⁸ Yus pen̄ké wáitruachmin asa áyatik ni tamajaj nekasaiti. Nuna arant nuikia imia Niñki pachiimias ti ikiakátmaji in. Nujaj iisha uwempratai tusar Ni-
iní weamkatikia tsan̄katramkattajnia nu ti shiir enentáimsar wáinkiatin nákaji. ¹⁹ Nu enentáimsar kakaram ajaji. Yusaj̄ya in umuchtiamakamnia pen̄ké atsawai. Yusaj̄ áchitkia asakrin ti kakaram emettamji. ²⁰ Jesussha emka Yusaj̄ wayá mash iwiarturmaji. Tura Mirkiseték amia núnisan̄ Niisha yamá tuke amuukashtinian Yús̄nan pujurniu uuntrī ajasuiti.

7

Mirkiseték amia núnisan̄ Jesussha Yús̄nan pujurniu uuntrī ajasuiti

¹ Nu Mirkisetéksha Sarem nun̄kanam akupniuyayi. Tura ashí nan̄kamas kakaram Yús̄nan pujurniuyayi. Apraám chíkich akupniun mesetjaj awakak támatai Mirkiseték ji-
intiuki in̄kiun̄ ti shiir awájsámiayi. ² Túramtai Apraám

nupetmakar kuit jukimiun tias (10) akantuk susamiayi. Mirkisetéka naari tana júka “ti penker uunt akupin” tawai. Tura Sarema “ti shiir imiatkincha” tawai. Tura Mirkiseték Sarema akupniuri asa “ti shiir imiatkinchanum akupin” tawai. ³ Nukurisha aparisha Yus-Chichamnum atsawai. Núnisan ni uuntri sha atsawai. Ni akiiniamurincha ni jakamurincha ujaatsui. Tuma asamtai Yusa Uchirja áintsan tuke iniañnakchatniun Yúsnañ pujurniu uuntri ajasuiti.

⁴ Mirkiseték timiá uuntauya nu enentáimprata. Ii uuntri Apraámsha nupetmakar kuit jukimiun tias akantuk susamiayi. ⁵ Tuma asamtai Apraám nañkaamas úuntaiti. Muisais akupkamujai Riwi weeáka Yúsnañ pujurin áiniawai. Niisha ashí Israer-shuarjai métek Apraám weeá áiniawai. Túmaitiat penké Israer-shuar ni waririn tias akantuk Riwi shuaran suu árimiayi. Muisais tu akupkamiayi. ⁶ Túrasha Mirkiseték Riwi weeachunak Apraám tiásan akantuk nin susamiayi. Apraám Yus shiira nuna tsankatkamuitiat Mirkisetékan niijjai uunt asamtai susamiayi. Túram Mirkiseték Apraáman shiir awajsamiai. ⁷ Imiá nekas Mirkiseték Apraáma nañkaamas páantin asa Apraáman shiir awajsamiai. ⁸ Israer-shuarti tias akankamun súajnia nú shuar aya aents ásar tuke pujushamin áiniawai. Antsu Mirkiseték jakamun Yus-Chicham penké ujaatsui. ⁹ Yamái Riwi weeá shuar kuit akankamun achiktin áiniawai. Túrasha Apraám Mirkisetékan súakui Riwi weeá nujai susa áiniawai. ¹⁰ Apraám weeá áiniak ni ayashía áinis enentáimtusmin áiniawai.

¹¹ Muisais akupkamunam Riwi-shuarnumiá aya Arun weeá shuar Yúsnañ pujurin árimiayi. Niisha Muisais akupkamu timia nujai métek penké shuarjai takasarmiayi. Tura Riwi-shuarnumiá Yúsnañ pujurniu takatrijjai tunáa nekas asakárminiaitkiuñkia Yúsnañ pujurin yamarmak, Arun weeachu, anaikiashtin ainti. Túrasha Yus Jesusan, Mirkiseték amia áinis, Yúsnañ pujurniun anaikiaiiti. Nusha Arun weeachuiti. ¹² Tura Yúsnañ pujurin yapajniámtai Muisais akupkamusha yapajniátniuiti. ¹³⁻¹⁴ Nu arantcha, ii Uuntri Jesukristu Riwi-shuarcha antsu Jutá-shuarauiyayi. Tura Muisais akupkamujai Jutá-shuarnumiá Yúsnañ pujurin atsutniuiti. Antsu nuna takatrin penké túrashtiniuyi. Tuma asamtai nújajsha Muisais akupkamu yapajniátniuiti.

¹⁵ Nú páantcha awajsamniaiti. Wats, Yúsnañ pujurin yarmarma nuka Mirkisetékjai méteketi. ¹⁶ Niñkia Riwi shuar asa Yúsnañ pujurin ajaschamiayi, antsu jákashtin asa nu kakarmajai Yúsnañ pujurin ajasmiayi. ¹⁷ Tuma asamtai júna Yus Jesusan áujmatui:

“Mirkisetékka Yúsnan pujurin amia núnismek Amesha iniañnatsuk Yúsnan tuke pujurin átatme.”

¹⁸ Nujaj yaunchu akupkamu péñkercha ajasmatai japirmaiti.

¹⁹ Muisais akupkamuka shuáran péñker awajsachminiuyayi. Antsu Yus in ti shiir awajtamsattajnia nu nákaji. Nujaj Yusaj ti shiir jeeáitji.

²⁰ Nunasha Yus “nekas tajai” tusa Niñki pachiimias tumammiayi. ²¹ Riwi-shuarnumiá Yúsnan pujurin Yusa naari pachitsuk anaikiamu ármiai. Antsu jú Yúsnan pujurniunka Yus imia Niñki pachiimias anaikiamiayi. Tura Nin júnis tímiayi:

“Uuntka imia Niñki pachiimias tiniu asa penké yapajiáshtatui.

Niisha “Mirkisetékka Yúsnan pujurin amia núnismek Amesha tuke Yúsnan pujurin átatme” tímiayi.”

²² Tuma asantai Jesuska nekas uwemtikrattajai tusa yaunchu amia nujaj nankaamas péñker Chichaman iwiarturuiti. ²³ Yaunchu Yúsnan pujurin untsurí ármiai. Chíkich jakamtai chíkich tuke takaarmiai. ²⁴ Antsu Jesus tuke jákashtin asa chikichan ikiurkishtatui. ²⁵ Tuma asa tuke iwiaaku pujak ni shuarin tuke Yúsán áujtusminiaiti. Tuma asa shuar Nin enentáimtusar Yusaj weankarun tuke uwemtikramniaiti.

²⁶ Tuma asa Jesus Yúsnan péñker pujurin asa ii atsumajnia núkete niisha. Niisha ti shiir asa penké tunaarinchaiti. Ashí tunaariniunmaya kanakniuiti. Tura Yusaj métek Uunt ajasuiti. ²⁷ Niisha yaunchu Yúsnan pujurniu uuntri armia núnikchaiti. Yaunchua nuka murikiun máawar ashí tsawant Yúsán suu ármiai. Nujaj emka ni tunaarin nuyá ashí shuara tunaarin asakátin ármiai. Tura Jesuska jákatniunam chikichki surumak ashí shuara tunaarin asakátramiayi. ²⁸ Muisais akupkamuka penké shuarnak tuke péñkercha ain Yúsnan pujurniu úuntrin anaikiaiti. Tura nu ukunmanka Yus, nekas niñki pachiimias, ni Uchirín, tuke péñkera nuna, Yúsnan pujurniu úuntrin anaikiaiti.

8

Nankaamas péñker Chichaman Jesus takartamji

¹ Nekas júna tájame: Yúsnan pujurniu uuntri Jesus in ti shiir yainma asa akupin pujutainium Yusa untsuurini nayaimpiniam pujusuiti. ² Nekas Yusa Jee nayaimpinma nu aents najanachma antsu Yus najanamuiti. Nuí Jesus Yúsnan pujurui. ³ Ashí Yúsnan pujurniu uuntri ainia nu, shuar Yúsnan susamuncha tura naman maar Yus sútaincha Yúsán ashí súsatín áiniawai. Núnisan Jesukristusha Yúsán súsatniuiti. ⁴ Juyá Yúsnan pujurin Muisais timia nuna Yúsán yamaisha

susamin akui Jesus ju nunkanam pujakka Yúsnan pujurin áchainti. Antsu nayaimpiniam takaawai. ⁵ Yus yaunchu Muisaisan nayaimpiniam írunna nuna iniaktus tímiayi “Ame wáinkiamna nujaj métek ashí najanata.” Túramu asamtai ashí yaunchu Yúsnan pujurin Muisais najanamujaj takainia nu aya nayaimpiniam ana nuna nakumkamujajin takainiawai. ⁶ Antsu Jesus ti nekasa nujaj nayaimpiniam takaawai. Muisais akupkamuka shuáran péñker awajsachminiaiti. Antsu Yus in ti péñker awajtamsattaji. Kame Yamaram Chicham-num Yus ashí túrutmattajnia nu Muisais akupkamunam ana nuna nankaamas ti péñker áiniawai. Tuma asamtai nankaamas péñker Chichaman Jesus takartamji.

⁷ Kame Emka Chicham, Yus Muisaisjaj yaunchu najanamia nu, nekas péñkeraitkiuinia Yamaram Chichaman najanachaayi. ⁸ Antsu péñkercha áiniakui Israer-shuaran tímiayi:

“Uunt Yus tawai: “Tsawant jeamtai ashí Israer-shuarjaj Yamaram Chichaman najanattajaj. ⁹ Yaunchu ju shuara uuntrin Ejiptunmaya yaruakmiaj nuí Emka Chichaman najanamjai. Tura Yamaram Chichaman najanattaj nu núnischa átatui. Emka nuna uminiachkui ajapan iniaisarmajai.” Núnis tawai Uunt Yus. ¹⁰ Tura nu arantcha tawai: “Tsawant jeamtai Israer-shuarjaj Yamaram Chichaman najanattaj nuka júnis átatui. Wi akupeajna nuna enentáin paant enentáimtikrattajaj. Nuyá ni Yusri ártatjai tura niisha Wíi shuar ártatui. ¹¹ Nuisha Yúsán nekaat tusa jintin-naiyachartatui. Kame ni aisha ni yachisha kame ashí shuar, uchisha uuntcha, ashí nekarawartatui. ¹² Tura ashí ni tunaaríncha tsankuraran ni yajauchirin atak penké enentáimtuschartatjai” tímiayi.” Tu áarmaiti.

¹³ Wats, Emka Chicham yajauch ajakui Yus Yamaram Chichaman nájaneak pujurui. Tura yajauch ajasua nuka wárik ajapnattawai.

9

Yusa Jee nayaimpinmasha tura ju nunkanmasha

¹ Ayu. Yus shiir awajsatniuka Emka Chicham timia nujaj métek túratniuyayi. Tura ju nunkanmaya Yusa Jee we-riar Yús shiir awajsatniuyayi. ² Nu Jeasha júnis tesak-mauyayi. Nékátka Shiir Tesaamu tutainti. Nuí asuitin ekeemakar tsáapin awajtaisha tura misasha Yus iniaktusma tantajaj pujuyayi. ³ Nuyá-tesaamuka Imiá Shiir Tesaamu tutainti. ⁴ Nuí kunkuin ekeemataisha kurijaj kuerma tura Chícham Aarma Chumpitiaisha pujuyayi. Nusha ashí

kurijiai kuérmauyayi. Tura init kurijiai najanamu ichinkian maná yurumak enkemniuyayi. Nuyá Yúsnan pujurniu uuntri Arunka ushukrutairi yaunchu tsapaak janukumia nusha enkemniuyayi. Nuyá Yus najanamu Chícham Mui-sais kayanam aarmasha enkemniuyayi. ⁵ Nuna úkurin Kirupín, nayaimpinmaya suntara nu, kurijiai nakumkamu wajarmiyai. Nusha Yusa shíirmarin nakumkarmiyai. Tura ni nanapéjai shuara tunaarin ayamprutain nukúakuyayi. Nuna arantka yamá etserkatin atsumatsji.

⁶ Núnis aa asamtai Shiir Tesaamunam ashí Yúsnan pujurin tuke wáiniak Yúsnan takasarmiyai. ⁷ Tura Imiá Shiir Tesaamunmanka aya ni uuntrin wáiniauyayi. Tura niisha ashí uwitin aya chikichik tsawant wayamiayi. Wayak ni tunaarisha tura ashí shuara tunaari tsankurnarat tusa Yus súsatniu namanké numpen juu ámiayi. ⁸ Yusa Wakaní núnis atí tusa nuna mash iwiamiyai. Tura asa juna paant awajturmají. Jú nunkanmaya Yusa Jee pujakui tura aya nuin Yus shiir awajsamniaitkiuinia nekas Imiá Shiira nui Yus pujamunam wayatin tuke itiurchat ainti. ⁹ Nusha yamá pujuiniaj nuna enentáimtikrampratniuitji. Shuar Yus shiir enentáimtikratniun namanken maa suíniaksha nu shuar ni tunaarijiai tuke itit enentáimtumainiawai. ¹⁰ Warí, aya yurumátniusha umartincha nijiaartincha tura ashí núnisan túratniujai aya pátatek asamtai enentáiniam ana nuna iwiarachmin áiniawai. Antsu Yus nú túratniunka yapajiatniuyayi. Tuma asamtai yapajniátsain túratin áiniawai.

¹¹ Tura yamaikia Kristu táwiti tura Yúsnan pujurniu uuntri ajas Yamaram Chichamnum Yus ti penkeran túrutmatniua nuna pujurturmaji. Niisha ti shiir Yus Jea aents najanachmanum takaawai. Nu Jea ju nunkanmayanchuiti. ¹² Tura Kristu Imiá Shiir Tesaamunam namanke numpéjai wayachuiti antsu ni numpejainkⁱ wayaiti. Tura aya chikichkí wayá ii tunaarin asakturmar tuke uwemtikramprami-aji. ¹³ Nekas namanké numpesha tura áisamu yunkunmirisha tunáa shuarnum pátatek ukatkamu aya pátatek shiir awajsamniuyi. ¹⁴ Túrashá Kristu numpé ii tunaarin penké asakáruiti. Túramtai yamaikia tunáa jákatniunam júana nujai itit enentáimtumatsuk nekas iwaaku Yus shiir umirkamniaitji. Kristu penké tunaarincha asa tuke jákashtin Wakaní kakarmarijai jákatniunam Yusai surumakmiayi.

¹⁵ Nu asamtai Jesukristu Yamaram Chichaman shiir takarniuiti. Yaunchu Chichamjai tunáa nekas tsankurachma asamtai Kristu jaka nu tunaancha tsankurarmiyai. Nujai ashí Yus-shuarti Yus achikma asar Yus tsankatramajnia nu wáinkiar tuke wararsattaji. ¹⁶⁻¹⁷ Shuar ni kuítrin

akantrattak chichaman najanatniuiti. Tura jáatsain nu kuit akantrashtiniaiti. Aya nii jakamtai nu chicham najanamu uminkiatniuiti. ¹⁸ Nu asamtai Emka Chicham Muisaisjai najanamusha maamu numpé ukatramujai akupkamuyayí. Nujaisha naman máatniuyayi. ¹⁹ Muisais nu akupkamun ashí shuáran ujakarmiayi. Nuyá ure kapaakujai tura nupajaisha namanké numpé entsajai pachimpramujai ayak akupkamu papincha ashí shuarnasha ukatkarmiayi. ²⁰ Tura tiarmiayi “Ju numpajai “Chícham Yus akupturmarmena nu nekas umiktiniaiti” tawai.” ²¹ Nuyá nu numpajai Yusa Jeencha ashí nui takastin irunmia nunasha ukatkarmiayi. ²² Nu akupkamujai penké ishichik numpajainchu shiir awajsamniaiti. Túrasha numpajainchu tunáa penké asakárchamniaiti.

Kristu jakamujai tunáa asakárminiaiti

²³ Tuma asamtai Muisais najanamu nayaimpiniam ana nuna aya nakumkamu ásar namanké numpejai shiir awajsamu ármiai. Antsu nayampiniam nekas írunna nu, nankaamas kakaram numpajai shiir awajsatin áiniawai. ²⁴ Krístuka yaunchu Yusa Jeen aents najanamunam takastaj tusa wayachmiayi. Nuka nayaimpinmayan aya nakumkamuiti. Antsu nekas nayaimpiniam Yus pujamunam wayá asa in áujturmaji. ²⁵ Yaunchu Yúsnan pujurniu uuntri ni numpejainchu ashí uwitin Imiá Shiir Tesaamunam wain ármiai. Tura Krístuka untsuri wayachuiti. ²⁶ Kame untsuri wayatniuitkiuinkia ni numpejain^k wayá asa yámankamtaiknumia untsuri jákaayi. Antsu yamaikia ju nunka amúamunam Kristu chikichkí jákatniunam surumak tunaan ashí asakáruiti. ²⁷ Ashí shuar chikichkí jakar nuyá ni túramun Yusai nekamatniun nantaktin áiniawai. ²⁸ Núnisan Kristu chikichkí jákatniunam surumak shuara tunaarin asakáruiti. Tura atakka tunaan asakártinian wantinkiashtatui. Antsu ni tátintrin nákainia nuna uwemtikkrattsa wantinkiattawai.

10

¹ Muisais akupkamuka ukunam ti penker átatna núchaiti. Antsu nuna aya nakumeawai. Tuma asa ashí uwitin naman maar Yus sútaijaisha shuara tunaarin asakátrachminiaiti. ² Kame asakátraka shuar nekas shiir awajsamniatkiuinkia Yus naman maar súsatniun atsumachuk iniaisaraayi. Iis, mash tsankuramuitkiuinka ni tunaarijai itit enentáimtumasarainti. Túrawar naman maar Yus súsatniun iniaisarainti. ³ Antsu namanken maar ashí uwitin tuke suíniak nujai ni tunaarin tuke enentáimtuiniawai. ⁴ Warí, namanké numpejai ii tunaari penké asakárchamniaiti.

⁵ Nu asamtai Kristu jú nun_{kan}am taa Yúsán chicharuk tímiayi:

“Naman_u maar sútaisha pen_{ké} nakitr_{ame}. Antsu ayash_i iwiam_u surusuit_{me}. ⁶ Naman_u áesamusha tura tunaan asakártin naman_u susamusha wakerats_{me}. ⁷ Tuma asamtai “Yusrú, tímiajai. Winia áatrur_{ma} núnisnak ame wakeramurmin umiktajtsan táwitjai” tímiajai” tímiayi.

⁸ Emka, Muisais akupkamu aín, naman_u susamuncha, tunaan asakárat tusa naman_u maar susamuncha, naman_u áesamuncha Yus ashí nakitraiti tawai Kristu. ⁹ Nuyá “Yusrú, ame wakeramurm_{in} umiktajtsan táwitjai” tawai. Nuna taku naman_u maar sútain “Asakáini_{aiti}” tawai. Tura chikichan ikiuawai. ¹⁰ Jesukristu Yúsán umiruk jákatniun chikichkí surumakmatai Yus in tunaarincha shiir awajtamsaitji.

¹¹ Tura Israer-shuarnumiá Yús_{nan} pujurin ashí tsawan-taj nú naman_{nak} máawar tunaan asakáchunak Yúsán ti suu áiniawai. ¹² Antsu Jesukristuka jákatniunam chikichkí surumak ashí shuara tunaar_{in} asakár atakka pen_{ké} jákashtini_{aiti}. Nuna tura Yusa untsuurin_i nekas akupin pujutainium pujusuiti. ¹³ Tura Yus ni nemasr_{in} nupetak nin umirkarti tusa súsartatna nuna nákwai. ¹⁴ Chikichkí jakamujai ni shuar_{in} tuke tunaar-incha awajsaruiti. ¹⁵ Yusa Wakan_{isha} núnisa_n tawai. Emka tímiayi:

¹⁶ “Yamaram Chichaman najanattaj nuka jú_{nisa}n átatui: Wi akupeaj nuna ni enentá_{in} paant enentáimt_{ikrartat}jai.”

¹⁷ Nuyásha tawai: “Ni yajauch tunáa túramur_{in} pen_{ké} enentáimtuschattajai.”

¹⁸ Tuma asamtai, ii tunaar_i tsan_{kuramu} asamtai atak in jarutramkatin atsumatsji.

Yus tuke shiir enentáimtusar Yusaj jeartai

¹⁹ Tuma asamtai, yatsurú, Jesukristu numpejai pé_{nker} awajsamu asar sapijmiatsuk shiir enentáijjai Imiá Shiira nui, nekas Yus pujamunam wayam_{ni}aitji. ²⁰ Nui wayatniuka Kristu jaka Yusa Je_{en} tesaamun júsatniua áintsan ánturmamiaji. Yamaisha tura tuke wayam_{nia} átatui. ²¹ Jesus Yús_{nan} pujurniu uuntri asa ashí Yus-shuartin wáitmak pujurtamji. ²² Tuma asamtai, tuke enentáijjai Yus imiá nekas enentáimtusar Yusaj jeartai. Ii enentái Kristu numpejai niijarma asamtai nekas enentáimtakur ii tunaar_{ijai} itit enentáimtumaschatniuitji. Tura ii ayash_{isha} pé_{nker} entsajai imianniuitji. ²³ Yus tsan_{katramkattajnia} nu shiir enentáim_{amu} iniaitsuk kakaram ajasar tuke emetatniuitji. Yus tsan_{katramkaitji} nuna umiktatui. ²⁴ Pé_{nker} anenain tura pé_{nker} túrin ajasartai tusar mai yainiaikiartini_{aitji}. ²⁵ Yusa Je_{en} Yus-shuarjai tuke iruntratin iniaiashtini_{aitji}. Chíkich

iniainiakuisha iikia tuke iruntratniuitji. Nui irunkurkia ikiakánairtiniaitji. Tura Kristu tátin tsawantri ishichik ajasu asantai nú nukap túratniuitji.

Anearta. Ti tsúumainti iwiaaku Yusa kakarmarijiai asutniátin.

²⁶ Túrasha shuar nekas chichaman nékayat wakera-murijiaín tunaanum wekaakka Kristu jakamun nakitia asantai chíkich atsawai ni tunaarín asakátratniun. ²⁷ Áyatik ašamak ti tsuumai sumamatin tsawantan nákasminiaiti. Nu tsawantai Yus ni nemasrín ti kajerak asutiak mash emesrattawai. ²⁸ Shuar Muisais akupkamun umikchamtai tura jímíar shuar menaintiusha etserkarmatai waitnentsuk máatniuyayi. ²⁹ Núnisaitkiuinkia shuar Yusa Uchirín wishikiainiakka ni numpencha nakitiainiakka tura Yus nin anea nuna Wakaníncha katsekainiakka nuna nankaamas asutniáchartatuak. Warí, nii nakitiana nu numpajai Yamaram Chicham nekas umirkatin awajsamuyayi. Tura nújaisha nii ti péñker awajnastiniuyayi. ³⁰ Ii Uuntri Yus júnis tímiayi “Wi asutiátniuitjai. Wi yapajkiattajai.” Nuyásha tímiayi “Wíi shuara tunaarín ti paant nekarattajai.” ³¹ Ti tsúumainti iwiaaku Yusa kakarmarijiai asutniátin.

³² Tura atumsha yámankamtaik Yusna nekaarum Yus-shuar ajasmarum nu enentáimsatarum. Kakaram ajasrum ashí itiur-chat katsuntramarme. ³³ Chíkichtirmeka katseknakmarme tura ashí íimiainiamunam yajauch awajnasmarme. Chikichcha nu shuarnum pachitkia asarum itit awajnasmarme. ³⁴ Atumsha sepunam pujuinia nusha waitnentrarmarme. Tura shiir warasrum kuítrumin atantramainiakuisha katsuntramarme. Nayaimpiniam tuke amuukashtin kuit pachik-tin asarum túramarme. ³⁵ Tuma asarum yawetsuk Yus tuke enentáimtusrum kakaram ajastarum. Túrakrum nankaamas akinkiattarme. ³⁶ Atumsha esetra enentáimsarum Yus wakera nu túrakrum Yus atumin amastinia nu wainkiattarme. ³⁷ Kame Yus-Chichamnum áarmaiti:

“Tátinia nu ishichik ajasai. Wárik tátatui. ³⁸ Shuar Yúsan nekas enentáimtak péñker wekaak uwemprattawai. Tura iniaiyakuinkia nin wararsashtajai.”

³⁹ Tura iikia iniaisar mesena nú shuarchaitji. Antsu Yus shiir enentáimtusar uwempraitji.

11

Yus nekas enentáimtustin

¹ Yus nekas enentáimtakur “nákañnia nuna, Yus nekas suramsattaji” taji. Tura wáinchaitiatar “nekas wainkiattaji” taji. ² Yaunchu ii uuntri Yúsan nekas enentáimtuiniakui Yus “pénkeraitme” tiarmiayi.

³ Aya Yus enentáimtakur ju nékaji: Yus aya ni chichamejain ashí nunkan najanamiai. Túramtai ashí wáiniainiaj nu wáinchataijiaj najanamu áiniawai.

⁴ Apir Yúsán nekas enentáimtak Kaínja jai nankaamas péñkera nuna Yúsán susamiai. Túramtai Yus “pénkeraitme” taku shiir yuminsamiai. Tuma asamtai Apir jákaitiat tuke enentáimtikramji.

⁵ Enuksa Yúsán nekas enentáimtak iwiaakuk nayaimpiniam junakmiai. Yus yukimiu asamtai wáinkiacharmiai. Tura Yus-Chichamnum aarma “Eruk júnatsuk Yúsán ti shiir enentáimtikniuyayi” tawai. ⁶ Tura Yus nekas enentáimtachkumka žitiurak Nii shiir enentáimtiksatam? Nekas enentáimja jai Yúsán weantuktaj tusam wakerakmek, emka, Yus iwiaaku pujawai, tu enentáimpratniuitme. Nuyáša, Wi Yúsán eakuinkia Yuska winia yáintkiattawai, tu enentáimsatniuitme.

⁷ Yus, ‘amaarkatniun akupkattajai” tiniu asamtai, Nuaisha Yúsán nekas enentáimtak, amaarun wáinchaitiat, “túrunattawai” tímiayi. Túrak Yus timiaja jai métek uunt kanun najana ni shuarincha uwentikramiai. Tura Yúsán nekas enentáimta asamtai Yus “pénkeraitme” tímiayi. Tura ni umirkamujai chíkich shuar Yúsán enentáimtachun súmamtekiawarmiai.

⁸ Tura Apraámsha Yúsán nekas enentáimtak Yus “núñkem ikiukim wetá” tutai shiir umikmiai. Yus tuke nin súsatniua nú nunkanam wémiayi. Turasha ni nunken ikiuak ni jeatniun nékatsuk jiinkimiai. ⁹ Yúsán shiir enentáimtak nú nunkanam Yus nin tsan̄katkamuitiat írara áinis pujusmiai. Nuap jeanam pujuyayi. Núnisan̄ ni uchirí Isaksha tura ni tiran̄kí Jakupsha nuñ̄ tsan̄katkamuitiatan̄ írara núnisar pujuarmiai. ¹⁰ Kame Apraámka nayaimpinmaya ashirchamin péprunam pujustinian nákasmiayi. Yus nu pepru péñker iwiar jeamka asamtai umuchkiachminiati.

¹¹ Apraáma nuwé Sarasha Yúsán shiir enentáimta asa úuntach áyat ajaprukmiayi. Yus timia nuna umiktatui tau asa uchin takusmiayi. ¹² Tura nujai Apraám ti úuntchitiat ti pampan̄miayi. Nii chikichkitiat ni pampan̄marj ti untsurí ajar yaajai métek tura náikmijiaj métek nekapmarchamnia ajarmiayi.

¹³ Ashí nu shuar Yus tsan̄katkamun wáintsuk jákarmiai. Túrashá Yúsán nekas enentáimtuiniak arantia wáinkiar warasar shiir enentáimtiarmiayi. Túrawar “ju nunkanam nekas aya íraraitji” tiarmiayi. ¹⁴ ‘Íraraitji” tu chichainiak chíkich nunka eamun páant awajainiawai. ¹⁵ Niisha matsatu winíarmia nuñ̄ atak waketkitniun wakeruiniakka páchitsuk waketkiaraay. ¹⁶ Tura antsu niisha nuna nankaamas péñker nunkan nayaimpinmaya nuna enentáimtiarmiayi. Túmainiakui

Yuska péprun iwiartur susa asa “wi ni Yusr̥ntjai” títinian natsantatsui.

¹⁷ Ataksha Apraám Yúsan nekas enentáimtak “chikichik uchi amasmaj nu, naman̄kea áitkiasmek maam surusta” takui Apraám Isakan ni uchir̥in Yus susatniun pen̄ke suritkiachmiayi. ¹⁸ Kame Yus “Isakjai ti pampantatme” tau asamtai ¹⁹ Apraám “máamtaisha Yus iniantkittiwai” tu enentáimpramiayi. Tura Yus ukunam máatiun suritkiamtai Isakan máachiat nekas jákatniunmaya uwempran nantakniua áintsan̄ wáinkiamiayi.

²⁰ Isaksha Yúsan nekas enentáimtak ni uchir̥in Jakup-nasha Esauncha ukunam ni túrunattana nuna ujakarmiayi. ²¹ Núnisan̄ Jakup Yúsan nekas enentáimtak jatsuk ni tiran̄kin, Jusé uchir̥in, shiir túrunattana nuna ujakarmiayi. Tura ti uuntach asa máshtun̄krin ushukruma Yúsan shiir awajsamiayi. ²² Tura Jusesha jákatniuri ishichik ajatesmatai Yúsan nekas enentáimtak Yus ukunam Israer-shuaran Ejiptu nun̄kanmaya júkiartatna nuna ujakarmiayi. Tura jíiniainiak ni ukunchin̄ júkiar Yus tsan̄katkamu nun̄kanam iwiarsarat tusa akupkamiayi.

²³ Muisaisa apar̄isha nukur̄isha Yúsan nekas enentáimtuiniak Muisais ti shíirmach asamtai suntar máawar̄in̄ tusa akiiniamunmayā menaintiu nantu úukarmiayi. Tura uunt akupin akupkamun ashamkacharmiayi. ²⁴ Muisaissha Yúsan shiir enentáimtak uunt ajas Ejiptunmayā uunt akupniu nawantr̄i uchir̄i ajastinian nakitramiayi. ²⁵ Antsu Ejiptu nun̄kanam ishichkisha tunaan warartsuk Yusa shuar̄ijjaī métek wáitsatniun nan̄kaamas wakerukmiayi. ²⁶ Nujaī Krístun yajauch awajsarmia núnisan̄ niisha wáitsatniuyu. Túrasha ashí Ejiptu nun̄kanam pen̄ker irunmia nuna nan̄kaamas Yus nin ukunam tsan̄katkatta nuna shiir enentáimtusmiayi. ²⁷ Niisha Yúsan shiir enentáimtak uunt akupin kajeramu aīn̄ ashamtsuk Ejiptu nun̄kanmayā jiinki wémiayi. Yúsan wáinchiat shiir enentáimtamujaī wainiua áinis kakaram ajas ashí katsuntramiayi.

²⁸ Muisais Yúsan shiir enentáimtak yámankamtaik paskua namperan najaneak ashí Israer-shuaran numpajaī ni wáitir̄in̄ kuérat tusa akupkarmiayi. Nujaī Yus timia núnisan̄ nayaimpinmayā suntar nuna iis nu jeanam̄ iwiair̄in̄ máatsuk nan̄kaikit tusa tímiayi.

²⁹ Israer-shuarsha Yúsan shiir enentáimtuinia ásar Kapāantin̄ Entsa nakaakamtai ajapén̄ ti pen̄ker kukarnum katiñkiarmiayi. Ejiptunmayā suntarsha núnisan̄ katiñtai tukamá jakerarmiayi.

³⁰ Israer-shuarsha Yúsan shiir enentáimtuinia ásar Yus timian umirkar siati tsawant Jerikiú péprun téntakarmatai

aa tanish sáanákmiayi. Nujai ti yúpichuch nupetkarmiayi.
³¹ Raapsha nu péprunam pujak, Yúsan nekas enentáimtak tsanirmatai áyat Israera suntarin mamikmak wekaan ti penker itiaa asa chíkich shuar Jerikiúnam matsatua nujai jákachmiayi.

³² Nu arantcha Yúsan shiir enentáimtin ti írunui. Jeteúnsha, Paraksha, Saṣsunsha, Jiptísha, Tawitcha, Samuersha, Yúsnan etserniusha nu shuar ármiai. Mash ujaktinian jeatsjai.
³³ Niisha ashí Yúsan nekas enentáimtuinia ásar Yusa kakarmarin niisháa niisháa iniaktusarmiayi. Nuna túruiniak chíkich chíkich nunkanmaya aentsun nupetkarmiayi, nuisha penker akupkarmiayi, tura Yussha ni timia núnisan yainkiarmiayi. Uunt yawancha kajeche awajsarmiayi, ³⁴ uunt jiniasha iki-ajniakarmiayi, puniajai mantamnatniuncha uwemprarmiayi. Kakarmachusha kakaram ajasaram mesetnumsha ni nemasrincha nupetkarmiayi. ³⁵ Nuwasha ni uchiri jakan iniantkiniun wáinkarmiayi.

Chikichcha wáitias mantamnowarmiayi. Ti shiir pujustinnium nantaktiai tusar nú tsawantai uwempratniun nakitrarmiayi. ³⁶ Chikichcha katseknakarmiayi, asutniáwarmiai, jirujai jinkiawar sepunam enkenawarmiayi.
³⁷ Kayajai tukú mantamnowarmiayi, jímiapetek tsupinkarmiayi, Yúsan iniaisarar tusa nekapnasarmiayi, puniajai mantamnowarmiayi. Aya wékainiarmiayi, kuítríncha ásar nuapen entsararmiayi, shuar nincha áintrar wáitnenmai awajarmiayi. ³⁸ Atsamunmasha, naincha, wáanmasha, ashí nunkanam wekain ármiai. Nu shuarjainkia ju nunkanmaya shuar imiá yajauch ásar niijiai pujumainchu áiniawai. ³⁹ Nu shuar Yúsan shiir enentáimtuiniakui Yus “pénkeraitrume” tiarmiayi. Túmaitiat ni tsanatkamun wáinkiacharmiai.
⁴⁰ Yuska nuna nankaamas pénkeran iwiarturaru asa tura in yamá pujajnia juna enentáimturma asa niisha iisha mai metek tsaninkiar ti penker ajasarti tu enentáimsamiayi.

12

Jesus tuke enentáimtusar tsékentiai

¹ Ashí ju nunkanam túrajnia nuka shuar nakuruiniak tsékena nujai nakumkamniaiti. Ashí shuar yaunchu Yúsan shiir enentáimtusaruka téntakar írmainiaji. Tuma asantai ashí kijin ana nusha tura ashí tunaaka itit awajtamaj nusha ajapa iniaisar tura katsuntrar tsékenkir jeatai. ² Túmakur Jesus tuke enentáimtusar tsékentiai. Ashí shuarjai nankaamas Jesus Yúsan ti nekas enentáimtak aya pénkernak túramiai. Tuke nekas awakmakmiayi. Imiá tunáa shuáran krusnum

máatin ajin núnisan natsanmainium jákatniun surimiakchami-
ayi. Antsu ukunam ti shiir warastin átatna nuna enentáimtak
nuna ashí katsuntramiayi tura nuyá Yusa untsuurini akupin
pujutainium pujusuiti.

³ Tunáa shuar Jesusan wáitkiasarmia nu enentáimpratarum.
Túrarum pimpitsuk katsuntratarum. ⁴ Átum tunaajai
máaniakrum Jesus túramia áintsarum numpemsha
puárchaitrume tura jákachuitrume. Nuisha katsuntrarum
jeatniuitrume. ⁵⁻⁶ Yus nekas ni uchirin chicharkatniua áinis
túramprum nu kajinmatkichmashuram. Júnis tawai:

“Uchirú, wi jintintramajmena nu kajinmatkip. Asutiámkuisha
kúntuts pujusaip. Kame Uuntka Nii aneana nuna
jintintiwai. Tura ni uchiri ajasat tusa achána nuna
asutiawai.”

⁷ Tuma asamtai Yus ni uchiria áinis asutiámkuisha katsun-
tratarum. Warí, ashí apa ni uchirin chicharkashtatuak.

⁸ Tura ashí uchin chicharkatniua núnis Yus atumin chichar-
tamchakrumninkia nekas ni uchirinchuitrume. Antsu chi-
kichnaitrume. ⁹ Nu arantcha ii apari uchich árinin chichar-
tamkurin umirniuyaji. Nu arant nuikia nekas ii Apari
nayaimpiniam pujana nu shiir umirkar tuke shiir pujustin
wakerishtatjik. ¹⁰ Ii apari ishichik ni enentáijia wakeramu
chichartamniuyaji. Antsu Yуска ti penker awajtamsataj
tusa nekas atsumajnia nujai métek chichartamji. ¹¹ Kame
nekasaiti, ashí asutiámu yamaikikia waraschamniaiti, antsu
kúntuts enentáimtikramji. Túrasha ukunam nu asutiámujai un-
uimiaj nuka penker túratniun tura shiir pujustinian yáinmaji.

Anearta. Yus tana nu nekas antuktiniaiti.

¹² Nujai pimpirarusha tura kakarmachu ainia nusha
ikiakártarum. ¹³ Túrarum penker esettsa enentáimsarum
wekasatarum. Túrarum tujintiainia nusha shiir wekasatin
yaintarum.

¹⁴ Ashí penker túrakrum ashí shuarjai nawamnaikiarum
penker wekasatarum. Tunaan túrinkia Yusai penké
jeashtatui. ¹⁵ Aneartarum. Shuar nakitiakuinkia Yus
nu shuáran shiir yáintinian tujinkiattawai. Nu shuar
yajauch enentáimiuk chíkich shuárnasha itit awajas tunaanum
útsukartatui.

¹⁶ Tsanirmawairap.

Yusna nusha nakitrairap. Isaka uchiri Esau penkera nuna
nakitramiayi. Yus “iwiairin núkap súsatniuiti” timia nuna
enentáimtuschamiayi. Tura asa aya ishichik yurumkajai ya-
pajámiayi. ¹⁷ Tura nuyá ni apari ukunam túrunattana nuna
takui Esau ti penkeran wakerimiayi. Tura ti útkuisha ni apari

nin nakitramiayi tura ni chichasman yapajíátniun tujinkiami-ayi.

¹⁸ Atumjainkia Yusna enentáimtusminia nuka yaunchu Israer-shuarjaj ashammmain amia núnischaiti. Yáunchuka Yus ni akupkamurín Israer-shuaran súakui Senai muranam jeeármiai. Muranam uunt jisha kiritniusha teesha nasesha ajamiayi. ¹⁹ Tura kachu kakaram umpúamusha ámiayi. Tura Yus kakaram nin chichaream antukar ashamkar atakka chichaschati tu searmiai. ²⁰ Kame Yus chichaak “Shuarsha tan̄kusha ishichkisha nú muranam najarmatai nuka kayajaj tukurar tura nan̄kijiaisha máatniuiti” tímiayi. Nu akupkamu ti ashammai asamtai “chichaschati” tiarmiayi. ²¹ Wáinkiarmania nu ti tsuamai asamtai imia Muisaissa “Ashamakun kuraajaj” tímiayi.

²² Antsu atumjainkia Yusna enentáimtustin nujaj nan̄kaamas péñkeraiti. Átumka nayaimpinmaya Seun náinnium, Jerusarén iwiaaku Yus pujutai péprun nakumeana nu jeeáitrume. Nuisha ti untsurí nayaimpinmaya suntarsha ²³ ashí Yus-shuarsha shiir iruntrarú áiniawai. Yus-shuarka ashí nayaimpiniam ni naarí anujtukma ásar ni uchirí áiniawai. Nuisha Yus, ashí shuaran ti nékana nu, pujawai. Niisha shuáran ti pen̄ker awajsamtaí nu shuar jákar ni wakaní nu jeeáitrume. ²⁴ Nuisha Yamaram Chichaman in takartamajnia nu, Jesus, pujawai. Nuna numpe ukatramujaj ashí shiir awajsaiti. Nu numpasha Apira numpejaj nan̄kaamas péñkeraiti. Kame Apir ántar máamu asamtai yapajmiatrukta titinia áintsan enentáimtaji. Antsu Jesus tunáa shuáran péñker awajsartaj tusa jakamiayi.

²⁵ Nuka ti pen̄ker asamtai Yus chichartamprumna nu nekas anturkatniuitrume. Yaunchu Yus jú nun̄kanam murá chichaamun anturkachar asutniátniunam uwempracharmiayi. Nuikia Yus nayaimpinmaya chichartamkurin ántachkurkia ishichkisha uwemprashtatji. ²⁶ Yaunchu Yus chichamejaj nun̄kan úrmamtikiarmiayi. Tura yamaisha tawai “Ataksha aya núnkankechu antsu nayaimpinmasha úrmamtikiattajaj.” ²⁷ “Ataksha” tana nujaj “ashí muchitrámnia nu amuukartatui” tawai. Tura muchitrachminia nu juakartatui. ²⁸ Yus in akupkatniun tsan̄katramaj nuka umuchnakchattawai. Tuma asamtai Yus yuminsatniuitji. Yus wakerana núnisrik wishiktsuk shiir enentáimtusar Yus shiir awajsatniuitji. ²⁹ Maa, ii Yúsriñkia kakerkan̄ka uunt jáa nuke áesaa mash emesramniaiti.

13

Yus shiir enentáimtiksatin

¹ Nuamtak yachja núnisrum tuke mai anenai ajatarum.
² Tuke írar shiir itiaatarum. Nuna túruiniak shuar nékachminiak nayaimpinmaya suntaran itiaawaruiti.

³ Sepunam pujuinia nusha atumsha nijijai pujáa núnisrumek waitnentrarta. Wáitkiasarma nusha wisha núnisnak wáitsamniapitjia tusarum waitnentratarum.

⁴ Nuatnaikiatin péñkeraiti. Shuar ni nuwejai tsaniñ pujustin péñkeraiti. Tura nuatkamu ainia nusha chikichan eakchatniuiti. Tsanirmana núnaka Yus asutiáttawai.

⁵ Aya kuítiak enentáimtusam pujusaip. Yuska “Kanakchattajai tura penké ikiukchattajme” túramui. Tuma asamtai ame takakmena nujai shiir enentáimsam “maakete” titiá. ⁶ Tiniu asamtai arantutsuk ju tminiaitji: “Winia yainnia nuka Uunt Yúsaiti. Nu asamtai shuar túrutamnia nuna ashamkashtajai.”

⁷ Atumin Yus-Chichaman jintintramawarmia nu enentáimtustarum. Yúsan shiir enentáimtuiniak péñker wekasarmia núnisrumek atumsha túratarum.

⁸ Jesukrístuka tuke yapajítsuk nuikiya núnisan yamaisha tura ukunmasha tuke núnisan átatui. ⁹ Chíkich chicham niisháa írunna nu anturkairap. Yus in anenma asakrin kakaram ajasartai. Shuar niisháa yurumkajai enentáiruikakaram ajastaj táyat penké yáinchaíti. Yurumeaj nújainchu antsu Yusa anenkrattairijiai ii enentáin kakaram ajasminiaitji.

¹⁰ Yáunchu Yúsna pujuin naman maar Yus susamunmayan yuu ármiayi. Tura iikia Yus-sutaj nusháa ana nu súaji. Nusha Kristu jakamu asamtai yaunchua nu Yúsna pujuin nuji pachiinkiachmin áiniawai. ¹¹ Israer-shuarnumiá Yúsna pujurniu uuntri tunaan asakártaj tusa namanké numpen júkiar Imiá Shiir Tesaamunam wain ármiayi. Tura nu naman arant áesatniuyayi. ¹² Núnisan Jesussha péprunam arant wáitkianas mantamnamiayi. Nujai ashí shuara tunaarin ni numpejai nijiatkaiti. ¹³ Núnisrik iisha péprunmaya arant wétinia núnisrik Jesusai weri Nijijai métek wishikmain katsuntutai. ¹⁴ Kame ju nunkanam amuukachmin pepru atsawai. Antsu ukunam ti shiir pepru átatna nu nákaji. ¹⁵ Tuma asar naman maar Yus sútsuk antsu shiir chicham súakur tuke Yus shiir yúminkiaji. Tuke núnisar túratai. ¹⁶ Péñker túrakrum takakrum nu ajamnaisatin kajinmatnaikiirap. Nusha ti shiir Yus sútainti.

¹⁷ Yus-shuaran akupin ainia nu umirkarum shiir enentáimtikratarum. Ni takatrín Yúsan ujaktin ásar atumí wakanin shiir wainiainiawai. Niisha itiurchatcha antsu wakerumainian túrawarat tusarum shiir yáintarum. Nu túrachkumka çitiurak yainmakarat?

¹⁸ Incha Yus áuj̄satarum. Iisha ashí pén̄ker túratin wakeraji. Túraji enentáim̄ji. ¹⁹ Tura Yus áuj̄kuram Yus ataksha atum̄j̄ai wainniaikiatniun wari tsan̄katruk̄at tusarum seatritiarum.

Amúak shiir chichaawai

²⁰⁻²¹ Imiatkinchanum apuj̄kartinia nú Yus, Jesukrístun jaka-munmaya iniantkimia nuka, ni numpé kakarmarij̄j̄ai ashí pén̄ker ana nuna suramsarti. Nuj̄ai ni wakeramu túrattarme. Tura Jesukrístu kakarmarij̄j̄ai ashí ni wakeramun in puj̄urta-mas takasti. Ii Uuntri Jesukrístu ashí Yus-shuaran ti pen̄ker Wáinniuiti. Tura ni numpej̄ai Yamaram Chichaman kakaram awajsamiayi. Nu Chichamsha tuke men̄kakashtatui. Aya Kristu tuke shiir awajnasti. Núnisan̄ atí.

²² Yatsurú, kakaram chicharkajrumna ju shiir enentáim̄j̄ai anturkatarum. Kame ti wárik áatrajrume. ²³ Yamaikia ii yachi Timiutéu sepunmaya jiinki an̄kant ajasai. Nuna ujaajrume. Wárik támatain̄kia atumin íitiaj tusan winiakun niij̄j̄ai winitti-ajai.

²⁴ Atumí úuntri sha tura ashí Yus-shuarsha amikmaatarum. Itiaria nun̄kanmaya shuarsha amikmatmainiawai.

²⁵ Ashí Yus ti shiir yainmakarti. Nuke atí.

SÁNTIAK papin áarar akuptukma

Sántiak aarmiania nu

¹ Wi Sántiak Uunt Yúsán tura núnisán ii Uuntrí Jesukrístun umirin asan ju papin aajai. Ashí Yus-shuartermin ashí nunkanam tsakinmakarum matsatrumna nuna amikmaajrume.

Nekatainkia Yúsnumiáiti

² Yatsuru, ashí itiurchat wáinkiuymesha tuke warastarum. ³ Iis, itiurchatnum pujakrum nekas Yus enentáimtaitkiurmeka katsuntratin unuimiartatrum. ⁴ Tura tuke páchiachkuram, tuke katsunteakrum, nuikia Yúsjaí ti penker katsuartatrum. Penké atsumashtatrum.

⁵ Átum nánkamsarmek nekaatin tujintiakrumka Yusa nekatairí seata. Shuar seakuí Yuska kajetsuk tura ementutsuk antsu patatas súawai. Tuma asamtai seakminkia suramsattawai. ⁶ Túrasha Yus nekas enentáimtusam, “túratpiash” tútsuk seata. “Cha, nékatsjai surustimpiash” tu seakmeka ántram seame. Nayaantsa tsukaturí juní taa, atúu waketki ajatsuk. Amesha áintsamek túmame. ⁷ Enentáimjin núnistketkuinkia, seamna nuna Yus penké suramsashtatui. ⁸ Shuar jimiará enentáimna nuka shiir wekasatniun tujintiawai.

⁹ Yus-shuar, ju nunkanam kuítríncha ainia nu, Yus shiir awajsamu nujai warasti. ¹⁰⁻¹¹ Tura Yus-shuar kuítrinniutkuisha péejchach enentáimtikramsha warasti. Iis, nupá kuánkam tura nantu ti sukuam kaar miniatsuk. Kuítrinniuka ántska ántram seame. Nayaantsa tsukaturí juní taa, atúu waketki ajatsuk. Amesha áintsamek tánkete. Tuke súrutnak pujurkusha itiurchat wáiniuk wárik amuukattawai.

Ii itiurchatrí ana nu

¹² Shíiraiti shuar ni itiurchatríin nekas katsunteana nuka. Nekapsam jíinkiuuka akinkiatniun wáinkiatstawai. Iwiaaku átinian, tawasap achiktinia núnisán, wáinkiatstawai Yus ni aneam tsankatka nuna. ¹³ Shuar tunáa túramnia nekapeakka “Yus nuna útsutrutui” tu enentáimprashtiniaiti. Yuska yajauch túramnia enentáimtsui túrasha Niisha penké chikichkinkesha tunaanum útsuchuiti. ¹⁴ Antsu ni wakeramuríjiaín aents tunaan níñki ikiatmamkaiti yajauch túratniun. Nújainkia tunaanum útsukmaiti. ¹⁵ Nu yajauch wakeramunmaya tunáa akiiniui. Tura nu tunáa mash amuukamtai jákatin akiiniui.

16 Yatsuru, aneakun tájarme, ananmamawairap. 17 Ashí péñker ana nu, ashí shiir ana nusha nayaimpinmaya Yusak amasuiti. Yus ashí tsáapnina nuna najanaiti. Tura Niin kiritin atsañ yapajítsuk tuke tsáapniiti. 18 Nii wakera asa ni nekas chichamea nujai ni uchirí najatmamji. Tura ashí ukunam átatna nujai ii émkaitji.

Yus nekas shiir awajsatin

19 Tuma asamtai aneamu yatsuru, wárik chichastin enentáimprairap antsu antuktin emka enentáimprata. Núnisan wárik kajekaip. 20 Kajena nuka Yus péñker wakeramun túratsui. 21 Nu asamtai, ashí péñkercha nu tura ashí yajauch íranna nusha iniaisata. Tura tuke enentáijiai Yus-Chicham ame enentáimin araamu anturkata. Tura nu Chicham kakarmaiti uwemtikrampratniun.

22 Yus-Chicham umikta. Aya ántukaip. Aya ántakmekamek ananmamattame. 23-24 Shuar íspikia íimiak ni yapin wapikian wáiniak tura nuyá jáupmitsuk we, ni urukuit nuna wárik kajinmatkishtimpiash. Shuar Yus-Chicham umitsuk aya ántana nuka nujai méteketete. 25 Yus tana nujai ankant ajasminiati. Shuar íspikia iimia áintsan nekas Yus péñker táman tuke iniaitsuk enentáimtus, nu shuar kajinmattsuk aya antukchattawai antsu tuke umiktatui. Tura ti shiir waras pujustatui.

26 “Nekas Yúsan shiir umirjai” tana nu tura eseer chichaachkunka imia niniki ananmamui tura “Yúsan shiir umirjai” tana nuna ántar tawai. 27 Nekas Yus Apa awajitsuk shiir umirkatin júiti: mitiaikiasha wajasha itiurchatnum pujuiniakuisha yáintiniati tura ju nunkanam ashí tunáa ana nújajsha máatrashtiniati.

2

Shuar antra akantrashtin

1 Yatsuru, ii Uuntri Jesukrístu ti shiir nankaamantua nu enentaimtatirmeka shuar akantratin enentáimsairap. Shuara enentái enentáimtsuk antsu aya pátatke wáinmena nujai aents akantram niisháa enentáimturairap. 2 Iis, iruntrumna nui shuar kuítrintin kurí aniyu aweera tura péñker iwiarmampra wayashtimpiash. Tura núnisan chíkich kuítrincha aruta entsaru wayashtimpiash. 3 Tura kuítrinnia nu “Péñkera jui pujusta” tíchatameash. Tura kuítrinchaka “Atu wajauta, túrachkumsha jui nunkansha pujusta” tíchatameash. 4 Nu tákumka yajauch enentáimpram jimiara enentáijiai aents enentáimtame.

5 Aneamu yatsuru, antuktarum. Ju nunkanam kuítrincha ainia nuna Yus achikiuiti Ní shuar ajaras Nin nekas enentaimtin ajasartinian. Tura ashí nayaimpiniam íranna

nunasha Yus nin tsan̄kattawai. Ashí shuar Yúsán aneena nuna anajmatra asa nin tsan̄kattawai. ⁶ Átum antsu kuítríncha natsant awajearme. Iista, kuítrinníua nuka timiá itíurchat awajtamainiatsuk. ¿Nuikia níichuk ainia achirmak kapitíánnium japiki júramprumna nu? ⁷ ¿Nín̄kichuk ainia Kristu naari shiira nuna ántar pachikiar pen̄ké yajauch áujmatainia nu? Tura átumka nuna naari tuke shiir awajkurmin, ashí shuar “Kristu shuari” túramainiawai.

⁸ Yus-Chichamnum ju akupeamu nekas pen̄keraiti: “Ame ayashim aneamna núnismek ame írutramuram aneeta.” Nu nekas umirniuitkiurmeka maak. ⁹ Nú enentaijjai kuítrinníujai chichasminiaiti. Tura nuyá kuítrínchajai shiir chichaachkumka, níisháa enentáimta asam, nu akupkamu umirkachuitme. Tunáa túrame. Núnismek Yusa akupeamurijjai amek sumamame. ¹⁰ Chíkich akupkamu írunna nu ashí umikiam tura aya chikichik akupkamu umikchamka nuikia ashí akupkamu umircha ajasume. ¹¹ Iis, Nín̄ki Yúsak chichaak tíchamka “tsanirmawaip.” Tura chikichnasha “man̄kartuawaip” tímiayi. Nu asamtai, shuar tsanirmatsuk túrasha man̄kartakka ni wakeramun umirtsui. ¹² Kristu an̄kant awajtamsamtai ii yamá ni akupeamuri yúpichuch umirkamniaitji. Nu asamtai nu akupkamujai métek wekakurnín̄kia Yus “pen̄ker túraitme” turamtatji. Tura umikchakrin̄kia “pen̄ker umikchaitme” turamtatji. Tura nu enentáimsar pen̄ker chichasar takasar wekasatniuitji. ¹³ Chikichan waitnentachkun̄ka waitnennatsuk asutniáttawai. Tura waitnen̄kratniuitkiurnín̄kia tsawant jeamtai Yus in waitnentramprattaji.

Yus enentáimtustin tura umirkatniusha

¹⁴ Yatsuru, shuar “Yusan shiir enentáimtajai” táyat tura pen̄ker túrachkuín̄kia pen̄kerashit. Nujai uwemprattawak. ¹⁵ Wátskea, Yus-shuar, áishman̄sha nuwasha, entsátáirin̄ tura yurumken̄ atumashtimpiash. ¹⁶ Tura ame nékayatmek ayash̄i atumana nu sútsuk tíchatapash “Pen̄ker wetá, entsatai entsaram túram pen̄ker yurumáta.” ¿Nu sútsuk tákum pen̄kerkait? ¹⁷ Núnisan̄ takatsuk Yus enentáimtustin ántrait.

¹⁸ Tura shuar tíchanpiash, “Chíkich takaawai tura chikichcha Yúsán shiir enentáimtai. Mai pen̄kerchakait” tichanpiash. Wats, ame Yus enentáimtamun takatsuk paant inaktusminiashitiam. Tura wi antsu pen̄ker takatrujai Yus enentáimtamun paant inaktustatjai. ¹⁹ Nekas Yus chikichkiiti tu enentáimtame. Nuka pen̄ker túrame. Túrasha iwianchcha nunasha nékainiawai. Tura umircha ásar ashainiawai. ²⁰ Netse enentáimpraip. Ashí Yus

wakera nu takaachkumka, Yus enentáimtustin ántraití. ¿Nu nekaatin wakeramek? Iista. ²¹ Apraáman Yus chicharuk “Winia ti shiir awajtusat tusam ame uchiram Isak maam surusta” tutai suritkiachmiayi. Máachiat suritkiachmiayi. Tura suritkiacham Yus “Pénkeraitme” tímiayi Apraáman. ²² Páantchakait. Apraám Yusa shiir enentáimtak umirkamiayi. Umirtsuk Yúsan enentáimtakka nuikia ántar enentáimtiaayi. Tura umirak Yus enentáimtamun umikmiayi. ²³ Nujai Yus-Chicham aarma nu uminkiamiayi. Juiti:

Apraám Yúsan shiir enentáimtusmiayi tura Yus chicharuk tímiayi “Máakete. Nújainkia tuke pénker túraitme Wijiai” tímiayi. Apraámsha nekas “Yusa Amikri” tu náamkamiayi.

²⁴ Páantchakait. Shuar aya Yúsan shiir enentáimtamujainchuk tura pénker takasmajaisha Yus nin shiir enentáimtawai. ²⁵ Núnisan Raap tsanirmataiyayi. Túmaitiat Israeran suntarin mamikmauta tusar akupkamun ni jéen itiaawar tura úukar chíkich jíntianam akupak uwentikrarmiayi. Nuna túramtai Yus “pénkeraitme” tímiayi nincha. ²⁶ Ayash wakantichuka jákachukait. Núnisan Yus enentáimtustin tura ni wakeramu takaachkurkia, jaka áintsan ántraitji.

3

Ii iniai

¹ Atum untsurí jintínkiartin ajastin wakerukairap. Yus in, jintínkiartin ájinia núnaka, nankaamas neka asar, awajiakrin nankaamas Yus asutiámattaji. ² Iis, ashí mash ti awajiat-sjik. Tura shuar chichaak, aya pénkernak chichaakka, nu shuar tuke eseer enentáimniuiti. Tura ayashíisha tuke pénker ana nuna túriniaiti. ³ Kawaisha enentáimpratai. Jiru wenu-chiniam ikiursam ni ayashí ashí ayantaatsuk. ⁴ Kanusha ti úuntaitiat tura kakaram wéayat ishitiapach wiantaijjai shuar wakera nuí ayantarminiaiti. ⁵ Núniskete ii iniai. Timiá ishitiapchitiat awakmaktinia tímianu chichaatsuk. Ji ishichik kapaajai ashí numi tsaruaku ekeemakchamniakait. ⁶ Ii iniaisha jijiai méteketete. Ashí tunáa piákuiti. Tura ii ayashín tunáa túratniun útsutmaji. Túnkuranmaya jijiai ikiapármaiti tura ashí ii wekajnia nuí émesewai. ⁷ Shuar ashí yajasman nawamkamin áiniawai. Ashí kajen írunna nunasha, nanamtincha, napincha, tura entsayanacha ashí nawamkaruiti. ⁸ Tura iniaikia penké nawamkachminiaiti. Ti yajauch asa penké nupetkachminiaiti. Iniaikia ti taráa tseasaiti. ⁹ Nu iniaijiai Yus Apa shiir awajeaji tura nu iniaijain aentsti yajauch chichárnaiyaji. Áentsun Yus Niijjai

métek-taku najanamaitiatar yajauch chicharnaiyaji. ¹⁰ Nu ini-aijiain pénkersha tura yajauchisha chichaaji. Yatsuru, nuka pénké atsutniuiti. ¹¹ ¿Púkuninmaya entsa sáawijiai kusuku jíinkimniakait? ¹² Yatsuru, ¿Kushinkiap shuinian nereawak. Munchisha kushinkiapen nerektatuak? Núnisan púkuninmaya entsa sáawijiai kusuku jíinkichminiaiti. Ii iniaijiai núnisan aya pénkera nu chichastiniaitji.

Yusa nekatairi

¹³ Shuar ti neka enentái takakna nu, pénker túrattawai. Nekas nékaitkiunka péechachia núnis tuke pénker ana nuna túrattawai. ¹⁴ Antsu atumí enentáijiai pénké yajauch enentáimtunairum tura atumek pénker pujustin enentáimtumarum, nékaitiatam pénker túrachiatam “pénkeraitjai” tiip. Nuka wáitrame. Nekaska núchaiti. ¹⁵ Nú enentaikia Yúsaiyanchuiti. Antsu ju nunkanmayaiti, shuara enentáiyaiti, núnisan iwianchnumiaiti nú enentaikia. ¹⁶ Shuarsha yajauch enentáimtunairar tura ninki enentáimtumainiakui, nujai ashí meseawai tura ashí yajauch ti awai. ¹⁷ Antsu Yusaiya enentái takakua nu júnisaiti: ashí nankaamas emka eseeratin, nuyá nawamkartin, shiir ajá, pénker anturnain, waitnenkratin, ashí pénker takáa tura anansuk naka chichamtin. ¹⁸ Eseera enentáimsatniusha shiir takawai ashí shuar pénker ana nuna túrawarti tusa.

4

Ju nunkanam írunna nu aneashtin

¹ ¿Urukamtaitsuk tuke kajernaikiarum ti máanaismum pu-jarum. Mesetnumsha urukamtaí wéarum? Júnisaiti: Atumin yajauch enentái katsuntrachmin útsutmakrumin tuke máaniarme. ² Wakerarmena nu takustin wakerarme tura nu wakeramu takustin jeachkuram nérentin maarme juruktiaj tusam. Chíkich takakna nujai itit enentáimtuniarme tura ataitin tujinkiam máanaitrume. Wakerarmena nusha Yus seachu asarum wáintsurme. ³ Tura seakrumsha yajauch searme. Atumí pénkerijiai warastin enentáimiu asarum searmena nusha wáintsurme. ⁴ Jú nunkanmaya wakerakum Yusa nemasrijiai tsanirma áintsanketrume. Nékatsumek atumsha. Ju nunkanmayan wakerakrikia Yusa nemasrintji. Shuar ju nunkanmayan wakerakka Yusa nemasri ajawai. ⁵ Yus-Chicham juna tawai:

Yus ni Wakaní ii enentáin apujturmasuitji. Nu Wakan in anenma asa ti akasmatramaji, táwai.

Tura nuna ¿antrankeash ta? ⁶ Tura anenma asa ti yáinmaji. Tuma asamtaí Yus-Chicham tawai:

Kajemtinian Yus íistatui tura péejchachin Yus nin aneak ti shiir yáíntatui, tawai.

⁷ Yusají ikiumastarum, tura íwianch taritratarum. Túrakrumin íwianch ikiurmaktiatui. ⁸ Yúsainí weamkata tura Nii atumin wearmaktatrum. Tunáa shuartiram Kristu numpejají nijia-martarum. Tura átum, Yussha tura ju nunkanmayasha mai métek wakerarmena nu, atumí enentáí naka eseeratarum.

⁹ Atumí tunaarí enentáimsarum kúntuts enentáimpratarum. Nu kúntutsjají ti úuttiarum. Nuik shiir enentáimprarum wishikmiarumna nuka iniaisarum kúntuts enentáimprarum úuttiarum.

¹⁰ Yusjají péejchach ajasta, túrakmin shiir awajtamsattawai.

“Yajauchiitme” tunaichatin

¹¹ Yatsuru, yajauch áujmatnaisairap. Yus-shuar ni yachin yajauch áujmatas tura yachí tunaarí tuke áujmatuk Yus “aneniatarum” tana nuna umichuiti. Antsu umichu asa “nu akupkamu ántraiti, umirkashtiniaiti” tawai nu shuar. Nujají nu shuar umirtsuk Yus akupkamu nankaamas enentáimtumawai.

¹² Yus Nínki akupkamu najana asa Nínki nu akupkamu umirkamun nekas nekaamnaiiti tunaashit tusa. Nínkiti uwentikratniun tura emesratniunam akupkatin jea nu. Amesha yáitiam chikicha tunaarí íistincha.

Kashin átatna nuna Yusak nékawai

¹³ Watsek, átum áujmateakrum “Arumsha kashincha nu péprunam weri nuí chikichik uwí takasar kuit achiktatji” tíchattarpash. ¹⁴ Ishichkisha penké nékatsrume kashin átatna nu. Ju nunkanam ii iwiaakmarí wárik amúatsuk. Yurankim utsanar tura nantu sukuam mash wárik menkaatsuk. Núnisketji. ¹⁵ Antsu júnis tíminiaitrume: “Yus wakerakuinkia iwiaaku pujakrikia nusha túrattaji” titiarum. ¹⁶ Túrachkurmeka átumka Yusjají nankaamantu enentáimprume. Tura ashí nu enentáikia yajauchiiti. ¹⁷ Shuar pénker túratniun nékayat, túrachkuinkia, nuka tunaiti.

5

Kuítrintin enentáimpratniua nu

¹ Kuítrinniutiram ju antuktarum. Ti úuttiarum. Ti wáitsatin asarum ti kakantra úuttiarum. ² Kuítrum mash mamukarai tura iwiarmampramurmesha mash tĩnkishap yúkayi. ³ Kurirmesha tura kuítrumsha ashí ijiakmamkarai. Ijiakmampramurisha ame pénkercha túram nuna paant iniakmawai. Tura jinium áesamua áintsan ame kuítrum yajauch awajtamsattawai ayashmijn. Amuukatin tsawant jeamunam anearchamame antsu ame kuítrum ikiaunkamame. ⁴ Ame takat iniararam ementushim akirarmamna nu “akirkati” turamainiawai.

Anearta. Yakijá Yus, nayaimpinmaya suntara uuntri, nu takartamniu chichamen antukai. ⁵ Ashí ju nunkanam írunga nu wararsaruitume. Tuma asarum kapunka nuke machararme tura yamaikia máatin tsawant jeayi. ⁶ “Nu shuar tunaiti” tírum tunaachu tsanumprurum máamarme, tura nínkia surimiakcharmai.

Yawetsuk takastin tura Yus áuj satin

⁷ Nu asamtai, yatsuru, nu páchitsuk ii Uuntri Kristu tatin nákastarum. Arakmausha ni arakri péñker tsapaiti tusa yumi yutuktinian shiir enentáijiai nákatsuk. Yútasua umirmatai esatrurmatai júuktatjai tusa nákatsuk. Tura júurmaksha ti waraatsuk. ⁸ Núnisan atumsha katsuntsatarum tura yawekiirap. Kristu tatin yuntumtemayi. ⁹ Yatsuru, nuámtak “ju yajauch túrutui” tunainirap. Tákurminkia Yus írmastatume. Nínkichukait nuna ístin tura anearta nu Yúsak tíjiuch wajatramui. ¹⁰ Yatsuru, yaunchu Yúsnan etserin enentáimpratarum. Tuke ii Uuntri Yus timia nuna shiir etserkarmiyi. Túmaitiat wáitsarmiyi túrasha pachischarmiyi. Núnisrumek enentáimsatarum. ¹¹ Itiurchatan katsuntainia nuka nekas shíiraiti, tu enentáimji. Shuar itiurchatan ti katsuntin ámiyi, ni naari Jup. Tura ni itiurchatri nankaasmatai Yus ti núkap kuítrin susamiyi. Nu nékatsrumek. Ii Uuntri Yus ti waitnenkratchakait.

¹² Ju ashí nankaamas enentáimtustiniaiti, yatsuru. Ame “ee” tákumka nekas titiá. Tura “atsá” tákumka nusha nekas titiá. Nekas chicham chichaachkumnínkia Yus írmastatui. Nu asamtai nayaimsha nunkasha ashí írunga nusha páchitsuk, aya támena nu tuke nekas atí.

¹³ Wáitakmeka Yus áuj sata. Waraakmeka, warasam kantamám Yus shiir awajsata. ¹⁴ Yus-shuartiram, shuar jáakka, Yus-shuara úuntrin untukti. Tura niisha taarti. Tura Jesusa naari pachikiar asuitijiai jaa shuaran ishichik kuerarti. Túrawar Yúsan áujtusarti nu shuaran. ¹⁵ Tura “Yus nuna nekas anturtamkattaji” tu enentáimsar áuj sarti. Túrawarmatai jaa shuar péñker ajastatui. Yus nin tsuártatui. Tura tunaan tura asa jáakuínkia Yus nu tunaan tsankurattawai. ¹⁶ Nu asamtai, atumí tunaari paant etsertunaiktarum. Túrarum Yus áujtunaistarum atumí tunaari tsankurnarat tusarum. Péñker shuar Yúsan tuke enentáijiai áujeamurínkia ti kakarmaiti. ¹⁷ Yaunchu Yus-Chichaman etserin ámiyi, ni naari Erías. Ni-isha iijiai méteketiat yumi yutukai tusa Yusa áuj samtai menaintiu uwí nuyá nankaamas yutukchamiyi. ¹⁸ Ataksha yutukti tu áuj samtai ataksha yutukmiyi tura araksha ataksha tsapainiarmiayi.

¹⁹ Yatsuru, shuar eseera wekatinmaya kanaakuinkia chíkich nin waketkitniun yainti. ²⁰ Shuar tunáa shuaran yajauch wekaan awakeakka jákatniunmaya uwemtikrattawai tura ti untsurí tunaarí tsankurnartatui.

PÍTIUR Emka papin aar akupkamu

Pítiur Yus-shuaran áatramiania nu

¹ Wisha ju papin aajna nu Pítruitjai. Wisha Jesukrístu akatramurintjai. Israer-shuar Yus-shuar árum nuna atumin ankant ankant tsakinmakarum chíkich chíkich nunkanam matsatrumna nuna áatjarme. Puntu nunkanmasha, Karasea nunkanmasha, Kapatúsea nunkanmasha, Asia nunkanmasha, Pitinia nunkanmasha pujarmena nuna áatjarme. ² Yaunchu Apa Yus, “uwemtikrataj” tímia núnisan achikmaitrume. Tura, Winia ajasat tusa ni Wakanijjai akantamkamiarme. Umirtukat tusa nuna túramiayi. Tura Jesukrístu numpejaisha atumí enentáin atsajkir chamir awajturmasmiarme. Wats, Yus tuke waitnentramar ti shiir awajtamsarat tusan wakerajrume.

Shiir enentáimsar pujustin

³ Wats, Yus, ii Uuntri Jesukrístu Apari ana nuna naari shiir awajsatai. Yussha ti waitnentrama asa, atak akiiniat-niun suramsaitji. Jesukrístu jakamunmaya nantakin asam-tai, iikia atak akiiniar tuke iwiaaku pujustiniaitiajnía nu aru-tramji. ⁴ Tura nayaimpiniam ikiurtamsamu ana nuna achik-mintrum tusa Yus wakerawai. Nu ikiurtamsamu meser-chamnia amuukachminiaiti. Tura nusha yajauchichuiti. ⁵ Yus nekas enentáimta asakrumin ni kakarmarijjai wear-marme. Tura tuke uwemtikrampratniun, nunka amuua-munam paant iniakmastatna nu achikmintrum tusa tuke tsawant ni kakarmarijjai wáitmarme.

⁶ Nu enentáimsarum wararme. Kame ju nunkanam pujakrum itiurchat wáinkiashtarmeash. Tura ju nunkanam pujustin ishichkichukait. Ukunam péñker pujustaj tu enentáimsarum wararme. ⁷ Enentáimsatarum. Shuar kurin wakerana núnisan atumniasha umirtukat tusa Yus wakerutmarme. Aents kurin jinium áesainiawai, aya kurik juakat tusa. Kurin ti wakeruinia ásar, amuukamnia ain túruiniawai. Atumsha, itiurchat wáinkiarmenta nujai, Yusan nekas enentáimtusartimpiash tusa nekapsamuitrume. Nu enentáimtamuri kurijai nankaamas péñkeraiti. Ukunam, Jesukrístu támatai, Yuska atumin “pénker túraitrume” turamtajtsa wakerittiawai. Tura “Ashí shuar nuna nekaawar winia naarun uunt awajsarat” tusa túrutmattarme. Nu tuma asamtai ju nunkanam nekapsamuitrume, itiurchat wáintrumna nujai.

⁸ Jesukrístu wáinchaitiatrum anearme. Tura yamáí wáinchiatrumek nekas enentáimtarne. Tuma asarum ti wararme. Nu warastin nayaimpiniam warastatjinia núniskete; nuka paant titin jeatsji. ⁹ Iimiatarum. Uwemtikrurat tusarum Yus umirkachurmek. Nu uwempratín wainiu asarum waraarme.

Krístujai ii uwempratniun yaunchu etserkarmiayi

¹⁰⁻¹¹ Yus áentsun waitnenta asa, uwemtikrataj tusa tuke wakerimiayi. Núnaka Yúsna etserin etseriarmiayi. Kristu Wakani ni enentáin pujuriarmia nu, túruntsain Kristu wáitsatniurín jintiarmiayi. Tura ukunam ni ti shiir pujustintríncha etseriarmiayi. Túrasha “tuu áishmankait Kristu tutai, tura urutiák túrunat” tusar nu etserin éamkesar anintrusarmiayi. ¹² Tura nii pujuiniainkia túrunashtinian, antsu ti ukunam, ii pujajnia jui túrunatniun Yus nekaamtikiarmiayi. Núnaka Yusa shiir chichamen ujamakarmia nú shuar nekaprutmarme. Nú shuar Yusa Wakani, nayaimpinmaya akupkamu ana nuna nekatairijjai ujamakurme. Maa, nu uwempratniun tájana nuna, nayaimpinmaya suntar nekaatai tusar wakeruiniawai, túrasha tujintiainiawai.

Pénker wekasatin

¹³ Tuma asamtai, pénker enentáimsarum tura pénker íimiasrum wekasatarum. Tura Jesukrístu ukunam wantiniak waitnentramp Prattana nu yawetsuk nákastarum. ¹⁴ Umin uchi áintsarmek yaunchu nékachu asarum wakerimiarmena nu iniaisarum Yus umirin atarum. ¹⁵ Ashí túramurmijjai timiá penker wekasatarum. Yus, untsurmakuana nu, pénker asamtai, átumka ni shuari asarum pénker wekasatarum. ¹⁶ “Wi pénker asamtai atumsha pénker wekasatarum” Yus tana nu ni Papirijn áarchamukait.

¹⁷ “Yus winia Aparuiti” tárugna nu aneartarum. Ashí aentsu túrutairín métek Yus nekaattawai. Nu neka asarum, ju nunkanam pujarmena jui Yus ashamkatarum. ¹⁸ Warí, ánta wekasatniun atumí uuntri jintintramarmena nuyá Yus uwemtikramprarme. Túrasha kurisha kuitcha amuukamnia ainia nujai uwemtikrachmaitrume. ¹⁹ Antsu Kristu numpe ti shiira nujai uwemtikramuitrume. Nu nékarme. Yaunchu, shuar tunáa túrakui, Yus tímiayi, “murik yajauchichu tunamarcha maarum, Yus sútainiam ikiustarum. Nuna numpen wáinkian, atumí tunaarin tsankurattajai” tınıuyayi. Núnisan Kristu in jarutramka asa ii tunaaríniá uwemtikrampraitji. ²⁰ Nunkan nájantsuk áentsun jaruktinian Kristun anaikiarmiayi Yus. Tura wárik akupkachmiayi. Antsu yamáí tsawantin, átum pujarmin,

pénker pujusúk tusa wakerak, atumin jarutramkat tusa Krístun akupkamiayi. ²¹ Niijjai átumka Yus umiirume. Yuska Krístun jakamunmayan iniantki nankaamantu awajsamiayi. Yus nekas enentáimtakrum, aya pénkernak túrawai titiarum tusa túraiti. ²² Yus nekas tana nuna, Yusa Wakanj yainmakui, umirka asarum atumí wakanjin pénker ajasuitrume. Yus-shuarjai yajauch enentáimtunaisuk mai anenai ajatai tusarum tura asarum, nekas shiir enentáimtunaisrum mai anenai ajatarum. ²³ Nekaatarum. Yusa chichame umirka asarum atak akiiniaitrum nuka ju nunkanmayanchuiti. Antsu Yusa chichame iwiaaku tuke amuukachmin ana nú chichamjai tuke iwiaaku átiniaitrum.

²⁴ Ju ayash tuke pujuschamniaiti. Yusa Papiriin junis áarmaiti:

Ashí aentsti nupáa áaniuitji. Ii pénkerisha kukujia áaniuiti.

Nupa wárik kaawai. Kukujsha núnisan wárik iniaawai.

²⁵ Tura Yusa chichamesha tuke amuukachminiati.

Nu Chichamjai uwempramnia asantai atumin etsernakuiti.

2

¹ Tuma asantai, ashí yajauch ana nu iniaisatarum. Anañkatin, ántar-chichamtin átin, chikichna wakeruktin, ashí tsanumpratniusha iniaisatarum. ²⁻³ Antsu, Uunt Jesukrístu waitnenkartutairi nekapsa asarum, uchi yama akiinia muntsun ti wakeruinia áintsarmek, Yusa chichame aya penkerkea nu ti wakeruktarum. Yusa chichamejai tuke tsawant tsakakrum tuke uwemprami tusarum túratatum.

Iwiaaku kaya

⁴ Ii Uuntri Kristu kayáa áantsankete. Tura shuar kayan ya-jauchin nakitiainia núnisan Jesukrístun nakitrarmiayi. Tura kayan ti penkeran wakeruinia núnisan, Yuska, “winia Uchir ti penkeraiti” tusa Jesukrístun achikmiayi. Atumsha Jesukrístu weantuktarum. Nii iwiaaku kayaiti. ⁵ Atumsha iwiaaku kaya áantsanketrume. Tuma asarum Yus wijiai ni jeen jeamti tusarum tsankamaktarum. Tura nútiksarmek Jesukrístui atumí iwiaakmari tsankamaktarum, Yus wakera nuna túrutati tusarum. Jesukrístujai tura asarum Yus shiir enentáimtikrume. ⁶ Jesukrístunun Yusa Papiriin junis áarmaiti: “Iistarum. Kayan ti penkeran achikjai” Yus tímiayi. Jeen emka apujtuamuri atí tusan Seunnum apujeajai.

Nin enentáimtana nu ántar enentáimtatsui. Aarma ana nu penké kayan chichaatsui. Antsu Jesukrístun tawai. ⁷ Yus umirkaitrumna nu, “kaya ti penkeraiti” tarume. Tura Yusan umirainiatsna nuka Yusa Papiriin tana nujai métek áiniawai. Ju áarmaiti:

Jeān jeamin nakitrarmia nú kaya jeān emka apujtuamurī atī tusa apujamuiti.

⁸ Tura jūsha aarma awai:

Tukumak iniaartin kayaiti.

Kame shuar Jesukristunun etserkamun nakitiakka, ħenentáinium itīur pēnker wekasat?

Wats, nú shuar, Krístun umirainiachu ásar, tuke túrunatin asamtai tukumainiawai.

Yusna ajasaru ainia nu

⁹ Tura átumka Yus achikmaitrume. Tura, wínian pujurtursarat tusa yajauchinmaya Uunt Yus akantamkaitrume. Yusna asarum pēnker enentáimin ajasurme. Tura Yus sumakmaitrume. Niisha winia pēnkerun etserturkarat tusa túraitī. Kame kiritniunmaya jīinkirum ni tsáapnintrīn wekasatniun achirmakurme. ¹⁰ Yaunchu nusháa shuar áuyarme. Tura antsu yamaikia Yus-shuar ajasrum, Niiniu ajasurme. Yus-shuar ajatsrumnī, ħya waitnentrampamia? Antsu yamaikia Yus waitnentramuitrume.

“Yúsnaítjai” tu enentáimsatin

¹¹ Yatsurtirmin tájarme, Yusna ajasrum, ju nunkanam írar matsatu asarum, atumí ayāshī wakerana nu tsan̄katkairap. Ayāshim wakerana nu túrakmiñkia ame enentáim nujai yajauch ajastatui. ¹² Yus-shuarchanum pēnker wekasatarum. Túrakrumñkia niisha yamáí “Yus-shuar yajauch túruiniawai” ántar tuíniayatan, ukunmañka, Yusjai in̄kiunaiktin tsawant jeamtai, pēnker wekarmena nuna enentáimturmasar, nú shuarsha Yúsán shiir awajsartatui.

¹³ Kristu atumí Uuntri asamtai, ju nunkanam akupin áiniana nusha umirkatniuitrume. Uunt akupin ashí akupin asamtai umirkatarum. ¹⁴ Tura ni akupeamurī ainia nusha tunaan túruinia núnaka asutiáti tura pēnkeran túruinia núnaka shiir awajsati tusa uunt akupin akupkamu ásarmatai umirkatarum. ¹⁵ Nekas pēnker wekaamurmijiai enentáimcha ainia nu netse chichaamurī itiatmam̄tikiatarum tusa Yus wakerawai.

¹⁶ Tunaanumiā an̄kant ajasu asarum pēnker wekasatarum. Túrashā wī an̄kant ajaschajak tusarum nán̄kamsarum yajauch túrawairap. Antsu Yusna asarum, ni wakera nuna umirkatjai tusarum anearum wekasatarum. ¹⁷ Chíkichcha shiir enentáimtustarum. Yus-shuar ainia nusha aneetarum. Yus pēnker asamtai ashamkatarum. Uunt akupin shiir awajsatarum.

Yus-shuarti katsuntratin

¹⁸ Takarniutirmesha ame úuntrum pēnker shiir enentáimturmakeisha tura yajauchiitkuisha umirkatarum.

19 Nekaatarum. Ántar wáitkiarmainia nuí, “Yus iirui” tu enentáimsa katsunteakrumka, ti penkeraiti. 20 Yajauch túrawakmin asutiámamtai katsunteakmeka nuísha warin ati. Antsu penker túrawakmin asutiámamtai katsunteakmeka júka ti penker túrame Yusaj. 21 Núnisan túrunatin achikmaitrume. Kristu waitrutmasmiarme nuí, Wi túraj núnisan túrawarmi tusar wáitsamiayi. 22 Krístuka tunaan penké túrachmiayi. Tura chikichkinkesha penké anankachmiayi. 23 Kátsekeamsha Niñkia katsekachmiayi. Wáitkiamsha “yapajmiaktaj” tíchamiayi. Antsu “winia Apar Yus iisti’ tímiayi, Yus penker túrin asamtai. 24 Kristu Niñki ni ayashin ii tunaarin entsaki krúsnum jarutramkamiaji. Tunáa enentáimtusairum tusa, antsu Yusaj penker wekasamniuram tusa jarutramkamiaji. Atumí enentáin tsuártaj tusa Kristu asutniámiayi. 25 Murik ni pujutairin waketkitniun nékatsna ántsarmek atumsha menkaka wekaimiarme. Tura yamaikia atumí wáitmaurin waketkintrume. Atumí wáitmau Krístuiti, atumí enentáin wáinnia nu.

3

Nuatnaikiaru itiur túratniuit

1-2 Tuma asamtai, nuwatiram atumí áishri umirkatarum. Amesha penker, Yus umirka weká asakmin, áishrum Yus-Chichaman umirchaitiat, ame túramurmin nekáa, ámek chichaatsminin, niisha Yus-shuar ajastinian wakerittiawai. 3 Nu asamtai aya pátatek iwiarmampratniusha ti enentáimtusairap. Intiash ti penker iwiaratniusha, kurijiai iwiarmampratniusha, pushí ti kuitjai entsartincha ti enentáimtusairap. 4 Antsu, “nekas shíirmach ajastaj” tákumka, enentáimin “shiir kajeche átajai” tu enentáimsatarum. Nuka sakarchattawai. Tura nuka Yúsnumka ti penkeraiti. 5 Yaunchu núnisaran nuwá Yúsan enentáimtusarmia nu, tura Yúsan shiir enentáimtikratniun wakeriarmia nu, ni áishrin umirkar nujai ni enentáin shíirmach ajasar pujuarmiayi. 6 Atumí weatri Sara ni áishrin Apráaman umirmiayi. Umirin asa, “winia uuntru” tíniuyayi nin. Atumsha penker túrakrumka tura sapijmiatsuk wekaakrumka, Sarajai métek átatrume.

7 Tura áishmanfirmesha Yus wakerana nu nekaarum atumí nuwe shiir enentáimtusurum tsanintarum. Nuwemsha, nuwá asa, áishmanjai métek katsuntrachminiaiti. Tura niisha, ámijiai métek Yusa waitnenkartutairijiai tuke iwiaaku átinian takusminiaiti. Tu enentáimta asam ame núwem shiir enentáimtustá. Yus áujukuram itiurchat atsuti tusarum túratarum.

Yúsnum penker wekasatin

⁸ Nuyasha ashí Yús-shuartirmin tájarme, aya chikichík enentaik atí. Waitnennairatarum. Nekas yatsum aneam núnisrumek anenaitiarum. Aya áminiuk enentáimtutsuk chikichan yáintaj tu enentáimsatarum. ⁹ Yajauch tura-mainiakuisha “yapajkiataj” tiirap. Katsekramainiakuisha “iikkiataj” tiirap. Antsu “Yus winia shiir awajtusuiti” tu enentáimsarum, yajauch turamainiana nu pénker awajsatarum. ¹⁰⁻¹² Yus-Chichamnum júnis aarma asamtai nu túratarum:

Uunt Yus pénker wekaana nuna wainiui, tura ni áujmancha ántawai. Tura yajauchin túrana nuna nakitrawai. Tuma asamtai, shiir pujustaj tákuŋka tura tuke tsawant warastinian wakerana nu, pénker ímiastí, yajauch chichakaj tusa tura wáitruawaj tusa. Tunaanumia kanaki pénkeran túratí. Tuke enentáijaj shiir átinian eakti.

Tu áarmaiti.

Itiurchat aij pénker túratin

¹³ ¿Yaki yajauch túrutmat pénker turamnisha? ¹⁴ Túrasha pénker túrayatmek wáitiamkinkia Yus shiir enentáimtikramprattarme. Tuma asamtai ashamkartutsuk, sapijmiatsuk wekasatniuitrume. ¹⁵ Tura “Kristu winia Úuntruiti” tu enentáimtustarum. Tura “¿urukamtia Yus-shuar ajasuitiam?” turamainiakuisha, pénker áimkiamnium iwiarnarum pujustarum. Waantu enentáimtumatsuk, nin pénker enentáimtikrataj tusam túrata. ¹⁶ “Yúsja pénker wekasataj” tu enentáimsarum wekasatarum. Yus-shuar asakrumin chíkich shuar ántar áujmatramainia nu ni ántar áujmatramsamun nekaawar natsaarat tusarum Yúsja pénker wekasatarum. ¹⁷ Yajauch túrakur wáitsatniujaj nankaamas, Yus wakerakuinkia pénker túrakur wáitsatniuka ti penkeraiti.

¹⁸ Kristu ii tunaarín asakártaj tusa jarutramkamiaji. Ashí asakárma asamtai atak tunaan jarukchatniuiti. Niisha tunaan penké túrichuiat, ii tunáa asakrin wáitrutmasmiaji, Yúsnum ejetaimtai tusa. Ayashíinkia jakayat ni wakaníjjai ni ayashí ataksha iwiaaku ajasmiayi. ¹⁹ Ni wakaníjjai jakáa wakanin emetamu armia nuna etserkataj tusa wémiayi. ²⁰ Nusha yaunchu Nuai uunt kanun nájanuk sianu painti (120) uwi pujurmia nuí Yuska umirtukarat tusa ti nákamaitiat Nuai étserman umikcharmiayi. Nú kanunmasha ishichik, uchu, aents kanunam pujuinian yumíjjai uwemtikrarmiayi. ²¹ Nu yumi Yus-shuarti imiantinian nakumui. Ii ayashí chamir awajsatai tusar imiantsuji. Antsu ii enentáij

pénker atí tusar Yus sear imianji. Nujai iisha uwemji. Jesukrístu nantakin asamtai, nujai uwempraitji. ²² Tura Niisha nayaimpiniam we akupin pujutainium Yusa untsuuríini apujsamuiti. Túramtai nayaimpinmaya suntarsha, tura ashí kakaram akupin áiniana nusha Jesukrístun umirainiawai.

4

Ju nunkanam wáitsatin

¹ Kristu ni ayashíin wáitsa asamtai atumsha núnisrumek wáitsatin ákuisha, katsuntratjai titiarum. Ni ayashíin wáitiana nú shuar yajauchin páchiatsui. ² Antsu “iwiaakjana nuíkie Yusa wakeramurín tuke umirkatjai” tu enentáimiui. Ni ayashí wakerana nuna yamaikia páchiatsui. ³ Warí, Yúsan nékainiatsna nú shuar túruiniana nu atumsha núkap túrichmakuram. Yus-shuar ajatsuk tsanirmatin wakerimiarme. Yajauch túratniusha, nampernum nampekrum ti yurumárum, enentáincha ajasrum charaatum ajatniusha, ántar-yusa namperiin yajauch ana nu najanatniusha nusha ashí wakerimiarme. ⁴ Tura surimiatsuk yajauch túrimiarmena nu iniaisa asakrumin, yaunchu atumjai nuna túrin armia nu, “urukamtai iniaisara?” tusar yajauch áujmatramprume. ⁵ Túrasa ukunam nu aents ni túramurín etserkartatui. Iwiaaku ainia nunasha tura jákaru ainia nunasha Neka awai. Nii nu aentsun sumamtikiawartatui. ⁶ Túrasa jaka armia nu Yusa shiir chichame ujankarmiayi. Ni ayashíin ashí shuarjai métek jakamniaitiatan Yus iwiaaku pujana núnisan ni wakaní iwiaaku pujusarat tusa ujankarmiayi.

Shuar yáintiniaitji

⁷ Ashí amuukatin jeatemayi. Tuma asamtai pénker enentáimsatarum; túrarum anearum Yus auju pujutarum. ⁸ Aneniamujai untsurí tunaasha tsankuratin awai. Tuma asamtai ashí nankaamas nuamtak anenaistarum. ⁹ Kajé-kajejainchu atumí jeen itiaaniátarum. ¹⁰ In ankant ankant shiir awajtamsatniun Yus ti núkap takakui. Tura in shiir awajtamsamujai chíkich shuarsha shiir awajsatarum tusa chíkich chíkich túratniun suramsaitji. Tuma asamtai pénker takaawa áintsarmek Yus amasmania nujai ame írutramuram yaintá. ¹¹ Etserkatniun Yus amasuitkiuinkia ame tamena nu, Yus tana nujai métek atí. Chíkich shuar yáintiniaitkiumka Yus amaana nú kakarmajai túrata. Ashí túramna nu Yusa naari shiir atí tusam Jesukrístu náarijiai túrata. Jesukrístun ashí aents shiir enentáimtusartí. Tura ashí áentsnum ni kakarmari tuke atí. Nuna tajai.

Yus-shuarti wáitsatin

¹² Aneamu yatsurtiram, ti waitsatin nekapramsartin jeartampramna nu nusháa enentáimprairap. Wáitsatin támatai, “¿urukamtai waitsa pujaj?” tu enentáimsairap. Kame túrunamniaiti. ¹³ Tuma aín shiir enentáimsatarum. “Kristu wáitsamurín métek-taku wáitiakun péñkeraiti” tu enentáimsatarum. Ukunam Kristu wincharí wáinkiarum timiá warasmi tusarum túratarum. ¹⁴ Krístunu asakrumin katsekkramkachartimpiash. Túmaitkiuisha Yusa Wakaní shiir ana nu atumíin pujurtamkui shiir awajsamuitrume. Katsekkramainia nú shuar imia Yusa Wakanín yajauch áujmatainiawai. Tura átumka Yusa Wakaní shiir awajearme. ¹⁵ Túra atumsha yajauch túrawáirum aneartarum. Mankartana nu, kasamkana nu, tunáa túrana nu, tura chikichna páchiana nusha ní wáitsatniurínkete. Atumjainkia nu wáitsatniuka atsutí. ¹⁶ Tura antsu Krístunuiti tusar wishikramuk wáitkiarmainiakui natsaáirairap. Krístunu asam wáitiayatmek, natsamtsuk Kristu naarí shiir awajsata.

¹⁷ Yuska ni shuarín nekapсатаjtsa naníamatniuiti. Tura nu tsawantcha jeayi. Yus imia in nekapramkuisha Yus-Chichaman umirainiatsna nú shuarsha urukawartín. Ti asutniáwartatui. ¹⁸ Imia Yus umirjinia nu uwempratniuri iturchataitkiuisha tunaan túruiniana nusha urukawartín. ¹⁹ Tuma asamtai Yus wakeramujai wáitiainia nu, niisha Yus najanamu asa Yus iirsatí tusa tuke péñker túratí. Warí, Yuska tuke péñker túrichukait.

5

Yus-shuara uuntri túratin

¹ Yamaikia Yus-shuara úuntriñtiram, jintintjiarme. Wisha núnisnak Yus-shuara úuntriñtjai. Kristu wáitsamurín wáinkiaitjai wisha. Tura ukunam ti shiir átatna nuí chíkich Yus-shuara uuntriñ núnisnak wisha pachiinkiaittajai. ² Yus-shuar ame ístiniaitmena nu, péñker íistá, murikiu wáinin ní murikrín wainnia áintsamek. Nakittsuk, shiir enentáimsam túrata, Yus wakerana nuke. “Chíkich akupta asamtai túrattajai” tútsuk tura nujai kuítrintin ajastin enentáimtsuk nekas wakeritia, Yusa takatrí asamtai. ³ Turasha, “Yús-shuara uuntri ajasan, Yus-shuaran akuptiaj” tu enentáimsaip. Antsu shiir túramurmijiai Yusa murikrí jintintiata. ⁴ Nuínkia murikiu wainniu Uuntri taa wantiniak iwiarmamtai tawasap ti shíirmachia núninian suramsattawai. Aents súana nú shíirmach wari mamurtiniaiti. Tura Úuntrum ámin suramsattana nuka penké mamurchattawai.

Yus-shuarti umirnaikiatin

⁵ Tura natsatirmesha atumí uuntri umirkatarum. Kame yaunchu Yús-Papinium aarma asamtai ashí Yus-shuartiram nan̄kaamantu enentáimtumatsuk umirnaikiatarum.

Waantu enentáimtuma núnaka Yus nakittiawai. Antsu nan̄kaamantuchu enentáimtuma nuna Yus waitnentak yayawai. Tu aarmaiti.

⁶ Wats, Yus timiá kakaram asamtai, amek nekamam, péechach enentáijiai enentáimtumasta. Nuinkia tsawant jeamtai ni wakerak Yus ámin pen̄keri awajtamsattawai.

⁷ Yus ámin ti enentáimturmakui ame itiurchatrum ainia nu Yus ashí iiktusta.

⁸ Aneartarum tura íimiastarum. Íwianch atumí nemasri ana nu, uunt yawáa nuke, yanak emesraintiaj tusa eāak tentaa wekaawai. ⁹ Tura tuke Yus nekas enentáimtusurum surimiaktarum. Ashí nuñkanam Yusnum atumí yachi ainia nu átum wáitiarmena núnisan̄ wáitiainiawai. Nusha kajinmakchatniuitrume. ¹⁰ Wats, ishichik tsawant wáitsarmena nu nan̄kaamasmatai Yus ataksha pen̄ker awajtamsattarme. Tura numi wewe wajana núnisan̄ ikiakátmartatrume. Tura Yus ikiakárma asarum ni jintiñ tuke pen̄ker wekasattarme. Ju Yus tuke in waitnentramtsujik. Tura iisha Jesukristunu asakrin Niiijai métek Yus ni shiir pujutainium tuke shiir pujusmintrum tusa achirmakuitji. ¹¹ Nú Yúsnasha ashí aents shiir enentáimtusartí. Tura ashí áentsnum ni kakarmari tuke atí. Nuke ati.

Amíak áujmamsamu

¹² Serpanujai ju papin ishichik áarmaj nuna akupeajai. Serpanu Yusjai pen̄ker wekaak Yusnum winia yatsur ajasuiti; núnaka nékajai. Yus waitnentrama asa ti yainmakmania nuna enentáimtikeajrume ju papijiai. Tura tuke ni waitnenkartutairiñ wekasatarum tájarne.

¹³ Papirúnianmaya atumjai métek Yus achikma áinia nu amikmaatmarme. Winia uchir Markus núnisan̄ amikmaatmawai.

¹⁴ Yusai yachi ajasu asarum anenaisrum shiir awajnaistarum. Jesukristunu ajasuitrumna nuna Yus imiatkinchanum pujustinian suramsarat tusan wakerajai.

Nu atí.

PÍTIUR Ataksha papin áarar akupkamu

Pitiur Yus-shuaran áatramiania nu

¹ Wikia ju papin aajna ju Semun Pítruitjai. Jesukrístu aka-tramu asan ni takarniurintjai. Ii Yusri tura in Uwemtikramin Jesukrístu umirumna nuna atumniasha juna áatjarme. Ni-isha ashí áentsun métekrak enentáimtin asamtai atumsha iijiai métek Niiniu ajasurme. Nuka ti penkeraiti. ² Yus, tura ii Uuntri Jesussha nékarmena nú nukap nekaki wéakrumin, Yuska atumin ti nukap yáinmaktatrum tura ti nekas imiatkinchanum pujustinian suramsattarme. Nuna nekaan tuke núnisan atí tusan wakerajrume.

Yusai páchitkia atin

³ Yus uunt asa tura ashí túramnia asa, umirtukat tusa achirmakuitji. Nii neka asar atsumajnia nu wáinkiaitji. Yus-shuarti wekasatniusha, tura Nin aneatniusha ii atsumajnia nuna Yuska kakaram asa suramsaitji. ⁴ Niisha uunt asa tura tujinkiachu asa ni chichamen suramsaitji. Nu chichamsha ti kakarmaiti tura ti penkeraiti. Nu chichamjai atumsha atumí ayashí yajauch wakerana nuyá uwemprarum, Yusai páchitkia átinian suramsaitrume. ⁵ Yus umirkarme. Yamaikia juna túrataj tusarum kakartiniaitrume. Ti penker wekasatniuitrume. Nuyá Yusna nekaatniuitrume. ⁶ Nuyá yayauch túrashtin ímiastiniaitrume. Nuyá katsuntratniuitrume. Nuyá Yus shiir enentáimtusum wekasatniuitrume. ⁷ Tura nuyá ashí shuar shiir enentáimtustiniaitrume. Tura nu nankaamas ashí shuar aneatniuitrume.

⁸ Ashí nu túrakrumka, tura tuke túrukum wéakrumka, nakiar-chattarme. Túrarum ni takatri émamkesum takastatrum. Tura ii Uuntri Jesukrístu nekas nekaattarme. ⁹ Tura nuna túruiniatsna nuka, kusurua áanin áiniawai. Jesukrístu wakeramurin enentáimtuiniatsui. Ni tunaariya uwemprarmia nuna kajinmatainiawai. ¹⁰ Tuma asamtai yatsurtiram, Yus atumin anaitiamak achirmakurmena nu tuke enentáimsarum wetarum. Túrakrumka penké iniarchattarme. ¹¹ Tura ii Uuntri Jesukrístu uwemtikramprajnia nu, Nii tuke akupeana nu, nakitsuk shiir awaintiamattarme.

¹² Tuma asamtai nékarmini tura Yusna nekas ana nuyá kanaatsrumni tuke enentáimtikratjarme. ¹³⁻¹⁴ Nekaatarum. Winia jákatniurun jeatema nuna ii Uuntri Jesukrístu ujat kayi. Tuma asamtai iwiaaku pujajna juik atumin tuke enentáimpratarum tusan jintinratniuitjarme, tu

enentáimsajai. ¹⁵ Tura wi jakamtai, wi aajna juna tuke kajinmatkirum tusan, wi jeajna nuna túrattajai.

Kristu waantu ajasun wáinkarmia nu

¹⁶ Ii Uuntri Jesukristu kakarmari tura ni táratniuri etserkamajnia nu, aya áentsnumiá ántar chichamchauyi. Antsu imia ii jijijai Uunt Jesukristu waantu ajasu wáinkia asar ujakmarjume. ¹⁷ Tura Apa Yus Jesukristun shiir waantu awajsamia nu, ni imiá shiir pujutairiya chichaak tímiayi, “Juka winia ti aneamur Uchiruiti. Nin ti wararjai.” ¹⁸ Iisha naint “Yusna” tájinia nu Nijijai pujá asar nu nayaimpinmaya chichaamu paant antukmaji.

¹⁹ Tura nuna nankaamas ti nekasa nu, Yúsnan etserin yaunchu etserkarmia nusha nékaji. Ju étserma jusha, tsawant tsawaatsain kiritniunam ji keak tsáapin awajeana áintsan asamtai, pénker enentáimta asarum pénker túrarme. Tura Kristu taa, yánkuam etsantea núnisan atumí enentáin ashí paant awajsattawai. Tura nu tsawant jeatsain nu étserma tuke pénker enentáimtustarum. ²⁰ Tura ju emka nekaatarum. Shuar aya ni enentáimmiarijijain, Yusa Wakaníjijainchu, Yus-Chicham urukamtai tu chicháa nuna nekaatniun jeatsui. ²¹ Warí, Yúsnan etserin yaunchu etserkarmia nu, aya ni wak-eramurijijain tícharmiayi. Nu áishmankan enentáin Yus pujur-sarmiai. Tuma asa ni tiarmia nuna Yusa Wakaní jintintiam tiarmiai.

2

Wait chichaman unuiniaia nu
(Jútas 4-13)

¹ Tura Israer-shuarnum wait chichaman etserniusha páchitkiarmiayi. Atumíncha wait chichaman unuiniau páchitkia ártatui. Niisha awajimtikrampratniun wakeruiniak wáitian ti yajauchin uukar unuiniarartatui. Tura “Uunt Jesus uwemtikrurmia nusha ántraiti” tiartatui. Nuna takui ni amuukatniurisha wárik jeartiatui. ² Tura untsurí shuar ni yajauch túruiniamurin lírsar métek túrawartatui. Iis, “Yus-Chichaman unuiniaitjai” tuíniayatan imiá yajauch túruiniakui untsurí aents “Yus-Chicham ántraiti” tiartatui. ³ Kuítian ti wakeruinia ásar, wait chichaman unuitiamprar akíam kuítriniawartatui. Tura nú shuar yaunchu Yus jákatniunam sumamtikiawarma ásar, ni amuukatin tsawantri jeatemayi. ⁴ ¿Warí? Yuska ni suntari nayaimpiniam pujuarmia nunasha penké tsankurachmiayi. Antsu nayaimpinmaya jinium akupkarmiayi. Tura nekapsatin tsawant jeatsain kiritniunam jinkiamu emetamu pujuiniawai. ⁵ Yáunchuya shuarnasha Yus tsankurachmiayi. Antsu amuukarat tusa

amaarkatniun akuptukarmiayi. Antsu aya Nuain, Yusjaj wekasatniun etserin asamtai ni shuarj siati armia nujaj uwentikramiayi. ⁶ Enentáimpratarum. Sutuma pépruncha tura Kumura pépruncha nayaimpinmaya jin akuptuk Yus mash amukmiayi. Aya yúnkunmik awajsamiai. Ukunam nu túrunamun nekaawar, shuar tunáa túratin tsúumainian nekaawarat tusa túramiayi. ⁷ Tura Yus Ráutan uwentikramiayi. Péñker shuar asa, Sutumanmaya shuar imiá yajauch ásar tunáa túruiniakui, Raut kúntuts enentáimsamiayi. ⁸ Péñker áishman asa, nuyá shuara yajauchirín wáitiainiak, ni enentáj péñker asamtai tuke tsawant kúntuts enentáimiuk wáitmiayi. ⁹ Tura incha tunaan iniakturmakrin, nu tunaanum nupetnakchati tusa Uunt Yus uwentikrampramniaitji, ni umirka asakrin. Túrasha yajauch shuárnaka nekapsatin tsawant jeakui ti asutniáwarat tusa Yus yámaikikia apujeawai.

¹⁰ Tura Yus akupeana nuna umirkatniun nakitrar ni yajauch wakeramurín túruinia nunasha Yуска nekas asutiáttawai. Enentáimcha áiniawai. Tura ni wakeramuríniak wakeruiniawai. Niijjaj nankaamas akupin ainia nuna yajauch áujmatainiawai. ¹¹ Warí, imia Yusa suntari Yusaj matsatania nu, nuna túratniun tsúumainiawai. Nankaamas kakaram tura nankaamas uunt áiniayat nu akupniun katsekainiatsui.

¹² Nu áishmansha enentáincha yajasma núnin áiniawai. Achikiar mantamnatniuk akiinia áiniawai. Enentáimtsuk nánkamsar yajauchin chichainiawai. Tuma ásar yajasma núnisan jakartatui. ¹³ Chikichan wáitkiamia áintsan wáitsartatui. Tuke tsawant ni wakeramunak túruiniak “waraajai” tuniawai. Tura atumjaj irunar yurumáiniayatan atumin anankramawar warainiawai. Nuka natsantaiti.

¹⁴ Nuwan wakerutskeka íniatsui. Tunaan yawetainiatsui. Yúpichuch ainia nú shuaran netse túratniun wakerumtikiainiawai. Kuítian wakeruktinniasha ti nékainiawai. Jákatniunam sumamawaru áiniawai. ¹⁵ Yúsnumaanj naka wétsuk awajirarai. Peura uchirí Paraam Yúsna etserniuitiat yaunchu awajimia núnisan awajiniawai ju shuar. Paraamka tunaan tura, kuítian achiktinian ti wakerukmiayi. ¹⁶ Tura niisha tunáa túratajtsa weaj Yуска umpuurun chichachun aents chichaana nujaj métek chichamtikiamiayi. Nuínkia umpuuru timia nujaj Yúsna etserin ni netse túratniurín enentáimiar iniaisamiayi.

¹⁷ Nu áishmansha yumirmat kuyua núnis áiniawai. Tura núnisan yuranmisha kíariat nase umpuim menkaana nu, yumi ajuarcha ásar, penké ántar áiniawai. Warí, Yus-Chichamjaj áentsun yainiainiatsui. Niisha imiá kirit áanum

tuke pujustin áiniawai. ¹⁸ Niisha ti chichainiayat ántar chichainiawai. Yajauch túratniujai tura ayash wakera nújaisha páchim túriarmia nuyá kanakiarua nú shuaran ataksha tunaanum ajuartajtsa wakeruiniawai. ¹⁹ “Iiya núnis túrakrumka ankant átatrume” tu wénawai. Túrasha imia niniki ni tunaariin emetamu áiniawai. Páantchakait. Shuar warí tunaajaim nupetnaka, nuna emetamurinti. ²⁰ Kame shuar, uunt Jesukrístu uwemtikiartin ana nuna chichamen nékainiak ju nunkanam yajauch ainia nuyá uwempra ainia nu, tunáa nupetkam atak yajauchiniam iniainiakka, nuik pujumia nújainkia nankaamas yamá imiá yajauch pujuiniawai. ²¹ Yusa akupkamurin imiá pénkera nuna Yus nú shuarnasha súarmiayi. Túrasha nékainiayat tunaanum waketkiaru ásar ti asutniáwartatui. Tuma asamtai, nekas jintia nekaachuitkiunka maak árainti. ²² Tíchamukait, “yawá iyak ataksha yúawai,” tura, “kuchisha imiainiuitiat ataksha tsakusnum maajkimiui.” Nu áishmansha núnisan yajauchiniam ataksha wáketainiawai.

3

Uunta tátintri

¹ Aneamu yatsurtiram ju papin jimiará áatjarme. Mai papinium winia jintintiamurjai atumí chamir enentáin enentáimtikratjarum tusan wakerajrume. ² Yúsnan etserin, pénger wekain armia nuna etserkamuri enentáimturtarum. Tura ii Uuntri akupkamurin ni akatramurijiai ujatmakarmia nusha enentáimpratarum. Jesukrístu uwentikrampramaj nuna chichamen tajai.

³ Jusha emka nekaatarum. Amuamu tsawantin Yúsnan wishikin wantinkiertatui. Tura niisha ni yajauch wakera-murin túrusar wekasartatui. ⁴ Tura juna tiartatui. “¿Kóstuka “wi atak tátatjai” timia nusha urukuit? Warí, ii uuntri yaunchu kajinkiarmla nuyá yapajjáchmaiti. Yus yaunchu ju nunkan najanamlia nuyá yamaisha tuke núniskete” tiartatui. ⁵ Túrasha nunkancha nayaimpincha Yus yaunchu najanamlia nuna nekaatniun nakitiainiawai. Yusa chichamejai nunka entsaya jiinkimiayi tura nunkasha entsá nanatrawai, Yus timia nujai métek. ⁶ Tura ukunam nu nunkan amaarkamujai Yus emesramiayi. Ashí nuna nekaatniun nakitiainiawai. ⁷ Tura Yus tiniu asamtai nayaimpisha nunkasha yamáia nuka jijiai emesnarat tusa ikiusma áiniawai. Yus áentsun nekapsattana nu tsawantai yajauch aents emesnartatui; tura jisha nu tsawantai nunkancha nayaimpincha áesattawai.

⁸ Tura jusha, aneamu yatsurtiram, enentáimsatarum. Uunt Krístujainkia chikichík tsawant mir uwiya núniskete; mir

uwisha chikichík tsawanta núniskete. ⁹ Uunt Kristu, “atak tátatjai” tana nuna umitsuk menkakashtatui. Áyatik áentsti “wau taatsui” taji. ¿Urukamtai wau taatsua? In áentstin nákarmaji. Shuar chikichíkísha menkakajin tusa nakitiawai. Antsu ashí shuar enentáin yapajíáwarat tusa wakerawai. ¹⁰ Túrasa Uunta tsawantri aya aneachma jeattawai. Kasa aya aneachma kiritniunam taana núnisan tátatui. Nu tsawantin nayaimpisha ipiamta núnis charáa timiatai menkakattawai. Tura nuí ashí írunna núurtiuk esaawartatui. Tura nunkasha tura ashí írunna nusha esaawartatui.

¹¹ Ashí nu emesnartin neka asarum atumsha imiá nekas Yus tuke enentáimtusum, takamtsuk umirkarum wekasat-niuitume. ¹² Yusa tsawantri wárik tati tusar, jintiá ímprusar nákastiniaitji. Nu tsawantai nayaimpisha esáa emesnartatui, tura ashí írunna núurtiuk ti tsuer ajas entsamnattawai. ¹³ Tura iikia yamaram nayaimpisha, yamaram nunkasha ati tusar nákaji. Nu átatui, tímiayi Yus. Tura nuísha aya péñkerak átatui.

¹⁴ Nu tuma asamtai, aneamu yatsurtiram, ju túrunati tusarum nákarmena nuí, imiatkinchanum wekasam chamir enentáimjai makuuchmin Yus wáitkiati tusarum wekasatarum. ¹⁵ Ju nekaatarum. In uwemtikramprataj tusa Yus ti nákarmaji. Ii aneamu yachi Páprusha núnisan Yus ni nekatairin susamia tímiatrusan áatrampramarme. ¹⁶ Ashí papí aarmia nuí Pápruka wi tajana nuna chichaawai. Kame ni áarmari chíkíchka ishichik nekaachminiusha áiniawai. Nékachu ainia nú shuarsha, tura Yúsnum tariarcha ainia nusha Papru áarman yapajíáwar nusháa jintintiainiawai. Tura chíkích chichamsha Yus-Chichamnumia ana nuna núnisan túruiniawai. Túmainiakka niníki emesmamainiawai.

¹⁷ Wátsek, aneamu yatsurtiram, túruntsain ujakjarmena nu neka asarum, yajauch shuar anankramattsa wakerut-mainiak awajimtikrurain tusarum, tura Yusai tariarurmena nuyá iniaraj tusarum anearum wekasatarum. ¹⁸ Tura ii Uuntri Jesukristu in Uwemtikkiartin ana nu, yamáí nékarmena nú nankaamas nekaatarum. Tura enentáimin nú nankaamas tariarum wetarum. Yamaisha tura tuke, ii Uuntri Jesukristu náarin uunt awájsartí. Nu atí.

JUAN

Emka papin áarar akupkamu

Tuke iwaaku átinia nérentin Chicham ana nu

¹ Ashí nan̄kamamia nú yaunchu Yusa Uchir̄i tuke pujuuyayi. Nusha iisha anturkaitji. Nekas ii jiijiai wáinkiaitji. Wáinkiarsha ii uwejejaisha antiñkiuitji. Niisha Yúsán ti paant awajeak̄, Chícham tíminiaiti. Tura tuke iwiaaku átinia nérennuiti. Nuna áateajrume. ² Iwiaaku átinia nérenniusha paant nekanamiayi, nusha Jesukrístuiti. Iisha Nii wáinkia asar nu étsereaji. Tura tuke iwiaaku átinia nérenniuri asa tuke Yus Apajaí pujuuyayi. Tura yamaikia iini paant ajatramsakrin atumniasha ujaajrume. ³ Ii Yus Apajaisha ni Uchir̄i Jesukrístujaisha tsan̄inkiar nekas chikichík ajaji. Tura atumsha núnisrumek iijiai chikichík ajasuk tusa wáinkiamajnia nuna anturkamajnia nunasha ujaajrume. ⁴ Ti shiir warastarum tusan juna áatjarume.

Yus tsáapniniaiti

⁵ Yus imiá tsáapnin asamtai kiritin Niinkia pen̄ké atsawai. Nu chichaman Jesukrístu in unuitiamprakrin nuna atumniasha ujaajrume. ⁶ “Niijiai tsan̄inkia pujaji” táyatar kiritni-unam pujustinia áintsar tunaanum pujakrikia wáitraji tura nekas pen̄ker ana nu túratsji. ⁷ Yuska tuke tsáapninium pujuwiti. Iisha núnisrik tuke tsáapninium pujakrikia nuámtak nawamnaikiar pujuiniaji. Túrakrin Yus ni Uchir̄i Jesukrístu numpéjai ashí ii tunaar̄i japirtamji.

⁸ “Wi tunaan túrichuitjai” tákurkia ímia iik anan̄mamaji. Nekas ana nu nékatsji. ⁹ Antsu ii tunáar̄i Yus paant ujakrinkia Yuska tsan̄kurtamprattaji. Tura ii tunaar̄in asakátramprattaji. Yuska ti pen̄ker asa Nii tana nuna tímiatrusan̄ umikmín asa túrattawai. ¹⁰ Kame “Tunaan túrichuitjai” tákurkia nujai “Yus wáitriniaiti” taji. Ni chichamesha ii enentáin pujurtamtsuji.

2

Jesukrístu in Yúsán áujturmaidji

¹ Yus-shuartiram, tunaanum iniaar̄airum tusan ju papí áateajrume. Túrashá Yus-shuar tunáa túramtain̄kia Apa Yusan ii áujturmau awai. Nuka Jesukrístuiti. Niisha ti pen̄keraiti. Niisha Yúsán áujturmakui Yusjai ataksha iwiaarar pujustatji. ² Jesukrístu ii tunaar̄in asakártaj tusa jarutramkamiaji. Túrashá aya íiniunkechu antsu ashí shuara tunaar̄in asakártaj tusa jarukmiayi.

³ Yus tana nu umirkurkia nuikia Yus nekas nékaitji. ⁴ Tura shuar “Yúsan nékaitjai” tayat Yus tana nuna umirchakka wáitrawai. Nekasa nuka ni enentáin atsawai. ⁵ Antsu shuar Yus tana nuna umireakka Yúsan ti shiir aneawai. Túrakur Ni-ijjai tsaniñkiar pujamu nékaji. ⁶ “Yusjai tsaniñkia wekaajai” tana nú shuar Jesukrístu wekasamia núnisan wekasatniuiti.

Yamaram akupkamu

⁷ Yatsuru, yamaram akupkamun áattsujrume. Áyatik yámankamtaiknumia antukmiarum nunak tájarne. Ashí atumin jintintiamu yaunchu akupkamuiti. ⁸ Túmaitiat nekas yamarma áitkiasnak áateajrume. Nu akupkamun Kristusha nekas iniakmasmai. Atumijincha nu akupkamu nekas paant awajsamuiti. Nujai kiritin menkaatemka asamtai tura nekas tsaapniñkia paant tsaapnirtasa pujakui nu akupkamun ataksháa áateajrume.

⁹ Shuar “tsáapninium pujajai” táyat chíkich Yus-shuaran nakitiakka tuke kiritniunam wekaawai. ¹⁰ Yus-shuaran aneana nu nekas tsáapninium pujawai. Niisha iniaatsuk chíkichnasha tunaanum ajuarchamniaiti. ¹¹ Tura shuar chíkich Yus-shuaran nakitiakka kiritniunam tuke wekaawai. Tura kiritniunam iimiu asa itiuraani wea nuna nékatsui.

¹² Uchitirmincha, Jesukrístu jakamujai atumí tunaari tsan̄kurnaru asakrumin juna áateajrume. ¹³ Úntirmincha yámankamtaiknumia tuke pujuuya nu nekáa asakrumin juna áateajrume. Únmarutirmincha uunt iwianch nupetka asakrumin juna áateajrume.

Uchitirmincha, Yus Apa nekáa asakrumin áateajrume. ¹⁴ Úntirmincha yámankamtaiknumia tuke pujuuya nu nekáa asakrumin juna áatjarne. Únmarutirmincha atumí enentájijai Yus-Chicham umirkarum kakaram asarum íwianch nupetka asakrumin juna áatjarne.

¹⁵⁻¹⁷ Aya áentsnumia ana nu yakiyanchuiti. Apa Yus súsachuiti. ¿Warimpiait nu? Júiti: ame ayashim wakerana nusha, ame ísam takustaj támena nusha, tura nan̄kaamantu ajastin. Nuka ju nun̄kanmaya áiniawai. Shuar aya nunak wakerak Yúsnaka aneatsui. Kame ju nun̄kasha amuukattawai. Ashí nu wakeruktincha ti nekas amuukattawai. Túrashá shuar Yusa wakeramur̄in umiana nu tuke iwiaaku pujustatui Yusjai. Nu asamtai atumsha ju nun̄kanam ana nu pachiki-airap. Tura aya juyá ana nu aya tákustin enentáimsáip.

Nekas chicham tura wait chicham

¹⁸ Uchirú, amuukatin tsawant jeatemayi. Atumsha Kristu nemasrī tátin antukuitrume. Yamaikia untsurí Kristu nemasrī wantinkiar matai amuukatin tsawant jeatemayi. ¹⁹ Nusha ii weeak ármayi. Túmaitiat nekas Yus-shuar

ácharmayi. Nekas Yus-shuar áiniakka tuke iijiai irunar pujuaraayi. Tura jĩinkíarmatai nekas Yus-shuarcha ainia nu paant nekanamniati.

²⁰ Antsu atumniaka Yusa Shiir Wakanĩn Kristu suramsam-tai ashí paant nékarme. ²¹ Nékachuitrume tu enentáimkiun áattsujrume. Antsu nekas chicham ana nu neka asakrumin paant áatjarne. Wáit-chichamsha nekas-chichamsha penké nushaachuk ainia.

²² Wáitrin júiti: Jesusan “Yus anaikiamuka Krístuchuiti” tana núiti. Núiti nekas Kristu nemasrĩ. Yus Apancha ni Uchirĩncha nakitia asa Kristu nemasrĩnti. ²³ Yusa Uchirĩn nakitiainia nu Yus Apajaisha tsanĩn pujatsui. Tura Yusa Uchirĩn shiir awajea nu, Yus Apajaisha tsanĩn pujawai.

²⁴ Yámankamtaiknumia antukmiarum nu atumí enentáin pu-jurtamsati. Nu túrakrum atumsha Yusa Uchirijiaisha Yus Apajaisha tuke tsanĩnkrum pujustatrume. ²⁵ Jesukrístusha Nijiai tuke iwiaaku pujustinian tsan̄katramkaitji.

²⁶ Anankartin írunkui juna áatjarne. ²⁷ Atumniasha Je-sukrístu Yusa Shiir Wakanĩn suramsakrumin, nu Wakan tuke pujurtamkurmin shuar jintintramatin atsumatsrume. Antsu Yusa Wakanĩ ashí jintintramprume. Ni jintintrammasha imiá nekas asa wáitchaiti. Tuma asamtai Nii jintintramna áintsarum Krístujai tuke tsanĩnkrum pujustarum.

²⁸ Yamaikia, uchiru, Krístujai tuke tsanĩnkrum wekasatarum. Nu túrakrikia Nii támatai natsamtsuk ti shiir in̄kiunaiktatji. ²⁹ Atumsha Jesukrístu ti penkera nu nékarme. Núnisan ashí shuar penkeran túruinia nuka Yusa uchirĩ áiniawai. Nusha nekaatarum.

3

Yusa uchirĩ áiniana nu

¹ Maa, shiir enentáimpratarum. Yus Apa ti anenma asa “winia uchir” tu anaitiamkaitji. Kame nekas ni uchirĩntji. Tuma asakrin jú nun̄kanmaya Yús-shuarcha nekarmainiatsji. Kame Yusnasha nékainiatsui. ² Aneamu yatsurtirmea, juna tájarne: nekas Yusa uchirĩ ajasuitji. Kame ukunam urukuk átajⁱ nusha nékatsji. Túrashu jú paant nékaji: Jesukrístu támatai imia Nii paant wáinkiar Nijiai métek ajastatji. ³ Tura shuar shiir enentáijiai nuna náakka imia nin̄ki shiir awajmamui Jesukrístujai métek shiir atajai tusa.

⁴ Shuar tunáa túrakka Yus akupkamu umirkachuiti. Kame núiti tunaaka Yus akupkamu umirkashtin. ⁵ Jesukrístu ii tunaari asakártaj tusa jú nun̄kanam támia nu nékarme. Tura Nin̄kia tunaan túrichuyayi. ⁶ Tuma asamtai shuar Nijiai tsanĩn wekáa nuka tunaanum wekaatsui. Antsu shuar tunaanum wekaakka nu shuar Krístun wáinchaiti, núnisan

nékachuiti. ⁷ Uchiru, shuar anan̄kramawairap. Pénker túrinkia Kristu ti pen̄ker asamtai niisha pénkeraiti. ⁸ Antsu shuar tunaanum wekaana nu iwianchnaiti íwianch tuke tunaan túrin asamtai. Yusa Uchirí ju nun̄kanam táwiti ashí íwianch túramun emesrataj tusa.

⁹ Shuar nekas Yusjaj akiinia nu tunaanum wekaatsui. Yusa uchirí asa Yusa iwiaakmarijaj wekaawai. Tuma asa tunaanum tuke wekaatsui. ¹⁰ Shuar pénker túratsna nuka tura Yus-shuaran kajera nuka Yus-shuarchaiti. Nujaj Yusa uchirí ainia nusha tura iwianchi uchirí ainia nusha paant nekaamniaiti.

Mai anenai ajatin

¹¹ Atumsha yámankamtaikniumia chicham antukmiarum nu júiti: mai anenai ajartin. ¹² Iisha Kaínkia áanin áchatniuitji. Íwianch-shuar asa ni yachin máamiayi. Tura ¿urukamtai maamia? Enentaimprata. Nii yajauch asa tura ni yachi pénker asamtai máamiayi.

¹³ Yatsurtiram, ju nun̄kanmaya shuar nakitramainiakui ti enentáimsairap. ¹⁴ Iikia jákatniunmaya uwempra asarⁱ nekas iwiaaku pujaji. Túmakur Yus-shuar ainia nu aneaji. Nujaj yamaram iwiaakma takakjinia nu imiá páantaiti. Shuar Yus-shuaran aneachkun̄ka tuke jákatniunam wekaawai. ¹⁵ Shuar Yus-shuaran nakitiakka man̄kartinia núnisaiti. Tura man̄kartinkia tuke amuicha iwiaakmanum pujuiniatsui. Nuka nékaji. ¹⁶ Jesukristu in jarutramka asakrin nujaj nekas in anenmaj nu nékaji. Iisha núnisrik Yus-shuar ainia nu ti aneakur ni yaíntai tusar jarukmin átiniaitji. ¹⁷ Túrashashuar chíkich Yus-shuar atsumana nuna takakiat waitnentachkun̄ka nekas ni enentáijijaj Yúsan aneawash. ¹⁸ Uchiru, aya chíchamjain̄ anenain áchatniuitji antsu nekas aneniakur pénker túrar yáiniaiktiniaitji.

Yusaj natsamtsuk jeamniaitji

¹⁹ Jujaj ii Yúsaj sapijmiatsuk jeatniusha tura nekas Yus-shuaraitji nu nekaatniusha nekapmampramniaitji. ²⁰ Ii enentái yajauch túramun enentáimtikramkurnisha Yus iijijaj nan̄kaamas ashí mash nékatsuk. ²¹ Tura, aneamu yatsurtiram, ii enentái yajauch túramun enentáimtikramchakrinkia Yúsaj sapijmiatsuk jeamniaitji. ²² Tura ni wakeramu túrakrikia tura ni chíchamesha umiru asakrin ashí ii seaj nuna suramsattaji. ²³ Júiti Yus akupkamu: ni Uchirí Jesukristu nekas enentáimtustin̄ tura Kristu timia áintsarik shuartisha mai anenai ajartin. ²⁴ Shuar ni chíchamen̄ umia nuka Yusjaj tsanin̄ wekaawai tura Yus nijijaj tsanin̄ wekaawai. Mai chikichik ajasu áiniawai. Tura Yusa Wakan̄ ii enentáin̄ pujá asamtai nujaj Yus iijijaj tsanin̄ wekaana nu nékaji.

4

Yusa Wakanisha tura Kristu nemasri wakancha

¹ Aneamu yatsuru, untsurí shuar wáitruiniak “wi Yúsnan etserniuitjai” tuiniawai. Tuma asamtai ashí shuar “wi Yusa Wakanin takakkun chichaajai” tuinia nu péñker nekaptsuk enentáimtusairap. Antsu íisrum nekas Yusa Wakanímpiashit tura chíkich wakaniashit nu nekaatarum. ² Jujai nekapsarum ya nekas Yusa Wakanin takaka nu nekaattarme: Shuar “Jesus Yusa Uchiri Krístuitiat nekas aents ajas ayashimkiamiayi” tana nu Yusa Wakanin nekas takakui. ³ Tura Jesusan tu enentáimtatsna nuka Yusa Wakanin takaktsui antsu Kristu nemasrí wakanin takakui. Kame Kristu nemasrí wakan tátin tama ántichukaitrum. Nu wakan yamaikia ju nunkanam táwiti.

⁴ Uchiru, átumka Yusna asarum Yus atumí enentáin pujawai. Tura ju nunkanmaya shuara enentáin íwianch pujawai. Atumiin pujana nuka niijjai nankaamas kakaram asamtai wáitrin ainia nu nupetkaitrume. ⁵ Niisha ju nunkanmaya ásar aya ju nunkanmayan áujmatainiawai. Túmainiakui ju nunkanmaya shuar ti penker anturainiawai. ⁶ Antsu iikia Yúsnaitji. Tuma asakrin Yúsan nékainia nu anturtamaini-aji. Tura Yúsnachu ainia nu anturtamainiatsji. Nujai nekas Wakanin takakusha tura wáitrin wakanin takakusha nekaamnaiiti.

Yus tuke anenkratniuiti

⁷ Aneamu yatsuru, anenaitin Yúsnumia asamtai mai anenai ajartai. Shuar anenkratniua nuka Yusa uchiri asa Yúsnancha nékawai. ⁸ Shuar anenkratcha nuka Yúsnanka nékatsui. Kame Yuska tuke anenkratniuiti. ⁹ Tuma asa ni Uchiri chikichkiniak ju nunkanam akupturmakmiaji. Iisha ni túrunamujai nekas iwiaaku pujaji. Nujai Yus in yáinmak ni anenkrattain paant iniakturmasmiaji. ¹⁰ Jujai nekas anenkrattainkia paant nekanamnaiiti: ii Yus aneaj núchaiti. Antsu ii ti tunáa árinin Nii aneachmaitiatan Yuska ti anenma asa ni Uchirin ii tunaarin asakarat tusa akupturmakmiaj nujai nekas nekanamnaiiti.

¹¹ Aneamu yatsuru, Yus núnis anenma asakrin iisha núnisrik mai anenai ajartai. ¹² Chikichkisha Yúsan wáinkiachuiti. Túmaitiat mai anenai ajakrikia Yus ii enentáin pujurtamkui Niiijai métek anenkratin ajaji. ¹³ Yus ni Wakanin suramsa asakrin Yus iijai tsanin wekaana nusha tura ii Niiijai tsaninkia wekaajnia nusha, nujai nékaji. ¹⁴ Yus Apa ni Uchirin ashí shuaran uwemtikrarat tusa ju nunkanam akupkamia nu wáinkia asarí étsereaji. ¹⁵ “Jesus Yusa Uchirinti” tana nu shuarjai Yus tsanin wekaawai tura niisha Yusjai tsanin wekaawai. Mai chikichik ajasu áiniawai.

¹⁶ Yus in anenmajnia nu ti nekas nékaji. Yus tuke anenkratniuiti. Tuma asamtai shuar anenkartakka Yusbai tsanin wekaawai tura Yusbha niijai tsanin wekaawai. Mai chikichik ajasu áiniawai. ¹⁷ Núnisar ti penker anenkartin ajaji. Túrarí súmamtikiatin tsawantai natsamtsuk wajastatji. Kame ju nunkanam pujayatrik Jesukristujai méteketji. ¹⁸ Nekas anenaiyamunam sápij atsawai. Antsu nekas anenaiyamunam sápij menkaawai. Aya asutiátiin akui sapijmiaktinaiti. Tuma asamtai ántar sapijmiana nu nekas anenkratchaiti.

¹⁹ Yus emka in anenma asakrin iisha Nii anejai. ²⁰ Tura shuar “wi Yúsán anejai” táyat chíkich Yus-shuaran naki-tiakka nuka wáitriniaiti. Kame Yus-shuaran tuke wainnia nuna aneachkunka ¿itiurak Yusan wáinchasha aneat? ²¹ Yus incha juna turammiaji: Yúsán anea nu shuar chíkich Yus-shuarnasha aneatniuiti.

5

Ju nunkanmaya írunna nu núpetejai

¹ Ashí “Jesus Yusa Uchirí Krístuiti” tu enentáimtana nú shuar Yusa uchirínti. Tura aparí aneakrikia ni uchirísha aneattaji. ² Yus Apa aneakur tura Nii wakera nu umirkur Yusa uchirísha ashí aneattaji. ³⁻⁴ Yus aneakur Nii tana nu umiktatji. Ashí Yusa uchiríya nu Yúsán nekas enentáimta asa, ashí ju nunkanmaya írunna nuna núpeteawai. Nu asamtai Yus tana nu umirkatin itiurchatchaiti. ⁵ Aya “Jesus Yusa Uchirínti” tu enentáimtana nú shuar ju nunkanmaya ana nuna awakamniaiti.

Jesukristu “Yusa Uchirínti” tu etserainia nu

⁶ Jesukristu jú nunkanam taa entsajai imiankui Yus nayaimpinmaya chichaak “Juka winia aneamu Uchiruiti” tímiayi. Tura nuyá Jesus jakamtai ni numpé puarmiayi. Entsajai imianin ni takatrín nankamamiayi túrasha in jarutramak ni takatrín amukmiayi ju nunkanam. Chikichinkia túrutsuk mai metek túra asamtai Yusa Uchiríya nu paant nekanamniaiti. Yusa Wakanísha tuke nekas tiniua nu métek tawai. ⁷⁻⁸ Nu asamtai menaint “Yusa Uchirínti” Jesusan tuiniawai: Nayaimpiniam Yus Apa tura Jesukristu, Chícham aa nu, tura Yus Wakancha; nunkanmasha Yus Wakancha, entsasha tura numpasha. Mash métekrak tuiniawai. ⁹ Aents étserainiakui ántureaji. Nuna nankaamas Yus ni Uchirín tana nu nekas anturkatniuitji. ¹⁰ Yusa Uchirín enentáimtana nú shuar ni enentáincha nékawai. Antsu Yus ni Uchirín timian enentáimtatsna nú shuar Yúsán enentáimtachu asa Yúsán “wáitriniaiti” tawai. ¹¹ Yus ni Uchirín timia júiti: Tuke iwiaaku pujutai nérenniuiti tura nu iwiaakmancha in

suramsaitji. ¹² Yusa Uchirijjaj tsanin wekaana nú shuar, nu iwiaakmajaj iwiaaku pujuiniawai. Tura Yusa Uchirijjaj tsanin wekaatsna nú shuar, nu iwiaaku átinnium pujatsui.

Amuak Yus nekas enentáimtustinian áarmiania nu

¹³ Yusa Uchirj nekas enentáimtakrum tuke amuicha iwiaakmajaj iwiaaku pujarme. Nu nekaatarum tusan juna áatjarme.

¹⁴⁻¹⁵ Yus wakeramujaj métek seakrinkia anturtamji. Tura anturtamkurin ii seamaj nu nekas takusua nu enentáimpramnaitji. Nu neka asar Yus ti shiir enentáimtaji.

¹⁶ Tunáa awai jákatniunam júana nu. Shuar nu tunaan túramtainkia Yus áujtustin ántraiti. Tura shuar chíkich tunaan túrakuinkia nuka nekas Yus áujtustiniaiti. Nekas jákatniunam júatsna nú tunaan túraitkiuinkia iwiaaku átinian Yus susatawai. ¹⁷ Ashí yajauchⁱ ana nuka tunaiti. Tura jákatniunam júatsna nú tunaasha awai.

¹⁸ Nekas Yusjaj akiinia nú shuar tunaanum tuke wekaatsui. Antsu Yusa Uchirj nin ti penker wainkiui íwianch antinchiachminiaiti.

¹⁹ Iikia nekas Yúsnaítji tura ashí ju nunkanmaya shuar iwianchnia áiniawai. ²⁰ Yusa Uchirj ju nunkanam taa nekas-Yus aa nuna paant jintintramji. Yusa Uchirj Jesukrístujaj tsaninkia wekaakur nekas-Yusa nujajsha tsaninkiar wekaaji. Nekas-Yus asa tuke iwiaaku átinia nuna nérenniuiti. ²¹ Uchirú, ántar-yus írunna nuí pachiinkiairap. Antsu nujaj aneartarum.

Nuke atí.

JUAN

Ataksha papin aar akupkamu

Nekasa nunasha tura anenaitniuncha ujaawai

¹ Wi Juan Yus-shuara uuntri asan ii umai Yus achikma nuna tura ni uchirinha ju papin áateajai. Wisha nekas anumin aneajrume. Tura aya wíkichu antsu ashí Yus-shuar ainia nusha nekas chichaman nekaawaru ásar atumin anenmarme. ² Nekas-chicham tuke amuutsuk ii enentáin pujá asamtai aneajrume. ³ Yus ii Aparisha tura ii Uuntri Jesukristusha, Yus Apa Uchiri asa, atumin anenmak imiatkinchanum shiir pujustinian waitnentrakmak yainmakarti. Nujai nekas-chicham nekaarum anenaittiarme.

⁴ Ame uchiram Yus Apa akupkamujai métek umiiniakui nuna nekaan ti shiir enentáimprajai. Nekas-chichaman umin áiniawai. ⁵ Yamaikia, umaru, tájame: mai anenai ajartai. Yamarak upkamun áattsujme antsu yámankamtaik antukmiaj nunak tájame. ⁶ Nekas anenkartinia nú shuar Yus akupkamun uminiaiti. Tura Yus akupkamuka “anenkartin tuke atarum” tawai. Nusha yámankamtaiknumia antukuitrume.

Anankartincha írunui

⁷ Ju nunkanam anankartincha ti írunui. Jesukristu nekas aents ajas akiiniamia nuna enentáimtuiniatsui. Nu shuar anankartin ásar Kristu nemasri áiniawai. ⁸ Nu shuarjai aneatarum. Yajauch shuar ántar yayakrumin Yus átum takasman métek akirmakchamniaiti. Antsu aneara takasakrumin Yus métek akirmakarmi.

⁹ Ashí shuar Kristu jintiamun iniais “nankaamas nékajai” tana nu, Yúsnachuiti. Antsu Kristu jintiamun umiana nu shuar Yus Apajaisha tura ni Uchirijjaisha mai tsanin pujawai. ¹⁰ Shuar Kristu chichamen jintiachu atumíjeen írmástaj tusa jeakui awayáwairap tura “shiir taume” tiirap. ¹¹ Kame nu shuar “shiir taume” tákumka nu shuar yajauch jintiamu jimiareame.

Umíamu chicham

¹² Ti nukap atumjai áujmatsatniun wakerajai. Túrasha ju papinium mashi áatrashtatjarme. Antsu imia wiki atumin iyakun jeátjai. Nuyá naka chichasar ti shiir warastatji.

¹³ Ame kaim Yus achikma nuna uchiri amikmaatmainiawai.

Nuke atí.

JUAN

Nuyá Ukunam papin aar akupkamu

Kayu ti penker shuaraiti

¹ Wi Juan Yus-shuara uuntri asan winia amikrun Kayun ju papin áateajai. Wisha ti nekas aneajme. ² Aneamu yatsurú, Yusjai penker wekaakum ame wakanim penker pujana núnisan ame ayashmisha penker atí tusan Yúsan áujtajme. ³ Ame nekas chicham umirman shuar jui taar ujatkar-mayi. Tura nuna antukan ti warasmajai. ⁴ Yus-shuar nekas chichaman umiiniakui imiá shiir enentáimtuiniyajai.

⁵ Aneamu yatsurú, chíchich Yus-shuar ti penker yayame. Kame jajaya yujainia nusha nekas yayame. Nu penkeraiti. ⁶ Nu shuar ame nekas anenamun jui taar Yus-shuar irun-tramunam etserkarai. Ataksha irauwenakui atsumainiana nu súsam shiir akupkarta. Penker wáinkiumka Yus shiir enentáimtikrattame. ⁷ Nu shuar Jesukristun takarsatai tusar wekainiawai. Túrawar Yus-shuarcha ainia nuna kuítrijiai yurumátniun nakitrarmatai ⁸ ii Yus-shuartikia nii atsumainia nu ajamsatniuitji. Nekas chichaman etserainia nu, yainkiartai tusar túratniuitji.

Tiútrepes yajauch túriniaiti

⁹ Ashí Yus-shuar árumna nuna papin akuptukmajrume. Kame nékajai, Tiútrepes nankaamantu enentáimtumak ii tájinia nuna umiktinian nakitiawai. ¹⁰ Nu asantai nui jean ní yajauch túramun etsertuktatjai. Nii ántar ti áujmatuk tsanumprut-maji. Tura nu arantcha Yúsnan takainia nu irainiakui awayáiniatsui. Tura chíchich awayátaj tákuisha suritiawai. Tura nuyá Yus-shuarjai iruntratniun surimiawai.

¹¹ Aneamu yatsurú, nu yajauch túramu jumamkiirap antsu penker túratarum. Penker túrinia nuka Yúsnaiti. Antsu tunáa túrinia nuka Yúsan nékachuiti.

Timitriu penker túriniaiti

¹² Imiá nekas penker shuar asantai ashí shuar Timitriun penker áujmatainiawai. Iisha núnisrik penker shuáraití tákurin nekas tájinia nusha nékarme.

Umíamu chicham

¹³ Wi ti nukap titinian wakerajme. Túrashá ju papinium mashi áatrashtatjame ¹⁴ wárik íitin asan. Nui jean chichasmi.

¹⁵ Shiir pujustá. Juyá amikrum amikmaatmainiawai. Ii amikrishá chikichik chikichik amikmaatruata.

JÚTAS papin áarar akuptukma

Jútas Yus-shuaran papin áateawai

¹ Wi Jútas Jakupu yachintjai. Jesukrístu takarin asan ashí Yus Apa ni shuari átinian achikma ainia nuna ju papin áateajai. Jesukrístujai tsaninkiaru ásarmatai Yus nin wainiainiawai ni-ijjai kanakchatniun. ² Yus ti waitnentrak imiatkinchanum tuke shiir pujustinian yainmakarti. Ti anenma asa túrati.

*Ti tunáa shuar írunui
(2 Pítiur 2.1-17)*

³⁻⁴ Aneamu yatsurú, iikia mai metek Yus-shuar asar ju uwempratin chichaman áatratniun wakerukjarme. Túrasha ti yajauch shuar anankramawar atumín pachiinkiarmai. Niisha “Yus ti anenkartin asamtai páchitsuk tunáa túramniaitji” tuiniawai. Nu arantcha Yus in Akuptamniuncha tura ii Uuntri Jesukrístuncha nakitin áiniawai. Nu asamtai nu shuaran “yaunchu sumamawaruiti” tímiayi Yus. Tuma asamtai tájarme “Tuke Yus-Chicham yapajíashtinian ashí Yus-shuar akasmatkarat tusar susamuiti. Wátsek, kakaram ajastarum” tájarme.

⁵ Yaunchu Uunt Yus Israer-shuaran túramia nu nékarme. Nuna atak enentáimtikratjarme. Ejíptu nunkanmaya júkiar Nin umirkacharua nuna máawarmiayi. ⁶ Nayaimpinmaya suntarsha ni pujutairin ajapa ikiukiar Yus susamun umitsuk iniaisarmiayi. Túrawarmatai Yus kiritniunam jirujai tuke jinkia sepunam apujas pujurainiawai. Tura Uunt Tsawant jeamtai súmamtikiawartatui. ⁷ Núnisan Sutuma péprusha Kumura péprusha tura tíjiuch péprusha áishmanjaisha nuwajaisha ti yajauch nuamtak tsanirmanainiakui ti tunaan penké túrachmin ana nunasha túrin ármiayi. Túmainiakui ashí shuar ashamkarat tusa Yus amuicha jinium asutiáwarmiayi.

⁸ Ayu. Atumín yajauch shuar ainia nu, yaunchu túrunamun enentáimtsuk tuke yajauch enentáimiainiak ni ayashin yajauch awajmamainiawai, Yusnasha nakitiainiawai, tura ashí akupin ainia nunasha yajauch áujmatainiawai. ⁹ Antsu Mikiar, nayaimpinmaya suntara kapitíántrintiat, iwianchjai máaniak Muisaisa ayashin akasmatak “áaniumsha” tu chicharkachmiayi. Antsu áyatik “Yus írmastí” tímiayi. ¹⁰ Túrasha ju shuarka nékainiatsna nuna nánkamsar yajauch chicharainiawai. Tura nékainiana nuka yawá áinis enentáimtsuk áyatik nékainiawai. Tura nújaisha imia niniki yajauch emesmamainiawai.

¹¹ Maa, anearartí. Kaín yajauchin túramia núnis tura ásar jákartatui. Tura Parama áinis kuítian ti wakeruiniak imia níŋki tunaanum tsan̄kamakaru áiniawai. Tura Kurea áinis ashí akupniun nakitin áiniak kajin̄kiartatui.

¹² Átum nuamtak anenaitiai-jisat nájankurmin nu shuar chikichan enentáimtutsuk Yushasha ashamsuk imia níŋki enentáimtumainiawai. Pen̄ké ántar áiniak yumi kíar tee ajasua núnin áiniawai. Tura nase umpuim yútutsuk nan̄kamainiawai. Árak nerektin nantutin nerechua áanin áiniawai. Tuma ásar uwemu pen̄ké jaka áanin áiniawai. ¹³ Entsa nujan̄krak saur̄in ajekeawai. Nu shuarsha núnisar ni natsantr̄in natsamsuk ajekenawai. Tura yaa waakua áanin áiniawai. Tuma ásar nekas kiritniunam tuke men̄kakatin áiniawai.

¹⁴ Ataŋka tiran̄kíyayi Eruk. Ti pen̄ker Yúsnan etserin asa juna tímiayi “Uunt Yus ti untsur̄i ní shuarij̄j̄j̄i winittiwai.

¹⁵ Nuyá ashí shuar túrawarman nekaattawai. Tura ashí yajauch shuarnasha ti tunáa túrawarua nuj̄j̄i tura Yúsan yajauch áujmatsarua núj̄j̄aisha súmam̄tikiawartatui” tímiayi Eruk. ¹⁶ Nu shuarka pen̄kera nuj̄j̄i waratsuk “yajauchiiti” tuiniawai. Aya ni ayashí wakeramunak wakeruiniawai. Nan̄kaamantu enentáimtumainiak chichainiawai. Tura chikich shuaran shiir chicharainiaksha aya nii wakera nuna túrutati tusa pen̄ker chichainiawai.

Yus-shuar enentáimtikratin

¹⁷ Tura atumsha, aneamu yatsurú, ii Uuntri Jesukrístu akatramur̄i yáunchu “aneartarum” tiarmiania nusha enentáimtustarum. ¹⁸ “Amúamu tsawant ishichik ajatesmatai shuar Yúsnan wishikrar nakitrartatui. Tura ni yajauch wakeramur̄iniak umí pujuartatui” tiarmiayi. ¹⁹ Nu yajauch shuar atumín akantamenawai. Ju nun̄kanmayan̄ak páchiniak Yusa Wakan̄in takakainiatsui.

²⁰ Tura átumka, aneamu yatsurú, tuke Yus nekas enentáimtusum kakaram ajastarum. Yusa Wakan̄i kakarmarij̄j̄j̄i ashí Yus seatarum. ²¹ Yus ti anenmakui nii wakera nu wakeruktarum atumsha. Túrarum ni anenmam̄u shiir nekaattarme. Tsawant winiawai, ii Uuntri Jesukrístu in waitnentr̄ama asa tuke shiir Niij̄j̄i pujustinian amastat̄ji. Nu tsawant naká pujutarum.

²² Mai yapaj̄i ajá ainia nu naka enentáimtikratarum. ²³ Chíkich shuarsha jin̄iumiá júsatniua áitkiasrum uwemtikratarum. Tura chikichcha ti yajauch ásarmatai anearum waitnentratarum. Tura ni pushir̄isha ni tunaarij̄j̄j̄i maatra asamtai muíjkiatniuiti.

Yúsan shiir awajeawai

24-25 Yus chikichkiiti. Ti nekaiti. In uwemtikkiartin asa ni kakarmarijiaí yainmakminiaiti tunaanum iniarchatniun. Tuma asa tunaajai máatrachu awajtamas ni ti shíirmariñ eje-tamtatrume. Túrutma ti waramtikramsattarme. Ii Uuntri Jesukrístu túrunamujai Yuska Niñki shiir awajsatniuiiti tura nañkaamantu enentáimtustiniaiti. Yáunchusha, yamaisha, tura tuke ashí akupin atí.

Núketé.

APUKARÍPSIS

Jesukrístu Juánkan paant iniaktusma

Jesukristu paant awajsamu

¹ Jú áarman Jesukrístun Yus ujakmiayi. Wárik túrunatta nuna ni shuarin ujakarat tusa ujakmiayi. Tuma asantai Jesukrístu ni suntarin akupak ashí winia paant awajtursamai. Wisha Juánkaitjai. ² Yus timia nunasha tura Jesukrístu ujakamia nunasha tura wi ísmaj nunasha ti paant aya nekasa nuna tájai. Penké wáitratsjai.

³ Jú papin áujea nu shuarsha tura núnisan juna ántana nusha nekas enentáimtuiniakka shiir ártatui. Ukunam átatna nuna ujaawai tura jeatemayi.

Juan siati péprunam Yus-shuar írunun juna áateawai

⁴ Wi, Juan, Asia nunkanam siati (7) péprunam Yus-shuar írunun ju papin áateajai. Yus anenma asa imiatkinchanum shiir pujustinian yainmakarti. Nu Yus tuke yaunchu pujuyayi. Núnisan yamaisha pujawai. Tura nuke winittiwai. Akupin pujutainium Yusa Wakanj siati naka pujurainia nusha shiir yainmakarti. ⁵ Núnisan Jesukrístu shiir yainmakarti. Nii tana nu imiá nekasaiti. Niisha emka jakamunmaya yamaram iwiaakmajai nantakniuiti. Tura ju nunkanmaya akupniu Uuntrinti. In anenma asa ni numpejai ii tunaarin nijiatramkaitji. ⁶ Túrutma akupin awajtamsaitji. Tura ni Apari Yúsnan pujursarat tusa anaitiamkaitji. Nii ti kakaram asa tuke shiir awajnasti. Núnisan atí.

⁷ Wats, Krístuka yuranmijiai winittiwai. Tura íjiuarmia nusha tura ashí shuarsha nuna wáinkiartatui. Túrawar ashí sapijmiainiak útiartatui. Maa, nekas nunis átatui.

⁸ Krístuka “yámankamtaiknumia amúamunmasha ashí nérenniuitjai, tawai. Wisha A rétranmaya Y rétranam ashí retra áintsaitjai” tawai ti kakaram Uunt Kristu. Tuke yaunchu pujuyayi. Núnisan yamaisha pujawai. Tura nuke ataksha winittiwai.

Kristu ti shiir wincha ajasun Juan wainkiamiania nu

⁹ Wi Juan atumjai métek waitia asan atumí yachintjai. Núnisan nayaimpiniam, Yus akupeana nui, métek jeattaji. Tura katsuntrar nákastinian Jesukrístu máí métek súramji. Yus-Chichamnasha tura Jesukrístu timiancha étsereakun nayaantsa ajapén atentramunam Pátmus nunkanam sepunam apujsamua núnisan pujumjai. ¹⁰ Tumai tumin tsawantai Yusa Wakanj pujurtakui winia úkuruinj kakantar

untsumman antukmajai. Kachu umpúamua núnis ti kakarmauyayi.

¹¹ Tura turutmiai “Wiitjai. Yámankamtaiknumiá amúamunam ashí nérenniuitjai. Wisha A rétranmaya Y rétranam ashí re-tra áintsaitjai, tímiai. Tuma asamtai wáinmena ju, papinium áaram Asia nunkanam siati péprunam Yus-shuar írunna nuí akuptukarta. Ju peprunam akupkarta: Ipisiusha, Ismir-nasha, Pírkamusha, Tiatirasha, Sártissha, Píratírpiasha, tura Rautiséasha.” Tu turutmiai.

¹² Túrutkui yaki túruta tusan apajasan íikman siati shirikip ikiutain kurijjai najanamun wainkiamjai. ¹³ Tura nuí ajapén Aents Ajasua núninan wajan wáinkiamjai. Tura pushirísha naweá timiai nuntuaru entsaruyi. Emenmamkesha kúrinia netsepnum emenmamaui. ¹⁴ Tura ni muuke intiashísha murikiu uré nijiamua núnisan tura micha núnisan ti puju chíarauyi. Tura ni jiiisha jiya núniskeyi. ¹⁵ Ni nawesha ti wincha asa jiru yankutaku jiamua áinis néwar ajarmiayi. Ni chichamesha ti kakaram asa uunt entsa téter ajá áintsauyi. ¹⁶ Ni untsuuriní siati yaan takakuyi. Tura ni weneniasha puniá áinis tsakatskat mai ere awajsamu jínimiai. Ni yapisha etsa ti etsantuk íischamnia núnisauyi.

¹⁷ Nuna wáinkian jaka áintsanak naween iniaarmajai. Túrasha ni untsuurí uwejen awaantrus turutmiai, “Ashamkaip. Wiitjai. Yámankamtaiknumiá amúamunmasha tuke pujuwitjai, timiai. ¹⁸ Wikia tuke iwiaakuitjai. Jakamiajai tura nantakin jákashtinian tuke iwiaaku pujajai. Jákatniuncha tura jaka pujuinia nuna yawirin takakkun nérenniuitjai, timiai. ¹⁹ Tuma asamtai wáinkiamna jusha, yamá wáinmena nusha, tura ukunam átatna nusha aartá, timiai. ²⁰ Wáinmena nu júnisaiti. Siati shirikip-ikiutai kúrik wainkiam nu, siati péprunam Yus-shuar írunun nakumeawai. Tura winia untsuuruiní siati yaa wainkiam nu, siati péprunmaya Yus-shuaran wáinniun nakumenawai, turutmiai.

2

Ipisiunam chícham áatramu

¹ Nuyá turutmiai ‘Ipisiunmaya Yus-shuaran wáinin ju áatratá: Siati yaan untsuurnum takakna nu tura núnisan siati shirikip-ikiutai kúrinman ajapén atenta wekáa nu, tawai: ² “Ashí ame túram nuna nékajai. Ti kakaram takaakum katsunteamuncha nékajai. Yajauch shuar nawamtsuk awe-maitrume. Shuar “Yus akatramuitjai” ántar tuinia nu nekaa-marme. Wáitrinia nusha nékaitme. ³ Ti wáitiatmek katsuntram yawetsuk Winia ti takartusuitme. ⁴ Túrin áminiñ juna títiatjame. Yus aneakum yámankamtaik ti penker wekainiuyam

núnisam túratsme. ⁵ Tuma asam ikiuknium nu enentáimpram yaunchu túriniuyam núnismek ataksha túrata. Túrachakminkia ame shiripkirmin wari jurustatjame. ⁶ Tura ju pénker túriniaitme. Nikiurás shuar nakitniuitrume. Nu shuar “ayash wakeramu páchitsuk túramniaiti” tuiniakui Wisha núnisnak nakitiajai. ⁷ Kuíshtinia nu shuar Yusa Wakanj ashí Yus-shuaran timian antukti: Nupetmakunka tuke iwiaaku pujutai numi nerēn yúatniun tsan̄katkattajai. Nu numi Yus pujana nuj wajaawai.” Tu áartá’ turutmiai.

Ismirnanam chícham áatramu

⁸ Nuyá turutmiai ‘Ismirnanmaya Yus-shuaran wáinin ju áatratá: Yámankamtaiknumiá amúamunam tuke pujuwa nu tura núnisan̄ jaka nantakmia nu, tawai: ⁹ “Ashí ame túram nuna nékajai. Ti wáitiam nunasha tura kuítrinchaitmena nunasha nékajai. Antsu Yusañkia ti kuítrinniiuitme. Tura shuar uunt iwianch Satanása shuari áiniayat “Israer-shuaraitjai” tuíniak yajauch áujmatramena nuna nékajai. ¹⁰ Ti wáitsattamna nu ashamkaip. Íwianch ashí nekapramsataj tusa atumiñian sepunam en̄keattawai. Nuj tias tsawant wáitsattarme. Jáakmesha tuke Yus shiir enentáimtusakminkia tawaspan nakurin susatniua nútiksanak nekas iwiaakman tuke shiir pujustinian amastatjai. ¹¹ Kuíshtinia nu shuar Yusa Wakanj ashí Yus-shuaran timian antukti: Nupetmakuka jimiará jákatniuka waitsashtatui.” Tu aartá’ turutmiai.

Pírkamunam chícham áatramu

¹² Nuyá turutmiai ‘Pírkamunmaya Yus-shuaran wáinin ju áatratá: Puniá áinis tsakatskat mai ere awajsamun takakna nu, tawai: ¹³ “Ashí ame túram nuna nékajai. Uunt iwianch Satanás akupea nuj pujayatmek tuke shiir enentáimturmena nuna nékajai. Winia shiir umirtínian Ántipasan máawarmataisha Winia enentáimtursatin ishichkisha iniaitiuschamame. Nusha íwianch pujutainium pujakrumin túrunamai. ¹⁴ Túrin áminin̄ juna títiatjame. Atumiñia shuar yaunchu Yúsna etserin Param yajauch jintíamun tuke emetainiawai. Niisha Israer-shuaran tunáa awajsat tusa kapitían Parakan unuiniarmiayi. Nuyá Parak Yus-sutai namanken maar yúatniun Israer-shuaran jintintiamiayi. Núnisan̄ ti tsanirmatniun jintintiamiayi. ¹⁵ Atumiñia shuarsha Nikiurás jintíamuncha, Wi nakitaj nuna, iniaisatniun nakitiainiawai. ¹⁶ Wats, enentáimpram iniaisata. Túrachakminkia Wi wari winin winia wenuruiya puniá jiinia nujai máaniaktajai. ¹⁷ Kuíshtinia nu shuar Yusa Wakanj ashí Yus-shuaran timian antukti: Nupetmakunka maná yurumkan uukma nuna ayurattajai. Nuyá kaya pújun susattajai. Nu kayanam yamaram naari aarma átatui.

Nunasha chíkich shuarka penké nékatsain aya achía nuke nekaattawai.” Tu aartá’ turutmiai.

Tiatiranam chícham áatramu

¹⁸ Nuyá turutmiai “Tiatiranmaya Yus-shuaran wáinin ju áatratá: Yusa Uchirí jii jiiyai métek keena nu tura núnisan nawe jiru yanikutaku jiamua núnis néwar ajawa nu, tawai: ¹⁹ “Ashí ame túram nuna nékajai. Yus shiir enentáimtakum aneam nuna nékajai. Tura katsuntram péñker takaamna nuna nékajai. Yáunchujai nankaamas péñker túrame yamaikia. ²⁰ Túrin áminin juna títiatjame. Nu nuwá Jesapír awematsme. “Yúsnan unuiniajai” tinia Wíi shuaran ti anankenawai. Tura ti tsanir-matniuncha tura ántar-yus-sutai namanken maar yúatniun jintintiainiawai. ²¹ Niisha ni tunaarín enentáimiar iniaisat tusan nákasuitjai. Tura nakitiawai. ²² Wátsek, sunkurmatkiakan peaknum áepsattajai. Tura chíkichcha níjjiai tsanirma ainia nunasha níjjiai métek ti wáitkiastatjai. Ni tunaarín enentáimiar iniaisacharmatainkia túrattajai. ²³ Ni uchiríncha mantúattajai. Nujai ashí Yus-shuar Wi nekas shuara enentáin nékaitjia nuna nekaawartatui. Atumniasa chikichik chikichik takas-majai métek akiktatjarme. ²⁴ Tura chíkich shuar Tiatiran-mayatiram, nú chicham enentáimtuscharmena nu, “nekas iwianchnia uuukma” tútaiya nu nékachu asakrumin atakka túratniun patatkashtatjarme. ²⁵ Tura Wi jeatsain takakrum nu emetatarum. ²⁶ Nupetmakunka Wi wakeraj nunak tuke initsuk túrana nuna untsurí nunkanam akupkatniun tsanatkattajai. ²⁷ Winia Apar tsankatrukmiá núnisnak akupkatniun tsanatkattajai. Tura nuwe najanamu jirujai awati ijiakratniua áinis ti kakarmajai akupkattawai. ²⁸ Yáñkuam káshik jiinia nuna susattajai. ²⁹ Kuíshtinia nu shuar Yusa Wakaní ashí Yus-shuaran timian antukti.” Tu aartá’ turutmiai.

3

Sártisnum chícham áatramu

¹ Nuyá turutmiai “Sártisnumia Yus-shuaran wáinin ju áatratá: Siati Yusa Wakanín takakna nu tura núnisan siati yaan takakna nu, tawai: “Ashí ame túram nuna nékajai. Iwiaakua áintsan wekayatmek Wíjjaiinkia jákaitme. ² Shintiarta. Kajinia nu umpuím ekeemakta. Kame Yusjai ísam péñker túrichuitme. ³ Yus-Chicham ti shiir enentáijjai emka antukmam nu ataksha enentáimpram emetata. Tura tunaarumsha enentáimpram iniaisata. Tura iniaiyachkumninkia kasa núnisnak nékatsmin jeartiatjame. ⁴ Tura Sártisnum shuar ishichik pushirí wapik máacharu pujuiniawai. Nusha ti péñker áiniak pushí pújun entsarar Wijjai wekasartatui. ⁵ Nupetmakuka pushí pújun

entsartatui. Tura iwiaaku átinia nu papiniumiá ni naari áarman japirashtajai. Antsu winia Apar tura ashí nayaimpinmaya suntar íimmianum shiir áujmattsattajai. ⁶ Kuíshtinia nu shuar Yusa Wakani ashí Yus-shuaran timian antukti.” Tu aartá,” turutmiai.

Piratírpianam chícham áatramu

⁷ Nuyá turutmiai ‘Piratírpianmaya Yus-shuaran wáinin ju áatratá: Ti shiir túrin tuke nekasán tana nu, uunt akupin Tawitia yawiri takaku asa uraimtai chíkich penké epenchamniaiti. Tura epenmiatai chíkich penké uraichminiaiti. Juna tawai: ⁸ “Ashí ame túram nuna nékajai. Kakarmachuitiatmek winia chichamur shiir enentáimtakum Winia initieschaitme. Tuma asakmin wáitin uratjiame. Nuna chíkich penké epenchamniaiti. ⁹ Wátsek. Shuar wáitruiniak “Israer-shuaraitjai” tuíniayat uunt iwianch Satanás-shuar áiniawai. Nu shuáran, nekas ámin aneajna nuna nekaawarat tusan amíini tikishmatkiarartatjai. ¹⁰ Katsuntrata tímiaj nu, shiir umírka asakmin Wisha ti wáitsatin ashí nunkanam átatna nuyá uwemtikrattajme. Nu wáitsatniujai ashí nunkanmaya shuar nekapnasartatui. ¹¹ Wárik winittiajai. Takakmena nu emetata. Akinkiatniuitmena nuna chíkich shuar atantramkiarain. ¹² Nupetmakunka winia Yusru jee tankirin awajsattajai. Tura nuyá penké júnkichartatui. Tura níin winia Yusru náarin áatrattajai. Tura winia Yusru pépruri náarincha áatrattajai. Nu pépruka nayaimpinmaya yamaram Jerusarénga Yúsnumia tára núiti. Núnisan winia yamaram náarun níin áatrattajai. ¹³ Kuíshtinia nu shuar Yusa Wakani ashí Yus-shuaran timian antukti.” Tu aartá,” turutmiai.

Rautiséanam chícham áatramu

¹⁴ Nuyá turutmiai ‘Rautiséanmaya Yus-shuaran wáinin ju áatratá: Wáitrutsuk nekasa nunak tiniua nu tura núnisan ashí Yus najanamun Úntriya nu, tawai: ¹⁵ “Ashí ame túram nuna nékajai. Tura míchaash míchachuitme. Núnisan tsuërsha tsuérchaitme. Míchaitkiumsha tura tsuéraitkiumsha maak. ¹⁶ Kame míchachu tsuërcha antsu aya tsuétsetak asakmin imiutkattajme. ¹⁷ Iis, “Kuítrinniuitjai, ti irumpraitjai, warinkisha atsumatsjai” tame. Túrasha ashí yajauch, wáitnenmai, kuítrincha, kusuru, tura misú iyajme. ¹⁸ Tuma asam Winí ti shiir kuri sumakam nekas kuítrintin ajasta. Turam puju pushí Winí sumakam misú ajasma shiir entsarta. Pénker ímprataj tusam jínium enketai enkeeta. ¹⁹ Aneajna nuna chichareajai. Nu asamtai kakaram ajasam tunaarum enentáimpram iniaisata. ²⁰ Enentáimprata. Shuar wáitiniam wajas untsumna áintsanak Wi ámin untsúajme. Winia antur-tukam ame enentáimin awaintiakminkia Wi wáintiuattajme.

Tura wayan ámiijai yurumáttajai. Tura amesha Wijiai yurumáttame. ²¹ Nupetmakuka akupin pujutainium Wijiai pujustatui. Wisha núnisnak nupetmaku asan winia Aparjai akupin pujutainium pujusuitjai. ²² Kuíshtinia nu shuar Yusa Wakaní ashí Yus-shuaran timian antukti.” Tu áartá,” turutmiai.

4

Nayaimpiniam Yúsán shiir awajenawai

¹ Nu nankaasmatai nayaimpiniam waiti uranniun wainkiamjai. Tura nuyá kakaram untsumman antukmajai. Nuik kachujai métek kakaram chichartukma nu turutmiai “Juí yaki wakatá. Ukunam átatna nuna iniaktustatjame” turutmiai.

² Nu chichamaik Yusa Wakaní akantukmiai. Túrutamtai nayaimpiniam akupin pujutainium pujaan wainkiamjai.

³ Niisha jaspi kayasha tura kurnarínia kayasha nujai métek ti wínchauyi. Akupin pujutain tuntiak téntakuyi. Nusha ismirarta kayajai métekeyi. ⁴ Chíkich paintikuatru (24) akupin pujutain nu pujutain téntakarun wainkiamjai. Tura paintikuatru uunt púju entsarainian tura kurin etsenkrakainian, nuí pujuinian wainkiamjai. ⁵ Akuptainiumia peemsha ipiamtasha untsummasha jíiniarmai. Tura nu pujutainium naka siati shirikip kearmai. Nusha siati Yusa Wakanínti. ⁶ Núnisan nu pujutainium naka nayaantsa áanin ti saar amai.

Nu pujutainium wakenmaanisha niisháa tanqu kuaru téntakar ármiai. Ukurínisha tura eemsha jii irunmiai. ⁷ Emka tanqu úunt yawaa áanniuyi. Chíkichka turu uchichia áanniuyi. Tura chikichcha shuara yapia áanniuyi. Tura chíkichka churuwia nanamua áanniuyi. ⁸ Nusha sais nanamtin ármiai. Tura jiisha ti irunainiak ashí wainmarmai. Káshisha tsawaisha tuke iniaitsuk juna tiniu armai:

“Ti nekas péñkeraiti Uunt Yus. Ashí nankaamas kakarmaiti. Tuke yaunchu pujuyayi. Núnisan yamaisha pujawai. Tura ataksha juke winittiwai” tiniu armai.

⁹ Tura uunt pujutainium pujana nu tuke iwiaaku pujú asamtai nu tanku ti shiir awajsar yúminkiak pujuriarmai. ¹⁰ Túruiniakui paintikuatru uunt tuke iwiaaku pujun tikishmatainiak ni etsenkrutairin naka áepuiniak tuiniawai:

¹¹ “Úuntá, ii Yúsrinme. Tuke shiir awajmainme. Ashí nankaa-mas kakarmaitme. Amek ashí írunna nu najanaitme. Tura aya wakerakum najanamame. Ame wakerakmin irunainiawai” tuiniawai.

5

Murikkia papin urakminiaiti

¹ Nuyá akupin pujutainium pujuya nuna untsuurín papí penuarma áanniun wainkiamjai. Nu papisha initiaanísha tura pátatkesha áarmauyi. Tura urakchamnia atí tusa siati anujtukmajai kaki peekmauyi. ² Tura nayaimpinmaya suntar ti kakarma nu, ti kakantar inintran wainkiamjai. Niisha tímiai “¿Ya akupniuk ju papin kaki anujkamun jaak urakminiait?” ³ Tura nayaimpinmayasha nunkanmayasha tura jakamunmayasha chikichkisha nu papin urakmin atsumiayi. Áujtsuk ístinniasha tujinkiarmai. Tímianu akupin atsumai. ⁴ Nu papin uraktincha tura áujsatniusha, kame ístincha atsakuí ti útmiakai. ⁵ Nuyá chikichik uunt turutmiai “Ti útíp. Israer-shuarnumiá Úunt-yawa, Jutá weeá awai. Niisha uunt akupin Tawit weeaiti. Nupetmaku asa nu papí siati anujtukman jaak urakminiaiti.”

⁶ Nuyá uunt pujutaiya nui tura kuaru tan̄kunam ajapén tura úuntnum ajapén Murik wajan wainkiamjai. Maamua áintsan̄ketiat iwiaakuyi. Kachurísha siátiyi. Ni jiīsha siátiyi. Nusha Yusa Wakan̄i siati ashí nunkanam akupramua nuuyi. ⁷ Nu Murik we nekas uunt Akupniun untsuurínian nu papin achikmiayi. ⁸ Tura papin achikmatai kuaru tan̄kusha tura paintikuatru uunt arma nusha Murikiun tikishmatrarmiayi. Ashí uunt arpa tuntuítaiin takaku armai. Tura ashí kun̄kuin en̄ketain kuri najanamun takaku armai. Nu kun̄kuin Yusshuar áujsamuiti. ⁹ Ju yamaram kantancha kantampriarmai:

“Amek imiá nan̄kaamas akupniuitme. Amek papí achikiam anujtukmarí jaakminiaitme. Yus-sutai naman̄kea áinis mantamna asam túramniaitme. Ashí nunkanmaya shuarnumiasha Yusna árat tusam ame numpem̄jai in sumakmiame.

¹⁰ Turam akupin awajkartusuitme tura núnisan̄ ii Yúsrīniun pujurin awajkartusuitme. Tuma asakmin akupin ajasar ju nunkanam akupkattaji.” Tu kantamainiawai.

¹¹ Tura untsurí nayaimpinmaya suntar uunt pujutaincha tan̄kuncha tura úuntnasha en̄kekawarun wainkiamjai. Nusha nekapmarchamnia ti untsurí armia nu ¹² kakantar tiarmai:

“Murik mantamnamia nu akupin ajas ashí kakarmancha, kuítniasha, nekaatniuncha Nīnki achikminiaiti. Tura nupetmaku asamtai yuminsar Nin ti shiir awajsatin áiniawai.” Tu tiarmai.

¹³ Núnisan̄ ashí Yus najanamu, nayaimpiniam írunna nusha, nunkanam írunna nusha, nunká init írunna nusha, nayaantsanam írunna nusha, tuínian antukmajai:

“Muriksha tura akuptainium pujana nusha ti shiir tura ti kakaram ásar tuke iniaitsuk shiir awajnasarti.” Tu tuiniawai.

¹⁴ Tura kuatru taṅkusha “Tuke núnisaṅ atí” tiarmai. Tura paintikuatru uuntka nekas tuke iwiaaku pujá nuna tikish-matar shiir awajсарmai.

6

Murikkia siati anujtukman jaakmai

¹ Wi iyakui Murikkia chikichík anujtukman jaakmai. Túramtai chikichík taṅku ipiamtajai métek kakantar untsumun antukmajai. “Winim iitiá” turutmiai. ² Túrutkui kaway pújun wainkiamjai. Nuí ekeemia nu tishimkiun takakuyi. Akuptai tawaspasha susamuyi. Tura tuke nupetmaktinian jíinkimiai.

³ Nuyá Murik anujtukma jímiaran jáakmatai taṅku jímiara nu “Winim iitiá” turutmiai. ⁴ Túrutkui chíkich kawai kapaakun wainkiamjai. Nuí ekeemia nuna puniá úuntan susamuyi. Nusha shiir pujuscharat tusa ashí jú nuṅkanmaya shuaran máanaimitikiatniun akupkamuyi.

⁵ Nuyá Murik anujtukma menaintiun jáakmatai taṅku menaintiua nu “Winim iitiá” turutmiai. Túrutkui kaway mukusan wainkiamjai. Nuí ekeemia nusha kijin nekap-matain takakuyi. ⁶ Tura kuatru taṅku ajapénia chichaamun antukmajai. “Tsawant takamtsuk takaakmesha apatkuka penké ishichik sumakmin átatme. Tura núnisaṅ machasha nijiamchisha amuukacharat tusam péṅker wáinkia.” Tu timiai.

⁷ Nuyá Murik anujtukma kuátrun jáakmatai taṅku kuatrua nu “Winim iitiá” turutmiai. ⁸ Túrutkui kaway yaṅkun wainkiamjai. Nuí ekeemia nusha Jákatín náartiniuyi. Tura nuna úkurin Jatai nemarak winimiai. Nusha ashí nuṅkanmaya shuar kuatru akankamunmaya chikichkin máatniun akup-karmaui. Nusha mesetjaisha tsukajaisha suṅkurjaisha tura yajasmajai máawarmai.

⁹ Nuyá Murik anujtukma sénkun jáakmatai Yus-sutai kunkuin ekemtai wakenmaani íismajai. Túran Yus-Chichaman etserainiakui máawarma wakanin wainkiamjai.

¹⁰ Nusha kakantar untsumainiak tiarmai “Uuntá, ti penker asam támena nu umíatsmek. ¿Urutiak nuṅká pujuinia nú shuar ii mantamnamunam yapajmiátruktam?” tiarmai.

¹¹ Tuíniakui pushí pújun susar tiarmai “Chikichcha Krístunun etserainiakui mantamnatin áiniawai. Nu náakrum ishichik ayampratarum” tiarmai.

¹² Nuyásha Murik anujtukma sáisan jáakmatai ti úurun wainkiamjai. Tsawai-nantusha itiurchat ajasua áintsan

mukusa ajasmai. Kashí-nantusha numpá áintsan ajasmai. ¹³Tura yaasha wampú nere nase umpuim ti majūwa áintsan kákekarmai. ¹⁴Nayaimpisha papí penuara júamua áintsan menkakamai. Tura naintcha yajá apujnasarmai. Tura nun̄kasha nayaantsanam ajapén atentrainia nusha yajá apujnasarmai. ¹⁵Tura jú nun̄kanam akupin ainia nusha náinnium wear kayá wáanam uumkarmai. Nijjiaisha ashí shuar, uuntcha, kuítriniusha, suntara kapitíántrisha, ashí kakaram ainia nusha, tura takarniusha an̄kant ainia nujai náinnium wearmai. ¹⁶⁻¹⁷Túrawar náinniasha kayancha tiarmai “Asutniátin tsawant jeayi. ¿Yaki aun katsuntrat? Nu asamtai saanakim in yutukratata. Túrarum Murik ti asutiámataj nuyásha tura akupin pujana nuyásha uukratkatá” tiarmai.

7

Israer-shuarnumiā anujturma armia nu

¹ Nu nan̄kaamasmatai kuaru nayaimpinmaya suntar, nunkaa kuaru yantamén wajan wainkiamjai. Nusha kuaru nase kukarsha, nayaantsanmasha tura kampunniunmasha nasenkacharat tusar wajatiarmai. ²Kame kukarsha tura nayaantsanmasha yajauch awajsatniun akupkamu armai. Tura chíkich suntarnasha nantu tátainmaaniā winian wainkiamjai. Tuke iwiaaku Yusa anujtutairin takakauyi. Nusha kuaru suntaran kakantar untsuak tímiai, ³“Íi Yusri takarin ainia nu nijjainium áarar anujtatsriniñ kukarsha, nayaantsasha, tura kampunniusha nasejai yajauch awaj-sairap” timiai.

⁴Tura tímiajni untsurí aara anujtukman antukmajai. Ashí Israer-shuar tuse (12) shuar weeá ainia nuyá chikichik sian̄tu kuarenta kuaru mir (144.000) armai. ⁵Jutá weeanmaya tuse mir (12.000) anujtukma armai. Rupin̄ weeanmayasha tuse mir anujtukma armai. Kat weeanmayasha tuse mir anujtukma armai. ⁶Aser weeanmayasha tuse mir anujtukma armai. Niptarí weeanmayasha tuse mir anujtukma armai. Manasés weeanmayasha tuse mir anujtukma armai. ⁷Semeun̄ weeanmayasha tuse mir anujtukma armai. Riwi weeanmayasha tuse mir anujtukma armai. Ísakar weeanmayasha tuse mir anujtukma armai. ⁸Sapurún̄ weeanmayasha tuse mir anujtukma armai. Jusé weeanmayasha tuse mir anujtukma armai. Pinjamín̄ weeanmayasha tuse mir anujtukma armai.

Ti untsurí shuar pújun entsararu

⁹Nuyá ti untsurí shuaran wainkiamjai. Ashí nun̄kanmaya nusháa shuaraim iruntrarū ásar nekapmarchamnia armai. Tura nusha uunt akupin pujataniun tura Murikniun naka

wajaarmai. Tintiuki nukea áaniun takaku armai. Tura ashí pújun entsaru armai. ¹⁰ Ashí kakantar untsumainiak tiarmai: “Íi Yusrî uunt akupin pujutainium eketna au tura Muriksha imia Nîŋki Uwemtikin áiniawai” tiarmai.

¹¹ Tura nayaimpinmaya suntarsha uunt akupin pujutaincha, kuatru tan̄kuncha, tura úuntnasha téntatkar armia nu pini-akum nun̄ká tepersar Yúsan shiir awajsar ¹² tiarmai

“Nekasaiti. Tuke iniaitsuk ii Yusrî ti shiir awajsatniuiti. Nîŋki ti neka, ti kakaram, ti akupin, tura ti pen̄ker asamtai tuke yumînsatniuiti. Núnisan̄ atí.”

¹³ Nuyá chikichik uunt inintsamai “Pújun entsaru ainia jusha ¿ya ainia tura tuyá ainia?”

¹⁴ Túrutkui “Uuntá, amek nékame” tímiajai.

Tutai nii túrutmiai “Ju shuar ti waitsaru áiniawai. Túrawar Murikiu numpéjajî ni pushirî nijiamawar puju awajsaru áiniawai. ¹⁵ Nuna túrawaru ásar yamaikia Yusaj naka pujusar tsawajsha káshisha Yúsnan ni Jēen takainiawai. Tura akupin pujutainium eketna au tuke wainkiartatui. ¹⁶ Yamaikia tsukajajîsha kitiakjajîsha wáitsachartatui. Tura etsasha sukuiniak yajauch awajsachartatui. ¹⁷ Murik, akupin pujutainium naka wajana au, ni murikrîŋ wáiniuk áyureak ti pen̄ker púkuni entsa waana nuŷ apujsartatui. Tura Yus ni neajkincha ukuŷtiurartatui.” Tu túrutmiai.

8

Anujtukma siatia nu jaakma tura kun̄kuin ekeemataijjajî túrunamu

¹ Nuyá Murik anujtukma siatin jaakmatai nayaimpiniam chikichik ura jeastatuk ajapén mitia ajasmai. ² Nuyá siati suntar Yusaj naka wajainia nuna wainkiamjai. Nusha siati kachun susamu armai. ³ Nuyá chíkich suntar kun̄kuin en̄ketain kurijjajî najanamun itiamai. Tura Yus-sútainium ayamas wajasmatai núkap kun̄kuin sunasmai. Nu kun̄kuin ashí Yus-shuar áujsamujajî métek kun̄kuin ekeematainium ekeemaktiniuyi. Nu ekeematai kurijjajî najanamuyi tura uunt akupin pujutainium naka pujumai. ⁴ Tura suntar ekeemakmatai kun̄kuinia mukuintiurî Yus-shuar áujsamujajî métek Yúsan amainkiamai. ⁵ Nuyá nu kun̄kuin en̄ketain suntar achik ekeematainmaya ji kapaan káirîŋ áimiak ju nun̄kanam ukaamai. Túramtai ipiamtasha untsummasha, peemsha, tura uŷsha armai.

Kachu umpuarma

⁶ Nuyá siati suntar kachun takakainia nu umpuartaí tusar iwiarnararmai.

⁷ Emka suntar kachun umpuarmatai micha kákekamai. Nunasha ji numpajai pachimpramuncha nunkanam ajapawarmai. Túmakui menaintiu nakakma jeeán numincha tura ashí írunna nui ekeemakmai. Tura ashí nunkanam chírichrin takamtsuk ekeemakmai.

⁸ Nuyá suntar jímiaara nu kachun umpuarmatai uunt naintia áanin kean nayaantsanam ajunmai. Túramtai menaintiu nakakma jeeá nayaants numpa ajasmai. ⁹ Núnisan menaint jeeá nayaantsanam matsatainia jákarmai. Tura menaint jeeá uunt kanua nu emesnararmai.

¹⁰ Nuyá suntar menaintiua nu kachun umpuarmatai ti uunt yaa nayaimpinmaya kapaa kákekamai. Tura entsasha tura púkununmasha menaint nakakam jeeánum kákekamai. ¹¹ Nu yaasha Yapá-numi náartiniuyi. Tura menaintiu nakakam jeeá entsa yapá ajasarmai. Túrunamtai ti untsurí shuar nu entsa yapá ajasmájai jákarmai.

¹² Nuyá suntar kuatrua nu kachun umpuarmatai menaintiu nakakam jeeá tsawai-nantusha kashí-nantusha tura yaasha emesnarar ajapén tee ajasarmai. Túrunawar tsawaiisha káshisha menaintiu nakakam jeeánum tsáapnircharmai.

¹³ Nuyá chíkich suntar nayaimpiniam nanamun wainkiamjai. Nusha kakantar untsumuk timiai “Maa, chíkich menaintiu suntar umpuiniakui nunkanam pujuinia nu ti wáitsartatui.” Tu timiai.

9

¹ Nuyá suntar senkua nu, kachun umpuarmatai yaan nayaimpinmaya nunká kákeran wainkiamjai. Tura nu yaan tunáa shuar jákaru matsamtai yawirín susamuyi. ² Tura uraimtai nu nánkatkachu wáanmaya ti mukuint jínmiat uunt jiniumia áintsan. Tura etsancha tee awajsamai, yuranmincha tee awajsamai. ³ Nuyá nu mukuintiunmaya manchi jíntrar nunká ti yujaarmai. Tura ju nunkanmaya titinkia áinis najamin ajastinian susamu armai. ⁴ Chírichrincha ashí arakmancha ashí numincha yajauch awajsatin suritki-amuyi. Antsu áyatik shuar nijiaínium Yusa naari áarar anujtukchamunak yajauch awajsatin armai. ⁵ Túrusha ajaktsuk senku (5) nántutin wáitkiastin susamu armai. Kame titin, shuaran ijiú, najaweá núnis najaweatin susamu armai. ⁶ Nui shuar wari jakataj tuíniayatan jákachartatui. Ti wakeruiniayatan jákatniun tujinkiartatui.

⁷ Manchisha ísam mesetnum weena nu kawaiya áinis armai. Kurí tawaspa áinis etsenkraku armai. Yapísha shuarna áinis armai. ⁸ Intiashísha nuwánua núnis armai. Najsha úunt yawá naiya núnis armai. ⁹ Netsepén namaka saepea áinis jiru péeram armai. Tura nanamenaksha kaway karu japiiniak

mesetnum tsékeena núⁿisan téter ajarmai. ¹⁰ Ujukés^ha titín^ki ujuké^a áinis asa jan^ki ajakin armai. Nujai^j tuke sen^ku nantu yujarsar shuaran íjiuar wáitkiastin armai. ¹¹ Ni uuntrisha náⁿkatkachu wá^a uraimia nuyáiti. Nusha Israer-chichamjai Apatúnⁿ tutainti. Tura Kriaku-chichamjain^kia Apuriúnⁿ tutainti. Nuka Yajauch Awajkartin tawai.

¹² Jujai^j emka wáitsatin nan^kaamasai. Tú^rrasha tuke jí^miar taasai.

¹³ Nuyá^a suntar saisa nu kachun umpuarmatai chichaman antukmajai. Yusai^j naka kun^kuin ekeemaka Yus-sutai kurimp^ramu amai. Tura ni kuaru yantame^m kachu jín^miai. Tura nuyá^a chichaak ¹⁴ suntar kachu takakun saisa nuna timiai “Kuaru suntar Eupratis kanusá^a pujuinia nu atiram akupkarta.” ¹⁵ Tú^rramtai nu kuaru suntar wear menaintiu nakakam untsurí^j shuaran maatai tusar weriarmiayi. Kame nuna tú^rawarat tusar ikiusma armai. Tura nu uwitin, nu nantutin, nu tsawantin, tura nu ú^ratin atí^atin ikiusma armai. ¹⁶ Tura suntarnasha kawainium eketainian wainkiamjai. Tura timiá^a untsurí^j nekapmarchamnia asamtai aya nú^mirurínⁿ antukmajai. Nusha jimiará^a sian^tu miyúnⁿ (200.000.000) armai.

¹⁷ Tura í^miamunam suntarnasha kawaincha júnⁿisan wainkiamjai: Eketainiaka netsepnum jirun entsaru armai. Nusha kapaá^ku win^kia tura yan^kú^a armai. Tura kawaisha ú^uunt yawá^a muuke^m áinⁿi armai. Tura ni weneyá^asha jisha, mukuintiusha, asuprisha ti tsuer^r keá^a nu jíⁿiarmai. ¹⁸ Nu menaintiu ti yajauch wáitsamujai^j menaintiu nakakam shuar untsurí^j já^karmai. Jijiaisha, mukuintiujaisha, asuprijaisha já^karmai. ¹⁹ Nujai^j nu kaway ni wenejai^j shuá^ran wáitkiasarmai. Tura ni ujuké^m napí^a mú^uukeya áinⁿi á^rmai. Nú^jjaisha shuaran wáitkiasarmai.

²⁰ Tura nujai^jsha já^kacharmia núⁿ shuar tuke tuná^a tú^ratniun iniaisacharmai. Tura yajauch wakanniasha tura áⁿtar-yusnasha tikishmatratniun iniaisacharmai. Nu áⁿtar-yus kurijaisha, kuítjaisha, jiru yan^kutakujaisha, kayajaisha, numijaisha najanamu á^sar wainmaktinniasha, antuktinniasha, tura wekasatniuncha tujintiainiawai. ²¹ Núⁿisan man^kartuatniuncha, wawekratatniuncha, tsanirmatniuncha, tura kasamkatniuncha iniaisacharmai.

10

Papichin suntar takusmia nu

¹ Nuyá^a chí^kich kakaram suntar nayaimpinmaya tá^aarun wainkiamjai. Nusha yuran^kim amú^amu tura mú^uuknum tuntí^ak téⁿtakmauyi. Yapí^asha etsajai^j mé^tek win^hchauyi. Tura kujapés^ha ji keá^a áⁿintsan^keyi. ² Nusha

papin urak takakauyi. Tura imiá uunt asamtai ni nawé untsuurnumaní nayaantsanam tura menaarini kukar tarimias wajasmai. ³ Tura úunt yawá kakar shiniak chicháa áinis ti kakaram untsumkamai. Nujai siati (7) ipiamtasha chichasarmai. ⁴ Nii chichasarmatai ni chichamen áartiniujai tura nayaimpinmayá chichartak “Áaráip, túrutmiai. Juka nekanashti” túrutmiai.

⁵ Tura nuyá, suntar nayaantsanmasha tura kukarsha tarimias wajama nu ni uweje untsuurin nayaimpinmaani takuimiai. ⁶⁻⁷ Tura timiai “Penké ishichik ajasai. Suntar siatia nu umpúakuinkia Yus ashí yaunchu enentáimpramia nu uminkiatstawai. Emka ujatsuk ukunam ni shuarin Yúsnan etserniua nuna ujakmiayi.” Tu timiai. Nuyá chichaak:

“Yus tuke iwiaaku pujawai. Tura imiá kakaram asa nayaimpincha, nunkancha, nayaantsancha, tura ashí nui írunna nunasha najanaiti” timiai.

⁸ Nayaimpinmayá “áaráip” túrutmia nu ataksha chichartak turutmiai “Suntar nayaantsanam tura kukar tarimias wajana nu weritiá. Turam ni untsuurini papin urak takakna nu achiktá” turutmiai. ⁹ Nuyá túrutkui werin papichin seamjai.

Tura surak turutmiai “Papái. Yuátá. Tura yúamka ti yumin átatui. Tura antsu wakeminkia yapamprattame” túrutmiai. ¹⁰ Nuyá papichin suntarnumia jukin yuamjai. Tura nii turutmia núnisan wenuruinkia ti yumin nekapramjai. Tura antsu yuan wakeruinkia yapampramjai.

¹¹ Tura nuyá turutiarmai “Waketkim ataksha ashí nunkanmayá shuaran tura ni kapitiántríncha Yus tana nu ujakartiniaitme.” Tu túrutmiai.

11

Jimiará shuar Yusaiya akupkamu

¹ Nuyá karisun nekapmatia áaniun surus turutiarmai “Weme Yusa Uunt Jee nekapmartá. Túram naman-maa-Yus-sutaisha nekapmartá. Tura nui Yúsán shiir awajeena nusha nekapmartá. ² Antsu jea áarininkia yajaya shuar susamu asamtai nekapmatsuk ikiuktiá. Nu shuar ti shiir péprun Jerusaréinkan kuarentitús (42) nantu nui akupeenak mash yajauch awajsartatui. ³ Túruiniakui Wikia Wii-shuaran jímíaran akatran akupkattajai. Nusha chikichik mir jimiará sianu sesenta (1.260) tsawant pujusar Winian etserkartatui. Nuka menaintiu uwí nankaamasaiti. Úutkur-entsatai pushin entsaru ártatui.” Tu turutiarmai.

⁴ Nu jímíar shuarsha nayaimpiniam nakumkamu áiniawai. Uriwiu numisha jímíar tura shirikip ekeemataisha jímíar nayaimpiniam awai. Nusha ju nuká Uuntri Yusai

wajainiak, jímíar akatramua nú shuaran nakumainiawai.
⁵ Shuar nin yajauch awajsataj tutai ni wenenia jinia jiiiki nemasri ashí áesatniuiti. Núnisan nin yajauch awajsatniun wakera nuka jákartatui. ⁶ Nu aentska Yúsna áujmatainiak yumi yutukaip títinian kakarman takakainiawai. Núnisan entsancha numpa awajsatniun kakarman takakainiawai. Tura ashí yajauchia nujai aentsun wáitkiasinian takakainiawai. Nuna ashí ni wakeruinia nui páchitsuk túramin áiniawai. ⁷ Tura ni takatrin umikiarmatai Ti Kajen Yajasma náńkatkachu waanmaya jiiinia nu mesetan najata nupetak máawartatui. ⁸ Tura iwiarnatsuk ni ayashi uunt pepru jintiin ajapén tepeartatui. Nu péprunmasha ii Uuntri Jesukristuncha máawarmiayi. Nu péprunmaya shuar tuke tunaan túrin ásarmatai Ejiptu tuńiak tura núnisan Sutuma tuńiak nu péprun páchiiniawai. ⁹ Tura menaintiu tsawant nuyá nankaamas ashí nunkanmaya shuar jaka tepan ísar iwiarnascharti tiártatui. ¹⁰ Nu jákarmatai ashí nunkanam pujuinia nú shuar ni jakamun ti wararainiak mai sunai ajartatui. Kame nu jimíará aents Yúsna áujmatenak ashí shuaran wáitkiasaru ásarmatai ti warasarmai. ¹¹ Nuyá menaintiú tsawant nuyá nankaamas jaka tepesarmatai Yus ataksha iwiaaku awajsarmai. Tura nantakiarmatai nuyá shuar nin wainkiar ti ashamkarmai.

¹² Nuyá nu nantakiaru nayaimpinmaya kakaram untsumman antukarmai: “Juí yakí wakatarum.” Tu untsummiai. Tutai ashí ni nemasri íimiainiaín yuran kim amuam nayaimpiniam wákarmai. ¹³ Túmainiaí ti úurkamtai tias nakakam jeeá pepru saanakmiai. Tura siati mir (7.000) shuar jákarmai nu uujai. Chíkichkia sapijmiainiak Yus nayaimpiniam pujana nuna shiir awajsarmai.

¹⁴ Jímíar wáitsatin nankaamasai. Chikichik ajasua nu túrunatin ishichik ajasai.

Suntar siatia nu kachun umpuarmai

¹⁵ Nuyá suntar siatia nu, kachun umpuarmatai chícham kakaram chichainian nayaimpinmayan antunkamai. Juna tímiayi:

“Yamaikia ii Uuntri Yus tura ni Anaikiamu Kristu ashí shuaran akupin ajasari. Niisha tuke amutsuk akupkartatui.”

¹⁶ Nuyá paintikuatru uuntka akupin pujutainium Yusaj naka pujuarmia nu piniakum tepersar Yúsna shiir awajenak tiarmai:

¹⁷ “Unt Yusá, ti kakaram asam Ámijiai tujinkiatin atsawai. Yáunchusha, yamaisha, tura tuke amuutsuk iwiaaku pujuwitme. Ame ti kakarmarmijiai nekas akupkatin

juarme yamaikia. Tuma asakmin yumĩnsajme, tiar-mai. ¹⁸ Ashí shuar kajertamkaru aĩn yamaikia ameshajajer katin tsawant jeayi. Jákarusha iniantkim ni túramurĩ íisartatme. Turam amée shuarka shiir etseturmakua nusha, tura Aminiak enentáimturmasarua nusha, tura Ámin shiir awajtamsarua nusha ashí mash ti shiira nuna súakum akiktatme. Antsu ju nunkan emesniuka ashí emesratniunam akupkattame.” Tu tiarmai.

¹⁹ Tuĩniakui Yusa Uunt Jee nayaimpiniam ana nu uranmiatai wakenmaani Chícham Aarma Chumpitiai paant amai. Túrunamtai peemsha, ipiamtasha, cháarpisha, uusha amai tura michasha ti kakekamai.

12

Nuwasha tura Ti Kajen Yajasmasha

¹ Nuyá nakumkamu ti enentáimpramnia nayaimpiniam wantinkiamai. Nuwá etsajai penuarma wantinkiamai. Nawesha nantunam ekeemai. Tura múuknum tuse yaan etsenkrakuyi. ² Nu nuwá ajamtin asa jurertaj tusa wáitiak ti kakantar uutmiai.

³ Tumai ataksha ti enentáimpramnia nayaimpiniam wantinkiamai. Ti Kajen Yajasma kapaaku wantinkiamai. Muukeshasiasi asa siati akuptai tawaspan etsenkraku ármái. Tura kachurisha tiásauyi. ⁴ Menaintiu nakakam jeeán yaan ni ujukéjai japiki akakermái. Tura nunká utsamai. Nu Ti Kajen Yajasma nu nuwá jatema nui wajasmai. Júermataik yuruataj tusa wajattsamai. ⁵ Tura nuwasha áishmankan jurermái. Nu uchi uunt ajas ashí nunkanam ti kakaram akupkatin asa, nu uchi akupin pujutainium Yus pujana nui junakmiai. ⁶ Tura núwaka atsamunam pisarmái. Nui pujustinian Yus iwiarturmai. Tura chikichik mir jimiará sian̄tu sesenta (1.260) tsawant ayurnat tusa akupkamai. Nuka menaintiu uwí nan̄kaamasaiti.

⁷ Nuyá nayaimpiniam meset amai. Nayaimpinimaya suntara kapitían̄tri Mikiar ni suntarijijai Ti Kajen Yajasmajai máanaikiarmái. Ti Kajen Yajasmasha ni suntarijijai ti máanaikiarsha ⁸ nupetmakcharmai. Túramtai nayaimpinimaya jiīki akupkamuyi. ⁹ Núnisan̄ Ti Kajen Yajasma ashí ni suntarijijai nunká akupnakmai. Nu Yajasmasha iwianchi kapitían̄tri Satanás tutainti. Yáunchuya-napiiti niisha. Ashí nunkanmaya shuáran anan̄niuiti.

¹⁰ Nuyá nayaimpinimaya kakaram untsumman antukmajai. Tura timiai:

“Unt iwianch ii yach̄in yajauch áujmatin jiīki akupkamu asantai yamaikia ii Yusri uwemtikratniusha tura

ni kakarmarín iniakmastincha tura akupkatniusha jeayi. Anaikiamu Krístusha ashí akupin ajastincha jeayi. Tura uunt iwianch ii yachín tsawaisha káshisha iniaitsuk Yusaj yajauch áujmatniua nuna¹¹ íksan ii yachí nupetmakarai. Yus-susamu murikiu numpea áinis Jesukrístu numpejai nupetmakarai. Niisha jákatniuitkiusha surimiatsuk nekas-chichaman páchitsuk etserkarmai. Nujajsha uunt iwianchin nupetkarmai.¹² Tuma asamtai nayaimpiniam pujarmena nusha warastarum. Antsu nunká tura entsá pujarmena nusha uunt iwianch atumin tarutmarmatai, maa, waitnentajrume. Ni tsawantri ishichik ajatesman nekáa ti kajekuiti.” Tu timiai.

¹³ Nuyá Ti Kajen Yajasma nunká ajapna nuwá áishman kan jurerma nuna áintramai. ¹⁴ Turakui nuwan uunt nanapen churuwia nanapea áinis sunasmai. Nujai nanamuk yáunchuya-napiya pisar atsamunam wemai. Tura ni ayuratniunam menaintiu uwí nuyá sais nantu pujusmai. ¹⁵ Nuyá nu napi ni weneya entsá jiki nujan krumamai nuwan ajekrataj tusa. ¹⁶ Túrasha nunka nuwan yayak nakaak nu entsan mash ukuyámai. ¹⁷⁻¹⁸ Túramtai nuwan ti kajerak ni weeá chíchik írunna nujai máaniaktaj tusa wemai. Nu shuarsha Yus akupkamun umirainiak Jesusan ti shiir áujmaténakui, nijiai máaniaktaj tawai.

13

Nuyá Yajasma jímira nu

¹ Nuyá nayaantsa káanmatkarín wajasan nayaantsanmaya Yajasman jiiniun wainkiamjai. Muuksha siátitiat kachuri tias tura akuptai tawaspasha tias armai. Ashí muuken Yúsán yajauch chicharin tu áarmauyi. ² Nuí wáinkiamaj nu Yajasma nekas uunt yawáa áinniuitiat nawenka chai nawea áinniuyi. Wenesha nekas kajen yawáa áinniuyi. Tura Ti Kajen Yajasma Entsaya Yajasman ni kakarmaríncha tura ni akupkatniuríncha susamai nujai ti kakaram akupkati tusa. ³ Entsaya Yajasma muuké chikichkin jakamnia awatmian wainkiamjai. Túrasha pénger awajnasmai. Túramtai ashí nunkanmaya shuar nuna ísar ti enentáimturar nemarsarmai. ⁴ Túrawar nin tikishmatrar shiir awajsar “¿Yaki jujaisha jeá. Imiá kakaram asamtai yaki nijiai máanaikminiait?” tiarmai. Tura Ti Kajen Yajasma ni kakarmarín Entsaya Yajasman susa asamtai ashí shuar nincha tikishmatrarmai.

⁵ Núnisan nu Entsaya Yajasma waantu enentáimtumak Yúsán yajauch chicharkatniusha tsankatnakmai. Tura kuarentitús (42) nantutin kakaram akupkatniun sunasmai. ⁶ Núnisan

túrak Yúsan yajauch áujmatuk ni náaríncha ni Jeencha tura ashí ni shuarí nayaimpiniam pujuinia nunasha katsekkar-mai. ⁷ Tura Yusna ainia nujai mesetan najana nupetkatniun tsan_{kan}katnakmai. Tura ashí nun_{kan}mayá shuaran akupkatniun tsan_{kan}katnakmai. ⁸ Túramtai ashí shuar tuke iwiaaku átinia nu papiniun ni naari yámankamtaiknumiá anujkamu atsúarma nuka nu Yajasman tikishmatrarmai. Nu papincha Murik jaka nantakmia nu takakui.

⁹ Shuar júna ántakka enentáimprati:

¹⁰ “Shuaran emetá juinia nusha emetnattawai.

Núnisan_{an} shuaran nan_{kij}iai mainia nusha nan_{kij}iai mantam-nattawai.”

Tuma asamtai Yajasma mesetan najanamtai Yus-shuar Yus iistí tusar tuke enentáimtusar katsuntsar pujustin áiniawai.

¹¹ Nuyá chíkich Yajasman kukariá wáakun wainkiamjai. Nusha murikiu áanin jimiará kachurtiniuyi. Tura Ti Kajen Yajasma áinis kakaram chichaakuyi. ¹² Niisha Entsaya Yajasma kakarmarin súam akupniuyi. Tura ashí nun_{kan}mayá shuaran “Entsaya Yajasma penké jaa tsuarma nu, shiir awajnasti” tímiai. ¹³ Núnisan_{an} shuarti túrachminian ti turin asa ashí shuar íimiainain_{in} nayaimpinmayá jinia nun_{ka} ajuarmai. ¹⁴ Tura Entsaya Yajasma súam aents túrachminian ti turak ashí nun_{kan}mayá shuaran anan_{kan}warmai. Túrak Entsaya Yajasma nakumkamurin najanawarat tusa akupkamai. Túramtai puniajai penké jakamnia awatmia pé_nker ajasma nuna nakumkamurin najanawarmai. ¹⁵ Kukariá Yajasma kakaram sunasmai. Nujai Entsaya Yajasma najanamun iwiaaku awajsatniua áintsan_{an} ichachkiamai. Túram ashí níniak shiir awajeacham máatniun susamai. ¹⁶ Nu arantcha ashí shuar anujmamprarat tusa akupkamai. Uuntcha uchisha kuítrinniusha kuítrinchasha an_{kan}tacha an_{kan}tchasha ashí ni nijai_{in}cha tura wakerakka untsuurin_{in}cha anujtuktiniuyi. ¹⁷ Entsaya Yajasma náarin tura wakerakka ni náari númirurin_{in} anujtuktiniuyi. Túrachuka sumatnasha sumakchamniuyi, surutnasha surukchamniuyi. ¹⁸ Wats, wi tájana ju nekaatniuka ti nekas enentáimtustiniaiti: Entsaya Yajasma númiruri áishma_{nka} númiruri asa sais sian_{tu} seséntisáisaiti (666). Ashí ti neka ainia nú shuar Entsaya Yajasma númirurin_{in} nekapmar nin nekaati.

14

144.000 shuar Yúsan kantampruawarma

¹ Nuyá Murikiun Seun náinnium wajan wainkiamjai. Níjia_{isha} sian_{tu} kuaréntikuátru mir (144.000) shuar wajaarmai. Nusha nijiai Murikiu náarin_{in}cha tura ni

Aparí náaríncha anujtukma aarmai. ² Ti untsurí árpan nayaimpiniam túntuiniak teer awajenak kanusa uuntri nujan̄krak téter ajá núnisan̄ antukmajai. Ti kakaram ipiamta núnis amai. ³ Nu tuntuiyamujai siāntu kuaréntikuátru mir shuar akupin pujutainium naka wajasar yamaram kántan kantamáwarmai. Niisha kuatru tan̄kunmasha tura paintikuatru uuntnumsha naka wajasar kantamáwarmai. Nu kántanka chíkichka nekaachmin armai. Aya nu siāntu kuaréntikuátru mir shuarka jú nun̄kanmayā shuarnumiā uwempraru ásar nu kántan kantamiarmai. ⁴ Nu shuarsha nuwajai yajauch ajascharu ásar ti shiir áiniawai. Túrawar Murik weana nūj nemarainiawai. Jú nun̄kanmayā shuarnumiā uwempraru ásarmatai Yussha tura Muriksha ti shiir enentáimtiarmai. Niisha emka juukma ti shiira núnisan̄ armai. ⁵ Nu shuar pen̄ké wáitruachu ásar Yúsaisha ti shiir tunáa máatrachu armai.

Menaintiu suntar chichaman etserainiawai

⁶ Nuyá nayaimpiniam suntar nanamun wainkiamjai. Nusha uwempratin chicham tuke amuukashtinia nuna ashí nun̄kanam pujuinia nú shuaran ujakartiniuyi. ⁷ Nusha ti kakantar untsumuk timiai: “Yus ashamkatarum. Nīnki shiir awajsatarum. Yamaikia ashí shuaran súmam̄tikiawartin tsawant jeayi. Nayaimpincha nun̄kancha nayaantsancha ashí entsancha najana asamtai shiir awajsatarum.”

⁸ Nuyá chíkich suntar, jímiara nu, taa timiai: “Pai, Uunt Papirúnia pépruka pen̄ké meserai. Niisha tuke tsanirmaua núnisan̄ ashí shuaran anampratniua núnisan̄ utsuurmai. Tuma asa niisha nú shuarjai nupetnak tuke emesnarai.”

⁹ Nuyá chíkich suntar, menaintiua nu, taa timiai: “Shuar Entsaya Yajasmancha tura ni nakumkamuríncha shiir awajeakūn̄kia tura nijiāin̄iumsha uwejn̄umsha ni naarī anujtuk-maitkūn̄kia ¹⁰ Yus nin kakerak ti asutiáttawai. Yapá pachimprachman áartinia áintsan̄ ti kakerkattawai. Túramtai asupri ti tsúer keá nujaī jin̄ium wáitsartatui. Yusa suntarī tura Murik íimmianum apenáwar jin̄ium wáitsartatui. ¹¹ Ni wáitsatniurī ji esaak kajintsuk tuke mukūintia nuniskete. Entsaya yajasman tura ni nakumkamurin shiir awajeenak ni naarī anujm̄mainia nuka tsawaisha káshisha ayamtsuk wáitsartatui. ¹² Nu asamtai ni chichamen̄ umirainiak Yusna ainia nuka Krístun ti shiir nemarainia ásar nu tsawantaī itiurchatnum pujuiniak katsuntratin áiniawai.”

¹³ Nuyá nayaimpinmayā chichaman antukmajai. Nusha turutmiái “Jú áatratá: “Uunt Jesusan umirainia nu yamá jakarusha tura ukunam jakarusha ti shiir pujusartatui.” Tu aartá” timiai.

‘Núnisan Yusa Wakaní tawai. “Eta, ti takasaru ásar jakar yawerman ayamprartatui. Tura ti penker túrawar akinkiar-tatui” tawai” turutmiai.

Jú nunkanam arakma juukma

¹⁴ Nuyá yurañkim pújun wainkiamjai. Tura yurañminiam Aents Ajasua nuna eketun wainkiamjai. Akuptai tawaspan kurijiai najanamu etsenkrakuyi. Tura machitian éren takakuyi.

¹⁵ Tura chíkich suntar Yusa Uunt Jeeñiá jiinki yurañminiam eketun kakantar chicharuk tímiai “Árak júuktin tsawant jeayi. Machitrumjai tsupiram juuktá.” ¹⁶ Tutai yurañminiam eketu ni machitrijiai nunká arakman tsupir juukmai.

¹⁷ Nuyá chíkich suntar Yusa Uunt Jee nayaimpiniam ana nuyá jiinkimiai. Niisha ni machitri éren takakuyi. ¹⁸ Tura chíkich suntar naman maar Yus-sútainmaya jiinkimiai. Niisha jinia wáinniuyi. Tura máchit ti éren takakun kakantar chicharuk tímiai “Machitrum ti érea nujai uwa nunká arakma nu tsupiram juuktá. Mash tsamakarai.” ¹⁹ Tutai suntar ni machitrijiai ashí nunkanmaya uwa nerén tsupir juukmai. Tura neketainiam chumpiamai. Nu neketai Yus ti kakerak shuáran ti asutiátta nuna nakumeawai. ²⁰ Tura uunt péprunmaya arantach ijiurarmai. Tura neketainmaya numpa jiinkimiai. Nu numpa tres sianu (300) kirumitrua nui pajamar kawayu nujiijiai métek ajasmai.

15

Nayaimpinmaya suntar amúamunam wáitkiastinia nuna pininnumian ukainiawai

¹ Nuyá ashammain ti enentáimpramnian nayaimpiniam wainkiamjai. Siati suntar amúamunam wáitkiastinia nuna takusarmai. Nujai ju nunkanam yajauch shuáran ti wáitkiasar Yus kajeamun umirtatui.

² Nuyá antumianka áiv 20 Tura uunt péprunmaya aranntsai ti saar jijiai pachimpramun wainkiamjai. Ni káanmatkarincha Entsaya Yajasman tura ni nakumkamurincha nupetkarman nu nui wajaarmai. Tura nin arpa tuntuitiain Yus súsarmai.

³ Túramtai kantamáwarmai. Yusa yaintri Muisaisa kantarincha tura Murikiu kantarincha kantamainiak tiarmai:

“Uuntá, ashí tujinchaitme. Ti penker tura ti enentáimturmin ashí najanaitme. Ashí Uunt Akupin asam ashí nekasa nu túrasha péñkera nu túriniaitme. ⁴Uuntá, ¿yaki ashampramkachat? Tura yaki ti shiir awajtamsachat? Aya Amek ti shiir tunaarinchaitme. Ashí nunkanmaya shuar ame ti shiir túramun wáinkiar Aminiak jeartamar ti shiir awajtamsartatui.”

Tu kantamáwarmai.

⁵ Nuyá atak Yusa Uunt Jeen íisan, Ti Shiir Tesaamun uraniun wainkiamjai. ⁶ Tura Ti Shiir Tesaamunmaya siati suntar siati wáitkiastinjai jíinkiarmai. Niisha ti shiir pújun entsaru armai. Netsepnumsha kurin emenmama armai. ⁷ Nuyá kua-tru tankunmaya chikichik kurí pinínkian súsarmai. Nu pinin tuke iwíiaaku Yusa kajetairíjiaí piaku armai. ⁸ Tura Yusa kakarmari ti ashammai Ti Shiir Tesaamunam mukuintiua núnis piakmai. Túramtai nu siati suntar wáitkiastinian ukarar amuiniatsajin Yusa Jeen wayachminiuyi.

16

Wáitkiastin pinin ukararma

¹ Nuyá Imiá Shiir Tesaamunmaya ti kakaram chichaamun antukmajai. Nusha siati suntaran tiarmai “Nunká werum Yusa kajetairi siati pininnum ana nu ashí ukartarum.”

² Tutai emka suntar we, pininnumia kukar ukarmai. Túramtai ashí shuar Entsaya Yajasma náarin anujmamprar ni nakumkamurin shiir awajiarma nuna ti najamin kuchap jiintiurarmai.

³ Nuyá chíkich suntar jímiara nu, we Yusa kajetairin nayaantsanam ukarmai. Túramtai nayaants jakáa numpéa áinis ajasmai. Tura ashí nui pujuinia nu kajinjiarmai.

⁴ Nuyá suntar menaintiua nu, entsanam tura púkununmasha ukarmai. Túramtai ashí numpa ajasarmai. ⁵ Nuyá suntar entsá wáinnia nuna chichamen antukmajai. “Uuntá, amek ti penker Yus asam jútikiame. Yáunchusha tuke pujú asam ti shíiraitme. ⁶ Iis, nu shuar amée shuárumincha tura ame chichammin etserniuncha máawar ni numpen ukatraru ásarmatai Amesha núnismek numpa áarume. Maa, páchitsuk áitkianatin áiniawai.”

⁷ Tutai naman-maa-Yus-sútainmaya chichaman antukmajai. “Eta, Uuntá. Nekas kakaram asam ashí ti tujinchaitme, Nekas túratniua nu ti penker túrin asam nu shuar túramujai métek akiruitme, timiai.”

⁸ Nuyá suntar kuatrua nu, tsawaj nantunam ukarmai. Túramtai jijiaí shuáran esaamujai wáitkiastin kakaram sunasmai. ⁹ Tura shuar ti sukuám wáitiarmia nu, nu wáitkiastinian nérenniun Yusan yajauch chicharkarmai. Tura ni tunaarin enentáimtsuk Nin shiir awajsatniuncha penké nakitrarmai.

¹⁰ Nuyá suntar senkua nu, Entsaya Yajasma akupin pujutairin ukarmai. Túramtai ni nunkeen ashí kashi ajasmai. Tura shuar ti najaimiainiak iniaincha esamiarmai. ¹¹ Tura nújaisha yajauch túratniuncha iniaisacharmai. Antsu kuchapríjiaisha tura ti najaimiainiak wáitiainiak nayaimpinmaya Yusan ti yajauch chicharkarmai.

¹² Nuyá suntar saisa nu, Eupratis entsanam ukarmai. Túramtai kuyuámai. Nujai nantu tátainmaaniá akupin taarti tusa jintiamnmai.

¹³ Tura nuyá juna wainkiamjai. Ti Kajen Yajasma weneyasha, Entsaya Yajasma weneyasha tura núnisan penké Kukariá Yajasma ántar yúsna etserniua nuna weneyasha puachia núnin yajauch wakan menaint jiniarmai.

¹⁴ Íwianch áiniak aents tujintiamun túruiniak ashí nunkanmaya akupniun irurarmai. Ti Tujincha-Yusai ni uunt tsawantri jeamtai mesetan najanatai tusar weriarmai. ¹⁵ (Yamá Kristu “Aneara pujustarum, tawai. Nékachmanum kasa núnisnak jeattajai. Kánutsuk tuke iwiarnar pujak ni entsatairín pénger wáinia nú shuar ti shiir átatui. Misuchu asa natsaarchattawai.” Tu tawai.) ¹⁶ Tura yajauch wakan uunt akupin áinian Armajetún nunkanam irurarmai. Israerchichamnum nu nunka tu anaikiamuiti.

¹⁷ Nuyá suntar siatia nu, nasenam ukarmai. Túramtai nayaimpinmaya Yusa Uunt Jeeniá ti kakaram chicham Yus akupin pujutainmaya chichaak “Mash uminkiai” timiai.

¹⁸ Tura nuyanka peemsha, chárpisha, ipiamtasha ajamai. Tura nunkasha ti kakaram úrkamai. Maa, aents jú nunkanam yámankamtaik pujuarmia nuyá júnis úrkamuka atsuwiti. ¹⁹ Ti Uunt Péprusha menaint nakantramai. Ashí nunkanmaya péprusha saanakiarmai. Nuisha Yus ti kajerak Papirúnia pépruncha kajinmattsuk ni kajetairín yapá umutaia áintsan aarmai. ²⁰ Entsá ajapén atentrasha tura murasha menkaramai. ²¹ Núnisan nayaimpinmaya uunt kaya núnisan micha kákeramai. Ti uunt áiniak kintiarjai métek kijin armai. Shuarsha nujai ti wáitiainiayatan áyatik Yúsán yajauch chicharkarmai.

17

Tsanirmatai nuwá asutiámu

¹ Nuyá siati suntarnumiá chikichik taruti turutmiai “Winitia. Tsanirmatai nuwá ti asutiátniun iniaktustatjame. Nu nuwá nayaantsanam uku eketui. ² Ashí jú nunkanmaya akupin nijijai tsanirmawaru áiniawai. Núnisan ashí jú nunkanmaya shuar, nu nuwá tsanirmatniun tsankateam, nijiamanch umartinia áintsar nijijai ti yajauch túrawar nampekarmai.” Nuna taku Yusnumiá kanaktinian nakumkamai. ³ Nuyá mesekranam kampuntin atsamunam jurukmiai. Tura nuí Yajasma kapaakunam nuwá eketun wainkiamjai. Nu Yajasma manmasha ashí Yúsán yajauch chichareamu áatramuyi. Muuke siátitiat kachuri tiásauyi.

⁴ Nu nuwasha tarachin yamakai kapaakujaisa ti shiir

iwiarmamar entsaruyi. Kurijiaisha, shíirmach kayajaisha, ti shiir sháukjaisha iwiarmamprauyi. Kurí pinínkian mujmiainniasha tura ashí ni tsanirmatairi imiá yajauch armia nunasha piakun ajaamak takakauyi. ⁵ Nijiaíniumsha ni naaria áintsan yúpichuch nekaachminia nu júnis áarmauyi: UUNT PAPIRÚNIA, Ashí Tsanirmauncha tura Ashí Ju Nunkanam Mújmiainian Túrinia Nunasha Nukurinti. ⁶ Nu nuwasha Yus-shuar Krístunun etserkar máawarma ainia nuna numpen nampekuyi.

Nuna wáinkian ti enentáimturmajai. ⁷ Túrunamtai nayaimpinmaya suntar túrutmiai “¿Urukamtai imiá enentáimtam? Wats, ashí nuwanun paant ujaktatjame. Núnisan yajasma ekenak júana nunasha paant ujaktatjame. Muukeshá siátichukait tura kachurisha tiáschak áinia. ⁸ Nu yajasma wáinkiam nuka yaunchu pujuwiti tura yamaikia jui pujachiat amúamunam tuke játsuk náńkatkachu wáanmaya jínkíttiawai. Shuar nuna wáinkiar ni naari tuke iwiaaku pujutai papinium yámankamtaiknumiá anujtukchamua nuka nu yajasman ashamkartatui. Nu yajasma yaunchu pujú yamaikia atsayat atak wantinkiattawai’ turutmiai.

⁹ ‘Nekas neka ainia nu júna enentáimturarti: Siati muukenka siati náintian nakumui. Nu nuwá nuí eketui. ¹⁰ Núnisan ni siati muuke siati akupniun nakumui. Kame senku akupniuka nankaamasaru ainiawai. Chikichik tuke akupniuiti tura chíkichka tuke taatsui. Nii taasha núkap tsawant akupkashtatui. ¹¹ Nuyá ashí ukunmanka yaunchu amia nú yajasma wantiniak nujai uchu akupin ajastatui. Túmaitiat chíkich siati akupniujai iruram métek enentáimpramniati. Tura nu yajasma yamaikia atsayat wantiniak akupak umik tuke emesnartinnium wétatui’ turutmiai.

¹² ‘Tias kachuri wáinkiam nuka tias akupin tuke aku-peenatsna núiti. Niisha nu yajasmajai métek penké ishichik tsawant akupin ajasartatui. ¹³ Ju tias akupniusha métekrak enentáimiainiak ni kakarmarin yajasman sústartatui nújaisha akupkat tusar. ¹⁴ Murikjaisha mesetan najanawartatui. Túrasha Murik nupetkartatui. Niisha uuntjai nankaamas Uunt asa tura núnisan akupniujai nankaamas Akupin asa nupetmaktatui. Tura Niijiai írutraa nu, Yus Winia atí tusa achikma ásar tura Nin tuke umirin ásar Niijiai nupetmakartatui.’

¹⁵ Suntar tuke chichartak turutmiai ‘Tsanirmatai nuwá nayaantsanam uku eketu wáinkiachumek. Nu nayaantsaka ashí nunkanmaya shuáran nakumeawai. ¹⁶ Tura tias káchuka yajasmanum wáinkiam nu, tsanirmatai nuwan nakitrar ajapawar misú ikiukiartatui. Ni ayashíncha

yuawartatui tura áesawartatui. ¹⁷ Nu akupniu enentáin Yuska ni wakeramurin apujsaiti. Nii timia nu umintsain akupniusha métekrak enentáimprar ni kakarmarin takamtsuk yajasman súsatniun enentáimtikramai. ¹⁸ Nuwá wáinkiam nuka ashí nunkanmaya akupniun akupeana nu pépruiti.”

18

Papirúnia emesramuiti

¹ Nuyá nayaimpinmaya suntar táarun wainkiamjai. Ti kakaram akupin asa nunkancha tsáapin awajsamai. ² Tura ti kakantar chichaak timiai “Pai, Uunt Papirúnia penké meserai. Tura yamaikia íwianch matsamtaisha ashí yajauch wakaní pujutairisha ajasai. Mujimiai nanamtincha tura ashí yajauch nanamtin ainia nusha nui pasunmainiawai. ³ Nu péprunmaya shuar tuke tsanirmaua núnisan ashí nunkanmaya shuaran anampratniua núnisan ni ti yajauch turamujai utsuurmai. Núnisan ashí jú nunkanmaya akupin Yúsan iniaisar nijijai tsanirmawarua áinis áiniawai. Tura shuarsha ni yajauch wararmajai ti kuítrintin ajasaruiti.” Tu timiai.

⁴ Nuyá nayaimpinmaya ti kakantar chichaman antukmajai. “Wíi shuaraitrumna nuka nú peprunmaya jíinkitiarum. Túrachkurmeka ni tunaari jumamkirum ni wáitsatniurinha pachiinkiatarme. ⁵ Ni tunaarisha ti piak nayaimpiniam jeastatuk ajasai. Tuma asamtai Yus ni tunaarin kajinmatkichuiti. ⁶ Ni tunáa túramujai métek akikiam ataksha nuna nankaamas métek patattsata. Ni yajauch túramu nijiamchin ashí áararma núnisan nuna nankaamas ti wáitsatin nijiamanch pachimpruram susata. ⁷ Waantu enentáimtumak yajauchin wararsama nujai métek ti wáitkiastá yamaikia. Tunáan ti túriniaitiat ni enentáinkia enentáimias “Uunt Akupniuitjai. Wajechu asan penké wáitsashtiniaitjai” tu enentáimtumawai. ⁸ Tuma asamtai ti wárik chikichik tsawantai ni wáitsatniuri tarittiawai. Jákatniusha ti wáitsatniusha tura tsukasha tarí ashí jijijai ekeemankattawai. Uunt Yus ashí Tujincha nu kajer kamu asa nujai asutniáttawai.” Tu timiai.

⁹ Ashí nunkanmaya akupin nijijai tsanirmawaru ainia nu ashí yajauchin nijijai wararsaru ásar nu pepru esaak múkuint ajakui eararmai. ¹⁰ Ti esaak wáitiakui nui pachiinkiar wáitsatniun ashamainiak arant wajasar tiartatui “Maa, Papirúnia ti uunt pépruitiat nekas wáitnenmai ajawai. Imiá wárik ni wáitsatniuri tarini.”

¹¹ Núnisan ashí nunkanam súrin ainia nusha nu péprun ti kuntuts enentáimturar earartatui. Ni surutain itiamun çyaki sumarkat? ¹² Kame juna itiaru áiniawai: kurincha, kuítniasha, kaya shíirmachincha, ti shiir sháuknasha, ti pénger

tarachniasha, akupin entsatai shiirmachin yamakaincha kapaaniuncha, sétancha, itiaru áiniawai. Núnisan ashí kunkuin numincha, ti shiir awara najanamuncha, ti shíiram numincha, yankú jiruncha, penké jiruncha, mármur kayancha itiaru áiniawai. ¹³ Núnisan ishpinnasha, nusháa kunkuinninasha, mira kunkuinninasha, umutaincha, asuitincha, trikiu nerencha, tura trikiu ti penker nekenmancha itiaru áiniawai. Núnisan áintstai tankuncha, murikniasha, kawaincha ni kárurijiai, tura nú arantka shuárnasha suruktinian itiaru áiniawai.

¹⁴ Tura nu péprun tiarmai “Numí neren ti wakeruk súmauya nu yamaikia nuj atsawai. Ashí ni kuítrisha tura ashí ni penkerisha tuke penké amuukai.” Tu tiarmai.

¹⁵ Ashí nuna súrin armia nu, nuna surukar kuítrintin ajasaru ásar, ti wáitsamun ashamkar arant wajasar earartatui.

¹⁶ Túrawar tiartatui “Maa, uunt pépruiat ti wáitnenmai ajakai. Nuwa ti penker iwiarmampra áinis nuyá shuar akuptai tarachin yamakaiijiai kapaaku entsarmai. Kurijiaisha kaya ti shíirmachijiaisha tura ti penker sháukjaisha ti shiir iwiarmampraruyi. ¹⁷ Ti wárik ashí ju kuit amukaiti.” Tu tiarmai.

Ashí uunt kanú kapitíántrisha, ashí nayaantsanam katiinia nusha, ashí kanú wiánniusha, tura ashí kanú nérennurisha árantak wajasarmai. ¹⁸ Tura pepru esaak múkuint ajan wáinkiar ti kakantar úutainiak tiarmai “Timiá shiir pepru atsuwiti.” ¹⁹ Tiar ti kuntuts pujuiniak awatmamar kakanantar úutainiak tiarmai “Maa, ti uunt pépruiat ti wáitnenmai ajakai. Ashí uunt kanu nérentin nayaantsanam niijiai takasar kuítrintin ajasarmai. Tura ti wárik mash emesnarai.” Tu tiarmai.

²⁰ Antsu nayaimpiniam pujarumna nu, ashí Yus akatramu-tirmesha, ashí Yusna etserniutirmesha, tura ashí Yus-shuar árumna nu ni wáitsamujai warastarum. Nu wáitsamujai atumin yajauch awajtamsamarmena nuna yapajtiurmakurme.

²¹ Nuyá ti kakaram nayaimpinmaya suntar ti uunt neketai kayan jukí nayaantsanam ajun timiai “Júnisan uunt pepru Papirúnia emesnar atakka wainniakchatin tuke menkakattawai. ²² Tura atakka jantsemma pinkiuisha tampursha shakapsha antunkashtatui. Nu arantcha nuinkia shuar penké takakmaschartatui. Túramtai nekeamusha antunkashtatui. Ashí mitia átatui. ²³ Shiripkincha ekeemakchartatui. Nuatma nampersha antunkashtatui. Nuikkia ni shuari súrin arma nu ashí nunkanam nankaamantu armái. Tura ashí nunkanmayá shuaran waweatniua áintsan níya núnis ajasarat tusa anankawarmai. Túrashá núnisan ti kakarmaitiat ju mash túrunayi.” Tu timiai.

²⁴ Kame ni akupkamujai penker shuar ti mantamnawaru asamtai nu péprunam ashí yaunchu Yusna etserniu

numpesha, ashí Yus-shuara numpesha tura pé_nker shuar ashí nun_nkanam maamu ainia nuna numpesha nu_i paant wáinkiamniaiti.

19

¹ Nuyá nayaimpinmaya ti untsurí aents kakantar untsumainian antukmajai.

“Ju ti shiir enentáimtumainti. Yuska uwempratniuncha, nekas shiir átinniasha, nan_nkaamaku átinniasha, tura ashí kakarmancha nekas nérenniuiti. ² Niisha aya nekas pé_nker túratniua nuna túrin asa ti nukap tsanirmaun ashí shuaran tsanirijiai utsuun ti asutiáyi. Nin ti wáitkias ashí ni shuarí máawarman yapájmíátkaiti” tiar-mai.

³ Ataksha kakantar untsumainiak tiarmai:

“Ti shiiraiti. Nii wáitsatin ji esaak tuke kajintsuk múkuint ajawai.” Tu tiarmai.

⁴ Tuíniakui paintikuatru uunta nu tura kuatru tan_nkusha nun_{ká} piniakumawar akupin pujutainium Yus pujana nuna shiir awajsarmai. Túrawar “Imiá nekasaiti. Ti shiir túriniaitme” tiarmai. ⁵ Akupin pujutainmaya chícham jíinkimiai.

“Yusna takarniutirmesha tura ni umirniutirmesha, úuntaitkiurmesha úchitkiurmesha kapitíanitkiurmesha pééjchachitkiurmesha, ii Yusr_i tuke shiir awajsatarum.” Tu timiai.

Murik nuatnaikiatin namperi

⁶ Nuyá ti untsurí aents chichainiak kanusa uuntri nu-jan_nkrak téter ajá núnisan antukmajai. Ti kakaram ipiamta núnis amai.

“Tí shíiraiti, tiarmai. Ii Uuntri Yus ashí tujincha asa ashí akupkatniun nan_nkaamayi. ⁷ Tuma asamtai shiir enentáimsartai. Murikiu anajmarmar_i shiir iwiarnar-matai ni nuatnaikiatin tsawantri jeayi. Tuma asamtai ti shiir warasar nincha shiir awajsatai. ⁸ Murikiu ana-jmarmar_inkia iwiarnarti tusa ti shiir pushí sunasmai. Nusha yamaram máatrachu asa ti pújuiti.” Tu tiarmai.

Nu pushí Yus-shuar pé_nker túramun nakumeawai.

⁹ Nuyá nayaimpinmaya suntar turutmiai “Ju áatrarta: “Murik nuatma námpernam ipiaamu ainia nuka ti shiir warasarti.” Tu aartá, turutmiai. Juka Yus timia asa imiá nekasaiti.”

¹⁰ Takui nu suntaran shiir awajsataj tusan tikishmatramjai. Túramtai turutmiai “Pe_nke áinkiaip. Wisha Yusa yáintrintjai ámijiai métek tura yatsumjai métek Kristu nekas chichamen

tuke umirin ainia nu. Yúsak shiir awajsatniuiti.” Tu turut-miai.

Kame Kristu imiá nekas timia nuna ashí Yúsnan etserainia nú shuar paant awajkartin áiniawai.

Kaway pújunam eketna nu

¹¹ Nuyá nayaimp uranniun wainkiamjai. Nuí kaway puju wantinkiamai. Nu kawaynium ekeema nuna naari Ti Penker Umin tutaiyi. Núnisan Ti Nekas Turin tutaiyi. Ti penker Akupin asa aya nekas penker túrak mesetan najanaiti. ¹²⁻¹³ Ni jiiisha jijiai métek keearmai. Múuknumsha akuptai tawaspan untsurí etsenkrakuyi. Nuí ni naari Yus Chicham áarmauyi. Túrasha tana nuna Niñki takamtsuk nekaamai. Numpajai enkerman entsaruyi. ¹⁴ Ti untsurí nayaimpinmaya suntar mesetnum weena áintsar kawainium ekemkar ti shiir pújun entsaru Nin nemariarmai. ¹⁵ Nu suntara Uuntri weneeya, ashí nunkanmaya yajauch shuaran máatin, puniá mai ere tsakatskatin jínmiiai. Tura jirujai asutiátniua áintsan ti kakaram akupkattawai. Túrak Ashí Tujincha Yusa kajetairi ti kakarma nujai shuáran asutiáttawai. Uwa nekenkar ijiuratinua áitkiasan wáitkiasartatui. ¹⁶ Ni pushirincha makuincha ni naari áarmauyi: Ashí Akupniun Akupin tura Ashí Uunta Uuntri.

¹⁷ Nuyá tsawái-nantunam suntaran eketun wainkiamjai. Nusha nayaimpiniam nanamtin nanamainian kakantar untsuak timiai “Yusa uunt namperin yurumáitiarum. ¹⁸ Akupniu namankésa yuítiarum. Suntara kapitántri namankésa, kakaram suntara namankésa, kaway namankésa tura eketainia nuna namankésa, kame ashí shuara namankésa nankaamantu ainia núnasha tura penké shuar ainia núnasha yuítiarum.” Tu untsukmai.

¹⁹ Tura nuyá Entsaya Yajasmancha tura jú nunkanam akupin ainia nunasha ashí ni suntarjijiai wainkiamjai. Niisha kawainium eketka nujai tura nuna suntarjijiai mesetan najanatai tusar iruntrarmai. ²⁰ Tura nu mesetnum Yajasmasha tura Kukariá Yajasmasha, penké ántar yúsnan etserniua nu, mai achinkiarmai. Nuikkia Entsaya Yajasma ni kakarmarin súam nu Kukariá Yajasmaka aents tujintiamun ti turak shuáran anankawarmai. Túramtai nu shuar Entsaya Yajasma náarin apujmamsar ni nakumkamurin shiir awajsarmai. Tuma asamtai Entsaya Yajasmancha tura Kukariá Yajasmancha íwiakuk asuprijiai ti kea nu ji-antumiannum apeáwarmai. ²¹ Chíkichka kawainium eketkanumiá puniá tsakatskatin weneya jijnmia nujai mantamnawarmai. Túramtai nanamtin ni ayashin yuawar ejemakarmai.

20

Kristu mir uwí jú nunkanam akupkattawai

¹ Nuyá nayaimpinmaya suntar táarun wainkiamjai. Nusha nánkatchu waa yawirín tura jínkiatai jirun kampurman takakuyi. ² Nu suntarsha Ti Kajen Yajasman jiru kampurmajai jínkiamai. Nu Yajasma iwianchi kapitíántri Satanas tutainti. Yáunchuya-napiti niisha. Tura nu iwianchin jínkiá mir uwí pujusat tusa ³ nánkatchu waa nam epenmíai. Tura waiti uraichminian anujtukmai. Mir uwí nankaamatsai ashí nunkanmaya shuaran anankawarain tusa túramai. Antsu mir uwí nankaamasmatai ishichik tsawant ankant akupnaktiniaiti.

⁴⁻⁵ Nuyá akupin pujutainium pujuinian wainkiamjai. Tura shuara túramurín írsarat tusa kakaram sunasarmai. Tura núnisan muuke tsupirka maamu wakaníncha wainkiamjai. Nusha Yusa chichamen etserainiak tura Kristu chichamencha etserin ásar maamu armai. Niisha Entsaya Yajasmáncha ni nakumkamuríncha tikishmatracharu armai. Núnisan náaríncha nijiaíniumsha tura uwejniumsha anujmampracharu armai. Nu shuar ataksha nantakiar emka nantaktin tsawantnum pachiinkiarmai. Túmainiak Krístujai métek mir uwí akupeamun wainkiamjai. Antsu chíkich jákaruka mir uwí nankaamatsai nantakcharmai. ⁶ Antsu emka nantaktin tsawantnum pachiinkiarua nú shuar, ti penker áimak, ti shiir warasmin áiniawai. Nu shuarka jimiara jákatniunam pachiintsuk Yusna tuke takarin tura núnisan Krístunu tuke takarin ártatui. Tura Krístujai métek mir uwí akupkartatui.

⁷ Tura mir uwí nankaamasmatai uunt iwianch urani akupnaktatui. ⁸ Túram ashí nunkanmaya shuáran anankawartaj tusa jínkittiwai. Kuk nunkanmasha tura Makuk nunkanmasha ashí pujuinia nuna anankawartatui. Tura mesetan najanataj tusa ni suntarín nekapmarchamnia ti untsurí irurtatui. ⁹ Tura ashí nunkan enetak Yusshuar matsamtaincha tura Yus ti aneamu pépruncha mash éñkekarmai. Túramtai Yus nayaimpinmaya jinia akuptuk mash áesawarmai. ¹⁰ Tura iwianchi kapitíántri, nin anankawarmia nu, asuprijai keá ji-antumiannum apenámai. Nu yaunchusha Entsaya Yajasmasha tura Kukaria Yajasmasha, penké ántar yusnan etserniua nu, nuí apenáwarmai. Nuisha tsawajsha káshisha inianatsuk ti wáitsartatui.

Ashí amúamunam súmamtikiatin tsawant

¹¹ Nuyá akupin pujutain úuntan tura ti pújun wainkiamjai. Tura nuí pujancha wainkiamjai. Niisha ti kakaram asam-tai nun̄kasha nayaimpisha aya men̄karar tuke atsúarmai. ¹²⁻¹³ Tura túrunatsaín nayaantsanam jákarua nusha jíinkiarmai. Núnisañ iwiarsamunam jaka pujuinia nusha jíinkiarmai. Tura jákaruncha, nan̄kaamantu arma nunasha tura pen̄ké shuar arma nunasha, ashí wainkiamjai. Tura Yusaj naka wajaarmai. Nuyá ashí shuar túramu aakma papí urantrarmai. Tura nu papinium aarma nujaj métek ashí ni turamurí paant nékaneakui súmamtiknawarmai. Tura chíkich papisha tuke iwiaaku pujustin papí urankamai. ¹⁴ Nuyá jákatin amuukati tusa ji-antumian̄num apenámai. Nu ji-antumian̄num wétin jimiara jákatin tútainti. ¹⁵ Tura ashí shuar ni naari tuke iwiaaku pujustin papinium atsúarma nusha nuí apenáwarmai.

21

Nayaim yamaram tura yamá nun̄ka

¹ Nuyá nayaimpisha tura nun̄kasha men̄karamtai nayaim yamarman tura yamá nun̄kancha wainkiamjai. Tura nayaantsasha atsumai. ² Wi, Juan, ti shiir péprun, Yusnumia yamaram Jerusarénkan nayaimpinmaya táarun, wainkiamjai. Anajmarma ni áishrin in̄kiuntaj tusa ti shiir iwiarmampra áintsan ti pen̄ker iwiaramuyi. ³ Nayaimpinmaya ti kakantar chichaamun antukmajai. “Iisiá, Yus yamaikia aentsjai pujawai. Tuke niijiai pujaku ashí ni shuari ártatui. Tura niijiai tuke pujak nekas tuke ni Yusri ártatui. ⁴ Yus ni neajkin ujurturartatui. Tura nuik amia nuka ashí amuukarmatai jákatniusha, úuttincha, wáitsatniusha, tura najaimiatniusha atsuttawai.”

⁵ Tura akupin pujutainium ekema nu “Iistá, Wi ashí pen̄ké yamarman nájanjai” timiai. Nuyá nu arantcha turutmiai “Juka imiá nekas asamtai aartá. Nekas enentáimtustiniaiti.”

⁶ Ataksha turutmiai “Yamaikia mash uminkiyai. Wiitjai. Yámankamtaiknumia amúanmasha tuke pjuwitjai. Wisha A rétranmaya Y rétranam ashí retra áintsaitjai. Ashí kitama núnaka tuke iwiaaku pujutai entsan pen̄ké kuitchajai áartatjai. ⁷ Nupetmakunka ashí yamarma juna mash susattajai. Wisha ni Yusri ártatjai. Núnisañ niisha winia uchir ártatui.

⁸ Antsu sápijia, Yúsan enentáimtichusha, yajauchin máatrasha, man̄kartincha, tsanirmatan pujurniusha, wawekratniusha, ántar-yusan tikishmatniusha, tura ashí wáitrincha asuprijiai keá ji-antumian̄num apenáwartatui. Nuka jimiara jákatin tútainti.”

Yamaram Jerusarén

⁹ Nuyá siati suntar pinin̄ amúamunam wáitkiastin̄jai piakun takakua nuyá chikichik taruti túrutmiai “Winitiā. Murikiu anajmarmarin̄ iniaktustatjame.” ¹⁰ Taku mesekranam naint yakí juruki Yusun̄miā ti shiir Jerusaren̄ pepru nayain̄pinmayā táarun̄ iniaktursamai. ¹¹ Nu péprusha Yusa wincharij̄jai tsáapniniuyi. Nu tsáapn̄incha kaya ti shíirmachia núnis̄ jaspi kaya nuní saar asa ti tsáapniniuyi. ¹² Pepru yantamesha ti yakí p̄n̄kramuyi tura wáitir̄i tuse amai. Tura nu wáitin̄ium suntar wajatiarmai. Nu wáitin̄masha Israer-shuara uun̄tr̄i tuse armia nuna naarī áarmauyi. ¹³ Nantu tátainmaanī menaintiu waiti amai. Nantu akatain̄maan̄isha menaintiu waiti amai. Nun̄kaan̄isha menaintiu waiti amai. Arakaan̄isha menaintiu waiti amai. ¹⁴ Ti uunt kaya tuse apuj̄samu armai. Tura nuī ekenir̄ p̄n̄kramuyi. Nu tuse kayanam Murikiu akatramurī tuse armia nuna naarī áarmauyi.

¹⁵ Suntar wij̄jai chichaua nu, nekapmatain̄ kurin takakuyi. Nuj̄ai péprun̄cha, wáitir̄in̄cha, tura p̄n̄kramur̄in̄cha nekapmartiniuyi. ¹⁶ Pepru esant̄isha wan̄kant̄isha yakir̄isha mash métekrak armai. Suntarsha péprun̄ nekapmataij̄jai nekapmaram esant̄isha wan̄kant̄isha tura núnisan̄ jeamkamu yakir̄isha jimiará mir̄ jimiará sian̄tu (2.200) kirúmitru amai. ¹⁷ Nuyá p̄n̄kr̄in̄cha nekapmarmai. Suntar aents nekapmataij̄jai nekapmaram sesentikuatru (64) mitru amai. ¹⁸ Nu p̄n̄kramusha jaspi kayaj̄ai najanamuyi. Péprusha aya kúrik̄iyi. Nu kuri ti p̄n̄ker sáarauyi. ¹⁹ P̄n̄ apuj̄tukma kayasha ti shiir kaya ainia nuj̄ai najanamu asa ti shiir iwiaramuyi. Emka nu jaspi káyauyi. Jímiara nusha sapiru káyauyi. Menaintiua nusha ákata káyauyi. Kuatrua nusha ismirár̄tauyi. ²⁰ Sen̄kua nusha únise káyauyi. Saisa nusha kurnarinia káyauyi. Siatia nusha krisur̄itiu káyauyi. Uchua nusha periru káyauyi. Nuiwia nusha tupasiu káyauyi. Tiasa nusha krisuprasa káyauyi. Áuntsea nusha jasentu káyauyi. Tusea nusha amat̄ista káyauyi. Ti kayaim apuj̄samu asamtai ti shíirmach̄iyi. ²¹ Pepru wáitir̄i tuse ainia nu, ti shiir nayaantsanmayā shauk̄jai chikichik najanamu armai. Pepru jint̄isha aya kúrik̄iyi. Nu kuri ti p̄n̄ker sáarauyi.

²² Yusa Uunt Jeen̄cha wainkiachmajai. Antsu nu peprunam Uunt Yus ashí tuj̄in̄cha nu tura núnisan̄ Muriksha nu péprun pímiutkui takamtsuk Níiniuyi. ²³ Nu péprunmasha tsawai-nantusha kashi-nantusha atsumchamai. Antsu Yusa winchar̄i tsáapin̄ awaj̄miai. Núnisan̄ Muriksha tsáapin̄ awaj̄miai. ²⁴ Nu tsáapn̄ij̄jaisha ashí nun̄kanmayā shuar wekasartatui. Tura ashí nun̄kanam akupin̄ ainia nusha nuī yuj̄ainiak ni p̄n̄ker̄ij̄jai nuna shiir awaj̄tuiniawai. ²⁵ Tura kashi atsá asamtai tuke tsawaiti. Tuma asamtai wáitir̄i tuke epenchamu

ártatui. ²⁶ Tura ashí nunkanam penker ana nuna nuji itiaarta-tui. ²⁷ Tura yajauchikia penké wayashatatui. Mujiainian túrincha tura anankartíncha penké wayachartatui. Antsu áyatik shuar tuke iwiaaku pujutai papinium naari aarma ainia nuke wayawartatui. Nu papíncha Murik takakui.

22

¹ Nuyá suntar tuke iwiaaku pujutai entsan ti sáaran ini-aktursamai. Nusha uunt akupin pujutainmaya ti saawi jini-miai. Nu pujutaisha Yusna tura Muriknauyi. ² Pepru jintíncha tura entsá mai paen tuke iwiaaku pujutai numi wajamai. Nusha ashí tuse nantutin neremai. Ni nukésa ashí nunkanmaya shuar tsuámatainti. ³⁻⁴ Ashí yajauchia nuka atsuttawai. Uunt akupin pujutai, Yúsnasha Murikniasha, nuin aa asamtai ni shuari ti paant wainiainiak tikishmatrartatui. Tura nijiaíncha ni naari anujmamkartatui. ⁵ Tura káshisha atsuttawai. Nuji pujuinia nuka shiripkincha etsancha atsum-chartatui. Uunt Yúsak tuke tsáapin awajtiatui. Tura ni shuari tuke iniañnatsuk akupkartatui.

Jesukrístu tátintri penké nuntumsai

⁶ Nuyá suntar turutmiai “Ju chicham ti nekas asa nekas enentáimtusminiaiti. Uunt Yus yaunchu níiniun etserniun ni chichamen enentáimtikramia núnisan yamaikia ni suntarin akuptuk wárik túrunatta nuna ashí ni shuarin ujakuiti.”

⁷ “Ti wárik winittiajai” tawai Murikkia.

Shuar ju papinium Yusa Chichame áarman umirna nuka shiir warasminiaiti.

⁸ Wi, Juan, juna mash íisan mash antukmajai. Tura mash íisan antukan nayaimpinmaya suntar iniaktursama nuna shiir awajsataj tusan tikishmatramjai. ⁹ Túram turutmiai “Penke áinkiaip. Wisha Yusa yáintrintjai ámijiai métek tura yatsumijiai métek. Yúsnan etserin ásar tura ju papinium áarma nuna umirainiak Yusa yáintrí áiniawai niisha. Yúsak shiir awajsatniuiti.”

¹⁰ Nuyá ataksha turutmiai “Ju papinium aarma Yusna asamtai úukam ikiusaip. Ashí túrunatin tsawant ishichik ajatesai. ¹¹ Nu jeatsainkia yajauch shuarka tuke yajauch túruki wetí. Núnisan mujiainian túraka tuke túruki wetí. Antsu penkeran túraka penkeran túruki wetí. Núnisan esetar enentáimniusha tuke esetar Yusjai wekasati.”

¹² Muriksha tawai “Eta, ti wárik winittiajai. Túran ti shíirmachin ashí penker túramujai métek súsatniua nuna takukin winittiajai. ¹³ Wiitjai. Yámankamtaiknumia amúanmasha tuke pjuwitjai. Wisha A rétranmaya Y rétranam ashí retra áintsaitjai.” Tu tawai.

¹⁴ Ni pushirí pénker nijiamatniua núnisā pénker túrinia nú shuar shiir warasminiaiti. Nu shuar nu pepru wáitiríncha wayamniaiti. Túrar tuke iwiaaku pujutai numinmayā yuamniaiti. ¹⁵ Tura antsu Yúsā enentáimtachuka, wawekratniuka, tsanirmatan pujurainia nuka, mankartinkia, ántar-yus tikishmatniuka, tura ashí shuar wáitian wararainiak tuke túrinainia nuka āā matsatainiak penké wayāchmin áiniawai.

¹⁶ “Wi, Jesus, ashí Yus-shuaran ujakarat tusan winia suntarun akupkajai. Wikia Tawit Weeitjai. Túrasha Tawitia Úuntrintjai. Wikia ti tsáapin yaa, yánkuamia áintsanketjai.” Tu tawai.

¹⁷ Yusa Shiir Wakanísha tura Murik anajmarmasha “Winitiarum” tuiniawai.

Tura júna ántana nusha “Winitiarum” tití. Tura ashí kitiama nuka winití. Wakerakka tuke iwiaaku pujutai entsan penké kuítchajai umartí.

¹⁸ Ashí shuar jú papinium Yus-Chicham aarma nuna antukarun júna ujaajai: Shuar júi áarman chikichan pataakka Yus nin ti wáitsatin júi aarma nuna patattsattawai. ¹⁹ Núnisā shuar júi aarman emeneakuinkia Yus ni naarín iwiaaku pujutai papiniumia japirattawai. Tura ti shiir péprunam wayatniun suritkiattawai. Nu péprusha tura nu papisha júi paant ujakma áiniawai.

²⁰ Jú papí áantratniun ujakua nu tawai “Eta, ti wari winittiajai.”

Pai, núnisā atí. Wari winitia, Uunt Jesúsá.

²¹ Ii Uuntri Jesukrístu atumniasha shiir yainmakarti.

Nuke atí.